


QVID NON MORTALIA PECTORA COM

AVR. SAGR. F. M. T. A.



HISTOIRE

DES

GVERRES CIVILES DES ESPAGNOLS DANS LES INDES;

Causées par les Souffleuemens des PICARRES, ET DES
ALMAGRES; suivis de plusieurs Desolations, à peine
croyables; Arriuées au PER V par l'Ambition, & par
l'Auarice des Conquerans de ce grand Empire.

*Escrite en Espagnol par L'YNCA GARCILASSO
DE LA VEGA;*

Et mise en François, Par I. BAYDOIN.



A PARIS,
Chez AVGVSTIN COVRBE', au Palais, en la Gallerie
des Merciers, à la Palme.

ET
Chez EDME COVTEROT, rue S. Jacques, à l'Enseigne
du bon Pasteur.

M. DC. L.

Avec Privilege du Roy.





A MONSEIGNEVR
SEGVIER,
CHANCELIER
DE FRANCE.



ONSEIGNEVR,

*IE ne sçay si ie n'ay point mauuaise grace, de vous
offrir en François l'Ouurage d'un Indien, qui l'ayant escrit
en Espagnol, semble m'aduertir, qu'il est à croire que vous*

EPISTRE.

L'aurez déjà veu en sa Langue, & qu'ainsi Vous n'avez
 pas besoin de le relire en la nostre. Quoy qu'il en soit neant-
 moins, ie me persuade, MONSEIGNEVR, qu'en la
 Version que i'en ay faite, peut-estre y trouueréz vous en-
 core quelque sorte d'agrément, qui Vous le rendra re-
 commendable, pour le grand nombre de Relations utiles,
 & d'Histoires serieuses qui s'y rencontrent à tout propos.
 Comme dont elles ne semblent pas moins estranges qu'elles
 sont extraordinaires; Cela me fait croire que vostre Gran-
 deur n'y trouuera point un petit Sujet d'estonnement;
 quand elle y verra les Conquerans du PERU, s'armer à
 la perte d'un si puissant Empire, pour satisfaire leur Am-
 bition Tyrannique. Mais, MONSEIGNEVR, Vous
 serez encore bien plus estonné de les voir eux-mesmes,
 avecque toutes leurs Forces, contrainsts de ceder à la force
 de l'Esprit de trois ou quatre Ministres de la Justice, hau-
 tement loüez dans cette Histoire. Aussi estoient-ils sans
 doute, des Hommes de Cœur, d'eminent Sçauoir, d'exqui-
 se Prudence, & tels en un mot qu'ont tousiours esté vos
 Glorieux Predecesseurs, ou tels que vous estes, par vo-
 stre inclination propre, & par leur Exemple. Que s'il
 est vray, MONSEIGNEVR, qu'à former un excel-
 lant Homme, doiuent necessairement contribuer deux cho-
 ses exquisés; l'heureuse Naissance; & la bonne Conduitte;
 dont la Nature fait la premiere, & l'Industrie donne la
 seconde; Peut-on douter que possédant l'une & l'autre
 ensemble, Vous ne possediez aussi toutes ces autres Quali-
 tez Illustres, par qui les grands Hommes cessent d'estre
 Mortels, en faisant comme Vous des Actions immortel-
 les? La plupart de ceux qui ne fondent leur gloire qua

E P I S T R E.

*Sur les Vertus de leurs Ancestres, louent bien souvent ce qu'ils ne possèdent pas eux mesmes. Il n'en est pas ainsi de Vous, MONSEIGNEUR, Vous encherissez par vostre Vie sur la Vertu de vos Peres; Leur Probité s'est toujours fait admirer dans les grands Emplois: mais la vostre est encore plus admirable dans la principale de toutes les Charges de la Robe. Il s'est trouué parmi-eux des Aigles, en matiere d'Esprit, & des Lions, en matiere de Courage. Tel fût il y a six cens ans vn des plus fameux Paladins de la Terre Sainte, signalé entre les autres, tant pour sa propre Valeur, que par le Nom de SEGVIER. Il estoit Escuyer, & des Principaux Confidans du grand GODOFROY, comme le tesmoignent ces vers du Tasso.**

Onde riuolto dice al buon SIGIERO,
 Che gli portaua vn'altro Scudo, e l'Arco,
 Hora mi porgi, ô fedel mio Scudiero
 Coteſto meno assai grauoſo incarco;
 Che tentarò di trapassar Primiero
 Sù dirupati sassi, il dubio varco,
 E tempo è ben, ch'alcuna nobil'opra
 De la nostra Virtute homai si scopra.

* Dans
 la Ieru-
 salem de-
 liurée,
 Chant.
 11.
 Stance
 53.

*Parolles, qu'il me souuient d'auoir autresfois ainsi traduittes; Puis se tournant vers le bon SEGVIER, qui luy portoit vn autre Arc, & vn autre Escu; Mon fidelle Escuyer, luy dit-il, donnez moy maintenant ce Fardeau, qui ne me sera pas si pesant, afin qu'avec moins d'incommodité ie puisse monter par les ruïnes de cette Brèche: Car il est temps deormais que nous donnions icy des preuues de nostre Courage. Et plus auant il ad-
 joust; Que SEGVIER, pour auoir fait Bouclier de*

E P I S T R E.

son Corps, l'opposant au Iauelot lancé par Argant à GODOFROY, en fut luy-mesme percé à la gorge; & tomba tout à l'instant à ses pieds, sans auoir regret à sa Mort, apres auoir si genereusement sauué la Vie à son Maistre; *Ce que le mesme Poëte décrit ainsi.*

Chant.

11.

Stance

80.

L'hasta, ch'offesa hor porta; & hor vendetta,
Per lo noto sentier vola, e rivola
Ma gia colui non fere oue e diretta :
Che gli si piega, il capo al colpo invola ;
Coglie il fedel SIGIERO, il qual ricetta
Profundamente il ferro entro la gola :
Ne gli rincresce del suo caro Duce
Morendo en vece, abandonar la Luce.

D'où il paroist assez, ce me semble, que ce n'est pas d'aujourd'huy que les SEGVIERs tesmoignent leur Zele, & leur grand Courage, iusques au point de s'immoler eux-mesmes dans les occasions d'Honneur, en celles sur tout où il y va de la Gloire de DIEV, & du service du PRINCE. Ces deux choses, MONSEIGNEVR, leur ont tousiours esté si precieuses, & Vous sont aujour-d'huy si considerables, que Vous faites comme eux de l'une & de l'autre, tout vostre entretien, & vos plus cheres delices. Car sans m'arrester à dire, que les Vertus qu'on appelle Morales, semblent estre nées avecque Vous, qui ne voit combien d'assiduité Vous apportez à cultiuer les Chrestien-nes ? Peut on mettre en doute que la PIETÉ n'ait un esyle chez Vous, aussi bien que la JUSTICE, dont vostre Maison est le sacré Temple ? N'est il pas vray que Vous trauallez, sans vous laisser, à la conseruation des Autels dressez, & à l'observation des Loix establies ? Par elles,

E P I S T R E.

elles, *MONSEIGNEUR*, ainsi que par de fortes Colomnes, Vous affermissiez le Culte de *DIEU*, & l'Obeïssance que nous devons tous au Roy; Comme par elles mesmes, Vous mettez vn ordre aux choses qui n'en ont point, & vne distinction veritable entre les gens de bien, & les Meschans, dont vous attirez les vns par l'amour de la Vertu, & retenez les autres par la terreur de la Peine. Il ne faut donc pas s'estonner de tant de grands & d'heureux Succes que Vous faites naistre dans les Affaires les plus hazardieuses, qui vous occupent sans cesse pour le salut de la *FRANCE*. Car, à vray dire, vos soins infatigables pour elle, se peuvent nommer des Travaux d'*Hercule*, & des efforts de *Caton*. En vous comme en eux, le Courage & la Prudence agissent ensemble. L'un eût à combattre diuers Monstres; Et l'autre en vn seul Monstre, qui estoit le menu Peuple, sorty de la lie de *Romulus*, en combattit plusieurs, qui luy donnerent bien de la peine. Il leur resista pourtant; picqué beaucoup moins de leurs outrages; que de l'Honneur de sa Charge. Ainsi *MONSEIGNEUR*, dans l'Ascendant de la Vostre qui ne sçait combien dignement vous imitez ce Sage Romain, à soutenir par vne haute Vertu la violence d'une basse Multitude? Quelque tempeste qu'elle esmeue; elle est enfin contrainte de ceder à l'Adresse que vous apportez à la calmer. Vous sçavez mieux que personne, qu'encore que le Pilote ne soit point Maistre du Vent, il ne laisse pas toutesfois de le combattre, quand il le faut; iusques-là mesme, qu'il l'assujettit souuent à son Art, par vne ingenieuse & adroitte resistance Vous en faites de mesme, *MONSEIGNEUR*; Et cette Merueille est en effet

EPISTRE.

une véritable preuve, non seulement de la grandeur de vostre Ame, mais encore de la Bonté de vostre Esprit, & de la force de vostre Ingement. Ces Guides inseparables vous mettent en sécurité dans les Chemins les moins aisés à tenir; & vous tirent du Labyrinthe des plus grandes Affaires, où ceux qui n'en suivent pas le fil, demeurent souvent embarrassés, & même perdus. Ce n'est pas MONSEIGNEUR, ce que vous devez apprehender, dans les Emplois mêmes les moins plausibles. Pour grands qu'en soient les Obstacles, ils vous rassurent, plutôt qu'ils ne vous effrayent. Les Ames fortes, comme la vostre, élevées aux Dignités les plus sublimes, en soutiennent l'éclat constamment, & sans en être éblouies; Au lieu que les Esprits faibles, même dans les Emplois médiocres, si de hasard il s'y rencontre le moindre Brillant, en sont incontinent aveuglés. Ainsi l'Aigle regarde fixement le Soleil au lieu que le Papillon se perd, à la lueur du moindre Flambeau. Or comme l'Experience, & la Pratique du Monde vous ont appris dans les Conjonctures bonnes ou mauvaises, ce que peut une judicieuse Conduite; Aussi la faites vous si bien valoir en toutes vos Actions, que sans vous arrêter aux sentimens de ces faux Sages, qui donnent tout au Hazard, vous n'agissez jamais que par la Raison: Car c'est elle seule que Vous opposez à la Fortune; impérieuse, & vaine Maîtresse, qui se vante insolamment de tout faire, & de tout gouverner à son mode.

Dans un si vaste sujet d'un Eloge véritable, & digne de Vous; pourrais-je bien, MONSEIGNEUR, pour ne point déplaire à vostre Modestie, faire des Loü-

E P I S T R E.

anges, qui Vous sont si iustement deuës, & n'offencer point la Verité, qui les publie si hautement par la bouche de tant de Personnes irreprochables? Elles disent avec moy, Que vous estes à la France ce qu'ont autresfois esté à l'Ancienne Rome, les plus celebres Legislateurs que le Senat ait produits; Ce que luy sont encore auourd'huy dans le Sacré College, ses plus inuiolables Ministres; Et ce que doiuent estre generalement à tous les Estats les mieux policez, ceux qui en ont la Conduitte, Et que leur vray Zele au bien du Publicq, fait appeller à bon droit Conseruateurs, & Peres de la Patrie.

• D'ailleurs, MONSEIGNEVR, vos Actions si Chrestiennes, vos soings genereux, & vos Bien-faits, sensibles à tant d'Illustres Infortunez, ne sont-ils point les Herauds de vostre Gloire? Ne la font-ils pas scauoir à toute la Terre? Et n'est-ce point par eux aussi que Vous estes

Bona notus super æthera Famâ?

Car c'est en effet la bonne Renommée, & non pas la mauuaise, ou la fausse, accoustumée, comme l'on sçait, à publier le Mensonge, plustost que la Verité, qui employe pour Vous, MONSEIGNEVR, non seulement ses Voix, & ses Langues, mais ses Plumes encore. Elle se les arrache avecque plaisir, pour les donner à l'Histoire; qui en escrit de sa propre main les hautes Merueilles de vostre Vie. A quoy ne pouuant suffire elle seule, elle a pour se soulager dans vn si noble Travail, diuers Secretaires qui la seruent. Je doy m'estimer bien glorieux d'estre de ce nombre, & d'en tirer aduantage; puis qu'il est vray, MONSEIGNEVR, que mes Escrits ne

ÉPISTRE.


*ſçauroient auoir ny vn Employ plus Illuſtre que celui
de vos Louanges, ny vne protection plus favorable que
celle de voſtre Nom. Comme ce leur eſt donc vne gran-
de Gloire de ſe produire au iour à la faueur d'un Nom
ſi celebre; Ce m'eſt auſſi vn Bon-heur extreme de me pou-
uoir dire, en vous les dediant*

MONSEIGNEVR,

DE VOSTRE GRANDEVR


*Le tres-humble, tres-obeiſſant, &
tres-obligé ſeruiteur.*

I. BAUDOIN.



AVANT-PROPOS A V LECTEUR,

TOUCHANT CETTE HISTOIRE.

ES Hommes sont la plus-part du temps d'une humeur estrange: Les vns admirent tout indifferamment: Si bien que l'Admiration, qu'on nomme d'ailleurs, *Mere de la Science, & de la Sageſſe*, est en ceux-cy bien souuent, *Fille de l'ignorance, & de la Folie*: Les autres au contraire n'admirent rien; & tels sont pour l'ordinaire certains Esprits de haute volée; mais trop presomptueux aussi, qui se persuadent qu'il n'est point de Nouveauté pour eux, peut estre pour auoir leu, *Qu'il n'y a rien de nouveau sous le Soleil*. Mais quelque bizarre sentiment qu'ils ayent de ce costé-là, si faut-il apres tout qu'ils auoient, qu'au Siecle de nos Peres, & au nostre mesme, se sont manifestées & se manifestent tous les iours de nouvelles Merueilles, qui semblent, à vray dire, tout à fait dignes de l'Admiration des Personnes raisonnables. Telle est entre les autres la Descouverte du Nouveau Monde, & particulièrement celle du Peru, que ie trouue d'autant plus admirable, qu'elle s'est faite par douze fameux Auanturiers, qui bien à peine eurent mis le pied dans ces riches & grandes Pro-

A V A N T - P R O P O S

uinces, qu'ils entreprirent de les conquerir, comme ils les cōquirent aussi. De vous dire maintenant LECTEUR, comment cela se pût faire, c'est ce que ie me suis proposé de monstrier dans la Version de ce Liure.

Ie l'ay faite en suite du *Commentaire Royal des Yncas*, composé en Espagnol par le celebre GARCILASSO DE LA VEGA. Ce Premier Volume ayant esté déjà imprimé, ie vous donne icy la Continuation & la conclusion de tout l'Ouurage par le mesme Autheur. Dans son Commentaire il a descrit assez au long, ce me semble, l'Origine des Rois Yncas, le merueilleux Esprit de celuy qui aspira le premier à ce haut titre d'Honneur, son Arriuée au Peru, l'Estat déplorable où il le trouua, la Brutalité de ses Habitans, leur Idolatrie, leurs Sortilèges, leurs Sacrifices abominables, leurs Superstitions, leur Rage obstinée à respandre le sang humain, à s'entretuer, à se manger l'un l'autre, & pour tout dire en vn mot, l'estrange Desbordement de leur Vie, digne sans doute de la Reformation, & du bon Ordre qu'y apporta leur nouveau Seigneur. Car les ayant rangez d'abord à la seule Adoration du Soleil, dont il se disoit Fils, il chargea leurs Loix & leurs Coustumes, ou mesme il les abolit, & leur en donna de meilleures. Il leur apprit en suite les Vertus Morales, Politiques, & Militaires, qu'il sceut si bien pratiquer luy-mesme, que par elles il conquist vne grande estenduë de Pais, dont il se fit Souuerain. D'où il aduint qu'après sa Mort, la possession qu'il en prit durant sa Vie, passa de luy à ses Successeurs, qui en iouïrent depuis plus de cinq cens ans, iusques à la prise d'Atahualpa, Prince mal-heureux s'il en fut iamais, à qui les Espagnols venus de loing à son grand dommage, osterent la Vie, & en suitte l'Empire.

A V L E C T E U R.

Ils ne crurent pas plustost l'auoir gaigné, que l'Ambition & l'Auarice allumerent entre-eux les Guerres Civiles, comme il aduint autres fois aux Capitaines d'Alexandre le Grand, pour n'auoir pû apres sa Mort précipitées'accorder entre-eux du partage des Terres conquises. Ce fut alors que les Peruvians virent avec estonnement ces nouveaux Hostes, qu'ils appelloient Sauvages, à cause de leur longues Barbes, & Hommes vestus de Fer, pource qu'ils estoient Armez de toutes pieces. Mais ils furent encore bien plus estonnez de voir par eux-mêmes leurs Familles desolées, leurs Villes mises à feu & à sang, leur Temples démolis, les Tombeaux de leurs Peres indignement violez, & tous ces maux ne leur estre faits par ces Inconnûs, que pour assouuir l'insatiable faim qu'ils auoient des Richesses de ce nouveau Monde.

Comme i's eurent donc, avec vne peine qui n'est pas imaginable, fait passer la Mer à l'Auarice, & à la Conuoitise d'auoir de l'or, ils en trouuerent enfin la source dans le Peru sa Terre Natale. Ils l'arracherent alors du profond de ses entrailles, & quelque grande qu'en fut l'abondance, ils ne pûrent se lasser de l'enuahir, ny s'en assouuir encore moins. A leur exemple, pour appliquer icy fort à propos la pensée du Poëte Tragique; *Tout le Monde a voulu se hasarder sur la Mer, & nauir guer mesme par des Routes inconnuës. Les vagues ont obeï depuis, non seulement à des Rois, mais à leurs sujets; Et sans distinguer ny rang, ny condition, elles ont receu des Loix de tous les hommes en general. Leurs courses ne sont plus maintenant les bornes des Mers; on a basti de nouuelles Villes en des Terres inconnuës; & n'est pas iusques au* Seneque,
en la
Medee.

AVANT-PROPOS

moindre coin du Monde qui n'ait esté vifité. Ainfi s'est verifiée affeurement en diuers Voyages des Espagnols, cette Prediction du meſme Autheur, Qu'il viendrait vn temps auquel l'Auarice feroit rompre aux Hommes tous les obſtacles de l'Ocean, Qu'ils decouueroient vne ſpacieuſe eſtendue de Terre, que Typhis verroit de nouveaux Mondes, & que la grande Bretagne ne ſeroit plus la derriere, ny la plus reculée partie du Septentrion.

Voila, LECTEUR, vn ſentiment, qui pour eſtre Poëtique n'eſt point Fabuleux pourtant, puisque les Euenemens qu'on en voit de iour en iour, en ſont des preuues indubirables. Car en eſſet, n'eſt-il pas vray que depuis ſix ou ſept vingts ans ſeulement, ont eſté decouuertes dans les Indes, tant Orientales, qu'Occidentales; diuerſes Prouinces, que nos plus celebres Pilotes n'auoient pas encore connuës, & où peut-eſtre ils n'auroient iamais priſ terre, ſi la violence de la Tempeſte ne les y eug iettez hazardeuſement, par ie ne ſçay quel Deſtin, & par vn Naufrage ſalutaire?

Ce fut à peu près de la meſme ſorte, qu'aborderent au Peru les premiers Conquerans de ce grand Empire: Heureux Argonautes, ſelon le Monde, d'auoir decouuert la vraye Toiſon, dont ils ont fait leur Deuiſe, & de ſ'en eſtre emparez par la Ruze, en ſe faiſant Maiſtres du plus ſouhaittable Païs, que leur pouuoit offrir leur bonne Fortune. Car ils le trouuerent, comme i'ay dit n'aguere, ſi plein de Richèſſes, qu'il en a fourny depuis, & en fournit encore aujourd'huy tout noſtre vieux Monde. Il les donne meſme avec tant de profuſion, qu'on peut dire veritablement, qu'en ſes Mines & en ſes riches Montagnes, s'engendre en eſſet cette precieuſe

Pierre

A V L E C T E V R.

Pierre dont les Chimistes font tant d'estat, quand ils se persuadent de pouuoir changer en Or vne Mer qui seroit toute de Mercure;

Pulueris exigui iactus.

Mais ç'a esté sans doute par la Vertu secrette d'une autre Poudre bien plus raffinée, qui est celle du Canon, & des Armes à feu, que les Espagnols ont trouué la Pierre Philosophale. Ce Soulfre deuorant & incombustible, comme quelques-vns l'appellent, leur a donné la vraye Poudre de Projection, qui germe insensiblement dans les Cachots de la Terre. C'est d'où les Indiens deuenus Esclaues de leurs nouueaux Tyrans, sont par eux contraincts à force de fer & de feu, de tirer ce puiffant Roy des Metaux, pour l'exposer au Soleil qui luy a donné l'estre. Mais pour se vanger de l'outrage qu'il croit luy estre fait par l'Auarice de ceux qui l'enleuent iniustement d'un lieu, qui tout obscur qu'il est, ne laisse pas de luy estre naturel; quelles malheurs estranges, & quelles tragiques Aduentures ne cause-t'il point parmy-eux par le cruel & funeste embrasement des Guerres Ciuiles?

Vous en verrez, LECTEUR, les diuers effets dans cette Histoire, diuertissante à merueilles, & où l'Auteur s'estudie de faire jouër leur roolle en cette Scène aux principaux de ceux qui en sôt les veritables Acteurs: Là vous verrez disje, par un estrâge Caprice de la Fortune, des Valets deuenus Maistres, des Maistres soumis à des Valets, de bons Capitaines vendus meschamment par des soldats perfides deuenus tout à coup Capitaines. Quoy plus? Vous y trouuerés les plus sages dans le Mespris, les Factieux dans l'Estime; les Traistres comblez de biens, & les plus fidelles sans recompense. Que si

A V A N T - P R O P O S

vous voulez encore voir sur ce Theatre ce que peut la patience irritée; là se presenteront à vos yeux des Indiens desesperez, & qui du haut des Montagnes, où ils se tiennent en embuscade, font rouler en bas sur les Espagnols de pesantes masses de Rocher, sous lesquelles eux & leurs Cheuaux sont partie escrazez, partie precipitez dans des Fondrieres, où ils demeurent enseuclis.

Là semblablement paroistront en foule deuant vous, des Rebelles à leur Prince, & des Mal-conténs; ceux-cy remis à leur deuoir par la crainte de la peine, & ceux-là rangez à l'Obeyssance par la bonne cōduitte d'un homme seul, le President Gasca principal Ministre de la Iustice, là mesme parmy plusieurs Prisonniers illustres, vous verrez les vns enuoyez sur Mer, pour y seruir à leurs despens l'Armée Royale, & les autres exilez en des terres inhabitées, ou l'intemperie de l'Air, & la sterilité du Pays, les font mourir de froid & de faim, au milieu de l'Abondance de leurs Tresors inutiles. Mais vous y remarquerez sur tout, au dernier Acte de la Piece, l'inconstance de la Grandeur humaine, en la Personne de deux puissans Gouverneurs, deuenus Chefs de Party, & Ennemis irreconciliables. Il faut que l'aduoüe, que l'esclat de leur Fortune m'esbloüit, quand parmy les Conquestes & les Triomphes, ie me les represente dans cette Histoire, couuers de Lauriers, chargez de Tresors, & adorez à l'enuy des gens de Guerre. Mais à reuolution estrange! que leur arriue-t'il en suite de ces prosperitez si hautes? Vn coup formidable de Nemesis irritée, qui les reduit à porter leur teste sur vn Eschaffaut, où ils meurent si Pauures, apres auoir esté si Riches, que l'un est enseuely dans ses habits, à faute de quelque meschant

drap; & l'autre, pour en auoir vn, où charitablement on l'enſeueliſſe, demande publiquement l'Aumofne.

Vous me dites là deſſus, Lecteur, qu'il ne ſe peut rien imaginer de ſi funeſte, que la fin malheureuſe de ces deux Chefs. En voicy pourtant vne plus tragique, & par conſequent plus lamentable. C'eſt la Mort violante de l'infortuné *Tupac Amaru*, pour qui, quand on l'executa, les moins ſenſibles à la pitié, teſmoignerent auoir vne ſecrette tendreſſe. Soit que le Vice-Roy Dom François de Toledé, ſ'imaginàſt follement, de pouuoir par vne Action ſi noire, apporter vn nouveau luſtre à ſa Reputation, ſoit qu'il fit vanité de croire, qu'il en ſeroit mieux venu près de l'Empereur ſon Maiſtre, tant y a qu'il employa toute ſorte d'artifices à faire ſortir hors des Montagnes ce pauvre Prince, qui ſ'y eſtoit exilé volontairement afin d'y eſtre à couuert de la violence des Eſpagnols. Auſſi en ſortit-il en eſfet, & entra depuis dans Cozco où il fut receu avec beaucoup de magnificence & de pompe. Mais le Vice-Roy, qui ne cherchoit qu'à ſ'en defaire, luy ſuppoſa pour cette fin diuers faux Teſmoins, qui l'accuſerēt de pluſieurs Crimes, dont il eſtoit innocent, le voylà donc condamné à perdre la teſte, ſans que les larmes ny les Prières des ſiens pūſſent iamais flechir ſon rigoureux Iuge. Au contraire, apres auoir inhumainement oſté la Vie à l'Heritier legitime de la Couronne des Yncas, il ne traita guerre mieux ceux qui reſterent de la Famille Royale. Car il les banniſt ſi loing les vns des autres, en des Montagnes deſertes, qu'ils y moururent preſque tout de miſere ou de melancholie. Le Vice-Roy cependant ne ſe réjouyſt pas moins de leur perte, que de quelque Vi-

AVANT-PROPOS

toire gaignée, ce qui fit, que pour la publier hautement, il reprit vn peu apres la route d'Espagne. Comme il y fut de retour, il s'en alla salüer l'Empereur, qui avec vne mine seuer, luy demanda, *s'il auoit en ordre de respandre le sang des Princes?* Et luy dit en suite, qu'il eût à se retirer. Ce qui fut sans doute vn rude Commandement à Dom François Mendoza, ou pour mieux dire, vn coup fatal & mortel, puis qu'à quelque temps de là, vne si fascheuse Disgrace mit fin à sa Vie, par qui se finit aussi cette Histoire generale de l'Empire du Peru.

Ne la parcourez point, ie vous prie, Lecteur, mais lisez-là tout de suite, & meditant là dessus, n'imitiez point ces impatiens, qui engloutissent les Liures, tant ils ont peur d'en estre ennuyez. Tellement que ce n'est pas merueille, s'ils n'en peuuent gouter les bonnes choses, ny les digerer encore moins, & profiter de cette Lecture superficielle, non plus que l'estomach des viandes dont on le voudroit remplir à la haste, & sans les mâcher. Je vous aduertis encore de ne vous rebutter point des Noms propres des Peruiens & de leurs Prouinces, ny de tous les autres generalement, qui sont de la Langue de ces Peuples des Indes. Ce que ie ne vous dirois point, si tels Noms, à ce que i'en ay sçeu, n'auoient choqué d'abord quelques Esprits delicats pour les auoir leus d'as-
des Tuncas Rois du Peru
le *Commentaire Royal*. Mais encore leur sçay-ie bon gre de n'auoir eu pourtant qu'une tres-haute opinion d'un Liure si rare; En cela bien esloignez du sentiment trop austere de quelques-vns, qui me voulurent dernièrement faire accroire, que *sans nous amuser à ces Pancartes des Antipodes* (c'estoient les termes dont ils vsoient) nous pourrions nous entretenir plus vtilement de la

AV LECTEUR.

Lecture de nos Annales, comme si nous estions obligez par sermēt de ne lire iamais d'autre Histoire que celle de nostre Pais. Mais en voicy vne, qui les fera peut-estre desdire d'une opinion si absurde, & si mal fondée. Que s'ils ne le font, cela me doit estre indifferant, puis que ce n'est pas à leur Iugement, mais au vostre, iudicieux Lecteur, que ie me rapporte du prix de ce Liure. Traitez le donc fauorablement, & en excusez les fautes, puis qu'asseurement il n'en est pas exempt. Je parle des miennes, aussi bien que de celles de l'Imprimeur, dont les principales sont celles-cy.

Par tout où vous trouuerez Carate qui est vn nom propre, lisez *garate*, avec vn ç à queüe. Plus en la page 31. *si vous voulez dire*, ostez *dire*. p. 49. à l'*Ambassadeur son Frere*, adioustez *fut vn peu plus bas ostez fut*. p. 59. les *lis*. le p. 105. *mais vn trait*, *lis*, *mais ce fut vn trait*. p. 109. *de ses derniers*, lisez *de ces*. p. 164. *amassez tout ce que vous*. p. 176. *qu'il*, lisez *qui*. p. 196. *Chile*, *lis*. *Chily*. p. 229. *estourdis par terre*, *lis*. *estendis*. p. 252. *nous cedions a*, *lis*. *nous au- rions*. p. 257. *ia le prendre*, *lis*. *à le prendre*. p. 292. *pource qu'il mit*, *lis*. *qu'elle*. p. 293. *que ce mesme Cavalier*, ostez *mesme*. p. 320. *à quoy* *lis*. & p. 359. *& est*, *lis*. & *c'est*. p. 364. *Cituda*, *lis*. *Ciudad*. p. 435. *par lis*. *pour*. p. 436. *a fait apres*, *lis*. *expres*. p. 542. *en l'adresse*, lisez & *en*. p. 551. *se trouuant diuers*, *lis*. *se trouuerent*. p. 553. *Et ainsi qu'a- pres cette*, *lis*. *apres ceste*. p. 581. *bastirent*, *lis*. *battirent*. page. 597. *non consent*, lisez *consans*. p. 622. *à ce Gongalo*, *lis*. *à ce que*.

LE SENTIMENT

DE DEUX EXCELLANS

AUTHEURS MODERNES,

touchant les PERUVIENS, & les YNCAS.

MONSIEVR LE CHANCELIER BACON

*en son Liure intitulé Aduis sur le sujet d'une
Guerre Sainte.*

LES Peruuïens, ou les Peuples du P E R V, quoy qu'ils fussent comme nuds, selon le Clymat, & qu'ils eussent mesme des Coustumes fort barbares; si est-ce que le Gouuernement des YNCAS se faisoit considerer à bon droict par la Douceur, & l'Humanité, qui se trouuoient esgalement iointes en eux à la conseruation Ciuile. Ils auoient reduit les Nations d'une multitude d'Idoles à la seule Adoration du Soleil. Dans l'estenduë de leur Empire se voyoient des Temples à leur mode, extrêmement riches & magnifiques. Leur Police estoit exacte; iudiciuse, & tres-bien reglée. Les Sujets gardoient ponctuellement à leurs Rois l'Obeysance & la Foy. Quoy plus? Ils obseruoient les Formalités d'une Iustice qui se pouuoit dire Martiale, ou

LE SENTIMENT &c.

Militaire, par eux pratiquée enuers leurs Ennemis propres, ausquels pour leur commun bien, ils offroient leur Loy comme meilleure, auant qu'ils en vinssent aux mains les vns contre les autres. A leur Gouuernement ressembloit encore à peu pres celuy de la Mexique, qui estoit vne Monarchie Electiue. Car quant aux Orientaux, & particulièrement à ceux de Goa, de Calicut, & de Malaca, c'estoient des Peuples gentils, espargnans, & toutesfois magnifiques, quoy qu'ils ne fussent pas Soldats &c.

Et plus auant dans le mesme Traitté il adjouste.

Vous auez leu ie m'asseure GARCILASSO DE LA VEGA, qui pour estre descendu luy-mesme de la Race des YNCAS, en qualité de Mestif, deuoit bien par consequent s'estudier à faire valoir de tout son possible, les Coustumes & les Vertus de ceux de son Pais propre; Et qui toutesfois le fait sobrement, bien qu'aucc assez de vray-semblance. Mais sans rechercher plus auant ce qu'il en pensoit, ie ne suis pas homme à me laisser persuader aisément, que telles Nations, qui tiennent encore de la Barbarie, ne puissent estre subjuguées selon la Loy de Nature, par d'autres Peuples plus civilisez, quand mesme ils n'auroient qu'une forme de Police, qui fut raisonnable, & accompagnée des Vertus Morales.

Laisant donc à part la Propagation de la Foy, de laquelle nous parlerons en son lieu, ie dis qu'au Temps que ces Idolatres viuoient en Bestes assure-

ment leur Nudité (la pluspart de ceux du Pays n'ayant alors ny couerture ny voile) effaçoit en eux le Caractere de la Raison, & monstroit qu'ils auoient perdu cette pudeur honneste, qui est naturelle à toutes les personnes bien nées, & qui ne sont ny Brutales, ny Vicieuses. Car ce fut cette mesme Nudité, qui fit rougir nos premiers Parens, apres le Peché par eux commis; Et l'Herésie des Adamistes à tousiours passé pour vn Affront fait à la Nature. Mais ie ne m'arreste point à toutes ces choses, ny à l'humour idiote des Peruviens, qui croyoient autresfois que les Cheuaux mangeoient leur frain, & que les Liures parloient; ny mesme à leurs Sorcelleries, qui sont ordinaires à toutes les Nations Idolâtres. Il me suffit de dire, que leurs Sacrifices, sur tout en ce qu'ils s'entre-mangeoient, estoient si abominables, qu'il me semble que quiconque a le visage d'un Homme, n'osera iamais nier qu'il n'ait esté loisible d'envahir leurs Estats, comme confisquez par les Loix de Nature, ou de les transplanter, & déraciner. Que cela s'éloigne de moy pourtant, de vouloir en aucune façon iustifier les cruautés & les barbaries, dont les Espagnols vsèrent au commencement contre ces Peuples par eux domptez: Aussi en furent-ils recompensez à la fin: car il n'y eût pas vn des principaux, & des premiers Conquerans, qui ne mourut de mort violante.

MONSIEUR

MONSIEVR GROTIUS,

dans son *Traitté de l'Origine des Peuples*
de l'Amerique.

LES Peruviens, qui ont l'Esprit poly, & propre au Gouvernement des grands Estats, ne tirent point, ce me semble, leur origine d'ailleurs que des Chinois, Peuples qui n'ont pas moins de Politesse qu'eux, & qui ne sont pas aussi moins capables d'avoir du commandement sur autrui. Nous sommes confirmés dans cette croyance de leur Origine, par les Relations que les Espagnols nous en ont laissées. Car ils disent qu'au bord de cette Mer qu'on appelle *Pacifique*, furent trouués il y a fort long-temps diuers desbris de quelques Nauires de la Chine. Et à vray dire, il ne faut pas s'estonner si le Hazard, ce grand coconome, par qui s'accroist & se conserue la Race humaine; ou la curiosité de descouvrir de nouvelles Terres, ietta fortuitement en Celles cy les Chinois, qui sont, à ce que l'on tient, grands Nauigateurs.

Les Peruviens adoroient le Soleil, avant que les Espagnols entraissent dans leur País : Les Chinois l'ont de tout temps adoré de mesme; & comme les Rois de la Chine se nomment Fils de ce grand Astre;

les *Yncas* aussi, Rois du Peru, disent que le Soleil est leur Pere. Les Peruvien, non plus que les Chinois, n'escriuent aucunement par Lettres; mais par diuerses Marques des choses, qui sont comme autant de Figures Hieroglyphiques, qu'ils tracent par colonnes, du haut du papier en bas.

Il me semble encore que vray-semblablement *Manco Capac* se pouuoit dire Chinois: car comme c'estoit vn Homme de grand Cœur, & de grand Esprit, il est à croire qu'ayant sceu par Relation, ou par conjecture, qu'il y auoit au delà de cette Mer vn fort bon Pais; mais dont les Habitans escartez les vns des autres, n'estoiēt gouuernez par aucun Chef, s'y en alla prendre terre, & vnist ensemble ces Peuples espars, dont il se fit Souuerain; puis sur le modèle de l'Empire de la Chine, il establisl sa Principauté, qu'il laissa hereditaire à ses Descendans. Que si maintenant quelqu'un s'estonne de ce que la Langue des Indiens Asiaticques nō plus que celle des Chinois, n'est point demeurée en son entier, ny en ces lieux maritimes, ny en toute la coste du Peru, ie n'ay qu'à le payer des mesmes raisons que ie viens de rapporter, touchant le changement qui s'est fait des Langues dās tout le Pais, qui est au deça de *Isthme de Panama*.

ANNOTATIONS.

I. *M*ais par diuerſes marques des choſes &c.] Je ne veux pas dire que Monsieur Grotius, cét excellent & merueilleux Eſprit, qui ſcauoit tant de belles choſes, ſe ſoit icy meſconté; mais ie dis bien que *Garcilaſſo de la Vega*, ny en ſon *Commentaire Royal*, ny dans cette Hiſtoire encore moins, n'a point fait mention que les Peruiens exprimaffent autrement leurs penſées que par leurs Nœuds, qui leur renoient lieu d'Eſcriture, dont ils n'auoient aucun Vſage, & leur donnoient les Notions neceſſaires, pour ſ'expliquer, & ſe faire entendre.

II. *Je n'ay qu'à les payer des meſmes raiſons &c.*] La principale de ces raiſons eſt, Que par la prononciation des Conquerans venus depuis au Peru, la Langue ſ'eſt corrompue, bien que neantmoins la pluſpart des mots Peruiens, ayent preſque meſme terminaifon que les mots Chinois.

PRIVILEGE DV ROY.



NOUS PAR LA GRACE DE DIEU, ROY DE FRANCE, ET DE NAVARRE : A nos Amez & feaux, Conseillers, les gens tenans nos Cours de Parlement, Maistres des Requestes ordinaires de nostre Hostel, Baillifs, Seneschaux, Preuosts, leurs Lieutenants, & à tous autres nos Iusticiers, & Officiers qu'il appartiendra, Salut. Nostre cher, & bien Amé JEAN BAUDOIN, nous a fait remonstrer qu'il a traduit vn Liure, intitulé *l'Histoire des Guerres Civiles des Espagnols dans les Indes, Seconde Partie du Commentaire Royal des Incas, Roys du Pérou, composé en Espagnol, par l'Inca Garcilasso de la Vega*; lequel Liure il desireroit faire imprimer pour l'utilité de nos Sujets, s'il nous plaisoit de luy accorder nos Lettres sur ce necessaires, humblement requerant icelles. A CES CAUSES, Nous auons permis, & permettons par ces presentes audit Baudoin, de faire imprimer, vendre, & distribuer en tous les lieux de nostre obeysance ledit Liure, en telles marges, en tels caracteres, & autant de fois que bon luy semblera, ou à ceux qui auront droit de luy, en vertu des presentes, durant l'espace de cinq ans entiers, & accomplis, à conter du iour que ledit Liure sera acheué d'imprimer, pour la premiere fois. Et faisons tres expresses deslences à toutes personnes, de quelque qualité, & condition qu'elles soient d'imprimer, faire imprimer, vendre ny debiter ledit Liure, durant ledit temps, en aucun lieu de nostre Obeysance, sans le consentement de l'Exposant, sous pretexte d'augmentation, correction, changement de tiltre, fausses marques, ou autrement, en quelque sorte, & maniere que ce soit, à peine de deux mille liures d'amande; payables sans deport par chacun des contreuenans, & applicables vn tiers à Nous, vn tiers à l'Hostel Dieu de nostre bonne Ville de Paris, & l'autre tiers à l'Exposant; de confiscation des Exemplaires contrefaits, & de tous despens, dommages, & interets. à condition qu'il en sera mis deux Exemplaire en blanc en nostre Bibliothèque publique, & vn en celle de Nostre tres cher, & feal le Sieur Segnier, Chancelier, Chancelier de France, auant que de les exposer en Vente; à peine de nullité des presentes; du contenu desquelles Noys vous MANDONS que vous fassiez jouir, & user pleinement, & paisiblement l'Exposant, & tous ceux qui auront droit de luy, sans qu'il leur soit donné aucun trouble, ny empeschement. VOULONS aussi qu'en mettant au commencement, ou à la fin dudit Liure, vn Extraict des presentes, elles soient tenues pour dûement signifiées, & que Foy y soit adioustée, & aux Copies, col-

lacionnées par l'un de nos Amez & feaux Conseillers, & Secrétaires, com-
me a l'Original. MANDONS au premier nostre Huissier, ou Sergent sur
ce requis, de faire pour l'execution des presentes tous Exploicts necessai-
res, sans demander autre permission. CAR tel est nostre plaisir, nonobstant
Clameur de Haro, Chartre-Normande, & autre Lettres à ce contraires.
DONNE à Paris le huitiesme iour de Ianvier, l'ande Grace mil six cens
quarante-six, & de nostre Regne le troisieme.

Par le Roy en son Conseil.

CONRART.

Acheué d'imprimer le 2. iour de Fevrier, 1650.

Les exemplaires ont esté fournis.

TESMOIGNAGE ILLVSTRE DE CE LIVRE

& de son Auteur, traduit de l'Espagnol.



'AY ven les huit Liures de cette Histoire, composée par l'Inca **GARCILASSO DE LA VEGA**, dont ie fay ce Jugement, sans interest, & sans flatterie. C'est un Ouvrage tres agreable, dautant qu'il parle de choses grandes, nouvelles, admirables, & auantageuses à nostre Nation; Tres bien escrit, pour n'auoir ny paroles superflües, ny raisonnemens trop longs, ny digressions ennuyenses; Tres clair, pource que l'ordre des Temps y est obserué, sans embarras, & sans equiuoque; Tres veritable, à cause que son Auteur est homme de foy, qui ne dit rien qu'il n'ait veu luy mesme, ou appris de personnes croyables; Et que d'ailleurs il obserue si ponctuellement les circonstances de la vraye Narration, qu'il rend par elles exempts de tout soubçon de Mensonge les merueilleux Euenemens qu'il raconte. A raison dequoy

*ie me persuade que ce Liure sera fort recherché ,
pour estre si rare ; fort bien receu, pour estre si uti-
le ; fort intelligible , pour estre si clair ; fort avant
dans la creance de ses Lecteurs , pour estre si ve-
ritable ; fort estimé d'eux , pour estre si excellent ;
Et sur tout fort propre à l'entretien des honnestes
gens , qui le peuuent lire seurement , Et sans scrupule,
pour n'y auoir rien qui soit contraire à la Foy,
Et aux bonnes Mœurs. Fait à Cordoue , dans le
College de la Compagnie de Iesus , le 26. de Jan-
vier, 1613.*

FRANCOIS DE CASTRO.





HISTOIRE

DES

GVERRES CIVILES

DES ESPAGNOLS,

DANS LES INDES.

LIVRE PREMIER.

SOMMAIRE.

TROIS ESPAGNOLS S'ASSOCIENT,
*pour aller à la Conquête du Peru ; Profit qui leur en
reuient , & travaux qu'ils souffrent pour descouvrir
cét Empire-là. Piçarre est abandonné des siens , à la re-
serue de treize , qui demeurent avec luy. Leur arriuée à
Tumpiz , & miraculeux euenement , que Dieu permet
pour auancer leur dessein. François Piçarre fait voile en
Espagne , pour y demander le país de Conquête. Son
arriuée au Peru , & ses travaux durant son voyage.
Ambassades diuerfes, entre les Indiens, & les Espagnols.
Emprisonnement d'Atabuallpa ; grande Rançon qu'il
promet. Dilligences des Espagnols pour l'auoir ; Mort
des deux Roys Yncas , & veneration rendue aux Es-
pagnols.*

TROIS GENTILS-HOMMES ESPAGNOLS aspirent à la Conqueste du Peru.

CHAPITRE I.

Liv. 9.



LE CRUEL *Atahwallpa* s'occupoit aux choses que nous auons dites en la premiere Partie de nos Commentaires, s'imaginant que par ses inhumanitez, & ses tyrannies, il pourroit s'affermir sur la teste vne Couronne qu'il auoit ambitieusement vsurpée : Mais il ne voyoit pas que ses propres violences feroient qu'elle luy seroit bien-tost arrachée par des Estrangers, dont il ne cognoissoit pas le nom. Comme en effect; en vn temps qu'il croyoit entierement fauorable à ses desseins; il fut estonné de voir les Espagnols à sa porte, où ils vinrent pour le precipiter de son Trosne, & luy oster ensemble l'Empire & la vie.

Pour auoir vne plus ample cognoissance de cette Histoire; il est necessaire que nous la recommencions par les euenemens de quelques années precedentes; & qu'ainsi remontant à sa source, nous en reprenions plus aisément le fil de nostre Discours. Il faut donc sçauoir que les Espagnols ayant descouvert le nouveau Monde, furent espris d'un si ardent desir de voyager en des Prouinces incognuës, & apres celles-cy d'en descourir encore d'autres plus nouuelles; qu'encore que la plupart d'entr'eux fussent riches; ne se contentant pas neantmoins de leur bonne Fortune, establie aux despens de tant de traux, d'incommoditez, de perils, de bleseures, de maladies, de mauuaisiours, & de pires nuits, qu'il leur auoit salu souffrir par Mer, & par Terre; ils s'exposoient volontairement à des hazards encore plus grands, pour passer plus outre dans leurs voyages, & s'immortaliser ainsi par leurs Exploicts heroïques. Cette genereuse ardeur de gloire fit naistre l'enuie de conquerir le Peru, à François Pizarre, natif de Truxillo, mais qui demouroit alors à Panama, personnage de noble Extraction, pour estre fort d'une Famille, qui a produit plusieurs Gentils-hommes signalez en cette Ville là, où ils auoient mesme nom que

luy. A cét honneur voulut encore auoir part, le vaillant Diego d'Almagre, du lieu de Malagon, selon Augustin de Carate, bien que Gomare soit d'opinion (ce qui est plus vray semblable) que le Bourg d'Almagre, dont il portoit le nom, fut le lieu de sa naissance. De vous dire au reste qu'elle estoit sa maison; cela me seroit difficile, pour ne l'auoir iamais sçeu apprendre: Mais apres tout, il vous doit suffire qu'il ait veritablement prouué sa Noblesse par sa Vertu, puis que c'est elle qui fait les Gentils-hommes, & que par le fruit on juge ordinairement de la bonté de l'Arbre.

Ces deux Caualliers estoient fort riches, & dans vne haute estime, pour les celebres actions qu'ils auoient faites en plusieurs autres Conquestes, principalement François Pigarre. Car en l'an 1512. il eut l'honneur d'estre Capitaine, & Lieutenant de Gouverneur dans la Ville de Huraua, lors qu'elle fût conquise & peuplée. A quoy i'adjouste qu'il fut Lieutenant General d'Alonse de Hojeda; & le premier Capitaine Espagnol, qui dans cette Prouince-là, fit des choses fort memorables en tous les lieux où il fut, & qui encourut plusieurs grands perils, comme le remarque succinctement Pedro de Ciega de Leon, par les paroles suivantes: *Après que cela se fut passé, le Gouverneur* Chap. 5.
Hojeda ietta les fondemens d'une Ville qu'il peupla de Chrestiens, au lieu qu'on appelle Hurabá, où il fit son Lieutenant François Pigarre, depuis Gouverneur, & Marquis: Et ce fut en cette mesme Ville que ce grand homme, & tous les habitans avec luy, souffrirent si constamment la faim; les incommoditez, & les maladies, qu'ils en firent à jamais loüables; & particulièrement leur Capitaine, &c. Il se trouua pareillement à la descouuerte de la Mer du Sud, avec Vasco Nunnez de Balboa, le plus fameux de tous les Guerriers de son temps; comme aussi en la Conquête de *Nombre de Dios*, & de *Panama*, avecque le Gouverneur Pedro Arias Dauila, comme le remarque Gomare dans son Histoire des Indes.

Mais apres auoir souffert tant de trauaux, François Pigarre, Ch. 145
& Diego d'Almagre, sans en estre rebuttez, tesmoignerent qu'ils estoient prests d'en souffrir encore de plus grands. A raison de quoy, sur vn simple bruit qui couroit des merueilles du Peru, ils s'associerent ensemble, & avec eux Hernand de Luquo, Re-
cteur* de Panama, & Seigneur de la Taboga, tilre dont il se * L'Es-

pagnol
l'appelle
Maestre
Scuelda.

qualifioit. Pour ce mesme effect ils passerent entr'eux vn contract d'association, par lequel ils promirent de ne se point fausser compagnie, de ne s'abandonner iamais l'un l'autre, quelques disgraces qui leur arriuaissent en ce voyage du Peru; & de partager en freres tout le gain qu'ils pourroient faire en cette Conqueste. En suite de cela ils conclurent que Hernand de Luquo demeureroit à Panama, pour y faire valoir le bien de tous trois; Que François Piçarre trauiilleroit à la descouuerture du País, & que Diego d'Almagre iroit, & viendroir, tantost à l'un, & tantost à l'autre, avec des Soldats, des Armes, des Cheuaux, & des prouisions de bouche, pour en assister les gens de Guetre qu'ils meneroient avec eux. Cependant on se moquoit de tous trois, & particulierement de Hernand de Luquo, qu'on appelloit *Hernand le Fol*, pour luy donner à cognoistre, & à ses deux Compagnons, qu'on s'estonnoit fort de ce qu'apres tant de peines souffertes, & en l'âge où ils estoient, le plus jeune d'entr'eux ayant passé 50. ans; ils auoient si peu de retenue que de s'aller abandonner à de nouueaux traux, en vn País qu'ils ne cognoissoient point, sans sçauoir s'il estoit riche, ou pauvre, try les moyens qu'il falloit tenir pour cette Conqueste là. Mais la bonne Fortune de ceux qui s'en preualent aujourd'huy, les appelloit, & les pouffoit mesme à cette entreprise, sans sçauoir à quelle fin; car Dieu le vouloit ainsi par sa Misericorde infinie, pour reduire ces Peuples Gentils dans le Giron de son Eglise, & leur faire prescher son saint Euangile, comme il se verra par plusieurs Miracles, qu'il luy pleût faire en faueur d'eux, en cette fameuse Conqueste.

DES EXCELLENCEs, ET DES GRANDs
deurs que l'Association des trois Espagnols a produittes.

CHAPITRE II.

LE Triumvirat conclu dans Panama par les trois Espagnols sus-nommez, me fait souuenir de celuy que trois Romains, des plus fameux de leur temps, firent autrefois à Layno, auprès de Bologne: Ils furent si differens neantmoins, que ce seroit extrauagance d'en vouloir faire vn parallele; pource que

celuy-là fut de trois puissans Chefs, & celuy-cy de trois pauvres particuliers; l'un pour partager entre eux tout l'ancien Monde, que les Romains auoient gaigné, afin d'en iouir paisiblement: Et l'autre pour traualier à la Conqueste du nouveau Monde, sans en sçauoir les moyens. Toutesfois si l'on sçait bien considerer les effectz, & les fins diuerses de tous les deux; on trouuera que l'ancien Triumvirat fut de trois Personnes qui tyranniserent tout l'Vniuers, & le nostre de trois hommes, si vaillants, & si genereux, que le moindre d'entr'eux meritoit d'estre Empereur, pour sa constance dans les trauals. Le Triumvirat des Romains eut pour but la desolation de toute la Terre, comme ils la desolerent en effect; au lieu que celuy des Espagnols l'a tellement enrichie, que la preuve s'en est veüe, & se verra encore tous les iours, comme il sera desduit plus au long dans les Chapitres suitans. Ce premier Triumvirat fut pour donner les Amis, & les Parens propres, en eschange des Ennemis, afin de se vanger d'eux: Et en ce dernier, ceux qui le firent n'eurent pour but que de se mettre au hazard de leur vie, pour obliger autrui. Car en effect il s'est veu qu'ils ont conquis à leurs despens de nouveaux Empires pour les Amis, & les ennemis, sans distinction aucune, puis qu'il se treuve aujourd'huy que les Chrestiens, les Gentils, les Iuifs, les Mores, les Turcs, & les Heretiques iouissent indifferemment de leurs trauals, veu que patmy eux s'espandent les Richesses qui viennent des Royaumes que nostre Triumvirat a gaignez. I'obmets que la Predication du saint Euangile, qui vaut plus que tout, est vn effect salutaire de leurs trauals, pour auoir esté les premiers Chrestiens qui l'ont presché dans ce grand Empire du Peru, où ils ont ouuert les portes de l'Eglise Catholique, Apostolique Romaine à vn si grand nombre d'Infideles, qu'il n'est pas possible de le pouuoir dire, ny de raconter non plus les merites de cette seule action, quand il n'y en auroit point d'autre. O Nom! ô Genealogie des Picarres! combien te sont obligez les Peuples du vieux Monde, pour les grandes Richesses que le nouveau leur a données! Mais combien plus te doiuent encore les deux Empires du Peru, & de Mexique, pour tes deux illustres fils Hernand Cortez, & François Picarre, sans y comprendre ces trois autres freres Hernand, Iean, & Gonçale, qui par leurs trauals & leurs Exploicts incroyables ont tiré ces

Idolâtres des Tenebres infernales, où ils mouroient tous les iours, pour leur apporter la lumiere Angelique, qui les fait viure aujourd'huy ! ô famille des Piçartes, que tous les Peuples du Monde te benissent, de siecle en siecle ! Que la Renommée ne cesse de publier l'illustre Nom de Sancha Martinez Dañasco Piçarte, Ayeul de tous ces Heros, qui ont tant fait de bien aux deux Mondes : à celuy-cy par les Richesses temporelles, & à celuy-là par les Spirituelles, pour qu'il nostre Triumvirat ne merite pas moins d'estime, d'honneur, & de gloire, que l'autre a mérité de blasme, d'infamie, & d'abomination par toute la Terre. Aussi à vray dire, ny les Peuples d'apresent, ny ceux de l'aduenir, ne pourront iamais assez dignement louer celuy-cy, ny blasmer cét autre, à l'égard de sa malice, & de sa tyrannie. A propos dequoy François Guichardin, natif de Florençe, Cavalier digne d'une telle Mere, Docteur au Droit Civil, & Canon, & le premier Historien de son temps, dit ce qui s'ensuit, dans le neuuesiesme Liure de son Histoire.

L'ayno se rendit fameux par le Triumvirat de Marc-Antoine, de Lepidus, & d'Octauien, qui ietterent là sous trois le Plan des Entreprises tyranniques, qu'ils executerent depuis dans Rome, par une sanglante Proscription, qu'on ne scauroit iamais auoir assez en horreur. Cét excellent Esprit parle ainsi de ce mal-heureux Triumvirat, & du nostre parlent, amplement aussi les deux Ministres Impériaux, François Lopez de Gomare, & Augustin de Carate, outre les Auteurs qui en ont écrit depuis, que nous citerons tousiours, quand l'occasion s'en presentera.

*DU PEU D'ARGENT QVIL Y AVOIT
en Espagne auant la Conqueste du Peru.*

CHAPITRE III.

POUR prouuer comme nostre Triumvirat a enrichy tout le Monde, ietrouue à propos de faire icy vne longue digression, & de rapporter diuers endroits de l'Histoire, pour monstrier combien grands sont aujourd'huy les reuénus de quelques Royaumes, à cōtparaïson de ce qu'ils estoient auant la Conqueste du Peru : Que si vous me permettez d'en desdire

les principaux ; ie le fairay fort succinctement. Ican Bodin, Liu. 6.
 François de nation, en son Liure de la République, dit en ge- Chap. 2.
 neral, & en particulier ce que tiroient de rentes les Republi-
 ques, & les Estats des Princez, qui estoit peu de chose, à l'es-
 gal de ce qu'elles ont aujourd'huy. *Plusieurs Estats*, dit-ils, *su-*
rent alors vendus à vil prix, outre qu'il n'est pas à croire combien petite
estoit la paye qu'auoient les Soldats, combien peu considerables les
gages que les Princes donnoient à leurs Domestiques, & le bon mar-
ché qu'on auoit de toutes choses : Surquoy il rapporte quantité d'au-
 tres remarques, où ie renuoye le Lecteur. D'où il fait voir par
 preuues faciles, que ce qui ne donnoit alors que cent Reales de
 rente, en donne mille aujourd'huy, & que les terres valent
 maintenant vingt fois plus qu'elles ne valoient en ce temps-
 là. Il remarque en suite que la Rançon que saint Louys Roy
 de France, l X. du Nom, paya, quand il fut pris au Soldan
 d'Egypte, ne fut que de 500000. liures : Et que depuis le Roy
 François I. donna pour la Senne trois millions à l'Empereur
 Charles V. A toutes lesquelles choses il adjouste, que du vi-
 uant de Charles V l'an 1449. la Couronne de France n'auoit
 de rente que 400000. francs ; Et qu'en l'an 1564. lors que le
 Roy Charles IX. mourut, elle se trouua par vne iuste supputa-
 tion 14. millions : Il en dit de mesme de plusieurs autres grands
 Potentats. Ce qui suffit, ce me semble, pour monstrier que le
 Peru se peut donner la gloire d'auoir enrichy tout le Monde.
 Mais sans aller chercher des preuues si loing, puis que nous en
 auons en abondance dans nostre Espagne ; ie n'en produiray
 aucunes d'un siecle plus esloigné, que celui du Roy Dom-Fer-
 nand, surnommé le Saint, qui gaigna Cordoue, & Seuille.
 L'Histoire generale d'Espagne, écrite par le Roy de Dom Alon-
 se le Sage, rapporte que Dom Alonse, l X. Roy de Leon, Pe- Parti 4.
 re du Roy Dom-Fernand le Saint, luy fit effectiuement la Ch. 10.
 Guerre, & que son fils luy enuoya vn Ambassadeur avec vne
 lettre, par laquelle il le pria de croire, *Qu'il estoit fils d'obeyssance,*
& non pas de Rebellion ; Que la Nature luy deffendoit de resister à son
Pere : Et partant qu'il le supplioit bien fort, de luy vouloir dire la
cause qui luy mettoit les Armes à la main contre luy, qui ne demandoit
pas mieux que d'en payer l'amande. A quoy Dom Alonse respon-
 dit, *Qu'elle procedoit de ce qu'il ne daignoit luy payer 10000. Mar-*
uedis qu'il luy denoit ; Si bien que le Roy Dom-Fernand les luy

paya tout aussi-tost, & ainsi la Guerre se termina. La lettre que le fils escriit à son Pere est trop longue, pour estre icy rapportée: c'est pourquoy ie me contenteray de la Responce que fit le Pere, tirée mot à mot de l'Historien, qui dit ainsi. *Alors le Roy de Leon enuoya cette Responce sans lettre: Qu'il faisoit la Guerre, à raison de 10000. Maravedis que le Roy Dom Henriquez luy deuoit, pour l'eschange de Santivannez de la Motte, & qu'il poseroit les Armes, s'il les luy payoit: D'où il aduint que le Roy Dom-Fernand, ne voulant point auoir Guerre contre son Pere pour 10000. Maravedis; les luy enuoya*
 Ch. 11. *sans delay, &c. Cecy est pris de la Chronique generale; & celle du mesme Roy Dom-Fernand, dit particulièrement ce qui suit, que i'ay tiré sans y rien changer.*

Vn peu de temps apres le Roy Dom-Fernandez, ayant eu diuerses plaines contre un Cavalier nommé Ruy Dias de los Camereros, du nombre de ceux qui s'estoient croisez pour la Guerre Sainte; le fit venir à la Cour, pour s'y iustifier des cas dont on l'accusoit, & satisfaire ceux qu'il auoit offencez: En effect le Chenalier vint à la Cour à Valladolid, & fut sifflé des manuais bruits qui couroient de luy, que pour le des-plaisir qu'il en eut, suivant le conseil que ses Amis luy donnerent; il partit incontinent de la Cour, sans en auoir permission du Roy Fernand. Luy cependant fut bien en peine de ce que Ruy Dias s'en estoit ainsi allé, & encore plus de voir qu'il ne pouuoit se résoudre à rendre les Places qu'il tenoit, lesquelles neantmoins il rendit enfin à sa Majesté,
 Ch. 16. *à condition qu'on luy donneroit 14000. Maravedis en or: si bien que les ayant receus, il remit incontinent les Forteresses entre les mains de Fernand, &c. En la mesme Histoire est rapporté ce qui suit, touchant la possession que le Roy prit du Royaume de Leon. Le Roy Dom-Fernand n'estant pas encore entré en possession de tout le Royaume, bien que neantmoins il en eust la meilleure partie; partit de Mancilla pour Leon, Capitale de tout le Pays, où luy fut faite vne entrée solennelle, & là mesme il fut nommé Roy de Leon, par l'Euesque de la Ville appellé Rodrigo, ensemble par la Noblesse, & par ceux du Tiers Estat, qui le recognerent pour tel. En suite de quoy, apres qu'on l'eust esleu au Trône Royal, le Clergé chanta solennellement le Te Deum: Et tous ses subiects, bien aises de l'auoir, ne le nommerent point autrement que Roy de Castille, & de Leon: aussi est-il vray que ces deux Royaumes luy appartenoyent de droit, pour en auoir herité de ses pere, & mere. De cette façon depuis la Mort de l'Empereur ces deux Royaumes ayant esté partagez entre Dom Sancha Roy de Castille, &*
 Dom-

Dom-Fernand Roy de Leon, qui les possederent quelques temps; se recûrent enfin, & reunirent au Roy Dom-Fernand III. Depuis, la Reyne Therese Mere de M. Sancha, & M. Douce Sœurs du Roy Dom-Fernand, voyant qu'il estoit en possession du Royaume, & qu'elle ne le pouuoit empêcher; luy enuoya vn Ambassadeur pour traiter a'accommodement, au grand desplaisir des principaux Seigneurs de Castille, qui par ie ne scay quelle malice noire desiroient passionnement qu'il y eût Guerre entre Castille, & Leon, & qu'on l'entretint par des Reuoltes successiues. Mais apres que la bonne Reyne M. Berenguelle eut ouÿ l'Ambassade de M. Therese, apprehendant les dommages que la Discorde apportoit ordinairement; elle trouua si bien à cét accommodement entre le Roy son fils, & ses sœurs M. Sancha, & M. Douce, qu'elle gaigna sur son Esprit qu'il ne bougeat de Leon, tandis qu'elle s'en iroit à Valence, pour y voir la Reyne M. Therese, & les Infantes aussi; de quoy sa Majesté demeura d'accord. Alors M. Berenguelle prit le chemin de Valence; Si bien que par cét abouchement avec M. Therese, & les Infantes, il fut conclud qu'elles laisseroient iouir en pais du Royaume, le Roy Dom-Fernand, & luy cederoient leurs pretentions sur le Royaume de Leon, se desistant par mesme moyen de tout autre droit sur la Couronne Royale, sans different, ny procez; à condition neantmoins que le Roy Dom-Fernand donneroit tous les ans aux Infantes leur vie durant, 30000. Maravedis en or. Cela s'estant ainsi conclu, le Roy vint à Beneuan; & les Infantes aussi, où il se fit de part, & d'autre vn Accord fort ample, signé de leur main: Et alors le Roy leur assigna les 30000. Maravedis sur vn fonds bien assuré, dont elles furent contentes; & ainsi il iouit paisiblement du Royaume de Leon. Dans la mesme Histoire se lisent encore ces paroles.

Après que le Roy Dom-Fernand eut espousé M. Jeanne, comme il s'en alloit visitant son Royaume, il vint à Toledo, où il apprit que la ville de Cordouë se trouuoit reduite en de grandes extremittez à faulte de viurs, ce qui le fâcha bien fort; de sorte que pour y subuenir, il enuoya 25000. Maravedis en or à la ville de Cordouë, & autant aux autres places & forteresses, &c. Dans la Chronique du Roy Dom-Fernand le Saint, il est fait mention de ces petites parties, qui monstrent assez combien l'argent estoit rare en ce temps-là; ce que nous prouuerons encore dans le Chapitre suiuant, par le tesmoignage des autres Rois qui luy succederent.

AVTRES PREUVES DV PEU D'ARGENT
qu'il y auoit auant la Conqueste du Peru.

CHAPITRE IV.

L'Histoire du Roy Dom Henriquez Second, escrite à la main, dans la Bibliothéque du Docteur Ambroise de Morales Historiographe, parlant de ses rentes, dit qu'elles se montoient tous les ans à 30. comptes de Marauedis, qui sont quatre-vingts mille ducats; où il est à remarquer qu'il estoit Roy de Castille, & de Leon; sur quoy il rapporte quantité de choses que ie n'escriis point, pource qu'elles me semblent odieuses. Il me suffit de dire, qu'en la Chronique du Roy Dom Henriquez troisiésme, qui est au commencement de celle du Roy Dom Iean Second son fils, qui regnoit en l'an 1407. se lisent des choses merueilleuses, sur le suiet du peu d'argent qui se manioit alors en Espagne, de la petite paye que tiroient les gens de guerre; & du prix vil, & abiect de toute sorte de denrées: Et d'autant que toutes ces remarques se pouuoient faire au temps que l'on gagna le Peru; il est à propos que nous en rapportions icy quelques-vnes des plus considerables, & des plus conformes à nostre suiet. Le tiltre du second Chapitre de l'Histoire susdite porte ces mots, *Harangue de l'Infant aux Grands du Royaume*, où vous remarquerez que par cét Infant, est entendu Dom Fernand, qui gagna Antequera, & qui fut depuis Roy d'Aragon. Voicy ses paroles.

Prelats, Comtes, hommes riches, Procureurs, Caualliers, Escuyers & autres qui estes icy assemblez, vous n'ignorez point que le Roy Monseigneur est si malade, qu'il ne se peut trouuer en cette assemblée; Veyla pourquoy il a voulu m'y enuoyer, pour vous dire le suiet qui l'a fait venir en ceste ville. C'est pource que le Roy de Grenade a rompu la tréue qu'ils auoient faite enséble, & n'a daigné luy rendre ny le Chasteau d'Ajamont, ny l'hommage qu'il luy doit legitiment: A raison dequoy il a resolu de luy faire vne rude guerre, & d'entrer dans son Royaume avec de puissantes forces; ce qu'il ne veut point faire pouruant, sans en prendre vostre aduis: Mais il desire sur tout, que vous voyez comme la Guerre qu'il entreprend est tres-iuste, & que vous sca-

chiez par mesme moyen de quelle façon ils'y doit prendre, & quel nombre d'hommes auoir, tant Cavaliers que gens de pied, afin de monstrer par là son pouuoir, & la prééminence qui luy est deuë. Il veut que vous luy disiez, ce qu'il faut d'Artillerie, de munitions, & de viures, pour executer son entreprise; quelles forces luy sont necessaires pour la deffence des places frontieres, & quelles sommes d'argent, pour payer les gens de guerre durans six mois, &c. C'est le contenu du second Chapitre de cette Histoire: Et dans les autres suiuaus, il est mis en question, quels des Deputez des villes de Burgos, de Toledé, de Leon, & de Seuille, deuoient parler les premiers: Mais enfin, estant demeurez d'accord de ce point-là, ils respondirent à la demande de l'Infant, *Que ce n'estoit pas à eux, mais au Roy, à designer le nombre des soldats, ny la quantité de munitions, & de viures qu'il falloit pour cette Guerre.* Et ainsi sa Maiesté le declara depuis, comme il se void dans le Chapitre 10. par ces paroles expressees. Pour mener à bout cette expedition, il faut auoir 10000. hommes d'Armes, 4000. Cheuaux, & 50000. fantassins, tant Arbalestiers, que Piquiers, sans y comprendre ce qu'on attend d'Andalousie: & pareillement 30. Galeres armées, 50. Nauires, & l'équipage suiuant. Six gros Canons, 50. grandes Archebuzes à croc, & autant de Fautonneaux; diuers Moriers, & Petards, ou autres Bombes & Machines à feu; des pics, des hoyaux, des besches, douze paires de grands soufflets de forge, & 6000. pavois, avec tout ce qu'il faut de charrettes, & de bœufs pour mener cét équipage, ouire l'argent necessaire pour la paye des gens de guerre durans six mois. C'est pourquoy ie vous enioins, & vous prie a'aduiser entre vous, à combien pourra monter durant tout ce temps la somme requise pour l'entretenemens de cét attirail de guerre, & aux moyens de payer le tout, sans que nos peuples en soient soulez, &c. Ce sont les paroles du 10. Chapitre, duquel, & des autres, nous deduisons ponctuellement les particularitez, comme importantes à ce que nous voulons prouuer: Voycy ce que dit le Chapitre suiuant.

Veu par les Deputez des Prouinces ce que le Roy leur a ordonné de faire, il leur a semblé fort difficile de le pouuoir executer en si peu de temps: Neantmoins apres vne iuste supputation faite par eux de ce à quoy se pouuoient monter les fraix de la guerre, afin d'en enuoyer l'estas à sa Maiesté, & qu'elle vîd par là ce qu'ils ont iugé necessaire pour le bien de son seruice, & celui de son Royaume, ils ont trouuë que la solde de 10000. Lanciers, payez six mois durant, à raison de 10. Marau-

dis par iour, & par teste, se montoit à 27. comptes: celle de 4000. Che-
 uaux à 200000. Maravedis: & celle de 50000. hommes de pied à 5.
 Maravedis chacun, & à chaque iour, 45. comptes. De plus, que pour
 l'entretienement de 50. Nauires, & de 30. Galeres, il falloit 15. com-
 ptes, & six pour la conduite de l'Artillerie, & de l'attirail qui se de-
 noit mener par charettes; tellement que le tout se montoit à 100. com-
 ptes, & 200000. Maravedis: d'où les Deputcz conclurent que les
 deux Royaumes ne pouuoient fournir en si peu de temps vne si grande
 somme. A cause dequoy ils supplierent le Prince de vouloir prier le
 Roy son pere, qu'il luy pleust prendre pour cette Guerre vne partie des
 deniers prouenans des Gabelles, Peages, & semblables droicts, qui se-
 roient bien la somme de 60. Comptes: Et l'autre dans le Tresor qu'il
 auoit à Segouie, afin que le pais suppléast au reste, comme il le feroit tres-
 volontiers, &c. Voylà le contenu du Chapitre, dont ie n'ay tiré
 pourtant qu'une partie, le reste m'ayant semblé trop long, &
 hors de mon sujet: Mais au Chapitre suiuant, qui est le 10. il est
 dit, Que le Roy trouua fort bon, que le Royaume luy fournit
 45. comptes de Maravedis, pour la guerre qu'il estoit resolu de
 faire au Roy de Grenade, ce qui fut executé ponctuellement.
 Dauantage, par le Testament du mesme Roy Dom Henry III.
 il paioit entre les autres legs qu'il fait; Qu'il veut, & entend qu'en
 l'Eglise de Tolde soient fondées sept Chappellainies, à raison de 1500.
 Maravedis de rente annuelle pour chacune, assignée sur un fonds de
 10500. Maravedis. En suite dequoy il enioint encore, Qu'en la
 mesme Eglise soient faits douze Anniiuersaires, suiuant l'ordre des mois
 pour chacun desquels il y ait 200. Maravedis à distribuer à ceux qui se
 trouueront presens à l'Anniiuersaire. Vn peu plus auant aussi il dit,
 Que le Prince Dom Fernand, se voyant reduit à de grandes extre-
 mitez au siege d'Antequera, enuoya demander vn secours d'argent à
 la Reine M. Catherine sa belle-sœur, qui prit du Tresor du Roy son fils,
 six comptes de Maravedis qu'il luy enuoya, & par le moyen desquels il
 acheua de se rendre Maistre de la ville d'Antequera. Que si l'on veut
 passer plus auant de ce siecle là au nostre on trouuera que le Roy Catho-
 lique Dom Fernand, & M. Isabelle, ne despensoiert pour leur table
 de taxe faite, que 12000. ducats par an, quoy qu'en effet, l'un & l'autre
 iouissent ensemble des Royaumes de Castille, de Leon, d'Aragon, de
 Nauarre, & de Sicile, &c. Mais afin que ce Chapitre ne soit si
 long, nous le diuiserons en deux parties, sans toutesfois nous
 esloigner de nostre intention.

DE CE QUE COVSTA LE NOUVEAU
Monde au Roy de Castille.

CHAPITRE V.

POUR venir au dernier point de mon dessein, qui est de monstrier par preuues valables, le peu d'argent qu'il y auoit en Espagne, auant la conqueste de mon païs; ie rapporteray icy combien peu cousta non seulement ce grand, & tres riche Empire, mais encore tout le nouveau Monde, inconnu alors; de quoy fait mention assez au long François Lopez de Gomare, dans son Histoire generale des Indes, où il escrit de choses tres remarquables, les principales desquelles sont les suiuanes. L'on Ch. 15.
ne scauroit croire combien Christophle Colomb eut de peine en la Negotiation des Indes: Il s'adressa premierement au Roy d'Angleterre Henry VII. Puis au Roy de Portugal Alphonse V. Puis au Duc de Medina Sidonia, Dom Henry de Guzman, & à celui de Medina Cæli, Dom Louys de la Cerda. Mais enfin, frere Jean Perez de Marquena, & Frere François de la Rabeda, Cosmographe & Humaniste tres-excellent; luy persuaderent d'aller à la Cour des Rois Catholiques, qui estoient bien aises qu'on leur donnast de ces Aduis-là, & en escriuient à Frere Fernand de Tallauera, Confesseur de La Reine M. Isabelle. Christophle Colomb entra donc en la Cour de Castille l'an 1486. où il presenta sa Requeste au Roy Catholique Dom Fernand, & à Madame Isabelle, qui en tinrent peu de conte, pour n'auoir alors d'autre pensée que de chasser les Mores du Royaume de Grenade; ce qui le fit resondre de s'adresser à ceux qu'on croyoit auoir le plus de credit enuers le Roy, & la Reine, quand il leur falloit communiquer quelque affaire. Mais le considerant comme Estranger, pauvement vestu, & qui n'auoit pour tout support que la recommandation d'un bon Religieux de l'Ordre de saint François, ils ne daignoient l'escouter, ny mesme adionster foy à la proposition qu'il leur entamoit. Alonso de Quintanilla, Sur-Intendant des Finances, estoit le seul qui luy donnoit de quoy manger, & qui prenoit plaisir au recit qu'il luy faisoit d'un pays dont on n'auoit iamais ouy parler qu'à luy; ce qui luy donnoit quelque esperance d'en pouoir communiquer un iour avec leurs Maistres Catholiques. Cependant, par l'entremise du mesme Alonso de Quintanilla

nille, Colomb fit en sorte d'auoir entrée chez le Cardinal Dom Pero Gonzalez de Mendoza, lors Archeuesque de Toledé, qui estoit fort bien dans l'esprit du Roy, & de la Reine. Comme il l'eut donc bien examiné, il le presenta à leurs Maiestez, qui prirent la peine de se fiire lire ses Memoires; & bien que d'abord ils les creurent pour des contes faits à plaisir, ils luy firent presenter neantmoins qu'apres la guerre de Grenade, on penseroit à le despescher: Cette responsé fit bien esperer Christophle Colomb, qui commença deslors d'entrer en estime, & d'estre considéré par les Courtisans, qui s'estoient auparavant mocquz de luy. Cependant, il ne perdoit pas vn moment de temps à solliciter son affaire, qu'il poussa si auant, que la Ville de Grenade estant prise; pour aller à la Conqueste de ces nouuelles Terres, dont il racontoit tant de merueilles, & qu'il disoit abonder en Espiceries, en argent, en or, en Perles, en Pierrieres, & en toute sorte de Richesses; leurs Maiestez le gratifierent encore de la douziésme partie des Rentes, & des Droicts Royaux en toutes les Terres qu'il descouuriroit, sans preindice du Roy de Portugal, comme il l'assuroit; Les Articles en furent dressez à Sainte Foy, & les Lettres de gratification à Grenade, le 30. a^r Avril, en l'ande la prise de cette mesme Ville. Or d'autant que leurs Maiestez n'auoient pas alors l'argent qu'il faloit pour le voyage de Colomb; Louys de sainte Ange, Secretaire d'Estat, presta six comptes de Marauedis, qui sont, à le prendre au large, 16000. Ducats, ou enuiron. Deux choses sont remarquables icy: l'vne, que c'est vne merueille bien grande qu'avecque si peu d'argent, les Rentes de la Couronne Royale de Castille soient montées aux sommes immenses, qu'on tire aujour d'huy des Indes: L'autre, que la Conqueste des Mores, qui auoit duré plus de 800. ans, n'eut pas plus tost prin fin, que celle des Indes commença, comme si par vn Decret du Ciel les Espagnols eussent esté destinez à combattre sans cesse les Infidelles, & les Ennemis de la sainte Foy de Iesus-Christ, &c. Ce sont les paroles de Gomare, qui font la conclusion du Chapitre que nous venons d'alleguer: De maniere que 7. ou 8. ans de travail qu'employa Colomb à fa demande, & 16000. Ducats d'emprunt, ont enrichy l'Espagne, & tout le vieil Monde de la façon que nous auons ditte. Et d'autant que ces exemples des Rois que nous venons de produire, pour prouuer nostre proposition, doiuent suffire, ce me semble; ie trouue à propos que nous en rapportions quelques-uns des particuliers, & des plus communs, afin que la preuue en soit encore plus forte de part & d'autre.

DU PRIX DES CHOSES COMMUNES,
auant que l'on conquist le Peru.

CHAPITRE VI.

AYant à parler du prix des choses communes, nous n'en produirons icy afin de n'estre si longs que trois particulieres, pour preuue de ce que nous auons dit, laissant à part les autres de ce genre-là, qu'il nous seroit aisé de mettre en auant. Le premier témoignage est, qu'au païs d'Estremadure, aux enuirs de la ville de Truxillo, vne seule terre, * qui vaut plus de 8000. ducats de rente, n'a iamais cousté à ceux qui la posséder auourd'hui que 200000. Marauedis vne fois payez; ce qui estoit beaucoup auant qu'on eut conquis le Peru. Le second, qu'en cette Ville de Cordouë vn Gentilhomme venant à mourir, auant que les Indes fussent descouuertes, ordonna par son Testament qu'on eut à faire vne solemnité particuliere à l'honneur de la Vierge, à dire vne Messe haute, & en suite vne Predication qui seroit faite par vn Religieux de l'Ordre de Saint François, le tout moyennant vne aumosne de dix Marauedis, qui se feroit ce iour-là pour la nourriture de ceux du Conuent. La rente des possessions que legua ce Cavalier, tant pour cette œuvre pieuse, que pour quelques autres, valoit alors 450. Marauedis. Depuis les Confreres de cette mesme Feste, qui sont les Secretaires du Roy, voyant cette rente extrêmement augmentée, donnent d'aumosne au Conuent, il y a plus de 50. ans, tantost 20. ducats, tantost 30. selon que l'an rend plus ou moins de reuenu, s'estant trouué telle année qui a donné iusques à 40. escus en or, qui sont 16000. Marauedis, au lieu de 30. que le Testateur legua; la rente, comme i'ay dit, estant montée si haut, qu'en la presente année 1533. les possessions s'afferment plus de 900. Ducats, tant en argent qu'en autre chose. Le troisieme, & dernier tesmoignage est, qu'en la Ville de Badajox, où mon Pere est né, entre plusieurs terres nobles, il y en a quatre qui demeurerent aux quatre fils d'une vefue, à qui appartenoit vne Bourgade, qui auoit à sept lieües d'alentour plusieurs possessions, & bons heritages. Et d'autant que cette Bourgade, ou si vous voulez, cette

* Ou si vous voulez, vn pasturage, l'Espagnol dit *dehesa*.

Ville, estoit frontiere entre le Portugal, & la Castille, & que la Dame n'estoit pas capable de la pouuoir deffendre au besoin, le Roy par vne bonne raison d'Estat, luy en fit rente à perpetuité de 45000. Marauedis, qui estoit alors ce qu'elle donnoit de reuenu. Mais à 60. ans de là, on en tira plus de six-vingts mille Ducats, & auourd'huy elle en vaut plus de 300000. à ce que l'on tient; mais comme ie ne le sçay pas bien, i'en laisse la decision à celuy qui la possede en qualité de Seigneur. La vefue dōna cette rente à son Aîné, pour l'aduantager par-dessus les autres trois fils, ausquels elle laissa 4. ou 5000. Marauedis de rente en bons pasturages, qui donnent auourd'huy à leurs Maîtres, des Ducats au lieu de Marauedis; Où l'on remarquera que l'Aîné de ces trois freres, s'est trouué par là moins riche que les autres, pour n'auoir eu sa rente qu'en forme de pension, par dessus laquelle il ne se preualust de rien, au lieu qu'il ne luy en fut pas arriué de mesme, s'il l'eut eue en possessions. De cette mesme façon s'est augmenté insensiblement le prix de toutes les autres choses, qui seruent au commun vſage du public, soit des viures, soit des vestemens, soit de la chausseure; Pour prouue de quoy i'allegueray, qu'en l'an 1560. que i'entray en Espagne, les deux premieres paires de souliers de marroquin que j'acheptay à Seuille, me cousterent vn real & demy la paire; au lieu qu'en la presente année 1613. ceux de la mesme façon qui n'estoient qu'à vne simple semelle coustent 5. Reaux; quoy que d'ordinaire les denrées soient à meilleur marché à Cordoué, qu'elles ne sont à Seuille. Pour monter donc du plus bas prix au plus haut des choses qu'on fait valoir, & entre autres des Possessions; ie dis qu'en l'année 1560. l'argent qu'on donnoit pour le faire profirer se montoit à 10000. Marauedis pour 1000. de rente, & que neantmoins on n'a pas trouué depuis que ce fut vne mauuaise Police, de le hausser iusques à 14000. le milier. A quoy i'adjouste, que cette année ceux à qui l'on veut donner de l'argent à profit, s'il y en a quantité, encore faut-il qu'il soit bien assigné; refusent de le receuoir autrement qu'à 20000. le milier; Ce qui est cause que plusieurs Seigneurs, croyant que ce soit bon marché; ont pris & prennent des rentes à 20000. le milier, pour rachepre celles de 14000. Sur quoy i'ay à dire pour conclusion, que depuis le peu de temps qu'il y a que la Flotte du Peru est arriué à Seuille, il s'en parle comme d'une merueille, iusques aux

dernieres

dernieres Prouinces du vieux Monde: Car comme le Commerce des Marchands passe de Prouince en Prouince, & d'un Royaume à l'autre, pour le desir qu'on a de gagner, l'esperance s'en accroist de iour en iour, à cause que cét Empire là, est comme vne Mer d'argent, & d'or, dont les Marées, par maniere de dire, vont & viennent dans toutes les Contrées du Monde; ce qu'on ne peut appeller autrement que de vrais effects des Auteurs de nostre Triumvirat, dont tous les habitans de la Terre leur sont, & seront tousiours redevables.

DEUX OPINIONS TOUCHANT LES
Richesses du Peru; Et le commencement de sa Conqueste.

CHAPITRE VII.

A PRES auoir dit ce que valoit autrefois la rente d'Espagne; il n'est pas hors de propos de monstrier ce qu'elle vaut à present, pour ne laisser rien à desirer sur ce sujet là: Car bien que i'en aye rappotté la meilleure partie, ie n'ay pû neantmoins desduire le tout, pour n'auoir aucune communication avecques les Officiers des Finances du Roy, joint que ce sont des secrets, où il n'est pas permis de penetrer, & dont les Officiers mesmes ne scauroient parler au vray quand ils le voudroient; C'est vne masse si grande, que ceux qui de iour en iour y adioustent de nouveaux monceaux, & qui sont gagez pour cela, pourroient difficilement en comprendre les dimentions, & encore moins vn homme tel que moy, qui ne scay pas, comme dit le Prouerbe, de quelle couleur est la farine. Tout ce que ie puis asséurer (n'y ayant personne qui l'ignore) est que pour reparer, la perte de l'Armée Nauale qu'on enuoya en Angleterre l'an 1589. le Royaume de Castille fournit à Philippe II. huit millions, qui sont quatre vingts fois cent mille Ducats, sans y comprendre ce qu'on tira de toutes les autres rentes que l'on payoit au Roy tous les ans, & qu'on ordonna depuis n'estre payées que trois fois l'année. Il est manifeste encore, qu'un peu après que le Roy Dom Philippe III. fut entré en possession de la Couronne, le Royaume luy donna en six ans dix-huit millions, qui sont cent quatre-vingts fois cent mille Ducats; outre les

rentes ordinaires, qui furent mises dans son Espargne.

De ces parties, & de l'augmentation des rentes des particuliers, on peut inferer où peuuent estre montées celles du Roy, l'accroissement desquelles est d'autant plus grand, que tous les Reuenus des particuliers ne sont rien à comparaison; outre que pour leur grand nombre, il est presque impossible de le compter: Que s'il est vray, comme dit le Poëte, qu'il n'y a que les Pauvres qui sçachent le conte de leur bestail, & si ce Prouerbe ne laisse pas de s'appliquer à vn riche Particulier, que sera-ce des Richesses, & des Tresors d'un si grand Monarque, comme est le Roy d'Espagne, sur les terres duquel le Soleil luit tous-jours, à ce que disent les Cosmographes. Toutes ces grandeurs, & ces bonnes fortunes ne se doiuent-elles pas à nostre Triumvirat?

Or bien qu'il soit vray, comme j'ay dit n'a guere, que ie n'ay aucune communication, ny aucun commerce avec ceux qui manient les Finances du Roy; ie ne laisse pas toutesfois d'auoir pour Amis quelques-vns des plus entendus de sa Cour, qui m'esclaircissent de ces doutes, & entr'autres vn Cavalier des plus capables, appellé Iean de Morales, natif de Madrid, Secrétaire de sa Maiesté, & Huissier de sa Chambre Royale, dans son grand Conseil des Indes; lequel j'ay prié souuent de s'enquerir de ce que peuuent valoir les rentes du Roy, afin de les mettre dans mon Histoire, pour preuue des choses que i'en ay dites. Mais comme j'ay veu qu'il estoit trop long-temps à me respondre; ie me suis contenté d'en faire le recit que vous auez veu, ne pouuant m'imaginer qu'on en pût iamais sçauoir précisément la quantité, pour estre trop grande. Ce qui me fut confirmé depuis par Iean de Morales, qui apres auoir employé trois mois tous entiers à cette recherche, m'escriuit enfin ces paroles. *Je vous aduertis, Monsieur, qu'il n'a pas tenu à moy que ie n'aye fait toute sorte de diligences, pour apprendre quelles sont les rentes que tire sa Majesté de tous ses Estats: Mais c'est vne chose qu'on n'a pu encore sçauoir au iuste, nymefme à peu près. Je diray bien dauantage, c'est que le Roy mesme n'a iamais sçeu en venir à bout; car pour le desir qu'il a eu de le sçauoir, il voulut n'a guere que certains Reglements se fissent là dessus dans le Conseil de ses Finances, & que pour la mesme fin on fit vn Livre particulier, qu'on n'a pas encore commencé; tant s'en faut qu'on soit sur le point de l'acheuer, ce chemin estant si raboteux, & si*

plein de desours en haut & en bas, qu'on n'y scauroit aller qu'à tastons. D'ailleurs tant de diuers sentiers s'y rencontrent, qu'il n'est pas possible de les ioindre ensemble pour en faire vn bon: En vn mot cela ne se peut escrire, à moins que d'y employer vn fort long-temps, pour en faire plusieurs broüillons: Ce sont les paroles de Iean Morales; dequoy ie fus d'autant plus satisfait, que ie les trouuay entiere-ment conformes à ce que i'en ay escrit moy-mesme, m'accommodant au sentiment des autres; à raison dequoy ie les ay mises icy depuis, pour autoriser mon trauail. Car à vray dire, ie prends tous les soings imaginables, pour ne rien escrire s'il est possible, qui n'ait pour fondement la verité toute pure: Que s'il est question de prouuer encore plus fortement combien il est mal-aisé de supputer ce que valent les Rentes du Roy d'Espagne, Empereur du nouueau Monde; ie n'ay qu'à produire l'autorité de Iean Bottere Bonez, grand & vniuersel Rapporteur des choses d'icy bas. Cét Autheur parle assez au long en ses Relations, des rentes du Roy de la Chine; de celles que la Galice, le Portugal, & les Asturies donnent à l'Empire Romain; comme encore du Reuenue du Roy de France, du Roy de Navarre, de l'Empereur, du Roy de Pologne, du Roy d'Angleterre, du Duc de Lorraine, du Roy d'Ecosse, de Suede, des Gots, de la Maison d'Austriche, du Roy de Narisgue, du Xérife, & du grand Turc; Mais il ne dit pas ce que valent les Rentes du Roy d'Espagne. Dequoy ie ne puis alleguer d'autre raison, sinon quel' Autheur, ou son Traducteur, n'en a pû scauoir la iuste supputation, ny calculer vne si prodigieuse quantité d'or, & d'argent que donnent pour tribut au Roy Catholique tant de riches Royaumes, & entr'autres celuy du Peru.

Pour confirmation de cette grandeur, & des Richesses que le Peru a fournies à tout le monde; ie rapporteray icy l'Exemple du tres-Reuerend Dom Paul de la Duna, autres fois President au Conseil des Finances de sa Majesté; depuis principal Ministre du Conseil des Indes, & finalement esleu Euesque de Cordouë l'an 1603. Cét excellent homme vn iour entre les autres, de la presente année 1604. parlant des Richesses du Peru, en vne Compagnie où estoient en son Prouiseur, & son Confesseur, avec le Licencié Iean de Morales l'vn de ses Chappellains, & le Licencié Pedro Quadrado, natif de Toledo, leur dit ces paroles. *C'est chose assurée, que d'une seule Montagne de celles du Peru, la*

Roy d'Espagne en a tiré iufques en l'an 1602. 12. millions de pezos d'argent, enregiftré dans fes comptes, fans y comprendre plus d'autres cent milions, venus depuis peu, pour eſtre mis de meſme dans le Regiſtre. Ie puis aſſeurer encore qu'en vne ſeule flotte, j'ay veu transporter hors du Peru 25 milions de pezos d'or, & d'argent. A quoy la Compagnie ayant reſpondu, que ſi quelque autre perſonne que ſa Seigneurie leur eut dit ces chofes, difficilement on les eut creuës, tant elles eſtoient merueilleuſes, l'Eueſque repartiſſant, Je les maintiens neanmoins pour tres-veritables, & en dis vne autre poſſible bien plus incroyable; qui eſt que tous les Roys d'Espagne enſemble, depuis Dom Pelayo, n'ont iamais tant eu d'or & d'argent qu'en a le Roy Dom Philippe II. qui regne auioyd'huy; de ſorte qu'apres le teſmoignage d'un ſi excellent homme, il ſeroit ſuperflu d'en produire vn autre, pour rendre plus authentique la preuue de la propoſition que j'ay faite.

Ceux qui regardent avec d'autres yeux que les ordinaires les grandes Richelſſes que le Peru a reſpandues par tout le vieux Monde, diſent qu'elles luy ont eſté plus nuifibles que profitables. Ils alleguent pour raiſon, qu'elles meſmes ſont ordinairement la ſource des Vices, pluſtoſt que des Vertus : Qu'elles portent les inclinations de ceux qui les poſſedent à l'orgueil, à l'Ambition, à la Gourmandiſe, & à la Luxure : Que par elles les hommes s'entretenant comme ils ſont dans la molleſſe, & dans la faineantiſe, deuiennent eſſeminez, & inutiles en temps de Paix, mais encore plus, durant la Guerre; Que comme tels ils n'ont autre ſoing que de plaire à leur ventre, par des mets exquis, & de contenter leur luxe par des ſuperfluités de riches habits, dont ils inuentent à tout moment de nouvelles modes; Mais que le pire eſt, que ne ſachant plus comment s'aider, pour en eſtre mieux parez, ils s'habillent en femmes pluſtoſt qu'en hommes, comme il ſe void auioyd'huy. Qu'au reſte à meſure que les rentes des Riches ſe ſont augmentées, pour les faire viure parmy l'abondance, & le luxe, les miſeres des Pauvres ont pris acroiſſement de meſme, pour les reduire à mourir de faim, & à n'auoir pas dequoy couvrir leur nudité, pour l'extrême cherté que le trop d'argent a cauſée en matiere de veſtemens, & de viures. Ce qui ſe void par eſpreuue, en ce que les Pauvres n'ont auioyd'huy ny dequoy manger, ny dequoy s'habiller, à cauſe que les deſbauches des Riches ont fait mettre

Toutes choses au prix le plus excessif qui fut iamais : d'où il s'enfuit qu'il y a tant de Miserables parmy le Public , qu'ils se trouuent plus incommodez que lors qu'il y auoit moins d'argent. Car bien qu'en ce temps-là les aumosnes ne fussent pas si grandes, elles leur estoient neantmoins plus profitables, pource que les choses coustoient beaucoup moins qu'elles ne font à present. D'où il conclud, que les Richesses du nouueau Monde, si on les considere bien, n'ont augmenté en rien les commoditez necessaires pour l'vsage de la vie humaine, les principales desquelles sont les vestemens, & les viures; qu'au contraire elles les ont encheries, & rendu les hommes effeminez, en emoussant la pointe de leur Esprit, ouure qu'elles ont amolli le corps, par mille desguisemens, qui ne les rendent pas moins ridicules en leurs habits, qu'en leurs mœurs : au lieu que se tenant, comme ils faisoient autresfois, dans les bornes de la Mediocrité, ils en estoient incomparablement plus contens, & plus craints de tout le Monde.

De ces deux opinions que j'ay dites, suiura qui vouldra celle qui luy semblera la meilleure: de moy, qui suis comme Partie en cette cause; ie ne veux, ny condamner cette derniere, pource qu'elle m'est fauorable, ny soutenir non plus la premiere, bien qu'elle soit à l'honneur, & à l'agrandissement de ma Patrie. Sans m'amuser donc à rien decider sur ce sujet là; il me suffit de reprendre le fil de mon Histoire, où moyennant la Grace Diuine, ie me propose de rendre compte, du commencement, du milieu; & de la fin de nostre fameux Triumvirat.

Après que ces trois grands Hommes, qui seruent de fondement à nostre Discours, eurent concerté leur association, & l'Employ qu'un chacun d'eux deuoit auoir; la premiere chose qu'ils firent fut de faire deux Nauires, avecque beaucoup de peine, & de frais : En l'un François Pigarre sortit de Panama, l'an 1525. ayant avec luy 114. hommes, & la permission du Gouverneur Pedro Atias Danila. Comme ils eurent nauigué cent lieuës, ils furent prendre terre en un país enuironné de Montagnes, presque inaccessibles, & tellement fascheuses, qu'il ne cesseroit iamais d'y pleuvoir. Les habitans ne firent point les poltrons si tost qu'ils les virent; Au contraire, pour paroistre vailians, ils sortirent en grand nombre, & les chargerent si vertement, qu'ils en tuerent quelques-vns. Ils firent 4. diuerses attaques, où

François Piçarte se trouua blessé de sept coups de fleches, qui l'auroient mis en grand danger de sa vie, s'il n'eut esté bien armé: ce qui fut cause qu'ils partirent de ce pais-là, bien faschez de n'auoir rien fait, & encore plus de s'estre portez à vne si dangereuse entreprise. Diego d'Almagre sortit de Panama quelques iours apres, pour les suiure, & le mal-heur voulut que luy & ses gens, arriuerent au mesme pais, où les Indiens acharnez desja sur les Espagnols, donnerent sur eux de rechef, creuerent vn œil dans le Combat à Diego d'Almagre, blessèrent plusieurs des siens, en tuerent quelques-vns, & forcerent les autres à se retirer: ce qui fut tout le beau gaing que firent les Espagnols, en la premiere Contrée, où ils aborderent avecque dessein de la conquerir. Les Historiens ne disent point quel pais c'estoit, & ie m'en estonne: Mais quoy qu'il en soit, apres cét eschet sanglant Almagre s'en alla chercher Piçarte, & l'ayant trouué à Chinchama, il demeura d'accord avec luy de tascher d'en faire la Conqueste: Mais ils treuuerent que ce pais-là n'estoit pas meilleur que le precedent, ny moins pluuieux & plein de Montagnes: Le pire fut, qu'il en sortit quantité de gens aguerrys, qui à force d'armes, les contraignirent de s'embarquer, & leur chanterent poiüilles, comme le remarque au long François Lopez de Gomate, rapportant à ce propos plusieurs autres choses, où ie renuoye le Lecteur, s'il les veut sçauoir plus particuliere-ment.

ALMAGRE RETOURNE DEUX FOIS à Panama, pour auoir du Secours.

CHAPITRE VIII.

DIEGO d'Almagre s'aduifa de retourner à Panama, pour y auoir des gens de secours; comme en effet il en amena quatre-vingts hommes; Et neantmoins les deux Capitaines avec tout ce qu'ils auoient de soldats, n'oserent iamais faire aucun effort, pour la grande resistance qu'ils trouuerent en ceux du pais. Comme il seurent donc continué leur route par mer, ils aborderent la Plage de Catamez, qui est vne Contrée, où il y a fort peu de Montagnes, & beaucoup de viures. Ils y conceurent d'abord

de grandes esperances de s'y faire riches, pour s'estre apperceus que ces Indîes se faisoient des trous sur le visage, pour y mettre des clouds d'or, outre les Turquoises, & les Esmeraudes fines qu'ils y auoient enchassées; dequoy ces Aduenturiers furent extrêmement aises, s'imaginant d'estre desia comblez de tresors. Mais ils perdirent bien-tost l'esperoir de ces richesses imaginaires, pource qu'ils virent venir à eux vn si grand nôbre de gens, tous bien armez, & qui ne demandoient qu'à cōbattre, qu'ils n'eurent iamais la hardiesse d'en venir aux mains, ny l'assurance non plus de se tenir là dauantage, quoy qu'ils fussent plus de 250. hommes; & ainsi d'un commun consentement ils s'en allerent en l'*Iste du Coq*. * Ils furent plusieurs iours en des inquietudes estranges, ** Isla del gallo, dit l'Espagnol.* tantost se fiant en leur entreprise, tantost s'en défians, selonc que les occasions qu'ils se repentoient d'auoir cherchées, se trouuoient, ou bonnes, ou mauuaises, les Capitaines estans les seuls qui se deliberoient de suiure leur pointe, ou de mourir en la peine. Sur cette resolution, il fut conclu entr'eux, que François Pigarre demeureroit dans l'Iste, & Diego d'Almagre s'en retourneroit à Panama, pour y leuer de nouveaux soldats. Cependant parmy ceux qu'il auoit menez la premiere fois, il y en eut plusieurs qui perdant courage, furent d'aduis de le suiure; Mais luy ne le voulut iamais permettre, ny mesme se charger de leurs lettres, de peur que par le recit des trauaux qu'ils auoient soufferts, ils ne diffamassent son entreprise, en décrivant vn païs, des Richesses duquel, sans les auoir veües, il auoit dit des choses estranges; si bien que sa perseuerance à ne point démordre de son dessein, ne pouuoit seruir qu'à les rendre plus incroyables.

Mais quelque peine que prissent les Capitaines, pour destourner les soldats d'escire à Panama, ils ne pûrent iamais empescher qu'ils n'en trouuassent le moyen, faisant voir par là combien ce Prouerbe est veritable; *Que la necessité aiguise l'esprit.* Comme donc vn de leurs soldats, appelé Xarauia, natif de Truxillo, eut quitté François Pigarre son Capitaine, quoy qu'il fut d'autant plus obligé de le suiure, qu'il estoit de mesmo païs que luy; il enuoya à Panama, dans vn peloton de fil de cotton (sous pretexte qu'il vouloit qu'on luy fir vne paire de bas à l'esguille) vn Memoire en forme de Requeste à vn Amy, où plusieurs de ses Camarades auoient signé, & où il estoit parlé

tant de la mort de plusieurs d'entr'eux, que des peines passées, & de la violence presente, qui estoit si grande qu'on ne leur permettoit pas de retourner à Panama: Et au bas de ce Memoire, estoient sommairement compris leurs travaux dans ce Quatrain.

*Monsieur le Gouverneur, on s'en va vous chercher,
Pour emmener des gens de la Ville où vous estes;
Enuoyez nous en donc, car voicy le Boucher,
Qui les esgorgera, comme de pauvres bestes.*

Surquoy ie rapporteray, qu'il me souuient d'auoit en mon enfance souuent ouy dire ces quatre Vers, que ceux qui parloient des diuers succez de la Conqueste du nouveau Monde, auoient ordinairement à la bouche. Et à vray dire, celuy qui en fut l'Auteur, n'obligea guere les Capitaines susnommez, pource que les aduis qu'il donna furent cause qu'ils perdirent leurs biens, & le frui&t de plusieurs grands travaux qu'ils auoient soufferts par le passé. A mon arriuée en Espagne, ie trouuay ce mesme Epigramme dans la Chronique de François Lopez de Gomare, & n'est pas à croire combien i'en fus aise, pource que cela me remit en memoire quantité de choses, que i'auois ouyes sur ce sujet en mes premieres années.

*PICARRE EST ABANDONNE' PAR
ses gens, à la resêrne de treize, qui demeurent
avec luy.*

CHAPITRE IX.

IL yauoit plus d'un an que Diego d'Almagre ne cessoit de voyager, comme i'ay dit, lors qu'à son retour à Panama, il y trouua vn nouveau Gouverneur, qui estoit Pedro de los Rios, Cavalier, natif de Cordouë; à qui l'on n'eut pas plustost presenté la Requête des soldats, qu'il enuoya en l'Isle du Coq vn Intendant de Iustice, appellé *Tafur*, avec ordre exprés de mettre en liberté tous ceux qui voudroient retourner à Panama. A ce mandement les gens d'Almagre, qui s'estoient autresfois

monstrez

monstrez si ardentes à le suivre, se débandoient d'avecque luy, disant, que puis que les autres s'en deuoient aller, il n'estoit pas iuste qu'ils demeurassent là tous seuls; De quoy Diego d'Almagre fut extrêmement fasché, pource qu'il vid bien que par là seroient destruites les plus grandes esperances. Il en aduint de mesme à François Pigarte, qui s'affligea fort de voir, que tous les Associez estoient beaucoup plus enclins à s'en retourner qu'à passer outre dans le voyage par eux entrepris. Ce qui fut cause que pour les tirer de confusion, & particulièrement pour connoistre ceux qui se declareroient ses Amis; il mit la main à l'épée, avec la pointe de laquelle il fit vne longue ligne à terre, aboutissant du costé du Peru, où s'acheminoient tous les desseins; puis se tournant vers les gens; Messieurs, leur dit-il, *cette ligne est un symbole du travail, de la faim, de la soif, des souffrances, des blessures, des maladies, & de tous les autres maux, & dangers où nous allons nous exposer en cette Conquête, iusques à la fin de nostre vie: Sus donc que ceux qui auront assez de courage pour s'y hasarder, & les vaincre, passent cette ligne, pour un tesmoignage de leur valeur, & vne assurance de n'estre fidelles Compagnons. Comme au contraire, que ceux qui s'estimeront incapables d'une si haute entreprise, s'en retournent à Panama, mon intention n'estant pas de retenir personne par force; Car quelque petit que soit le nombre de ceux qui me resteront, j'espère qu'avecque l'aide de Dieu, à la plus grande gloire duquel se rapportent tous nos desseins; nous les pousserons iusques au bout; & nous passerons de ceux qui nous voudront abandonner.*

Les Espagnols ayant ouy ce Discours, s'embarquerent en diligence, de peur qu'il ne vint quelque nouveauté qui les empêchast de retourner à Panama, où ils s'en allerent avec l'Intendant; par où ils monstrent assez, qu'ayant le Courage bas, comme gens abjets qu'ils estoient, l'apprehension des travaux eut plus de pouuoir sur eux, que l'esperance de l'honneur & de la reputation. Il n'y eut que 13. des Compagnons de Pigarte qui demeurèrent avecque luy, sans que le mauvais exemple, ny les persuasions des autres, fussent capables de leur faire abandonner leur Capitaine; Au contraire, leur courage, & leur fidelité se redoublant en eux, ils passerent la ligne, & luy protestèrent de nouveau qu'ils mourroient tous avec luy. François Pigarte leur en fit des remerciemens dignes de sa generosité, & leur promit que le meilleur du butin seroit pour eux. Cela fait, ils traicterent

dans vne autre Isle, vulgairement appellée *la Gorgonne*, où ils furent tellement persecutez de la faim, qu'elle les contraignit durant plusieurs mois, à ne viure que de ce qu'ils trouuerent sur le bord de la Mer, & à ne manger que de grandes Couleures, & autres Reptiles, dont il y a grande quantité dans cette Isle, exposez aux iniures de l'air, & à des pluyes continuelles, accompagnées d'esclairs & de tonnerres fort frequens; tellement qu'ils endurerent des peines qui ne sont pas imaginables. Gomare ne fait mention dans son Histoire que de ces trois hommes heroïques, & c'est ie m'assure pour n'auoir eu aucune relation des autres onze, ou possible pour la nonchalance que les Historiens Espagnols apportent à louer les grands personnages de leur país, quoy qu'il seroit iuste, ce me semble, qu'ils en dissent non seulement les noms, mais celuy de leur patrie, & de leurs parens, ayant à escrire des choses si memorables, comme sont celles qu'ils ont faites en la descouuerte & aux diuerses Conquestes du nouveau Monde: D'où il aduiendroit qu'outre que la Memoire de ces Conquerans en seroit immortalisée; leur país & leurs parens auroient encore dequoy se vanter d'auoir esleué des enfans si recommandables à la Posterité. L'un de ceux que nomme le mesme Gomare, s'appelloit Pierre de Candie, pource qu'il en estoit natif, & Grec de Nation; Et l'autre Barthelemy Ruiz de Moguer, né dans cette Ville-là, & Pilote non moins vigilant que fidelle, pour ne les auoir iamais abandonnez en cette nauigation. Augustin de Carate fut plus curieux que Gomare, & outre ces deux, il en nomme sept autres, qui furent Nicolas de Ribera d'Elluera, Jean de la Torre, ou de la Tour, Alonso Briceño, natif de Benauant, Christophle de Peral, né dans Baço, Alonso do Truxillo, ainsi appelé du lieu de sa naissance, François de Cuel-

* *Natif* de la mesme Ville. * & Alonso de Molina, natif de la Ville de Beda.

Pour esclarcir ce que dit ce Cavalier en cet endroit, il faut que l'on sçache qu'outre ce Nicolas de Ribera il y en eut vn autre appellé comme luy, le nom duquel m'est eschappé de la Memoire; Il me semble toutesfois, que c'estoit Hierosme, ou Alonso de Ribera, & mesme ie me souuiens, que pour en marquer la difference l'on appelloit l'un Ribera le ieune, & l'autre Ribera le vieux, non qu'il le fut plus que son compagnon; au

contraire il estoit plus ieune, mais bien, poutce qu'il y auoit plus long temps qu'il estoit dans l'association de François Picarre, ayant esté des premiers qui sortirent de Panama, au lieu que l'autre fut des seconds, ou des troisiésmes qui en partirent avec Diego d'Almagre, Ce que ie puis asseurer, pour auoir ouy toutes ces particularitez en mon país propre, par la bouche de ceux qui parloient des choses passées en ce temps-là, les ayant veuës eux-mesmes. Ces deux Riberas eurent des departemens d'Indiens en la Ville des Rois, où ils laisserent des filles, & des fils d'une haute Probité. Quant à celuy qu'Augustin de Carate nommé Alonse de Truxillo, que i'ay connu, il s'appelloit Diego, né dans Truxillo, qui auoit vn département d'Indiens dans la Iurisdiction de Cozeó, & quand ie sortis de cette Ville-là, qui fut en l'an 1560. il estoit encore plein de vie. En ce mesme nombre des 13. il faut mettre encore François Rodriguez de Villefort, qui passa le premier la ligne, & qui viuoit aussi l'an susdit. Je l'ay connu comme les autres; Et touchant les deux qui manquent, pour en remplir le nombre de 13. on n'en sçait point dire les noms. I'ay bien voulu faire ce supplément sur ce qu'en escrit Augustin de Carate, pour mieux esclaircir son Histoire, & obliger les descendans de ces Hommes Illustres, à se piquer de la gloire, d'en estre sortis. J'en feray de mesme des autres endroits que les Historiens Espagnols n'auront pas assez particulièrement expliquez, afin que ceux qui les liront, les trouuent escrits de telle sorte, qu'il n'y ait rien d'obmis, ny qu'ils puissent desirer.

FRANÇOIS PICARRE PASSE PLUS
auant dans sa Conqueste.

CHAPITRE X.

FRANÇOIS Picarre, & ses treize Compagnons, furent plusieurs mois en l'Isle Gorgonne, sans auoir ny tente, ny hutte d'vn país, où comme i'ay dit, il ne cesse iamais de pleuvoir. Les plus delicieux de leurs mérs estoient de grosses Couleures, tellement qu'on pouoit dire d'eux, qu'ils ne subsistoient que par miracle, & que Dieu le vouloit ainsi, pour faire voir par eux ses

hautes Merucilles: Aussi fust-ce par vn effet de sa Prouidence que les autres soldats associez s'en retournerent, afin qu'il fut manifeste à tout le Monde, qu'une œuvre si grande venoit de la permission d'en-haut, & non pas de l'industrie d'icy-bas. Car humainement parlant, il n'estoit pas possible que treize hommes seuls, eussent le courage d'entreprendre la Conqueste du Peru, puis que c'estoit folie, & temerité de l'imaginer, tant s'en faut qu'on le pût mettre en execution. Neantmoins la Misericorde Diuine, touchée de la misere de ces peuples Gentils; fortifia le cœur de ces Espagnols d'une valeur toute particuliere en l'execution de cette entreprise, afin de faire voir sa puissance en vn si foible sujet, comme il fit autresfois dans les cheveux de Sanson, & d'enseigner son saint Euangile à des Peuples qui en auoient si grand besoin.

Au bout de plusieurs mois (pource qu'on ne pût se hastier davantage) arriua le Nauire, que Diego d'Almagre leur enuoya, où il y auoit quelques provisions de bouche, mais point de soldats, ce qui fut par consequent vn secours si foible, qu'il sembloit les inuiter à reuenir, plustost que les encourager à passer outre. Mais Dieu qui produisoit en eux de cōtinuelles merueilles, voulut qu'ils se sentissent aussi forts, comme si tout le monde eut esté pour eux. Ils ne virent pas plustost le Nauire, qu'ils se resolurent de poursuiure leur route, pour voir quel païs, quelles gens, & quel monde il y auoit sous l'Equinoctial, où s'il y auoit des terres, les Espagnols les auoient à peine veues. Ils s'embarquerent ainsi avec d'estranges obstacles, & sortirent de ce Golphe, où il est tres-difficile de nauiguer. Ils faisoient ensemble l'office de Mariniers & de soldats, selon que la necessité s'en offroit. Ils alloient bord à bord, avecque de grands empeschements, à cause du vent du Sud, & des courans de cette Mer-là, qui le long de cette coste vont d'ordinaire du Sud au Nord. A n'en mentir pas c'est vne chose admirable que de les voir: Je voudrois tres-volentiers les pouuoir depeindre, en faueur de ceux qui ne les ont point veus: On diroit que, ce sont de furieuses Riuieres, qui se desbordēt sur terre d'un bord à l'autre, avecque tant de destours, tant de bruiet des vagues, & tant de bouillons d'escume, causez par l'impetueuse agitation de l'eau; que les Nauigateurs n'en passissent pas d'effroy sans cause, pour l'extrême danger qu'il y a qu'eux, & leurs Vaisseaux ne

soient engloutis, par l'impetueux tourbillon des flots irrités. Parmy ces Courans il y en a qui rendent l'eau toute trouble; & toute visqueuse, à cause de la vase: Et d'autres qui la laissent claire comme lait; Quelques-vns aussi sont fort vastes, pour ce qu'ils prennent vne grande estenduë de Mer; & les autres estroits au possible. Mais de moy ce qui m'estonnoit le plus estoit la grande difference que ie remarquois entre l'eau courante, & celle qui ne couroit point, qui estoit telle qu'il sembloit que ce ne fut pas vne mesme eau. Or comme celle qui court est si rapide, & si furieuse, que bien à peine le peut-on imaginer; L'autre au contraire est si calme aux deux costez du courant, qu'il semble qu'il y ait vne muraille entre deux. De vous dire au reste, où commence le Courant, & où il se va rendre, cela me seroit fort difficile, puis que j'ignore la cause de son mouvement. Il suffit que vous sçachiez qu'à raison des difficultez de ces Courans en vne Mer si peu cognüe, & de l'extrême inhumanité de ceux du pais; nos Navigateurs furent sur Mer vn assez long-temps, avec vne persëuerance tout à fait digne de leur petite troupe, composée seulement de 13. hommes, qui faisoient des choses qu'on ne sçauroit jamais louer assez hautement. Ils souffrirent cependant vne faim insupportable, & d'autant plus grande, que pour leur petit nombre, ils n'osoient descendre à terre, de peur des Indiens: si bien que les viures qui leur tombaient entre les mains, estoient plustost mandiez, ou pris par adresse, que gaignez par la force.

FRANCOIS PICARRE, ET SES TREIZE
Compagnons arriuent au Peru.

CHAPITRE XI.

DE Vx ans apres que nos Aduenturiers furent sortis de la Gorgonne, ils arriuerent enfin à la grande vallée de l'Amprz. Durant vne si longue navigation, ils continuerent leur route, sans sçauoir où ils alloient. Les traux qu'ils endurerent furent si grands, que ne les pouuant deduire comme il faut, ie les laisse à considerer à ceux qui ont leu plus particulièrement l'Histoire de cette descouuerte, pource qu'en cet endroit, plus

qu'en nul autre, les Historiens passent legerement, au lieu d'en desduire les particularitez par le menu. A Tumpiz nostre Seigneur fit vne de ses Merueilles en faueur de la foy Catholique, & de ceux du païs, afin qu'ils eussent le bon-heur de la recevoir pour le salut de leurs Ames. Cette merueille fut, qu'après que leur Nauire eut pris terre près de la Ville de Tumpiz, il prit enuie aux Espagnols de sçauoir quel païs c'estoit, pource qu'ils le virent mieux peuplé que les autres, & que les bastimens en estoient plus somptueux: Mais pource qu'ils ne sçauoient ny comme l'apprendre, à cause qu'ils n'osoient pas y enuoyer aucun de leur troupe, de peur que les Indiens ne le tuassent, ny s'y transporter tous ensemble, craignant d'encourir le mesme danger, ils ne pouuoient se resoudre à ce qu'il leur falloit faire. Ils estoient dans cette confusion, lors que Pierre de Candie, avec vn courage vrayement heroïque, & vne confiance de vray Chrestien; *Je veux, dit-il, m'y en aller tout seul, pour voir ce qu'il y a dans cette vallée, & quels Peuples l'habitent: Que s'ils me donnent la mort, vous n'aurez perdu qu'un seul compagnon; comme au contraire, si mon dessein reussit, vostre Victoire en sera plus grande.* Ce disant ils s'arma d'une cotte de maille sur son habit, d'un pot en teste des meilleurs qu'ils eussent, d'une Rondache d'acier, & d'une espée à son costé, outre qu'il prit en sa main droite vne Croix de bois, à peu pres de la longueur d'une aulne, en laquelle il se fioit plus qu'en ses Armes, pour estre le Symbole de nostre Redemption. Pierre de Candie auoit, à ce qu'on tenoit, la taille fort haute, & ie me l' imagine ainsi, pource qu'encore que ie ne l'eusse point cognu, il me souuient neantmoins qu'il auoit vn fils, autresfois mon compagnon d'Ecole à Beaba, qui monstroita assez qu'il tenoit de son pere, en ce que n'ayant que 11. ou 12. ans, il estoit vne fois plus grand que son aage ne sembloit requerir. En cet équipage ce vaillant homme s'en alla d'avecque ses compagnons, se recommandant à leurs prieres, & tira droit à la Ville, passant, & repassant auprès, avec vne desmarche graue, comme s'il eut esté Seigneur de toute ceste Prouince-là. Les Indiens, que l'arriuée du Nauire auoit tous mis en desordre; s'y mirent encore d'auantage, quand ils apperceurent vn homme si grand, tout couuert de fer de pied en cap, & ayant vne longue barbe, chose qu'ils n'auoient iamais veüe, ny mesme imaginée: Et d'autant que ceux qu'il auoit rencon-

erez par le chemin se mirent deuant, pour aller donner l'alarme à la Ville; Pierre de Candie y arriuant, trouua la forteresse pleine de gens qui estoient en armes. D'abord ils s'estonnerent tous de voir vne chose si estrange, sans sçauoir que dire, ny sans oser luy faire aucun mal, ne croyant pas que ce fut vn homme mortel. Mais enfin pour en faire espreuue, les principaux & le Curaca furent d'aduis del'exposer au Lyon, & au Tygre que Huayna Capac leur auoit enjoint de garder, comme nous l'auons dit en sa vie: ce qu'ils firent à dessein, afin que ces furieux Animaux le missent en pieces. Pedro de Cieça parlant des Conquestes, & des Exploits memorables que fit Huyana Capac dans cette grande Prouince de Tumpiz; touche succinctement cette Histoire, dont ie trouue à propos de rapporter les paroles, afin d'appuyer ce que ie mets en auant du tesmoignage de cét Authheur Espagnol; ce qui seruira beaucoup encore, pour faire voir les grandeurs, & les merueilles qui se remarquoient alors dans cette fameuse vallée de Tumpiz. Voicy donc ce qu'il en dit. *Les habitans de l'Isle de Punna se trouuant dans quelque different avec ceux du pays de Tumber, furent cause que les Capitaines de l'Ynca resolurent (ce qui leur fut bien facile) de se fortifier d'une Citadelle, pour preuenir les dommages que ces dissensions, & ces guerres, bien que petites, leur pouuoient causer vn iour. Comme donc la forteresse estoit sur le point d'estre acheuée, voila suruenir Huayna Capac, qui commanda qu'on eust à bastir le Temple du Soleil, près de la mesme forteresse de Tumbiz, & à mettre dedans 200. Vierges, & dauantage, qui fussent toutes belles, & filles des principaux Seigneurs du pays. Dans cette Place-là, qui deuant qu'elle fut ruinée estoit comme vn Arcenal tres-agreable à voir. Huayna Capac entrechoit vn Capitaine, ou si vous voulez vn Gouverneur, avec quantité de Mitimaes, ou de gens de Guerre, qui estoient là comme en garnison. Il y auoit encore des Magasins pleins de choses precieuses, & de toute sorte de provisions, tant pour la nourriture des Soldats qui gardoient la Place, que pour les gens de Guerre qui passoient par là: L'on tient mesme que par l'ordre exprés de l'Ynca on y mit dedans vn Lyon, & vn Tygre fort cruels, dont il commanda qu'on eust vn grand soing; & il est à croire que ces Animaux farouches, furent ceux mesmes auxquels on exposa le Capitaine Pierre de Candie, pour en estre deshiré en pieces, au temps que le Gouverneur François Picarrie, & ses treize compagnons arriuerent au Pern, qu'ils découvrirent tous les premiers, comme il se verra*

dans la troisieme Partie de mon Histoire. Dans la mesme forteresse de Tumbex il y avoit un grand nombre d'Orfevres qui travailloient sans discontinuer à faire quantité de vaisselle d'or, & d'argent, comme aussi divers joyaux, tant pour l'ornement du Temple, qu'ils estimoient sacré, que pour le service de l'Inca; Outre qu'on les employoit encore à forger des plaques des mesmes Metaux, pour en embellir les Temples, & les Palais. Quant aux femmes dediées pour le service du Temple, elles ne faisoient autre chose que filer, & preparer pour divers usages de la laine extremement fine. Mais pource qu'il est amplement parlé de cette matiere dans la seconde Partie de mon Histoire, où j'ay traité le mieux qu'il m'a esté possible, tant du Royaume du Peru, que de ses Incas, depuis Manco Capac, qui en fut le premier Roy, jusques à Guascar, qui en tint le Sceptre tout le dernier, & en droite ligne; ie n'en diray pas davantage dans ce Chapitre, &c.

C'est la Relation de Pedro de Ciega, parlant des grandes Richesses de Tumpiz, * & des furieux Animaux qui furent lancez contre Pierre de Candie; ee qu'il ne raconte icy qu'en general, se proposant comme il dit, d'en traiter plus amplement en son lieu, à sçavoir en la troisieme Partie de son Histoire, qui l'autre. n'est pas encore imprimée.

CHOSE MERVEILLEUSE ADVENUE à Tumpiz.

CHAPITRE XII.

POUR acheuer le Recit que nous avons entamé touchant le Lyon, & le Tygre qui furent lancez par Pierre de Candie; il faut sçavoir qu'aussi tost que ces Animaux farouches le virent, avant en main, comme bon Chrestien, le sacré signe de la sainte Croix, qui estoit la plus assurée de toutes ses armes; ils coururent droit à luy; Et perdant à mesme temps la cruauté qui leur est naturelle, se mirent à le flatter, aussi appriivoisez que s'ils eussent esté deux chiens, & se jetterent mesme à ses pieds. Cette merueille, qui ne pouvoit venir que de Dieu, transporta d'une incroyable joye Pierre de Candie, qui sans plus rien craindre, porta la main sur la teste, & sur les flancs de ces Animaux, y mettant la Croix dessus, pour donner à cognoistre à ces Gens,

tifs, que la vertu de cette Enseigne sacrée rendoit douces, & traitables les bestes les plus sauvages : D'où ils tirèrent cette coniecture, qu'il falloit absolument que cét Inconnu fut Fils du Soleil, qu'il auoit enuoyé du Ciel en terre; tellement qu'avec cette croyance ils s'en allerent à luy, & l'adorerent tous, comme Fils de ce grand Astre leur Dieu, puis le menerent en son Temple, dont ils luy monstrent les magnificences & les riches murailles, toutes couuertes de plaques d'or, pour luy donner à connoistre par là l'extrême veneration qu'ils luy rendoient.

Après luy auoir montré tout le Temple, & ce qu'il y auoit de vaisselle, & de ioyaux de grand prix, destinez, à ce qu'ils dirent, au seruice de leur Dieu; ils le menerent au Palais Royal des Yncas, qu'ils appelloient ses Freres, & qu'ils tenoient aussi pour fils du Soleil, le faisant passer par diuerses salles, anti-chambres, chambres, & galeries, où ce n'estoit qu'or de routes parts. Ils luy monstrent en suite la vaisselle de l'Ynca, où il n'y auoit rien qui ne fut de ce mesme metal, iusques aux chauderons, aux pots, & aux matmites de cuisine.

Au sortir de ces départemens ils entrerent dans les Iardina-ges, où entre plusieurs merueilles, Pierre de Candie y remarqua des arbrisseaux, des plantes, des herbes, des animaux, & diuers Reptiles, tous d'or, ou d'argent; representant si bien le naturel, que ce Voyageur estrange ne fut pas moins estonné de ces merueilles, qu'ils l'estoient eux-mesmes de voir vn homme fait comme luy.

PIERRE DE CANDIE VA RENDRE
*compte de ce qu'il a veu, à ses Compagnons, qui
 s'en retournent à Panama.*

CHAPITRE XIII.

L'ON ne scauroit croire avec quel transport de ioye, Pierre de Candie s'en retourna trouuer ses Compagnons, vers lesquels il doubla le pas, avec vne viftesse incomparablement plus grande, que celle qu'il auoit tesmoignée à s'en aller en la Ville de Tumpiz. Comme il les eut ioints, il leur fit vn long recit

de ce qui s'estoit passé en son voyage, & des grandes Richesses qu'il auoir veuës, qui luy sembloient au delà de toute imagination. Ses Camarades en furent d'abord si estonnez, qu'ils eurent peine à le croire, & se tintent néanmoins pour satisfaits de tant de peines qu'ils auoient eues à chercher des tresors, puis qu'ils n'estoient pas hors d'esperance d'en auoir abondamment, s'ils estoient hommes à les gagner. Mais comme ils ne pouuoient aller plus auant, pource qu'ils manquoient de forces, ils resolerent entr'eux d'en aller chercher à Panama, extrêmement aises d'auoir trouué ce qu'ils desiroient, & qui estoit mesme au dessus de leur pensée. Ils partirent tous, à la reserue de trois, selon Augustin de Garate, ou de deux, suiuant ce qu'en dit François Lopez de Gomare; & ce qu'ils demurerent-là, fut apparemment, ou pour voir ces grandes Richesses que Pierre de Candie leur auoit tant vantées, ou pour en auoir quelque eschantillon, si ce qu'on venoit de leur dire estoit veritable. Quoy qu'il en soit, on ne pût sçauoir ce qu'ils deuinrent; & bien que les Historiens Espagnols disent que ceux du païs les mirer à mort; si est-ce que les Indiens le nient, alleguant qu'ils n'estoient pas gens à les tuer, mais à les seruir, apres les auoir adorez pour Fils du Soleil; ce qui me fait croire qu'ils moururent de maladie, l'air de ce païs là estant fort mauuais pour les Estrangers. Ces deux ou trois doiuent estre apparemment ceux qui défailleut au nombre des treize; à raison dequoy ie n'ay pû auoir tant de connoissance d'eux, pour estre restez morts entre les Indiens, comme i'en ay eu de leurs compagnons. Ces Espagnols furent plus de trois ans à descouurir le Peru, comme le tesmoignent les Autheurs susnommez, & entre autres Augustin de Garate, quien parle ainsi.

Liv. 1.
Ch. 2.

Dom François Pizarre ayant eu cette connoissance du Païs, s'en retourna à Panama, apres auoir esté trois ans entier à la descouurir; ce qui ne fut pas sans s'exposer à de grands dangers, & à souffrir beaucoup de travaux, tant pour n'auoir pas des viures, qu'à cause des guerres & de la resistance des Indiens: à quoy il falloit ioindre les facheux contrastes que ses gens propres auoient tousiours ensemble, la plus-part se deffiant du riche butin, dont ils croyoient qu'on les lenroit. Mais la prudence de Dom François, & son grand courage pacifioient sous ces troubles, outre qu'il se fioit entierement aux soins de Diego d'Almagre, esperant qu'il ne manqueroit pas de luy enuoyer les viures, les soldats, les cheuaux, & les munitions de guerre, qui luy seroient neces-

saïres; Comme en effet, il n'y manqua pas: si bien que pour venir à bout de leur dessein, Dom François & luy firent de si grosses despences, qu'ils en demeurèrent pauvres, & engagés à de grandes sommes, &c. Voilà les paroles de Carate, à peu près conformes à celles de Ch. 109 Gomare, qui dit, *Que François Piçarre employa plus de trois ans à la descouverte du Pais, qu'on nomme Peru: durant lesquels il se fit remarquer, tant pour son extrême constance à souffrir la faim, & la fatigue, sans se rebuter ny des apprehensions, ny des dangers, où il se trouvoit exposé, que pour les bons mots qu'en de si grandes extremitez il avoit ordinairement à la bouche; Et voilà les sermes de cet Auteur en la conclusion de ce Chapitre.*

Durant les travaux insupportables que François Piçarre souffroit en cette Conquête, entre les autres paroles sententieuses, dont il entretenoit les gens à toute heure; il leur disoit ordinairement: *Malheureux que nous sommes de nous tuer, comme nous faisons, pour conquerir des Royaumes estrangers, sans considerer qu'àpres les avoir conquis, ils ne seront ny pour nous, ny pour nos Enfants, mais pour ceux des autres!* Paroles que j'ay souvent ouy repeter à ceux qui se trouvoient avec luy, quand il gagna cét Empire, & qui ne feignoient point mesme de declarer de quels Enfants Piçarre entendoit parler. Mais pour ne me rendre odieux, il est plus à propos de m'en taire que de le dire. Ce mesme langage fut tenu depuis assez souvent par les Associez susdits, lors qu'après leur Conquête ils se virent exposez dans les dangers des Guerres Civiles de Gonçale Piçarre, & de François Hernandez Giron, où la plus part d'eux moururent; ce que les vns & les autres disoient pour leurs interets, ne pouuant se taire de cette verité de François Piçarre, dont j'ay esté moy-mesme tefmoin.

VOYAGE DE PICARRE EN ESPAGNE,
où il demande la Conquête du Peru.

CHAPITRE XIII

FRANÇOIS Piçarre fit toutes les diligences imaginables, pour arriuer le plustost qu'il pût à Panama; où d'abord il entreteint Diego d'Almagre, & le Recteur Hernand de Luques ses compagnons, des Richesses incroyables qu'il avoit descouvert-

tes, dont ils se resioüirent infiniment : En suite dequoy ils trouuerent bon que François Piçarre fit voile en Espagne, pour y demander à l'Empereur Charles V. la Conqueste, & le Gouvernement du pais, que luy & ses compagnons auoient descouuert & employé pour cela 12000 Ducats, ou enuiron, dont ils emprunterent la meilleure partie, apres auoir fait de si grandes despenfes, que n'ayant plus dequoy y fournir, ilsestoient contrains de recourir aux emprunts.

François Piçarre estant arriué en Espagne, y fit son Rapport au Conseil des Indes, & descouurit à sa Majesté ce qu'il auoit fait, & veu, la suppliant de le vouloir gratifier pour les seruices passez, & presens, du Gouvernement de ce Pays-là, qu'il se promettoit de conquerir au hazard de sa vie, & à ses despens, ou de ses Amis, & de ses plus proches. Surquoy il offrit de si grands Tresors, & de si riches Royaumes, qu'il fit croire à ceux qui l'oüyrent parler, qu'il en disoit beaucoup plus qu'ils n'y en auoit, afin que tous ses beaux contes fussent de leurres, pour inciter plusieurs à s'en aller conquerir des Terres si riches en or, & en argent. Mais quelques années apres ils cognurent que les effects de ce qu'il disoit estoient montez incomparablement plus haut que ses promesses. Sa Majesté le gratifia de la Cõqueste, sous le tiltre d'Adelentado, ou de Capitaine, & Gouverneur general de tout ce qu'il gaigneroit de pays dans le Peru, qui fut deslors appelé *Castille la Neufue*, pour en marquer la difference avec l'autre Empire, que les Espagnols appellent *la Nouvelle Espagne*, qui ont esté gaignez tous deux de mesme façon, aux despens des mal aduisez, & des fols, qui sont les noms que les Estrangers donnent ordinairement à ceux qui les ont conquis à leurs despens.

François Piçarre fut deslors appelé *Dom François*, pource qu'au Breuet que luy donna sa Majesté, on l'honora du prenom de *Dom*, qui pour mieux qualifier les Gentils-hommes n'estoit pas si en vſage qu'il est maintenant : car toute sorte de personnes se l'approprient indifferemment ; si bien que les Indiens de mon pays, Nobles, ou non, pour auoir veu que les Espagnols en vſoient comme d'une marque d'honneur, en font aujourdhuy de mesme, à leur imitation. Et dautant que Diego d'Alimagre fut aussi associé des premiers à cette Conqueste ; Nous l'appellerons semblablement *Dom Diego*, pour n'estre pas

moins considerable que Dom François Pigarre; puis qu'ils ont esté tous deux esgaux. Comme donc ce Conquerant eut receu toutes ses Expéditions à la Cour d'Espagne, il se tint prest pour son voyage; Et accompagné de quatre freres qu'il auoit, ensemble d'une grande quantité de Noblesse d'Estramadure, il s'embarqua pour Seuille; si bien qu'à la faueur du bon vent il fut prendre terre à Panama: Mais le mal-heur voulut pour luy, qu'à son arriuée il y trouua Dom Diego d'Almagre, extrêmement fasché contre luy, de ce qu'il n'auoit daigné le faire participant des Prééminences, des Charges, & des Tiltres que sa Majesté luy auoit donnez pour marques d'honneur, puis qu'ils s'estoient associez tous deux, & dans les perils, & dans la despense, qui estoit plus grande de son costé, pour auoir employé plus de bien que luy dans ce Voyage, où mesme il auoit perdu l'un deses yeux.

En effet cette plainte là n'estoit pas trouuée iniuste, par ceux qui sçauoient comme les affaires se passoient; Car ils s'estonnoient fort de ce que Pigarre n'auoit daigné parler à sa Majesté de son Compagnon, & en attribuoient la faute à sa nonchalance, ou à la malice de ses Conseillers. Cependant ils furent toujours mal ensemble, iusques à ce que quelques-uns de leurs Amis les accorderent: Et ainsi ils tindrent prestes les choses nécessaires pour leur voyage. Mais comme les Amitiez reconciliées ont tousiours ie ne sçay quoy qui se ressent du passé, Dom Diego d'Almagre, qui s'estoit chargé de la despence, la faisoit beaucoup moindre qu'auparauant, & ne fournissoit pas mesme à Dom François, ny à ses freres, les choses qui leur estoient nécessaires: dequoy Hernand Pigarre, pour estre altier, & d'assez mauuaise humeur, s'offençoit particulièrement, & traittoit mal Dom Diego d'Almagre. se faschant mesme contre son frere de ce qu'il souffroit ces bassesses, & ces laschetes. A quoy il respondoit, qu'il estoit iuste d'endurer de Dom Diego, pource qu'en effet il ne se plaignoit pas sans cause de luy, qui violant le droit de leur Association, ne luy auoit apporté de la Cour aucune marque d'honneur. Car bien qu'il fut vray que le butin qu'ils faisoient, se deuoit partager entr'eux, comme entre camarades, & qu'on le dit à tout coup à Diego d'Almagre, pour le consoler, luy neantmoins n'en tenoit conte, & repliquoit à cela, comme genereux qu'il estoit, Qu'en toutes ses despences &

ses trauaux , il s'estoit tousiours proposé de trauailler plustost pour l'honneur, que pour le gaing : d'où nasquit aussi entre Piçarre, & Almagre vne si grande animosité, qu'elle ne se termina iamais, que l'vn n'eut tué l'autre, se faisant iuge en sa propre cause: Toutesfois dans cette conioncture ils s'accorderent enfin, par l'entremise de quelques personnes de qualité, que François Piçarre, & ses autres freres, plus affables qu'Hernand, firent agir accortement, & sous main, voyant bien que sans l'amitié de Dom Diego d'Almagre, il leur estoit impossible d'aller plus auant. Le Licentié Antoine de la Gama, que i'ay cognu à Cozco, où il auoit vn departement d'Indiens, fut le principal Autheur de cette Reconciliation, par laquelle il promit de céder à Dom Diego le tiltre d'Adelencrado, & de supplier sa Majesté de permettre qu'il l'eur; ce qui fut le seul moyen d'appaiser Dom Diego d'Almagre, qui en mesme temps donna près de mille Ducats à son compagnon, ensemble tout ce qu'il se trouua de prouisions, d'armes, de cheuaux avec deux Nauires qu'il auoit.

DE CE QVE LES ESPAGNOLS SOVF-
firent, depuis Panama, iusques à Tumpiz.

CHAPITRE XV.

DOM François Piçarre se mit à la voile, avec ses quatre freres, & les autres Espagnols, qui pûrent estre sans embarras dans les Nauires, où ils embarquerent aussi les cheuaux. Ils nauiguerent en intention de ne point prendre terre iusques à Tumpiz; mais ils en furent empeschés par le vent du Sud, qui est tout à fait contraire à cette route-là; ce qui fut cause qu'ils allerent prendre terre à vn autre Plage, à cent lieuës de Tumpiz; & qu'ayant enuoyé les Nauires à Panama, ils se resolurent d'aller par terre, cela leur semblant moins incommode, que de s'exposer au vent du Sud.

Mais ils se tromperent fort, pource que le vent, quelque contraire qu'il fut, ne leur eut pas esté si nuisible, que les diuers obstacles qu'ils rencontrerent en voyageant par terre: Car il n'est pas à croire quelle faim, & quelle fatigue il leur salut endurer.

pour la sterilité, & la rudesse du pays. Ils trouuerent de grandes Riuieres, qui s'engolfoient dans la mer, & plusieurs bras d'eau qui s'estendoient bien auant, & qui les contraignoient souuent de faire des Radeaux, tantost de bois, & de branches d'Arbres, tantost de Roseaux, de Ioncs, & de grandes Calebaces attachées l'une à l'autre. A cette sorte de Bac seruoit de Maistre Pilotte Dom François Picarre, pour estre plus adroit que les autres, & accoustumé à de semblables trauaux. Aussi les souffroit-il avecque tant de patience, & de courage, que bien souuent pour soulager ses compagnons, il trajettoit sur ses espauls ceux qui pour estre malades n'auoient pas la force de passer l'eau. Avec ces trauerses, & ces dangereux obstacles, ils arriuerent en la Prouince de Coaqui, où ils trouuerent des viures en abondance, & quantité d'Esmeraudes fines; mais ils estoient si mauuais Lapidaires, qu'ils en rompirent la plupart, s'imaginant que si elles eussent esté fines, elles ne se fussent iamais cassées, quelques grands coups de marteau qu'on leur pût donner sur vn Enclume, où ils en faisoient l'espreuue: le mesme leur arriua dans Tumpiz, où ils en rompirent aussi plusieurs autres de si grand prix, qu'elles valoient 3. ou 4000. Ducats, tant, du plus que du moins. Mais ceux-cy ne furent pas les seuls qui firent cette sortise; Ceux qui entrerent vn peu apres dans le pays, avecque l'Adelantado Dom Pedro d'Aluarado, les imiterent, & rompirent comme eux, plusieurs Esmeraudes, & Turquoises, qui valoient vn tresor inestimable. Cette perte fut suivie d'une autre disgrâce, qui aduint aux gens de Picarre; Ce fut vne maladie estrange, & abominable: car à tous ceux qu'elle faisoit, il leur venoit d'abord à la teste, au visage, & par tout le corps, certaines pustules, qui au commencement ne paroissoient pas plus grandes que des verruës; mais elles s'augmentoient insensiblement, & deuenoient grosses & noires, comme des figues, à qui elles ressembloient. C'estoit chose horrible, de voir combien il en distilloit de pus, & de sang corrompu. Ceux que ce mal affligeoit souffroient vne douleur insupportable, & ne pouuoient endurer qu'on y portast la main. Ils auoient le visage tout plein de ces verruës malignes, qui s'attachent tantost au front, & aux sourcils, tantost à la bouche, & aux narines, tantost aux oreilles, & mesme au dessous de la barbe. Plusieurs moururent de ce mal contagieux: d'autres en guerirent, quoy

que neantmoins il fut plus commun à ceux du Peru qu'aux Espagnols; trois ou quatre desquels en estans atteints long-temps apres dans la Ville de Cozco, où ie les vis, en reschapperent heureusement. Ce fut sans doute quelque influence maligne, qui causa ce fleau, dont il ne se parle plus maintenant. Or bien que tous ces traux, ces maladies, & ces morts estranges fussent aduenues aux Compagnons de Piçarre, il ne laissoit pas toutesfois de prendre courage, de continuer sa route, & de penser ses Amis, & ses soldats le mieux qu'il pouuoit. Il enuoya dans Panama 24. ou 25000. ducats en or, tant pour faire valoir sa Conqueste, que pour donner à Dom Diego d'Almagre, de quoy l'assister en son voyage; Où vous remarquerez qu'une partie de cét or vint de bonne guerre, & l'autre de la Rançon des prisonniers Indiens.

Ces Voyageurs ayant bien marché, passerent outre iusques à Tumpiz, où ils trouuerent d'autres Espagnols, que le bruit des grandes Richesses du Peru auoit fait sortir de Niçaraga. Ils auoient pour Capitaines, Sebastien de Belalcaçar (car c'est ainsi que s'appelle ce beau Chasteau, dont il a pris son nom, & non pas Beralcaçar, comme on l'escriit ordinairement) & Iean Fernandez, dont on ne sçait pas le país. Dom François Piçarre se réjouit fort de leur venuë, pour le grand besoin qu'il auoit de gens pour sa Conqueste. Le nom de la famille de Belalcaçar estoit Moyano, mais il prit celuy de sa Patrie, pour se rendre plus fameux, & plus recommandable. Ils estoient trois freres; & vne fille, qu'on disoit estre nais d'un seul accouchement: l'Aîné s'appelloit Fabien Garcia Moyano, & la fille Anastasie Moyano, qui n'eut pas moins de vertu que les Cadets eurent de courage, à l'imitation de leur Aîné: l'en ay eu la Relation d'un Religieux de l'Ordre de Saint François, faisant sa demeure dans le celebre Couuent de Sainte Marie des Anges: Et d'autant que pour estre natif de Belalcaçar, il connoissoit tous les parens de Sebastien; il m'en donna des Memoires, comme il sceut que i'auois dessein d'escrire cette Histoire; de quoy ie fus extrêmement aise, pour le desir que i'auois de parler de la naissance extraordinaire d'un si grand homme.

*LES ESPAGNOLS GAGNENT L'ISLE
de Puña, & la Ville de Tumpiz.*

CHAPITRE XVI.

DOM François Piçarre voyant qu'un nouveau secours d'Espagnols luy estoit venu, se resolut d'aller à la Conquête de l'Isle de Puña, pour avoir appris qu'elle abondoit en or, en argent, & en autres Richesses. Il en passa le traict sur des Radeaux, avec beaucoup de dangers, pource qu'elle est aduancée de 12. lieues dans la Mer. A son arriuée il eut diuerses batailles contre ceux du païs, qui luy tuerent quatre de ses gens, & en blesserent plusieurs, entr'autres Hernand Piçarre, qui receut vn dangereux coup au genouil, mais enfin la Victoire demeura aux Espagnols, qui tuerent vn grand nombre d'Indiens, & gagnerent sur eux vn riche butin d'argent, d'or, & d'autres choses de prix, qu'ils partagerent aussi-tost entr'eux, pour preuenir l'arriuée des Soldats, qu'Hernand de Sorto deuoit amener de Niçaraga, où il estoit allé dans vn Nauire, de la part de Diego d'Almagre, pour faire venir à Dom François Piçarre vn secours de gens, & de munitions de Guerre, qui deuoit bien-tost arriuer, comme il fit, suivant les nouuelles que le mesme Hernand en auoit eues.

Dés aussi-tost que Dom François Piçarre se vidassez de gens pour aller à Tumpiz, il prit sa marche de ce costé-là; & pour gagner les volontez des habitants, il s'aduifa de leur enuoyer, sous la conduite de trois Espagnols, qu'il deputa pour Ambassadeurs, 600. Captifs de leur païs, qu'il trouua dans l'Isle de Puña. Il se porta pour Intercesseur enuers les habitants, & les rechercha de paix, & d'amitié, en faueur des mesmes Captifs, ou Prisonniers, qui promirent à leur parlement de rendre de signalez seruices aux Espagnols, pour recognoissance de la liberté qu'ils leur auoient donnée. Mais comme gens ingrats & barbares, se voyant parmy leurs Compatriottes, ils firent tout le contraire; & au lieu de dire du bien des Espagnols, ils les déchirerent à force de calomnies, les accusant d'estres auares, & possédez d'une insatiable conuoitise d'or, & d'argent, iusques-

là meſme, que pour les rendre plus odieux, ils les tancerent de fornication, & d'adultere: d'où ils ſ'enſuiuit que ceux de Tumpiz, pour eſtre mal informez, ſ'enſcandaliferent de telle ſorte, que ſans daigner oſtyr les trois Eſpagnols, ils les liurerent entre les mains des Bourreaux, pour les mettre à mort, & les ſacrifier, comme ils firent, avec vne cruauté qui paſſa iuſques à la Rage. Voila comme en parlent Auguſtin de Carate & Gomare: mais le Pere Blas Valera, quel'on doit croire plus que pas vn autre, dit que ces beaux contes ne furent que pures imaginations des Eſpagnols, fondées ſur ce qu'il ne ſe parla plus depuis de ces trois Soldats: neantmoins à quelque temps de là le Gouverneur ſceut au vray que l'vn ſ'eſtoit noyé par ſa faute dans vne Riuiera, & que les autres eſtoient morts de diuerſes maladies, à cauſe de l'intemperie de l'air, qui eſt grandement nuſible aux Eſtrangers, comme nous auons dit en vn autre endroit. Auſſi n'eſt-il pas à croire que les Indiens les euſſent voulu tuer & ſacrifier, apres auoir veu la merueilleuſe aduenture de Pierre de Candie, touchant le Lyon, & le Tygre, dont il a eſté parlé n'aguere, qui fut cauſe qu'ils le creurent de la Race du Soleil.

Comme il fut queſtion de prendre terre à Tumpiz, Dom François Piſarre ſe vid bien en peine avecque ſes gens, qui pour ne ſçauoir gouverner les Radeaux, couraient fortune à tout coup de couler à fonds, à cauſe de l'agitation des vagues, qui eſt furieuſe en cette coſte-là: Mais enſin ils firent leur deſcente, & ſ'en allerent droir à la ville, où ils donnerent diuers combats, dont ils demeurerent Victorieux: Plusieurs des Ennemis y furent tuez ſur la place; & cét eſchec eſtonna ſi fort les autres, qu'il les obligea de ſe rendre entierement, comme ils firent, croyant que cette diſgrace leur fut arriuée par vne iuſte punition du Soleil. Et d'autant qu'ils voyoient par eſpreuue, que les Eſpagnols ne ſe laſſoient point d'auoir de l'argent, de l'or, & de la Pierrierie, ils leur en donnerent quantité, pour ſe les rendre Amis, & le Curaca, Seigneur du lieu, leur vint rendre hommage.

Le bon ſucces de cette iournée reſioiit tellement les Eſpagnols, qu'ils reſolurent entr'eux de jeter en ce lieu-là les fondemens d'une Ville qu'ils appellerent *Saint Michel*, pource qu'elle fut fondée le iour de ſa Feſte. La premiere peuplade d'Eſpagnols dans le Peru, fut dans ce Bourg-là, où quelques-uns d'entr'eux demeurerent, pour y receuoir ceux qui vien-

droient de Niçaraga, & de Panama; Il ne faut pas oublier que cette fondation se fit en l'an 1531. Or pource que Dom François Piçarre manquoit de soldats; pour en auoir promptement, il enuoya ses trois Nauires à Panama, & la valeur de plus de 30000. Ducats en or, & en argent, oultre plusieurs riches Esmeraudes, pour monstrier par là les grandes Richesses de ce païs de Conqueste. Il faut remarquer en suite de cecy, qu'entre les autres gratifications que sa Majesté Imperiale fit à Dom François Piçarre; il luy permit d'auoir près de luy 24. Halebardiers, tant pour la garde ordinaire de sa personne, que pour mieux authentifier sa Charge. Comme il eut donc pris la Ville de Tumpiz, il voulut establir cette garde, afin d'entrer plus auant dans le païs, avec plus de pompe qu'il n'en auoit fait paroistre iusques alors: Mais quelques promesses qu'il sceut faire à ceux qu'il vouloit obliger à le seruir en cette qualité-là, pas vn d'eux n'y voulut entendre, ce qu'on ne pût imputer qu'à l'humeur altiere, & à la bizarrerie Espagnole, qui est telle que ceux de cette Nation, quelques hùbles qu'ils soient, quād ils abordent en ce païs, y deuiennent si orgueilleux tout à coup, que les grandes esperances qu'ils conçoieūt, leur enflēt le cœur d'une façon extraordinaire, comme ie l'ay ouy dire à plusieurs; tellement qu'il n'y eut que deux soldats que i'ay connus, qui accepterent les halebardes; ce qui ne diminua rien de leur bonne estime, ny mesme de leur valeur, qu'ils tesmoignerent depuis, tant en la Conqueste de cēt Empire-là, que dans le cours des Guerres ciuiles, où ils furent honorez de charges Militaires, & mesme de bons Departemens d'Indiens. Je ne les nomme point, pour certaine consideration, & me contente de dire qu'ils moururent entre les mains de leurs Ennemis.

Après que le Gouverneur Dom François Piçarre eut pacifié la Prouince de Tumpiz, & sa frontiere, d'où il tira de grandes Richesses; il entreprit de passer outre, & d'aller à Cassamarca, pour y voir le Roy *Atahualpa*, des prodigieux Tresors duquel il auoit appris des choses à peine croyables; Mais quelques grands qu'ils fussent, ils n'estoient que des beueuës, à comparaison de ceux qu'il auoit trouuez à Tumpiz. En ce voyage ils passerent vn desert sablonneux, ayant d'estenduë plus de vingt lieuës, & faillirent d'y mourir de soif par vn excez de chaleur, & à faulte d'eau, dont ils n'auoient daigné faire prouision, pour estre

encore Nouices en ce pais-là: Toutesfois apres y auoir beaucoup souffert, ils arriuerent enfin en certaines vallées extremement agreables, & fertiles, où trouuant toutes choses en abondance, ils s'y rafraischirent à loisir, & se refirent de tous les maux qu'ils auoient soufferts par le passé: En ce chemin-là vint à la rencontre de Dom François Picarre, vn Ambassadeur du mal-heureux Huascar Ynca, sans qu'il fut possible de iuger comme il l'auoit pû enuoyer, de la façon qu'il estoit tenu de prés entre les mains de ses Ennemis; ce qui fit croire que c'estoit quelque Curaca des siens, qui luy rendoit ce bon office, touché de compassion, de ce qu'on traittoit si tyranniquement le vray Ynca, Seigneur legitime de ce grand Empire. Par cette Ambassade il demandoit auec vne humilité profonde, *Que les Espagnols (puis qu'ils estoient fils de son Dieu Viracocha, & qu'ils se disoient estre là venus pour la deffence des Innocens) voulussent prendre sa cause en main, & le vanger des outrages qu'on luy faisoit: C'estoit tout le contenu de l'Ambassade, qui fit soubçonner qu'elle ne venoit point de Huascar, mais de quelqu'un de ses Amis, qui prenoit part aux miseres, & à l'emprisonnement de ce pauvre Prince. Le Gouverneur respondit qu'il l'assisteroit, & qu'il n'estoit en chemin que pour arrester le cours de ces violences, & autres semblables, en faueur de ceux à qui on les feroit.*

DE L'AMBASSADE, ET DES GRANDS
presens qu'Atahualpa fit aux Espagnols.

CHAPITRE XVII.

LE Capitaine General receut vne autre Ambassade, beaucoup plus solemnelle que la precedente. Elle luy fut faite de la part du Roy Atahualpa, par son frere Titu Aautachi, qui dit en peu de paroles, *Que l'Ynca enuoyoit feliciter de leur bien-venuë les Fils de son Dieu Viracocha, & leur faire present des fruits du pais, pour vn tesmoignage du grand desir qu'il auoit de les seruir de toutes ses forces: Qu'il les prioit au reste de ne se laisser manquer de rien par le chemin, & de demander librement tout ce qu'il leur faudroit, qui leur seroit abondamment donné à l'heure mesme, Qu'il desiroit passionnement de les voir, & de les seruir, comme ses Freres,*

pour estre fils du Soleil leur Pere, & que tous les Vassaux le croyoient de mesme que luy. Voylà sommairement ce que dit l'Ambassadeur au nom de son Roy; puis s'adressant pour son particulier au Gouverneur, pource qu'il luy fut ainsi enjoint, il y adjousta ces paroles; *Inca Viracocha* fils du Soleil, puis que ie suis si heureux que de te faire cette Ambassade, j'ose prendre la hardiesse de te supplier de m'accorder trois choses: La premiere, de vouloir contracter vne amitié perpetuelle avecque mon *Inca*, qui est le Roy *Atahualpa*; la seconde, de pardonner aux nostres toutes les offenses qu'ils peuuent auoir commises contre toy, ou par mesgarde, ou par ignorance, ne seigniant point de nous employer, en quoy que ce soit, où nous te pourrons seruir, afin que tu connoisses par là l'extrême desir que nous en auons: & la troisieme, Que tu n'exerces point sur les peuples de *Cassamarca*, & des autres Prouinces que tu trouueras allant plus auant la punition de mort que tu as faite en l'Isle de *Puna*, en la valée de *Tum-piz*, & en quelques autres endroits, par l'expres commandement du grand Dieu *Viracocha* ton Pere, & le nostre; Mais qu'au contraire, tu apaises sa colere, & le portes à nous pardonner les fautes que nous auons faites contre luy; Dequoy nous te prions aussi à nostre esgard, & de vouloir user de clemence en nostre endroit, puis que tu es veritablement *Inca* fils du Soleil.

Cela dit, il fit venir les presens qu'on luy enuoyoit, & à ses gens, que les Capitaines, & autres Officiers qui en auoient la charge, mirent aussi-tost deuant le Gouverneur. C'estoient des Agneaux, des Brebis & des Moutons du païs, avecque de grandes tranches de venaison de leurs bestes fauues, comme *Huanacus*, *Vigoignes*, *Cerfs*, *Cheureüils*, *Daims*, & autres semblables Animaux, dont ils en offrirent plusieurs en vie, de châtue gente de venaison coupée par tranches. Ils presenterent encore quantité de Lapins, tant sauuages, que domestiques, plusieurs *Perdrix* viuentes, & mortes; des Oiseaux de Riuiere, & d'autres en tres-grand nombre; du Mahiz en grain, & en pain; diuers fruiçts secs, & verds; du Miel en abondance; de cette sorte de Poiure qu'ils appellent *Vehu*, & quantité de breuage fait de mahis, & d'un autre grain nommé communément *Mulli*. A toutes lesquelles choses ils adiousterent vn autre present des plus fines estoifes dont le Roy s'habillât, & des plus exquis Brodequins qu'il eut accoustumé de porter; ensemble diuers Perroquets, Singes, Guenuches, Reptiles, & autres ani-

maux du pays; En vn mot, ils n'obmirent rien de ce qu'ils creurent pouuoir agreer à leurs hostes. Mais le meilleur fut qu'ils estalerent plusieurs Vases, Coupes, Escuelles, Plats, & Bassins, d'or, & d'argent, pour le seruice de la table, sans y comprendre quantité de Turquoises, & de fines Esmeraudes. Outre tout cecy le plus honorable present qu'ils firent au Gouverneur, fut de deux Brasselets d'or, par eux appelez *Chipanas*, qu'ils ont accoustumé de porter au bras gauche; & quoy qu'ordinairement ils n'en ayent qu'un; l'Ynca neâtmoins en enuoya deux, afin que le Gouverneur eut de quoy changer. Ce Brasselet estoit vn prix de Milice; & vne marque d'honneur, particuliere à ceux du Sang Royal, & aux Capitaines, & Soldats, qui s'estoient signalez à la Guerre par quelque belle action; pour recompense de laquelle le Roy leur donnoit de sa main propre cét honorable Ioyau, qu'il s'aduifa d'enuoyer à Dom François Pigarre, pour deux raisons principales: La premiere, pource qu'il le tenoit pour Fils du Soleil, & du Dieu *Viracocha*; Et la seconde, à cause que ses actions guerrieres luy faisoient croire que c'estoit vn Capitaine d'une valeur extraordinaire.

Comme on eut présenté toutes ces choses l'une apres l'autre, Titu Aautachi fit son compliment au Gouverneur, & aux Espagnols, lesquels il pria de luy vouloir pardonner la hardiesse qu'il auoit prise de leur donner ces bagatelles, qu'il confessoit estre indignes des fils du Soleil, y adioustant qu'on tascheroit de leur rendre à l'aduenir des seruites plus considerables.

Le Gouverneur, & ses Capitaines estimerent fort le compliment de l'Ambassadeur, & encore plus ses presens, dont ils remercierent l'Ynca, & luy en suite, qu'ils ne prenoient que pour vn Ambassadeur ordinaire: Mais quand ils sceurent qu'il estoit frere du Roy, ils luy rendirent de grands honneurs, & plusieurs ciuilitiez, dont il fut extremement satisfait. La responce qu'ils luy firent en peu de paroles, fut, *Que les Espagnols estoient la venue de la part du Souuerain Pontife, pour desabuser ceux du pays de leur Idolatrie, & les instruire en la vraye Religion des Chrestiens; & que par mesme moyen l'Empereur, ou le Roy d'Espagne, qu'ils dirent estre le plus grand Prince de la Chrestienté, les auoit là enuoyez pour contracter Amitié, & Alliance avecque l'Ynca, & par consequent avecque tous ses sujets, auxquels ils ne prenoient aucunement de faire la Guerre, ny autre chose qui les peust fascher: surquoy ils conclurent, qu'ils*

s'entretiendroient de cela plus à loisir, & de plusieurs diuerses particularitez qu'ils auoient à dire à l'Inca. Gomare, & Augustin de Carate ne font mention ny de ces presens, qui estoient si grands, & si riches, ny de la qualité de celuy qui les fit, qui estoit Frere du Roy, ny de la responce du Gouverneur; Ils parlent seulement des Brodequins, qu'ils apportèrent au Gouverneur, & particulierement des Brasselets, encore les appellent-ils) & ie ne puis m'imaginer pourquoy) du nom de Manchettes, comme pourroient estre celles d'une chemise, sans considerer que les Indiens du Peru n'en porterent iamais aucunes.

Le Roy Atahuallpa enuoya cette Ambassade, & ces Presens aux Espagnols, pour appaiser le Soleil, s'imaginant que les Indiens de l'Isle de Puña, ceux de Tumpiz, & les Peuples d'alentour l'eussent offensé, pour leur auoir résisté, & tué quelques-uns de leurs gens, ainsi que nous auons dit. A raison dequoy, comme luy & ses sujets les tenoient pour Fils de Viracocha, & pour estre de la Race du Soleil; aussi craignoient-ils que pour leur peu de respect enuers eux, quelques grands malheurs ne leur arriuaissent. A cette crainte s'en trouua jointe vne autre bien grande du costé d'Atahuallpa, qui fut de voir accomplie la prediction de son Pere Huayna Capac, qui auoit dit, *Qu'après la fin de ses iours entreroient dans ses Royaumes des Peuples qu'on n'auoit iamais veus, ny meisme imaginez, qui osteroient à ses Fils l'Empire, bouleuerferoient son Estat, & destruiroient son Idolatrie:* De maniere que ce Prince creut en voir l'effet, dès qu'il sceut que ce peu d'Espagnols, entrez dans ses terres, auoient mis à mort tant d'Indiens à Panama, en la Ville de Tumpiz, & en quelques autres Contrées, dont les habitans croyoient fermement que cette punition vint du Soleil qu'on auoit offensé. Voila pourquoy il apprehendoit qu'il ne luy en arriuat autant & à toute sa famille. Or ce qu'il recommanda particulierement à l'Ambassadeur son frere, qu'il demandât à son propre nom trois choses au Gouverneur, pour recompense de son Ambassade; fut afin qu'on ne le blasmat de lâcheté, & de peu de courage, si son frere les eut demandées de sa part. Toutes ces craintes, & ces alarmes auilirent le cœur d'Atahuallpa iusques à sa Mort, & furent cause qu'il ne daigna résister aux Espagnols, ny user de sa puissance pour les exterminer de ses terres; si ce n'est qu'on veuille dire, comme il est vray semblable, que ce fut d'un costé vn chastiment

qui se deuoit à ses cruautéz, & à son Idolatrie; Et de l'autre vn effect de la Misericorde Diuine, pour attirer ces Gentils dans le Giron de son Eglise.

Après le Partement de l'Ambassadeur, les Espagnols s'aduiferent de certaines choses, qui partagerent leurs opinions. Les vns disoient, que tant plus estoient riches les presens qu'on leur venoit de faire, tant plus il s'en falloit défier; Que par ces leurrez on les vouloit attirer, & les endormir avec ces pauors, pour les prendre au despourueu, & les mettre à mort plus facilement: D'où ils concludoient qu'il se falloit tenir sur ses gardes plus que iamais, & considerer qu'un si grand bien n'estoit pas bien, mais plustost malice, & fourberie. Les autres, dont le nombre se trouua plus grand, & le sentiment contraire, mirent en auant, Qu'encore que les loix de la guerre leur commandassent d'vser tousiours de precaution; cela n'empeschoit pas pourtant qu'on ne deust beaucoup louer la magnificence de l'Ynca, la douceur de ses parolles, & la Maiesté de son Ambassade, pour laquelle il auoit enuoyé son propre Frere; la prudence, & la courtoisie duquel auoit paru sans doute en tous ses raisonnemens; Que s'il y auoit eu quelque faute, il s'en falloit prendre à l'ignorance du Truchement, qui pour ne sçauoir la langue de Cozco, ny l'Espagnole non plus, auoit fait dire à l'Ambassadeur quantité de choses qui n'estoient pas de son intention; Pour preuue dequoy, adioustoient-ils, au lieu de s'expliquer nettement, & d'accommoder ses periodes à peu près à celles du Prince Indien, il en auoit retranché la moitié, en termes qu'on ne pouuoit entendre: de telle sorte qu'elles se contredisoient, au grand desplaisir de ceux qui l'oysient parler; & qui n'y pouuant mettre remede, estoient contrains de les comprendre comme ils pouuoient.

La nuit suiuiante, & plusieurs iours après, ils se regalerent des presens, & des viures qu'Atahualpa leur auoit faits en grande abondance. Après cela, ils continuerent leur marche droit à Cassamarca, où ils pensoient trouuer le Roy. A leur arriuée dans le pais, il y furent grandement bien receus des Indiens, qui par l'express ordre d'Atahualpa, s'assemblerent tous, tant Gentilhommes, que Plebeiens, pour receuoir les Descendans du Soleil, & les fils de leur Dieu Viracocha. Le traitement qu'ils leur firent fut magnifique, & leur logis tout semé de fleurs, & d'herbes

d'herbes odorantes, outre les grands preparatifs de viandes, & de toute sorte de boissons, qui furent faits sans y rien espargner par l'ordre d'Atahualpa. La principale charge en fut donnée au Curaca, Seigneur de Cassamarca, qu'on appelloit Cullqui Human; qui pour tesmoigner l'obeïssance qu'ils deuoient tous à leur Roy, les incitoit continuellement à regaler, & servir les Espagnols. Mais vn des plus notables seruices qu'ils leur rendirent fut, qu'ayant pris garde que leur Cheuaux machoient leur frein, & s'imaginant qu'ils se nourrissoient de fer, ils mirent près d'eux quantité d'or, & d'argent, leur disant qu'ils mangeassent de ces Metaulx qui leur sembloient meilleurs que du fer: dequoy les Espagnols aussi aises, comme ils estoient estonnez de leur sortise; *Apportez en dauantage*, leur disoient-ils, *si vous voulez que ces Animaux vous aiment, & qu'ils ne vous fassent aucun mal.*

LE GOUVERNEUR ENVOYE DES
Ambassadeurs au Roy Atahualpa.

CHAPITRE XVIII.

LE iour d'apres, le Gouverneur tint Conseil avecque ses Freres, & ses Capitaines, touchant l'Ambassade qu'on deuoit enuoyer au Roy Atahualpa, pour l'aduertir de celle qui les obligeoit à venir à luy de la part du Pape, & de l'Empereur: ce qu'il iugea tres à propos, afin qu'il ne semblast pas que luy ny ses gens se voulussent monstrier ingrats de la bonne reception, & des presens qu'il leur auoit faits. Surquoy ils resolurent ensemble, que puis que l'Ynca leur auoit enuoyé pour Ambassadeur vn de ses Freres, il falloit de mesme que le Gouverneur luy en enuoyast vn autre des siens, afin qu'il y eut correspondance en qualité, puis qu'il n'y en pouuoit auoir en dons.

Hernand Pizarre, & Hernand de Sorto furent nommez pour cette Ambassade, & pour aller trouuer Atahualpa. Il n'estoit pas loin de Cassamarca, & se diuertissoit dans vne Maison de plaïssance, où s'estoient assemblez plusieurs Gentilshommes & soldats, pour y reformer certaines choses que la licence des Guerres auoit déreglées. Pour cette mesme fin, l'Ynca faisoit

de nouvelles Loix, qui ne buttoient qu'à mieux affermir sa tyrannie & mettre en seureté sa personne, faisant acceroire que son Pere le Soleil luy auoit reuelé qu'il faloit que cela fut; & tous les autres en disoient de mesme, afin que les actions en eussent plus de credit & d'autorité. Où il est à remarquer, qu'encore qu'Atahuallpa eut fait mourir tout ce qu'il pût trouuer de personnes de Sang Royal; il ne laissoit pas toutesfois d'apprehender ce qui en estoit resté, bien qu'en petit nombre, ny de craindre que le temps ne fit reconnestre à l'aduenir, par voye de Religion, pour Ynca, & Roy legitime, celui à qui la Couronne appartiendroit par la proximité du Sang. Pour empescher donc que cela n'aduint, il prenoit pour pretexte de ses Ordonnances, que le Soleil en estoit luy-mesme l'Aurheur, afin de tenir en bride, & pacifier par ce moyen tous les Peuples de cét Empire là.

Les deux Ambassadeurs menerent avec eux le Truchement Indien appelé Philippe, natif de l'Isle de Puña, pource qu'ils ne s'en pouuoient passer, quoy qu'il fut, comme i'ay dit, extrêmement ignorant en la langue de Cozco, & encore plus en l'Espagnolle. Ils furent suivis de 200. Gentils-hommes Indiens, auxquels le Curaca de Cassamarca commanda qu'ils accompagnassent ces deux Espagnols, comme il sceut qu'ils s'en alloient voir son Roy; & qu'ils fissent mesme tout ce qu'ils leur diroient, y allât-il de la vie. Si tost que les deux Ambassadeurs sortirent de Cassamarca, ils enuoyerent au Roy Atahuallpa vn des principaux Indiens de leur fuite, pour l'aduertir de leur venue, & luy demander permission de paroistre deuant son Altesse. L'Ynca respondit, *Qu'il seroit bien aise de satisfaire au desir qu'il auoit depuis quelques iours de iouyr de leur priſence,* & enuoya tout à mesme temps vn Mestre de Camp avecque sa Compagnie, pour s'en aller receuoir ces Fils du Soleil, & les amener deuant luy avecque veneration. Cette response si obligeante, & la certitude qu'eurent les Espagnols qu'on s'en venoit au deuant d'eux, leur firent perdre la crainte qu'ils eurent, quand on leur dit qu'il auoit avecque luy pour sa garde 30000. hommes. Cependant comme ils s'acheminoient tousiours au Palais du Roy, à peine furent-ils à my. chemin, qu'ils virent paroistre dans vne Plaine les gens de Guerre Indiens, qui s'en venoient au deuant d'eux. Alors Hernand de Sotto, pour leur donner à cognoistre que s'ils vouloient faire les mauuais, il suffisoit luy seul pour les exter-

miner tous ; poussa son Cheual à toute bride, iusques à ce qu'il fut près du Mestre de Camp, au lieu duquel les Historiens Espagnols veulent que ce fut le Roy Atahualpa : Car l'un d'eux assure, que Hernand de Sotto, maniant son Cheual à courbettes, s'en alla iusques au Siege du Roy, qui ne bougea point, encore que le Cheual l'eut choqué, & qu'il fit mesme mourir plusieurs Indiens, pour s'en estre fuy des Cheuaux, quand ils les virent galopper. Mais cét Autheur-là se trompa fort, aussi bien que celuy qui s'aduisa de luy faire cette belle Relation sur le sujet d'Atahualpa, & de Hernand de Sotto ; estant bien certain que l'Ynca ne fit mettre à mort aucun de ceux qui fuirent, Aussi ne fut-ce pas vn crime que de s'escarter, comme ils firent, mais plustost vne maniere de respect, dont ils vsèrent, pour laisser passer les Espagnols, qu'ils voyoient monter sur des Cheuaux, & qu'ils tenoient pour Fils du Soleil ; Que s'ils eussent fait autrement, ils auroient creu commettre vn grand sacrilege, & mespriser ces hommes-là, qu'ils appelloient Diuins, & venus du Ciel : D'ailleurs, Atahualpa n'auoit pas si peu d'entendement, que de faire tuer en la presence des Ambassadeurs, des Indiens qui les auoient honorez avecque veneration ; Il scauoit assez que cela ne se pouuoit, à moins que de prouoquer les Espagnols à la Guerre, au lieu d'entretenir la Paix avec eux, pour se mettre à couuert des apprehensions & des craintes qu'ils auoient. Quant à Hernand de Sotto, qu'on auoit esleu pour Ambassadeur ; y auoit-il apparence qu'il eut esté si desobligéant, que de pousser son Cheual contre le visage d'un Roy, auquel il deuoit parler de la part du Souuerain Pontife, & de l'Empereur ? Certainement tous ces contes-là ne sont que de pures fables, qui me font trouuer estrange qu'il y ait en Espagne des gens si malins, que ne pouuant rendre compte au vray de ces choses aduenües si loing ; ils prennent plaisir à inuenter ces extrauagances qu'ils debitent aux despens de l'honneur d'autrui.

L'Ynca Atahualpa tesmoigna en certaines choses beaucoup de franchise, & de generosité aux Espagnols : Aussi auoit-il plusieurs bonnes qualitez, dont nous traiterons ; vne grande vivacité d'esprit ; vne humeur affable, & vne adresse admirable en tout ce qu'il faisoit : Car puisque nous auons parlé de ses tyrannies ; ce seroit assurément luy faire tort, que de taire ce qu'il y auoit de bon en luy, veu que l'Histoire oblige ceux qui l'escrit-

uent, à publier la verité toute pure, sur peine d'estre mocquez du Monde, & de passer pour infames. C'est pourquoy ie me propose de ne rien mettre en auant, qui ne soit fondé sur les Relations de plusieurs Espagnols, qui se sont trouuez presens aux euenemens que i'ay à raconter, & dont ils s'entretenoient souuent dans la Maison de mon Pere, en leurs conuersations ordinaires, où ils ne parloient de rien plus volontiers que des Conquestes de cét Empire-là. Dequoy i'oyois faire encore des Recits particuliers à quantité d'Indiens, qui dans leurs visites chez ma Mere, luy racontoient ces aduentures estranges, principalement celles qui s'estoient passées sur le sujet d'Atahualpa, depuis la fin de sa vie, où l'on luy disoit, qu'il eut à souffrir les disgraces de sa mort violente, pour satisfaction des cruautez, & des tyrannies qu'il auoit exercées contre ses plus proches. Outre cela i'ay diuerfes Relations fort amples, que mes Compagnons d'Escole m'ont enuoyées, tirées des Annales des Prouinces où leurs Meres demeuroient, comme i'ay dit au commencement. A toutes lesquelles choses il faut adiouster ce que i'ay trouué dans les papiers du tres-curieux, & tres-elegant Historien le Pere Blas-Valera, fils d'un de ceux qui assisterent à l'emprisonnement du Roy Atahualpa; outre que pour estre né aux Confins de Cassamarca, & pour y auoir esté nourry; il est vraysemblable qu'il eût vne vraye cognoissance de tous ces succez, tirez de leurs sources, comme il le raconte luy-mesme. Aussi les a-t'il desdits plus au long que pas-vn autre euenement de l'Histoire de ce pais-là, le tout se trouuant conforme aux autres Relations que i'en ay. Je me propose au reste en cecy de suivre les pas que les Histoires des Espagnols m'auront marquez, leur seruant, comme i'ay dit cy-deuant, de Commentaire où il en sera besoing, puis qu'asseurément ils ont obmis plusieurs choses qu'ils n'ont point sceues, & que les Historiens mesmes n'ont pas esrites.

RECEPTION FAITE PAR LE ROY A
l'Ambassade des Espagnols.

CHAPITRE XIX.

LE Mestre de Camp, qui fut enuoyé au deuant de Hernand Piçarre, & de Hernand de Sotto, les receut avec autant de veneration que s'il les eut adorez; Puis se tournant vers ses Capitaines, & vers ses Soldats; *Voicy*, leur dit-il, *les Fils de nostre Dieu Viracocha*. Les Indiens leur firent vne profonde reuerence à leur mode, non moins estonnez de leur visage, que de leur habit, & de leur langue; puis les accompagnerent avec grand honneur, & les menerent deuant l'Ynca. Les Espagnols entrerent dans le Palais Royal, dont les Magnificences, & les Richesses les esbloüirent d'abord; L'affluence de tant de gens qu'ils y virent les mit dans l'admiration, & leur Arriuéee n'en donna pas moins aux Indiens: Si bien qu'il seroit difficile de dire quels des vns, & des autres furent les plus estonnez. Les Ambassadeurs firent à l'Ynca, qui estoit assis en vn Trosne d'or, vne grande reuerence à l'Espagnole: Le Roy tesmoigna qu'il estoit rauy de les voir; & se leuant de sa Chaire, les embrassa fort courtoisement, & leur dit: *Capac Viracocha vous sôyez, les bien-venus dans mes terres*. Paroles que le Pere Blas-Valera a esrites en langue Indienne, pource qu'il la scauoit bien; & si ie ne les mets icy de mesme, c'est que ie ne le iuge pas necessaire: L'Ynca se remit en sa place; & alors leur furent presentez des Sieges tous d'or, de ceux mesmes du Roy, qui les croyant de la Race du Soleil; voulut qu'ils eussent mesme aduantage que luy, & ce d'autant plus, qu'il apprit que l'un des Ambassadeurs estoit frere du Gouverneur. Apres qu'ils furent assis, l'Ynca se tournant vers ses plus proches; *Vous voyez icy*, leur dit-il, *le mesme visage, la mesme figure, & le mesme habit de nostre Dieu Viracocha, comme nostre Predecesseur l'Ynca Viracocha a voulu qu'on le representat par la statue de pierre qu'il nous en a laissée, où il se void tel qu'il s'apparut à luy, & tel que nous le voyons en la presence de ceux-cy.*

Le Roy eut bien à peine acheué ces paroles, qu'on apperceut

entrer dans la Chambre deux filles du sang Royal, extrêmement belles, & qu'ils appelloient *Numsta*. Chacune portoit en main vn petit vase d'or, plein de breuuage de la bouche du Roy. Elles estoient accompagnées de quatre Princesses du mesme Sang; bien qu'elles ne fussent pas legitimes, & leurs Meres estoient sujettes d'Atahualpa, comme nées dans les terres de son obéissance. Apres qu'elles se furent approchées du Roy, pour luy rendre les adorations accoustumées, l'une luy mit en main son vase; & l'autre donna le sien à Hernand Piçarre, par l'ordre de l'Ynca. Cependant ce mesme Titu Aautachi frere du Roy, dont il auoit esté Ambassadeur vers les Espagnols, comme il a esté dit n'aguere, se mit à parler, & dit au Truchement Philipillo; qu'il leur fit entendre, *Que l'Ynca beuuoit à leur santé, pour ce que la coustume des Rois Incas estoit d'en ser ainsi enuers leurs Amis, pour vne marque d'affection, & d'alliance perpetuelle.* Alors Hernand Piçarre fit raison au Prince, avec vne reuerence tres-humble. L'Ynca beut à deux ou trois reprises, apres lesquelles il donna le vase à son frere Titu Aautachi, pour boire le reste. Cela fait, il voulut que la Princessesse presentast l'autre Vaze qu'elle auoit en main à Hernand de Sotto, qui fit le mesme que son Compagnon: l'Ynca beût encore deux ou trois fois, & donna son reste à vn autre Frere qu'il auoit, appellé *Choquehuaman*. Comme l'on eut beu, les Ambassadeurs voulurent parler; mais le Roy leur dit qu'ils se reposassent vn peu, & qu'il prenoit plaisir à considerer leurs visages, pour ce qu'ils representoient celui de leur Dieu Viracocha. A mesme temps entrerent six Pages, & six filles fort lestes, qui apporterent la Collation de toutes sortes de fruiçts, avec du Biscuit à leur mode, du vin fait de la semence de l'Arbre Mulli, & de riches Nappes de Cotton, pour ce qu'on n'auoit point l'usage du Lin en ce Pais-là. Alors l'une de ces filles, appellée Pilleu Figa Numsta, fit compliment à ces nouveaux Hostes, & leur dit; *O Fils de Capac Ynca Viracocha, goustez, ie vous prie de ces choses qui vous sont presentées, bien qu'elles ne soient pas capables de vous regaler comme nous voudrions.* Les Espagnols s'estonnerent fort de voir tant de Courtoisie, & de gentillesse en des personnes qu'ils auoient creu estre grossieres, & mesme barbares; Et afin qu'ils ne semblassent point mespriser ce qui leur estoit offert de si bonne grace, ils en gousterent vn peu, & dirent que cela suffisoit, de quoy les Indiens furent tres-contens, & tres-satisfaits.

HARANGVE DES AMBASSADEVRS, & Responce de l'Ynca.

CHAPITRE XX.

HERNAND PIÇARRE, voyant qu'on ne disoit plus mor, aduertit Hernand de Sotto de parler, pour ne perdre pas dauantage de temps; & de n'estre pas long en son discours, pource qu'il leur faloit retourner au giste; & ne se point fier à des Infideles, quelque bon traitement qu'ils leur fissent, pour ne scauoir pas si ce n'estoit point vn artifice pour les attirer dans leur confidence, & se seruir de cét aduan tage pour les prendre mieux au despoureu. Alors Hernand de Sotto s'estant leué, fit son Compliment à l'Espagnole, qui fut de se descouurir la teste. & de faire vne grande reuerence; puis se remit en sa place, & dit ces paroles.

Serenissime Ynca, vostre Altesse sçaura qu'il y a deux Princes dans le Monde, esleuez en puissance, par dessus tous les autres. L'un est le Souuerain Pontife, Lieutenant de Dieu sur terre, où il prend le soin de faire obseruer sa diuine Loy, & d'enseigner la sainte Parole: l'autre est l'Empereur des Romains, appelé Charles V. Roy d'Espagne. Ces deux Monarques ayant sceu que ceux de ce païs estoient si auengles, à faulte d'estre esclairez de la lumiere de la Foy, qu'ils ne connoissoient point Dieu, Createur du Ciel, & de la Terre, dont ils adoroient les Creatures, & le Diablemisme, bien qu'il soit le plus grand Ennemy qu'ils ayent; ont enuoyé nostre Gouverneur, & Capitaine general, Don François Piçarre, avecque ses Compagnons, & quelques Prestres, & Ministres de Dieu, pour apprendre à vostre Altesse, & à tous ses Sujets cette verité diuine, & sa sainte Loy, qui est le fondement du salut. C'est le sujet qui les a menez en ce païs, où apres auoir gousté par les Chemins des fructs de vostre generosité, ils entrerent hier à Cassamarca, & nous enuoyent aujourd'huy à vostre Altesse, afin que nous commencions de contracter vne Paix, & vne Amitié qui soient perdurables: A quoy nous parviendrons les vns, & les autres, si sous la protection de vostre Altesse, il nous est permis de vous instruire, & tous vos Sujets en la Doctrine Chrestienne, ce qui sera tres honorable pour vous, tres utile pour eux, & tres salutaire pour tous ensemble.

En cét endroit le Pere Blas-Valera transporté de zele pour la Conuerſion de ces Gentils, fait vne grande exclamation, diſant que des paroles ſi importantes, comme eſtoient celles de Hernand de Sotto, auoient beſoin d'un bon, & ſidelle Truchement, qui ſceut non ſeulement l'une & l'autre langue, mais qui eut vne charité vrayement Chreſtienne, pour en donner l'explication, ſans la corrompre. A quoy il adiouſte, qu'il ne ſe paſſeroit iour de ſa vie qu'il ne deſplorât le mal-heur de cét Empire-là, qui fut ſi grand que ſes premiers Conquerans, & les Preſtres qui les accompagnoient, purent dire veritablement que leur Truchement Philippille fut cauſe d'une infinité de maux qui arriuerent par ſon ignorance, & dont pour ſe iuſtifier eux-mesmes ils pouuoient avec vne grande raiſon reietter toute la faute ſur luy; Car il expliqua leur intention en termes ſi ambigus, ſi peu raiſonnables, & ſi barbares, qu'il dit pluſieurs choſes tout au rebours de leur ſens: Ce qui affligea non ſeulement l'Ynca, mais tous ceux en general qui oyrent ſon mauuais raiſonnement, par qui toute la Maieſté de cetté Ambaſſade fut deſtruite. La raiſon eſt, pource que les Indiens purent coniecturer par là, qu'on leur auoit enuoyé des Barbares, quoy qu'à la fin ils cognurent vray ſemblablement qu'il n'y auoit aucune apparence que l'Ambaſſadeur eut vſé par la bouche de l'Interprette, de pluſieurs termes qui n'eſtoient aucunement de la bien-ſeance de cetté Ambaſſade: Ce qui fut cauſe qu'Atahuallpa, bien en peine de cetté ambiguité de paroles; *Que veut dire celuy-cy? ſ'eſcria-t'il, qui par ſes mots tranſpoſez, & conſus, ne ſe fait non plus entendre qu'un Muet?* Où il eſt a remarquer que ces paroles ont beaucoup plus de ſignification, & de force en leur idiome Indien, qu'en la langue Eſpagnole; Mais les Capitaines, & les Seigneurs de Vaſſaux dirent au Roy, que la faute n'en eſtoit pas aux Ambaſſadeurs, mais à leurs mauuais Interpreter, qui ne ſ'entendoit pas luy-mesme, tant ſ'en faut qu'il pût faire entendre aux autres ce qu'il leur diſoit: tellement que cetté excuſe leur fit tirer ce qu'ils pûrent de cetté Ambaſſade; & ainſi quoy qu'ils ne la pûſſent pas bien conceuoir, ils ne la iſſerent pas de la prendre en bonne part, & d'adorer derechef comme Dieux ceux qui en portèrent la parole; L'Ynca meſme leur rendir plus de reſpect qu'ils n'en auoient iamais pû deſirer de luy, & leur fit la Reſponſe ſuiuante.

IE me respoûis fort, hommes diuins, de ce qu'en mon temps vous & vos Compagnons estes arriuez en des pays si esloignez, comme sont ceux-cy, & que par vostre vennë, vous auez rendu veritable ce que nos Ancestres ont tant de fois predict par leurs Deuinations, & par leurs Augures; Ce n'est pas neantmoins que ie ne m'en doive plustost atirister, pource que ie voy bien qu'à cette heure s'en vont accomplis tous les Prognostics que nos Peres nous ont laissez de la decadance & de la fin de nostre Empire, qu'ils ont assure deuoir aduenir sous mon Regne, par le succez de plusieurs choses estranges, qu'eux-mesmes ont dites de vostre arriuee. Quoy qu'il en soit, ie tiens ce siecle pour tres-heureux, où il a pleu à nostre Dieu Viracocha de nous enuoyer de si bons hostes, sous qui nous verrons tout nostre Estat se changer en mieux, par une reuolution salutaire: dequoy nous sommes rendus certains par la tradition de nos Ancestres, par le Testament de mon Pere Huayna Capac, par les Guerres aduenues entre mon Frere, & moy; & finalement par vostre Diuine presence: Aussi l'auons-nous eue en telle veneration, qu'encore que nous ayons sceu qu'à vostre entrée dans nos terres, vous y auez mis des gens en garnison, fait plusieurs degasts, tuë quantité de personnes, & causé plusieurs calamitez à Puna, dans Tumpiz, & en diuers autres endroits; si est-ce que moy, nymes Capitaines n'auons iamais voulu nous mettre en deffence, ny vous chasser du pays, pour auoir cren, comme nous croyons encore, que vous estes Fils de nostre grand Dieu Viracocha, & Ambassadeurs du grand Pachacamac. A raison dequoy, pour satisfaire au commandement que mon Pere nous a laissé de vous seruir, & vous obeyr; nous auons fait une Loy qui s'est publiée dans les Ecoles de Cozco, par laquelle il est expressement deffendu de prendre les Armes contre vous, & de vous troubler en quelque façon que ce soit. Vous pouuez donc faire de nous ce qu'il vous plaira, puis que nous tiendrons à singuliere faueur de mourir de la main de ceux que nous estimons Diuins, & vrais Messagers de nostre Dieu: n'estant pas possible qu'il ne vous ait enuoyez luy-mesme, veu les grandes merueilles que vous auez desia faites. Il ne me reste plus qu'à m'expliquer d'une chose, qui est, que ie treuve estrange qu'estant venus icy, comme vous dites, pour faire Alliance, & perpetuelle Paix avec nous, au nom de vos deux grands Princes; vous n'ayez pas laissé neantmoins (sans parler à par-un des nostres, & sans sauoir nostre volonté) de tuer de nos suiets, & de faire plusieurs degasts dans les Prouinces par où vous auez passé. D'où ie tire cette coniecture, que puis que vous en estes venus si auant, il faut sans doute que vous l'ayez fait par l'express commandement de vos

deux Princes, & qu'eux-mesmes en ayent eu l'ordre du Pachacamac. Que si cela est, ie vous dis derechef que vous sachiez de nous ce que vous voudrez; & n'ay qu'à vous prier d'une chose, qui est de vouloir prendre pitié des miens, la mort desquels, si elle arriuoit auant la fin de mes iours, me seroit incomparablement plus sensible que la mienne.

Ces dernieres paroles de l'Ynca toucherent les siens de compassion, & leur firent respendre des larmes en abondance; sur tout quand ils se representèrent la perte de son Empire, qu'ils tenoient desia comme asseurée, & qu'il leur auoit long-temps auparauant annoncée; Car comme il voyoit approcher le terme que son Pere Huayna Capac auoit predit, & marqué pour cette decadence; il ne s'entretenoit d'autre chose que de cela dans ses discours ordinaires, disant que le grand Pachacamac le vouloit, & que son Decret estoit irreuocable. Ainsi cette assurance que se donnoit Atahualpa, de la desolation entiere de ses Estats, le rendit si mol, & si lasche, qu'il ne daigna resister aux Espagnols, comme nous le verrons cy-apres: Où i'oubliais à dire, que parmy les Courtisans, & autres qui accompagnoient l'Ynca dans la Salle, où fut donnée Audience aux Ambassadeurs, se trouuerent deux de leurs Historiens, qui par leurs Chiffres, & les nœuds dont'ay parlé dans ma premiere Partie, marquerent le mieux qu'ils pûrent l'Ambassade de Hernand de Soto, avecque la Responce de l'Ynca.

Cependant les Ambassadeurs s'estonnoient fort de voir que le Roy leur faisoit si bonne mine, en parlant à eux; & que neantmoins les Capitaines, & les Curacas fondoient en larmes: De sorte que pour ne sçauoir la cause qui obligeoit des personnes de leur condition d'en respendre en si grande abondance, & les autres de mesme, ils en eurent tres-grande pitié. C'est aussi en cet endroit que le bon Pere Blas-Valera regrette extrêmement le malheur de ces personnes-là, disant que si l'Interprete eut bien expliqué les raisons de l'Ynca, ils eussent fleschy à Misericorde, & à Charité ceux à qui elles s'adressoient; Mais cet Ignorant ne satisfit non plus les Espagnols que les Indiens, pour ne sçauoir comme il falloit, ny l'Ynca, ny l'autre langue. Sur ces entrefaites, les Ambassadeurs furent vn peu en peine, quand ils ouïrent parler des ruïnes, & des morts qu'ils auoient causées, tant en l'Isle de Puña, qu'en la forteresse de Tumpiz: ce qui leur fit craindre que l'Ynca ne s'en voulut vanger, pource que le

Truchement ne s'expliqua pas mieux, & qu'il n'auoit sceu que repliquer à la Responce d'Atahuallpa; ce qui les rendoit extrêmement confus. Car ce ne fut pas seulement aux termes que Philippille failir, pour ne les auoir sceu dire en Espagnol, mais encore aux raisons de l'Ynca, qu'il ne pût retenir, pour auoir esté vn peu longues.

Les Ambassadeurs ayant demandé permission au Roy de s'en retourner, l'obtinrent incontinent de son Altesse, qui leur dit en termes obligeans, *Qu'ils se retirassent à la bonne-heure, & qu'il s'en iroit bien-tost à Cassamarca, pour y voir les Fils de son Dieu Vt-racocha, & les Ambassadeurs de Pachacamac.* Les Espagnols sortirent aussi-tost du Palais Royal, dont ils ne cessoient d'admirer les Richesses, & la grande estime que faisoient d'eux tous ces Indiens. Ils voulurent alors partir sans delay, & demanderent pour cét effect leurs Cheuaux: Mais auant que d'y monter, ils furent abordez par deux Curacas, qui les prierent de vouloir accepter vn present qu'ils auoient à leur faire, & de les excuser s'il estoit indigne de leur Diuinité. Cela dit, ils commandèrent à leurs seruiteurs, qui les suiuiot en grand nombre, de les mettre deuant eux; ce qu'ils firent aussi-tost; & il se trouua que c'estoit vn present semblable à celuy qu'on leur auoit desia fait, les mesmes choses leur estant offertes, mais en plus grande abondance, avec quantité d'or, & d'argent, partie mis en ceuvre, partie comme on le tiroit des Mines. Ces courtoisies, & ces generositez redoublées firent perdre aux Espagnols la des fiance qu'ils auoient que l'Ynca ne leur voulut ioter quelque mauuais tour: tellement qu'ils blasmerent derechef l'insuffisance de Philippille, pour n'auoir pas eu l'esprit de leur expliquer la Responce de l'Ynca, ce qui leur auoit fait commettre plusieurs lourdes fautes, & qui fut cause depuis qu'ils en commirent encore d'autres plus grandes, comme nous verrons cy-apres.

LES DEUX AMBASSADEURS ESPAGNOLS retournent trouuer leurs gens, qui se tiennent prests à recevoir l'Ynca.

CHAPITRE XXI.

LEs deux Ambassadeurs s'en estans retournez vers leurs gens, leur firent vn long Recit des grandeurs de la Maison de l'Ynca, de ses merueilleuses richesses, du bon traitement qu'ils venoient d'en receuoir, & des presens qu'on leur auoit faits, qu'ils partagerent ensemble : Mais cela n'empescha pas que comme gens aduisez, & Soldats vigilants, ils n'apprestassent leurs Armes, & leurs cheuaux pour le lendemain, afin de ne pecher pas à faute de precaution. Car bien qu'on les eut aduertis du grand nombre de gens qui accompagnoient Atahualpa, ils n'en auoient pas moins de courage; au contraire ils se fortifioient tousiours plus fort dans la resolution par eux prise de cōbattre en Espagnols. Si tost qu'il fut iour, les gens de Cheual, qui n'estoient pas dauantage de 60. se diuiserent en trois Esquadres, commandées par trois Capitaines, qui estoient Hernand Pigarre, Hernand de Sotto, & Sebastien de Belalcaçar. Ils se rangerent ensemble derriere vne vieille muraille, tant pour n'estre veus des Indiens, que pour se rendre plus redoutables par leur soudaine sortie. Le Gouverneur fit vn bataillon de cent hommes de pied, n'en ayant pas dauantage, dont il voulut estre Capitaine. Ils se mirent en l'vn des bouts de la Plaine de Tempu, pout s'en seruir au besoin comme d'vn Champ de bataille, où ils attendirent le Roy Atahualpa.

Ils s'en vint à eux dans vne superbe Chaire d'or, portée sur les espauls des siens, avec vne magnifique suite de Courtisans, & d'Officiers de sa Maison, qui n'estoient pas moins à craindre, comme il sembloit, pour leur courage, que pour la force de leurs Armes. Plusieurs Indiens marchoiēt deuant la Chaire Royale, applanissant ce qu'il y auoit de rabotteux dans les chemins, dont ils estoient non seulement les pierres, & les cailloux, mais iusques à la moindre paille. Les plus grands de sa Cour estoient les plus proches de sa personne, & les gens de

Guerre rangez en 4. Esquadrons de 8000. hommes. Le premier bataillon qui composoit l'auant. garde, marchoit deuant son Altesse, comme font les Coueurs pour asséurer les chemins. Les deux qui formoient le corps de bataille alloient à ses costez : & apres ceux cy suiuiot l'arriere-garde. Le Capitaine se nommoit *Rumimani*, qui signifie *œil de pierre*, à cause d'un durillon qu'une taye y auoit engendré. Avec cette marche militaire Atahualpa fit vne lieuë de chemin, depuis son Camp iusques au logement des Espagnols, où il demeura plus de quatre heures, non pour aucune enuie qu'il eut de combattre, comme nous verrons tout maintenant, mais pour le seul desir qu'il auoit de mieux s'esclaircir des particularitez de leur Ambassade, qu'ils disoient venir de la part du Pape, & de l'Empereur. On l'auoit aduertiy que les Espagnols ne pouuoient monter vn costau fort rude, autrement que dessus leurs Cheuaux, à la queuë & au poiëtral desquels les gens de pied s'attachoient, afin de se soulager en montant; Qu'au demeurant, ils n'estoient ny dispos à la course, ny si endurcis à la fatigue, comme les Indiens. Ce qui fut cause, que se fondant sur cette Relation, & sur la bonne opinion qu'il auoit de ces nouueaux Venus, qu'il appelloit des hommes diuins; il passa outre, sans aucune crainte de ce qui luy arriua depuis, & entra dans la Place d'Armes, accompagné de trois bataillons de gens de Guerre, ayant fait arrester l'arriere-garde plus loing. En suite dequoy, voyant que les Fantassins Espagnols se tenoient serrez, comme s'ils eussent eu peur; *Ces gens-là*, dit-il aux siens, *sont autant de Messagers de Dieu, qu'il ne faut point s'ascher, mais les obliger par toutes sortes de courtoisies*. Et alors vint droit à l'Ynca vn Religieux de l'Ordre de saint Dominique, appellé Frere Vincent de Valverde, avec vne Croix à la main, & en intention de parler au Roy de la part de l'Empereur.

DE LA HARANGVE QUE LE P. F.
Vincent de Valverde fit à l'Ynca Atahualpa.

CHAPITRE XXII.

LE Pere Blas-Valera, qui faisoit vne tres-exacte recherche des choses qui se passoient en ce temps-là, pour le desir qu'il auoit d'en escrire vn iour l'Histoire; rapporte au long la Harangue que le P. F. Vincent de Valverde fit au Roy Atahualpa, diuisée en deux parties, qu'il dit auoir veuës à Truxillo, lors qu'il y apprenoit le Latin, escrite de la main propre du mesme F. Vincent, & qu'auoit par deuers luy vn des Conquerans du Pais, nommé Diego d'Oliuarez, apres la mort duquel elle tomba entre les mains de son Gendre: à quoy il adioust, qu'il l'auoit leuë plusieurs fois, & mesme apprise par cœur. C'est pourquoy il ne me semble pas hors de propos de la mettre icy, de la mesme sorte que l'escriu le Pere Blas-Valera, pource que suiuant l'original qu'il en a eu il la déduit plus au long que n'ont fait les autres Historiens. Que si ie la mets icy comme mienne, c'est à cause qu'elle se trouue entierement conforme aux Relations que i'en ay, & peu differente en substance de ce que les Historiens Espagnols en escriuent: Ainsi la publiant au nom de ce bon Religieux, ie feray le mesme à mon aduis, que si ie la donnois au nom de nous deux, sans que ce soit mon dessein pourtant de m'en attribuer l'honneur, puis que c'en est assez pour moy que de m'appuyer de l'aüthorité d'un si grand homme. Il faut donc scauoir qu'aussi tost que le Pere Valverde s'approcha del'Ynca, il le rendit tout estonné de voir ses Cheueux, & sa Couronne, comme la portent les Religieux, & son habit large, ensemble vne Croix de Palmier qu'il portoit en vne main, & en l'autre vn Liure, qui estoit selon quelques-vns, la somme de Syluestre, & selon les autres, le Breuiare, ou la Bible.

Le Roy, pour apprendre de quelle façon il deuoit traiter avec cét homme-là, en prit l'aduis d'un des trois Indiens principaux, qui par l'ordre exprés de son Altesse, quatre iours auparavant auoit fait donner aux Espagnols tout ce qui leur estoit necessaire. *De quelle condision, dit-il, pensez-vous que soit cét hom-*

me-là? Est-il au dessus des autres, ou au dessous d'eux, ou leur esgal? A quoy l'Indien fit response; *Ace que i'en ay appris Tnca, il est Capitaine, & Guide, de parole (il vouloit dire Predicateur) Ministre du grand Dieu Pachacamac, & son Messager, qui a quelque chose plus que les autres.* Alors le Pere Valverde, ayant fait la reuerence à la façon des Religieux, demanda permission au Roy de parler, & apres l'auoir obtenuë, fit la Harangue suiuaute.

PREMIERE PARTIE DE LA HARANGVE sufdite.

VOUS deuez sçauoir, Grand, & Puissant Roy, qu'il est necessaire que vous & vos Subjets soyez instruits en la vraye Foy Catholique, & que vous oyiez, & croyez fermement ce qui s'ensuit.

Premierement, qu'un seul Dieu en trois Personnes, a creë de rien, le Ciel, la Terre, & toutes les choses du Monde; Que c'est luy qui donne pour recompense la vie esernelle aux gens de bien, & pour punition, l'Enfer aux Meschans, dont les tourmens iamaïs ne finissent; Que dès le commencement du Monde, il crea l'Homme du Limon de la Terre, luy inspirant l'Esprit de Vie, que nous appellons Ame, & qu'il le fit à son Image, & semblance; à raison dequoy tout homme est composé de Corps, & d'Ame raisonnable.

De ce premier Homme, à qui Dieu donna le nom d'ADAM, nous sommes tous descendus; Et comme il pecha pour n'auoir obey au commandement de son Createur, en luy ont peché de mesme tous les Hommes qui sont nais iusques auourd'huy, & qui naistront iusques à la fin du Monde; n'y ayant ny Homme, ny Femme qui soient exempts de ceste tache; excepté Nostre Seigneur IESVS CHRIST. Ce Fils du vray Dieu est venu du Ciel en Terre, où il a pris naissance de la VIERGE MARIE, pour racheter, & deliurer de la tyrânie du Peché tout le Genre-humain; Et finalement il est mort pour nostre salut, en vne Croix de bois, semblable à celle que ie tiens à la main; Et voylà pourquoy nous qui sommes Chrestiens l'adorons.

C'est luy qui par sa propre vertu est ressuscité de Mort à Vie, & monté au Ciel, où il est assis à la Dextre de Dieu son Pere Tout-puissant. Il a laissé en terre ses Apostres, & leurs Successeurs, afin que par leurs Instructions, & par d'autres voyes salutaires, ils nous amènassent à la connoissance de sa diuine Majesté, & à l'observation de sa Ley.

Luy-mesme encore a voulu que saint Pierre ait esté Prince des Apo-

Pres, de leurs Successeurs, & de tous les autres Chrestiens: comme aussi Lieutenant de Dieu sur Terre, & que tous les Pontifes Romains, que les Chrestiens appellent PAPES, ayent la mesme authorité que Dieu luy a donnée: tellement que deslors, & à present, ils ont tousiours pris, & prennent continuellement tous les soins qu'ils peuvent, d'instruire les hommes en la Loy du Souuerain Createur, & de leur prescher sa sainte parole.

SECONDE PARTIE.

COMME donc le grand Pontife Romain a seu que tous les Peuples de ces Royaumes, abandonnant le Culte du vray Dieu, adoroient indignement les Idoles, faites à la semblance du Diable; Pour les attirer à la veritable connoissance du Tout-puissant, il a donné la Conqueste de ces Païs, à Charles Empereur des Romains, Roy des Espagnes, & Monarque de toute la Terre, afin qu'ayant subjugué ces Nations, & leurs Rois, exterminé les Rebelles, & châtié les Tyrans, il regne absolument sur tous ces Peuples, les reduisant à l'adoration d'un seul Dieu, & à l'obeyssance de son Eglise. Ainsi bien que nostre Potentat soit continuellement empesché au Gouvernement de tant de Prouinces & de grands Royaumes qu'il possède; si est-ce qu'il n'a pas voulu refuser à se charger de ce que le Pape luy a si iustement octroyé, pour le salut de tant de personnes; Voila pourquoy il a tout aussi-tost enuoyé des Capitaines, & des soldats à l'execution de cette entreprise, come il a fait autresfois, à la Conqueste de Mexique, & des terres prochaines, qu'il s'est assujetties à force d'Armes, & qu'il a reduites à la vraye Religion de IESVS-CHRIST, suiuant en cela les Commandemens de Dieu, qui veut que l'on remette les Desnoyez dans le bon chemin.

Pour ce mesme effect, le grand Empereur Charles V. a choisi pour son Lieutenant, & son Ambassadeur Dom François Picarre que voicy, tant pour faire à vos Prouinces la mesme grace qu'aux autres, que pour establir vne Alliance perpetuelle, entre sa Majesté, & vostre Altesse; de maniere qu'elle & tout son Empire luy soient tributaires. Cela veut dire, que payant tribut à l'Empereur, vous luy soyez subiet, & luy laissez libre la possession de vos Estats, les soumettant à son gouvernement, à l'exemple de plusieurs autres grands Rois: Voilà pour le premier point. Quant au second, l'on entend qu'apres que vous aurez cédé le Sceptre, soit de gré, soit de force, vous ayez à rendre vne vraye obeyssance

obeyssance au Souuerain Pontife, & à bannir pour iamais l'abominable superstition des Idoles, qui est de l'inuention des Diables, au lieu que nostre Religion vient de Dieu, source de toute Verité, bien loin de la vostre, qui n'a pour obiet que le Mensonge, & l'Erreur. Vous devez donc, ô grand Roy, vous porter volontairement à ce que ie vous conseille, si vous aimez vostre bien, & celui de tous les vostres. Sinon, n'esperez pour toute recompense qu'une Guerre pleine de sang, & de feu, par le moyen de laquelle vos Idoles seront abbatuës, & ainsi l'on vous contraindra par la force, à quitter malgré vous vostre Idolatrie, pour recevoir La Foy Catholique, & vous rendre tributaire de nostre Empereur, en luy cedant vos Royaumes. Si vous vous obstinez au contraire, assurez-vous que comme Dieu permit autrefois que Pharaon, & tous ses gens de Guerre perissent dans la Mer rouge, il permettra de mesme que vous & vos Indiens soyez tous exterminés & destruits par nos Armes.

INCONVENIENS ARRIVEZ, POUR
n'auoir sceu expliquer le raisonnement de F. Vincent
de Valverde.

CHAPITRE XXIII.

VOILA quelle fut la Harangue de F. Vincent de Valverde, sur laquelle le Pere Blas-Valeza fait quelques reflexions conuenables à l'Histoire; & dit que ceux qui ont parlé de ce succez, & de cette Harangue, ont retranché plusieurs choses, tant de la premiere que de la seconde Partie, qu'ils n'ont rapportées que par lambeaux dans les Histoires qui en ont esté imprimées; Mais que Iean d'Oliua, & Christophle de Medina, grands Predicateurs, & fort sçauans en la langue Indienne; Ensemble Iean de Montalve Prestre, & Interprete excellent; comme aussi Calconius Aragonois, Docteur en l'un, & en l'autre Droit, dans le Liure qu'il a fait pour la conservation de la liberté des Indiens; Et pareillement Frere Marc de Ioffre Cordelier, & plusieurs autres grands Hommes, dont les Eserits nous sont demeurez, rapportent toute entiere, comme nous auons fait, & en deux Patties, la Harangue de F. Vincent de Valverde; de-

meurant tous d'accord, qu'elle fut extrêmement rude, & piequante, comme nous verrons tout maintenant: Ce qui fait que les mêmes Auteurs trouvent plus de moderation, & de modestie en celle que Hernand Pizarre, & Hernand de Sotro firent à Atahualpa.

Mais pour réuenir à l'explication de cette Harangue-là, il faut dire quelque chose de son Interprete Philipille. Il estoit natif de l'Isle de Puña, de fort basse condition, si ieune, qu'il n'auoit pas encore 22. ans, & aussi peu versé en la langue particulière des Espagnols, qu'en la generale des Yncas, pour ne l'auoir pas apprise à Cozco, mais à Tumpiz, où elle estoit tout à fait barbare, & corrompue par les Indiens de l'Isle, qui ne la sçauoient pas eux-mêmes: car, comme j'ay dit en la premiere partie de cet ouutage, il est certain qu'à la reserve de ceux de Cozco, tous les autres Indiens parlent en termes estrangers. A quoy'adjouste que ce même Philipille ne sçauoit de la langue Espagnolle, que ce qu'il en'auoit appris des Espagnols mêmes, & particulièrement des soldats suiuaus, qui n'auoient ordinairement que ces termes à la bouche, *Voto a tal, iuro attal*, & autres semblables, encore pires: de maniere qu'il n'apprit d'eux en les seruant, qu'à demander les choses necessaires, encore en corrompoit-il la plus-part des mots, comme font les Negres; & bien qu'il fut baptisé, il n'auoit neantmoins aucune teinture de la vraye Religion, ny aucune connoissance de la Doctrine Chrestienne.

Ce fut-là pourtant le premier Interprete qu'il y eut dans le Peru: de sorte qu'il ne faut pas s'estonner s'il s'acquitta si mal de sa Charge, & s'il expliqua toutes choses à contre-sens; non qu'il le fit par malice, mais plustost par ignorance, & à la façon des Perroquets; Comme par exemple, au lieu de dire *un Dieu en trois Personnes*, il disoit, *trois Dieux*, & *un sont quatre*, vsant de supputation pour se faire entendre, ainsi qu'il se voyoit par la Tradition des *Quipus*, autrement des nœuds, & des chiffres, dont estoient composées les Annales de Cassamarca, où ces euenemens se passerent. Mais après tout, il ne pouuoit s'expliquer autrement: La raison est, d'autant que les Indiens du Peru n'ont pas les termes propres, pour rendre en leur langue plusieurs paroles de la Religion Chrestienne, telles que sont celles-cy. *Trinite, Trin & un, Personne, S. Esprit, Foy, Grace, Eglise,*

Satremens, & autres semblables termes que ces Gentils ne connoissoient point alors, pour n'estre pas de leur langue: ce qui est cause que les Truchemens Espagnols d'aujourd'huy, pour bien expliquer ces choses-là, sont contraints de chercher de nouveaux mots, & de nouvelles raisons, en se servant avec elegance, & adroitement, de vieux termes Indiens; ou mesme d'vser de periphrases, & d'imiter les plus habiles d'entr'eux, qui accommodent à leur expression les façons de parler Espagnoles, par le changement, & l'agreable meslange qu'ils font de l'une, & de l'autre langue. De sorte que suppleant ainsi aux mots qui manquent aux Espagnols; ils leur donnent moyen de mieux s'exprimer en leurs Predications, & par consequent de se rendre plus intelligibles à ceux du país.

J'ay parlé souuent de toutes ces difficultez qui se rencontrênt dans la langue generale du Peru; sur le sujet de laquelle ie dis derechef, que si le Truchement Philipille se vid contraint de prendre les choses au pied de la lettre; ce ne fut pas tant la faute, que celle de la langue Peruvienne: car il est certain que de mon temps 29. ans apres que les choses dont nous traitons furent arriuées, les Indiens, qui par leur conuersation avec les Espagnols deuoient estre bien plus accoustumez à les entendre, ne laissoient pas neantmoins de faire les mesmes fautes que Philipille; à cause dequoy ils ne s'entrenoient iamais avec luy qu'en leur propre langue. Mais apres tout, ie n'ay point connu d'Indiens qui parlissent passablement Espagnol; que deux jeunes garçons, qui auoient esté mes Compagnons d'Escole, où dès leur enfance ils auoient appris à lire, & à escrire; l'un desquels s'appelloit Charles, fils de Paulu Ynga: Ce qui procedoit sans doute du peu de curiosité qu'auoient les Indiens d'apprendre la langue Espagnolle, & de la nonchalence des Espagnols à l'enseigner: tellement que si les vns, & les autres se faisoient entendre, ce n'estoit point par Preceptes, ny par Regles, mais par le moyen de la communication qu'ils auoient ensemble: pour preuue dequoy ie diray que cette nonchalence de part & d'autre estoit si grande, qu'encore que les jeunes Indiens qu'on auoit esleuez avec moy entendissent assez bien les choses communes que ie leur disois en langue Espagnolle; si est-ce que lors que ie m'en voulois seruir à faire quelque Message d'importance, j'estois contraint de leur parler Indien, pource qu'autre-

ment ils n'eussent pû s'en acquiter, à faute d'entendre l'Espagnol.

Que si cette ignorance regna parmy les Indiens 29. ou 30. ans apres la venue des Espagnols dans leur pais, quoy que durant ce temps-là ils eussent tousiours conuërsé avec eux; faut-il s'estonner s'ils ne pouuoient auparavant s'expliquer, en vne saison, où sans auoir iamais frequenté ensemble; il ne se parloit entr'eux que d'Armes, & de Guerre? Faut-il s'estonner, dis-ie, si Philipille ne fit pas bien sa Charge de Truchement? Certes la mauuaise intelligence qui s'ensuiuit de sa fausse interpretation, ne fût, ny sa faute, ny celle du bon F. Vincent de Valverde, ny des Espagnols non plus; Et s'il y eut du mesconte, il s'en salut prendre à la seule sterilité de la langue Peruuienne. Car auourd'huy mesme (& à plus forte raison alors, quoy qu'il y ait plus de quatre vingts ans depuis la Conqueste de cet Empire-là) il ne se trouue point de termes Indiens assez propres pour exprimer les Mysteres de nostre sainte Religion. Je n'en veux pour toute preuue qu'un Catechisme, qui en l'année 1603. me fut enuoyé du Peru par le Pere Diego d'Alcobaça, imprimé l'an 1585. en trois langues differentes, à sçauoir en langue Espagnolle, en la generale de Cozco, & en la particuliere de la Prouince d'Aymara; où si l'on prend la peine de lire, on trouuera que dans les deux langues Indiennes, il y a plusieurs mots que l'on a rendus Espagnols. Par exemple en la seconde demande que fait le Directeur Spirituel à son Disciple, où il dit, *Estes-vous Chrestien baptisé*; la Traduction generale de la langue Peruuienne porte *Baptiz'siachutanqui*, où vous remarquerez qu'il n'y a qu'un mot Indien, à sçauoir le Verbe *Canqui*, correspondant aux mots, *Estes-vous*: Et que le premier des deux autres est purement Espagnol, comme le second, qui est l'Adiectif *Baptisé*, se peut dire aussi *Castillan*, hormis qu'on le fait Indien; ce qui se rencontre encore dans la langue de la Prouince d'Aymara. En la quatriesme demande, qui est, *Sçauex-vous la Doctyne*? se remarque presque le mesme. Car le seul Verbe, *sçauoir* est Indien, & les deux autres noms, *Substantif*, & *Adiectif*, sont Espagnols, meslez dans les deux langues Indiennes. Outre tous ces noms il y en a vne infinité de Castillans, que l'on a rendus conformes au langage Indien; du nombre desquels, pour n'estre si long, j'ay tiré ceux cy particulièrement, comme les plus con-

siderables. IESVS CHRIST, nostre-Dame, Image, Croix, Prestre, Dimanche, Feste, Religion, Eglise, Penitence, Communier, Ieusner, Marier, Homme sans Femme, Concubinaire, & quantité d'autres, qui sont dans le Catechisme. Or bien qu'il soit veritable que quelques-vns de ceux-cy, & de leurs semblables se pourroient dire en Indien, comme, Dieu, nostre-Dame, Croix, Image, Dimanche, Feste, Ieusner, Marier, garçon; & ainsi des autres: Si est-ce que c'est Chrestiennement fait, quand on instruit les Indiens en la vraye Religion, de n'vser point des termes, dont ils se seruoient en leurs Idolatrie, pour signifier à peu près ces choses, afin de ne les faire souuenir des superstitions comprises dans la signification de ces mots, & d'errabolir ainsi la memoire.

Les raisons que ie viens d'alleguer suffisent, ce me semble, pour iustifier les Espagnols, principalement F. Vincent de Valverde, & l'Indien Philipille, de la faute qu'on leur imputoit, pour ne s'estre pas bien expliquez. Car si maintenant les Religieux, & les Prestres, dont le nombre est si grand dans le Peru, avec tous les soins qu'ils prennent d'apprendre la langue du pais, pour instruire les Indiens en la Doctrine Chrestienne, ont tant de peine d'en venir à bout, qu'eussent-ils pû faire en ce temps-là, où les Espagnols n'auoient aucune connoissance de la langue Peruuienne? Mais pour reuenir à l'interpretation du Truchement Philipille, qui fut si mauuaise, qu'au lieu d'esclaircir, & de rendre intelligibles les paroles du bon Religieux F. Vincent de Valverde, elle les obscurcit, & les rendit ambiguës, ie remarqueray icy les principales de ses impertinences, qui furent, que parlant de la generation d'Adam, il dit, *Que tous les hommes du Monde, nais & à naistre, chargerent Adam de leurs Pechez;* au lieu de dire, *Que tous les Hommes qui sont nais, & qui naistront, ont herité, & heriteront du Peché d'Adam: Et qu'au reste Nostre Seigneur Iesus-Christ, sans parler aucunement de sa Diuinité, fut vn tres-grand Homme, qui mourut pour le Genre-humain.* l'obmetts qu'il ne fit non plus mention de la pureté de la Vierge, & qu'en vn mot il rendit le sens des Paroles, dont il deuoit estre l'Interprete, tout au contraire de l'intention de celuy qui les profera.

Il est vray neantmoins, qu'en l'explication de la seconde Partie de la Harangue, il fit moins de fautes qu'en la premiere, à cause qu'elle traittoit d'un sujet de Guerre: mais d'un autre costé, il encherit tellement sur la puissance de l'Empereur Char-

les V. & sur les soins qu'il prenoit d'enuoyer des Capitaines & des soldats à la Conquête du Monde entier, qu'à l'oüir parler les Indiens se firent accroire que Charles estoit Maistre du Ciel, & le laisse à part quantité d'autres choses qu'il mit en auant, & qui n'estoient pas moins extrauagantes que celles-cy, pource que le Truchement ne les entendoit point, & qu'il ne pouuoit par consequent expliquer au net ce qu'il ignoroit entierement: Toutesfois de cette faute, le Pere Blas-Valera en tire vne verité fort grande & tres-remarquable, qui est qu'aujour d'huy les Indiens de Cozco, qui naissent & sont nourris par les Espagnols, dont ils scauent fort bien la langue, & qui ne sont pas mal instruits aussi dans les Mysteres de la Foy, n'osent pourtant expliquer en leur idiome aux Indiens Estrangers, ce qu'ils oyent dire aux Predicateurs Espagnols, de peur qu'il ne leur eschappe quelque erreur, pour les difficultez qu'ils rencontrent dans ce langage-là. Que si telle chose aduient à present aux Indiens instruits en la Foy, & versez en la langue Espagnole, que pouuoit-on esperer en ce temps-là d'une personne qui ne scauoit ny l'un, ny l'autre?

RESPONSE D'ATAHVALLPA A LA HARANGUE de F. Vincent de Valverde.

CHAPITRE XXIV.

LE Roy Atahvallpa, ayant appris par la conclusion de la Harangue du Religieux, qu'il luy vouloit persuader de se delmettre de gré, ou de force, de tous ses Royaumes, pour se rendre tributaire d'autrui; & satisfaire au desir du Pape & de l'Empereur, qui le vouloient ainsi, sinon, qu'on mettroit tout à feu, & à sang dans le Peru, & que le mesme chastiment luy aduiendroit, & aux siens qu'au Tyran Pharaon, & à son Armée; fut grandement affligé d'une si mauuaise nouvelle. Car il s'imagina que ceux que luy, & ses Indiens appelloient *Viracochas*, les tenans pour Dieux, ne luy pouuoient faire de si rudes, & si estranges demandes, à moins que d'estre en effet ses ennemis mortels; ce qui fit qu'il en soupira du profond du cœur, & qu'il exprima son regret par le mot *Atac*, qui signifie, hélas ! comme si par

cette interiection, il eut voulu donner à connoistre combien luy estoit sensible la conclusion de la Harangue de F. Vincent, auquel il fit la Responce suiuaute, adoucissant le mieux qu'il pût l'amertume de son Ame.

C'EST est un grand bon-heur pour moy, si apres auoir refusé comme vous auez fait, de respondre aux choses que l'ay demandées à vos Deputez, vous m'eussiez appris vostre volonté par un Interprete plus sçauant, plus fidelle, & plus experimenté que le vostre. Vous n'ignorez pas iem'assure, que les deuoirs de la vie Civile & Politique entre les hommes, s'apprenuent bien plus tost par la parole, que par les consumedes: Et partant, quand vous auriez les plus hautes Vertus qu'on se puisse imaginer; si vous ne me les donnez à cognoistre de vive voix, il sera difficile que ie les puisse concevoir par la veüe. Si donc cette necessité du Discours est requise au commerce de tous les Peuples du Monde, elle l'est particulièrement à ceux qui pour estre grandement esloignez comme nous sommes, & de pays, & de langage; ne peuuent se descouvrir leurs pensées, que par le moyen des Interpretes; tellement que s'ils ne sçauent les langues comme il faut, il vaudroit autant parler à des bestes qu'à eux. Je vous dis cecy, homme de Dieu, pource qu'il est impossible que vos sentimens ne soient differents de ce que m'en a dit vostre Truchement: l'affaire dont il est question le requiert ainsi; Et si cela n'estoit, il faudroit necessairement que les effets desmentissent vos propositions. Car apres m'auoir aduertiy par vos Ambassadeurs, qu'elles n'estoient autres que de traiter avec moy de Paix, d'Amitié, d'Aliance perpetuelle, & mesme de Parenté; ce m'est vne merueille bien estrange, que maintenant vous me fassiez dire tout le contraire par vostre Interprete. A ce que ie puis iuger de son Discours, il ne me menasse pas de moins, ny tous mes faiets, que de Guerre, de Feu, de Sang, & de Massacre. Il presche le bannissement & la ruine totale, tant des Incas, que de tous ceux de leur Sang, & veut que renouçant à mon Empire, de force, ou de gré, ie deuienne tributaire d'un homme que ie ne cognois pas: d'où ie tire cette consequence, qu'il faut necessairement ou que vostre Prince, & vous, soyez des Tyrans; qui rodant par le Monde, vsarpez les Royaumes d'autrui, & ostez les biens, & la vie à des personnes qui ne vous doiuent rien, & qui ne vous ont iamais offencé; ou que le grand Dieu viuant, par nous appelé Pachacamac, vous ait fait Ministres des chastimens qu'il veut executer contre nous. Que si cela est, moy, & mes subiets, nous offrons volontairement à la Mort, & nous redons à vostre mercy, bien que ce ne soit pour aucune peur que

nous ayons, ny de vos menaces, ny de vos armes; mais seulement pour obéir à mon Pere Huayna Capac, qui nous commanda par son Testament de servir, & d'honorer des hommes barbus, comme vous, qui viendroient en ce pays un peu apres qu'il seroit mort; ce qui luy fut confirmé quelques années auparavant par la nouvelle qu'il eut que des gens tels que vous estes, courroient les costes de son Empire; desquels il nous dit, que c'estoient des Peuples plus Religieux, plus sages, & plus vaillants que nous ne sommes, outre que leur Loy valoit incomparablement plus que la nostre. Sçachez donc que pour satisfaire à la dernière volonté de mon Pere, nous vous auons appellez Viracochas, vous tenant pour Messagers du grand Dieu Viracocha, à la iuste indignation, & à la puissance duquel on ne scauroit resister, quoy que neantmoins il ne laisse pas d'estre bon, & misericordieux. Voila pourquoy, comme ses Ministres, vous ne deuez point porter plus auant les ravages, & les cruels degasts que vous auez faits à Tumpiz, & en toute sa Frontiere.

* Il veut dire vn Dieu en 3. personnes comme il a esté remarqué cy-deuant. ** Lisez le Chapitre precedent, qui vous esclaire de ces deux erreurs, aduenues par sa faulx explication du Truchement ignorant.

Outre cecy vostre Interprete m'a mis en auant cinq hommes signalez, dont il faut, dit-il, que s'aye cognoissance. Le premier est trois, & vn, * qui sont quatre, que vous nommez Createur de l'Vniuers; & possible est-ce le mesme que nous appellons Pachacamac, & Viracocha. Le second est celuy que vous distes estre Pere des hommes, sur qui ils se sont dischargez * de tous leurs Pechez. Le troisieme est Iesus-Christ, qui fut le seul, à ce que i'en puis comprendre, qui ne se dischargea point des siens * sur ce premier Homme, & qui endura la Mort. Le quatrieme, adioustez-vous, est le Pape: Et le cinquiesme Charles, que vous nommez, sans faire conser des autres, puissant Monarque de l'Asininers, & relené par dessus le reste des Mortels. Mais si ce Charles est Prince absolu de tout ce que l'on voit icy bas, qu'estoit-il besoin que le Pape luy fit une nouvelle donation, pour me faire la Guerre, & usurper mes Royaumes? Et si le Pape auoit ce pouuoir, n'estoit-il pas plus grand Seigneur que Charles, qui est, à ce que vous asseurez. Empereur de tout le Monde? Je m'estonne encore de ce que vous voulez que ie luy paye tribut plus tost qu'aux autres, sans m'en donner aucune raison, & sans considerer qu'il n'y a rien qui m'y puisse obliger: car si i'auois à payer tribut, & faire hommage à quelqu'un, ce deuroit estre ce me semblera, à ce grand Dieu qui nous a tous créez; à ce premier Homme qui est Pere du Genre humain; à ce IESVS-CHRIST, qui n'a iamais mis ses pechez sur autrui, & qui peut donner mes Royaumes, & ma Personne à qui bon luy semblera. Que si vous me respondes que ie ne

doij

doir rien à ceux cy, ie vous respondray de mesme que ie ne doy rien non plus à vostre Charles, qui m'est incognu, & qui n'a iamais eu aucun droit sur les terres de mon obéissance : Mais apres tout, quand mesme il l'auroit par la donation du Pape; il estoit iuste, si ie ne me trompe, que vous m'en aduertissiez, auant que de me menacer de Guerre, de Fen, de Sang, & de Massacre, pour me faire resoudre de m'assujettir à son Empire; Car ie ne suis pas si despouruen d'esprit, que ie ne sçache bien obeyr à ceux auxquels la Raison, & l'Equité m'obligent de me soumettre.

Pour conclusion de ce que i'ay dit; ie voudrois bien sçauoir si vostre IESVS-CHRIST, qui fut si bon, mourut de maladie, ou entre les mains de ses Ennemis? S'il fut mis au nombre des Dieux deuant sa Mort, ou apres; & si vous prenez pour des Diuinites ces cinq Personnes, que vous m'auiez proposees, & auxquelles vous portez tant d'honneur? Car si cela est, vous auez plus de Dieux que nous, qui n'adorons que le Pachacamac, comme souverain Dieu, au deffous duquel nous mettons le Soleil, qui a la Lune pour Sœur, & pour Femme. Voila pourquoy ie seray bien aise de m'esclaircir de toutes ces choses par un meilleur Truchement que n'est celuy qui m'en a parlé, afin que les sçachant, ie vous obeysse.

GRANDE SEDITION ADVENUE ENTRE les Indiens, & les Espagnols.

CHAPITRE XXV.

L'ESPREEVE qu'Atahualpa venoit de faire de l'ignorance du Truchement des Espagnols, fut cause qu'il s'aduise de deux Expedients, pour s'accommoder à son ignorance, & se faire mieux entendre à luy. Le premier fut de luy dire les choses par Articles, l'un apres l'autre, iusques au dernier, afin qu'il les conceut, & les retint plus facilement; Et le second, de les debiter en la langue de *Chinahafuyu*, se persuadant que pour estre plus commune en ces Prouinces-là, que celle de Cozco, elle seroit plus intelligible à l'Interprette Philipille; & qu'ainsi il en comprendroit mieux ses raisons, & les feroit mieux comprendre aussi aux autres, quelque barbare que fut son langage. Tellement qu'apres les auoir desduictes le mieux qu'il pût, on

enuoya dire aux Annalistes qu'ils eussent à les marquer par leurs neuds, afin que par traditiue elles vinsent à la cognoissance de la Posterité.

Tandis que cela se passoit, les Espagnols ne pouuant souffrir la prolixité de la Harangue du Religieux, sortirent de leurs Postes, pour combattre les Indiens, & leur oster l'or, l'argent, & la pierrierie, dont ils s'estoient parez, pour faire plus d'honneur à l'Ambassade du Monarque de tout l'Vniuers qu'ils venoient ouïr. Cependant, quelques autres de leurs Camarades s'aduiserent de monter sur vne petite Tour, où il y auoit vne Idole, enrichie de plaques d'or, & d'argent, & de pierres precieuses, qu'ils pillerent entierement; dequoy les Indiens firent vn grand bruit, & en voulurent tirer vengeance: Mais l'Ynca, qui s'en apperceut, se mit à crier qu'ils s'arrestassent, & s'abstinissent de traiter mal les Espagnols, quelques pillages qu'ils fissent, quand mesme ils attenteroient à sa propre vie. Surquoy le Pere Blas-Valera fait cette belle Reflexion, Que comme Dieu, nostro souuerain Maistre, changea en douceur l'humeur aigre du Roy Assuere, par la presence de la Reine Esther; ainsi par le moyen de la Sainte Croix, que le Religieux de Valverde tenoit en main deuant l'Ynca, il rendit non seulement doux, & paisible; mais encore plein de soumission, & d'humilité, le cœur du Roy Atahuallpa: Car comme nous auons dit, si tost que l'esmeute commença, il fit commandement à ses gens de ne point combattre, quand mesme les Espagnols se voudroient saisir de luy, & le mettre à mort, D'où il paroist manifestement, que ces merueilles, & autres semblables que nous verrons dans la suite de nostre Histoite, furent des effets de la Misericorde Diuine, qui voulut par elles disposer les Ames de ces Gentils à receuoir la verité de sa Doctrine, & de son saint Euangile. Les Historiens font Auteur de cette alarme F. Vincent de Valverde, disant que ce fut luy qui mit les Espagnols en esmeute, en leur demandant iustice, & vengeance d'Atahuallpa, qu'ils accuserent d'auoir ietté par terre le Liure du Religieux, quoy que cela n'aduint point. Ce qui se passa, fut que F. Vincent se mit luy mesme en alarme par le bruit soudain des Indiens, apprehendant qu'ils ne luy fissent quelque mal, d'où il aduint qu'il se leua promptement de la Chaire, où il estoit assis en parlant au Roy; & qu'en se leuant, il posa la Croix qu'il tenoit en main; si bien qu'à mes-

me temps le Liure qu'il auoit deuant luy, vint à cheoir. Comme il se fut donc baissé pour le releuer, il courut viste à ses gens, auxquels il cria qu'ils ne fissent aucun mal aux Indiens, ayant desia quelque inclination enuers Atahualpa, pour auoir iugé de son accortise par sa responce, & de la viuacité de son esprit par ses demandes, auxquelles ils s'en alloit satisfaire, quand cette esmeute se fit, qui les empescha d'ouïr ce qu'il leur dit en faueur des Indiens. Adioustez à cecy que c'est faussement encore que les Historiens attribuent au Roy d'auoir proferé ces paroles. *Vous autres croyez que Iesus-Christ est Dieu, & qu'il a souffert la Mort: mais pour moy, j'adore le Soleil, & la Lune, qui sont immortels;* Et qu'ils assurent en fuite, qu'ayant demandé à F. de Valverde qui luy auoit appris que le Dieu des Chrestiens estoit le Createur de l'Vniuers? ce bon Religieux luy respondit, que c'estoit son Liure: & qu'alors le Roy le prit en main, en tourna les feüillers, puis le porta en l'vne de ses oreilles; & voyant qu'il ne luy disoit mot, il le ietta par terre: ce qu'apperceuant F. Vincent, il le releua tout aussi-tost; & s'en allant aux Espagnols, *Chrestiens,* leur dit-il, *endurez-vous que ces Meschans foulent aux pieds les saints Euangiles? Vangez à ce coup l'outrage qu'ils font à nostre Religion, & destruissez ces Infidelles, qui mesprisent nostre Loy, & se moquent de faire amitié avecque nous.* Il ne faut pas croire aussi moins fabuleuse que tous ces beaux contes, cette responce qu'ils font faire à l'Ynca dans leurs Escrits. *Je suis né libre, & n'ay que faire de payer tribut, puis que ie ne dois rien à personne, & que ie ne releue d'aucuns Potentats: Ce n'est pas neantmoins que ie ne fusse bien aise d'estre Amy de l'Empereur, quand ie considere qu'apparemment il faut qu'il soit fort puissant, pour enuoyer comme il fait, tant d'Armées en des pais si esloignez, comme sont ceux-cy. Mais touchant ce que vous me dites que ie dois rendre obeissance au Pape; ie ne suis pas d'humeur à cela, pource que ie ne puis croire pour bien Charitable un Homme qui veut enrichir ses Amis aux despens d'autrui, & qui me commande que j'aye à renoncer, au profit d'une personne qui m'est inconnuë, à un Empire qui m'appartient par droit d'heredité. Quant à ma Religion, puis qu'elle me semble tres-bonne, j'aurois bien peu d'espris & d'honneur de la changer avec une autre, & de mettre en question, & en doute une chose qui n'est pas moins approuuée qu'elle m'est agreable, pour l'auoir eüe de mes Ancestres par une tradition tres-ancienne.*

Mais comme ie viens de dire, ces choses ne sont que pures faibles, appuyées sur la complaisance, & sur les fausses Relations que les Historiens en ont eües. Car apres tout Atahualpa ne nia iamais le droit du Tribut, & insista seulement sur ce qu'on luy en donna la raison, tellement qu'en cette conioncture survint le bruit que firent les Indiens. Le General Espagnol & ses Capitaines enuoyerent à l'Empereur la Relation que les Historiens en ont depuis publiée, & apporterent toute sorte de precautions, & de soins, pour empescher qu'on n'escriuit la verité des choses passées, qui sont celles que i'ay dittes, que i'ay apprises par la bouche de plusieurs Conquerants qui se trouuerent en cette iournée: là: Outre qu'elles sont particulièrement marquées dans les nœuds Historiques de cette Prouince de Cassamarca. Surquoy le. R. P. Blas- Valera rapporte, qu'un de ceux qui les sceurent le mieux, fut Alonse Valera son pere, auquel il asseure d'en auoir ouï faire le Recit plusieurs fois. En vn mot le nombre de ceux qui moururent ce iour- là fut de plus de 5000. Indiens, dont il y en eut bien 3500. qui passerent par le fil de l'espee: Et quant aux autres, ce furent des Enfants, de jeunes garçons, des femmes, & des vieillards inutiles, pource qu'il accourut à cette Assemblée vne infinité de gens de tout sexe, & de tout aage, pour rendre l'Ambassade de ceux qu'ils tenoient pour Dieux plus solennelle, & plus authentique. Il en mourut de ceux- cy plus de 1500. qui furent estouffez dans la foule de leurs propres gens, & de la Caualerie, sans y comprendre vne autre tres- grande quantité de personnes de tous aages, qui furent esclafées sous vne muraille, que les Indiens abbatirent par l'impetuosité de leur fuite, sans qu'il fut possible d'en sçauoir le compte, pource qu'ils furent enterrez tous en vie, & que d'ailleurs il y auoit plus de 30000. hommes de guerre.

Deux iours apres cette destroute, la Croix fut trouuée au mesme lieu, où le P. F. de Valverde l'auoit laissée, personne n'ayant osé en approcher: les Indiens neantmoins l'adorerent, se souuenant de celle qu'ils auoient premierement veüe dans Tumpiz; & croyant qu'il y auoit dans ce bois- là quelque Deité particuliere, qui estoit vn Caractere de la puissance de Dieu: si bien qu'ils luy demandoient pardon des offences qu'ils auoient faites contre elle, ne sçachant pas les Mysteres de Iesus Christ nostre souuerain Seigneur. Alors ils se remirent en memoire cet-

te ancienne tradition de leur Ynca Viracocha, *Qu'il viendrois un iour, auquel non seulement leurs loix, leurs Villes, & leurs Estats seroient changez, mais leur Religion aussi, & leurs Ceremonies s'esteindroient comme un feu, & passeroient aussi viste qu'un esclai.* Or pource qu'ils ignoroient si cette reuolution deuoit aduenir alors, ou depuis, leur Roy n'en estoit pas moins en doute qu'eux mesmes, qui ne pouuoient se resoudre, ny de se deffendre, ny d'offencer les Espagnols, qu'ils respedoient au contraire comme des Dieux, les croyant vrayz Messagers du Dieu Viracocha, qu'ils adoroient, & dont ils leur auoient donné le nom, pour s'autoriser dans cette croyance.

Tout ce que ie viens de rapporter est tiré de nos Relations, & des Memoires du Pere Blas-Valera, dont ie desirerois grandement d'auoir l'Histoire parfaite, afin d'en orner la mienne, pour estre bien assure qu'il n'escruiroit rien qu'en vray Religieux, & en homme ponctuel, qui cherchoit la verité de chaque succez par l'exacte Information qu'il tiroit des Indiens, & des Espagnols, pour se satisfaire dauantage. Voilà pourquoy ie ne manqueray pas de le citer en tous les endroits qui me sembleront conuenables à mon sujet, pour l'appuyer de son Authorité, car ie l'estime si grande, qu'elle me fait Admirateur de ses ouvrages, dont ie ne trouue jamais des fragmens, & des pieces déchirées, qu'il ne me prenne enuie de pleurer, tant i'en ay de regret.

L'AUTHEVR CONFRONTE CE QU'IL
a dit avec les Histoires des Espagnols.

CHAPITRE XXVI.

AYANT maintenant à faire vne maniere de parallele entre les choses que i'ay rapportées, & celles que les Historiens Espagnols ont escrites; ie vous aduertis que la Harangue de Frere Vincent, & la Responce d'Atahuallpa sont fort abregées dans les Histoires qu'on a données au Public: ce qui est adueni de ce que le General, & ses Capitaines, qui enuoyerent la Relation, retrancherent la pluspart des choses qu'ils vouloient n'estre pas sceñs; Et qu'au contraire ils y en adiousterent plusieurs

autres, qu'ils croyoient leur estre fauorables, afin de ne se condamner eux-mesmes, s'ils en vsoient autrement, pour les gratifications qu'ils enuoyoit demander en recompense de leurs beaux Exploits, qu'ils esmailloient, & doroient, pour les rendre plus agreables, & plus esclatrans. Ce que nous auons raconté du commandement qu'Atahuallpa fit à ses Indiens de ne point combattre contre les Espagnols, est aussi rapporté par les Historiens; & particulièrement par François Lopez de Gomare, qui dit; *Bien que ce iour-là les Indiens fussent prests, & dessous les Armes, si est-ce qu'ils ne donnerent point, chose non moins remarquable que fort estoignée de leur humeur farouche, & de leur façon de faire la Guerre, pource qu'ils n'en eurent ny signal, ny ordre: Outre qu'estans sur le point de consulter là dessus, ils se trouuerent surpris, & tous en alarme par le bruit soudain des Trompettes, des Arquebuses, de l'Artillerie, & des Cheneaux mesme, au poitrail desquels on auoit attaché quantité de sonnettes, afin que leur tintamarre confus les espouuentât.* Et vn peu plus bas il adjouste, *Que plusieurs Indiens furent tuez en ce Combat, pource qu'ils ne daignerent resister, & que cependant les nostres les perçoient à grands coups d'estocades, par le conseil de F. Vincent, qui leur persuadoit d'en vser ainsi, pour ne rompre leurs espées.* Voilà ce qu'en dit Gomare, à l'opinion duquel s'accordent les autres Autheurs, qui remarquent qu'aussi-cost que les Indiens virent leur Roy prisonnier, il se desbanderent, & se mirent en destoute. D'où l'on peut conjecturer, qu'il falloit bien qu'Atahuallpa leur eut deffendu de ne point combattre. Ce qui fut assurément vn effet de la Misericorde de Dieu, pour empescher que ce iour-là ne mourussent plusieurs fideles Chrestiens, qui deuoient prescher son saint Euangile. Que si l'Yncane leur eut deffendu d'en venir aux mains, & de resister, il est indubitable, que voyant leur Prince par terre, & qu'on l'arrestoit prisonnier, ils se fussent seruis de leurs Armes qu'ils auoient en main, & des pierres mesmes, pour empescher qu'on ne l'emmenast; & qu'ils eussent respandu pour luy iusques à la dernière goutte de leur sang: tellement que de 160. Espagnols qu'ils estoient en tout, vn seul ne fut demeuré en vie, au lieu que pas vn d'eux ne fut ny tué, ny blessé, à la reserve de Dom François Picarte, qu'un des siens blessa legerement, & sans y penser, comme il se voulut saisir d'Atahuallpa, ainsi que les Historiens le remarquent. Or ce que les Indiens ne cōbattirent point, fut, com-

me il a esté dit ailleurs, pource qu'ils tenoient pour vne maximo de Religion le commandement de l'Yncas, quand mesme sa vie & la leur y eussent couru fortune, comme il aduint en l'occasion presente. Quant à la reproche qu'on fait à Frere Vincent d'auoir luy-mesme attisé le feu de sedition, demandant vengeance contre les Indiens, & conseillé aux Espagnols de ne frapper ny de reuers, ny de taille, pour ne rompre leurs espées, d'où il aduint que le Massacre des Indiens en fut plus grand, le mesme Auteur rapporte que ce fut vne fausse Relation que l'on fit aux Historiens, qui escriuirent en Espagne tout le contraire de ce qui s'estoit passé à 3000. lieues de là. En effet, ce seroit vn crime que de s'imaginer seulement qu'un Ecclesiastique eut proferé ces paroles-là, qui eussent bien pû partir de la bouche d'un Neron, mais non pas de celle d'un Religieux, qui pour son grand sçauoir, & sa vertu eminente merita d'estre Euesque depuis, & mourut entre les mains des Indiens, en leur preschant la Foy de IESVS. CHRIST. Reuenons à nostre Histoire.

LES ESPAGNOLS FONT PRISONNIER *le Roy Atahualpa.*

CHAPITRE XXVII.

LEs Cavaliers Espagnols sortirent alors de leurs postes en grande furie, & se meslerent à toute bride dans les bataillons Indiens, dont ils tuerent plusieurs à coups de lances, ne trouuant personne qui leur resistat. Cependant Dom-François Pizarre & ses Fantassins s'aduancerent du costé d'Atahualpa, poussez d'un ardent desir de l'auoir entre leurs mains, pource qu'ils croyoient qu'ayant gaigné ce Ioyau, ils auroient en leur puissance tous les tresors du Peru; Ce qu'apperceuant les Indiens, ils enuironnerent en grand nombre la Chaire du Roy, pour empescher qu'on ne le foulât aux pieds, ou qu'on ne luy fit quelque autre mal. Les Espagnols en blessèrent plusieurs, bien qu'ils ne se deffendissent point, & qu'ils se tinssent seulement au tour de la Chaire du Roy, afin qu'aucun n'en pût approcher: mais apres qu'il en fut demeuré quantité de morts sur la place, l'on fendit la presse enfin, & Dom-François Pizarre fut le premier

qui le saisissant par l'une des manches de sa robe, tomba par terre avec luy, bien qu'un Historien dise qu'il le prit par les cheueux, mais il se trompe, pource que les Yncas estoient rasez.

Quoy qu'il en fut, il est tres-certain que les Espagnols renuerlerent de sa Chaite le Roy Atahualpa, qu'ils firent leur prisonnier: Et c'est à ce propos que François Lopez de Gomare dit ces paroles. *Pas-vn des Espagnols ne fut ny tué, ny blessé, hormis François Piçarre, qui voulant saisir Atahualpa, recut vne atteinte d'un poignard, dont vn de ses soldats voulut blesser l'Ynca, pour l'abattre par terre: d'où quelques-vns ont tiré cette coniecture, que ce fut* Ch. 113. *vn autre que Piçarre qui l'arresta prisonnier.* Ce sont les ptoptes tetmes de Gomare, ausquels nous adiouterons, pour suppléer au defaut de son Histoire, comme nous l'auons proposé, que ce soldat, qu'on nommoit Michel Astete, fut depuis vn des Seigneurs de la Ville de Huamança, où il fut pourueu d'un bon Departement d'Indiens. Comme Atahualpa vint à cheoir, ce mesme soldat luy osta le Bourlet rouge qu'il portoit au front en lieu de Couronne, & le garda soigneusement: ce qui fit croire à plusieurs qu'autre que luy n'auoit pris le Roy. Mais quoy qu'il en soit, puis qu'ils se trouuerent si ptoches l'un de l'autre, il est iuste d'endonner l'honneur au Capitaine Michel Astete, qui garda ce Bourlet iusques en l'an 1557. qu'il le rendit à l'Ynca Sarti Tupac, quand il sortit des Montagnes, où il s'estoit retiré, comme il sera dit en son lieu.

Les Indiens voyant leur Roy pris, & que les Espagnols ne cessoient de blesser, & de tuer, s'enfuirent tous; & ne pouuant sortir par où ils estoient entrez, pource que les gens de cheual s'estoient saisis de ce poste-là, s'allèrent mettre à couuert d'une Muraille, de celles qui enuironnoient cette Place-là, & qui estoient routes de brique fort pollie, faites au temps du grand Ynca Pachacutec, lors qu'il gaigna Cassamarca. Mais à force de courir viste contre cette Muraille, pour se garantir de la violence des Cavaliers; ils la choquerent si rudement, qu'ils en abbatirent plus de cent pas de longueur, & s'ouurirent ainsi vn chemin pour se retirer au Camp. Vn Auteur rapporte icy que les pierres de ce Mur-là furent plus pitoyables que les cœurs des Espagnols, puis qu'elles se laisserent choir, pour fauoriser la sortie, & la fuite des Indiens, qui ne pouuoient s'eschapper autrement des mains de la Mort. Mais les Espagnols (comme le

le rapportent les Auteurs, ne se contentant pas de les voir fuir, les pourſuivirēt la Lance à la main, iufques à ce que la nuit leur en fit perdre la piſte: Alors ils ſaccagerent leur Camp, où ils eurent quantité d'or, d'argent, & de pierreie. François Lopez de Gomare dit à ce propos ce qui ſ'enſuit. *Ils trouuerent, tant au Palais Royal, qu'au Camp d'Atabaliba 5000. femmes, qui bien que tristes, & abandonnées, ne laiſſerent pas de prendre part avec les Eſpagnols à une infinité de riches Tentés, de beaux Meubles, de fines Eſtoffes, d'habillemens ſuperbes, & de précieux vianciles d'argent, & d'or: l'un deſquels preſtoit à ce que l'on tient 200. liures de ce Metal, la ſeule vaiſſelle d'Atabaliba eſtant eſtimée cent mille Ducats. Cependant ce mal-heureux Prince eut tous les déplaiſirs du Monde de ſe voir dans les fers, priant à tout coup Piſarre de le vouloir bien traiter, puis que ſon deſſin l'auoit fait tomber entre ſes mains, &c. L'ay tiré cecy mor à mor de Gomare, d'Auguſtin de Çarate, qui dit preſque le meſme, & de quelques autres Hiſtoriens, auxquels ie renuoye ceux qui en voudront ſçauoir dauantage.*

Ch. 13.

*ATAHVALLPA PROMET POVR SA
deſliurance vne incroyable Rançon aux Eſpagnols,
qui pour l'auoir font toute ſorte de dilligences.*

CHAPITRE XXVIII.

LEs hommes de condition qui ſ'eſtoient ſauuez du Maſſacre de Caſſamarca, ſçachant que leur Roy viuoit, ſe preſenterent pour le ſeruir en priſon. Vn ſeul Ruminai, ſon Meſtre de Camp, qui eſtoit demeuré à l'arriere-garde, & qui n'auoit iamais eſté d'aduis de traiter de Paix avecque les Eſpagnols, ny de ſe fier en eux, ſçachant ce qui ſe paſſoit à Caſſamarca, fut ſi faſché de ce qu'on ne l'auoit pas voulu croire, qu'il ſ'enſuit avecque ſes gens au Royaume de Quitu, afin d'y faire les preparatifs neceſſaires, pour ſe deffendre des Eſpagnols, & pouſſer ſes deſſeins particuliers plus auant; car ſon intention eſtoit de ſe ſouſleuer contre Atahualpa, avec ceux de ce Royaume là, ſuiuant le mauuais exemple que luy-meſme leur auoit donné. Pour cetter fin, dès qu'il fut arrivé à Quitu, il ſe ſaiſit de quel-

ques vns des enfans du Roy, sous pretexte de les vouloir protéger, & deffendre contre les violences des Espagnols; mais vn peu apres il les mit à mort; comme aussi Culliscacha, que les Historiens Espagnols nomment autrement Yllescas, Frere d'Atahualpa; outre lesquels il fit mourir aussi le Mestre de Camp Chalcuchima, & plusieurs autres Capitaines, & Curacas, comme il sera dit en son lieu.

Le Roy Atahualpa se voyant garraté d'une chaisne de fer, commença de capituler, & offrit pour sa Rançon de couvrir de vaisselle d'or, & d'argent le plancher d'une grande salle, où il estoit prisonnier; mais voyant bransler la teste aux Espagnols, qui estoient là presents, comme s'ils eussent voulu donner à cognoistre par là qu'ils n'en croyoient rien, il les assura, ainsi que le remarque François Lopez de Gomare, *Que dans certain temps prefix, il leur donneroit autant de vaisselle, & d'autres pieces d'or, & d'argent, qu'il en faudroit pour remplir la Sale, à la hauteur d'une marque qu'il fit luy-mesme avecque la main, contre la muraille, à l'entour de laquelle il voulut qu'on traçat en esgale proportion une ligne rouge, afin qu'il n'y eut point de mesconte; à condition neantmoins de ne point foudre ny rompre les Tinettes, Cruches, & Vases qu'on y rangeroit iusques à la hauteur de la ligne, &c.* Voila les paroles de Gomare, sur lesquelles ie ne veus point encherir, pour n'estre si long que les autres Historiens, auxquels ie m'en remets entierelement. Il me fust de dire absolument ce qui regarda la vie, & la mort des Roys Yncas, iusques au dernier d'eux & de leurs descendans, ce qui a tousiours esté mon intention; & de rapporter en suite ce qui s'est passé de plus memorable dans les Guerres des Espagnols.

Atahualpa enuoya de toutes parts chercher de l'or, & de l'argent pour payer sa Rançon: Et bien qu'on luy en apportât vne prodigieuse quantité, si est-ce qu'il sembloit impossible aux Espagnols qu'il pût iamais accomplir sa promesse. A raison de quoy ils murmuroient entr'eux; disant que puis que le Prisonnier ne leur pouoit tenir parole, & que le terme estoit expiré, il ne luy faisoit point donner vn plus long delay, de peur que ses gens ne se ralliassent cependant, pour leur couper à tous la gorge, & desliurer leur Roy; si bien que ces choses qu'ils se mettoient dans l'imagination les rendoient fort mescontens: de quoy s'apperceuant l'Ynca, qui auoit l'Esprit penetrant, il en

demanda la cause à Dom-François Picarte; & l'ayant apprise, il luy dit, *Que les Espagnols auoient quelque raison de le soupçonner, pour ne sçauoir pas la grande distance des principaux lieux, d'où luy deuoit venir la plus grande partie de sa Rançon, qu'il esperoit auoir bien.* - est de Cozco, de Pachacamac, de Quitu, & de plusieurs autres Provinces; Qu'il leur faisoit sçauoir au reste, que le plus proche de ces endroits, qu'estoit Pachacamac, estoit à quatre vingts lieues delà: que iusques à Cozco il y en auoit 200. & 300. iusques à Quitu; En un mot, q e pour ne mettre en doute cette verité, ils n'auoient qu'à enuoyer quelques Espagnols, pour voir les tresors de ces pays-là, & de tout le Royaume, afin qu'ils se fussissent, & se payassent de leurs mains propres.

Mais comme l'Ynca se défia que les Espagnols ne iouissent quelque mauuais tour à ceux à qui l'on donneroit cette commission: Vous n'auez que faire de rien craindre, leur dit-il, puis que vous me tenez dans les fers. Alors Hernád de Sotto, & Pedro de Barco, natif de la Ville de Lobon, se resolurent d'aller à Cozco. Atahualpa fut bien fâché de ce qu'un tel voyage eschût à Hernand de Sotto, à cause qu'il luy vouloit du bien, & qu'il estoit comme assuré qu'il luy seruiroit d'Amy, quand l'occasion s'en presenteroit: toutesfois il n'osa point trouuer mauuaise sa Commission, de peur que les Espagnols ne luy reprochassent que luy-mesme se contredisoit en sa demande; Et qu'ainsi il ne leur fut plus suspect qu'auparauant. Outre ces deux Espagnols, il y en eut quatre autres qui furent enuoyez en diuerses Provinces, pour remarquer quels en estoient les tresors. Le premier fut à Quitu: le second au País des Huayllas: le troisieme à Huamachucu: Et le quatrieme à Cielapampar. On leur recommanda sur tout, de prendre bien garde si l'on ne leuoit point de gens de Guerre par le Royaume, pour tirer de prison Atahualpa leur Roy. Mais luy bien esloigné de mettre en execution les défiâces, & les soubçons que les Espagnols en auoient, ne pensoit qu'aux moyens d'auoir la quantité d'or, & d'argent qu'il auoit promise, pour se mettre en liberté; à cause de quoy il fit publier par tout son Royaume, Qu'en tous les lieux de son obeyssance par où passeroient ces Chrestiens solitaires, on eut à les receuoir, & à les loger, avec toute sorte de bon accueil, & de bonne chere. En effet, tant en consideration de ce mandement de l'Ynca, que pour les merueilles qu'ils auoient apprises des Espagnols, qu'on tenoit pour Dieux dans le país, & pour Messagers du grand Pachaca-

mac, comme ils en auoient eux-mesmes semé le bruit; outre qu'ils sçauoient en core ce qui estoit arriué dans Tumpiz à Pierre de Candie, avec ces deux Animaux furieux, dont nous auons parlé cy-deuant; on les regaloit le mieux qu'on pouuoit par toutes les Villes où s'adressoit leur voyage: car les habitans leur presentoiient tout ce qu'ils auoient de plus exquis, iusques à leur vouloir faire des Sacrifices, estans si superstitieux, & si sots, que d'adorer les Espagnols comme des Dieux; Car ils ne laissoient pas de les tenir pour tels, bien qu'ils ne sceussent que trop à leur dommage, par le rapport de ceux qui eschappiez du Massacre de Cassamarca, s'estoient espandus de part & d'autre, qu'ils les auoient traittez en Demons cruels, & horribles; ce qui estoit cause qu'ils leur sacrisoient, pour les appaiser, & empescher que s'ils ne leur vouloient faire du bien, ils ne leur fissent du moins aucun mal.

Hernand de Sotô, Pedro de Barco, & les autres quatre Espagnols, voyageoient à la façon du païs, dans des *Hamecas* portées sur les Espauls des Indiens, l'Yncal'ayant ainsi commandé, afin qu'ils allassent plus viste, & plus à leur aise. Où il est à rematquer, que le mot *Amaca* est Indien, & de la langue des Isles de Barlouento, où pour l'extrême chaleur du païs, les plus voluptueux reposent en certains Lits, qui sont comme des Rets faits des feuilles de Palmier, ou d'autres Arbres. Quant aux gens du commun, ils en ont de Cotton, qu'ils attachent par les deux bouts, à deux pieux, & qui s'esleuent ainsi de terre de la hauteur d'vne aulne, où l'on est plus fraichement, & plus à son aise que sur des Matelas. De cette mesme façon les Indiens du Peru, attachoient vne Mante à vn pieu de la longueur de trois ou quatre aulnes, où s'estendoit tout de son long celuy qui deuoit courir la poste; les autres deux bouts de la Mante estant noiez au plus haut du pieu, pour empescher que le Voyageur qui estoit dedans, où il sembloit estre mort, ne vint à tomber. Les Indiens le portoient avec grande adresse, & facilité; l'vn succedant au travail de l'autre, afin de se deslasser, car ils estoient tousiours 20. ou 30. qui le portoient chacun à son tour; & ceux-cy pareillement changeoient comme de relais de trois en trois lieux; pource qu'autrement ils n'y eussent pû suffire dans vn grand Voyage: Et voilà comme ils couroient la poste. Ils appelloient *Ниава*, ou *Rampa*, cette façon de Litiere, & les Espa-

gnols la nommoient *Hamaca*, pource qu'elle ressembloit à peu près aux Lieûs ordinaires,

Ce fut de cettelà façon que ces deux braues Espagnols Hernand de Sotto, & Pedro de Barco, firent 200. lieûs de chemin, depuis Cassamarca iusques à Cozco, avec plus d'assurance, & moins d'incommodité que s'ils eussent voyagé dans leur païs propre. Il en aduint de mesme aux autres quatre, pource que la parole de l'Ynca, & la proclamation qu'il fit faire, mirent en seureté leur vie, & furent cause que par tout où ils passèrent, on les receut si bien, que lors qu'ils en parloient eux mesmes, ils n'auoient pas des paroles assez propres, pour encherir sur vn si bon traitement.

*HERNAND PICARRE S'ACHEMINE
à Pachacamac : Sucez de son Voyage.*

CHAPITRE XXIX.

VN peu après le partement d'Hernand de Sotto, Hernand Picarre s'en alla au Temple de Pachamac; pour voir si ce qu'on disoit de ses grandes Richesses estoit veritable. Il prit avec luy des gens de cheual, pour n'estre pas seul, s'il luy arriuoit quelque chose de sinistre. Ces Espagnols se mirent ainsi en chemin; & comme ils eurent gagné le haut d'une Montagne, ils en virent vne autre deuant eux, dont le sommet leur sembloit tout d'or, & leur esbloüissoit les yeux, tant il estoit resplendissant par la reuerberation du Soleil. Ils marcherent droit en ce lieu-là, tous remplis d'estonnement, ne pouuant s'imaginer la cause de cét esclat extraordinaire; Mais comme ils y furent arriuez, ils trouuerent que c'estoient diuers Vtenciles de Cuisine, comme Tinettes, Brocs, Vases, grands & petits, Marmites, & Chauderons, sans y comprendre quelques Pauois, ou Rondaches, & plusieurs autres pieces d'or, & d'argent, qu'un Frere d'Atahuallpa, nommé Culliscacha, dont nous auons parlé cy-deuant, faisoit transporter, pour ayder à payer la Rançon du Roy, le tout estimé deux millions, contre le sentiment de quelques Historiens, qui ne le font monter qu'à 360000. Ducats, ou enuiron; ce qui me fait croire qu'il y eut de la faute en ce calcul,

comme il se verra cy-apres par les parties qui en furent faites. Les Indiens, qui portoient toute cette vaisselle, s'en estoient deschargez, quand les Espagnols en apperceurent l'esclat, qui leur fit iuger que ce pouuoit bien estre de l'or, comme ç'en estoit en effet. Ce conte-là me fut fait dans mon pais, par ceux qui se trouuerent presents à cette aduventure; & depuis estant en Espagne, i'appris le mesme du bon Cavalier Dom Gabriel Pigarre; ce qui me fut encore confirmé par vn autre Gentilhomme, nommé Iean Pigarre d'Orellana, qui pour s'estre trouué dans cette Iournée avec Hernand Pigarre, faisoit souuent le Recit des Richesses susdires, & de ce qu'il en auoit appris.

Culliscacha ne fut pas plustost arriué à Cassamarca, qu'il y desliura ces tresors pour son Frere Atahualpa, duquel il eut ordre en mesme temps de s'en aller au Royaume de Quito, pour en pacifier les troubles, s'il y en auoit, & preuenir la Rebellion que pouuoit faire son Mestre de Camp Ruminai, dont il connoissoit les mauuais desseins; & ainsi pour le preuenir, en se tenant sur ses gardes, il enuoya son frere apres luy.

Mais Ruminai, qui pour auoir esté le sanglant Ministre des cruautéz, & des tyrannies d'Atahualpa, scauoir dés longtemps ses artifices, & ses intrigues, ne vid pas plustost venir à luy Culliscacha, qu'il se douta bien pourquoy c'estoit. Il dissimula neantmoins; & le receuant comme Frere de son Roy, s'enquit amplement de sa prison, & des moyens qu'on pourroit tenir pour l'en desliurer; iusques-là mesme qu'à cette fin ils resolurent entr'eux d'amasser tout ce qu'il y auroit d'or, & d'argent dans le Royaume. Ruminai neantmoins ne desiroit rien moins que la liberré de l'Ynca; & s'il resmoignoit le contraire, c'estoit pour joüer le personnage de Traistre, tant à l'endroit du Roy, que de Culliscacha, qu'il regaloit, comme fidelle Ministre, en attendant le temps, & l'occasion d'executer, comme il fit, son pernicieux dessein.

Hernand Pigarre, sans s'amuser à Culliscacha, continua sa route iusques au grand Temple de Pachacamac, les incroyables Richesses duquel, & le grand nombre d'Indiens, dont cette vallée estoit peuplée, l'estonnerent grandement, & les gens de mesme. Mais les Indiens furent bien plus estonnez de voir les visages, & les cheuaux de leurs nouueaux hostes; ce qui fit que pour obeir au commandement de leur Ynca, ils les

adorerent comme des Dieux, leur rendirent tous les services imaginables, & les regalerent si bien, qu'on auroit peine à le dire. Alors ayant apperceu que leurs chevaux machoient leurs mords, qui estoient de fer, ils s'imaginerent, comme ceux de Cassamarca, qu'ils s'en nourrissoient : de sorte qu'à mesme temps ils leur apporterent quantité d'or, & d'argent, les priant de manger de ces metaux, qui estoient bien meilleurs que le fer. Cependant les Espagnols bien aises de se preualoir de l'ignorance des Indiens, ainfi qu'ils auoient fait à Cassamarca, leur disoient, *qu'ils apportassent quantité de ces viures-là, & qu'ils les messent parmy l'herbe, & le grain de Mahis, pource qu'assurément les chevaux, qui estoient grands mangeurs, engoutiroient le tout, ce que les Indiens faisoient aussi tost, tant ils adioustoient foy à leurs paroles.*

De tout l'or qu'Hernand Pigarre trouua dans le Temple, il en prit ce qu'il pût transporter commodement, & mit ordre qu'on enuoyât le reste à Cassamarca, disant aux Indiens, *Que c'estoit pour la Rançon de leur Roy Atahualpa, afin qu'ils donnassent de leur bon gré ces Richesses, & qu'ils ne les cachassent point.* Le mesme Pigarre estant à Pachacamac apprit à 40. lieuës delà, que plus auant dans le país, il y auoit vn Mestre de Camp d'Atahualpa, nommé *Chalenchima*, qui commandoit vn assez bon nombre de gens de Guerre; tellement qu'à l'heure mesme il despescha vers luy vn homme exprés, afin de luy dire qu'ils eussent à se voir ensemble, pour traiter de plusieurs choses necessaires à la Paix, & à la tranquillité du Royaume. L'Indien ne voulut point aller, où estoit l'Espagnol, ce qui fut cause qu'il falut que Pigarre l'allat chercher, au grand hazard de sa personne, & de tous ceux de sa suite; car il n'est pas à croire combien ils souffrirent, allant, & venant, soit pour les mauuais chemins, soit pour l'incommodité des grandes Riuieres, dont ils auoient à passer les Ponts, faits comme j'ay dit ailleurs, de plusieurs Clayes entassées l'une sur l'autre, où les chevaux ne pouuoient marcher, qu'avec vne peine extremement grande. Cependant tous les gens de Pigarre trouuoient bien estrange qu'il s'allat mettre à la mercy d'un Infidelle, au lieu de s'en deffier, pour le grand nombre de gens de Guerre qu'il auoit avec luy: mais le Capitaine Espagnol se fioit sur les promesses, & sur les seings & contre-seings que le Roy Atahualpa luy donna, quand il partit d'avec

luy pour faire ce voyage, afin de s'en préualoir au besoin, en cas qu'il fit reneontre par le chemin de quelqu'un de ses Capitaines, ou de ses Mestres de Camp: de sorte qu'à la faueur de si bonnes enseignes, Hernand Pigarre ayant trouué Chalcuchima, luy conseilla de congédier ses gens; & de s'en aller avec luy trouver son Roy prisonnier: comme en effet l'Indien le creut; & pour faire plus de dilligence, tous deux prirent le chemin de la Montagne, où ils fussent morts de froid, si les Indiens ne les eussent portez de temps en temps dans certaines Grottes, qui se rencontroient parmy les Rochers, dont il y a quantité dans ce Royaume, & où ils semettoient à couuert de la neige.

Ch. 114. Mais d'autant que pour la rudesse du chemin, leurs cheuaux se deffetroient, & qu'ils n'auoient daigné se pouruoir de fers, ne croyant pas que les chemins fussent si mauuais; ils s'aiderent de l'industrie des Indiens, qui leur en firent d'or, & d'argent, dont ils se seruirent à ce besoin. A quoy se rapportent ces paroles de Gomarc. *Ils furent contraincts alors de ferrer leurs cheuaux d'or, & d'argent, à cause que ces Metaux ne s'usient pas si tost, outre qu'ils manuoient de fer, &c.*

Auec ces traueux, & plusieurs autres incommoditez, Hernand Pigarre, & Chalcuchima arriuerent à Cassamarca, où le Mestres de Camp ayant à rendre ses deuoirs à son Ynca; comme il fut près de la Salle où il estoit prisonnier, posa ses Brodequins, & prit vne maniere de fardeau sur ses espauls, pour vne marque de soumission, & de seruitude: alors avec vn grand ressentiment qu'il tesmoigna de voir son Roy dans les fers, il luy dit, *Que s'il se fut trouué present à cette aduenture, il eut bien empesché les Espagnols de le prendre.* A quoy l'Ynca fit response, *Que le Pachacamac l'auoit ainsi permis, afin d'accomplir les predicions qu'ils auoient depuis tant d'années de la venue de ces nouueux Peuples, de la ruïne de leur Roy, & de l'alienation de leur Empire, dont son Pere Huayna Capac les auoit asseurez auant que mourir.* A toutes lesquelles choses il adjousta, *Que depuis sa prison, il auoit enuoyé à Cozco consu d'or son Pere le Soleil, & tous les autres Oracles du Royaume, mais particulièrement l'Idole de la vallée de Rimac, qui auoit tout à coup perdu la parole, Qu'au reste ce qui l'affligeoit le plus, estoit que l'Oracle voilé, qui se voyoit dans le Temple de Pachacamac, & qui disoit à ceux qui l'interrogeoient sur les affaires des Roys, & des Grands du Royaume, quel en deuoit estre l'euénement; estoit aussi devenu muet.* Car bien qu'on

qu'on l'eut consulté sur la prison d'Atinca, & sur les moyens qu'on pourroit aduifer pour rompre ses fers; on n'auoit pu tirer un seul mot de luy: Qu'au surplus tous leurs Sacrificateurs, & leurs Deuins qui n'aguere communiquoient si familièrement avec les autres Oracles de l'Empire, l'auoient aduertiy qu'on n'espéroit plus d'en auoir à l'aduenir aucune réponse, ny par Coniurations, ny par Sacrifices. D'où le mal-heureux Atahualpa conclud, Qu'il apprehendoit extrêmement que le Soleil son Pere ne l'eut tout à fait abandonné, puis qu'il ne souffroit plus à l'accoustumée, que ses Prestres, & autres personnes qui leur estoient consacrées, entraissent en conference avec ses Idoles; ce qu'il ne pouuoit prendre autrement que pour des presages euidentz de la fin de son Empire, & de sa vie.

Atahualpa tout en alarme, & touché dans le profond de son Ame, d'une douleur qui luy estoit sensible au dernier point, rentretint de ces langages funestes avec Calcuchima, son Mestre de Camp, dans la prison où il estoit, & où le secret remords de sa Conscience ne cessoit de luy reprocher les miseres, & les desolations que ses cruautéz, & ses tyrannies auoient causées, & causoient à tout moment, à l'infortuné Prince Huascar, & à sous ceux de la Famille Royale.

TOVS LES DEMONS DV PERU SONT
rendus muets, par la vertu des Sacrements
de la sainte Eglise.

CHAPITRE XXX.

C'EST chose certaine, que les faux Oracles cessèrent dans le Peru, par la diuine Vertu des Sacrements de nostre sainte Mere l'Eglise Catholique, Apostolique, Romaine. Le premier fut la Consecration du Corps, & du Sang de nostre Seigneur IESVS-CHRIST, dans les Messes que les Chrestiens voyent: Le second, le Baptême qu'on donnoit aux Indiens, qui entroient au seruice des Espagnols: Le 3. le Sacrement de Mariage, par lequel on les lioit inseparablemēt avec celles qu'ils espousoient. Le quatriesme, celuy de la Penitence, que les Espagnols pratiquoient par l'usage de la Confession, auant que de

communier. Ces quatre Sacremens furent establis tous les premiers dans mon País; & les autres trois ne le furent pas si promptement, pource qu'on voulut attendre qu'il y eut de la disposition pour les establis: de maniere qu'aussi-tost qu'on leur eut donné entrée dans le Peru, ils imposerent silence aux Demons, qui parloient auparavant aux Gentils, & communiquoient familièrement avec eux: Que s'ils respondoient par fois à quelques-vns, ce n'estoit qu'à leurs Sorciers & Deuins, dans le commerce desquels ils s'entretenoient d'ordinaire, encore faisoit-il que ce fût secrettement. Or bien que ceux du Party de *Huascar*, qui s'apperceurent tous les premiers de ce silence de leurs Oracles, dirent d'abord; *Que le Soleil, fâché des cruautés & des tyrannies d'Atahualpa, leur auoit enjoin de se taire, & que cela ne seroit peut-estre que pour vn temps*; Si est-ce qu'ils apprirent depuis par espreuue, que telle chose continuoit, non pas en vn seul lieu, mais par tout où il y auoit des Oracles: ce qui leur fit croire, qu'asseurément cela procedoit de la venue des Espagnols en leur país. A cause dequoy tant plus ils alloient en auant, tant plus ils les respectoient, & les craignoient comme des hommes qu'ils ne croyoient pas moins puissans que des Dieux, puis qu'ils faisoient perdre la parole aux Oracles: Aussi fust-ce pour cette mesme raison, qu'ils leur attribuerent de nouveau le nom de *Viracocha*, qui estoit vn Dieu qu'ils auoient en plus grande veneration que les *Huacas*, dont nous auons amplement parlé cy-deuant.

*HVASCAR YNCA DEMANDE SECOVRS,
à deux des Espagnols deputez.*

CHAPITRE XXXI.

HERNAND de Sotto, & Pedro de Barco, ayant fait plus de cent lieues, arriuerent à Sausa, où les Capitaines d'Atahualpa tenoient prisonnier Huascar ynca. Les Espagnols sçachant qu'il estoit en cel lieu, le voulurent visiter; & luy de mesme les voulut voir, quoy que cela fut difficile, de la façon qu'il estoit gardé. Toutesfois ils se virent enfin, sans qu'ils pussent alors s'entendre l'un l'autre, à faute de Truchement, tellement

qu'ils ne parlerent que par signes. Mais depuis il se verifia par coniectures, qu'après que Huascar Ynea eut appris des Indiens que la vraye intention des Espagnols estoit de rendre justice, & de vanger les outrages faits aux Innocens, comme en effet ils le publièrent dès qu'ils eurent mis le pied dans le païs; il leur dit, ainsi que les Historiens le rapportent, *Que puis que la principale fin de leur Roy, & de son Capitaine general, estoit de conseruer le bon droit aux Chrestiens, comme aussi aux Indiens, dont il feroit la Conqueste, & de leur faire redre à chacun le sien; il estoit bien aisé de leur pouuoir dire l'extrême tyrannie que pratiquoit contre luy son propre Frere; Qu'il ne vouloit pas seulement luy offer vn Royaume, qui luy appartenoit par succession legitime; mais la vie encore, veu que pour cette mesme fin il le tenoit prisonnier entre les mains de plusieurs Gardes, qui le traittoient fort mal: Et partant, qu'il les coniueroit de n'aller pas plus auant, & de ne l'abandonner point, pour mettre à couuert sa vie: Qu'aussi-tost qu'ils seroient sortis, les Capitaines qui le gardoient ne manqueroient pas de le mettre à mort; Qu'après que le General se seroit enquis de son bon droit, il le restablirait dans le Trofne, plus qu'il se d'soit n'estre venu là que pour la deffence de ceux que l'on opprimoit, & qu'alors il luy donneroient, & à ses gens, des Tresors incomparablement plus grands que ceux qui leur auoient esté promis par son Frere; Que non seulement il esleueroit vn monceau d'or, & d'argent, iusques à la ligne qu'il auoit marquée dans la salle de sa prison, mais qu'il le porteroit trois fois plus haut, & iusques au toict: Qu'il pouuoit tenir sa parole mieux qu'Atahualpa, comme seachant où estoient les Richesses de ses Ancestres, & de son Pere, qui consistoient en des Tresors inepuisables; & que son Frere ne pouuoit s'acquiter de sa parole, s'il ne despoüilloit de leurs precieux ornemens, les Temples, & les Autels, n'ayant point d'autres biens que ceux-là. A quoy Hernand de Sotto, & Pedro de Barco, qui l'entendrent par signes, firent responce de mesme; Qu'ils ne pouuoient rien entreprendre contre l'ordre de leur Capitaine, qui portoit qu'ils s'en allaissent à Cozco, mais qu'ils ne tarderoient guere à reuenir; & qu'alors ils luy rendroient tous les seruices qu'il pourroit desirer d'eux. Ils se défirent ainsi du pauvre Huascar Ynea, qu'ils laisserent plus triste & plus desolé qu'auparauant; pource qu'ayant mis quelque sorte d'esperance en leur venue, il la perdoit par leur partement, bien assésuré que leur entreueüe feroit cause, comme il aduint, qu'on luy osteroit plus promptement la vie.*

L'ES DEUX ESPAGNOLS ARRIVENT A
*Cozco, où ils trouvent des Croix dans les Temples,
 & dans les Maisons Royales.*

CHAPITRE XXXII.

LES deux Espagnols continuant leur route, s'en allerent à Cozco, où du plus haut du lieu qu'on nomme *Carmenca*, ils furent ravis de voir cette Ville Imperiale, si grande, & si bien peuplée. Ils y furent receus avec beaucoup de magnificence, & accompagnez d'un grand nombre de gens, qui accoururent exprès pour les voir. Des réjouissances, & des festes publiques se firent en faueur d'eux, où ce ne furent que bals, & que danses. Il y eut aussi des Arcs de triomphe, faits de toute sorte de fleurs, & dressés en esgale distance de l'un à l'autre, par les principales Ruës, toutes ionchées d'herbes odorantes. Ils eurent pour logement vne des Maisons Royales, qu'ils appelloient *Hamarucan-cha*, qui auoient esté autresfois à *Huayna Capac*; & le Compliment qu'ils leur firent, en les priant de l'accepter, fut que les considerant comme des hommes diuins, ils les mettoient dans le Palais du plus grand, & du plus chery de tous leurs Rois. A l'entrée de ce Palais estoit vn Dôme extrêmement beau: Il y auoit quatre estages dont la charpenterie estoit merueilleuse, comme composée de ces prodigieuses pieces de bois qu'on employoit d'ordinaire à la structure des Maisons Royales: mais le toit sur tour, en estoit si haut, que ie puis dire sans hyperbole, de n'auoir point veu de touren Espagne, celle de Seuille exceptée, qui luy fut comparable. Il aboutissoit en rond, reuestu de mesme que les Murailles, ayant au sommet en lieu de giroüette, dont les Indiens n'vsoient pas, pource qu'ils ne prenoient point garde aux vents, vne maniere de pique extrêmement grosse, creuse par dedans, & de plus de 60. pieds de hauteur, communément appellée *Sunturhuact*, c'est à dire, *piece remarquable*. Il n'y auoit point de Bastiment comparable à celuy-cy, qui fut abbatu de mon temps, pour n'embarasser la place, qu'on voulut rendre en l'estat qu'elle se void auourd'huy, bien qu'à vray dire,

vn si superbe edifice estant à costé d'elle, ne luy seruit pas d'vn petit ornement; & c'est là mesme qu'est maintenant le Collisée de la Compagnie de Iesvs, comme ie l'ay dit en vn autre endroit.

Le lendemain les Indiens inuiterent les Espagnols à se promener par la Ville; portez dans des Litieres ouuertes à la façon du païs, pour la voir mieux à leur aise. Comme ils passoiẽt par les rues, les habitans leur rendoient tous les respects, & toutes les soumissions qu'ils auoient accoustumé de rendre, pour vne marque d'adoration. Eux cependant estoient comme ravis d'estonnement de voir la Majesté de Cozco, la grandeur, & la Richeſſe des Temples, & la magnificence des Maisons Royales; bien que neantmoins les Guerres passées de leurs Yncas eussent beaucoup diminué de leur lustre, pource qu'on auoit caché la meilleure partie de ce qui s'y trouuoit de plus precieux, & de plus beau. Or bien qu'ils prisassent grandement de si beaux Palais que ceux de leurs Yncas, à la structure desquels on n'auoit employé aucunes Machines, si est-ce qu'ils estimerent encores plus le Bastiment magnifique de deux murailles de pareille hauteur, faites de fort belle pierre, entre lesquelles couloit vn ruisseau, artistement paué par en bas, joint que ces murailles s'estendoient à plus d'vn quart de lieü de la Ville. Ils s'estonnerent du nombre incroyable d'Indiens, & de la grande quantité de Marchands, quoy que leurs Marchandises ne fussent, ny en abondance, ny de grand prix. Ils estimerent fort la ciuilité des Gentils-hommes, leur douceur, leur courtoisie, & la peine qu'ils prenoient de leur agréer: dequoy vray semblablement ils eussent donné des preuues plus amples, sans le desordre; où ils se trouuoient, à cause des Guerres entre les deux Freres Yncas. Mais ils furent ravis sur tout de voir des Croix arborées sur le haut des Temples, & des Maisons Royales; ce que ceux de Cozco firent sans doute, pour auoir appris en la mesme Ville ce qui estoit arriué dans Tumpiz à Pierre de Candie, contre ces deux cruels animaux, ausquels on l'auoit abandonné, pour le faire mettre en pieces, & qui poserent toute leur rage au pied de la Croix, avec laquelle il les appriuoisa si bien, qu'ils le caresserent, au lieu de luy faire mal. Toutes lesquelles choses leur furent racontées par les Indiens arriuez à Cozco, qui les comblerẽt d'estonnement par le recit de si grandes merueilles. Com-

me donc les habitans apprirent des effets si admirables du glorieux Estendart de la Croix, ils allerent aussi-tost à leur Sanctuaire, où comme j'ay dit ailleurs, ils en auoient vne de laspe Cristallin, & l'adorerent avec de grands applaudissemens; Car en luy adressant leurs prieres, ils luy dirent, *Que puis qu'ils l'auoient en veneration depuis tant de siècles, bien que pour n'auoir seen ses grandes Vertus, ils ne luy eussent pas rendu l'honneur qu'ils luy d'noient, il luy plust les deliurer de ces nouveaux Peuples qui venoient dans leur pays, comme elle auoit deliuré cét homme qui leur estoit incogno, de la cruauté d'un Lyon & d'un Tygre.*

Après auoir fait leurs adorations, ils mirent incontinent des Croix sur le haut des Temples, & des Maisons Royales, afin que par la Vertu de ce sacré Signe, ces lieux-là, & tous les autres du Royaume, fussent deliurez des Ennemis qu'ils apprehendoient. Il faut remarquer icy, que les Gentils mesmes, tous Idolâtres qu'ils estoient, auant qu'on leur preschast le S. Euangile, donnerent à la Croix, & à toute la Religion Chrestienne, la possession de leurs propres personnes, & celle de tout leur Empire, puis que l'ayant posée dans leurs Temples, & dans les Palais de leurs Rois, ils l'adorerent solennellement, en la suppliant de les vouloir affranchir de la crainte qu'ils auoient: car à vray dire, depuis la mort de Huayna Capac, tous ces peuples du Peru furent continuellement en alarme, de voir la fin de leur Idolatrie, & de leur Empire; Ce qui leur fut confirmé par leur Prince, qui vn peu deuant que mourir, leur declara tout ouuertement, les presages que leur auoient donné de tous ces Prodiges leurs vieux Oracles, qu'ils auoient consultez, bien qu'ils n'en eussent parlé que confusément, & avec beaucoup d'obscurité: mais Huayna Capac l'esclaircit, en predisant à ses peuples, la venue des Espagnols, qui changeroient toute la face de l'Estat, & la Predication du saint Euangile dans le Peru; ce qu'il leur dit deuoit attriuer vn peu apres qu'il feroit hors du Monde; Voilà pourquoy les Indiens tenoient pour Dieux les Espagnols, & les adoroient avec toute sorte de soumissions, se doutant bien que par eux la predi&ion de leur Yncaseroit accomplie.

Cependant, Hernand de Sotto, & Pedro de Barco rendirent conte par leurs lettres à leur Capitaine General, de toutes ces choses si merueilleuses, ensemble des incroyables Richesses de

Cozco, plus grandes incomparablement qu'ils ne s'estoient imaginez, & de la bonne reception que ceux de ce pais-là leur auoient faite, pour obeïr au mandement d'Atahualpa, qui auoit fait publier par tout son Royaume, qu'on eut à les traiter magnifiquement. Les autres quatre Espagnols, qu'on auoit enuoyez par les Prouinces, escriuirent le mesme, pour n'auoir pas esté moins bien accueillis que leurs compagnons; ce qui fut sans doute vne nouuelle tres-agreable au General, & aux siens, principalement quant aux Richesses du pais, & aux grands respects qu'on leur auoit rendus: Car pour la Prophetie de Huayna Capac, ils dirent qu'il ne falloit point s'arrester à telles predi-
ctions, qui n'estoient que sortileges.

RVSE D'ATAHVALLPA, ET MORT du Roy Huascar Ynca.

CHAPITRE XXXIII.

AVGVSTIN de Carate ayant traité de l'abouchement qui se fit par signes, entre Huascar Ynca, Hernand de Sotro, & Pedro de Barco, qui fut le mesme dont nous venons de parler, & de la façon qu'ils se separerēt d'avec ce pauvre Prince, qu'ils laisserent en grand danger de la vie; en dit ce qui suit. Liu. 1.
Ch. 6.

Ils se remirent ainsi en chemin; ce qui fut cause de la mort de Huascar, & de la perte qu'ils firent de cette immense quantité d'or qu'il auoit promis de fournir, pource que les Capitaines qui le tenoient prisonnier, despescherent incontinant des Courriers, pour aduertir Atabaliba de ce qui s'estoit passé. Comme donc ce Tyran estoit rusé au possible; il iugea tout à mesme temps, que si le Gouverneur auoit le vent de la perte que Huascar auoit faite, il pourroit bien luy oster le Royaume, & le donner à son Frere, tant sous pretexte de luy faire iustice, que pour auoir tous ces monceaux d'or qu'il promettoit, pour assouir l'insatiable auarice de ces nouueaux venus. Il apprehenda mesme qu'ils ne le fissent mourir, pour auoir contre toute raison fait rebeller ces peuples, & arresté prisonnier son Frere; ce qui fut cause qu'il se résolut de le faire mourir, quoy que ce ne fut pas sans apprehension, pour auoir souvent oüy dire aux Chrestiens, Qu'une de leurs principales Loix estoit de donner la mort par iustice, à celui qui l'auoit donnée à un autre par violence: Ce qui

fit, qu'avant que passer outre, il voulut fonder adroitement le Gouverneur. Pour ceste fin, il se sembla un iour d'estre si triste, & si fâché en son Ame, qu'il ne voulut ny manger, ny parler à personne; Et bien que le Gouverneur l'importunât plusieurs fois de luy declarer la cause de sa tristesse, il se fit prier pour la descouvrir, & luy dit enfin, Qu'il estoit trahy meschamment; & qu'un de ses Capitaines ayant secü sa prison, avoit tué son frere Huascar: chose qui l'affligeoit grandement, à cause que c'estoit son Aîné, qui luy devoit servir de Pere; Et qu'au reste, s'il le tenoit prisonnier, ce n'estoit ny pour faire mal à sa personne, ny pour le priver du Royaume, mais seulement pour le reduire à laisser en paix la Province de Quito, que son Pere luy avoit recommandée, plus qu'il ne luy avoit pas un autre, apres l'avoir gaignée, & conquise; outre qu'elle n'estoit pas de son Domaine.

Le Gouverneur le consola le mieux qu'il pût, luy representant, Que la mort estoit vne chose naturelle; à l'égard de laquelle les vns n'avoient pas plus d'avantage que les autres; Qu'au reste lors que le Royaume seroit paisible, il informeroit de ces acte tragique, & qu'il en feroit iustice. Arahualpa voyant que le Marquis ne prenoit pas autrement cette affaire à cœur, resolut de passer outre dans l'exécution de son entreprise; pour laquelle il envoya dire aux Capitaines qui gardoient Huascar, qu'ils le tuassent sans autre delay: comme en effet ils luy obeirent si promptement; qu'on eut toutes les peines du monde à verifer si ce fut, ou deuant, ou apres la mort de ce Prince là, qu'Arahualpa fit toutes ces apparences, & ces fausses monstres de tristesse que nous avons dites. Tous ceux qui firent reflexion sur cette mort, en imputerent le blâme à Hernand de Sotto, & à Pedro de Barco, sans considerer que lors qu'il s'agit d'un mandement qui regarde le Public, ceux à qui on le donne sont obligez de suivre ponctuellement leurs ordres, sur tout en matiere de Guerre, & de ne point relâcher de leurs instructions, iusques à ce qu'ils ayent un contre-mandement, qui leur permette de changer de dessein, selon le temps, & l'estat des affaires, dont ils ont la commission.

Les Indiens assurent, que lors que le pauvre Huascar prit garde qu'on se iettoit sur luy pour le mettre à mort, A ce que ie voy, dit-il, ie n'ay pas esté long-temps Seigneur du pays, mais en revanche i'estre encore moins mon Traistre de Frere; par l'ordre duquel on m'oste la vie, bien qu'il releve de moy par droit de Nature. D'où il ad-
vint

uint que les Indiens ayant veu mourir depuis Atahualpa, comme il se verra dans le Chapitre suiuant, prirent ces dernières paroles de Huascar pour vne maniere de Prophetie, ayant prédit comme il fit, la mort de son Frere: A quoy il adiousta, *Qu'un peu deuant que mourir, son Pere luy auoit commandé, que lors qu'il verroit venir dans son pais des hommes blancs, & barbus, il eut à s'insinuer dans leur Amitié, d'autant que ce seroient eux qui se rendroient Maistres de l'Empire.*

Voilà ce que j'ay trouué de cette mort dans Augustin de Carate, des paroles duquel, & de celles des autres Historiens Espagnols, j'ayme mieux me seruir que des miennes, quand ie voy qu'ils s'attachent fortement à la verité de l'Histoire, ce que ie trouue à propos, afin de parler plustost comme Espagnol, que comme Indien: Et voilà pourquoy i'en vseray ainsi par tout, horsmis aux endroits, où ie croiray de pouuoir adiouster quelque chose qu'ils auront obmise en leur Relation.

Pour reuenir aux paroles d'Augustin de Carate, il faut remarquer qu'il ne fait que toucher legerement plusieurs choses, que j'ay amplement desduites dans mon Histoire; & entr'autres la tyrannie d'Atahualpa, son adresse, sa ruse, & son artifice à sonder l'esprit de Dom. François Picarte, pour voir quels estoient ses sentimens sur la mort de Huascar: Que si l'Espagnol eut esté aussi fin que l'Indien, & s'il se fut aduisé de luy dire, *Vous auiez fait tuer vostre Frere; s'en sçauray la verité, & vous puniray, comme vostre crime le merite*, Il est vray-semblable, qu'il n'eut iamais commandé qu'on le mit à mort. Mais comme il vid que le Gouverneur ne le soubçonnoit aucunement de l'auoir fait mourir; & qu'au contraire, au lieu de le tancer rudement, il le consoloit par douces paroles; il prit courage, & se resolut d'oster du monde son propre Frere, & son Roy legitime, ce qui fut la plus grande de toutes les cruautéz.

Ceux qui en auoient la garde, le tuerent inhumainement, & le couperent par quartiers, & par tranches, sans qu'on pût sçauoir ce qu'ils en firent, si ce n'est qu'ils le mangeassent de rage, comme les Indiens le creurent, ou qu'ils le brussassent, ce qui est plus vray-semblable, au rapport du Pere Acoſta. Le mesme Carate, parlant de la diligence extraordinaire des Courriers, dit qu'elle fut encore icy plus grande, pource qu'Atahualpa commanda que l'aduis de la mort de Huascar, luy fut donné par un

signal de fumée, ou de feu, dont les Chasquis auoient accoustumé d'vser, pour donner plus promptement à connoistre les euenemens d'importance; ce qui fut cause qu'on ne pût sçauoir au vray, si les apparences de la falscherie d'Atahualpa s'estoient passées depuis, ou apres la mort de Huascar. Cét Auteur. là, fait mention encore de la prediſtion de Huayna Capac, touchant la venue des Espagnols, & la Conqueste qu'ils deuoient faire des Royaumes du Peru. Mais ie reuiens à Hernand de Sotto, & à Pedro de Barco, pour les iustifier du blafme qu'on leur imputoit, pour ne s'estre arrestez près de Huascar; ce qu'apparemment ils auroient fait, s'ils eussent pû entendre ce qu'il leur dit, de leur donner trois fois autant d'or que son Frere en auoit promis; la Commission qu'ils auoient, n'estant pas chose beaucoup importante à la pacification, & à la Conqueste du Royaume, puis qu'elle ne buttoit qu'à s'asseurer de la promesse qu'auoit fait Atahualpa, & à sçauoir s'il la pouuoit accomplir, ou non; de sorte que Huascar ayant offert trois fois autant d'or, il est bien à croire qu'ils ne l'auroient pas refusé, s'ils eussent pû entendre ce qu'il vouloit dire; ce qui fut le mesme pretexte que prirent ceux qu'on accusa de la mort de Huascar.

Ainsi mourut cét infortuné Prince, qui fut le dernier Monarque de cét Empire, ayant veu en ses Sujets, en ses Domestiques, en ses Alliez, en ses Freres, en ses Enfans, & en sa propre Personne, les disgraces, & les calamitez que nous auons dites, executées par son propre Frere, avec vn si mauuais traitement durant sa prison, qu'il a donné sujet à Diego Fernandez de Palenſe d'en parler ainsi. *Les deux Capitaines d'Atabalipa retournerent à leur Maistre, apres auoir pris Huascar; qu'ils traittoient si mal, que par le chemin ils luy faisoient boire de l'vrine, & manger des Insectes, & autres ordures. Dans cette conioncture, Dom François Picarre, & les autres Chrestiens de sa suite arresterent Atabalipa dans Caxamalca: Ce sont les paroles de cét Auteur, qui adjouste vn peu apres. Ils tuerent Huascar dans Andamarca, & Atabalipa mourut à Cassamarca: il veut dire Cassamarca, qui signifie Province, ou terre gelée, pource que Cassa est le mesme que glace, & que le mot Marca comprend les trois autres significations. C'est pourquoy pour la mesme raison, au lieu d'Andamarca, il faut escrire Antamarca: c'est à dire, Province de Cuire, pource qu'Anta est aussi le mot par qui l'on exprime ce metal.*

DOM DIEGO D'ALMAGRE ARRIVE A
*Cassamarca: Presages, & bruits de la Mort d'Ata-
 huallpa, qui en est tout en alarme.*

CHAPITRE XXXIV.

PAR la Mort du pauvre Huascat, qui arriua, comme i'ay dit, le cruel Atahuallpa n'assura ny le Royaume, ny la liberté de sa personne, ny sa propre vie; au contraire, peu de iours apres, il fut condamné à la perdre, de la façon que le rapportent Augustin de Carate, & François Lopez de Gomare, qui se trouuent tous deux de mesme opinion, & en cét endroit, & en plusieurs autres de l'Histoire. Cette mort fut assurément vne iuste punition du Ciel, ordinaire à ceux qui se fondent plus sur leurs ruses, & leurs tyrannies, que sur la Raison. & la Justice. D'où il aduient que Dieu permet qu'ils tombent souuent dans les mesmes maux, qu'ils ont procurez aux autres, & en des inconueniens encore pires, comme nous verrons tout maintenant Il faut sçauoir pour cét effect que Dom Diego d'Almagre, s'estant embarqué à Panama, pour seconder cette nouuelle Conqueste, se mit dans vn beau Nauire, où il y auoit plusieurs bons soldats bien armez, avec dessein, comme disoient ses Ennemis de gagnet l'aduantage sur François Pigarre du costé du Midy, pour auoir appris que les bornes du Gouuernement de Dom François ne passoient pas 200. lieües, depuis la ligne Equinoctiale iusques au Sud. Comme ils disoient qu'il desiroit de porter sa Conqueste plus loin, aussi faisoient-ils courir le bruit que c'estoit-là vne des principales causes de son embarquement; dequoy l'on tient que Dom François Pigarre fut aduertty par vn Secrétaire de Dom Diego d'Almagre, qui le fit pendre pour cette faute-là: Quoy qu'il en soit, il est certain qu'en sa navigation Dom Diego sceut l'emprisonnement d'Atahuallpa, & les incroyables Richesses qu'il faisoit venir de toutes parts, pour le payement de sa Rançon; ce qui l'obligea de changer d'aduis, pour s'en aller suivre la Fortune de son Compagnon victorieux, puis que selon les Articles accordez entr'eux, il de-

uoit auoir part au butin que Dom François Piçarre feroit.

Almagre & ses gens arriuez à Cassamarca, furent extrêmement estonnez de voir la prodigieuse quantité d'or, & d'argent qu'on auoit amassée : mais vn peu apres, les gens de Dom François desabuserent les soldats de Dom Diego, auxquels il dirent, que puis qu'ils ne s'estoient point trouuez à la prise de ce Roy-là, ils ne deuoient pretendre aucune part à ce qu'on auoit recueilly d'or, & d'argent iusques alors, ny à ce que le Prisonnier en donneroit à l'aduenir, iusques à ce que le monceau en fut venu de tous les endroits de la Salle, iusques à la ligne qu'il luy auoit marquée pour sa Rançon; à quoy ils ne pensoient pas que tout l'or, & tout l'argent du monde pussent suffire, veu la vaste estendue du lieu; ce qui fut cause qu'ils proposerent de mettre à mort l'Ynca, pour participer au gain qui se feroit à l'aduenir. Or bien que cette raison, & les autres qu'ils mirent en auant, fussent extrêmement foibles; neantmoins telles qu'ils les alleguerent, elles se trouuerent assez fortes, pour leur faire entreprendre sur la vie d'un si grand Prince comme estoit Atahualpa. Luy cependant se tenois delia pour mort, voyant les contrastes des Espagnols, qui s'entre-quelloient à toute heure, voire à tout moment, avecque des crys, & des mouuemens, qui luy faisoient peur: D'où il concludoit, qu'il luy faudroit enfin essuyer tous leurs desplaisirs aux despens de sa vie.

Cette défiance s'augmentoit en luy, par le silence de ses Oracles accoustumez, qui ne daignoient plus respondre à ses demandes, & par les aduis qu'il luy donnoient les Indiens; qu'on voyoit toutes les nuits errer dans le Ciel quantité d'Estoiles grandes & petites, à quoy ces Gentils adjoûtoient foy volontiers, & à d'autres choses encore moindres; sur tout en vn temps calamiteux, comme celuy-là, où leurs superstitions leur faisoient prendre pour des prodiges toutes les choses qui leur passoient par la veüe, & que la simple imagination leur mettoit dans l'Esprit.

* d'A
thual-
pa.

Mais ce qui fit le dernier comble de son desespoir, * fut qu'on luy vint dire, qu'entr'autres signes malencontreux, il paroistroit dans le Ciel vne grande Comette, noire, & verdastre, d'environ la grosseur d'un homme, plus longue qu'une pique, & à peu près semblable à celle qu'on auoit veüe vn peu deuant la Mort de son Pere Huayna Capac.

Atahualpa fut fort affligé de cette nouuelle, & encore plus, quand elle luy fut certifiée par les Espagnols, ausquels il demanda permission d'en estre luy-mesme tefmoin oculaire: de sorte qu'ayant veu, & bien considéré cette maligne Constellation, il en fut si triste, qu'il ne voulut depuis parler à personne, ny se diuertir à l'accoustumée; sur quoy se voyant importuné plusieurs fois par Dom François Piçarre, de luy dire la cause de son des-plaisir; afin de n'estre pressé de luy dauantage, & d'empescher qu'il ne le soubçonnast d'autre chose; *Apu*, luy respondit-il, ie suis assuré que ie mourray bien-tost: i'en tire vn presage certain de ceste Comette, tout à fait semblable à celle que nous vîmes en ce pais, vn peu deuant que mon Pere rendit l'Esprit: iuge par là, si ie n'ay pas de quoy m'attrister, de me voir à la fin de ma vie, auant que d'auoir à peine commencé de iourir de mes Royaumes; Car ces apparitions n'aduient iamais, qu'elles n'annoncent d'estranges calamitez, sur tout la mort des grands Rois, & l'entiere ruine de leurs Empires; ce qui n'est pas néanmoins vne chose qui me doie sembler nouuelle, puis que dès que ie me suis veu dans les fers, j'ay iugé de ma mort par mon emprisonnement; ie n'en dois donc plus douter, puis que la Comette que j'ay veüe me la rend indubitable. Voilà ce que ie te puis dire du sujet de ma profonde mélancolie.

Le Gouverneur luy repartit, *Qu'il ne deuoit point s'amuser à ces vains presages, ny moins encore y adiouster foy, mais esperer qu'il se verroit bien-tost hors de prison, & restably dans son Royaume: mais ces paroles ne le rendirent pas moins triste qu'auparauant, la coustume de ces Peuples estant de ne voir iamais tels prodiges, sans en tirer des coniectures certaines de leur ruïne future: de sorte qu'il y mit plus de croyance qu'à tout ce que luy pût dire le Gouverneur Dom-François Piçarre. Pedro de Cieça de Leon rapporte le mesme de la Comette, & de la superstition des Indiens, en matiere de ces choses, & autres semblables, suiuant lesquelles Atahualpa perdit toute esperance de sortir de prison, & tint sa mort pour assurée: comme en effet, elle aduint quinze iours apres l'apparition de la Comette, ainsi que le remarque le mesme Cieça dans le Chapitre susdit.*

Ch. 65.

*HERNAND PICARRE S'ENVA EN
Espagne, pour y rendre compte des choses aduenües
dans le Peru.*

CHAPITRE XXXV.

LE Gouverneur Dom-François Picarre, bien au contraire d'Atahualpa, qui craignoit tout, & n'esperoit rien, auoit de tres-grandes pretensions, & des esperances encore plus hautes, suiuant les faueurs que sa bonne Fortune luy auoit faites iusques alors. Desirant donc de les mieux accroistre à l'aduenir, il iugea qu'il estoit à propos d'aller rendre compte à sa Majesté de ce qui estoit arriué iusques alors: Pour cette fin il communiqua son dessein à Dom Diego d'Almagre son Camarade, & à ses Freres aussi, qui trouuerent bon entre eux qu'Hernand Picarre fit voile en Espagne, pour y raconter au Roy ce qu'eux & leurs Compagnons auoient fait de memorable dans le Peru, afin que sa Majesté les recompensast comme ils meritoient. Hernand Picarre prit d'un monceau d'or & d'argent d'Atahualpa ce qu'il luy falloit à peu près pour les frais de son voyage, puis qu'il le faisoit pour tous ceux qui auoient part à ces Richesses. Il embarqua pour sa Majesté cent mille pezos d'or, & autres cent mille d'argent, à desdure sur le Quint qui deuoit reuenir au Roy de la Rançon d'Atahualpa; & ces precieux Metaux furent les premices de ce que le Roy a tiré depuis, & qu'il doit tirer de mon país. L'argent consistoit en pieces unies en ceuvre, comme le rapporte Augustin de garate par ces paroles. *Il fut resolu d'envoyer Hernand Picarre en Espagne, pour y rendre compte à sa Maiesié de l'heureux succez de leur voyage. Et d'autant que pour n'auoir encore rien fondu, ny fait aucun essay, l'on ne pouuoit scauoir au iuste ce qui veniendroit au Roy, de tout ce monceau, il en tira cent mille pezos d'or, & 20000. Mares d'argent, choisissant pour cet effet les pieces les plus massines, & qui auoient plus belle monstre, afin qu'elles en fussent plus estimées en Espagne. Ainsi il enleua quantité de Cuuettes, de Rechands, de Caissees de Tambour, de figures d'hommes, de femmes, & d'autres Animaux, dont il fit le poids de la valeur dissety-*

Liu. 2.

Chap. 7.

dessus. Avec ces Richesses il fut s'embarquer sans autre delay, au grand regret d'Atabalipa, qui l'affectionnoit fort, & luy communiquoit toutes ses affaires: Aussi comme il vid qu'il prenoit congé de luy; Et quoy, luy dit-il, tu i'en vas donc Capitaine? ô que l'ay grand regret d'en estre fâché, puis qu'il est indubitable, qu'après ton partement, ce gros Piffre, & ce Borgne que voila, ne me laisseront pas longtemps au Monde! Par où il entendoit parler de Dom Diego d'Almagre, qui n'auoit qu'un œil, comme i'ay dit cy-deuant, & d'Alonse Requelme, Trésorier de sa Maisté, qui s'estoient n'agueré fuschez contre luy, pour la raison que nous rapporterons cy-apres. Comme en effet Hernand Pigarre ne fut pas, plustost parly, qu'on parla de condamner à mort Atabalipa, & de se servir à luy faire son procez d'un Truchement Indien, qu'on appelloit Philipille, &c. Gomate dit, comme il se verra cy-aptes, que Hernand Pigarre tira de la Rançon d'Atahuallpa ce qui appartenoit au Roy pour ses dtoicts, ce qui neantmoins ne vint point de Cassamarca, mais de ce que i'ay dit cy-deuant. Toutesfois, pour ce qu'incontinent après son embarquement arriva la Mort de ce miserable Roy, & qu'en suite fut fait le partage de sa Rançon, cela ne fit que hastier sa dernière fin, au lieu de le desliurer de sa captiuité. Soixante Conquerans s'en allerent en Espagne, chacun avec la part qui luy estoit escheuë de 30. 40. & 50000. pezos, tant du plus que du moins, joint qu'ils emporterent aussi par mesme moyen le Quint de sa Maisté; ce qu'ils firent avec tant de succez, qu'ils rencontrerent Hernand Pigarre à Nombre de Dios, d'où il n'auoit pas encore fait voile, si bien qu'ils allerent tous de conserue; Et voila comme par cette Relation se verifie ce que ces Auteurs escluiuent, sans contredit des vns, ny des autres.

Vn peu après qu'Hernand Pigarre s'en fut allé, Hernand de Sotto, & Pedro de Barco reuindrent de Cozco, avec la nouvelle des incroyablés Richesses qu'ils auoient veuës en cette Ville. là, tant au Temple du Soleil, qu'aux Palais des Roys defuncts; en la forteresse de la Ville, & en d'autres lieux, & reduits, où les Diables parloient à leurs Sacrificateurs & Deuins: Et d'autant qu'ils tenoient ces lieux là pour sacrez, voila pourquoy ils les paroiënt si richement, qu'ils estoient par dedens tous couuerts de Plaques d'or, & d'argent. Les autres quatre, qu'on auoit enuoyez pour la mesme fin d'aller descouurir les Richesses du pais, en dirent autant aux Espagnols, quien furent

extrêmement résoluës, pour le desir qu'ils auoient de se faire riches par la iouissance de tous ces Tresors; ce qui fut cause qu'ils halsterent la Mort d'Atahualpa, pour oster de leur esprit les soings, & les obstacles diuers, qui par vn trop long delay, pouuoient empescher qu'ils ne possedassent l'or, & l'argent qu'il y auoit dans la Ville Imperiale de Cozco, & dans les autres Provinces du Peru. Pour se tirer donc de peine, ils conclurent à sa Mort, que les deux Auteurs susdits escriuent d'une mesme façon; c'est pourquoy ie rapporteray icy ce qu'en a dit François Lopez de Gomara, dans le Chapitre suiuant, dont ie n'ay point changé le tiltre.

Ch. 119.

PROCEZ FAIT AU ROY ATAHVALLPA,
par Fourberie, & fausses Informations, avec vn
Recit de sa Mort.

CHAPITRE XXXI.

LA Mort d'Atabalipa fut comme vne trame ourdie d'une façon bien estrange, & dont il se doutoit le moins. Car le Truchement Philipille s'estant rendu amoureux d'une de ses Femmes, avec dessein de l'essoufer, en cas qu'on executat à mort le Prisonnier, dit à Picarre, & aux autres, qu'il faisoit leuer des gens sous main, pour massacrer les Chrestiens, & se tirer de prison. Les Espagnols, parmi lesquels ce bruit courut soudainement, le creurent d'abord, & interrent sa perie; les uns disant qu'il le falloit tuer, pour mettre à couuert leurs vies. & ce Royaume là; Et les autres, qu'il valoit mieux espargner le sang de ce grand Prince, quoy qu'il se trouuât coupable, & l'enuoyer en Espagne: comme en effect c'est àuis estoit bien le meilleur: mais ils ne laisserent pas de suivre l'autre, à l'instance, comme quelques-uns le racontent, de ceux qu'Almagre auoit amenez, qui disoient, que tant qu'Atabalipa viuroit, ils n'auroient aucune part à sa Rançon, iniques à ce qu'il eut porté le comble de l'or promis, à la ligne qu'il auoit luy mesme tracée. A la fin Picarre prit resolution de s'en despescher, se persuadant que lors qu'il ne seroit plus au Monde, il en auroit moins de peine à conquerir le pays. Il luy fit donc son procez, sur la Mort de Huascar, le premier Roy de cet Empire là, & promua qu'il vouloit faire mourir de mesme les Espagnols;

pagnois : Mais un trait de la malice de Philippille, qui expliquoit à sa fantaisie les depositions des Indiens que l'on oyoit par ces moins, ce qui luy estoit d'autant plus facile, que pas un Espagnol ne les entendoit. Cependant Atabalipa nioit toujours ce de quoy on le chargeoit, disant qu'il n'y avoit aucune apparence, qu'un homme qui ne pouvoit faire un pas hors de la prison, pour estre perpetuellement esclavé de ses gardes, eut commis les choses qui luy estoient reprochées : surquoy il menaçoit Philippille, & prioit ceux qui l'oyoient de ne le point croire. Mais quand on vint à luy prononcer sa sentence, il se plaignit grandement de ce que Gonzalo Pizarre le condamnoit à mourir, apres l'avoir pris à rançon, le conjurant de l'envoyer plustost en Espagne, & de ne point fouiller ses mains, ny sa Reputation, du sang d'une personne qui ne l'avoit iamais offensé, & qui l'avoit enrichy. Un peu denant qu'on l'exécutoit à mort, il demanda le Baptisme, par le conseil de ceux qui le consoloient, qui luy dirent, Que s'il ne se faisoit Chrestien, ils le brusseroient tout en vie. Comme on l'eut donc baptisé, on l'attacha contre un pieu, & ensuite on l'estrangea. Il fut enterré à la façon des Chrestiens, & Pizarre mesme n'en porta pas seulement le deuil, mais luy fit encore une honorable Pompe funebre. De blâmer maintenant ceux qui furent cause de sa mort, cela ne seroit de rien, veu que le temps & leurs pechez, les en punirent depuis : car ils firent tous une mauvaise fin, comme il se verra par la suite de l'Histoire.

Atabalipa mourut avec un grand cœur, apres avoir commandé qu'on portast son corps à Quito, où estoient enfevelis les Rois ses Ayeuls de par sa Mere : Que si ce fut de bon cœur qu'il demanda le Baptisme, tant mieux pour luy, sinon, il fut payé comme il meritoit, des meurtres commis durant sa vie. Il estoit au reste, dispos de son corps, courageux, aduise, plein de franchise, propre en sa façon de vivre, & bien fait de sa personne. Il laissa quelques fils de plusieurs femmes qu'il avoit, & usurpa sur son frere Huascar beaucoup de Pais ; mais il ne prit jamais la Bordure rouge, qu'il ne se fut auparavant saisi de luy : sa mine estoit pleine de Majesté, pour marque de laquelle il ne crachoit jamais que dans la main d'une Dame des principales de la Cour. Les Indiens s'estonnerent tellement de ce qu'il mourut si tost, qu'ils tinrent Huascar pour fils du Soleil, pour avoir predit, apres qu'il eut fait commander à ses gardes de le tuer, que luy-mesme ne luy survivroit pas long-temps.

Ce sont les Paroles de François Lopez de Gomara, où l'on trouve remarquable entre autres choses ce qu'il dit de la malice de Philippille, qui expliquoit à sa mode les depositions des tes-

moins Indiens, sans que les Espagnols l'en peussent reprendre, pource qu'ils ne l'entendoient pas: ce qui sert grandement, si ie ne me trompe, pour prouuer, comme j'ay monsté ailleurs, que ce mauuais Interprete expliqua fort mal au Roy Atahuallpa les Mysteres de nostre sainte Foy Catholique, tant pour ne les conceuoir pas, que pour manquer de mots propres, pour exprimer en langue Peruuienne ce qu'il vouloit donner à connoistre: D'où l'on peut tirer encore vne coniecture vray-semblable, que Hernand de Sotto, & Pedro de Barco, pour n'auoir pû comprendre ce que Huascar leur dit, ne demeurèrent point avec luy, & furent cause innocemment de sa mort. D'où il faut conclurre que celle de ce puissant Roy fut pareillement causée par la faute qu'on eut de bons & fideles Interpretes. Or ce qu'Atahuallpa voulut estre enseuely à Quito, avec ses Ayeux de par sa Mere, & non pas à Cozco, parmy les Ancestres paternels; proceda sans doute de ce qu'il scauoit que tous ceux de cét Empire le haïssoient à mort, pour les grandes cruauitez qu'il y auoit commises, si bien qu'il apprehendoit qu'ils ne s'en vengeassent sur son Corps, afin de le rendre plus infame: & voilà pourquoy il aymoit mieux s'en fier aux siens, qu'à ceux qu'il tenoit pour estrangers, bien que neantmoins il s'en salût beaucoup que les Tombeaux des Caciques de Quito fussent comparable à ceux des Yncas de Cozco, ny en ornement, ny en magnificence. Ce n'est pas sans raison encore, que le mesme Autheur rapporte, qu'Atahuallpa ne se mit point sur la teste la bordure Royale, iusques à ce qu'il eut fait arrester prisonnier Huascar, pource que la Royauté auoit pour Symbole cette Bordure, qu'il ne pouuoit porter tant que son Frere l'auroit, comme Roy legitime: de sorte que s'estant saisi de sa personne, il prit aussi-tost cette espee de Couronne, bien que tyranniquement, comme il a esté monsté en diuers endroits. Que si ce Prince idolatre, apres auoir commis tant de cruauitez, eut le bon-heur d'estre baptizé; ce fut vn effect particulier de la Misericorde diuine, qui n'abandonne iamais les pecheurs, quelques grands qu'ils soient, comme celuy cy.

On le nomma *Dom Iean Atahuallpa*, & le Pere Blas-Valera dit, *Que plusieurs iours auant qu'il fut executé, F. Vincent de Valverde prit le soin de l'instruire en la Foy: Qu'au surplus, apres auoir esté un assez long-temps dans la prison, il tomba dans vne grande Ma-*

ladie, de regret qu'il eut de se voir chargé de fers, sans pouuoir conuerfer avecque personne, pource qu'on ne laissoit entrer aucun Indien où il estoit, qu'un de ses Nepueux qui le seruoit en ses necessitez. Ainsy son indisposition fut cause qu'on le tira de prison, & qu'on fit venir auprès de luy ses principaux Domestiques. Ils apporterent quantité d'herbes pour le guerir, & afin de s'asseurer s'il auoit la fièvre, on non, ils luy saferent le poulx, non pas au poignet, comme font les Medecins, mais au dessus des narines, & à costé des sourcils, puis ils luy firent prendre le jus de ces herbes, toutes de grande vertu, & dont la principale s'appelloit Payco.

L'Auteur adiouste, quel'effet de cette Medecine fut de luy causer vne sueur vniuerselle par tout le Corps, & vn long & profond sommeil, qui luy osta la fièvre, sans vser d'autre remede; tellement qu'en peu de iours il se trouua guery, & alors ils le ramenerent en prison. Il confirme aussi ce que nous auons desia remarqué, à sçauoir, *Que lors qu'on luy prononça l'Arrest de sa mort, il luy fut enjoinct de se faire baptiser; sinon, qu'on le brusleroit tout en vie, comme on auoit bruslé à Mexique Huahutimo, Roy de cét Empire-là, le buscher estant allumé, tandis qu'on luy signifioit sa sentence. Surquoy il conclut, Qu'il fut baptisé; puis mené à la Place, & attaché à vn pieu, où l'on le estrangla, pour les causes que l'on fit sçauoir par vn Crieur public: De maniere qu'en cecy il se trouue conforme aux Historiens Espagnols, & dit qu'Arahualpa fut prisonnier trois mois tous entiers.*

INFORMATIONS FAITES CONTRE *Atahualpa.*

CHAPITRE XXXVII.

LE Procez d'Aтахualpa fut authentique, & fort long, bien que Gomare ne le rapporte que sommairement.

Le Gouverneur luy fut donné pour Iuge, & Dom Diego d'Almagre pour Lieutenent. Sancho de Cuellar fit l'office de Greffier, & vn autre de mesme, celuy de Denonciateur. Il y eut aussi vn Aduocat qui plaidoit pour luy, & deux Procureurs nommez pour l'vne, & l'autre Partie. Avec cela on depura vn Commissaire pour presenter les tesmoins, & deux hommes de

lettres que i'ay cognus, pour seruir de Conseillers en cette cause, lesquels ie ne nomme pas pour certaines considerations. L'interrogatoire qu'ils firent consistoit en douze demandes.

La premiere, s'ils cognoissoient Huayna Capac, & s'ils scauoient combien il auoit de femmes: La seconde, si Huascar Ynca estoit legitime heritier de la Couronne, & Atahualpa bastard, comme fils de quelque Indien de Quito, & non pas du Roy: La troisieme, si l'Ynca n'auoit point de fils, outre les susdits: La quatrieme, si Atahualpa estoit heritier de l'Empire, ou par le testament de son pere, ou par tyrannie: La cinquieme, si le Pere de Huascar Ynca auoit esté priué de l'heredité par le Testament de son defunct Pere, ou s'il l'auoit declaré son heritier legitime: La sixieme, si Huascar Ynca viuoit, ou non, & s'il estoit mort de maladie, ou par l'ordre d'Atahualpa, deuant, ou apres la venue des Espagnols: La septieme, s'il estoit Idolatre, & s'il contraignoit ses sujets de sacrifier des hommes, & des enfans: La huitieme, s'il auoit fait des Guerres iniustes, & mis à mort quantité de gens: La neuuiesme, s'il entretenoit plusieurs Concubines: La dixieme, s'il auoit destourné, ou dissipé les tributs de l'Empire, depuis que les Espagnols en estoient en possession, L'vnzieme, s'ils scauoient que depuis leur venue, il eut donné à ses Parens, à ses Capitaines, & à d'autres gens de toute sorte de conditions, quantité d'or, & d'argent de l'Espagne, & dissipé les biens dont il estoit depositaire pour le public: La douzieme, s'il estoit vray que depuis sa prison, il eut incité ses Capitaines à se reuolter, pour faire vn massacre des Espagnols, Et si pour la mesme fin il auoit fait sous main de grands preparatifs d'armes, & des leuées de gens de Guerre.

Voila les Articles sur lesquels on interrogea les tesmoins, dont il y en eut dix qui se presenterent pour estre examinez, à scauoir sept qui seruoient les Espagnols, & trois qui ne releuoient point d'eux, afin qu'on ne dit pas qu'ils fussent tous leurs Domestiques. Ils declarerent ce qu'ils scauoient au Truchement Philipille. Mais celuy de tous ces tesmoins qu'on interrogea le dernier, appelé *Quepe*, Capitaine d'une Compagnie, & qui n'estoit pas des Domestiques, eut si grand peur que le Truchement n'ostât, ou n'adioustât quelque chose à sa deposition, que pour l'empescher, il s'aduisa de ne respondre iamais, que par les mots *ye manan*, qui signifient, ouïy, & nenny. Et afin que

ceux qui estoient là presens l'entendissent, & que l'Interprete ne changeat le negatif en affirmatif, ou qu'il ne prit au contraire l'affirmatif pour le negatif; quand il disoit /s/ il baïssoit la teste deux ou trois fois, pour monstrier qu'il en demeueroit d'accord. Il marquoit la negatiue par vn branslement contraire, qu'il faisoit, & de la teste, & de la main droite; les Iuges & les Officiers admirant cette industrie de l'Indien. Pour tout cela neantmoins, ils ne laisserent pas de condamner à mort vn Roy si puissant, & si grand, comme estoit Atahualpa, & de luy prononcer son Arrest: ce qui ne vint pas plustost à la cognoissance des Espagnols, qu'il y en eut plusieurs, tant des gens de Dom-François Pizarre, que de ceux qu'amena Diego d'Almagre, qui pour auoir l'ame genereuse, & portée à la compassion, se mutinerent contre cette sentence. Les principaux furent François & Diego de Chaues, tous deux Freres, natifs de Truxillo, François de Fuentes, Pedro d'Ajara, Diego de Mora, François Molcoso, Hernand de Haro, Pedro de Mendoza, Iean de Herrada, Alonso Dauila, Blas d'Atiença, & plusieurs autres, qui d'un commun accord mirent en auant, Qu'ils ne deuoient point permettre qu'on mit à mort vn Roy qui les auoit traittez si obligamment: Que s'ils trouuoient qu'il leur failly en quelque chose, il leur sembloit bien plus à propos de l'enuoyer en Espagne vers l'Empereur, que de se porter pour Iuges contre vn Prince, sur lequel ils n'auoient aucune iurisdiction; Qu'il y alloit en cela de l'honneur de toute la Nation Espagnolle: Qu'on scautoit par tout le Monde à quel excez d'inhumanité ils se feroient porter, en faisant executer à mort vn Roy prisonnier, contre la parole qu'ils auroient donnée de le relascher pour sa Rançon, dont ils auoient desia touché la meilleure partie; Qu'ils ne ternissent point le lustre de leurs beaux faits par vne action si noire, de peur que Dieu ne destournât d'eux les graces qu'il leur auoit faites iusques alors: qu'ils ne deuoient rien esperer de bon d'un acte si barbare, & si tragique, qui ne pouuoit abboutir qu'à vne fin tres-dangereuse pour eux; Et qu'il n'estoit point permis de faire mourir personne, sans l'oüyr dans ses defenses: D'où ils conclurent qu'ils appelloient de leur sentence pardeuant l'Empereur Charles Quint, & que dans leur Acte d'opposition, & d'appel, ils nommoient Iean de Herrada pour Protecteur du Roy d'Atahualpa.

Ces declarations & autres semblables se firent, non seulement de parole, mais par escrit, & furent signifiées aux Iuges, avec de grandes protestations, contre les inconueniens, & les dommages qui s'ensuiuroient de l'exécution de cette sentence. Ils dirent encore à ceux qui deffendoient Atahualpa, qu'ils estoient Traistres à la Coutonne Royale de Castille, & à l'Empereur leur souuerain Seigneur, puis qu'ils s'opposoient à l'accroissement de ses Estats, & de ses Royaumes: Que par la mort de ce Tyran ils s'asseuroient l'Empire, & leur vie propre, au lieu qu'ils perdroient l'un, & l'autre en le laissant viure. De toutes lesquelles choses, & des desordres qu'elles pourroient causer, ils protesterent de rendre compte à sa Maiesté, afin qu'elle discernast par là ses bons seruiteurs, d'auecque les Traistres à ses Estats; Et qu'ainsi faisant chastier les vns, il luy pleut aussi de recompenser les autres. Cependant cette mutinerie alla si auant, que de la façon qu'elle s'alluma peu à peu, elle se fut difficilement esteinte, si Dieu n'y eut mis remede: Car il permist qu'il y eut des Entremetteurs, qui moins passionnez les vns que les autres, appaïserent ceux qui soustenoient l'Ynca, disant qu'ils prissent bien garde à ce qu'ils faisoient; Qu'il y alloit en cette affaire & du seruice du Roy, & de leurs propres vies; Qu'il n'estoit pas iuste qu'entre les Fidelles se formassent des partialitez, & des factions pour la deffence des Infidelles: Que tout leur Partry n'estoit composé que d'une cinquantaine d'hommes; au lieu que dans celuy qu'ils vouloient choquer, il y en auoit plus de 350. Qu'en un mot, s'il en falloit venir aux mains, ils ne se trouueroient pas les plus forts; & qu'ainsi leur propre perte pourroit causer celle d'un Royaume des plus riches du Monde, qu'ils auoient presque gagné, & dont ils pouuoient s'asseurer la Conqueste, en tuant celuy qui s'en disoit Roy. Voilà quelles furent les menaces, & les raisons des vns & des autres, mais enfin, les Protecteurs d'Atahualpa donnerent les mains, & consentirent à sa mort; si bien que ses ennemis en vinrent un peu apres à l'exécution.

GRANDE PREUVE DE LA SVBTILITE'
de l'esprit d'Atahualpa, & de la merueilleuse
quantité d'or, & d'argent, qu'il donna
pour sa Rançon.

CHAPITRE XXXVIII.

A TAHVALLPA, comme i'ay dit ailleurs, n'auoit que trop de vinacité d'esprit, puis qu'elle ne luy seruit qu'à le precipiter plustost à la mort: car ayant veu lire & escrire les Espagnols, il s'imagina que c'estoit vne chose qui naissoit avec eux, & qui leur estoit naturelle. Pour s'en esclaircir, estant vn iour visité par vn Espagnol de ceux qui le voyoient d'ordinaire, ou qui le gardoiēt, il desira qu'il luy escriuit sur l'ongle du poulce de l'vne de ses mains, le nom de son Dieu, ce que le soldat fit aussi-tost. Il en vint vn autre apres, auquel il demanda ce que cela vouloit dire? Il en l'eut incontinent le nom, & trois ou quatre autres en firent de mesme. Dom François Piçarre le vint trouuer en suite; & apres qu'Atahualpa se fut vn peu entretenu avec luy, il luy demanda ce que signifioient ces lettres-là. A quoy Dom François n'ayant pû respondre, pource qu'il ne sçauoit pas lire; il coniectura par là que cette connoissance estoit acquise, & non pas naturelle: d'où il aduint depuis qu'il l'en estima beaucoup moins. Car les Yncas, comme nous auons monstré, dans les preuues qu'il faloit qu'ils fissent pour estre armez Cheualiers, trouuoient par les raisonnemens de leur Philosophie Morale, que les hommes de condition, soit dans la Paix, soit dans la Guerre, deuoient auoir de signalez aduantages sur tous les autres, qui estoient au dessous d'eux, du moins en ce qu'il leur falloit sçauoir necessairement, pour s'acquitter de leurs Charges: pource, disoient-ils, que quand mesme la Fortune leur seroit esgalement fauorable; il n'estoit pas de la bien-seance qu'un homme de basse extraction, en sceut autant qu'un homme de haute naissance. D'où il aduint qu'Atahualpa trouua si estrange que le Gouverneur fut moins habile que ses soldats, qu'il l'en mesprisa depuis, iusques-là mesme que Piçarre s'en apperceut, & s'en offensa,

comme ie l'ay ouy dire à ceux qui s'y trouuerent presens. Ce qui est sans doute vn bel exemple aux Gentilhommes, pour les inciter à n'estre pas si nonchalans qu'ils sont d'ordinaire en l'instruction de leurs enfans, auxquels ils doiuent du moins faire apprendre à lire, & à escrire, ou mesme vn peu de Latin; & quand ils en sçauroient beaucoup, ils n'en seroient que plus louables, & se garentiroient ainsi des affronts, où leur ignorance les expose quelquesfois: Ce qui leur est d'autant plus facile d'apprendre, qu'il y a maintenant en Espagne beaucoup plus de Professeurs en toute sorte de Sciences, qu'il n'y en auoit aux siecles passez: Que si les Cavaliers se picquent tant de la Noblesse que leurs Ancestres leur ont laissée; ils ne doiuent pas se picquer moins de ces belles cognoissances, dont l'acquisition les peut rendre Nobles doublement, puis qu'elles sont comme de beaux Diamans, enchassez dans le plus precieux de tous les Metaux.

L'Esprit d'Atahualpa parut encore en vne autre chose bien remarquable, qui fut, Qu'entre les autres galanteries que certains Espagnols apportèrent, pour en trafiquer avec les Indiens, ou pour les tromper, comme disent quelques-vns, se trouua vn verre de Cristal, des plus fins qui se fassent à Venise: tellement que celuy qui en estoit Maistre se resolut de le presenter au Roy Atahualpa, sur l'esperance qu'il eut qu'il en feroit recompense au double, comme il le fut en effet; Car bien qu'Atahualpa fut prisonnier, il ne laissa pas d'enuoyer dire à vn Seigneur de ses sujers, qu'il donnast à l'Espagnol dix de ses coupes d'or ou d'argent, ce qu'il fit à mesme temps. L'Ynca prisa fort la politesse de ce verre; & le tenant entre ses mains: *Je m'assure*, luy dit-il, *qu'il n'y a que le Roy de Castille qui boiue là dedans.* A quoy quelqu'un de la compagnie, pensant qu'il eut plus d'égard à la beauté, qu'à l'ouurage du verre, respondit, s'imaginant dire vn bon mot, *Que non seulement les Rois, mais les grands Seigneurs, & mesme les gens du commun, s'en seruoient indifferemment:* Sur quoy Atahualpa, laissa tomber le verre des mains, disant, *qu'une chose si commune ne meritoit pas d'estre estimée.* Ce qui fut vne pointe d'esprit, qui donna de l'admiration à ceux qui l'ouyrent.

Or bien que la pluspart soiēt d'opinion qu'Atahualpa fut executé à mort, auant que d'auoir comblé le monceau d'or, & d'argent qu'il auoit promis, pource qu'on ne luy en donna pas le temps;

temps; il y en a pourtant d'autres, qui disent qu'on le fit mourir apres auoir payé sa Rançon entiere: Quoy qu'il en soit, les Espagnols la partagerent entr'eux, comme vn butin gaigné à la Guerre. D'asseurer au reste à quelle somme elle se pouuoit monter; cela seroit difficile, pource que les opinions en sont differentes dans les Escrits d'Augustin de Garate, & de François Lopez de Gomare, celebres Historiens de leur temps; Et ie croy mesme que dans le calcul qu'ils font des sommes, il y a diuerses fautes de l'Imprimeur. l'en rapporteray icy quelques-vnes, afin qu'on en iuge mieux. En voicy vne de Garate. *Il reuint au Roy, Liu. 2. dit-il, du Quint qui luy appartenoit pour ses droits 30000. Marcs Chap 5. d'argent blanc, & affiné, & 520. comptes de Marcs d'or, &c. Mais Ch. 113. Gomare rabat beaucoup de cette somme, par ces paroles. François Piçarres fit peser l'or, & l'argent, apres qu'on les eut mis à toute espreuve: si bien qu'il se trouua 25000. Marcs de bon argent, & vn million 326500. pczos de fin or.*

Que si l'on vient maintenant à faire vn iuste rapport de l'vn à l'autre de ces Auteurs; on trouuera de mesconte dans Gomare cent mille Marcs d'argent, pour l'ajouter avec Garate; d'autant que pour y auoir 30000. Marcs de Quint, il faut qu'il y ait 150000. Marcs de principal. La mesme faute, & encore plus grande, se trouue dans l'or, pource que par ces paroles de Garate, *Qu'il reuint au Roy pour son Quint six vingts comptes de Marcs d'or,* se void clairement la faute de l'impression; car s'il faut faire le compte conformément à la valeur des Marcs, & mettre 72. Ducats pour chaque Marc d'or, la quantité des Ducats se trouuera si excessiue, qu'il n'y aura pas moyen qu'elle passe dans la supputation: Que s'il prend les Marcs pour les Marauedis, la faute ne sera pas moins euidente; estant certain que six vingts comptes de Marauedis ne se montent qu'à 320000. Ducats. Or est-il, comme nous verrons cy-apres, par les Parties que ces Auteurs ont dressées, touchant le partage de cette Rançon; que le Quint du Roy, reduit en Ducats, avec son interet, se monteroit à ce compte à 786600. Ducats, ce qui ne feroit pas vn iuste calcul. Ainsi ie trouue plus à propos de tirer cette supputation des Parties par eux dressées, comme j'ay dit, sur le partage qui se fit de cet argent, sans m'arrester aux sommes generales, où comme il s'est veu, consiste toute la faute: En quoy ie ne puis mieux faire, que de m'arrester precisément à l'opinion

de garate; qui pour auoir esté Sur-Intendant General des Finances de sa Maieſté dans le Peru, d'où il a tiré les Relations qu'il en a faites, est plus digne de foy (ce me semble) que ne sont ceux qui ont escrit de ces choses à la vollée, & sur les memoires qu'ils ont eus des vns, & des autres. Que s'il se trouue qu'il ait obmis quelque chose, comme pourroit estre la quantité d'argent, qui escheut à chacun en partage, i'y fairay suppléer ce qu'en dit Gomare; & pareillement ce que chaque Capitaine eut pour sa part, car pour celle du General, nous l'auons prise de ceux qui s'y trouuerent presens.

Quant au partage des gens de Cheual, & des Fantassins, dont il faut ſçauoir le nombre, pour en iuger, Gomare dit, *Que les vns, (à ſçauoir les Gens. d'armes) furent soixante; & les autres, qui estoient gens de pied, 150. ou enniron; encore que Pedro de Cieza de Leon, parlant de Cassamarca, où fut prisonnier Atahualpa, mette en auant, Que les Canalliers qui le prirent estoient 60. & qu'il n'y auoit pas dauantage de cent Fantassins: Quoy qu'il en soit, en ce qui est de ces derniers; ie suy cét Autheur, & non pas Gomare, pource qu'il n'escrit rien qu'il n'ait veu luy-mesme dans le Peru, & que pour ne me tromper si facilement, i'ayme mieux m'attacher à la moindre partie, qu'à la plus grande. Il paroist par les mesmes Autheurs, que les partages qui se firent entre les Espagnols, furent differents: car les soldats eurent six parts en or, & vne en argent; & le Gouverneur avecque les Capitaines, & les gens de Dom Diego d'Almagre, vne part en argent, & trois en or. Que si l'on demande pourquoy il y auoit en ce temps-là tant d'or, & si peu d'argent, au contraire de ce que l'on void par tout le Monde, c'estoit pource que les Rois Yncas ne tiroient point alors ces Metaux pour en faire des tresors, mais seulement pour embelir leurs Temples, & leurs Maisons Royales. A cause dequoy ils ne se soucioient point de chercher des Mines d'argent, pour l'extrême difficulté qu'il y auoit à le tirer des entrailles de la Terre, ainsi que l'esprouuent encore aujour'd'huy ceux qui trauaillent aux Mines de Pothosy, qui ont plus de 200. toises de profondeur, comme le remarque le Pero Acosta dans son Histoire, où ie renuoye ceux qui voudront ſçauoir combien ce trauail est grand, & insupportable. D'ailleurs, les Rois Yncas ne se deuoient point foucier de chercher de l'argent, ny mesme de l'or, pource que sans en exiger par tribut, ils*

Lin. 4.

Ch. 8.

en receuoient autant qu'il leur en faloit des Indiens, qui leur en offroient tous les iours, comme nous l'auons monsté en son lieu, pour le seruice de leurs Maisons, & de leurs Temples. Et d'autant que l'or s'engendre en la surface de la Terre, d'où par consequent on a moins de peine à le tirer, outre qu'il y en quantité dans les ruisseaux, où l'entraignent les rauines des pluyes, & qu'il s'en trouue generally par tout le Peru, ou plus, ou moins, selon les endroits d'où ceux qui le tirent le lauent de mesme que font nos Orfevres leurs Balieures; c'estoit la raison encore pour laquelle il y en auoit plus que d'argent, outre que les Indiens, quand ils n'auoient rien à faire dans leur mesnage, s'employoient à le chercher, pour en faire present à leurs Roys.

Pour reuenir maintenant à nostre dessein, qui est de verifier la grande quantité de ces precieux Metaux qu'Atahualpa donna pour sa Rançon; nous en deduirons icy les Parties, de la façon que les Autheurs susdits les ont calculées: Nous mettrons celles d'or, & d'argent, eualuées selon leur prix, à raison de vingt pour cent, qui estoit le prix d'alors dans les Indes, & qui l'est encore à present en Espagne; puis pour faire plus aisément la supputation, nous reduirons les pieces d'or, & d'argent selon leurs especes, en Ducats d'Espagne, valant chacun vnze Reales, & vn Marauedis, qui sont, suiuant la supputation du pais, 375. Marauedis. D'où reuenant au partage de nos Conquerans, nous dirons avec Augustin de Garate, *Qu'à chaque homme de cheval escheut pour sa part, la somme de plus de 1200. pezos en or, pource que les Cavaliers eurent plus d'un quart que les gens de pied, somme considerable à vray dire, bien qu'Atahualpa n'eut pas encore fourny la cinquieme partie de ce qu'il auoit promis pour se racheter. Or pource que les Soldats qu'auoit amené Dom Diego d'Almagre, qui estoient en grand nombre; & tous gens de marque, ne pouuoient rien pretendre à la Rançon d'Atahualpa, pour ne s'en tre point trouuez, lors qu'on le fit prisonnier; le Gouverneur neantmoins ne laissa pas de leur donner 1200. Ducats, pour aider à les desdormager: Ce sont les paroles de Garate; mais Gomare dit, Que chaque homme de cheval eut pour sa part, outre l'or, 360. Mars d'argent, & que les Capitaines eurent la valeur de 30. à 40000. pezos; Ansi ioinant maintenant ensemble ce que disent ces Autheurs, nous tirerons par le moyen de ces Parties celles du partage general, & de ce partage le Quint, pour mieux supputer, & verifier à com-*

bien chaque Partie , & le tour peuent monrer.

Au Gouverneur furent données pour sa part 200000. pezos, à sçauoir 150000. en or , & 150000. en argent, la Chaire de l'Ynca, qu'il prit, comme Capiraine general, du monceau de sa Rançon, valant 25000. pezos en or. A trois Capiraines de Cavalerie 90000 pezos en or, & 30000. en argent. A quatre Capitaines d'Infanterie autant. A soixante gens-d'Armes 720000. pezos en or, & 180000 en argent. A cent Fantassins 900000. en or, & 136000. en argent. A 240. Espagnols, venus avec Dom Diego d'Almagre 80000. en or, & 60000. en argent. Et à Dom Diego d'Almagre 30000. en or, & 10000. en argent, sans ce que son Compagnon luy donna de sa part, comme il se dira cy-apres. De roubles lesquelles sommes il en reuint pour le Quint en or, 546250. pezos, & en argent 105750. Et daurant qu'au rapport des Historiens, rour céargent estoit affiné, ou argent de Coupelle, qui vaur plus de quatre reales par marc, quel'argent d'aloy, tel qu'estoit celuy dont nous auons fait le compte, il y a esté adiousté 38160. Ducats, qui est ce que l'argent de coupelle se trouue valoir de plus, que celuy d'aloy, en toute la quantité que nous auons mise dans le compte. Mais pour ne laisser pas rant les Lecteurs par vne longue suppuration de chaque somme, ie la reduiray en Ducats, avec l'intérest de 20. pour cent de l'or à l'argent, & autres 20. de pezos en Ducats: d'où il se verra que cent pezos en or, en valent six-vingts en argent; & que six vingts pezos en argent, sont 144. Ducats; de telle sorte que cent pezos en or se monrerent à 144. Ducats; & ainsi par le moyen de ce compte, nous trouuerons celuy de toutes les especes en or. De plus, pource que les Historiens n'ont pas remarqué si l'or estoit affiné, comme ils l'ont dit del'argent de coupelle, nous en ferons le compte, à raison de 22. Carats & demy, comme on le prarique dans le Peru, ou bien si nous le faisons monter iusques à 24. Carats, comme c'est l'aloy de l'or le plus fin, nous adiouterons à route la quantité 218500. Ducats, pour compenser ce qui se trouue manque d'un Carat & demy sur le tout, sans le specifier autrement, pource que les Autheurs Espagnols n'en parlent point, & que ie ne veux rien mettre en auant sans leur authorité. Côme done en l'eualuation del'argent, pour le reduire en or, il n'y a d'intérest aux pezos que ce qui s'y rrouue par dessus les Ducats, qui se monte à 20. pour 100. nous disons, pour faire

Le compte general, que l'or qu'eut pour sa part le Gouverneur	
Dom François Piçarre, y comprenant la Chaire del'Ynca, qu'il	
prit, comme nous auons dit, dans le monceau de sa Rançon,	
se montoit à	252000. Ducats.
Et l'argent à	60000. Ducats.
De plus il fut donné en or aux trois Capitaines de gens de che-	
ual.	126900. Ducats.
En argent,	36000. Ducats.
Aux soixante gens d'Armes, en or,	1036800. Ducats.
En argent,	129600. Ducats.
Aux cent Fantassins, en or,	129600. Ducats.
En argent,	162000. Ducats.
Aux 240. soldats d'Almagre, en or.	259200. Ducats.
En argent,	72000. Ducats.
A Dom Diego d'Almagre, en or.	43200. Ducats.
En argent,	12000. Ducats.
Au Quint du Roy, en or,	786600. Ducats.
En argent,	126900. Ducats.
Et pour le surplus de l'argent de coupelle.	38170. Ducats.

Desorte qu'apres auoir sommé le tout, il se trouue, *Que la Rançon d'Atahualpa fut de 4605670. Ducats*: les trois comptes desquels, & 933000. Ducats, sont du prix de l'or, & les 672670. Ducats de la valeur de l'argent, avec le surplus de l'argēt affiné, si bien que ces deux sômes, iointes ensëble, fôr quatre milliôs, six cës, cinq mil, six cës, septâte Ducats. Or bië que cette sôme de ducats qu'eurent les Espagnols dâs Cassamarca, fut extrême-mët grâde; si est-ce que celle qu'ils tirerent de Cozco, quâd ils y entrerët, fut encore plus notable, côme le remarquent les mesmes Autheurs Gomare, & çarate, que nous sciterôs en leur lieu. Le P. Blas- Valera fait monter la Rançon d'Atahualpa à quatre millions, huiët cens mille Ducats: ce qu'il verifie par les nœuds & les comptes de chaque Prouince, d'où ces Richesses furent tirées: Mais pour moy i'en suis demeuré à ce que les Historiens en ont dit, suiuant le desnombrement des partages, & des sommes; Que si l'on s'en veut tenir au sentiment du Pere Valera, il y aura de deschet de mon compte au sien, cent nonante quatre mille, trois cens trente Ducats: Surquoy ie diray, qu'on ne trouuera pas estrange auiourd'huy cette immense quantité d'or, & d'argent, si l'on considere qu'il y a plus de trente ans qu'il entre

à chaque année dans la Riviere de *Guadalquivir*, plus de douze millions d'or, & d'argent, qui de mon pais sont enuoyez en Espagne, d'où il s'espendent par tout le vieux Monde: & ainsi ie puis bien dire de ma Patrie, qu'elle se monstre cruelle Marastre à ses propres enfans, & Mere passionnée enuers ceux d'autrui. Gomare parlant de cette Rançon, en dit ce qui suit. *Picarre enuoya le Quint de sa Maiefté, & vne ample Relation de tout ce qui s'estoit passé, par son Frere Hernand Picarre, avec qui s'en retournerent en Espagne plusieurs soldats, riches de 20.30. & 40000. Ducats. En un mot ils enleuerent presque tous l'or qu'ils auoient eu d'Atabalipa, remplissant d'argent la Banque de Seuille, & tout le monde du bruit de leur bonne Fortune, & d'un desir de s'enrichir comme eux, &c. Ces soldats, tous Conquerans, se trouuerent soixante de nombre, qui furent les bien-venus, & se signalerent par leur arriuée: Le Gouverneur donna à son Compagnon, de la part qui luy escheut, six vingts mille Ducats. Quant au Recteur Hernand de Luquo, il fut frustré de la sienne par sa mort inopinée: Et voilà pourquoy les Historiens ne parlent point de luy.*

DE CE QVE DISOIENT LES ESPAGNOLS
touchant les choses qui s'estoient passées.

CHAPITRE XXXIX.

LA Mort des deux Rois Huascar, & Atahualpa, plus Ennemis que Freres, quoy qu'en effet ils le fussent, rendit les Espagnols Maistres absolus de ce Royaume-là, n'y ayant personne qui en prit la deffence, & qui les empeschast de faire ce qu'ils voulurent. Car les Indiens du Party de ces deux Yncas, estant comme de pauvres brebis sans Pasteur, n'eurent personne des leurs, qui dans la Paix, ny dans la Guerre, embrassast leur protection; ny qui voulut ou trauailler pour leur propre bien, ou couper chemin aux maux qui les menaçoient; Au contraire, de nouuelles factions se formerent entre ceux du Party de Huascar, & d'Atahualpa: tellement que pour se desobliger eux-mesmes, ils firent comme à l'enuy, pour seruir les Espagnols, & se les rendre fauorables contre le Party qu'ils ne vouloient point suiure. Ainside tous les Capitaines restez apres la

mort d'Atahualpa, les vns resisterent aux Espagnols, comme il se vetra cy-apres, & les autres licentierent leurs troupes, pour faire vn Roy de leur main, afin qu'il ne leur fut pas si contraire que s'il estoit fait par la main d'autrui. Ils esleurent pour tel le Prince *Paulu*, fils de *Huayna Capac*, du nombre de ceux qui s'estoient sauuez de la tyrannie d'Atahualpa. Le principal Auteur de cette eslection, fut le Mestres de Camp *Quisquiz*, qui estoit à *Contisuyru*, quand les nouuelles luy vinrent de la prison d'Atahualpa, & qui ne vouloit pas alors beaucoup de bien à Paulu.

Mais la necessité fait faite de grandes bassesses, principalement aux Tyrans, quand ils se voyent au penchant de leur ruïne, & aux hommes lasches de courage, quoy que la Fortune les ait esleuez iusques dans le Trosne; pource qu'au lieu de se tenir dans la moderation, ils s'emportent au delà des bornes, & n'ont pour but que leurs malheureuses pretentions. Quisquiz estoit principal Ministre d'Atahualpa, braue soldat, & fort expérimenté au fait de la Guerre; qui apres auoir offert à Paulu la Bordure Royale, voyant qu'il n'en tenoit conte, pour n'auoir aucun droit sur le Royaume, dont Manco Ynga estoit legitime Heritier, se resolut de l'abandonner, & de se faire Roy luy mesme. Pour executer vne si haute entreprise, n'ayant point de plus forte Machine que sa valeur propre; il conclud à patt soy de s'en seruir en cette occasion: tellement que pour ce mesme effet ayant rappellé ses troupes, il voulut sçauoir, auant que passer outre, quel succez auoit eu la Mort de son Roy Atahualpa, & prit à cette fin la route de Cozco, où nous le laisserons, pour le reprendre quand il en sera temps.

Cependant les Espagnols bien estonnez de ce que les honneurs qui leur estoient rendus generalement par tous les Indiens, passoient iusques à l'adoration; faisoient plusieurs contes là dessus, sur lesquels encherissoient beaucoup les six autres qu'on auoit enuoyez par les Prouinces, pour en descouurir les Richesses, dont ils ne cessoient de dire des merueilles; & pateillement de l'honneste reception qu'on leur auoit faite. Plusieurs attribuant ces choses à leur valeur propre, disoient que les Indiens, apres les auoir vus si courageux, & si braues, les tenant pour inuincibles aux Armes, s'estoient rendus à eux de pure crainte; & partant qu'il les falloit tenir pour conquis. De

cette façon ils se picquoient eux-mesmes de vaines louanges, & ne confideroient pas que les deferéces que les Indiens leur rendoient, procedoient de leurs superstitions, & du commandement que le grand Huayna Capac leur auoit fait auant que mourir, d'honorer des Estrangers (& c'estoient les Espagnols) qu'il predict deuoit venir en leur païs, où ils destruiroient ensemble, & leur Empire, & leur Idolatrie. Quelques-vns pourtant, plus aduisez, & portez d'un plus grand zele pour la gloire de Dieu, & l'augmentation de la Foy Catholique, prenoient cela d'un bien meilleur biais, & leur remonstroient, que tous ces beaux Exploits qu'ils vantoient si fort, ne deuoient s'attribuer qu'à Dieu seulement, Qu'il estoit le veritable Autheur de ces merueilles, & qu'il les faisoit en faueur de son saint Euangile, afin que les Fidelles, & les Infidelles en profitassent ensemble, les vns en receuant sa sainte Doctrine avec moins de resistance, & les autres en s'animant avec plus de zele à la prescher charitablement, pour le salut du Prochain, & pour la plus grande gloire de Dieu. Ils representoient en suite avec beaucoup de verité, Que de voir vn, ou deux Espagnols faire 2. ou 300. lieues par terre, dans le païs de leurs Ennemis, qui les portoient eux-mesmes sur leurs espaules, & leur rendoient mesme honneur qu'à leurs Dieux, quoy qu'ils les pussent jeter dans l'eau, ou les precipiter du haut des rochers, dont il y en auoit de si hauts, & en si grand nombre; n'estoient point des actions d'hommes, mais des miracles de Dieu: Et partât qu'ils ne se les attribuassent point, mais qu'ils s'humiliaissent en bons Chrestiens, & en vray Predicateurs de la Foy de IESVS CHRIST. D'autres alleguoient, & mesme en la presence du Gouverneur, Qu'apres qu'Atahuallpa eut receu le saint Baptisme, il eut mieux valu pour la Paix du Royaume, & pour l'augmentation de la Foy Catholique, le laisser en vie, que de luy donner la mort: Qu'on le deuoit plustost obliger par toute sorte d'honneurs à mettre en execution ce qu'on eut desiré de luy; & sur tout, puis qu'il estoit Chrestien, à faire vn nouuel Edit pour l'establissement de la Religion, comme celuy qu'il auoit fait en faueur des Espagnols, par lequel il fût enioint à tous ses subjets de receuoir le saint Baptisme dans le terme qui leur seroit prefix. D'où il fut aduenu, qu'indubitablement tous les Peuples du Peru se seroient fait baptiser, les vns à l'enuy des autres; à quoy les auroient obligez

trois ou quatre considerations de grande importance, se trouuant sur tout iointes ensemble. La premiere, le commandement de l'Yncas, qui passoit dans leur Esprit pour vne Loy diuine, iusques dans les moindres choses; Et à plus forte raison en matiere d'embrasser la Religion de ces hommes extraordinaires, qu'ils tenoient pour Dieux. La seconde, l'extreme obeissance qu'ils rendoient naturellement à leurs Princes. La troisieme, le iuste suiet qu'ils auoient de se faire baptiser, à l'imitation de leur Roy, l'exemple duquel est la chose du monde à laquelle ces Peuples-là ont ordinairement plus d'esgard. La quatrieme, & la principale de toutes les autres considerations, estoit qu'Atahualpa les eut incitez à faire comme luy ce que son Pere Huayna Capac leur auoit commandé par son Testament, à sçauoir, d'obeïr à de nouueaux Peuples, qui deuoient bien-tost venir en son païs, la Loy desquels estoit incomparablement meilleure que la leur. Toutes lesquelles choses eussent esté veritablement de grands aduantages aux Predicateurs du saint Euangile en ces Terres esloignées, s'ils se fussent aduisez d'y proceder par cette voye-là; mais nostre Seigneur par ses iugemens secrets voulut qu'ils en prissent vne autre.

EFFECTS DE LA DIVISION DES
deux Freres Yncas.

CHAPITRE XL.

LA Guerre des deux Freres Yncas Huascar, & Atahualpa, causa l'entiere ruine de l'Empire du Peru, pource qu'elle ouurit aux Espagnols l'entrée dans le Païs, afin de le gagner plus facilement, comme ils firent; Ce qui leur eut esté comme impossible autrement, veu qu'il ne falloit que fort peu de gens pour le defendre, à cause des mauuais passages, des chemins raborteux, & des montagnes presque inaccessibles. Mais par vn eternal Decret de sa Prouidence, Dieu tout bon, & Misericordieux, permit qu'il y eut de la diuision entre ces deux Freres, afin que les Predicateurs de son saint Euangile abordassent en ces Terres incognuës plus aisément, & y trouuassent moins de resistance. Le Pere Acosta parlant succinctement de ses Rois, en dit ces pa-

Liv. 6. roles. A Huayna Capac succeda dans Cozco un fils qu'il auoit appellé
 Ch. 22. Tito Cusi Gualpa, il veut dire Ynticu gualpa, qu'on nomma depuis
 Guascar Ynca, le corps duquel fut brulé par les Capitaines d'Atahualpa,
 qui eut aussi pour Pere Guayna Capac; & qui s'estant souleué dans
 Quito contre son Frere, s'en alla fonder sur luy avec vne forte Armée.
 Il arriva cependant que Quisquiz, & Chillacuchima, Capitaines d'A-
 tahualpa prirent dans la Ville de Cozco Guascar Ynca, comme on l'eut
 proclamé Roy, pource qu'il l'estoit en effect, & legitime heritier de la
 Couronne. Le ressentiment qu'en eurent tous ses subiets fut grand au
 possible, & principalement dans sa Cour. Or pource que la coustume de
 ce Peuple là estoit de recourir aux Sacrifices dans leurs plus pressantes ne-
 cessitez, en celle-cy ne se trouuant pas assez forts pour mettre en liberé
 leur Seigneur, ny résister à ceux qui l'auoient pris, à cause de leurs for-
 ces, & de la puissance Armée, avec laquelle Atahualpa les venoit trou-
 uer; ils resolurent (& quelques-uns tiennent que ce fut par l'ordre de
 leur Prince mesme) de faire un grand sacrifice au Viracocha Pachays-
 chachic, autrement Pachacamac, qu'ils tiennent estre le Createur de
 l'Vniuers, pour le prier qu'il puis qu'ils ne pouuoient deliurer leur Roy,
 il luy pleut enuoyer des gens du Ciel qui le tirassent de prison. Apres ce
 sacrifice, dont ils attendoient l'effect avec vne grande confiance, ils furent
 tous estonnez d'oüy dire que certains Estrangers venus par Mer,
 auoient pris terre dans le pais, & fait prisonnier Atahualpa: d'où il
 aduint, que tant pour le peu de gens qui le prirent à Caxamalca, qu'à
 raison de ce miracilleux succez aduenu au mesme temps que les Indiens
 firent leur sacrifice au Virachoca, ils appellerent ces Estrangers Viracochas,
 croyant tout de bon que ce fussent des gens enuoyez de Dieu,
 pour prendre leur cause en main: Et voila pourquoy ils appellent enco-
 re aujour d'huuy les Espagnols Viracochas. Ils auoient au reste grande
 raison de dire que ces gens leur estoient enuoyez du Ciel, & ie trouue
 pour moy qu'il y a bien à considerer icy, touchant la Providence Diuine,
 qui se seruit de ce moyen, pour ouurir vne entrée aux nostres dans le Pe-
 ru; ce qui leur eut esté difficile, sans les diuisions des deux Freres, &
 de leurs gens, iointes à la creance qu'ils eurent, que ces nouueaux Per-
 ples leur venoient d'en haut; en quoy veritablement ils gaignerent plus
 que tous, puis que la Conqueste qu'on fit de leurs Terres, fut cause
 qu'eux-mesmes conquerirent le Ciel.

Ces paroles que ie viens d'alleguer du R. P. Acofta, font la
 conclusion du Chapitre susdit, où il décrit sommairement la
 Guerre des deux Freres Yncas, la tyrannie de l'un, la iuste suc-

cession de l'autre, leur emprisonnement attriué tout à mesme temps, le peu d'Espagnols qui prirent Atahualpa, la Prouidence diuine en la Conuersion de ces Gentils, le nom qu'ils donnerent aux Chrestiens, & l'estime qu'ils firent d'eux, les croyant enuoyez du Ciel; toutes lesquelles choses nous auons amplement racontées chacune en son lieu.

Il reste maintenant à parler du nom de *Viracocha*, qu'ils donnerent aux Espagnols, dès qu'ils entrerent en leur País, pource qu'en leur barbe, & en leurs habits ils ressembloient au Phantôme qui s'apparut à Viracocha, qu'ils adorerent depais, le tenant pour leur Dieu, fils du Soleil, comme il les en auoit asseurez luy-mesme. Mais lors qu'ils virent, qu'à leur entrée dans le País, les Espagnols prirent Atahualpa; que peu de iours apres ils le firent mourir d'une mort ignominieuse, comme fut celle de le faire estrangler en place publique, supplice ordonné par leurs Loix contre les Voleurs, & les autres Criminels; & qu'ainsi il fut executé honteusement, le Crétur public faisant scauoir à tous les tyrannies qu'il auoit exercées, & la fin deplorable de *Huascar*; ils creurent alors veritablement que les Espagnols estoient Fils de leur Dieu Viracocha, Fils du Soleil, & qu'il les auoit enuoyez du Ciel, pour vanger Huascar, & tous ses subjets, par la mort d'Atahualpa. A cette creance leur seruit beaucoup de voir l'Artillerie, & les Arquebuses que les Espagnols auoient apportées, pource qu'ils dirent que le Soleil leur Pere les recognoissant pour ses vtrays enfans, leur auoit donné ses propres Armes, qui sont les Tonnerres, les Foudres, & les Esclairs, par eux appellez *Tllipa*, qui fut le nom qu'ils donnerent aux Arquebuses, & mesme au Canon, en y adioustant l'adjectif *Huayllipa*, qui signifie, *grand esclair, ou grand tonnerre*. Outre le nom de *Viracocha*, ils imposèrent encore aux Espagnols celuy d'*Yncas*; disant, que puis qu'ils estoient enfans de leur Dieu Viracocha, Fils du Soleil, il estoit bien iuste qu'on les honorât du tiltre d'*Yncas*, comme gens venus du Ciel; & ainsi ils appellerent *Viracochas Yncas*, tous les Conquerans du Peru, depuis les premiers, qui furent ceux qui y entrerent avec Dom François Pizarre, iusques aux seconds, qui suivirent Dom Diego d'Almagre, & l'Adalento Dom Pedro d'Aluaredo. Ce fut le sujet, pour lequel ils les adorerent comme des Dieux, iniques à ce que par de mal-heureux effets d'Auarice, de Cruauté, de

Conuoitise, & de Tyrannie, en estant fort mal traittez, ils se desabuserent de leur fausse creance, & leur osterent le nom d'*Yncas*, disant qu'ils n'estoient pas vrayz Fils du Soleil, puis que de la façon qu'ils les traittoient, ils ne ressembloient aucunement aux Yncas leurs Ancestres; & ainsi leur en ostant le nom, ils leur laisserent celuy de *Viracochas*, pour la ressemblance, & de leur barbe, & de leurs habits au Fantosme qui s'estoit apparu à l'*Yncas* Viracocha.

Voilà ce que firent les Indiens à ceux d'entre les Espagnols qu'ils reconnurent vicieux, & cruels; iusques-là mesme, qu'au lieu des tiltres de Conquerans, & d'Augustes, ils les appellerent *cupays*, c'est à dire *Diables*. Mais quant à ces autres qui leur semblerent de bon naturel, doux, traittables, & obliges; non seulement ils leur confirmerent les noms susdits, mais ils y adiouterent encore ceux qu'ils donnoient ordinairement à leurs Rois, qui estoient *Tncipchurim*, c'est à dire, *Fils du Soleil*, & *Haucchacuyac*, qui signifie *Amateurs des Pauvres*. Avec cela, pour esleuer encoré plus haut la vertu des Espagnols, qui les traittoient bien, ils les appelloient *Enfans de Dieu*, pour la grande estime qu'ils leur voyoient faire de la Diuinité. Et d'autant qu'ils n'auoient point en leur langue la lettre D, au lieu de Dieu, ils prononçoient *Tins*, & ainsi ils les nommoient *Tiuspachurin*, c'est à dire *enfants de Dieu*; Mais pour l'instruction qu'on leur a donnée depuis, ils sont auourd'huy mieux versez en la prononciation Espagnolle. Où il est à remarquer qu'on ne scauroit croire combien estoit grand à ces premiers commencemens l'honneur qu'ils rendoient aux Espagnols, qui les instruisoient en la Religion Chrestienne, & aux bonnes mœurs; ce qu'ils pratiquent encore auourd'huy enuers les Ecclesiastiques, & les seculiers; Car dès qu'ils les connoissent d'humeur paisible, enclins à la Compassion, exempts d'Avarice, & de Concupiscence, & ennemis de la Tyrannie, ils les adorent en leur Ame, & leur en donnent des preuues en leur exterieur, avec des rendres incroyables; Car apres tout ce sont des peuples fort humbles, & qui n'oublent iamais vn bienfait, quelque-petit qu'il soit. Ils ont appris cette reconnoissance des bons offices receus, d'une ancienne coustume qu'auoient leurs Rois, de s'estudier à obliger tout le monde, ce qui les rendoit dignes à bon droit, de tous les surnoms, & des autres prerogatiues qu'on leur donnoit,

GRANDE FIDELITE' DES INDIENS
*du Peru, enuers les Espagnols qui les auoient
 faits prisonniers de Guerre.*

CHAPITRE XLI.

Les Indiens du Peru, pratiquoient vne autre vertu bien grande enuers les Espagnols, qui estoit, qu'un Indien qu'on auoit pris à la Guerre, se rendoit plus sujet à son Maistre, que ne feroit vn Esclaue; car il faisoit son Idole de son Vainqueur; & le considerant comme son Dieu, le respectoit, luy obeissoit, le seruoit, & luy estoit fidele iusques à la Mort, croyant fermement qu'il n'y auoit, ny Patrie, ny Parens, ny Pere, ny Mere, ny Enfants, qu'il deussent destacher du seruite de celuy dont il estoit prisonnier: tellement que sur cette créance, il preferoit la conservation de son Maistre à tout ce qu'il auoit de plus cher dans le Monde; Que s'il luy commandoit de vendre ses parens propres, il ne marchandait point à le faire, & à luy seruir d'Espion quand il le faisoit. D'où il sensuiuoit, que par les aduis de si fideles Valets, les Chrestiens agissoient puissamment en la Conquête de ce pays-là.

Il n'y auoit ny desguisement ny fard en cette seruitude des Indiens: ils s'y portoient avec affection, d'autant qu'ils s'estimoient veritablement obligez par deuoir, d'obeir à la Deité qui les auoit reduits sous sa Puissance; c'est pourquoy ils s'estudioient à luy estre fideles au delà de toute imagination: Pour cette mesme raison ils combattoient contre leurs plus proches, dont ils se declaroient Ennemis mortels, & ne feignoient point mesme de leu'r oster la vie, pour la conseruer à leurs Maistres, & aux autres Espagnols, dans le Party desquels ils s'estoient iettez, avecque protestation de mourir pour eux. Que s'il aduenoit par fois qu'en courant la Campagne, les Espagnols en prissent quelques-vns, & que le Capitaine les voulut partager entre ceux qui n'auoient aucuns seruiteurs du Pais; alors l'Indien qu'on auoit fait prisonnier, disoit hardiment; *C'est celuy-cy qui m'a pris; c'est luy que ie suis obligé de seruir iusques à la Mort.* Puis s'il voyoit que

le Capitaine luy respondit, Que l'ordre de la Guerre vouloit qu'on partageast les Indiens entre ceux qui n'auoient aucuns valets, Que celuy qui venoit de les prendre en auoir desia, & partant que le deuoir l'obligeoit de seruir vn autre Espagnol: *Je le veux*, luy repartoit le Prisonnier, *à condition qu'en cas que ce Chrestien vienne à prendre vn autre homme de ma Nation, il me soit permis de retourner à mon premier Maistre: Que si tu ne veux m'accorder cela, tûe moy ie te prie, car ie n'en veux point seruir d'autre.* Ainsi sur la parole du Capitaine, il alloit seruir le Maistre qu'il luy donnoit, & luy aidoit mesme à prendre d'autres Indiens, afin de reuenir à son premier Maistre; ce que les Indiennes obseruoient encore avec vne fidelité merueilleuse.

Ie diray à ce propos qu'en la Maison de mon Pere *Garcillasso de la Vega*, ie laissay, quand i'en sortis, trois de ces Indiens prisonniers de Guerre, l'vn desquels s'appelloit *Ally*, qui signifie *Bon*. Apres le souleuement general des Indiens, il fut pris en vne bataille de celles qui furent données en la Prouince de *Côlla*, où il combattit en vaillant soldat; Mais pour s'estre donné l'alarme avec ses camarades, se voyant enuéléppé en mesme danger qu'eux, qui prirent la fuite, & que les Espagnols poursuuiuent; il creut qu'il ne pouuoit sauuer sa vie autrement qu'en faisant le mort, pour s'eschapper à la faueur de la nuict. Ayant donc posé sa Camisole, il se ietta parmy les morts, & se veautra mesme dans leur sang, afin de mieux iouër son personnage. Cependant, apres que les Espagnols eurent bien poursuivy les Fuyards, & que par diuers endroits ils s'en furent retournez à leur logement, trois ou quatre Camarades s'aduiferent de faire reueü du Champ de Baraille, où comme ils consideroient les Morts, dont il estoit tout jonché, *Garcillasso* mon Pere, qui estoit du nombre de ceux qui les regardoient, en apperceut vn qui luy sembloit haleter, si bien que l'ayant piqué du fer de sa lance, pour voirs'il le sentiroit, il fut tout estonné qu'il se léua incontinent, & luy demanda pardon, de peur qu'il ne le mit à mort. Mon Pere luy donna la vie, & l'ayant fait son prisonnier, il en fut seruy depuis, avec toutes les soumissions, & toutes les preuues de fidelité que nous auons dices; si bien qu'à quelque temps delà il le fit baptiser, & sa femme aussi, qui furent nommez, l'un *Jean*, & l'autre *Isabelle*.

FIN DV PREMIER LIVRE.



HISTOIRE

DES

GVERRES CIVILES

DES ESPAGNOLS,
DANS LES INDES.

LIVRE SECOND.

SOMMAIRE.

CE LIVRE CONTIENT L'EXPEDITION
de Dom Pedro d'Alvarado au Peru ; La Trahison,
& les Cruantez de Ruminani contre ses gens propres ;
Deux Batailles entre les Indiens , & les Espagnols ;
Les Capitulations qui se firent de part , & d'autre ;
L'Accord d'Alvarado , & d'Almagre ; Trois autres
Batailles des Espagnols , & des Indiens , avec le nom-
bre des Morts ; La paye que receut Dom Pedro d'Al-
varado , & sa Mort infortunée ; La fondation des
Villes des Rois , & de Truxillo ; La Mort du Mestre
de Camp Quirquiz ; Le voyage d'Almagre à Chily , &
son retour au Peru ; Les Miracles que Dieu fit en fa-
neur des Chrestions ; Le succez du siege de Cozco , &

de la Ville des Roys; Le nombre des Espagnols que tuèrent les Indiens; L'Exil volontaire de l'Ynca; Le Contraste des Almagres, & des Pizarres; Le secours que le Marquis demande, & qu'il enuoye à Cozco; La Bataille d'Amançay, & la prison d'Alonse d'Aluvarado; La Paix renouvelée, & rompuë entre les Pizarres, & les Almagres; La cruelle Bataille des Salines; La Mort d'Almagre, & de quelques autres fameux Capitaines; L'arrivée de Diego d'Aluvarado en Espagne; Celle d'Hernand Pizarre, & sa longue prison.

DOM PEDRO D'ALVARADO S'EN VA
à la Conqueste du Peru.

CHAPITRE PREMIER.

Ch. 6.



V bruit des grandes Richesses du Peru, les Espagnols y accouroient de tous costëz, afin d'en auoir leur part, comme le remarque François Lopez de Gomare, par ces paroles. *Les merueilles qui se contoyent de l'or du Peru, firent embarquer tant d'Espagnols pour s'y en aller, que Niçaragua, Panama, Quauhtemallan, & autres Villes, & Isles en furent despeuplées, &c.* Le principal de ces Espagnols, fut l'Adalantado Dom Pedro d'Aluvarado, Cavalier des plus fameux de son siecle; qui ne se contentant pas de tant d'Exploits memorables qu'il auoit faits en la Conqueste de l'Empire de Mexique, d'*Yslatan*, & de *Quahutemallan*, voulut encore auoir part à celle du Peru. Pour cet effet il demanda permission à l'Empereur Charles V. de s'y en aller; Et qu'avec cela il pleut à sa Majesté de luy donner le Gouuernement d'autant de pais qu'il en pourroit conquerir, & peupler, hors de la Iurisdiction de Dom François Pizarre. Sa demande luy estant accordée, il fit ses preparatifs pour ce voyage de Guerre, où il fut suivy des principaux Cavaliers de toutes les Prouinces d'Espagne, la pluspart desquels se trouuerent estre d'Estremadure, pource que Dom Pedro estoit natif de Badajox.

Entre

Entre plusieurs dons que ce Cavalier tenoit de la Nature, il auoit vne disposition si grande, que par elle il se destina de la mort, en la fameuse retraite que le Marquis de Valle fit à Mexique: Car voyant que les Indiens'auoient rompu le Pont, par où les Espagnols se retiroient; il sauta la Lance à la main d'un bord à l'autre, & de la longueur du Pont, qui estoit de 25. pieds, se soustenant de la poignée de la Lance sur les corps morts: de quoy les Indiens qui le virent s'estonnerent tellement, que pour ce beau saut ils s'escrierent qu'il estoit de la Race des Dieux. François Lopez de Gomare sur le sujet de la Conqueste de Mexique, parlant d'Hernand Cortez, dit ce qui suit, que i'ay tiré mot à mot. *Quand il reuint à ses Compagnons, il en trouua plusieurs qui defendoient vaillamment leur vie, & plusieurs aussi qui l'auoient perdue. Luy perdit de mesme ce qu'il auoit d'or, de bagage, de munitions, & de prisonniers: En un mot, il ne trouua quoy que ce fut en son ordre acoustumé, tous les soldats s'estant espariez quit, qui là, depuis leur sortie hors de leurs retranchemens. Il les rallia neantmoins le mieux qu'il luy fut possible, leur mettant en queue Pedro d'Aluaro, pour encourager, & rallier de mesme ceux qui restoient. Mais Aluaro se sentit trop foible pour resister à l'effort des Ennemis; & voyant plusieurs deses Compagnons esendus morts sur la place, il iugea qu'indubitablement il luy en prendroit de mesme, s'il attendoit dauantage. Il suivit donc Cortez avec sa Lance à la main, marchant à son grand regret sur les corps des Espagnols, ou morts, ou blesez, bien affligé des crys lamentables de ses derniers. Il vint à la fin iusques au Pont, & le trouuant rompu, se hazarda de sauter, comme il fit, iusques à l'autre bord, sans abandonner sa Lance, ce qui estonna les Indiens, & mesme les Espagnols; car ven à la distance du lieu le saut estoit dangereux, comme l'esprouuerent à leur dommage ceux qui le voulurent imiter, pource qu'ils cheuerent dans l'eau où ils se noyerent, &c. Voila ce qu'en dit Gomare: A quoy i'adiouste, qu'il me souuient d'auoir oüy dire en mon enfance à des Espagnols, qui s'entretenoient des beaux faits de ce Cavalier, qu'après qu'on eut pris Mexique pour la seconde fois, on fit esleuer aux deux bouts du Pont, deux Colonnes de Marbre, pour memoire à la Posterité, du temps, & du lieu où cette aduenture estoit arriuée. Je m'en remets à ces tesmoins, s'ils sont encore viuans; & si l'Enuie quis'attache par tout ne les en a fait desdire depuis.*

I'ay à raconter encore, en faueur du mesme Aluaro, qu'e-

stant à Seuille, à son premier voyage des Indes, il luy prit fantaisie, & de d'autres jeunes Caualliers ses Compagnons, de monter à la Tour de la grande Eglise, pour y prendrel'air, & en mieux considerer la veüë. Comme ils y furent donc montez, en la plus haute de toutes les fenestres, ils trouuerent vne grosse poultre, qui s'aduançoit de dix, ou douze pieds hors de la Tour, où elle auoit esté mise pour seruir d'estançon à des planches, dressées en forme d'Eschaffaut pour quelque trauail. Alors vn de ces Caualliers, nommé *Castillejo*, natif de Cordouë, sçachant que Dom Pedro se picquoit de disposition; & luy voulant monstrer qu'il n'estoit pas moins agile que luy, posa son espée, & son manteau: puis sans rien dire, sortit de la Tour par la fenestre, & se mit sur la poultre, dont il mesura la longueur iusques au bout, vn pied apres l'autre, pour sçauoir combien elle auoit de semelles; & cela fait il s'en retourna de mesme à reculons, rentrant ainsi dans la Tour.

Dom Pedro d'Aluarado qui l'apperceut, iugea tout aussi tost qu'il le desbioit parlà d'en faire autant; ce qu'il fit aussi, & plus adroitement encoire; Car sans poser ny son espée, ny son manteau, il en jettà la moitié sur son espaule gauche, & retroussa l'autre sous le mesme bras, tenant la main gauche sur la garde de son espée, & ainsi il mesura la poultre, comme auoit fait *Castillejo*; puis quand il se vid au bout, il tourna en rond, & se mit en face de la fenestre de la Tour, où il entra vn pied apres l'autre comme il en estoit sorty, pour en mesurer la longueur: ce qui fut à vray dire, vne grande adresse, mais vne temerité bien plus grande à tous deux.

Il aduint vne autre fois que ce mesme Dom Pedro, & quelques-vns de ses Compagnons aperceurent des Bergers, qui pour monstrer combien ils estoient dispos, estoient à l'entour d'un Puits, où ils sautoient à l'enuy d'un bord, à l'autre. Les Caualliers mirent pied à terre, pour en faire autant; comme en effet quelques-vns en vinrent à bout, & les autres n'oserent pas l'entreprendre. Dom Pedro fut le dernier de tous qui se hazarda; & qui s'estant mis sur le bord du Puits; *Ce ne seroit pas estre mal dispos*, dit-il, *que de le sauter à pieds joints, & ie ne sçay si ie le pourrois faire*. Ce disant, il s'eslança del'autre costé, où n'ayant pas bien posé le pied, il ressauta tout d'un temps à reculons, avec tant d'agilité, qu'il se trouua sur le mesme endroit d'où il estoit

party. I'oyois parler souuent de ces gentilleses, & d'autres semblables, tant de ce Cauallier, que de ceux qui furent à la Conqueste du nouueau Monde: tellement qu'il sembloit que Dieu, & la Nature les eussent créez avecque ces aduançages, tant du Corps, que de l'Esprit, afin que par eux ils pussent souffrir, & vaincre tant de trauaux qui se deuoient presenter en la Conqueste d'un pais si vaste, & où les chemins sont si mauuais, qu'il est difficile d'en surmonter les obstacles en temps de Paix, & à plus forte raison de les gaigner par la force des Armes. Ils en vinrent à bout neantmoins, & ce fut sans doute par vne grace particuliere de Dieu, qui les assista miraculeusement, ainsi que nous auons commencé de voir, & comme nous verrons cy-apres: estant certain que sans le secours du Ciel, toutes les puissances de la Terre ne pouuoient suffire à l'execution d'une si haute entrepise.

Après auoir parlé de la merueilleuse disposition de Pedro, ou Dom Pedro d'Aluaro, comme quelques-uns le nomment, tous deux n'estant qu'un; nous laissons au Lecteur curieux à voir ses trauaux & ses faits memorables dans l'Histoire de la Conqueste de Mexique, de Nicaragua, & du Peru, où ils les trouueront escripts, bien que non pas si au long qu'il a mérité. Il estoit bon homme de pied, & de cheual, & d'un abord si agreable, qu'à son retour de Mexique en Espagne, où il estoit venu exprès, pour se iustifier de quelques calomnies de ses Ennemis, estant necessaire qu'il recherchast l'occasion de parler à l'Empereur, pour luy rendre compte de ses seruices; il fut pour cét effect à Ariuez, afin de prendre son temps, & de baiser les mains à sa Maiesté. L'Empereur se pourmenoit dans les Allées de ses Iardins, où d'abord qu'il vid Dom Pedro, il demanda à ceux qui l'accompagnoient qui estoit ce Gentilhomme-là, & dès qu'il l'eut sceu; *Il a trop bonne mine*, dit-il, *pour auoir fait ce qu'on m'a rapporté de luy*. En suite dequoy il le rendit absous des cas qu'on luy imposoit, & luy fit plusieurs gratifications.

S'estant marié depuis, il s'en retourna en la nouuelle Espagne, où il emmena quantité de filles, & de femmes de condition avec luy, pour les marier de mesme avecque les Conquerans, qui auoient aidé à gaigner cét Empire-là, où ils viuoient à leur aise, pour y estre pourueus de riches departemens. A son arriuée à *Huastimallan*, il fut receu solempnellement; & tant dans la

Ville, qu'en sa Maison en particulier, se firent, & iour, & nuit, plusieurs festes, & danſes qui durerent vn aſſez long-temps. Pendant ces réjouifſſances, il aduint que tous ces Conquerans, eſtans aſſis dans vne grande Salle, où il y auoit aſſemblée, quelques Dames, qui ſe trouuerent au bout de la Salle, près d'une porte où il y auoit vn parauent, s'en ſeruirent, à ſe tenir cachées par honneur, & à voir auſſi ce qui ſe paſſeroit; ce qui n'empeſchoit pas qu'elles ne ſ'entretiſſent enſemble; ſi bien qu'en cette conuerſation il y en eut vne qui dit: *On parle de nous marier à ces Conquerans; Auecque ces vieux pourris*, reſpondit l'autre: *Les eſpoſe qui voudra: de moy ie ſuis bien certaine que ie n'en ſcray rien; au contraire, ie les donne tous au diable tres-volontiers: auſſi-bien ſemble-t'il qu'ils viennent de quelque Enfer, tant ils ont mauuaife mine; Les vns ſont boiteux, ou manchots, ou borgnes, ou ſans oreilles: les autres n'ont qu'un demy viſage; & le plus agreable d'entr'eux, ſe trouue tout balafré.* A quoy la premiere repartit; *Et quoy! vous ne ſçauiez donc pas que ce n'eſt point pour leurs beaux yeux que nous les voulons eſpoſer, mais pour heriter de leurs Departemens d'Indiens; eſtant ſi vieux, & ſi ceſſez qu'il n'y a point d'apparence qu'ils puiſſent viure long-temps: tellement qu'apres leur mort, nous en choiſirons de jeunes, pour les mettre à la place des vieux, comme on donne les vieilles Chandieres, pour en auoir de neuues.* Durant ce bel entretien, vn de ces vieux Cavaliers, qui eſtoit à coſté de la porte, & ſur qui les Dames n'auoient point ietté les yeux, pource qu'elles ne regardoient que de loin, ouïſt tout ce qu'elles dirent: mais enfin, n'en pouuant ſouffrir dauantage, il paruſt deuant elles, & ſe mit à les tancer en termes aſſez picquans, pour leur donner à connoiſtre qu'il ne leur ſçauoit guere de gré de leur mauuaife volonté: puis ſ'en allant à ſes Compagnons; *Mefſieurs*, leur dit il, *que tardez-vous tant à vous marier avecque ces belles Dames? Eſpoſez-les, ie vous prie, & vous verrez qu'elles vous payeront bien-toſt des courtoiſies que vous leur aurez faites.* Cela dit, il ſ'en alla droit en ſa Maison, où il enuoya querir vn Preſtre, qui le maria tout à l'heure avec vne Damoiſelle Indienne qu'il fit legitimer, afin que ſes biens fuſſent pour tous deux, & non pas pour celuy que Madame auroit choiſi, qui apres ſa mort en mettroit en poſſeſſion vn autre, & en fruſtreroit ainſi ſes enfans qu'elle ne tien-droit que pour Valets, ou pour Eſclauſes. Il ſ'en eſt trouué quelques-vns dans le Peru, qui ont fait de meſme, & ſe ſont mariez

avecque des Indiennes, bien qu'en petit nombre, la plus-part ayant fuiuy le Conseil de la Dame, dont nous venons de parler: Mais leurs enfans peuuent tesmoigner combien mal il leur en a pris, puis que dans les Hospitaux où ils viuent, ils voyent iouyr les enfans d'autrui, de ce que leurs Peres ont gagné, ou que leurs Meres, ou leur autres plus proches ont aidé à gagner. Car en ces commencemens, quand les Indiens voyoient quelque femme de leur Nation, mariée à vn Espagnol, & qui estoit enceinte, ils se ioignoient tous ensemble entre Parens, & les seruoient comme leur Idole, pour s'estre mis dans leur Alliance, ce qui aduanga grandement la Conqueste des Indes, à cause des soins que telles gens y apportèrent. Où vous remarquerez qu'il se fit depuis vne Ordonnance, en faueur des Conquerans du nouveau Monde, par laquelle il fut dit, qu'ils iouïroient des Departemens d'Indiens durant leur vie, qu'apres leur mort, quelqu'un de leurs Enfans en heriteroit aussi tant qu'il viuroit; & que s'ils n'en auoient aucuns, ce seroit la femme qui en auroit la possession, la preferant aux Enfans bastards, pour auoir comme il sembloit plus contribué que leurs Meres à la Conqueste du Pais: tellement que la Dame susdite ne croyoit pas auoir mauuaise raison de prendre vn vieux Mary, pour le troquer, comme elle disoit, avec vn ieune.

DES GRANDS TRAVAUX QUE DOM PEDRO
d'Aluvarado, & ses gens souffrirent en leur
Voyage.

CHAPITRE II.

GARCILLASSO de la Vega mon Pere, fit le voyage du Peru, en qualité de Capitaine, avecque Dom Pedro d'Aluvarado, comme le rapporte Pedro de Ciega de Leon, duquel voicy les paroles. *L'Adalentoado Dom Pedro d'Aluvarado, arriua près du lieu où estoit le Marechal Dom Diego d'Almagre. Il fut accompagné de Diego d'Aluvarado, de Gomez d'Aluvarado, d'Alonso d'Aluvarado, à present Marechal du Peru, du Capitaine Garcillasso de la Vega, de Jean de Sahauedra, & de plusieurs autres Cavaliers de* Cha. 42.

haute condition, que l'ay nommez en leur lieu. Ils se virent en de si grandes extremitez, qu'il y en eut qui creurent qu'ils seroient contrainsts de rompre les uns avec les autres, &c Voilà ce que dit Pedro de Ciega sur ce sujet, où Garcillasso de la Vega est le seul qu'il nomme Capitaine entre ces Caualliers, qu'il me souuient d'auoir tous connus, à la reserue de Dom Pedro, & de Diego d'Aluarado. Apres s'estre mis sur Mer, depuis Nicaragua iusques à Puerto Viejo, ils furent en grande necessité de viures, & d'eau douce, pour auoir esté si hastez de partir, & si obstinez à croire que leur nauigation ne seroit pas longue, qu'ils n'eurent pas assez de preuoyace pour mettre dans les Nauires toutes les choses qui leur estoient necessaires. Ils ne furent pas moins trauaillez de soif, & de faim, quand ils eurent mis pied à terre, comme il se void dans les Relations d'Augustin de Garate, & du bon Prestre François Lopez de Gomare, qui escriuirent tous deux presque en mesmes termes ce voyage que Dom Pedro d'Aluarado fit de la nouuelle Espagne au Peru; Que s'il y a quelque difference, elle n'est que sur le mot de *Dom*, & sur le prix de leurs Cheuaux, que la violence de la faim leur contraignit de manger; ce qui m'oblige de rapporter icy mot à mot ce qu'en dit sommairement Gomare dans son Histoire, parlant des grands maux qu'eurent en cette Expedition, Dom Pedro d'Aluarado, & ceux de sa suite.

Si tost que la Renommée eut publié de toutes parts les grandes Richesses du Peru, Pedro d'Aluarado demanda permission à l'Empereur d'aller descouvrir, & peupler les Prouinces où les Espagnols n'auroient pas encore mis le pied. L'ayant obtenu, il enuoya Garci-Holguin, avec deux Nauires pour apprendre ce qui se passoit au Peru: Le rapport qu'il fit à son retour, fut que le pays estoit fort bon; & si abondant en or, & en argent, qu'il estoit tout estonné des grandes Richesses que les Espagnols auoient tirées de la Rançon d'Atabalipa: A quoy il adiousta, que la Prouince de Cozco n'estoit pas moins riche; assurant le mesme du Royaume de Quiru, qui n'estoit pas loing de Puerto Viejo. Ces bonnes nouuelles ressonnerent tellement Pedro d'Aluarado, qu'il se resolut de faire ce voyage. A cette fin l'an 1535. il leua dans son Gouvernement plus de 400. Espagnols, & fretta cinq Nauires, où il embarqua quantité de Cheuaux. Cela fait, il se mit à la voile, & fut mouiller vne nuit à Nicaragua, où il enleua de force deux bons Nauires, qui se tenoient prests pour amener à Pisarre des Soldats, des Armes, & des Cheuaux.

Ceux qui se denoient mettre dans ces Vaisseaux furent ravis de s'embarquer dans ceux d'Aluvarado, qui se trouua par ce moyen 500. Espagnols, & quantité de Cheuaux, avec lesquels il fit sa descente à Porto-Viejo, s'enquerant tousiours de la route qu'il deuoit tenir. Comme il eut pris terre, il entra dans certaines Plaines environnées de plusieurs Montagnes, où peu s'en falut que ses gens ne mourussent de soif; à quoy nantmoins ils remedierent par la rencontre qu'ils firent de certaines Canes, qui par dedans se trouuerent toutes pleines d'eau; & appaiserent aussi leur plus grosse faim, par la chair de leurs Cheuaux qu'ils tuerent, dont il y en auoit tel qui valoit plus de mille Ducats (garate dit 5000. Castillans, ou Escus de Castille, & ie le tiens pour le plus assésuré, pour l'auoir ainsi ouï dire dans le Peru.) Cependant, par l'espace de plusieurs iours, ils se virent tous couuerts de cendres, que lançoient de toutes parts les embrasemens des Montagnes de Quitu, plus de quatre vingts lieues à la ronde: car les flammes que ces Monts vomissent sont si violentes, iointes au bruit qu'elles font, qu'on tient estre incomparablement plus grand que celui de la Foudre, & du Tonnerre; qu'elles espouuantoient ceux qui les voyoient, & qui les oyent aussi, à mesme temps. Avec cela les Arbres estoient si touffus dans les Forêts, qu'il leur faisoit trauerser, qu'ils estoient souuent contraincts de s'ouurir vn chemin à force de bras. Ils passerent aussi par des Montagnes toutes couuertes de neiges, s'estonnant bien fort de ce qu'il neigeoit ainsi subs^t l'Equinoctial. La rigueur du froid y estoit si grande, que soixante d'entr'eux en furent gelez. Mais enfin se voyant hors de ces rudes Montagnes, ils rendirent graces à Dieu de les auoir desliés de ce danger, & maudirent le pays, ou plustost l'insatiable conuoitise d'auoir de l'or, qui les reduisoit presque à mourir de froid, & de faim. Ce sont

Liu. 2.
Ch: 9.

les paroles de Gomare, auxquelles Augustin de çarate adioust les suivantes. Ils auoient si grande enuie d'ice retirer d'un si mauuais pays, qu'ils ne cessoient de courir, sans s'attendre, ny sans s'assister les uns les autres: D'où il aduint qu'un Espagnol, qui menoit avecque luy sa femme, & deux petite filles, voyant qu'elles s'estoient assises, pour estre abbattuës de lassitude, & qu'il ne pouuoit ny les secourir, ny les emmener, se resolut de ne les point abandonner: si bien que tous quatre transirent de froid; & ainsi bien qu'il se pût sauuer, il ayma mieux peirir avec elles. Apres ces perils, & ces trauaux effroyables, ils passerent la Montagne, s'estimant extrêmement heureux d'en estre dehors: Et voila combien fut lamentable la fin de la premiere Espagnolle qui entra dans le Peru.

J'ay à remarquer icy, que ces mesmes Auteurs peuuent bien s'estre abusez, touchant le nombre des Espagnols, qui suiurent Dom Pedro d'Aluarado, qu'ils disent n'auoir esté que de 500. Car ie me souuiens d'auoir ouï dire à plusieurs de ceux qui allerent avec luy, qu'ils estoient 800. de compagnie : toutesfois il se peut faire qu'il n'en sortit que 500. de Nicaragua, & qu'estant abordez au Peru, ils furent joints par les autres; si bien qu'ils se trouuerent 800. dans la Plaine de *Ruice-Pampa*, où comme nous dirons tout maintenant, Dom Pedro d'Aluarado, & Dom Diego d'Almagre contracterent amitié ensemble. Vn autre Historien raconte que cela se fit trois ans auparauant; Mais quoy qu'il en soit, ce n'est pas chose de grande importance. Les Canes, qu'ils appellent *Ypa*, où ils trouuerent de l'eau, sont aussi grosses que la cuisse d'un homme, & ont leur escorce de l'épaisseur du poulce. Il y en a qui ne viennent que dans les pais chauds, où ils en font comme des solives, & des poutres, pour la structure de leurs Maisons: Les Indiens qui en sçauoient le secret, leur dirét qu'il y auoit de l'eau cachée au dedans; comme en effet de chacune de ces Canes ils en tirerent plus d'un sceau plein, pource qu'elles estoient esgalement grosses, depuis le haut iusques en bas. Augustin de Garate en dit ce qui suit, dans la description qu'il fait de ce voyage de Dom Pedro d'Aluarado. *Ses soldats endurerent beaucoup de faim, & encore plus de soif; mais le bon heur voulut pour eux, qu'ils rencontrèrent certaines Canes, dans le creux desquelles, les coupant à l'endroit des nœuds, ils trouuerent de fort bonne eau douce: Ces Canes sont aussi grosses que la cuisse, si bien que chacune leur donnoit une grande mesure d'eau, qu'on tient que par une vertu spécifique, elles attirent de la rosée qui tombe la nuit, pour suppléer à la sécheresse de la terre, où il n'y a point de fontaines: Et voilà comme par le moyen de cette eau, furent soulagez les hommes & les cheueaux, de l'Armée de Dom Pedro d'Aluarado, &c. C'est ce que dit Augustin de Garate de cét Adalento, & de ses gens, que nous laisserons passer outre, pour reuenir aux Espagnols, & aux Indiens de Cassamarca.*

Liv. I.
Ch. 10.

LE CORPS D'ATAHVALLPA EST TRANSPORTÉ à Quito, où le Tyran Ruminaii exerce des cruantez estranges.

CHAPITRE III.

DOM François Piçarre, & Dom Diego d'Almagre, n'eurent pas plustost fait enterrer le Corps d'Atahualpa, qu'ils s'en allerent à Cozco, où en passant chemin, ils furent visiter le riche Temple qui estoit dans la vallée de Pachacamac, & en tirerent tout l'or, & l'argent que Hernand Piçarre n'auoit pû emporter. De là, ils furent à Cozco, Et quoy que les chemins fussent rudes, à cause des grands costaux, des Riuieres impetueuses, & des fondrieres profondes, ils n'y trouuerent qu'un seul obstacle, dont il fera parlé cy-apres.

Mais en attendant que ie le reprenne, pour mettre chaque chose en son lieu, ie reuiens au Mestre de Camp *Challcuchima*, & aux Capitaines d'Atahualpa, comme aussi aux autres Seigneurs de la Cour, qui demurerent à Cassamarca. Si-tost que les Espagnols furent sortis de cette Prouince-là, pour s'en aller à Cusco, les Indiens tirerent de terre le Corps d'Atahualpa, pource qu'il leur sembla chose mal-seante, indigne de la Majesté de leur Ynca, & contraire à la Coustume de leurs Ancestres, que de le laisser enseuely dans vne Tombe ordinaire; Ce qu'ils firent encore, pour executer sa derniere volonté, qui fut qu'on eut à l'enterrer à Quito, où ses plus proches transporterent son Corps, sans se mettre en peine, ny de solemnité, ny de Pompe, comme gens qui par la perte de leur Empire auoient perdu tout courage.

Cependant, le Mestre de Camp Ruminaii, en ayant eu la nouuelle, fit publiquement le plus grand preparatif qu'il pût, pour receuoir, & embaumer le Corps de son Roy, encore qu'il fut desia corrompu. Mais en son particulier jouant vn personnage bien different, il donna ordre à toutes les choses qui luy sembloient necessaires, pour executer ses desseins tyranniques. Pour cette fin, employant les artifices qui luy estoient ordina-

res, il se soumit à toutes les volontez de *Culliscacha*. Frere d'*A. Atahualpa*; & pour voir s'il auoit enuie de regner, luy conseilla de se mettre sur la teste la Couronne Royale, & de vanger la mort de son Frere: ce qu'il ne disoit qu'afin de luy oster le soupçon qu'il pouuoit auoir de luy, & s'en assurer par ce moyen, pour le mieux prendre au despourueu, & faire reüssir plus facilement ce qu'il s'estoit proposé. *Culliscacha* luy respondit, Que ce seroit folie à luy de pretendre à la Couronne; Que les Espagnols ne souffriroient iamais qu'on la leur ostast des mains; Et que quand cela seroit, il auroit à la disputer contre les Enfants de *Huayna Capac*, qu'il scauoit y auoir plus de droit que luy: Qu'au reste tous les Seigneurs de l'Empire ne manqueroient pas d'appuyer ses iustes pretensions, tant pour estre lassez des Guerres passées, qu'à cause qu'ils le tenoient pour Heritier legitime; outre qu'il n'estoit pas homme à leur pouuoir resister.

Cette response si bonne, & si iuste, ne fut pas capable de destourner *Ruminaui* de son meschant dessein: Au contraire, elle l'y fortifia dauantage, & le fit resoudre plus que iamais à l'executer, comme Barbare, & Inhumain qu'il estoit; iusques-là mesme que dans ses conuersations secretes, il remonstroit à ses Cōfidens, pour authoriser sa Tyrannie, que suiuant les Exēples qu'il auoit veus, il ne luy faloit point d'autre droit pour regner, que d'vsurper le Royaume: Que le meilleur estoit de l'oster à son Possesseur, en luy ostant la vie, de quelque façon qu'il en pût venir à bout: Qu'*Atahualpa* en auoit vsé de mesme enuers son Frere *Huascar Ynca*, & les Espagnols enuers *Atahualpa*: Qu'il se promettoit de les imiter, & mesme d'auoir assez de courage, pour reüssir en son entreprise. Sur cette resolution, où la Conuoitise de regner le precipitoit, il ne faisoit plus qu'attendre que les Capitaines, & les Curacas vinsent à *Quitu*, avec le corps d'*Atahualpa*: En effet ils y vintēt bien tost apres; & à leur arriuée, il leur fit vne reception solennelle, parmy vne foule de gens qu'il auoit assemblez pour le dueil de leur *Ynca*, qu'ils tesmoignerent à tout le Monde par les larmes respandues sur son Corps, dont ils abregerent la Pompe funebre; car ayant à durer vn an tout entier, suiuant la coustume du païs, ils n'y employèrent que quinze iours. Ce terme estant expiré, *Ruminaui* fut d'aduis de ne point laisser passer l'occasion de mener à bout ses pretensions, puis que sa bonne Fortune luy auoit fait assembler

tous ceux dont il se vouloit deffaire, qui estoient les Fils, & le Frere d'Atahualpa, le Mestre de Camp Chalcuchima, & quantité de Capitaines, & d'autres Seigneurs, qui luy estoient des obstacles à son dessein. Apres leur auoir donc fait promettre qu'ils se trouueroient le lendemain en vn festin qu'il leur vouloit faire, pour y resoudre de l'ordre qu'ils deuoient tenir contre les Espagnols, & declarer par mesme moyen Gouverneur, & Vice-Roy de Quito Culliscacha, fils aîné d'Atahualpa, en attendant qu'il fut hors de Minorité; Les Capitaines & les Curacas s'assemblerent tous au Palais Royal de l'Ynca, où ils proposerent plusieurs choses qui leur sembloient necessaires, sans toutesfois en resoudre aucune: Cependant, l'heure de manger estant venue, Ruminai qui auoit fait apprester vn magnifique festin, les conuia de se mettre à table. Apres le banquet, où ils furent traittez splendidement, il fut question de boire à la santé les vns des autres, d'un certain breuuage qu'ils appellent *sora*, autrement *uniapu*, dont les Rois Yncas auoient autresfois desfendu l'vsage, sur peine de la vie, pour estre si violent, qu'il priue de sentiment pour vn temps ceux qui en boient trop; & les ennyvre de telle sorte, qu'ils en restent comme immobiles, & comme morts: ce qui fait dire au Pere Acosta, Que les effets de cette liqueur, sont beaucoup plus prompts & plus dangereux que ceux du vin, comme il est indubitable; Ce qui ne s'entend pas neantmoins de leur breuuage ordinaire, d'autant qu'il en faudroit boire beaucoup pour en estre ennyvré. Comme dōc ce pernicious Tyran vid les Capitaines, & les Curacas tombez par terre, sans aucune sorte de sentiment, il leur coupa la gorge à tous; & entr'autres, au Mestre de Camp Chalcuchima; comme aussi aux fils, & aux filles d'Atahualpa, pour ne laisser personne qui pust le chocquer en ses mauuais desseins. Alors, afin que sa Rebellion donnast plus d'horreur, ayant escorché Culliscacha, il couurit vn Tambour de sa peau, y laissant la teste, pour donner à connoistre à qui elle estoit; & ainsi il descouurit à tous sa barbarie, en se rendant redoutable: car ce bon Disciple d'Atahualpa, ou plustost ce cruel Ministre de ses Tyrannies, ne buttoit qu'à se faire craindre par des exemples de terreur, & non pas à reduire ces peuples à l'obeissance par la douceur, maxime qu'ont accoustumé d'observer ceux qui se plaisent à estre pires que les Tyrans mesmes. Augustin de Carate,

descriit sommairement cette cruauté, qu'il ioint à la suiuite, & Pedro de Cieça, parlant de Chalcuchima, dit, que le Marquis Dom François Pizarre le fit brusler à Sacfahuana; où vous remarquerez que ce fut vn Capitaine du mesme nom que l'autre, & qui valoit moins que luy: car quant au Mestre de Camp Chalcuchima, il se trouua present à la mort d'Atahualpa, dont il transporta le Corps à Quito, comme nous auons dit, & mourut entre les mains des siens mesme.

*RUMINAUI FAIT ENTERRER EN VIE
tout ce qu'il trouue de Filles dans vn Couuent.*

CHAPITRE IV.

LA plus inhumaine de toutes les cruautés de Ruminai fut celle-cy, rapportée par deux Historiens Espagnols. Ils disent que ce Barbare arriué à Quito, & s'en estant allé voir ses femmes, *Responsses-vous*, leur dit-il; *car voicy venir les Espagnols, avec lesquels vous pourrez passer vostre temps*: dequoy quelques-unes se prirent à rire, sans y penser aucun mal, mais luy qui n'entendoit pas rallerie, coupa la gorge à ces Rieufes, & mit le feu à la garde robe où estoient les riches meubles d'Atahualpa. L'un de ces Historiens le dit ainsi, & l'autre raconte presque le mesme: Mais ce qui aduint veritablement, est que le Tyran s'en alla vn iour dans la Maison des Vierges, ou des Filles qu'ils appellent *Eleuës*, en intention de prendre pour luy celles qu'il trouueroit les plus à son gré, & qu'on auoit destinées pour estre femmes d'Atahualpa, comme si les aduoüant pour siennes, il se fut déclaré Roy, & eut pris possession du Royaume. S'entretenant donc avec elles sur les affaires passées, il leur dit entr'autres choses, quelles gens c'estoient que les Espagnols, encherissant tant qu'il pût sur leur valeur, & sur leurs beaux faits, pour monstrier par là qu'il ne faloit point luy imputer à blafme, que de si braues Soldats luy eussent fait prendre la fuitte. A quoy il adiousta, *Que c'estoient des hommes si extraordinaires, qu'ils auoient tout le visage barbu, & montoient sur certaines be'tes estranges, par eux appelées des Cheuaux, si vistes, & si robustes, que deux mille Indiens n'estoient pas capables de resister au moindre de ces Animaux, dont le seul*

galop leur donnoit si fort l'alarme, qu'ils en prenoient aussi-tost la fuite. Il leur raconta de plus, *Que ces nouveaux Hostes portoient en main des Tonnerres & des Foudres, dont ils tuoient les Indiens de trois cens pas, & qu'ils estoient habillez de fer, depuis la teste iusques aux pieds.* Il adjousta pour conclusion, *Que ce qu'il trouuoit de plus estrange en eux, estoit de leur voir porter entre les jambes de pesites Loges* * *en forme de Cabanes, où ils enfermoient leurs Parties genitales, par où il voulut dire des Brayettes, de l'inuention desquelles ie ne m'estonne pas moins que luy, & ne sçay pourquoy l'on en permet l'usage, que l'honnesteté ne peut souffrir ce me semble.*

* L'Espagnol le dit ainsi, s'accusant à la naïveté de l'Indien; Et voila pourquoy ie n'y ay rien voulu chan-ger, bien qu'au lieu de Loge & de Cabane, l'eusse pû dire proprement Estuy.

Les Filles oyant ce beau conte de Ruminavi se prirent toutes à rire, plustost pour se rendre complaisantes à son humeur, que pour autre chose: Luy cependant s'en mit si fort en colere; attribuant ces ris à des desirs peu honnestes, que d'un costé saisi de jalousie, & de l'autre de rage contre les Espagnols; *Ah! perfides,* dit-il, à ces Filles, *Effrontées, & Impudiques. si au seul recit que ie vous fais de ces nouueaux venus, vous estes, si resiouyes; dans quel transport ne serez-vous point, quand vous les verrez? mais assurez-vous que ie vous empeschera bien de les voir.* Cela dit, il commanda qu'on les menast toutes, & jeunes, & vieilles, au bord d'un Ruiffeau, qui passoit près de la Ville; Et comme si elles eussent esté coupables de quelque impudicité commise, il les fit cruellement punir du supplice en tel cas porté par leur Loy, qui étoit de les enterrer toutes viues: Et d'autant qu'aux deux costez de l'eau il y auoit plusieurs masses de Rocher, entassées par monceaux, il en fit esbouler vne partie sur elles, iusques à ce qu'à force de precipiter ces pierres d'en haut, elles en furent toutes couuertes, tellement que par ce genre de mort se rendit visible l'inhumanité du Tyran, & ce cruel acte fut encore plus abominable que le precedent: car apres auoir par trahison donné la mort à des hommes aguerris & robustes, qui ne la sentirent point, il enterra toutes en vie de pauvres Filles, de complexion delicate, qui demeuroient enseuelies sous des pierres qu'elles voyent plouuoir sur leurs testes, sans qu'il leur fut possible de s'en garentir. A cét euénement tragique se trouua present cét homme barbare, ou plustost ce chien enragé, imitant en cela ses semblables, le plus grand plaisir desquels est de voir eux-mesmes executer sur les Innocens les supplices qu'ils ont projettez contre eux, n'y ayant point de couleur plus agreable à leur veuë, que celle du

sang qu'ils font respendre. Impitoyables Tyrans, est-il possible que la Terre, & les autres Elemens vous souffrent en vie? Voila comme vne legeré faute, & vn ris accommodé à vn mauvais conte de celuy qui le faisoit, furent cause de la mort deplorable de ces Filles innocentes. Mais enfin ce Monstre de Nature, apres plusieurs autres meschancetez commises durant sa Reuolte, & quelques combats qu'il soustint contre Sebastien de Belalcazar, enuoyé pour chastier sa Rebellion, ainsi que nous dirons cy-apres; voyant qu'il ne pouuoit plus ny resister aux Espagnols, ny viure parmy les Indiens, pour les auoir inhumainement traitez, s'aduisa de faire retraite avec sa Famille, & quelques-uns de ses Domestiques, sur des Montagnes inhabitables, où il perit miserablement, comme c'est l'ordinaire de tous les Tyrans.

DE QUELQUES COMBATS ENTRE LES
Indiens, & les Espagnols.

CHAPITRE V.

LE Gouverneur Dom François Pigarre, & ses Compagnons, qui estoient plus de 350. Espagnols, y comprenant ceux d'Almagre, s'en alloient à Cozco, sans se mettre en peine de rien, comme gens qui se croyoient desia Maistres de tout le Peru, sans que personne pût l'empescher. Sur cette confiance, ils marchoient à la file, sans crainte des Ennemis, & se rafraichissoient de Ville en Ville, pour aller plus à leur aise, comme s'ils eussent marché dans leur pais propre. Augustin de Carate le rapporte ainsi, & adiouste à cela, *Qu'en ce voyage les Capitaines Indiens leur dresserent vne embuscade, dont ils ne se doutoient nullement; Car l'Inca Titu Autachi, voyant que son Frere Atahuallpa estoit prisonnier, & qu'il se parloit de le prendre à Rançon, s'en alla incontinant en diuers endroits du Royaume, pour y amasser tout ce qu'il pourroit auoir d'or, & d'argent pour le racheter: D'où il aduint qu'un peu apres, comme il retournoit à Cassamarca, avec vne prodigieuse quantité de ces Metaux, il apprit en chemin la mort de son Frere, & que les Espagnols s'en alloient en file, les vns apres les autres droit à la Ville de Cozco. Comme il en fut assuré, il mit à conuier*

Liv. 2.
Ch. 8.

Trefor qu'il transportoit, l'enace qu'il pût auoir de gens de Guerre; & suiuant les Espagnols à la piste, iusques à la Prouince de Huayllas, comme il les vid arriuez en la Ville de Tocto, il les chargea si vertement avec 6000. hommes de Guerre, qu'il en fit prisonniers huit des plus considerables, & entr'autres Sancho de Cuellar, qui en qualité de Greffier, auoit esrit toutes les Informations d'Atahualpa, & sa sentence de mort. Voila comme en parle Augustin de Carate, qui fait Auteur de cette action Titu Autachi; mais ie dis que ce fut Quizquiz, & qu'il prend assurément l'un pour l'autre.

Tandis que cela se passoit en la Prouince de Huayllas, il se donna vn autre Combat en chemin entre les Espagnols, & le Mestre de Camp Quizquiz, fameux Capitaine, dont nous auons parlé cy-deuant, & des principaux Ministres d'Atahualpa. Si tost qu'il apprist dans Cozco, qu'on auoit arresté son Roy prisonnier, il mit sur pied onze ou douze mille homes de Guerre, avec lesquels il prit sa marche droit à Cassamatca, pour voir si de gré, ou de force, il ne pourroit point faire sortir de prison son Prince; Mais la Fortune voulut qu'ayant rencontré les Espagnols en chemin, il leur donna bien de la peine dans vn Combat qu'il eut avec eux, dont les Historiens racontent confusément le succès au desauantage des Indiens. Pour mieux éclaircir cecy, il faut sçauoir que le Mestre de Camp Quizquiz, assuré par ses Coureurs, que les Espagnols venoient en file, & qu'ils n'estoient pas loing, donna d'abord dans leur gros; puis à la faueur d'une Montagne, dont ils se couuroient, il fit vn grand tour, pour enuolopper l'arriere-garde; comme en effet, il s'y en alla courageusement, & donna sur elle avecque tant de vigueur, qu'il blessa dangereusement quatre Espagnols, & laissa morts sur la place dix ou douze Indiens qui le seruoient. Cette nouvelle vint aussi tost aux oreilles du Gouverneur, qui menoit l'Avant-garde, si bien que par l'aduis de ses gens, il enuoya tout à mesme temps au secours de ses Compagnons deux Capitaines de Cavalerie, s'imaginant qu'à leur abord les Indiens s'enfuiraient, comme ils auoient fait à Cassamarca, en abandonnant laschement leur Roy. Ces Cavaliers arriuez près du lieu où estoit Quizquiz, furent receus de luy avec vn stratageme, dont le succez ne fut pas mauuais pour ses gens: car comme il les vid venir, sous pretexte de prendre la fuite, il fit retraitte avec les siens, du costé de la Montagne, où les cheuaux pouuoient aller

difficilement, ne laissant pas de l'entretenir, & de l'amuser par frequentes escarmouches. Ce leger Combat dura plus de trois heures, apres lesquelles aubruit que firēt les Indiens pour signal, à deux Compagnies de leurs gens, qu'ils eussent à sortir de l'embuscade où ils s'estoient mis par l'ordre de leur Capitaine, qui auoit ainsi partagé ses gens, afin que les Espagnols en ereussent le nombre beaucoup moindre qu'il n'estoit; Les Indiens sortirent incontinent, & donnerent avec vn grand courage: les Espagnols en firent de mesme; & il salut enfin, que le plus petit nombre cedast au plus grand. Il y demeura de morts sur la place 17. Espagnols, & n'en desplaise à vn Historien, qui n'en met que cinq, ou six. Outre ceux-cy, les vns y furent blesez, les autres faits prisonniers, & les autres s'eschapperent à toute bride. Soixante & dix Indiens y perdirent la vie, & les Prisonniers du costé des Espagnols, furent François de Chaues du nombre des Capitaines; Pedro Gonzalez, qui fut depuis vn des Seigneurs de Truxillo, Alonse d'Alarcon, Hernand de Haro, Alonso de Hojeda, qui à quelques années de là, tomba dans vne si profonde mélancolie, qu'il en perdit l'esprit, & mourut enfin à Truxillo, Christophle de Horosco, natif de Seuille, Iean Dias, Cauallier Portugais, & quelques autres moins considerables, dont i'ay oublié les noms. Le malheur voulut qu'Alonse d'Alarcon abbatu sous son cheual, eut la cuiſſe rompuë, sans que les Indiens, qui le penserent le mieux qu'ils pūrent, & avec luy les autres blesez, peussent empescher par leurs remedes; qu'il ne demeurast boiteux de cettē cheute. Alors le Mestre de Camp Quizquiz, comme Capitaine experimenté, sans attendre que le reste de l'Armée Espagnole arriuaſt, fit vne retraite iudicieuse; & se contentant de la victoire gagnée, prit le plus viste qu'il pūt la route de Cassamarca, pour auoir ſceu que Titu Autachi, Frere de son Roy, estoit en chemin; Il prit le sien par des sentiers destournez, & passa vne grande Riuiere, dont il brusla le Pont, qui estoit de bois, pour empescher que les Ennemis ne le pūssent ioindre: Et dautant qu'il fit rencontre del'Ynca Autachi, qui s'en alloit chercher les Espagnols, il demeura d'accord avec luy, qu'ils s'en allassent ensemble à Cassamarca, pour aduiser à ce qu'ils auroient à faire, & ils l'executerent ainsi.

LES INDIENS FONT MOVRIR CVELLAR,
& capitulent pour les autres Prisonniers.

CHAPITRE VI.

SI-TOST que l'Ynca Titu Autachi, & le Mestre de Camp Quizquiz, furent entrez dans Cassamarca, avecque les Espagnols leurs Prisonniers, eux-mesmes & leurs Indiens, firent vne exacte recherche de la mort d'Atahualpa leur Roy, par laquelle ils trouuerent que Cuellar auoit seruy de Greffier en ce procez, signifié la sentence de mort à l'Ynca, & assisté à l'exécution qui s'en estoit faite. Ils verifierent aussi, que François de Chaues, Hernand de Haro, & quelques autres qu'ils tenoient prisonniers, s'estoient porté favorablement pour l'Ynca Atahualpa, dont ils auoient procuré la liberté, iusques à se mettre au hazard de perdre leur vie, pour sauuer la sienne. Toutes ces choses bien considérées, l'Ynca Titu Autachi, le Mestre de Camp Quizquiz, & les autres Capitaines entrez en Conseil, conclurent entr'eux, Que le Greffier Cuellar, pour auoir eu l'effronterie de signifier à leur Ynca l'Arrest de sa Mort, & de s'y estre trouué présent, porteroit la peine de tous ceux qui l'auoient causée, & que les autres prisonniers Espagnols seroient pensez avec toute sorte de soins, en consideration de François de Chaues, qui auoit embrassé le Party de leur Ynca; & que lors qu'il se porteroit bien, on le renuoyeroit avec des presens, afin de donner à connoistre par là, que pour l'amour de ceux cy qui estoient honnestes gens, on pardonnoit à tous les autres. Ce qu'ils resolurent en leur Conseil fut executé le iour suiuant. Ils tirèrent Cuellar de prison, qui estoit la mesme où l'on auoit mis Atahualpa, puis le menerent à la Place, vn Crieur marchant deuant luy, qui disoit tout haut ces paroles. *C'est le vouloir de Pachacamac qu'on pendc cét Auca, & tous les autres qui ont sué nostre Prince.* Où vous remarquerez, comme j'ay dit ailleurs, que par le mot *Auca* s'entendent les Tyrans, les Parjures, les Traistres, & tous ces autres qui font des actions tyranniques. Or ce qu'ils firent marcher deuant vn Crieur public, ne fut pas pour

aucune Coustume qu'ils eussent d'en vser ainsi; mais seulement pour faire sçauoir que les Espagnols en auoient vſé de meſme contre leur Roy. Cela fait, ils eſtranglerent Cuellar, au meſme pieu, où les Ennemis de leur Ynca l'auoient eſtranglé, & d'où ils n'auoient oſé approcher depuis, tenant pour maudit cét instrument de ſon dernier ſupplice: En executant Cuellar ils luy dirent ces patoles, *Ainsi mourront tous les Compagnons*; & apres l'auoir laiſſé mort, & attaché au pieu tout ce iour-là, enuiron la nuit ils firent vne foſſe où ils l'enſeuellirent, imitant en cela tout ce que les Espagnols auoient fait en la mort, & à l'Enterrément d'Arahualpa.

Mais pour reuenir à François de Chaues, & à ſes Compagnons, ils les traiterent le mieux qu'ils purent; puis quand ils les virent bien gueris, & en eſtat de ſ'en pouuoir retourner, ils leur firent de grands preſens d'or, d'argent, & d'Eſmeraudes fines, leur donnant des Indiens pour les accompagner, & les porter ſur leurs eſpaules: Par meſme moyen ils capitulerent avec eux de tous les Espagnols, & propoſerent pluſieurs Articles de Paix, & d'Alliance, les principaux deſquels furent ceux-cy: Que tous Outrages, & Actes d'hoſtilité aduenus iuſques alors, demeureroient nuls, & ſ'oublieroient de part & d'autre: Que les Indiens, & les Espagnols viuroient en Paix à l'aduenir, ſans ſe faire aucunes violences: que les Espagnols ne conteſteroient point la Couronne de l'Empire à Manco Ynca, qui en eſtoit Heritier legitime: Qu'en tous leurs Traitez, & Negociations, les Espagnols, & les Indiens viuroient en bons Amis, & demeureroient allies enſemble, pour ſ'entr'aider au beſoin: Que les Espagnols relascheroient les Indiens, qu'ils tenoient dans les fers, où ils ne les mettroient plus deſormais, mais ſe ſeruiroient d'eux librement: Que les Loix des Yncas deſſuncts, faites pour le bien de leurs ſubjets, portant defences qu'ils n'eussent point à troubler la Religion Chreſtienne, ſeroient inuiolablement gardées: Et que le Gouverneur Dom-François Piçarre enuoyeroit le pluſtoſt qu'il pourroit ces Capitulations en Eſpagne, pour y eſtre ratiſſées par ſa Maieſté Imperiale. Toutes leſquelles choſes les Indiens firent entendre à François de Chaues & à ſes Compagnons, partie par ſignes, partie de viuë voix, par l'entremiſe des Indiens, valets des Espagnols, qu'ils auoient pris avec eux, leſquels Titu Autachi, auant que de parler à leurs Maiſtres, in-

struisit mort à mort sur tout ce qu'ils auoient à leur dire, afin qu'ils le pussent mieux expliquer.

Cependant les Prisonniers Espagnols, voyant que la generosité de Titu Autachi, & de tous ses gens estoit si grande en leur endroit, que non contents de les regaler dans la Prison, de les faire soigneusement penser, & de leur donner avec la liberté, de l'or, de l'argent, de la pierrerie, & des hommes pour les accompagner; au lieu que par le droit de la Guerre, & pour auoir fait mourir leur Roy, ils les pouuoient tous tailler en pieces; en furent fort estonnez, & encore plus de ce qu'ils leur demandoient des choses si iustes, & des conditions si aduantageuses pour eux. Ils en demurerent tous confus, & comme gens qui s'estoient veu hors d'esperance de viure plus long-temps; touchez d'un secret remords de s'estre si mal acquittez de leur deuoir à faire prescher le saint Euangile, & instruire les Indiens en la Doctrine Chrestienne, ils se resolurent d'amender leur faute à l'aduenir. Pour cét effet voyant les Indiens si paisibles, & si doux en leur endroit, ils se hazarderent de leur dire, *Que puis qu'ils leur demandoient des choses qui regardoient leurs interests, ils leur en vouloient demander de misne deux autres, & non pas d'auantage, en faueur des Espagnols.* Les Indiens leur dirent, *Qu'ils les proposassent, & qu'on leur accorderoit tres-volontiers tout ce qu'ils desiroient.* A quoy François de Chaues repartit, *Qu'il prioit tres-instamment, au nom du Gouverneur & des Espagnols, les Incas, leurs Capitaines, & autres Grands du Pays, de vouloir receuoir la Loy des Chrestiens, & permettre qu'elle se preschât par tout le Peru: Qu'avec cela, puis que les Espagnols estoient Estrangers, & qu'ils n'auoient, ny Villes, ny Terres, du reuenu desquelles ils pussent s'entretenir, qu'ils leur donnassent des viures, comme aux autres habitans; & pareillement des Indiens, & des Indiennes, qui les seruissent, non comme Esclaves, mais comme leurs Domestiques.* A ces deux choses ils respondirent, *Que pour ce qui regardoit la Loy des Chrestiens, tant s'en faisoit qu'ils la retiussent, qu'au contraire ils les supplioient bien fort, qu'aussi tost qu'ils seroient arrivez, où estoit leur General, ils leur enuoyassent des Predicateurs, & des Prestres, qui prissent la peine de les instruire.* Que c'estoit de toutes les choses celle qu'ils souhaitoient le plus; *Qu'assurément ils leur en tesmoigneroient la recognoissance, & les seruiroient comme des Dieux: Qu'ils se uoient bien que leur Loy valoit plus que celle de leur Pays; Que leur Inca Huayna Capac les en auoit asseurez,*

empen auant que mourir; Qu'ils n'en voulient point d'autre raison que le commandement de leur Roy, qui leur auoit aussi enjoinct d'obeïr à des gens qui aborderoient bien-tost les terres de son Empire, où ils auroient toute sorte d'auantages sur eux: Que cette al'solue volonté de leur Prince les obligeroit à seruir les Espagnols, aux despens mesme de leur vie, comme auoit fait Atahualpa: Et partant qu'ils demandassent tout ce qu'ils voudroient, avec assurance qu'on ne leur refuseroit iamais rien.

Comme ils furent demeurez d'accord de ces Articles, que les Historiens adioustent à leurs Nœuds, qui leur tenoient lieu d'Annales, ils dirent aux Espagnols, qu'ils s'en pouuoient retourner, s'ils le trouuoient bon. Et alors ces Prisonniers desliurez, priront congé de leurs Hostes, chargez de presens, & accompagnez d'une bonne Escorte. François de Chaues, & ses Compagnons s'entretenoient le long du chemin de la generosité de leurs Vainqueurs, qu'ils ne pouuoient assez hautement louer; & comme gens qui sçauoient considerer les choses, ils aduoüoient franchement, que leurs paroles, & leurs effets n'estoient point œures de Barbares, ny d'Idolâtres, mais vrayes inspirations de Dieu; qui touchoit secrettement les Ames de ces Gentils, afin qu'avec amour, & douceur, ils receussent son saint Euangile: surquoy ils concludoient, Qu'ils prioient instamment le Gouverneur, & les autres Espagnols, de le leur faire prescher, sans discontinuation: comme en effet ils le desiroient tous ardamment, & le Gouverneur plus que pas vn d'eux, sans qu'il fut besoin de les en solliciter dauantage.

Mais le commun Ennemy du Genre-humain, s'opposoit de toutes ses forces, à la Conuersion de ces Peuples des Indes; Et bien qu'il ne pût l'empescher entierement, si est-ce que durant plusieurs années, il y apporta diuers obstacles, par le stratageme de ses Ministres, les sept Pechez Mortels. Car en vn temps si plein de libertinage, chacun de ces Vices pouuoit tout ce qu'il vouloit, comme il parust bien par les Guerres sanglantes qu'il y eut depuis entre les Indiens & les Espagnols, pour s'opposer aux Capitulations susdites. Alors la Superbe ne pouuant souffrir qu'on restituast le Royaume à celuy qui en estoit Heritier, causa la reuolte generale des Indiens: Celle des Pigarres, & des Almagres vint en suite, suscitée par l'Ambition, & par l'Enuie, entre l'un & l'autre, d'auoir la meilleure part au Gouvernement;

ce qui dura iufques à leur mort, qui fut telle, qu'Almagre eut la gorge coupée par vn Frere de Pizarre, & Pizarre fut tué par vn Fils d'Almagre. A ces Guerres fuccederent celles du bon Gouverneur Vaca de Castro, que i'ay connu à Madrid l'an 1562. & de Dom Diego d'Almagre le leune, que l'Orgueil, & la Difcorde allumerent, ne pouuant souffrir que ce Cauallier obeït à son Roy legitime; tellement que toute fa valeur ne pult empêcher que la trahifon de fes gens ne leliurast pour estre immolé comme vne Vi&time. Apres fuiurent les diffentions que l'Auarice, & la Tyrannie semerent, entre Gonçale Pizarre, & le Vice-Roy Blasco Nuñez Vela: A quoy fuccederent l'vn apres l'autre, les foulleuemens de Dom Sebastien de Castille, & de François Hernandez Giton, fuscitez par la Gourmandife, & par la Luxure. Les Demons furent les sanglans Ministres de toutes ces Guerres, dont nous parlerons cy-apres, qui durerent 25. ans fuccessiuement. Ce furent donc elles seules, qui empêcherent qu'on ne preschast l'Euangile aux Indiens, pource qu'il n'y auoit point d'apparce que cela se pult parmy le feu, le sang, & le fer: car il est certain, que les Indiens ne se ressenoient pas moins de cette Guerre que les Espagnols, & qu'ils y auoient mefme du pire, pource qu'elle se faisoit à leurs despens par les deux Partis, qui ne se contentans pas de prendre chez eux de quoy viure, les employoient encore à transporter l'Attirail des Armées, & à faire quantité de semblables Couruées.

LES ESPAGNOLS ENTRENT DANS
Cozco, où il trouuent de grands Tresors.

CHAPITRE VII.

SI-TOST que l'Ynca Titu Autachi eut renuoyé François de Chaues, & ses Compagnons, avec les Capitulations susdites, il dépescha vn Courier exprés à son Frere Manco Ynca, pour luy en donner les Articles, & l'aduertir de ce qui se passoit, afin de se tenir prest, quand il en faudroit traitter plus particulièrement avecque les Espagnols. Cependant, le Mestre de Camp Quizquiz luy enuoya dire qu'il ne licenciast point ses

troupes, mais qu'il taschast plustost de les augmenter, iusques à ce qu'on fut demeuré d'accord avecque les Espagnols, de quelle façon l'on deuoit viure avecceux, l'aduertissant de s'en donner garde, de peur qu'il ne le trahissent de la mesme sorte qu'ils auoient traité son Frere Atahuallpa.

Ces aduis, & autres semblables, furent enuoyez à Manco Ynca par ses Indiens, qui s'offrirent à luy obeïr, & à le reconnoistre pour leur souuerain Seigneur, & de tout l'Empire, bien qu'auparauant ils luy fussent ennemis, & qu'ils desirassent mesme d'attenter à sa vie, afin qu'il ne seruit plus d'obstacle à l'vsurpation d'Atahuallpa. Mais comme ils virent ce Tyran mort, & ses pretensions reduites à neant; par vn Conseil de Guerre qu'ils tintent, ils resolurent de rendre l'Empire à celuy qui en estoit Heritier legitime; ce qu'ils aduiserent de faire pour le plus seur, afin que par ce moyen ils peussent tous ensemble resister aux Espagnols, & les chasser du Royaume, ou bien se resoudre de viure avec eux, pour en estre plus estimez, & plus craints, que s'il estoient diuisez par factions, & partialitez.

Le Prince Manco Ynca ayant receu les aduis de son Frere, & du Mestre de Camp Quizquiz, s'en réjouïst grandement, sur tout quand il sceut que ceux qui luy auoient esté si contraires, & si ennemis, se declaroient maintenant pour luy, afin de le restablir dans son Empire; ce qui luy fit esperer que les Espagnols en feroient de mesme, puis qu'ils se disoient si iustes, & si pleins d'integrité: Sur cette confiance, il se prepara pour les aller trouuer, & leur demander par voye de Paix, & d'amitié, qu'ils ne le troublassent point dans la possession que la Raison, & la Justice vouloient qu'il prit de son Empire, suiuant les Capitulations que son Frere Autachi luy auoit enuoyées. Nous le laisserons dans ses preparatifs, iusques à ce que le temps, & le lieu nous rappellent à luy, & reuiendrons au Gouverneur Dom François Picarte. Apres l'eschec qui fut donné à ses gens par Titu Autachi, il les rallia tous, & se tint sur ses gardes plus qu'il n'auoit iamais fait; La rencontre qu'il fit, & les Combats qu'il donna, furent de peu d'importance. Comme luy & ses gens furent près de la Ville de Cozco, les Habitans en fortirent tous en armes, pour empescher qu'il ne passast outre; & ne pouuant luy resister, ils s'en retournerent dans leurs Maisons, d'où ils tirerent leurs Femmes, leurs Enfans, & ce qu'ils peurent plus commodement

emporter de leurs biens, avec lesquels ils s'en allerent dans les Montagnes, espouventez de ce qui s'estoit passé dans Cassamarca. Cette Ville se resolut à la resistance, pource qu'ayant esté sujette autres fois au Gouvernement d'Atahuallpa, quoy qu'il l'eut tyrannisée par la prison de Huascar, ils vouloient neantmoins vanger sa mort, s'il estoit possible. Gomare dit à ce propos ce qui suit. Le iour d'apres, les Espagnols entrerent dans Cozco, sans que personne leur resistat : Et alors ils commencerent, les uns à deslacher du Temple ce qu'il y auoit d'or, & d'argent, les autres à s'irer des Tombeaux les Vases, & les Joyaux qu'ils y trouuerent. Ils pillerent encore les principales Maisons, & la Forteresse de la Ville, où il y auoit beaucoup d'or, & d'argent appartenant autres fois à Guayna Capac. En un mot, de cette Ville, & des enuirois ils eurent plus de ces riches Metaux qu'ils n'en auoient eu à Caxamalca, de la Rançon d'Atahuallpa; il est vray que comme ils estoient plusieurs, chacun ne fut pas si bien partagé; ce qui ne fit pas neantmoins tant de bruit qu'alors, estant aduenu pour la seconde fois, & sans emprisonnement du Roy. Il y eut tel Espagnol qui trouua dans vn Tombeau la valeur de 50000. escus, quelques-uns plus, & les autres moins; La custume des plus riches estant de se faire enseuelir avec leurs Richesses, mesme à la campagne, & près de quelque Idole. De plus, comme ils oyoiēt parler tous les iours du fameux Tresor de Huayna Capac, & des autres anciens Rois de Cozco, qui leur faisoit naistre à tout moment de nouueaux desirs d'y mettre la main, ils le chercherent de toutes parts, sans que neantmoins ils le sceussent trouuer ny alors ny depuis. Mais dans l'ardeur de leur Avarice insupportable, ce qu'ils auoient desia pris ne les contentant pas, ils bourleuoient tout, pour en auoir dauantage, aux despens de la peine des Pauvres Indiens, qu'ils traittoient cruellement, pour les forcer à leur monstres des Tombeaux, où il pussent trouuer de quoy s'enrichir. J'ay tiré tout cecy de Gomare, & suis d'aduis d'y adiouter le tesmoignage d'Augustin de Carate, qui parlant de certains Espagnols poursuuians vn Capitaine Indien; Comme ils ne le pürent ioindre, dit-il, ils retournerent à Cozco, où ils firent vn butin d'or, & d'argent, aussi grand que celui de Cassamarca, qui fut partagé par le Gouverneur entre ses Soldats, &c. Par ces auctoritez, sans qu'il soit besoin d'en alleguer d'autres, ie pense auoir assez bien prouué ce que j'ay dit cy-deuant, qui est, qu'il fut beaucoup moins trouué de Richesses à Cozco, qu'en la Ville de Cassamarca; ce que ie ne dis qu'apres les Auteurs susnommez, estant

Ch. 124.

Liu. 2.

Ch. 8.

bien aise de les scier, tant pour n'imiter la Corneille, qui se para des plumes d'autrui, que pour me rendre moins suspect, en produisant des tesmoings Espagnols, pour appuyer plus fortement ce que ie mets en auant.

Pour reuenir à ce que dit Gomare des tresors que les Espagnols trouuerent enterrez à Cozco ; il est certain que durant sept ou huiët ans, apres qu'ils furent paisibles possesseurs de cét Empire là, ils descouurirët plusieurs monceaux d'or, & d'argent, que les Indiens auoient cachez dans la mesme Ville, & aux environs. Je rapporteray à ce propos, qu'en vne Maison Royale, appelée *Amurucancha*, qui estoit escheuë en partage à Anthoine Altamirano, vn Cavalier poussant vn iour son cheual à toute bride dans vn Parc, le cheual s'engagea le pied dans vn trou qu'il fit à terre ; & comme on voulut voir d'où cela procedoit, on trouua que c'estoit le goulet d'un Vase d'or extrêmement large par le haut, & du poids d'environ 25. liures les, Indiens en faisant de grands, & de moindres en façon de Coquemarts, pour y mettre cuire leur breuuage ; & outre ce Vase, ils en trouuerent encore plusieurs autres, valant plus de 8000. Ducats. On raconte aussi qu'en la Maison des Vierges esleuës, dans l'Appartement de Pedro de Barco, qui fut depuis à vn Appoticaire, qu'on nommoit Hernand de Segouie, fut trouué par luy-mesme, en creusant bien auant dans la terre, vn Tresor de 72000. Ducats, avec lesquels, & plus d'autres 2000. qu'il auoit gaignez à faire sa profession ; il vint en Espagne, & ie le vis depuis à Seuille, où il mourut vn peu apres, de regret qu'il eut d'auoir quitté la Ville de Cozco, comme il aduint aussi à quelques autres : d'où l'on peut iuger du grand nombre des tresors qui se descouurirent deuant, & apres la prise de cette Ville-là : ce qui fait eroire qu'il y en a bien d'autres encore plus grands, que les Indiens cachèrent vray-semblablement en diuers lieux de leurs Pais, lors que les Espagnols y entrerent.

VN INDIEN DEMANDE A SE FAIRE
Chrestien, & se conuertit avec grand zele.

CHAPITRE VIII.

LE premier iour que les Chrestiens entrerent dans la Ville Imperiale de Cozco, se passa vne chose merueilleuse entre vn Espagnol, & vn Indien, qui fut, qu'un Gentilhomme natif de Truxillo, appellé Alonse Ruiz, s'estant mis à piller comme les autres, entra fortuitement dans vne Maison, le Maistre de laquelle le vint receuoir courtoisement, & luy dit ces mots en sa langue; *Tu sois le bien venu, mon Hoste; Il y a plusieurs iours que ie t'attends, le Pachacamac m'ayant predit en songe, & par diuers Augures, que ie ne mourrois point, qu'il ne vint au parauantence Pais vn nouveau Peuple, qui m'enseignerois la Loy veritable qu'il faut tenir: Et dautant que i'ay eu toute ma vie en mon Ame vn desir ardent de la sçauoir, i'espere que tu me l'apprendras.* Bien que l'Espagnol ne pust conceuoir d'abord ce que l'Indien luy dit, il en comprit neantmoins les premieres paroles, pour auoir desia quelque connoissance de celles qui se disoient d'ordinaire; deux desquelles en Indien luy firent entendre ces cinq; *Tu sois le bien venu.* Iugeant donc par elles, & par le bon accueil que luy faisoit l'Indien, qu'il desiroit quelque chose de luy; Pour s'en mieux esclaireir, il s'aduifa de ne prendre point d'autre Logis que celui-là, le Maistre duquel luy fit la meilleure chere qu'il pust. Deux ou trois iours apres, l'esmeute du sac de la Ville s'estant vn peu calmée, tant du costé des Fideles que des Infideles; Alonse Ruiz s'en alla chercher le Truchement Philipille, & le mena parler à son Hoste. Il se confirma dans les mesmes choses qu'il luy auoit dites au commencement, & luy fit plusieurs responses, touchant sa façon de viure, par lesquelles il iugea que c'estoit vn homme paisible, viuant bien moralement, sans faire tort à personne, & qui desiroit passionnément d'apprendre la veritable Loy des hommes; Pource, dit-il, que là sienne ne luy donnoit pas la satisfaction qu'il demandoit. L'Espagnol bien aise de cette confession, tascha de luy enseigner le mieux qu'il pust les Principes de nostre sainte Foy Catholique.

& de croire vn vray Dieu en trois Personnes, Pere, Fils, & Saint Esprit, pource comme i'ay dit cy-deuant, que la langue Indienne n'auoit pas des mots pour exprimer tout cecy : si bien que ne pouuant se faire entendre par le mot de *croire*, il luy disoit, qu'il tint pour resoluës en son Ame les mesmes choses que les Chrestiens tenoient pour indubitables, à l'exemple de la sainte Eglise, Catholique, Apostolique, Romaine. Apres luy auoir souuent repeté cecy, à quoy l'Indien respondoit tousiours, oïly; l'Espagnol fut d'auis de faire venir vn Prestre, qui bien asseuré de tous ces succez, & du desir que l'Indien tesmoignoït auoir d'estre du nombre des Fidelles, le baptisa sans autre delay, au grand contentement de tous trois, à sçauoir de luy-mesme, d'Alonso Ruiz, qui fut le Parrain, & de son Filleul nouuellement conuert, qui mourut à quelques iours de là, extrêmement satisfait d'estre vray Chrestien. Le mesme Alonso s'en retourna depuis en Espagne, riche d'environ 60000. Ducats, du gain qu'il auoit fait, tant à Cassamarca, & à Cozeo, qu'en diuers autres endroits, & en diuerses façons. Mais comme bon Chrestien qu'il estoit, touché d'un secret remords qu'il eut que ces Richesses ne fussent pas bien acquises, s'en estant allé trouuer l'Empereur. *Sacrée Majesté*, luy dit-il, *J'ay l'honneur d'estre des Conquerans du Peru, d'où i'ay apporté en Espagne 60000. Ducats, qui ne sont que me gesner la Conscience, pource que ie ne croy pas les auoir gagez équitablement. Ne sçachant donc à qui en faire restitution qu'à V. M. qui est Seigneur de l'Empire d'où ils viennent, ie suis prest à les luy remettre entre les mains; Que s'il luy plaist me faire quelque gratification, ie la receuray comme de la main de mon souverain Seigneur, qui me peut donner ce qu'il luy plaira, sinon, ie ne m'en prendray qu'à moy-mesme qui en suis indigne.* L'Empereur admit la restitution; & pour recompenser vn acte si Chrestien, comme estoit celuy d'Alonso Ruiz, il luy fit don de quatre cens mille Maraue-dis de rente annuelle à perpetuité, & d'un petit Village appelé Marta, proche de la Ville de Truxillo. Ce bien est auïourd'huy possédé par vn petit fils d'Alonso Ruiz; & ainsi ce que rendit ce Cavalier pour l'auoir vñrpé, luy fut doublement vtile; car outre que sa Conscience en fut deschargée; par le Fonds, & la Rente qui luy en reuint, il se trouua beaucoup plus de bien qu'il n'en eut pû auoir avec son argent; Et ce que i'y voy de plus remarquable est qu'il passa de luy à ses Descendans: tellement qu'au

lieu que les Départemens des Indes n'estoient en ce temps-là que pour deux vies, qui sont aujourd'huy presque toutes acheuées, le fonds susdit sera pour tousiours : bien au contraire des Richesses acquises par nos Conquerans, la jouissance desquelles, comme il s'est remarqué, tant aux Indes qu'en Espagne, n'est jamais venuë iusques au troisieme heritier. Reprenons maintenant le fil de nostre Histoire.

DOM DIEGO D'ALMAGRE, AVEC DOM
*Pedro d'Aluarado, & Belalcaçar, s'en vont
chercher Ruminani pour le chastier.*

CHAPITRE IX.

DOM François Pigarre, & Dom Diego d'Almagre estoient apres à s'emparer des riches Tresors, qui au rapport de Gomare, estoient à Cozco, & aux enuitons, quand ils apprirent que Dom Pedro d'Aluarado s'en venoit au Peru, pour y estre Gouverneur de tout le Pais qu'il y pourroit conquerir ; & que pour ce mesme effet il menoit avecque luy 500. hommes de Guerre, la plus part de noble naissance, & qui se pouuoient nommer l'Esclite des Caualliers d'Espagne. Leur équipage estoit leste, & ils ne manquoient pour cette expedition, ny d'Armes, ny de cheuaux, ny de munitions de Guerre. Au bruit de sa venue les Espagnols qui estoient dans Cozco, en furent tous en alarme, s'imaginant desia qu'on vint reprendre sur eux ce qu'ils auoient pris sur autrui, n'y ayât point de douceur au monde qui ne soit meslée de quelque amertume. Sur cette apprehension le Gouverneur fut d'aduis que son Compagnon Dom Diego d'Almagre, avecque cent Espagnols, s'en allast remedier aux inconueniens qui pouuoient arriuer ; qu'il deffendit le Pais de telle sorte, que Dom Pedro d'Aluarado n'eut pas moyen d'y prendre terre, & qu'en cas qu'il ne pust l'empescher, il acheptast tout son Equipage, avecque le plus de precaution, & d'adresse qu'il y pourroit employer. Dom Diego tascha d'executer cét ordre-là, dont nous desduirons l'euenemēt cy-apres, la necessité de l'Histoire nous obligeant de rapporter quelques grands suc-

cez qui arriuerent en m^{me} temps. Il faut donc sçauoir, qu'un peu deuant que Dom Diego d'Almagre fut party, François de Chaues, & ses Compagnons venus de Cozco, rendirent conte au Gouverneur, & aux autres Espagnols, des hautes generositez dont Titu Autachi, & tous les Capitaines auoient vsé en leur endroit, ensemble du bon traitement, & des presens mesme qu'ils leur auoient faits, iusques à leur donner des gens pour les accompagner; & pareillement des Capitulations qui s'estoient accordées entre les Indiens, & les Espagnols: A quoy ils adiousterent ensin l'exécution que les Indiens auoient faite par Iustice, à cry public, & par les mains du Bourreau, du Greffier Cuellar, pour auoir prononcé l'Arrêt de Mort au Roy Atahualpa.

Le Gouverneur, & tous ses gens furent extrêmement aises de voir de retour François de Chaues, & ses Compagnons, qu'ils auoient tenus pour morts, & s'estonnerent fort que les Indiens les eussent si bien traittez comme ils dirent. Ils estimerent aussi digne de remarque la mort de Cuellar, sur qui seulement ils s'estoient vangez, en pouuant faire de mesme de tous ceux qu'ils tenoient prisonniers; Mais ce qui leur donna de l'admiration par dessus toute autre chose, fut d'apprendre par les Articles passez, avec combien de zele, & d'ardeur ils eberchoient à s'insinuer dans l'Amitié des Espagnols, & à se faire instruire dans la Doctrine Chrestienne; ce qui fut cause qu'ils resolurent entr'eux d'accomplir ponctuellement les Capitulations accordées. Cela ne se pût toutesfois, à cause des troubles qu'apporta la venuë de Dom Pedro d'Aluorado, qui ne permirent pas qu'il se parlât encore de Religion, & de Paix, mais seulement de Guerre, & de Cruautez, pour la ruïne entiere des Indiens, & des Espagnols, comme il se verra par la suite de l'Histoire.

Enuiron ce mesme temps l'on fut aduertty au vray des tyrannies, & des massacres qu'auoit faits, & que faisoit tous les iours à Quitu le Barbare Ruminai, qui ne cessoit de leuer des gens, pour aller contre les Espagnols. Le Gouverneur le voulant punir, & mettre remede aux accidens que la Reuolte de ce Tyran pouuoit causer, enuoya le Capitaine Sebastien de Belalcazar, avec vne Esclite de gens de cheual, & de pied, tous bien armez, avec ordre exprez de secourir Dom Diego d'Almagre, en cas qu'il en eut besoin. Ils s'y en allerent avec beaucoup de soing,

& de diligence, de peur qu'il ne leur arriuaſt de meſme qu'à François de Chaues, & à ſes Compagnons. Le long des chemins ils rencontrèrent des Capitaines d'Atahualpa, qui s'eſtoient retranchez à la faueur de quelques Rochers, & d'autres ſemblables lieux, naturellement fortifiez, ne ſe trouuant pas aſſez de gens pour attendre l'Ennemy en raſé campagne. Ces Capitaines, qui eſtoient des moins conſiderables, ne ſceurent pas pluſtoſt l'Emprifonnement de leur Roy, que ſans aucun ordre del Ynca, ils leuerent confuſément des Soldats, cù ils en trouuerent, afin de ſ'en ſeruir au beſoing. Or pource qu'ils ſceurent depuis la Mort d'Atahualpa, ils ne trouuerent pas à propos de les licencier; mais ils les tinrent près d'eux, afin que ſe quelque parent de leur Roy les mandoit, pour en vanger la Mort, ils faſſent tous preſts; Et voila pourquoy ces Capitaines eſtoient maintenant eſpendus qui çà, qui là par le Royaume, comme gens qui n'auoient point de Chef qui les menaſt: Que ſ'ils euſſent eu l'eſprit de ſeioindre enſemble, il eſt indubitable qu'ils auroient fait beaucoup de mal aux Eſpagnols. ſur tout dans les paſſages difficiles, & dangereux. Sebaſtien de Belaſcaſa ayant rencontré ces Capitaines, en vint aux mains avec eux; mais ce Combat ne fut pas de durée, d'autant que les Ennemis n'ayant pas de quoy luy reſiſter, firent retraite auſſi-toſt. Vn ſeul d'entr'eux, qu'on appelloit *Cupuy Toupanguy*, comme qui diroit *Diable Toupanguy*, combattit conformément à ſon nom; car il tua cinq Eſpagnols, en bleſſa 14. & les eut tous taillez en pieces, ſ'il s'en fut preſenté d'auantage. François Lopez de Gomare, Chapellain de ſa Maieſté Catholique, eſcriuant cette ren-
Ch. 128.
 contre, dit, Que ce Capitaine ſe nommoit *Zupo Sopaquy*, ou ſe-
Liu. 2.
 lon Auguſtin de Carate *Sapa Sopaquy*, ce qui a plus de reſſem-
 blance au nom qu'il auoit. Pour mieux l'expliquer, il faut ſça-
 uoir que ces deux mots, *Cumac Toupanguy*, ſignifient le *Bel Tou-
 panqui*, d'autant que cét Indien eſtoit en ſa jeunèſſe, fort beau
 de viſage, & bien fait de corps, tellement qu'ils y adiouſterent
 l'Epirhete de *Beau*, qui eſt ce que ſignifie le participe *Cumac*,
 comme nous l'auons monſtré, parlant de la Poëſie des Yncas.

Il eſtoit Baſtard du Sang Royal, & ſa Mere Réyne de *Quitu*: En ſes premieres années il fut eſleué avec Atahualpa, qui le voyant courageux, & adroit aux Armes, le fit depuis Capitaine de ſes Gardes. Ce Barbare apperceuant que ſon Roy, apres

auoit vaincu, & pris son frere Huascar Ynca, inuenoit à tout moment plusieurs, & diuerses cruautéz; pour encherir par dessus tous ceux qui les exécutoient, en inuenta quantité d'autres si horribles, qu'il n'estoit pas possible qu'elles tombassent dans l'imagination de son Maistre, ny dans celle de ses sanglans Ministres: ce qu'il faisoit principalement, afin de se bien mettre dans son esprit, en se rendant complaisant à son humeur, comme font aujourd'huy la pluspart des Domestiques des Seigneurs, & des Princes, sans auoir ny crainte de Dieu, ny honte du Mōde: D'où il s'enfuiuit que les autres Capitaines, & les gens d'Atahualpa, trouuant les actions de son Ministre si conformes à celles du Diable, luy changerent son furnom; & au lieu de *Cumac*, l'appellerent *Cupay*, qui signifie *Demon*. Cét Indien desesperé ayant résisté à Sebastien de Belalcaçar, & fait contre luy du pire qu'il pût, s'aduifa finalement de s'enfuir en vn lieu, où il ne pût estre pris, ny des Espagnols, ny des Indiens, dont les vns le haïssoient pour ses meschantes actions, comme il estoit redouté des autres pour ses Exploits aguerris. On sceut depuis, que ne pouuant plus viure parmy les Indiens, pour ses diableries passées, ny se fier aux Estrangers, il s'estoit fait vn lieu de retraite sur les hautes Montagnes des *Antis*, pour y demeurer parmy les Tygres, & les Serpents, à l'imitation de quelques autres Capitaines ses Compagnons.

Cependant Sebastien de Belalcaçar passa plus auant, avecque dessein de tenir en bride, & de chastier les Cruautéz de Ruminai. Ce Tyran se presenta pour luy résister; & ainsi, comme nous auons dit ailleurs, ils eurent ensemble quelques Combats, peu dommageables aux Espagnols, pour estre en petit nombre, & fort mal adroits aux Armes. Ord'autant que ce Mestre de Camp, auoit avec vne cruauté sans exemple mis à mort le Capitaine, & ses Compagnons, comme aussi le Frere, & le Fils de son Roy, & enterré toutes viues, sans cause, ny sans raison, les Vierges Esleuës, il fut tellement hay des Indiens, qu'avec toute la peine qu'il prit de leuer des gens, sous pretexte que c'estoit pour vanger la Mort d'Atahualpa, il ne pût auoir personne; Et ainsi n'ayant pas des forces à suffisance, pour résister à Belalcaçar, il se retira dans les Montagnes, desesperé de sa vie; ce qui fut le mesme expedient dont quelques Espagnols se seruirent contre leurs Ennemis, comme nous verrons plus particulièrement cy-apres.

ESPERANCE, ET CRAINTE D'ALMAGRE:
fuite de son Truchement, & Paix avec Alvarado.

CHAPITRE X.

LORS que Dom Diego d'Almagre s'en alloit chercher Dom Pedro d'Alvarado, il fit la mesme rencontre que Belalcaçar auoit faite des Capiraines d'Atahualpa; mais le Combat qu'ils eurent ensemble ne fust pas grand, & ne vaut pas la peine qu'on en parle. Il poursuiuit donc sa route; & pour ne manquer pas Alvarado, il s'enquit à toute heure par le chemin du lieu où il pouuoit estre, bien asseuré qu'il auoit fait sa descente, & mesme qu'il estoit assez auant dans le País.

Sebastien de Belalcaçar, qui auoit ordre de seconrir Dom Diego, apres que Ruminai, & ses Capitaines s'en furent fuïs de Quitu, s'en alla chercher de toutes parts Almagre, le long dela Coste, Comme ils se furent ioincts ensemble, ils s'occuperent tous deux à mettre en desroute quelques troupes d'Indiens, espandus par ces Prouinces-là; ce qu'il s'aduiferent de faire, pource qu'ils n'osoient point aller chercher Dom Pedro d'Alvarado, pour estre bien asseurez qu'il menoit avec luy plusieurs bons soldats, & bien aguerris; ce qui leur eut fait tres-volontiers abandonner leur entreprise, si la honte ne les en eut empeschez. Ils furent dans cette irresolution, iusques à ce que Dom Pedro d'Alvarado approcha d'eux peu à peu, & prit sept de leurs Coueurs, que Dom Diego auoit enuoyez pour battre l'estrade: Mais il les relascha, lors qu'il se fut informé du nombre de gens qu'auoit Almagre, & de quelques autres particularitez qu'il luy faloit sçauoir necessairement: car l'intention de ce Cavalier ne fut iamais de troubler en rien les Conquerans du Peru; au contraire il ne demandoit qu'à les aider en tout ce qu'il pourroit; Et voilà pourquoy il desliura volontairement ceux qu'il auoit pris, quoy qu'il les pust retenir avec luy.

Cette generosité de Dom Pedro d'Alvarado, réjouïst extrêmement le bon Dom Diego d'Almagre, & luy fit perdre vne partie de ses apprehensions, s'imaginant que c'estoit là vn Augure de Paix, qui ne luy deuoit pas estre moins fauorable qu'vni-

le : Toutesfois, pource qu'Aluarado ne luy auoit rien enuoyé dire par les Coureurs relaschez, il ne se creut pas encore en seureté, si bien qu'il attendit avec impatience le succez de cette Iournée, balançant tousiours entre l'Espoir, & la Crainte.

Parmy ces inquietudes & ces apprehensions de Dom Diego d'Almagre, se mella vne nouueauté bien estrange, qui augmenta plus fort que iamais ses deffiances, & ses soupçons. Ce fut que Philippe, le Truchement Indien, qui estoit allé avec luy, sçachant que Dom Pedro d'Aluarado approchoit, s'eschappa de nuict; emmenant avecque luy vn des principaux Caciques du Pais, avec lequel il s'en alla chercher Aluarado. L'ayant trouué, il l'aduertit que Dom Diego d'Almagre auoit fort peu de soldats; que les Curacas qui l'accompagnoient desiroient des'enfuir d'avec luy, pour le venir seruir, que tous les plus grands en feroient de mesme; Et que pour luy, il s'offroit non seulement de les soumettre à son obeïssance, mais de les guider où estoit Almagre, afin que le prenant au despourueu, l'on se pust saisir de luy plus facilement. Mais quoy que Dom Pedro fut bien aise de sçauoir des con jonctures qui luy estoient si fauorables, il refusa neantmoins de faire ce que Philippe luy disoit, esperant de prendre vn meilleur biais, pour mener à bout sa negociation. Cét Indien fit cette trahison, pource que se sentant coupable, & gésné par sa Conscience, il apprehendoit qu'on ne le châtiaist, d'auoir meschamment supposé, & soustenu mesme, qu'Atahuallpa vouloit faire vn massacre des Espagnols. Pour abregé doncce conte, il faut sçauoir que Dom Pedro d'Aluarado, & Dom Diego d'Almagre se virent dans la Plaine de *Ruiccampa*, que les Espagnols appellent *Riobamba*, où ils furent presque sur le poinct d'en venir aux mains, de part, & d'autre. Mais quand ils se representerent qu'ils estoient tous Espagnols, & la plus-part d'Estremadure; touchez des sentimens naturels qu'ils eurent pour leur Patrie, ils s'aboucherent ensemble, quoy qu'ils n'en eussent point la permission de leurs Generaux, s'offrant vne Amitié mutuelle, comme il aduint autresfois à Lerida, entre les soldats du grand Iules Cesar, & les Capitaines du Party de Petrejus, d'Afranius, & de Pompée; dequoy fut grandement aise Dom Diego d'Almagre, pour n'auoir pas le quart des soldats de Dom Pedro d'Aluarado, bien que neantmoins, & luy, & ses gens,

gens, eussent resolu de mourir plustost, que de ceder l'aduantage à ses Ennemis; & ainsi, les vns & les autres, bien aises d'auoir communiqué ensemble, firent vne Treue de 24. heures, afin que leurs Generaux eussent loisir de se voir, & d'aduiser à ce qu'ils auroient à faire. Aussi se virent-ils en effet; & par l'entremise du Licencié Caldera, natif de Seuille, ils demurerent d'accord, Qu'ils partageroient entr'eux tout le butin qui s'estoit fait, & qui se feroit à l'aduenir; Qu'à cette fin Dom Pedro d'Aluarado avec son Armée Nauale, s'en iroit plus auant dans la Coste deuers le Midy, descouvrir de nouuelles Prouinces, & que cependant Dom François Piçarre, & Dom Diego d'Almagre, tascheroient de maintenir en Paix ce qu'ils auoient descouuert, & presque conquis; Qu'au reste les gens de Guerre, tant del'un que de l'autre Party, pourroient aller où bon leur sembleroit, à sçauoir à la descouuerte par Mer, où à la Conqueste par terre. Voilà ce qui fut publié touchant leur Accord, pour n'irriter point les gens de Dom Pedro d'Aluarado, parmy lesquels, au rapport de Pedro de Cieça, de Gomare, & de Carate, il y auoit plusieurs Caualliers principaux, qui se pouuoient offenser de ce qu'on n'auoit daigné leur faire presentement aucune gratification. Le fond du secret qu'ils se reseruerent entr'eux, sans l'oser publier, fut que Dom Diego d'Almagre, promit de donner à Dom Pedro cent mille pezos de bon or, c'est à dire du poids de 450. Marauedis chasque pezo, pour les Nauires, les Cheuaux, & les Munitions de Guerre qu'il menoit avecque luy, à condition qu'il s'en iroit à son Gouuernement de *Huahutimallan*, & qu'avec cela il iureroit, comme il fit, de ne retourner iamais au Peru, durant la vie des deux Associez Piçarre, & Almagre.

Après cét Accord, dont ils furent l'un & l'autre bien satisfaits, Dom Diego d'Almagre fit brusler tout visle Curaca, pour s'en estre fuy traistreusement avec l'Interprette Philippe, qu'il eut puny de mesme, si Dom Pedro d'Aluarado ne luy eut obtenu grace. Gomare dit en cét endroit les paroles suiuanes.

Quelque butin qu'eut fait Almagre en sa fameuse Conqueste, il n'eut pas de quoy payer les cent mille pezos de fin or, qu'il deuoit donner à Pedro d'Aluarado, quoy que luy & ses gens, eussent trouué dans Caraba un Temple conuert de Plaques d'or par dedans; Ou possible ne le voulut-il point faire, sans le consentement de Piçarre. Sur ces entrefaites,

ils s'acheminèrent tous deux à Saint Michel de Tangarara, Alvarado ayant permis à plusieurs de ses gens, dont il retint les principaux avec luy, de s'en aller à Quitu, pour en peupler les Prouinces. Ce sont les paroles de Gomare, de l'autorité duquel l'appuyee que ie deuois dire moy-mesme. Dom Diego d'Almagre, aduertit incontinent de toutes ces choses le Gouverneur Dom François Pigarre.

ALMAGRE, ET ALVARADO, S'EN VONT à Corço ; le Prince Manco Ynca vient parler au Gouverneur, qui luy fait vne tres-bonne reception.

CHAPITRE XI.

Les Espagnols ayant solemnisé leur Traitté de Paix, avec des réjouyssances publiques, les deux Gouverneurs, à sçauoir Dom Diego d'Almagre, & Dom Pedro d'Aluarado, à qui pour l'Alliance nouvellement contractée, ou donna le tiltre de Gouverneur, comme à Dom François Pigarre, & à son Compagnon Dom Diego d'Almagre, conclurent entr'eux, que le Capitaine Sebastien de Belalcaçar s'en retourneroit à Quitu, pour y mettre le Royaume en Paix ; Car les Espagnols estoient bien aises d'empescher, s'ils pouuoient, les dissentions, & les troubles que plusieurs petits Capitaines Indiens taschoient d'y apporter tous les iours. Apres auoir réglé cette affaire-là, ils pourueurent à quantité d'autres choses necessaires, & particulièrement à s'asseurer d'une Place forte, en faueur des Espagnols qui sortiroient de Panama, ou de Niçaragua, pour se trouuer à la Conqueste du Peru, où de iour en iour accouroient des gens de tous costez, au bruit de ses grandes Richesses, pour tascher d'y auoir part à quelque prix que ce fut. Ils mirent dans cette Place-là quantité d'Armes, & de prouisions de bouche, pour la subsistance des soldats qu'ils y laisserent en garnison pour la deffendre. Dans cette conioncture Pedro d'Aluarado, qui suivant les Capitulations publiées, deuoit retourner à ses Nauires, & le long de la Coste vers le Midy, aller à la Conqueste de nouvelles Prouinces; fit entendre qu'il iroit par terre, pour conten-

rer le desir qu'il auoit de s'entretenir avec le Gouverneur Dom François Pigarre, & voir ce Royaume-là, dont on racontoit de si hautes merueilles; ce qu'il ne dit neantmoins que pour couvrir de ce pretexte les secretes Capitulations qu'ils auoient faites ensemble. Sur cette occasion, il fut iugé à propos que Dom Diego enuoyast vn de ses Agens, appelé Diego de Mora, que j'ay connu depuis, afin qu'on le mit en possession des Nauires, comme il fut fait aussi-tost, & par mesme moyen, Dom Pedro enuoya *Garcibolguin*, pour les liurer à Mora, tant pour l'vn que pour l'autre Party, puisque suiuant le Traitté, les Vaisseaux, & leur équipage estoient communs entr'eux. Apres que ces Commissions furent données, les Gouverneurs prirent la route de Cozco, où estoit Dom François Pigarre; Et ce fut alors que luy attriua dans la mesme Ville, ce que ie m'en vay vous raconter, pour suiure l'ordre du temps, & mettre chascune chose en son lieu.

Apres les aduis qu'eut Manco Ynca, tant de la part de son Frere Titu Atauchi, que du Mestre de Camp Quizquiz, il s'appresta, comme nous auons dit, pour s'en aller voir le Gouverneur, afin de luy demander qu'il eut à le reestabli dans son Empire, suiuant les Articles que son Frere, & tous les Principaux du Royaume en auoient passez. Mais pour ne rien conclurre à la vollee, il consulta plusieurs fois avec eux, s'il deuoit faire ce voyage, ou en homme pacifique, ou accompagné de gens de Guerre. Les aduis de ses Conseillers se trouuerent differents; Tantost ils approuuoient l'vn, tantost ils rejettoient l'autre, mais ils en reuenoient presque tousiours là, Que pour mettre en seureté sa personne; il feroit bien de mener vn assez bon nombre de Soldats, conformément à l'aduis de Quizquiz, de peur qu'il ne luy en prit de mesme qu'à son Frere Atahuallpa, & se représenter au reste, Que les Estrangers seroient bien rendus plus souples par la crainte des Armes, que par vne sorte de complaisance, accompagnée de trop grandes soumissions, qui auoient esté bien plus nuisibles que profitables à l'imprudent Atahuallpa. Mais comme ceux du Conseil estoient sur le point de s'en tenir à cette derniere proposition, l'Ynca prit la parole, & leur dit, *Mes Fils, & mes Freres, nous allons demander iustice à des hommes, que nous tenons estre de la Race de nostre Dieu Viracocha, & qui dès leur premiere entrée dans ce pays, ont publié que leur princi-*

pal Employe estoit de la rendre à tout le Monde. Je croy qu'ils ne me la refuseront pas en vne chose si équitable, comme est la demande que i'ay à leur faire. La raison est; pource que suivant la Doctrine que nos Peres nous ont tousiours enseignée, il faut que les effets respondent à leurs paroles, s'ils veulent estre estimez vrays Fils du Soleil: S'ils font le contraire, tant pis pour eux. Le tiltre, de Diuin que nous leur donnons, les courra de honte, s'ils s'en rendent indignes: Quoy qu'il en soit, ie mets plus de conscience en nostre bon droit, qu'en la puissance des Armes; La gloire qu'ils se donnent d'estre Ambassadeurs du Dieu Pachamac, les doit obliger sans doute à le craindre, puis qu'ils ne peuuent ignorer, estant enuoyez par luy-mesme, qu'il n'est rien de si abominable à ses yeux, que de voir agir contre la Justice ceux qui sont tenus de l'administrer, & qui usurpent le bien d'autruy, au lieu de rendre à vn chacun ce qui luy appartient. Le voyage que nous allons faire a pour but la plus iuste demande qui fut iamais: Nous deuons plus s'esperer de l'integrité de ceux que nous tenons pour Dieux, que de toutes nos diligences; Car en cas qu'ils soient, comme nous croyons, vrays Fils du Soleil, assurement ils se comporteront en vrays Incas, & nous rendront nostre Empire; En quoy ie veux croire qu'ils imiteront les Roys nos Ayculs, qui dans leurs Conquestes n'ont iamais osté leurs biens aux Curacas, quelques Rebelles qu'ils se soient monstrez: Nous ne l'auons point esté à ceux qui se sont iettez dans nostre pays; au contraire, tout nostre Empire s'est rendu à eux sans resistance. C'est pourquoy ie trouue à propos d'agir avec eux en hommes paisibles, de peur qu'ils ne nous refusent la Justice qu'ils nous doiuent, s'ils voyent que nous la demandons à main armée: Vous scauez qu'il ne faut que le moindre pretexte aux hommes puissans, & ambitieux, pour esconduire les plus iustes Requestes, & ne rien faire que ce qui leur plaist. Cela estant, au lieu de porter nos Armes contre eux, apportons leur plustost des presens, qui par vne secrette vertu qu'ils ont, appaisent les hommes les plus facheux, & font mesme tomber la foudre des mains de nos Dieux, apres que nos crimes l'ont mis dans leurs mains. Amassez tout ce vous pourrez auoir d'or, d'argent, & de pierreries; Allez à la chasse des bestes Fauues, & du Gibier que l'on estime le plus exquis; Cueillez les plus agreables, & les plus delicieux de tous nos fruits, & avec ces Armes à la main, allons tous ensemble trouuer nos Hostes; Si nous manignons de l'ancienne puissance des Incas, leur courage dont nous auons herité, ne nous manque point: Mais apres tout, si ces choses iointes ensemble ne les peuuent obliger à nous rendre nostre Empire, nous cognoi-

strons clairement par là, que nous sommes reseruez à voir accomplie la predication de nostre Pere Huayna Capac, qui nous assura un peu deuant la fin de ses iours, que nostre Monarchie seroit mise en d'autres mains, nostre Gouvernement changé, & nostre Idolatrie destruite. Si c'est le Decree de nostre grand Pachacamac, deuous nous pas nous résoudre à luy obeyr? Laiss'ns leur donc faire ce qu'ils voudront, pourueu que nous fassions de nostre costé ce qui sera iuste. Voila ce que l'Ynca leur dit, avec vne action si pleine de Grandeur, & de Majesté, que ses Capitaines & les Curacas ne purent s'empescher de verser des larmes, quand ses dernieres patoles leur mirent dans l'esprit, que l'Empire des Yncas leurs Roys alloit prendre fin.

Mais enfin, apres s'estre vn peu remis l'esprit, ils suiuirent ponctuellement les Ordres de l'Ynca, & apprestèrent ce qu'il leur sembla de plus necessaire pour le voyage de leur Roy, afin qu'il le fit avec quelque sorte de Pompe, qui sentit ce qu'il estoit, puis qu'il ne pouuoit esgaler celle des Roys ses Ancestres. Ainsi avecce qu'il pût auoir d'équipage, ils'en alla droit à Cozco, accompagné de plusieurs grands Seigneurs, & de leurs plus proches; car de son costé il n'auoit presque point de parens, la Tyrannie d'Atahualpa les ayant exterminé du Monde. A son arriuée, les Espagnols furent au deuant de luy, les vns à cheual, les autres à pied, & sortirent tous assez loing de la Ville. Dès que le Gouverneur approcha de luy, il mit pied à terre, & l'Ynca en fit de mesme; car il descendit de sa litiere, qui n'estoit pas d'or, comme celle de ses Ayeuls, mais de bois seulement, pour ce qu'encore que ses gens luy eussent conseillé de marcher en Roy, assis sur la Chaire d'or, & avec la bordure rouge à la teste, qui est comme la Couronne Royale, il ne voulut faire ny l'un, ny l'autre, disant que ce seroit tesmoigner peu de respect au Gouverneur, & aux autres Espagnols, que de se parer des marques de la Royauté, en leur allant demander de le reestabli dans le Royaume: d'où ils pourroient tirer cette consequence, que quand mesme ils ne le voudroient point, il ne laisseroit pas d'estre tousiours Ynca, puis qu'il tesmoigneroit d'auoir desia pris possession de l'Empire, dont le Bourlet rouge estoit vne marque; Mais il leur dit, qu'il prendroit le jaune, afin que les Viracochas (les Indiens appelloient ainsi les Espagnols, & ie les nommeray de mesme, puis que ie suis Indien entendissent par là qu'il estoit legitime Heritier de l'Empire.

Le Gouverneur fit vn compliment à l'Espagnole à ce Prince, auquel il dit, *Qu'il estoit le bien venu.* A quoy l'Ynca respondit, *Que le sujet qui l'amenoit là, estoit pour seruir, & adorer ceux qu'il tenoit pour Dieux, enuoyez par le grand Pachacamac.* Ils n'eurent pas grands discours ensemble, à faute de bons Truchemens: Et dès que le Gouverneur eut fait avec l'Ynca, il fit place aux autres Espagnols, pour leur donner la commodité de parler à luy. Iean Piçarre, & Gonçalo artiuèrent en mesme temps; tellement que l'Ynca sçachant qu'ils estoient Freres de l'Apu (c'est à dire du Capitaine General) les salua fort courtoisement. Où il faut sçauoir, qu'auant que de parler aux Espagnols, il auoit mis ordre qu'un Indien venu avec eux, & qui cognoissoit le Capitaine, & les autres Officiers, les donnât tous à cognoistre; Car se tenant près des grands Seigneurs qui enuironnoient le Roy, il leur faisoit sçauoir quelle charge auoit vn chacun; Et alors l'un des principaux le disoit à l'Ynca, afin qu'il en fut aduerty: ce qui fit que parlant aux Capitaines, & aux Officiers des Finances du Roy, il les distingua d'avecque les autres Soldats, qui arriuèrent en ordre, pour le saluer, & parler à luy, qui les traitta ciuilement, tesmoignant beaucoup de bonne volonté pour eux, & à famine, & par ses paroles: Puis comme il les eut ainsi accueillis, il dit à ses gens le mesme qu'Atahualpa, quand il vid Hernand Piçarre, & Hernand de Sotto; *Assurement ces gens icy sont vrayz Fils de nostre Dieu Viracocha, dont ils representent le Portraict, soit par leur visage couuert de barbe, soit par la façon de leur habillement, & voila pourquoy ils merisent bien que nous les seruions, comme nostre Pere HuaynaCapac nous l'a commandé.*

L'YNCA DEMANDE AUX ESPAGNOLS
d'estre restably dans son Empire; & la Responce
qu'ils luy font.

CHAPITRE XII.

Ces choses s'estant ainsi passées, les Espagnols monterent sur leurs cheuaux, & l'Ynca se remit dans sa Chaire à bras, auquel le Gouverneur ceda la main droite; Ses Freres, & les

autres Capitaines & Soldats marchant deuant luy, chaque Compagnie selon son rang. Luy-mesme aussi commanda qu'il y en eut vne à l'arriere-garde de l'Ynca, & que 24. Fantassins enuiroñassent la Chaire du Roy, ce qu'ils tinrent à tres grand honneur, pource qu'il leur sembla que c'estoit vne grande deference que leur rendoient des hommes qu'ils tenoient pour Diuins; & qu'en faisant marcher leurs troupes par ordre, & non pas confusement, ils les honnoient encore dauantage. Ils entrerent ainsi dans la Ville, avec vne resiouissance publique, tous les Bourgeois en estant sortis pour les receuoir, & entremellant à leurs dances diuerfes Chançons, composées à la louange des Viracochas; n'estant pas à croire combien ils auoient de plaisir à voir leur Ynca, dont la presence leur faisoit esperer qu'il regneroit comme Heritier legitime, puis que le Tyrân Atahualpa ne viuoit plus. Ils auoient ionché d'herbes odorantes la grande rue par où l'Ynca deuoit passer, à laquelle seruoient encore d'un grand embellissement quelques Arcs de Triomphe, dressez en esgale distance, & couuerts de fleurs, comme estoient ceux dont ils honnoient l'Entrée de leurs Roys. Les Espagnols menerent l'Ynca dans vne de ses Maisons Royales, appelée *Cassana*; scituée en la grande Place, vis à vis du College des Peres Iesuites. Ils l'y laisserent dans vn comble de joye, & de grandes Esperances, s'imaginant, veu la bonne reception qui luy estoit faite, qu'on le deult reestabli dans son Empire, comme il le dit à ses gens, qui en furent grandement satisfaits, pource qu'ils creurent que de là s'ensuiuroit bien tost la Paix generale, dont ils auoient accoustumé de iouir sous le Regne de leurs Yncas. Cependant les Officiers du Roy firent le present qu'ils auoient apporté au Gouverneur, & à ses Viracochas, qui l'en remercièrent de si bonne grace, & en si bons termes, que les Indiens ne scauoient que repartir, tant ils estoient transportez de joye. Ces iours là furent les plus heureux, & les plus calmes de ceux qu'eut le pauvre Ynca, durant le cours de sa vie, tous les precedens n'ayant esté que malheurs, & qu'orages, causez par les persecutions, & les tyrannies de son Frere Atahualpa; iourre que ceux qui suiuirent iusques à sa mort, ne furent pas moins infortunez, comme il se verra plus particulierement.

L'Ynca ne fut pas plustost dans son logis, qu'il enuoya dire à François de Chaues, & à ses Camarades, qu'il desiroit de les

voir, & de les cognoistre, pour la Relation que ses gens luy auoient faite de leurs bonnes qualitez. Ils l'allerent trouuer aussi-tost, & furent receus de luy avec de grandes demonstrations de bien-vueillance; Car ne se contentant pas de les embrasser, il beut à leur santé, suiuant la Coustume des Indiens: puis entre autres paroles obligeantes, il leur dit, *Que leurs actions se noignoient assez qu'ils estoient vrais Fils du Dieu Viracocha, & Freres des Incas, puis qu'ils auoient voulu sauuer la vie à son Frere Atahualpa: Qu'il leur en sçauoit fort bon gré; & qu'en attendant qu'il les recognus plus amplement, ils l'obligeassent de le tenir pour Frere, veu qu'ils estoient tous de mesme Race, c'est à dire, Fils, & descendants du Soleil.* Apres ces ciuilitéz, il leur fit donner plusieurs Vases d'or, & d'argent, comme aussi vn assez bon nombre d'Esmeraudes: Et alors François de Chaves prenant la parole au nom de ses Compagnons, dit à l'Ynca, *Qu'ils estoient tous seruiteurs de son Altesse; Qu'en toutes les occasions qui se presenteroient, ils leuren donneroient des preuues certaines; Qu'ils n'auoient rien fait pour le Roy son Frere, à quoy le deuoir ne les obligeast; Et que s'il leur faisoit l'honneur de leur commander, il les trouueroit tousiours prests à le seruir.* L'Ynca le embrassa derechef, & ainsi ils se separerent d'avec luy, fort contens, & riches, comme i'ay dit, d'vne grande quantité d'or, d'argent, d'Esmeraudes, & de Turquioises.

Deux iours apres son Arriuée, le Prince Manco Ynca dit au Gouverneur, *Qu'il luy sembloit à propos de parler qu'on eut à le remettre dans son Empire, & d'accomplir ponctuellement le contenu des Articles, qui s'estoient passez entre les Indiens, & les Espagnols, pour contracter Alliance & amitié ensemble; Qu'il seroit bien-aise qu'on leur donnast des Prestres & des Ministres, pour prescher aux Indiens la Doctrine Chrestienne, comme les Espagnols mesmes l'auoient désiré par leurs Capitulations: Que pour cét effet, il les enuoyeroit tres-volontiers avec toute sorte de respect, & de bon traitement, dans les principales Prouinces de son Empire: Qu'il suffisoit que son Pere Huayna Capac eut dit à l'heure de sa Mort, *Que la Loy des Peuples qui aborderoient en ses Terres, estoit meilleure que la leur, pour les obliger à la receuoir tres-volontiers; Que les Dieux Viracocha n'auoient qu'à dire quelle estenduë de Païs ils desiroient auoir dans le Royaume; Qu'ils seroient obeis aussi-tost, & qu'on tâcheroit de les rendre contens, son Pere l'ayant ainsi ordonné**

par

par son Testament, qui portoit qu'on eut à les servir avec affection, & le mieux qu'il seroit possible.

A cette proposition de l'Ynca, le Gouverneur fit response, Que son Altesse estoit la tres-bien venue dans sa Ville Imperiale de Cozco; Qu'il ne demandoit pas mieux que d'accomplir ponctuellement sa volonté, puis que les Capitulations accordées estoient si iustes, & que la Raison vouloit qu'on les accomplist ponctuellement. Ils rompirent là dessus, & parlerent d'autre chose, leur Conference ne pouvant estre plus longue, à faute de Truchemens.

Le lendemain, le Gouverneur ayant consulté sur la demande del'Ynca, tant avec que ses Freres qu'avec les autres Capitaines, les trouua de differens aduis. Mais comme il sceut que la possession du Royaume ne consistoit qu'à mettre le Bourlet rouge sur la teste de celui qu'on vouloit couronner Roy, ils'en alla dans la Maison del'Ynca, où ses gens l'accompagnerent; & sans marchander davantage, il luy dit, Qu'il le supplioit bien fort de vouloir presentement prendre possession de son Empire; Que s'il eut sceu auparavant comme il y falloit proceder, il n'auroit jamais souffert qu'il eut esté seulement vne heure sans sa Couronne Royale à la teste; & que touchant le partage du Royaume, ils en parleroient à loisir, quand les vns & les autres seroient plus paisibles, pource qu'à present les Indiens & les Espagnols estoient en desordre; Qu'il ne pouvoit auoir de meilleur Arbitre de la Paix que son Altesse; Qu'il commandast luy mesme ce qui seroit le plus à son gré, & qu'il en seroit plustost obeï des Espagnols, qui manquoient pour l'heure de Ministres, pour enseigner la Loy du vray Dieu, n'ayant pas mesme les Prestres qu'il leur falloit, pour leur administrer les Sacremens: Qu'aussi tost qu'ils seroient arriuez, il ne manqueroit pas de leur en donner; & que les Chrestiens n'estoient là, venus que pour desabuser ceux du Pais de leurs erreurs, & de leur Idolatrie. Les Indiens furent tres-satisfaits de ces raisons, & à l'heure mesme l'Ynca fut couronné Roy, avec plusieurs solemnitez, mais non pas si grandes que celles qu'on obseruoit au Couronnement des Rois ses Ancêtres, pource qu'il n'y auoit plus de Prince du Sang Royal, qui en toutes les Cours du Monde sont ceux qui en rendent la Majesté plus considerable, & plus eminente: Tellement que ce ne fut pas sans raison que ce manquement fit pleurer les Vieillards,

se representant la magnificence qu'ils auoient veüe autresfois dans la Cour du grand *Huayna Capac*, bien queneantmoins les ieunes gens, qui prenoient le temps comme il venoit, ne laissent pas des'en réjouir extrêmement.

LES DEUX GOUVERNEURS S'EN VONT
chercher le Mestre de Camp Quizquiz.

CHAPITRE XIII.

DOM Pedro d'Aluorado, & Dom Diego d'Almagre, avec des troupes fort lestes marchioient tousiours du costé de Cozco, où ils sçauoient qu'estoit le Gouverneur Dom François Pizarre; lors qu'ils apprirent en chemin que le Mestre de Camp Quizquiz se rafraichissoit en la Prouince des Canarins, où il auoit plusieurs bons hommes de Guerre, de l'or, de l'argent, de la Pierrierie; & d'autres Ioyaux de prix en grande abondance, & vne incroyable quantité de Bestail. Toutes ces choses se publioient par la bouche de la Renommée, qui suiuant sa coustume y en adioustoit plus qu'il n'y en auoit. Les Gouverneurs allerent iusques là, pour tuer le Tyran, & tailler en pieces son Armée, pour estre bien assurez par ceux du País qu'il n'y auoit point d'autres soldats sur pied que les siens dans le vaste Empire du Peru. Or bien qu'il fut vray que Quizquiz auoit en effect tous ses gens prests, il ne desiroit pas pourtant d'en venir aux mains avecque les Espagnols, pource que l'Ynca mesme, & son Frere Titu Autachi ayant enuoyé au Gouverneur les Capitulations susdites, qu'ils auoient faites avecque François de Chaues, & ses Compagnons, en attendoient la ratification, & la Paix generale, qui se deuoit faire entre les Indiens, & les Espagnols: Tellement que Quizquiz se croyant en seureté de sa vie, negligeoit de se tenir sur ses gardes, que si quelque chose l'entretenoit encore plus fort dans la nonchalence, & l'oisiueté, c'estoit le commandement que l'Ynca Titu Autachi luy auoit fait à l'heure de sa Mort. Car vous deuez sçauoir que ce pauvre Ynca mourut, quelques iours apres qu'il eut relaché François de Chaues & ses Compagnons. Sa mort proceda principalement de l'extreme deplaisir

que luy apporta celle d'Atahualpa son Frere, où se trouua ioinct encore le regret qu'il eut des actes tragiques que le Traistre Ruminai auoit executez en la personne de ses Nepueux, de ses Freres, de ses Capitaines, & mesme des Vierges esleuës; ce qui fit croire que de si grandes meschancetez, commises par vn lubiet rebelle contre le propre sang de son Prince, estoient des presages infaillibles de la ruïne de tout l'Empire. Se voyant donc dans ces afflictions, & sur le point de rendre l'esprit, il fit venir le Mestre de Camp Quizquiz, & les autres Capitaines, ausquels il dit, *Qu'ils eussent à se maintenir en paix avecque les Viracochas; se souuenant que leur Prince Huayna Capac l'auoit ainsi ordonné par son Testament, comme par vn Oracle asseuré, dont la prediſtion s'accompliroit entierement, comme elle auoit desia commencé: Et partant qu'ils obryssent en toutes choses, à ceux qu'ils auoient pour Descendans de leur Pere le Soleil, Fils de leur Dieu Viracocha; Que c'estoit là sa derniere volonté, & que comme Fils de ce mesme Huayna Capac, il leur recomandoit de l'execter de point en point.*

Ces persuasions, & l'esperance qu'auoit Quizquiz, que la Paix traitée entr'eux, suiuant les Articles qu'ils en auoient passez, se concludroit bien-toſt, luy faisoient negliger les soings de la Guerre; de sorte qu'encore qu'il fut bien asseuré que le Gouverneur s'en venoit le trouuer, il ne s'en troubla nullement, & n'en fit point d'autre bruit, sinon qu'il enuoya vne troupe de cent Soldats, qui estoit la moindre Compagnie que les Yncas eussent à la Guerre, sous la conduite d'un Capitaine que les Historiens Gomate, & Carate nomment *Sotahurco*, pour dire *Cotahoreco*, qui signifie *six Montagnes*, *Cota* denottant le nombre de *six*, & *Cota*, le mot de *Montagne*, d'autant que ce Capitaine naquit dans vn plat païs, enuironné de tres-hautes Montagnes, comme il y en a quantité dans le Peru, en vn temps où son Pere & sa Mere furent à la Guerre ensemble, & ce deuoit estre pour quelque grande necessité, qui les y força. Il faut sçauoir maintenant, que pour memoire d'une naissance si extraordinaire, au milieu des Armes, ce quine s'estoit iamais veu iusques alors, pource que les Femmes n'alloient point à la Guerre avec leurs Marys, ce nom luy fut imposé, d'autant qu'à droit, & à gauche, il y auoit, comme i'ay dit, six Montagnes des plus hautes qui fussent en ce païs-là; de sorte qu'en ce seul nom se trouua comprise l'histoire entiere du temps, du lieu & de la naissance de ce Capi-

tain. Les Peruviens auoient accoustumé d'en vser de mesme en toutes les autres traditions de leurs Annales : Car pour en transferré la memoire à la Posterité, ils se seruoient de certains chiffres, qui en peu de mots comprenoient tous les succez de l'affaire qui s'estoit passée; ce qu'ils exprimoient encore par quelques Vers abregez, qui contenoient diuers sujets, dont ces mesmes Vers rafraichissoient la memoire; comme les Ambassades faites aux Roys, & leurs Responces; les Harangues de Paix, ou de Guerre; les Mandemens des Souuerains, les peines portées par les Loix, & quantité d'autres choses semblables, qui se passoient dans le Gouvernement Politique; Et ainsi leurs Historiens, & leurs Annalistes, qui les marquoient par nœuds, les ayant apprises par cœur, les enseignoient à leurs Descendans : car les chiffres, les Vers, les mots les plus significatifs, comme le nom de ce Capitaine, & autres semblables Symboles, par nous declarez, & que nous expliquerons cy-apres, si l'occasion s'en presente; ne seruoient qu'à mieux imprimer dans la memoire de l'Annaliste ce qu'il scauoit desia par tradition. D'où il aduenoit, que pour s'asseurer de quelque chose, ayant recours à ces nœuds, il s'en esclairecissoit à l'instant, & les deschiffroit aussi facilement qu'un Espagnol pourroit lire dans vn Liure; Dequoy l'on ne scauroit alleguer vne meilleure raison que celle qu'en donne le Pere Acosta, qui dit, Que tels Historiens scauoient par cœur les euenemens passez, pource qu'ils les estudioient iour, & nuit, pour rendre bon compte de leur Charge. Or bien qu'en mon premier Volume, j'aye parlé de cecy au long; si est-ce qu'il ne m'a pas semblé hors de propos de le repeter en cet endroit, sur le sujet du nom de Capitaine Cotahorco.

Liv. 6.
Ch. 8.

Comme donc le Mestre de Camp Quizquiz eut enuoyé aux Espagnols, qu'il scauoit venir au deuant de luy, vn Officier exprès, avec ordre d'en apprendre l'intention, & de luy en faire rapport, le Capitaine s'y en alla; & pour n'auoir eu la precaution qu'il falloit auoir, tomba dans les pieges des Espions qui le menerent à Dom Pedro d'Aluarado. D'abord il luy demanda où estoit Quizquiz, ce qu'il faisoit, & combien de gens il auoit avec luy: En suite il resolut de l'aller chercher en diligence; & comme il s'en verroit assez près, de luy donner vne camifade, afin de le prendre au despouruen. Pour executer cette entreprise, il prit vn assez bon nombre de Cavaliers, qui trouuerent les chemins si rudes, qu'estans à vne tournée de

Quizquiz, ils apperceurent que leurs Cheuaux estoient presque tous defferez; ce qui fut cause qu'ils ne dormirent point de cette nuit là, pour les ferrer le mieux qu'ils purent à la clarté des flambeaux, comme les deux Auteurs susdits le remarquent. Le lendemain ils doublerent leur marche, de peur que de tant de gens qu'ils trouuoient dans les chemins, il n'y en eut quelqu'un qui aduertis Quizquiz de leur venue: de sorte qu'ils ne relascherent point de leur route, iusques à ce que le iour à apres ils decouuurent le Camp de cet Ennemy, Mais comme il les vid venir, il tira de longue, avec tout ce qu'il auoit de Femmes, & de gens de seruite. Ce sont les paroles d'Augustin de Carate, que j'ay tirées sans y rien adiouster, & Gomare dit presque le mesme. Ce qui monstre assez que le Mestre de Camp, Quizquiz n'auoit enuie ny d'attaquer les Espagnols, ny qu'ils l'attaquassent: Car s'il eut creu les combattre, il est vray semblable qu'il ne se fut point chargé de Femmes, ny de Valets; ioint que ses Soldats n'estoient pas si lasches, qu'ils ne se fussent tenus prests, s'ils en eussent eu ordre de luy; & que pour l'estre bien tost, il ne faloit que faire passer la parole des vns aux autres. Mais ce peu de precaution de Quizquiz, & de ses gens, fut vn effet de la Prouidence Diuine, en faueur des Espagnols, afin qu'ils eussent moyen de prescher aux Indiens le saint Euangile. A quoy l'on peut adiouster, qu'eux-mesmes ne scauoient rien de l'Alliance, & de la Paix que Quizquiz pretendoit faire, ny des Capitulations que François de Chaves auoit apportées; pource qu'estant arriué avec elles en la Ville de Cozco, où le Gouverneur estoit alors; il trouua que Dom Diego d'Almagre, qui en deuoit dire la Responce, estoit sorty de la mesme Ville, pour aller apres chercher Dom Pedro d'Aluarado. Ainsi les Espagnols n'auoient pas mauuaise raison de pourchasser, comme ils faisoient, la ruine de Quizquiz, pour ne scauoir pas ses bonnes intentions; estant bien certain que s'ils les eussent cognues, ils ne l'auroient point poursuiuy, puis qu'ils ne desiroient pas moins la Paix que les Indiens; Mais l'ennemy du Genre humain employoit toutes ses ruses, & ses malicès, pour semer la diuision entre les vns, & les autres, & empescher qu'on ne preschât à ces Gentils la Foy Catholique, afin que par ce moyen il les pût tousiours tenir dans ses pieges, sans qu'ils se pussent desliurer de sa Tyrannie.

TROIS BATAILLES DONNÉES ENTRE
les Indiens, & les Espagnols, avec le nombre
des Morts.

CHAPITRE XIV.

LE Mestre de Camp Quizquiz, voyant que les Espagnols le poursuivoient tousiours, avec apparence qu'ils le vouloient forcer, quelque part qu'il fut; iugea bien par là qu'ils ne demandoient qu'à le combattre: ce qui fut cause que se repentant de sa trop grande confiance, il se mit en colere contre soy-mesme, de se voir ainsi affronté par sa propre faute, par sa mollesse, & par son peu de preuoyance. Mais enfin, ne pouuant faire autre chose, pour n'auoir que des gens de seruice, qui en semblables occasions embarrassent plustost qu'ils n'aident, il les ramassa le mieux qu'il pût; & pour les mettre à couuert des gens de cheual, s'alla retrancher avec eux sur le haut d'une Montagne. Cela fait, il commanda à vn Capitaine (que les Autheurs Espagnols nomment *Guaypalcon*, disant qu'il estoit frere d'*Atahualpa* de par sa Mere, & qu'en langage de *Quiru* il s'appelloit *Huaycalpa*, qui est vn nom que ie n'entends pas) qu'apres auoir rallié les gens de Guerre, il entretint les Espagnols, iusques à ce qu'il eut mis en seureté ce qu'il auoit d'hommes inutiles. *Huaycalpa* fit ce qu'il pût pour reioindre les soldats espars, & ne fut pas d'aduis de combattre *Dom Pedro d'Aluarado*, pource qu'il auoit quantité de cheuaux, dans vn lieu qui luy donnoit de grands aduantages. Il chargea *Dom Diego d'Almagre*, qui pour engager *Quizquiz* entre luy, & *Aluarado*, voulut monter vn Costau si rude, qu'il faillit à s'y perdre, au rapport de *Carate*, par ces paroles. *Huaypalcon*, & ses gens prirent leur poste sur le haut d'une Colline, si peu accessible que les cheuaux mesmes qu'on menoit en main, n'y pouuoient monter. Cependant, les Indiens lançoient d'en haut quantité de pierres, qu'ils appellent *Gualgas*; & à mesure qu'ils en iettoient vne, elle en choquoit vne seconde, qui en entraisoit vne autre, & ainsi consecutiuellement; si bien que leur nombre alloit quelques fois iusques à 25. ou 30. qui en atrachoient de leur place vne infini-

et d'autres deuant qu'elles fussent en bas, &c. Ce sont les paroles d'Augustin de Carate, qui se trouuent conformes à celles de Gomare, comme nous verrons maintenant.

Almagre fut tellement incommodé par ces *Gualgas*, qu'elles luy tuèrent plusieurs Cavaliers, avec leurs chevaux, & le mirent mesme en grand danger de sa vie : ce qui le fit re soudre de haster sa retraite, & de prendre vn autre chemin moins rude, pour attaquer Huaycalpa; mais luy se voyant entre les deux Gouverneurs, alla prendre poste sur des rochers de tres-difficile abord. Il s'y deffendit valeureusement iusques à la nuit, les gens de cheval, ny les Fantassins non plus, ne pouuant l'endommager, pource qu'en matiere de combattre, & de fuir en des Montagnes si raboteuses comme sont celles-là, les Indiens ont pour l'ordinaire de grands aduantages sur les Viracochas, pour n'estre chargez comme eux, de bagage, ny d'aucunes Armes defensives. Comme la nuit fut venue, Huaypalca fit retraite avec ses gens, & se mit en lieu de seureté; Le lendemain les Espagnols se virent avec l'arriere-garde de Quizquiz; Car comme il ne pensoit point combattre, il auoit diuisé son Armée en Avant-garde, & arriere garde, avecque des aisles aux deux costez, les vnes esloignées des autres de plus de 15. lieues, comme le remarque Carate par les paroles suiuanes.

Dom Diego, & Dom Pedro rallierent tous les Espagnols, tandis que Liv. 2.
Ch. 12. les Indiens sortirent à la faueur de la nuit, & s'en allerent chercher leur General Quizquiz. Ils trouuerent à quelque temps de là que 3000. de leurs gens, qui tenoient l'aisle gauche, auoient tranché la teste à 14. Espagnols, leur ayant coupé chemin par vn petit sentier; & ainsi continuant leur marche, ils firent rencontre de l'arriere-garde de Quizquiz. Les Indiens se forisfierent par le trajet d'une Riuiere, & ne laisserent passer aucuns Espagnols de tout ce iour-là; Cependant, ils gagnerent le haut par une route que les Espagnols auoient desia prise, qui les ayant voulu combattre, s'en trouuerent fort mal, pource qu'ils ne purent faire retraite, à cause des Halliers, & des brossailles où ils se trouuerent engagez; si bien qu'il y en eut plusieurs de blesez, & entr'autres, vn Commandeur de S. Jean, & le Capitaine Alonse d'Aluorado, qui eut une cuisse perçee d'un coup de fleche. Les Indiens firent garde toute la nuit suiuaute; mais le lendemain matin il se trouua qu'il n'y auoit plus d'embarras sur la Riuiere, & qu'ils s'estoient retranchez sur le haut d'une grande Montagne, où ils demurerent en paix, pource

que Dom Diego d'Almagre ne voulut pas se tenir là dauantage, &c. Ce que ie viens d'alleguer pris d'Augustin de Carate, est rapporté par Gomare en ces termes. Apres quelques lieues de chemin, & tandis que Quizquiz prenois la fuite, nos Espagnols rencontrèrent sin arriere-garde, qui ne les eut pas plustost apperceus, qu'elle se mit en estât de deffendre le passage de la Riuiere. Mais pour l'empescher, quelques-uns des nostres y firent garde, & les autres allcrent passer plus haut, pensant a'y trouuer les Indiens, & de les tailler en pieces. Les Ennemis se saisirent d'une Colline fort rude, pour se deffendre des cheuaux, & y combattirent aduantageusement, avec beaucoup de courage. Ils assommerent quelques cheuaux, qui ne pouuoient aduancer, ny reculer, à cause des halliers, & des buissons où ils estoient engagez. & tuerent quantité d'Espagnols, entre lesquels Alonso d'Aluado de Burgos, fut blessé à la cuisse, & Diego d'Almagre, en grand danger de perdre la vie, &c.

Les Espagnols qu'on tua dans le Combat, & ceux qui moururent depuis, des blesseures qu'ils auoient receuës en ces trois rencontres, furent 53. y comprenant les 14. dont parle Carate, & 18. autres en furent gueris. Il y eut 34. cheuaux de tuez, & entr'autres celuy de Dom Diego d'Almagre, qui d'une pierre extrêmement grosse qu'il l'atteignit derriere vne cuisse, la luy rompit avec vne extrême violence, si bien que tous deux tomberent en mesme temps, & ainsi ce ne fut pas sans beaucoup de peine que Dom Diego en eschappa. Que si la pierre eut donné à plein, il est indubitable que le Cavalier, & le cheual eussent esté mis en pieces. Du costé des Indiens il n'y en eut pas plus de 60. de tuez, à cause que l'incommodité du Torrent leur estoit vne sauuegarde, & vne vraye ruine, tant aux Espagnols qu'à leurs cheuaux: aussi fust-ce la raison pour laquelle Dom Diego d'Almagre ne voulut pas s'amuser plus long-temps à combattre de si fascheux ennemis, les voyant fortifiez en vn poste qui leur estoit tres aduantageux, au lieu que celuy des Espagnols estoit si incommode, qu'ils ne s'y pouuoient ayder eux-mesmes, ny se preualoir de leurs cheuaux. Il se retint donc, pour n'accroistre dauantage la perte de ses Compagnons, qu'il fut extrêmement grande, comme le Pere Gomare le rapporte au long dans le Chapitre qu'il intitule. D'un grand Eschet que receurent les nostres de l'arriere-garde de Quizquiz, &c. Le Pere Blas-Valera, faisant mention des Batailles les plus memorables, & les plus ruineuses aux Espagnols, qui fussent arriuées

arriuées dans le Peru, en nomme huit, dont il met celle-cy la premiere, qu'il appelle *la Batasle de Quizu*, pource qu'elle aduint en sa Frontiere. Surquoy il asseure, Que les Espagnols se fussent indubitabement perdus en ces Rencontres, si la Prouidence Diuine n'eut combattu en faueur de son saint Euangile; Ce qu'il me souuient d'auoir aussi ouï dire à plusieurs d'entr'eux qui s'y estoient trouuez, & qui protestoient qu'en des occasions si perilleuses, lors qu'ils croyoient impossible de s'en tirer par les forces humaines, ils estoient tous estonnez que celles du Ciel les rendoient victorieux en vn instant, ce qui ne se pouuoit faire que par vne grace tres-particuliere, dont il plaisoit à Dieu de les assister: Mais sur tout, quand ils venoient à raconter l'extrême danger où ils s'estoient veus en cette Bataille; ils disoient, Que si les gens de Quizquiz diuisez en quatre troupes, & sans aucun dessein de combattre, les auoient si mal traiteez; que n'auroient-ils point fait, s'ils fussent venus contre eux en ordre de Bataille, & sous la conduite du Mestre de Camp Quizquiz, qui passoit pour vn des plus fameux Capitaines de son temps, comme le tesmoigne Gomare, quand il raconre la mort que ses gens mesmes luy donnerent. Dom Diego d'Almagre fit ramasser le butin, qui consistoit, à ce que disent les Historiens, en plus de 50000. testes de bestail ordinaire, & plus de 4000. tant Indiennes qu'Indiens de seruice, que le Tyran Quizquiz auoit contrainsts de le suiure, & qui se rendirent aux Espagnols, lors qu'ils se virent libres. Quant au bagage, aux laines, & aux plus fines Estoffes, ils n'en eurent point du tout, soit qu'ils ne voulussent pas s'en embarrasser, soit que les Indiens y eussent mis le feu. Ils empescherent de mesme que leur or, & leur argent ne tombassent entre les mains de leurs Ennemis, & le cachèrent si bien, qu'on n'en pût iamais auoir aucunes nouuelles; Dequoy Dom Diego d'Almagre aduertit le Gouverneur par quelques Indiens qu'il luy enuoya, comme aussi du succez de tous ses Combats, & du voyage que Dom Pedro d'Aluarado s'en alloit faire à Cozco, pour y voir sa Seigneurie, adioustant à cela qu'il estoit bien aise de luy en donner aduis, afin qu'il mit ordre à ce qu'il auroit à faire pour le mieux.

LE GOUVERNEUR SORT DE COZCO,
*s'abbonche avecque Dom Pedro d'Aluarado, & luy
 paye ce qu'on luy auoit promis.*

CHAPITRE XV.

LA perte que les Espagnols venoient de faire, de plusieurs de leurs gens, & de leurs cheuaux, que les Soldats de quizquiz auoient tuez; fut d'autant plus sensible au Gouverneur Dom François Pigarre, qu'il sembloit que les siens eussent perdu par cét escheec toute la reputation qu'ils auoient gaignée iusques alors: Mais ne sçachant quel remede y mettre, il resolut avec eux d'vser de plus grande precaution à l'aduenir. Cependant, sur l'aduis qu'il eut que Dom Pedro d'Aluarado venoit à Cozco, pour y conferer avec luy, il voulut luy espargner vne partie de la fatigue du chemin, & l'expedier au plustost, suivant l'Aecord que Dom Diego d'Almagre & luy auoient fait ensemble: Car il ne demandoit pas mieux que de le voir hors de son Gouvernement, de peur que trois diuers Chefs (comme il y en auoit autant) ny apportassent quelque nouveau desordre; ce qui estoit d'autant plus à craindre, qu'on auoit veu par espreuue que deux Gouverneurs se sentant comblez d'honneurs, & abondamment pourueus des biens de Fortune, n'auoient pû viure en paix, ny se conseruer dans la bonne intelligence, qui estoit maintenuë entr'eux durant leurs plus grandes incommoditez, tant il est veritable que la Souueraineté ne peut souffrir d'esgal, ny de second mesme: d'où il aduint aussi que leur Ambition fut cause de leur ruine totale, comme il se verra par la suite de l'Histoire.

Pour haster le partement de Dom Pedro d'Aluarado, le Gouverneur trouua bon d'aller iusques à la vallée de Pachacamac, afin que Dom Pedro ne s'esloignât point de la coste, & qu'il ne fit les 240. lieües qu'il faut faire, allant, & venant de Pachacamac à Cozco, outre qu'il estoit bien aise que par ce moyen il ne vid point la grandeur de cette Ville Imperiale, de peur qu'elle ne luy mit dans l'Esprit quelque nouueauté, qui apportast du

changement à l'Accord qui s'estoit fait, ayant tousiours désiré apres l'auoir sceu, qu'on n'en différast point l'exécution. Auant que de se mettre en chemin, il prit conseil de ses Freres, & des autres Officiers de son Armée, auxquels il recommanda sur tout de bien prendre garde à la Personne de l'Ynca, & à toutes les autres choses nécessaires pour la conseruation de la Paix qu'ils auoient contractée avec les Indiens. Il ne voulut point partir aussi, qu'il n'eut pris congé de l'Ynca, auquel il dit, Qu'il luy falloit faire vn voyage de quelques iours en la vallée de Pachacamac, pour y donner ordre à certaines choses concertées depuis avec quelques Espagnols, nouuellement entrez dans le païs, & le Reglement desquelles estoit de grande importance, sur tout à l'égard des Capitulations qu'ils auoient faites ensemble, & qu'il esperoit de mener à bout à son retour. Aquoy il adiousta pour conclusion, Qu'il le supplioit bien fort de luy permettre de faire ce voyage; Que son dessein estoit de reuenir au plustost; Qu'en attendant son retour, ses deux Freres le seruiroient en toutes choses, comme aussi les autres Espagnols, qui demeureroient avec son Altesse; Et qu'il les luy recommandoit, puis qu'il les tenoit pour proches parens, & pour Fils du Soleil. L'Ynca luy fit réponse, *Qu'il s'en allât à la bonne heure, & qu'à la bonne heure aussi il pût reuenir, sans tarder beaucoup; Qu'il luy souhaitoit vn heureux voyage; Et que pour le regard de ses Freres, & des autres Viracochas qu'il laissoit, il ne s'en deuoit aucunement mettre en peine, pource qu'il prendroit le soing de les regaller, comme il le verroit luy-mesme, quand il seroit de retour.* Apres luy auoit donné cette assurance, il commanda aux Seigneurs qui estoient comme ses Lieutenans dans le Païs par où le Gouverneur deuoit passer, d'enjoindre à leurs Vassaux, qu'ils eussent à le seruir, comme sa propre personne, & à tenir prests 200. hommes de Garde qui l'accompagnaissent, les changeant de trois en trois iours, afin que la fatigue en fut moindre, & le Gouverneur mieux seruy.

A ce Mandement de l'Ynca, Dom François Pigarre prit congé de son Altesse, menant avec luy 30. Cavaliers pour luy tenir compagnie. A son arriuée à Saussa il eut aduis que Dom Diego, & Dom Pedro deuoient aller à Pachacamac, pour y voir son Temple magnifique. Cela luy fit haster son voyage, pour regaller dans cette belle vallée le Capitaine Dom Pedro d'Aluaro,

& luy rendre les honneurs qu'un si grand homme meritoit. Il tint à cette fin toutes choses prestes pour la reception de ses Hostes, qui arriuerent à Pachacamac vingt iours apres le Gouverneur, qui les y receut, & les traitta comme ils meritoient. Dom François n'espargna rien de ce qui estoit en sa puissance, pour accueillir fauorablement Dom Pedro. Il commanda mesme que les siens luy donnassent le tiltre de Gouverneur absolu, & qu'ils appellassent Dom Diego d'Almagre, & luy par leurs noms ordinaires, sans leur donner d'autres qualitez. De plus, il ne voulut point oüyr parler d'aucune affaire ny facile, ny serieuse, durant tout le temps que Dom Pedro fut de sejour à Pachacamac, outre qu'il commanda encore tres-expressément à ses gens, de luy obeir comme à leur Chef & leur Maistre. D'ailleurs comme il fut extrêmement aise de voir tant d'illustres Caualliers; aussi leur fit il toutes les ciuilitéz, tous les honneurs, & toutes les caresses imaginables.

Ils se réjouyrent ainsi durant quelques iours, à la fin desquels Dom François Pigarre fournit à Dom Pedro d'Alvarado cent mille pezos d'or, & autres 20000. pour luy ayder à payer vne partie de ses fraiz, comme aussi plusieurs Esmeraudes, & Turquoises de grands prix, avec vn seruice de vaisselle d'or, & d'argent; Car comme Pigarre sçauoit son monde, & l'art d'obliger de bonne grace les gens de Guerre, pour la grande experience qu'il en auoit, il voulut reconnoistre, comme il estoit raisonnable, le signalé seruice, & le grand secours de Soldats, d'Armes, & de cheuaux; qu'Alvarado luy auoit donné si à point, que luy seul fut cause que le Mestre de Camp d'Atahualpa se rendit, & que tout l'Empire des Yncas en fit de mesme à son exemple: de sorte que pour ne paroistre ingrat de tant de biens-faits, il voulut adiouster à la somme accordée les gratifications que nous auons dites. Il le fit pourtant, au rapport de Gomare, & de Carate, contre l'aduís de plusieurs des siens, qui luy conseilloyent de ne le point payer, mais de l'arrester, & l'enuoyer en Espagne, pour auoir esté si hardy que d'entrer dans sa Iurisdiction à main armée. A quoy ils adiousterent, qu'il pouoit dire que ce n'estoit pas luy, mais Diego d'Almagre, qui auoit fait cet accord, s'y voyant contraint par l'apprehension des grands aduantages que Dom Pedro d'Alvarado auoit sur luy; qu'au reste, quand mesme il faudroit qu'il le payast, il ne luy deuoit pas don-

net plus de 50000. p^{ezos}, pource que les Nauires ne valoient pas davantage ; outre qu'il y en auoit deux des siens, & que les gens, les Armes, & les cheuaux, n'estoient point mis dans le Contract en ligne de compte ; autrement c'eust esté vendre ce qui estoit libre de soy, & disposer du bien d'autrui sans raison : Mais tout ce que pûrent dire à Pigarte ceux qui luy donnoient ces beaux conseils, ne fut pas capable de le faire relascher de sa premiere resolution, estant Gentil homme, & Soldat. Aussi se demesloit-il des affaires en Cavalier, & non pas en Chicaneur, ny en Charlatan ; voilà pourquoy il paya genereusement, comme nous auons dit, Dom Pedro d'Aluaro, sçachant avec combien de respect, & de magnificence en semblables choses, les Cavaliers doiuent satisfaire ceux qui le sont véritablement. D'ailleurs, comme il se picquoit plus de la gloire des Armes, que des sentimens vulgaires, aussi ne voulut-il point contredire les Loix de la Milice ; Et ainsi il ayma beaucoup mieux tenir la parole que son Compagnon auoit donnée au nom de tous deux, que de se preualoir d'aucun interest de leur Accord, quelque aduantageux qu'il eut pû estre ; Et ce fut pour la mesme raison encore, qu'il refusa de prester l'oreille aux aduis que luy donnoient ses Officiers, qui estoient, que la necessité auoit reduit Dom Diego d'Almagre, à donner sa parole, & que les Nauires ne valoient pas la moitié de ce qu'il auoit promis d'en payer. A quoy Dom François respondit, que les Loix de la Cheualerie, & de la Soldatesque obligeoient vn Cavalier, & vn Soldat de ne rien promettre sans l'exécuter, comme auoit fait autresfois Atilius Regulus, mesme à son propre dommage. Qu'au surplus, apres auoir bien examiné les raisons qu'il pensoit auoir produites en sa faueur propre, Dom Pedro y pouuoit respondre, qu'on n'auoit qu'à remettre les choses au point où elles estoient, auant que l'Accord se fit, & qu'il reueroiroit sa parole : qu'il se pouuoit faire que les Loix Militaires le souffriroient ainsi, que neantmoins cela ne se deuoit point appeller satisfaction, puis que pour se desgager d'une promesse, il la faisoit tenir necessairement ; Et pour le regard du prix des Nauires, qu'ils disoient estre excessif ; s'ils consideroient bien le secours d'Armes, de Cheuaux, & d'Artillerie, qu'ils en auoient tiré pour gagner ce riche Empire, & en pacifier les troubles, ils trouueroient que le seul fret des Vaisseaux valoit les cent mille Ducats dont ils

estoit demeurez d'accord, tant s'en faut qu'ils deussent croire de les auoir bien payez. D'où il conclud, que quelques grands aduantages qu'il eut adioustez à la promesse donnée, il n'auoit fait que son deuoir de s'en acquitter, & de satisfaire à son obligation. Comme il eut acheué de parler ainsi, les mesmes Conseillers voulurent vser de replique; mais il les pria de ne luy point donner d'aduis, qui sous pretexte d'augmenter son bien, diminuassent tant soit peu sa reputation, pource qu'il n'estoit pas homme à les receuoir : Ainsi s'estant deffait de ces flatteurs, il tourna toutes ses pensées à regaler & seruir le bon Dom Pedro d'Aluarado; ce qu'il fit avecque les plus grandes demonstrations qu'il luy pût rendre, & par ses paroles, & par ses actions, de la bonne volonté qu'il auoit pour luy.

LA MORT DE DOM PEDRO
d'Aluarado.

CHAPITRE XVI.

L'ADALENTADO Dom Pedro d'Aluarado grandement content du bon traitement que François Pizarre luy auoit fait, prit congé de luy, auquel & à Dom Diego d'Almagre il offrit tout le secours qu'ils pouuoient desirer, pour venir à bout des grandes Conquestes que l'un & l'autre auoient entreprises. Il prit le chemin de *Huachumallan*, où quoy qu'il se pût reposer à son aise, ou quoy qu'il fut riche, heureux au possible, plein de trophées, & chargé de Palmes, que dès sa ieunesse il auoit gagnées par ses beaux faits Militaires; si est-ce qu'il ne voulut point en demeurer là, ny croupir dans vne sale faincantise: Au contraire, tant plus il auoit remporté de victoires, tant plus il desiroit d'en gagner d'autres plus grandes, par les hautes entreprises qu'il fit, dans l'exécution desquelles il laissa la vie, comme nous verrons tout maintenant; Car bien que la Relation de sa mort ne soit point de nostre Histoire, ie ne trouue pas hors de propos que nous en parlions; Et à vray dire, elle fut tellement inopinée, & si malheureuse, qu'elle merite bien d'estre remarquée, pour esmouuoir à pitié tous ceux qui ont conneu autrefois vn si vaillant Cavalier: car en effet il se pouoit dire tel

pour les glorieux Exploits, rendus visibles à tout le Monde, en la descouverte de plusieurs terres inconnues, faite par luy-mesme, en la compagnie de Jean de Griialua; Comme aussi en la Conqueste de l'Empire de Mexique, sous le grand Hernand Cortez; en celle de Guatimala, ou de Huahutimallan qu'il fit pour luy-mesme, & en quelques autres de plusieurs grandes Prouinces de la nouuelle Espagne, outre ce que nous auons dit qu'il fit en faueur de la Conqueste du Peru, estant veritable que ce fut luy qui mit en seureté tout ce grand Empire. Il mourut de la façon que le raconte François Lopez de Gomare, dans son *Histoire des Indes*; Et d'autant qu'il en dit plusieurs particularitez remarquables; Voicy comme ie les ay tirées de luy mort à mot. *Pedro d'Aluvarado* estant paisible possesseur dans son Gouvernement de Huahutimallan, & de Chapa, qu'il auoit eu de François Montejo, en eschange de celui de Honduras; obtint permission de l'Empereur d'aller peupler le Royaume de *Quitu* dans le Peru, en cas qu'il n'y eut point d'autres Espagnols: Et ainsi attiré par le bruit de ses Richesses, l'an 1535. il arma cinq Nauires, dans lesquels, & en deux autres qu'il prit à *Nicaragua*, il embarqua 500. Espagnols, & quantité de cheuaux. Il s'en alla prendre terre à *Puertoviejo*, a'où il fut à *Quitu*, apres auoir souffert en chemin beaucoup de froid, de soif, & de faim. A son arriuée, il mit en alarme François Pizarre, & *Diego d'Almagre*, auxquels il laissa ses Vaisseaux, & son Artillerie, moyennant la somme de cent mille escus de Castille, comme il est rapporté plus au long dans toutes les Histoires du Peru. Avec ces richesses il s'en retourna dans son Gouvernement de Huahutimallan, & fit faire depuis de cet argent qu'il auoit receu, dix ou douze Nauires, vne Galere, & quelques Vaisseaux de Rame, pour s'en aller à la traite des Espiceries, ou à la descouverte de quelque nouveau Pais, par la pointe, ou le cap des Baleines, autrement appellé *California*. Frere Marc de *Niça*, & quelques autres Religieux de l'Ordre de saint François, prirent la route de *Callubaca* par terre, l'an 1538. & furent du costé du Point 300. lieues plus auant que la descouverte que les Espagnols auoient faite de *Xalisco*, a'où ils rapportèrent de bonnes nouvelles de ce pays-là, louant sur tout les grandes richesses de *Cerola*, & de quelques autres Villes. Au rapport que firent ces Religieux, on fut d'aduis d'y enuoyer vne Armée Nauale, sous la conduite de *Don Anrhoine de Mendoza*, Vice-Roy de la nouuelle Espagne, & de *Don Fernand Cortez*. *Marquis de Valle*, qui en estoit Capitaine Ge-

neral, & qui auoit descobuert la coste du Sud: mais ceux qui en parlerent les premiers, n'en demeurèrent pas d'accord; Au contraire ils se querellerent là dessus, si bien que Cortez s'en alla en Espagne, & le Vice-Roy manda Pedro d'Aluaro, qui auoit les Nauires susdits, pour communiquer ensemble de cette affaire-là. Aluaro avec sa flotte se rendit au Port de Naudal, & delà il s'en alla par terre à Mexique, estant demeuré d'accord avec le Vice-Roy, pour faire le voyage de Cibola, quoy qu'il ne le pût, sans offenser Cortez, & mesme sans se montrer ingrat enuers luy, auquel il deuoit toute sa Fortune. Au retour de Mexique il fut à Xalisco, pour reduire à l'obeyssance quelques Villes de ce Royaume-là, les habitans desquelles par vne Reuolte manifeste en estoient venus aux mains avecque les Espagnols. Comme il fut arriué à Ecailan, où Diego Lopez de Suniga faisoit la Guerre aux Rebelles, il s'en alla avec luy sur vn costau enuironné de Rochers, où s'estoient fortifiez plusieurs Indiens, contre lesquels les Espagnols voulurent faire vn effort; mais les Ennemis les relancerent si bien, qu'ils en tuerent trente, & contrainquirent les autres de prendre la fuite: d'où il aduint qu'à cause de l'inegalité des Rochers, plusieurs de leurs cheuaux, qui ne pouuoient demeurer fermes en des lieux si raboteux se precipiterent du haut du costau: Ce qu'apperceuant Pedro d'Aluaro, il descendit du sien, pour esuiter la rencontre d'une autre qui rouloit droit à luy, afin de se desfourner, si bien qu'il n'en pût estre endommagé; mais pour ce que le cheual tomboit de bien hant, & qu'il entraioit avec luy tout ce qu'il trouuoit, il donna si rudement contre vn Roc, que d'un gros esclat qui en reiaillit Dom Pedro d'Aluaro fut abbatu, & roulé iusques en bas, le iour de saint Iean de l'an 1541. de sorte qu'il ne releua point depuis d'une si violente secousse, dont il mourut quelques iours apres dans Ecailan, à 300. de Quauhcallan, avec de si bons sentimens de la Foy, que touché d'une vaine repentance, quand on l'interrogeoit sur l'indisposition de son corps, il respondoit tousiours, que son plus grand mal estoit en l'Ame. Il passoit au reste pour vn homme de fort belle humeur, & de tres-grande franchise. Voila ce qu'en dit Gomare, qui conclud le mesme Chapitre par ces paroles. Il ne laissany richesses, ny autre memoire de luy que celle dont ie viens de parler, & eut d'une Indienne vne fille qu'esposa Dom Francois de Cuena. La Relation de ce dernier Euenement, & de ses circonstances rapportées par l'Autheur susdit, se trouue conforme à celle du Peru, sans qu'il y ait autre difference entre l'un & l'autre, sinon que la Relation du Peru dit, qu'une grande pierre

entraînée

entraînée par vn cheual du haut du Costau, abbatit Dom Pedro d'Aluorado, ce qui pût neantmoins s'entendre de tous les deux, pource que le cheual pouoit en roulant emmener avecque luy quantité de pierres, tant par deuant que par derriere. Outre la Fille dont ie viens de parler, Aluorado auoit encore vn fils Metit, appelle Dom Diego, digne à vrây dire d'vn si braue Pere, comestoit le sien. Il luy ressembloit en toutes ses vertus, & même en sa mort infortunée, pource que luy, & plusieurs autres Gentilshommes Espagnols, s'estant sauuez de la Bataille de *Chelqui Tnc*, furent tuez miserablement par des Indiens le long du chemin, comme il sera dit en son lieu, si nous en venons iusques-là. Ainsî mourut le bon Dom Pedro d'Aluorado, Cheualier de l'Ordre de saint Iacques, & d'vn des meilleurs Gens-d'armes qui eussent porté leur lance iusques dans le nouveau Monde. Sa Mort fut extrêmement sensible dans Cozco à ceux qui l'auoient suiuy dans cec Empire-là; si bien qu'alors, & depuis ils firent dire pour le salut de son Ame quantité de Messes, à quelques-vnes desquelles ie me souuiens d'auoir assisté. Les Cavaliers de sa connoissance ne parloient iamais de luy, qu'ils ne rendissent des témoignages illustres de ses bontez, & de ses hautes vertus. Quelques-vns mesme prenoient grand plaisir à raconter ses actions genereuses, dont ils s'entretenoient souuent dans la Maison de mon Pere, où se faisoient, comme i'ay dit ailleurs, leurs plus ordinaires Assemblées. Mais ils racontoient entre autres choses, Qu'à leur arriuée dans Tumpiz, apres auoir eü vne grande necessité d'eau, plusieurs d'entr'eux se trouuant si abbatus de la fièvre, causée par trop de soif, & de seicheresse, qu'ils ne pûrent mettre pied à terre, Dom Pedro d'Aluorado y descendit. Et qu'alors comme on luy eût apporté de l'eau pour se rafraichir, il n'en voulut point boire, quelque grande alteration qu'il eut, que tous les malades n'en fussent auparauant pourueus. A ces actions charitables estoient semblables toutes les autres bonnes qualitez que ces Cavaliers racontoient d'vn Capitaine si obligeant; bien au contraire de la Relation que Gomare en a eüe, comme il se void par vn Chapitre qu'il en a escrit, intitulé; *De la maniere de viure de Dom Pedro d'Aluorado*. Ce qui me fait croire qu'il falloit que celuy dont il tenoit ce Memoire-là, fut apparemment quelque Enuieux, qui ne pouuant qu'injustement ternir l'esclat de tant d'Exploits memorables de ce

grand homme, qui le rendoient illustre par tout le Monde; auoit recouru à la Calomnie, en disant de luy tout le contraire de ce qui en estoit: En effet, comme mesme Auteheur le reconnut bien depuis; & pour se iustifier de la fausseté des Relations qu'on luy
 Ch. 19.2 atoit données, il dit sur ce sujet. *Si quelqu'un a bien fait, & s'il n'en est point loué, qu'il en rejette la faute sur ses Compagnons, &c.* Par où il vouloit monstrier, qu'en toute sorte de conditions, se trouuent pour l'ordinaire plusieurs Enuieux, & Mésdisans, indignes de la Conuersation des gens de bien, & qui ne scauent faire autre chose qu'inuenter des Mensonges, au lieu de dire la verité toute pure: Mais en voilà trop pour ce Chapitre: Retournons maintenant au Peru, pour raconter ce qui s'y passa, depuis que Dom Pedro d'Aluaroado en fut sorty.

FONDATION DE LA VILLE DES ROIS,
 & de celle de Truxillo.

CHAPITRE XVII.

SI-ROST que le Gouverneur eut satisfait Dom Pedro d'Aluaroado, il enuoya droit à Cozco son compagnon Dom Diego d'Almagre, avec la plus-part des Cavaliers qui auoient accompagné Dom Pedro, pour s'y entretenir avecque le Prince Manco Ynca, & pareillement avec ses deux Freres Jean, & Gonzalo Pigarte. Il leur recommanda sur toutes choses, d'auoir soin de seruir l'Ynca, & de bien traiter les Indiens, afin qu'ils n'entraissent en quelque ombrage, & que l'Ynca ne perdît l'affection qu'il auoit pour eux, puis qu'il estoit venu de son bon gré, se mesler parmy les Espagnols.

Cependant, le Gouverneur demeura dans la Vallée de Pachacamas, avecque dessein de bastir vne Ville le long de la Coste, afin d'y establir le Commerce Maritime. Comme il en eut donc pris les aduis de ses gens, il enuoya des hommes experimenez au fait de la Mer, pour s'en aller tant de là que deçà la Coste, & voir s'ils ne descouucrioient point quelque lieu commode à faire vn Havre, à quoy buttoit principalement sa pretention. Le rapport qu'ils firent fut, Qu'à trois ou quatre lieues de Pachacamac, tirant vers le Nord, & vis à vis de la Vallée de

Rimac, il y auoit vn Port qui leur sembloit tres-commode. Dom François s'y en alla tout à mesme temps. & trouuant ce lieu tres-commode en effect, & pour sa scituation, & pour son abord, il se resolut de bastir là, & de discontinuer le trauail des fondemens qu'il auoit commencé de jeter en la Vallée de Saussa, à trente lieux de Rimac, allant plus auant dans le país.

Ainsi fut fondée la Ville *des Roys*, de la Feste desquels elle prit son nom, l'an 1534. Où il faut remarquer neantmoins, qu'en ce qui est des années, les Autheurs sont d'opinion differente; les vns aduancant, & les autres reculant le temps, auquel les choses sont arriuées; iusques-là mesme qu'il y en a qui posent le plus grand nombre des années, comme qui diroit 1530. & laissent le moindre en blanc, afin de ne se point tromper. Mais sans nous arrester à ces opinions diuerses, nous conterons les années par les choses les plus memorables que nous trouuerons estre aduenues.

C'est le sentiment de tous les Historiens, Que Dom François Pizarre; Dom Diego d'Almagre, & le Recteur Hernand de Luquo, firent leur Triumuirat l'an 1525. Qu'à descouurir le Peru iusques à leur premiere arriuée dans Tumpiz ils mirent trois ans entiers; Qu'ils en employerent autres deux, au voyage qu'ils firent en Espagne, tant pour demander la Conqueste du país descouuert, que pour retourner à Panama, avec les preparatifs par eux faits pour cette Expedition; Que l'an 1531. ils entrerent en l'Isle de Puña, & à Tumpiz; que cette mesme année, au mois de Decembre, aduint la prison d'Arahuallpa, qui au prochain mois de Mars en l'an 1532. fut suivie de sa Mort à Cassamarca, que ce fut encore en cette année là, & au mois d'Octobre, que les Espagnols entrerent dans Cozco, où le Gouverneur demeura iusques en Autil de l'an 1533. qu'il apprit la venue de Dom Pedro d'Aluaro; Qu'au mois de Septembre de la mesme année, il sortit de Cozco, pour satisfaire aux conuentions faites avec Aluaro; Et qu'à l'entrée de l'an 1534. iour de la Feste des Roys, il jeta les fondemens de la Ville, qui en a depuis porté le nom. A raison de quoy il luy donna pour Armes, & pour Deuise, les trois Couronnes de ces saints Roys, & l'Etoile resplendissante qui les guida.

Le Plan de cette Ville-là fut tracé d'une maniere agreable, comme il se void au iourd'huy. Elle est embellie d'une Place, qui

n'a possible point d'autre defect que d'estre trop grande: Les ruiës sont larges, & si droites, que de chaque aduenüe, on decouure diuers Païssages sans aucun obstacle; Dans son milieu, tirant vers le Nort, coule vne fort belle Riuiere, d'où l'on tire plusieurs Canaux, qui arrousent les champs, & passent par toutes les Maisons de la Ville: Elle paroist laide à qui la regarde de loing, pour n'estre point couuerte de tuiles; Car comme le long de cette coste, à le prendre d'un bord à l'autre, & à plusieurs lieües d'estenduë, il ne pleut presque iamais; Ceux du païs couurent leurs Maisons de chaume, ou d'une sorte de paille, qui est extraordinairement bonne; Ils en font plusieurs couches l'une sur l'autre, entre lesquelles ils mettent de la terre, de la hauteur de trois doigts, coupée menu, & paistrie avecque la mesme paille, se contentant qu'elle leur serue comme d'un Parasol contre le Soleil. Les baltimens au reste, tant au dehors qu'au dedans des Maisons, sont tres-bien faits, & se perfectionnent de iour en iour. Il n'y a que deux petites lieües de distance de la Mer à la Ville; qu'on approche d'elle de iour en iour, à mesure qu'on y bastit, sur tout du costé qu'elle est la plus peuplée, comme il se void depuis quelques années, ainsi que i'ay oüy dire: Son temperament est chaud, & humide, vn peu moins que n'est en Esté celuy de l'Andalousie. Que s'il ne l'est pas tant, c'est pource que les iours ne sont pas si longs, ny les nuicts si courtes, cõme elles sont par deçà au mois de Iuillet, & d'Aoust: D'ailleurs s'il y a moins de chaleur qu'en Andalousie; ce n'est que durant le temps auquel le Soleil, pour se leuer plus tard, & se coucher plustost, en eschauffe moins l'air; Et dans l'interualle où la nuit le refroidit plus aussi, pource qu'elle vient plustost, & se retire plus tard neantmoins, comme la chaleur de *quintu est* perpetuelle, & tousiours d'une mesme sorte; cela fait que ceux du païs y sont tous accoustumez, bien que toutesfois pour s'en deffendre ils ne laissent pas d'y apporter les remedes necessaires: car pour cette fin ils s'habillent à la legere, & se tiennent fraichement dans leurs Chambres, & dans leurs Lits: Outre qu'ils empeschent encore le mieux qu'ils peuvent, que les Mouscherons, & les Guespes, dont il y en a quantité en ce païs-là, ne les importunent, ny de iour ny de nuit, y en ayant en tout temps, principalement dans les vallées, où il fait grand chaud. Les Mousches de nuit sont comme celles que nous

auons par deçà, & de mesme couleur, mais beaucoup plus grandes. Les Espagnols, pour encherir par dessus leur piqueure, disent qu'elle penetre si auant, que quand on auroit de grosses hortes, il seroit difficile de s'en deffendre; mais sans vser de cete Hyperbole, il est certain qu'il n'y a, ny bas de soye, ny bas de serge, quand mesme il y en auroit vn de toile par dessous, qu'elles nepercent de leur aiguillon. Les Mousches de iour sont plus petites, & semblables à peu près à celles qui fourmillent par deçà dans les Cabarets à vin, horsmis qu'elles sont de couleur jaune, comme des Gucspes; & si alterées du sang humain, que lors qu'elles sont apres à le succer, elles se laissent creuer, plustost que de lascher prise. L'ayant ouy dire ainsi, i'en voulus faire l'experience, moy-mesme, & trouuay qu'il estoit vray, outre que m'estant laissé picquer à d'autres, ie pris garde que lors qu'elles furent bien saoules, elles ne se pûrent oster d'où elles estoient, qu'à force de ramper, & de se traïner. Les piqueures de ces Mouscherons sont venimeuses en quelque façon, principalement quand elles s'attachent à vne mauuaise chair, où elles font de petites enleueures sanglantes, qui sont neantmoins fort peu de chose. Or comme la Ville des Rois est grandement chaude, quand il suruient quelque humidité qui se mesle parmy la chaleur, la chair y est aussi tost corrompue; si bien qu'il la faut manger à mesure qu'on l'achepte, autrement elle deuient puante; D'où il se void que ce Climat est tout à fait different de celuy de Cozco, & mesme contraire en qualité, l'vn estant froid, & l'autre fort chaud. Les Bourgades, & les Villes peuplées d'Espagnols en la Coste du Peru, sont toutes du temperament de la Ville des Rois, à cause que ce n'est qu'un mesme Climat. Mais quant à ces autres qui sont plus auant dans le País, depuis Qutu iusques à Chusquisca, à la distance de 700. lieuës qu'il y a de Nort. Sud de l'une à l'autre; elles sont toutes fort bien temperées, n'estant ny si froides comme la Ville de Cozco, ny si chaudes comme celle de Rimac; tenant ainsi de l'une, & de l'autre, à la reserue pource que la Ville de Pothosi, où sont les Mines d'argent, scituée dans vn País extrêmement froid: aussi est-ce pour cela que les Indiens le nomment Puña, c'est à dire, inhabitable, pour la froideur excessiue: Ce qui n'a pas empesché toutesfois que l'amour de l'argent n'y ait attiré tant d'Espagnols, qu'elle est vne des plus grandes, & plus delicieuses Villes

qui soient aujourdhuy dans le Peru : mais ce n'est pas vne de ses moindres grandeurs, qu'elle ait deux lieuës de tour, comme le remarque le Pere Acosta.

Liv. 4.
Ch. 6.

Ce que ie viens de dire en general de toutes les Villes que les Espagnols ont fondées dans le Peru, doit suffire, ce me semble, pour m'exempter de la peine de le repeter cy-apres, quand ie parleray de chacune en particulier. Pour reuenir maintenant à celle des Rois, il faut sçauoir qu'apres que Dom François Pizarre en eut ietté les fondemens, & partagé les terres, & les autres heritages aux Espagnols, qui la deuoient peupler, il descendit en la Vallée de Chimo, scituée du costé du Nord, à huitante lieuës de la Ville des Rois, & en la mesme coste, où il fonda vne autre Ville, qu'il voulut estre appellée Truxillo, du nom de son pais, afin d'en laisser quelque memoire. Il donna diuers Departemens d'Indiens aux premiers Conquerans, qui tous ensemble imposèrent leurs propres noms aux Prouinces, qui leur furent données pour reconnoissance des grands trauaux qu'ils auoient soufferts en la Conqueste de ce Pais-là. Il en fit de mesme en la Ville des Rois, avec vn grand applaudissement, & vne commune satisfaction de tous les Habitans: Car il leur sembloit desia de voir la Paix establie dans toutes les Prouinces, puis qu'on les peuploit ainsi, & que l'on commençoit à gratifier les premiers, selon leurs merites; ce qui leur donnoit esperance qu'on en feroit de mesme des autres. C'estoit-là l'occupation qu'un si braue Cavalier se donnoit, qui n'estoit pas moins loüable, que le furent tous les autres emplois de sa vie. Mais en ayant assez dit pour le present, nous reuiendrons à d'autres euemens, qui se passerent à mesme temps entre les Indiens.

LE MESTRE DE CAMP QUIZQUIZ
est mis à mort par ses gens.

CHAPITRE XVIII.

AFIN de ne rien obmettre de ce qui aduint en ce temps-là de plus memorable dans le Peru, il est à propos que nous parlions icy du succez tragique du Mestre de Camp Quizquiz, & par mesme moyen du Capitaine Huaypalca, & de tous leurs

gens de guerre. La Viétoire qu'ils auoient emportée sur Dom Pedro d'Aluarado, & Dom Diego d'Almagre, en ttois diuerſes rencontres, les rendoit ſi preſumptueux, & ſi vains, qu'ils ſ'imaginoient de ſia d'auoir chaffé les Eſpagnols de tout cét Empire-là: mais celuy de tous qui le croyoit le plus, eſtoit le Capitaine Huaypalca, qui en l'abſence du Meſtre de Camp Quizquiz, & dans le plus fort du Combat, fut le principal Miniſtre de ce qui ſ'y paſſa: Ainſi voyant que tout luy auoit bien reüſſi, il en eſtoit deuenu ſaltier, qu'il ne ſe pouuoit rien adjouſter à ſon inſolence. Ces deux Capitaines ſ'en allerent donc à Quito, avecque deſſein de leuer des troupes, & de ſe pouruoir de toute ſorte de munitions, pour faire la guerre aux Eſpagnols; Mais apres quelques iournées de chemin, ils ſe trouuerent bien loin de leur compte; pourçe que les Curacas en particulier, & les Indiens en commun, faſchez de la trahiſon du Meſtre de Camp Ruminai, & apprehendant qu'un autre n'en fit de meſme, le fuirent pluſtoſt qu'ils ne le ſuiuirent, & ne vblurent iamais entendre à leur donner le moindre ſecours; à quoy particulièrement ils furent portez, pour ne voir en toute leur Armée vn ſeul Capitaine de Sang Royal, auquel ils deüſſent obeïr: outre qu'ils ne ſçauoient à qui des deux demeureroit le Royaume de Quito, & s'il ne tomberoit point pluſtoſt ſous la puïſſance de quelque Succéſſeur d'Atahualpa, ſe diſant Heritier legitime, & vniuerſel de tout cét Empire-là.

Parmy ces obstacles, & ces incommoditez de viures, le Tyrap Quizquiz ne laiſſoit pas de haſter ſa marche, quand il apprit que les Coureurs vepoient d'eſtre arreſtez par Sebaſtien de Belalcaçar, qui ſ'en ſaiſit, par le moyé de quelques aduis que les Indiens ſes Amis luy donnerent. Car comme ils n'aspiroient qu'à la Paix, qu'ils ſe promettoient d'auoir bien toſt avecque les Eſpagnols, ils eſtoient ennemis mortels de tous ceux qui leur parloient de Guerre: de ſorté que n'y ayant point ſur pied d'autre Armée que celle-cy, ils deſiroient de la voir deſfaite; Ce fut donc la cauſe pour laquelle ils ſe mirent dans l'intelligence de Belalcaçar, auquel il fut facile de mettre en deſſubte les Coureurs de quizquiz, & d'en faire pluſieurs priſonniers. Cependant ceux qui ſ'eſchapperent de cette rencontre, l'aduertirent de cét Eſcheé de ſes gens, & que les Viracochas eſtoient en grand nombre, pour le deſabuſer de l'opinion qu'il auoit que

les Espagnols ne marcholent point tous en Corps avecque Dom Pedro d'Aluárado, & Dom Diego d'Almagre. Alors le Mestre de Camp Quizquiz, ayant assemblé ses Capitaines, pour aduifer avec eux à ce qu'il falloit faire en tel cas, leur dit, Qu'il luy sembloit à propos de faire retraite pour aller chercher des viures, principale chose qui leur manquoit; & qu'après s'en estre pourueus, ils iroient donner sur les Viracochas, & ne cesseroient de les pourfuiure, qu'ils ne les eussent entièrement desfaits. Les Capitaines, & Huaypalca, qu'ils reconnoissoient pour General, depuis la dernière Victoire gagnée, luy répondirent, Qu'ils ne trouuoient point de meilleure expedient, que d'aller chercher les Espagnols, pour se rendre à eux, & leur demander la Paix: Que c'estoit folie de penser qu'on les pût assuiettir par les Armes, puis que par l'esperance qu'ils auoient faite de leur valeur, ils les auoient tenu pour ennemis: Qu'il leur estoit difficile d'auoir des Viures, parce que les Indiens ne leur vouloient plus obéir; Qu'à n'en ayant point, ils ne pouuoient faire la Guerre, ny vaincre les Victorieux; Qu'il valloit mieux les auoir de près que de force, sans se mettre en peine de résister à des gens avec lesquels ils pouuoient s'accommoder; & qui pour estre venus du Ciel, ne leur refuseroient point leur Amitié; & qu'il leur seroit inutile de tenter dauantage la fortune de la Guerre, puis qu'ils voyoient à toute heure s'accomplir la prediiction de leur Tey Huayna Capac, par laquelle il les auoit aduertis, que ces Hommes incognus qui viendroient à eux, se rendroient Maistres de son Empire.

Quizquiz, comme courageux, & aguerri qu'il estoit, ne voulant point ouïr parler de se rendre, s'offensa d'abord de la proposition que ses Capitaines luy en auoient faite; puis s'estant mis à blasmer la bassesse de leur courage, leur répondit avec des paroles altieres, Qu'il n'auoit aucunement besoin de conseil: Qu'en cela, & en autre chose, il scauoit ce qu'il luy falloit faire; Qu'estant leur Capitaine, il leur commandoit absolument de luy obéir, & de le suivre, pour mener à bout l'entreprise commencée: Mais les Capitaines, qui dès leur première rencontre avec Dom Pedro d'Aluárado, & Dom Diego d'Almagre, auoient commencé de perdre le respect qu'ils deuoient à Quizquiz, leur ayant semblé que pour sa couardise, & pour ne s'estre porté à combattre les Espagnols en cette occasion, il auoit coupé les ailes à la Victoire, en murmurèrent bien fort, iusques à tesmoigner qu'ils ne se soucioient guère de luy: Ce qui fit qu'ils luy répondirent hardiment, Que puis qu'il auoit tant d'auesien pour les Viracochas,

qu'il

qu'au lieu de traiter de Paix avec eux, il ne demandoit qu'à leur faire la Guerre, En que d'ailleurs il se promettoit de gaigner la Victoire; Qu'il ne differas pas davantage à combattre les Castillans, qui estoient si près de luy, Que l'occasion s'en présentant, il ne deuoit point la laisser échapper; Que deffoit lacheté de songer à la retraite; Que l'ayant fait luy mesme, il la leur imputoit sans raison; Qu'ils estimoient bien plus glorieux de finir leurs iours dans le Combat, que de mourir misérablement de faim, & se voir reduits à chercher à viure dans les Deserts; Et qu'en vn mot, c'estoit là leur dernière resolution. Quizquiz se facha d'oïr parler ses Capitaines avecque tant de liberté, ce qui augmenta le soubçon qu'il auoit depuis quelques iours, qu'on tramoit quelque Reuolte dans son Armée: chose qu'il se mit encore plus auant dans l'Esprit, par le mespris que ses Capitaines faisoient de luy de iour en iour, en defferant beaucoup moins à luy qu'au Capitaine Huaypalca. D'où il aduint qu'il leur voulut bien donner à cognoistre, qu'il s'en apperceuoit, pour les aduertir secretement de se deffaire du mauuais dessein qu'ils pouuoient auoir, plustost que de le contraindre à les en punir. Surquoy les reprenant de leur procedé trop temeraire, il leur dit, Que tesmoigner si peu de respect & d'obeïssance à leur Mestre de Camp, estoit assurément vne chose qui approchoit fort de la Reuolte, & que s'ils ne s'en chastioient, il les en sçauroit bien chastier luy-mesme, & terminer la Rebellion par le supplice de celuy qui en seroit Autheur. Huaypalca prit pour luy ces paroles, si bien qu'en orgueil de la Victoire passée, & par le tesmoignage de respect que les Soldats luy rendoient, ils'aduifa d'vne chose que pas vn d'eux n'eut iamais imaginée, qui fut de luy arracher de la main l'Enseigne de Capitaine, qui estoit vn Iauclot, ou vne Zagaye, qu'ils appellent *Chuquiapu*, comme qui diroit *Lance de Capitaine*, à peu près semblable à nos demy piques. Cela fait, il luy en donna dans le cœur, & tous les autres à son exemple se ietterent sur luy, avec les Armes qu'ils se trouuerent en main; Voila quelle fut la fin de Quizquiz, le dernier, mais le plus fameux de tous les Capitaines, & Ministres d'Atahualpa. Il mourut de la main de ses gens, comme firent aussi tous ses autres Compagnons. Ce qui verifie assez combien il est veritable, que par vne iuste punition du Ciel tous les Autheurs de la Tyrannie trouvent tousiours d'autres Tyrans qui les ostent du Monde. Apres cét Acte tragique, Huaypalca, &

ses Capitaines licentierent les Soldats; & se desguisant le mieux qu'ils pûrent, se retirèrent qui çà, qui là, aux lieux qu'ils creurent leur deuoir estre plus fauorables, pour se garentir des plaintes, & des soubçons qu'ils auoient de leurs gens mesmes, par les Exemples qu'ils en voyoient à toute heure.

*DOM DIEGO D'ALMAGRE SE FAIT
Gouuerneur, sans en estre authorisé du Roy, & passe
un Accord avec le Marquis.*

CHAPITRE XIX.

LA Discorde ayant fait parmy les Indiens vn stratageme digne d'elle, en voulut faire de mesme du costé des Espagnols; & possible en fut-elle venue à bout, si la Paix, & l'Amitié, qui sont ses mortelles Ennemies, ne s'y fussent opposées. Car il faut sçauoir qu'au bout de quelques mois, que les choses que i'ay dites se furent passées, on eut des nouuelles au Peru de l'arriuée d'Hernand Pizarre en Espagne, de la bonne reception qui luy fut faite, & à son Tresor, & des biens dont sa Maiezté le gratifia, honnorant de plus le Gouuerneur son Frere, du tiltre de Marquis, comme le rapporte Augustin de Carate par ces paroles.

Vne des principales choses dont le Gouuerneur François Pizarre enuoya supplier sa Maiezté, pour recompense des seruices qu'il luy auoit rendus en la Conqueste du Peru, fut qu'elle eut agreable de luy donner à perpetuité, pour luy, & ses Descendans, 20000. Subiets Indiens, en la Prouince des Atabillos, avec les rentes, tributs, Iurisdicctions, & autres choses semblables, dont il luy seroit permis de iouir, sous la qualité de Marquis. En effet, sa Maiezté luy accorda sa Requeste, touchant le tiltre de Marquis de cette Prouince-là: Mais quant aux Indiens qu'il luy demanda, il fit response; Qu'il s'informerait de l'estat du Pais, pour voir si cela se pouuoit sans preiudice, & qu'il donneroit ordre à faire tout ce qui seroit raisonnable pour luy. Dès-lors mesme, dans le Breuet que le Roy luy donna, il l'intitula Marquis, voulant qu'à l'aduenir on l'appellast ainsi, comme on fit, & comme nous ferons désormais, en tous les endroits où nous parlerons de luy dans cette

Histoire, &c. Outre ces gratifications, il obtint encore, que les bo-
nes de son Gouvernement eussent d'estenduë certain nom-
bre de lieües, que le mesme Carate n'a point spécifiées. Quant à
Hernand Piçarre, il fut honoré de l'Ordre de Chevalier de S.
Iacques, & receut quelques autres gratifications. Dom Diego
d'Almagre ne fut pas oublié non plus, sa Maieité luy ayant don-
né le tiltre de *Mareschal du Peru*, & vn Gouvernement de cent
lieües de longueur vers le Nord-Sud, en suite de celuy du Mar-
quis; où vous remarquerez que ce second Gouvernement fut
appellé *la nouvelle Toledé*, à la difference du premier, nommé
Castille la neuue.

Toutes ces nouvelles vinrent d'Espagne à Dom Diego d'Al-
magre, comme il estoit dans Cozco avecque le Prince Manco
Ynca, & avec Iean & Gonçale Piçarres, Freres du Marquis. Les
ayant receuës, sans attendre, ny le Breuet de sa Maieité, ny d'en
auoir des assurances plus amples, il prit aussi-tost le tiltre de
Gouuerneur, par vne maniere d'ambition, qui est ordinaire à
tous ceux qui veulent auoir du Commandement sur autrui. Or
pource qu'il luy sembla que le Gouvernement du Marquis
auoit 200. lieües de long, depuis l'Equinoctial iusques au Sud,
soit qu'on en prit la dimension par la Coste, ou bien par la terre,
ou par le Ciel mesme; tant y a qu'apperceuant que sa Iurisdi-
ction n'alloit pas iusques à Cozco, & qu'à son esgard cette mes-
me Ville estoit de son Gouvernement; il donna quelques De-
partemens d'Indiens, bien qu'il n'en eut encore aucun pouuoir
de sa Maieité. Avecque cela, pour faire paroistre qu'il les don-
noit comme Gouuerneur absolu, & non par l'autorité d'au-
truy, il s'aduisa de renoncer au pouuoir qu'il auoit eu du Mar-
quis son Compagnon, de gouverner cette Ville-là. Toutes les-
quelles choses ne furent faites que par les mauuais conseils de
plusieurs Espagnols, Perturbateurs du repos Public, qui luy di-
rent, pour satisfaire à leur Ambition propre, Qu'il falloit que
cela fut; Et qu'en l'execution de ses desseins ils se declareroient
pour luy. Mais d'un autre costé les sentimens de ceux-cy furent
contredits, par Iean, & Gonçale Piçarres, comme encore par
plusieurs autres Caualliers d'Estremadure, qui estoient venus
avec Dom Pedro d'Aluarado. Les principaux qui s'y trouue-
rent joints furent Gabriel de Rojas, Garcillasso de la Vega, An-
thoine Altamirano, Alonse d'Aluarado, & la plus-part des Sol-

dats, les vns & les autres se monstans si passionnez, qu'ils en vinrent aux mains plusieurs fois, si bien qu'il y en eut quelques vns de blesez, & mesme de morts.

Cependant, la nouuelle de cette Esmeute estant venuë au Marquis, comme il estoit à Truxillo, luy fit aussi-tost prendre la poste, à la mode du País, c'est à dire, à la faueur des Espauls des Indiens, qui le portèrent à Cozco, iusques où il y auoit deux cens lieues depuis Truxillo, d'où il estoit party. Or bien que ce Voyage fut long, il ne laissa pas pourtant de fier sa personne aux Indiens, & de s'en aller sans gardes, se representant qu'il auoit mis entre les mains de ses Freres le Prince *Manco Inca* (que nous n'appellons point Roy, pource qu'il ne regna iamais) pour l'amour duquel les Indiens desirieux d'obliger le Marquis, & les Espagnols à luy rendre son Empire, faisoient toute sorte d'efforts pour les seruir, & les regaler. Le Marquis arriué à Cozco esteignit incontinant par sa presence toutes les dissentions que la Discorde & l'Ambition auoient allumées; l'Amitié de ces deux grands Hommes, qui auoient tousiours vescu comme Freres, ayant pris de si profondes racines, que les mauuais Conseillers tâchoient en vain de les arracher, pource que quelque broüillerie qu'ils eussent ensemble, ils se reconcilioient tousiours à la fin. Dom Diego demeura tout confus de la faute qu'il auoit faite, sans daigner attendre les lettres du Roy, & s'en excusa neantmoins, disant qu'il ne pensoit pas que celuy à qui sa Majesté auoit fait vne grace, eut besoin de papiers pour s'en preualoir. Le Marquis luy pardonna, & ainsi tous deux se remirent si bien, qu'ils sembloient n'auoir iamais eu la moindre piccoterie. En suite dequoy ils iurerent sur le saint Sacrement, de n'estre iamais l'un contre l'autre, & de se maintenir fermes dans l'vnyon qu'ils auoient faite, quelques obstacles quis'y opposassent. Pour plus grande seureté de cette Alliance, & de cette Paix, ils demurerent d'accord avec ceux de leur Party, que Dom Diego s'en iroit à la Conqueste du Royaume de Chile, d'où les Indiens du Peru l'auoient aduertty, qu'il estoit abondant en or, & mesme de l'Empire des Yncas; Que celsa se trouuant veritable, ils en demandoient le Gouvernement à sa Majesté, pour Dom Diego d'Almagre; Et qu'en cas qu'il n'en fut point contant, ils partageroient tous deux le Peru. Cette proposition fut approuuée de ceux qui l'ouïrent,

quoy qu'il ne laissât pas d'y auoir de meschans Esprits, qui dirent, que Piçarre ayant esté si bon Amy d'Almagre, le vouloit enfin chasser du Peru, afin que luy & les siens fussent Maistres de tout le Païs; Qu'au reste, pour l'exterminer loing d'eux, & luy faire perdre la part qu'il auoit à vn si grand Empire, ils le leurroient de l'esperance qu'ils luy donnoient de se rendre Maistre d'un Païs qui n'auoit que cent lieues d'estenduë. Et d'autant que le bruit des grandes Richesses du Peru, y auoit attiré tant d'Espagnols de toutes parts, que ce qu'il y auoit de gain ne suffisoit point pour les premiers Conquerans, s'il les faloit recompenser, comme il estoit iuste, selon leur courage, & leurs merites; il fut resolu entr'eux d'enuoyer à de nouuelles Conquestes, semblables à celle de Dom Diego d'Almagre: ce qu'ils iugerent à propos, afin de contenter vn chacun par le partage des Terres; d'employer les Espagnols à les conquerir, de les destourner ainsi de l'oïsiueré; & de les enpescher de tramer de nouueaux troubles, sollicitez par vn secret despit de n'auoir part à tant de belles Terres, qu'ils voyoient qu'on donnoit tous les iours à leurs premiers Conquerans. Apres l'auoir ainsi concerté, ils donnerent ordre que le Capitaine Alonse d'Aluarados'en allât dans la Prouince des *Chachapuyas*, les Peuples de laquelle n'auoient daigné obeyr aux Espagnols, s'assurant sur les grands aduanrages que leur donnoit sur eux leur païs, fortifié naturellement par des Rochers, & des chemins rudes, où les cheuaux ne leur pouuoient nuire; outre qu'ils ne manquoient ny de force, ny de courage. Par mesme moyen le Capitaine *Garcillasso de la Vega* fut enuoyé à la Conqueste de la Prouince qu'on nomme par Ironie *Bonne-aventure*, & Iean Porcel à celle que les Espagnols appellent *Bracamoros*, & les Indiens *Pacamuru*. En suite dequoy ils trouuerent bon encore d'enuoyer du secours au Capitaine Sebastien de Belalcaçar, party depuis peu, pour aller conquerir le Royaume de *Quitu*.

Ces choses estant ainsi concludës entre Dom Diego d'Almagre, & le Marquis Dom François Piçarre; & les autres Conquestes publiées, chaque Capitaine se tint prest, & se pourueut de gens pour la sienne. Alonse d'Aluarado leua 300. hommes; *Garcillasso de la Vega* 250. & Iean Porcel autant. Auecque ces troupes ils prirent chacun sa route, où ils souffrirent de grands trauaux, pour les hautes Montagnes, & les Riuieres impetueu-

ses qu'il leur falloit trauffer, y en ayant quantité dans ces Provinces, comme nous le remarquerons cy-apres. Quant au secours qu'ils donnerent à Sebastien de Belalcazar, il fut de 150. Soldats, outre que Dom Diego d'Almagre en mit sur pied plus de 550. pour luy; Parmy lesquels il y en eut plusieurs pourueus de bons departemens d'Indiens, qui pour faire ce voyage se resolurent de les quitter, pensant d'en auoir de meilleurs à Chily, pour le bruit que la Renommée auoit semé des grandes Richesses de ce pais-là. Car à ces commencemens il n'y auoit point si chetif soldat Espagnol, qui n'eut assez d'ambition, pour s'imaginer que tout le Peru ensemble, estoit fort peu de chose pour luy. Almagre presta plus de 35000. Ducats à ses gens, pour s'équiper d'Armes, & de Cheuaux: si bien qu'à leur partement ils se trouuerent fort lestes. Il enuoya d'abord Iean de Sahauedra, Cavalier de Seuille, que i'ay autrefois cognu, avecque 150. hommes, pour aller deuant, & s'asseurer des passages dans le Pais, où il n'y auoit rien à craindre, pource que le Prince Manco Ynca estoit avecque les Espagnols, auquel tous les Indiens esperoient qu'ils deussent rendre son Empire. Cependant Almagre laissa dans Cozco le Capitaine Ruiz Dias, & Iean de Harrada son intime Amy, avec ordre de leuer des gens de secours, pour les luy enuoyer, s'il en estoit besoin, comme il y auoit grande apparence, veu les merueilles qu'on publioit de la valeur du Peuple de Chile.

DOM DIEGO D'ALMAGRE RECOIT VN
*grand Eschec en son Armée, & un fort bon
 traitement des subjets de l'Ynca.*

CHAPITRE XX.

A PRES auoir mis ordre à toutes les choses que nous auons dites, Dom Diego d'Almagre sortit de Cozco, au commencement de l'an 1535. accompagné d'un Frere de Manco Ynca, qu'on appelloit *Panllu*, & pareillement du grand Prestre des Indiens, par eux nommé *Villachumu*, & par les Espagnols *Villakoma*. Il emmena de mesme plusieurs Gentils-hommes Indiens,

chargez de munitions, & de viures. Ils furent en tout plus de 15000 Indiens, que le Prince Manco Ynca fit marcher en faueur des Espagnols, pour les obliger à le reſtablir dans ſon Empire, principale conſideration, pour laquelle il ſ'eſtudioit à leur plaire en toutes choſes : Auſſi fut-ce pour le meſme ſujet qu'il voulut que ſon Frere, & le grand Preſtre les accompagnaffent, afin qu'ils en fuſſent mieux reſpectez, & ſeruiſſent le long du chemin, dequoy neantmoins les Hiſtoriens ne demeurent pas d'accord; Au contraire, changeant l'ordre des euenemens, ils diſent qu'il leur fit trouuer bon de reuer Dom Diego, & tous ſes Soldars, au pays des Charcas, ou en tel autre lieu qu'ils auiſeroient; Ce qu'il leur remit en memoire, à ce qu'ils tiennent, par des Courriers enuoyez exprés, quand il ſceut au vray qu'ils ne vouloient point luy rendre ſon Empire, comme il ſera dit cy. apres.

Sur ces entrefaites Jean de Sahauedra, qui ſ'eſtoit mis deuant, arriua en la Prouince des Charcas, qui eſt à 200. lieuës de la Ville de Cozco, ſans rencontrer en chemin aucune choſe qui vaille la peine d'eſtre racontée, mais toute ſorte de bon traitement, que les Indiens luy firent, & à tous ſes gens. Il y trouua Gabriel de Rojas, que le Marquis auoit enuoyé quelques iours auparavant, afin qu'il tint cette Prouince à ſon nom, en qualité de Capitaine: Sahauedra neantmoins voulut l'arreſter, ſans en ſçauoir la cauſe; Et il ſembla que la Diſcorde ne pouuant ſe meſler avec les Indiens, pour eſtre d'une humeur douce, & pacifique, ſe voulut fourrer entre les Espagnols, pour ietter au milieu d'eux ſes flambeaux ſeditieux, & funeſtes: Mais Gabriel de Rojas aduertuy du deſſein de Sahauedra, ſ'abſenta tout auſſi-toſt, ſans faire ſemblant de rien; & ſ'en alla droit en la Ville des Roys, par vn chemin tout contraire à celui qu'auoit pris Dom Diego d'Almagre; & ſes ſoixante Compagnons ſ'en allerent à Chily. Dom Diego arriué aux Charcas, ſans aucune mauuiſe rencontre, appreſta toutes les choſes qui luy eſtoient neceſſaires pour ſon voyage, qu'il voulut faire par la Montagne, & non pas par la Coſte, pour auoir appris que le chemin en eſtoit beaucoup plus court. Ainſi bien que Paullu, & Villachumu l'aſſeuraffent qu'on ne pouuoit aller par là qu'à certain temps de l'année, où les aduenües de ces Rochers effroyables n'eſtoient pas ſi couuertes de neige qu'aux autres ſaiſons, ſi eſt-ce qu'il ne les voulut point croire, & leur dit avec vn imperieux Aſcendant,

Que rien n'estoit impossible à ceux qui venoient là, pour descourir, & gagner le Peru; Que la Terre, & les autres Elements leur auoient obeï par le passé, & qu'à l'aduenir les Cieux leur seroient de mesme propices, & fauorables. Avec cette resolution, il prit le chemin de la Montagne, qui ne fut descouuert par les Yncas, qu'apres qu'ils eurent conquis le Royaume de Chily, s'estant aduisez d'aller par là, pource qu'y estans entrez par la Coste, ils en auoient trouué le chemin trop long: Quoy qu'il en fut neantmoins, on ne passoit ordinairement ces Montagnes-là que vers Noel, qui est leur Printemps, comme c'est icy nostre Hyuer, encore y apportoiennent ils de grandes precautions, à cause des Neiges, dont elles sont couuertes toute l'année.

Comme Dom Diego d'Almagre se deffiant du conseil de Paullu, se fut engagé dans vn sifruide Pais, il en porta la peine bien-tost apres: Car à quelques iournées de là, ils trouuerent d'estranges obstacles dans la route qu'ils prirent. Le premier fut, qu'ils ne pouuoient marcher à cause des neiges, qui les obligeoient à tout moment à les oster à force de bras, afin de s'ouurir vn passage pour aller plus auant. Le second, que les viures commencerent à leur manquer, quoy qu'ils creussent d'en auoir pris trois fois plus qu'il ne leur en falloit: Et le troisieme, Que suiuant la supputation des Cosmographes, & des Astrologues, ces Montagnes portant leur sommet iusques dans la moyenne Region de l'Air, le rendoient si froid, pource que tout y est couuert de neige, principalement en vn temps tel que celuy que nos Aduanturiers auoient pris, qui estoit en Hyuer, * à le prendre selon l'ordre de leurs saisons, aux iours les plus courts, & les plus froids de l'année; qu'il y eut quantité d'Espagnols, de Nègres, d'Indiens, & de cheuaux, qui furent gelez & transis de froid. Mais les Indiens entr'autres, pour estre vestus à la legere en eurent la-meilleure part. De 15000. qu'ils estoient, il y en eut plus de 10000. de morts, & plus de 150. du costé des Espagnols, sans y comprendre ceux à qui les doigts des pieds & des mains tomberent insensiblement par la violence du froid: resmoin Hierosme Castilla, que i'ay conneu, natif d'une des meilleures familles de Camora, que la rigueur d'un si mauuais temps rendit comme perelus de ses membres. A cette perte de tant de gens, se trouua jointe celle du Bagage, qui aduint par la mort inopinée des Indiens qui le portoient: Mais, enfin, les Espagnols se

* C'est-
roit en
nostre
Climat
environ
la Saint
Jean.

se tirèrent de la Montagne, si fatiguez & si foibles, qu'ils n'en pouuoient presque plus. Ce leur fut vn extrême bon-heur, de trouuer au lieu où ils arriuerent, des Indiens qui les traitterent en amis, & avec la mesme tendresse qu'ils auroient pu tesmoi-gner à leurs propres Enfans. Car comme ils estoient subjets de l'Ynca, & de la Ville de *Copajapu*, annexée à son Empire; quand ils sceurent que Paullu, Frere de leur Prince, & le Principal de leurs Prestres, accompagnoit les Espagnols, ils les receurent avec grande ioye, & leur firent tout le bon traitement qui leur fut possible: Qu' si par malheur, au lieu de si bons Hostes, qui les logeoient si bien, ils eussent trouué des Ennemis en armes contre eux, assurément c'estoit fait de leur vie.

Tandis que les Viracochas prenoient vn peu de relasche, apres auoir souffert des trauaux sans nombre, & qui ne sont pas imagi-nables, Paullu Ynca, & son Parent Villachumu, firent vne Harangue aux Curacas, & aux Capitaines de l'Empire des Yncas, par laquelle ils leur rendirent compte de tout ce qui estoit arriué dans le Peru, sur le sujet de Huascar Ynca, & d'Atahuall-pa. Ils leur declarerent comme les Espagnols l'auoient tué, pour vanger la mort de leur Roy, & de toute la Famille Royale; Qu'à present ils auoient en leur pouuoir le Prince Manco Ynca, legi-time Heritier de l'Empire: Qu'avec ce qu'ils le traittoient hon-orablement, ils luy faisoient de grandes promesses de le resta-blier dans le Trosne de ses Peres; Qu'à raison de cela, tous les In-diens deuoient regaler, & seruir les Viracochas, pour les obliger à la restitution de l'Empire; Que leur Prince Manco Ynca s'y attendoit d'aurant plus, que ces hommes-là estoient Fils, & des-cendans du Soleil, Pere des Yncas, nom qu'ils leur attribuoient à bon droict, & mesme celuy de leur Dieu Viracocha; Et que leur General venu avec eux, estoit Compagnon, & Frere de ce-luy de Cozco. Qu'au reste les seruices qu'ils rendroient à l'vn, tiendroient lieu d'obligation à l'autre, & que le plus grand plai-sir qu'on leur pourroit faire, estoit de leur donner grande quan-tité d'or, d'argent, & de pierrerie, dont ils estoient passionné-ment amoureux; & partant, puis qu'il n'y auoit que de l'or en ce Pais là, qu'ils en fissent le plus grand amas qu'ils pourroient, pour leur en faire vn present.

Les Indiens de *Copajapu*, furent extrêmement réjouïs de l'es-perance qu'on leur donna du reestablissement de leur Prince: tel-

lement que ce mesme iour ils mirent à part la valeur de plus de deux cens mille Plaques d'or, qu'ils prirent dans le Tresor des presens qu'ils auoient destineez pour leurs Yncas, ausquels ils auoient accoustumé d'en faire de grands; mais ils s'en desistèrent, depuis qu'ils sceurent à Chily, que les deux Freres Huascar, & Atahuallpa, se faisoient la Guerre l'un à l'autre; & mesme les Capitaines Yncas, qui gouuernoient ce Royaume-là, discontinuerent leurs seruices, en attendant à qui demeureroit la Couronne: Que s'ils n'allerent secourir leur Roy, ce fut, & pour ne point abandonner Chily, & pour la grande distance du chemin; mais sur tout, pour n'en auoir eu aucun ordre de leur Ynca. Paullu apporta luy-mesme à Dom Diego d'Almagre, l'or qu'on venoit d'amasser, le luy presentant au nom de son Frere Manco Ynca, & de tout le Royaume de Chily. Almagre, & ses gens, ne se trouuerent iamais si contents qu'ils furent alors, de voir que les Indiens auoient tiré tant d'or d'une seule Ville, & en si peu de temps; Ce qui leur fit croire, qu'il falloit necessairement qu'en tout le Pais il y en eut une tres grande abondance. Pour reconnoissance de ce Present, Dom Diego d'Almagre luy fit un compliment de fort bonne grace, & l'assura qu'il le satisferoit avec aduantage en toutes les occasions qui se presenteroient. Ces promesses furent tres-agreables à Paullu, qui s'estudia dès-lors, de les regaler de plus en plus par de semblables Presens; de sorte qu'à l'heure mesme, il enuoya dire à ceux des autres Villes, & des prochaines Vallées, qu'ils luy enuoyassent tout l'or qu'ils se trouueroient auoir amassé, pour le donner à leur Prince, disant qu'il le falloit presenter aux Viracochas, qui estoient Freres de l'Ynca. D'où il aduint, que fort peu de iours apres ce mandement, ils apporterent aux Indiens une quantité d'or, qui valoit bien trois cens mille Ducats, que l'on presenta tout aussi-tost à Dom Diego d'Almagre. Luy cependant, extrêmement aise de ce qu'un si riche Pais luy estoit escheu en partage (car il le tenoit desia pour sien) fit de grandes generositez, qu'il donna comme pour arres de sa bonne Fortune, tant pour s'acquérir de la gloire, dont il estoit fort amoureux, qu'afin d'animer ses gens à luy estre fideles. Pour les y porter encore plus, il tira en leur presence les obligations qu'ils luy auoient faites, pour reconnoissance de l'argent qu'il leur auoit presté en diuers temps, qui se montoit à plus de cent mille Ducats; puis les

prenant l'une apres l'autre, il les rompit toutes, disant à ses Creanciers, *Qu'il les gratifioit de cela, & qu'il luy desplaisoit que la somme ne fut plus grande*; alors s'adressant aux autres, il leur fit diuers Presens; & ainsi il n'y eut pas vn seul d'entr'eux qui ne fut satisfait de luy par dessus son esperance. Aussi François Lopez de Gomare ayant raconté cette action; *Ce fut, dit-il, vne liberalité de Prince, non pas de Soldat; & toutesfoiſ, apres auoir obligé tant de gens, il n'eut pas vn Amy qui l'assistast d'un drap pour l'enfanelir, &c.*

DE NOUVELLES PRETENTIONS
s'opposent à la Conqueste de Chily : Dom Diego
d'Almagre parle de s'en retourner au
Peru, & pourquoy.

CHAPITRE XXI.

ALMAGRE ayant bien fait reposer ses gens, & leurs cheuaux, prit resolution d'aller conquerir les autres Prouinces, & Vallées du Royaume de Chily, qui n'estoient point sujettes à l'Empire de l'Ynca; car pour celles qui l'estoient, elles obeïrent toutes au General, dès qu'elles virent que Paullu, Frere de leur Roy, venoit avec luy. Mais devant que passer outre, il descouurit son dessein au mesme Paullu, qu'il pria de le vouloir assister de sa faueur, & de ses forces à faire cette Conqueste: En effet, Paullu reconnoissant que ce qu'il feroit pour luy réussiroit au bien de son Frere, tira ce qu'il pût auoir de gens des garnisons du Royaume; & apres auoir fourny l'Armée de viures, partit avecque Dom Diego, pour luy ayder à conquerir les Prouinces de *Purumaca*, d'*Antalli*, de *Pincu*, de *Cauqui*, & quelques autres de cette Frontiere-là, iusques à celle d'*Arauca*. En cette Expedition, il eut de grandes affaires à demesler avecque ceux du Pais, qui tesmoignerent bien aux Espagnols, qu'ils n'estoient pas moins hommes de cœur, qu'adroits & habiles à se seruir de leurs Armes, principalement des Arcs, & des fleches, dont ils firent des coups merueilleux, que ie raconterois en particulier, & leurs Combats aussi, qui furent long temps opinia-

stre de part & d'autre, n'estoit qu'il faut que ie retourne au Peru. Avec tout cela neantmoins, quelque resistance que fissent les Ennemis, ils ne pûrent empescher que l'aduantage ne demeurast aux Espagnols, par le grand secours que Paullu, & ses Indiens leur donnerent; ce qui leur fit espérer, qu'en moins de deux ans ils gaigneroient ce Royaume-là. Mais le malheur voulut que ces bons succez furent trauersez par la Discorde, qui ne cessa iamais de traiailler, & de mettre mal ensemble ces deux grands Hommes, qu'elle ne les eut perdus tout à fait, comme il se verra par la suite de ce Liure.

Cinq mois apres que le Capitaine Almagre fut entré dans Chily, & qu'il y eut gaigné diuerses Victoires, où il y eut neantmoins beaucoup de sang respandu du costé des Espagnols, le Capitaine Ruiz Dias, & Iean de Herreda, arriuerent-là de bonne fortune, avecque cent Espagnols, apres auoir fait quelque séjour dans Cozco, ainsi que nous auons dit ailleurs, afin d'y leuer des gens de secours, pour les amener à Diego d'Almagre. Ils prirent la mesme route qu'ils auoient prise : Et bien qu'aux aduenues de la Montagne ils eussent trouué moins de neige que luy, pour estre au mois de Nouembre, qui est comme icy le mois de May; si est ce que plusieurs Indiens, & quelques Espagnols ne laisserent pas d'y mourir de froid: Mais ceux qui en reschapperent, furent attaquez d'un autre costé d'une faim si grande, qu'ils en fussent tous peris, sans la rencontre qu'ils firent des cheuaux que Dom Diego d'Almagre, & ses gens, laisserent morts dans ces formidables lieux, quand ils passerent par là: car ils s'assouirent de leur chair, qu'ils trouuerent aussi fraische, & aussi peu corrompue (ce qui fut apparamment vn effet du froid) que si l'on n'eut tué ces cheuaux que ce iour-là.

Après auoir souffert tous ces maux, & d'autres semblables, qu'on peut mieux imaginer que d'escrire; ils arriuerent où estoit leur General, qui fut extrêmement aise de les voir, & encore plus, quand il apprit que Iean de Herreda luy apportoit vn Breuet du Roy, par lequel sa Majesté le faisoit Gouverneur de cent lieues de pais, hors de la Iurisdiction du Marquis. Ces Lettres de prouision estoient les mesmes qu'Hernand Piçarte auoit apportées à son retour d'Espagne au Peru; où il ne fut pas plustost arriué, que de la Ville des Roys il les enuoya par la poste à Iean de Herreda, sçachant qu'il estoit party pour Chily: Ce que Go-

mare a particulièrement remarqué par les paroles suivantes. *Almagre* faisoit la Guerre à *Chily*, quand *Jean de Herreda* luy donna les Lettres de Gouverneur, qu'*Hernand Pizarre* auoit apportées : Or bien qu'elles luy conseruent la vie depuis ; si est-ce qu'il se piquoit tellement d'honneur, qu'il les estima plus que tout l'or, & l'argent qu'il auoit gagné iusques alors. Comme il eut donc consulté avecque ses Capitaines sur ce qu'il auoit à faire, il demeura d'accord avec eux de s'en retourner à *Cozco*, pour y prendre possession de son Gouvernement : Plusieurs neantmoins luy conseillerent, & le prierent mesme, si auant que de passer outre il peuplât ce pays là, où celui des *Churcas*, tous deux grandement riches, afin de s'en preualoir ; Et d'enuoyer seauoir cependant quelle estoit là dessus la volonté de *François Pizarre*, & des Communantez de *Cozco*, auant que de rompre par vne mauuaise intelligence. A quoy le portioient sur tous les autres, *Gomez* & *Diego d'Aluado*, avec *Rodrigo Orgonos*, son Confident & son Fauory, si bien qu'à la fin *Almagre* se résolut de s'en retourner à *Cozco*, pour s'en faire Gouverneur par force, en cas que les *Pizarres* n'y voulussent point consentir de leur bon gré.

L'extrême passion qu'*Almagre*, & ses Capitaines tesmoignoient auoir de retourner au *Peru*, n'estoit pas assésurément pour jouïr d'une Iurisdiction de cent lieues, puis qu'ils auoient déjà gagné dans *Chily* vne estendue de pays incomparablement plus grande, & que ses habitans, comme il a esté dit, leur firent assez cognoistre les grandes Richesses, par la quantité d'or qu'ils leur donnerent à leur arriuée : Bien que cela leur pleust fort, ils n'en estoient pas entierement satisfaits, & leur prosperité leur sembloit deffectueuse, s'ils ne possedoient la Ville Imperiale de *Cozco* : Aussi fut-cela la Pomme de Discorde que le Diable s'aduisa de ietter entre ces deux Gouverneurs, pour attiser le feu des Guerres Ciuiles, par le moyen desquelles on ne pût, ny prescher aux Infideles le saint Euangile, ny leur administrer le saint Sacrement de Baptême ; A quoy s'opposoient en diuerses facons les Ministres de *Sathan*, & à tous les autres Exercices spirituels, qui sont les remedes salutaires de nos Ames. Comme donc tout le desir d'*Almagre* estoit de gouverner absolument dans *Cozco*, luy & les siens conclurent ensemble de sortir de *Chily*, non par le chemin qu'ils auoient pris en y allant, dont le souuenir leur bleissoit l'imagination, mais par vn autre qui leur sembloit meilleur, bien qu'en effet il ne fut pas moins rude, ny

moins fâcheux; Car s'ils auoient failly par le passé à se perdre mille fois dans les Neiges, ils pouuoient bien craindre à l'aduenir qu'ils ne se perdissent de mesme dans vn país sablonneux, & par vne secheresse trop grande: Il faut remarquer pourtant, que les Historiens ne sont pas bien d'accord touchant ce voyage d'Almagre à Chily, & entr'autres Gomare, & Carate: car ils disent tous deux, qu'Almagre s'en retourna par le mesme chemin, par où il y estoit venu; Et qu'encore que luy, & ses gens eussent fait vne grande prouision d'eau, dont ils remplirent des Oultres, ils en eurent necessité neantmoins; ce qui choque tout à fait mon sentiment, la Raison naturelle m'apprenant, qu'il est impossible de manquer d'eau en vn país où il y a de la Neige en abondance: d'où il se void clairement que celuy qui a donné cette Relation aux Historiens susdits, n'a fait qu'une mesme chose de diuers euenemens, tant du voyage que du retour de Chily, ny qu'un seul chemin aussi de deux, qui estoient fort differents. Pour le regard de l'or que Paullu Frere de l'Ynca, & les habitans de Chily presenterent à Dom Diego d'Almagre, ces mesmes Auteurs disent, que Iean de Sahaedra l'osta dans le país des Charcas aux Indiens, qui l'emportoient pour l'offrir à leur Roy: cette aduenue ayant esté fermée, dès que la Guerre fut declarée entre les deux Freres Huascar, & Atahuallpa. A raison dequoy cét ancien Conquerant, dont nous auons parlé ailleurs, & qui a fait des Notes sur l'Histoire de Gomare, voyant combien estoit confuse la Relation faite à l'Auteur, qui l'a mise depuis par escrit; s'en despita si fort, qu'il dit ce qui suit sur le Chapitre 132.

En tout ce que l'Historien a escrit, il y a beaucoup de choses à retrancher, & beaucoup aussi où il faudroit adionster: En effet, il paroist bien par ce qu'il en escrit, que ceux qui luy fournissoient des Memoires n'estoient pas plus sçauans que luy dans l'affaire dont ils l'instruisoient. Car il est certain qu'Almagre s'en retournant de Chily, ne prit point la mesme route, que luy & ses gens auoient prise en s'y en allant, par vne Montagne si rude, & si dangereuse, qu'ils faillirent d'y mourir de froid, & de faim. Adionstrez à cecy, qu'au sortir de ces lieux formidables, pour entrer à Copatapu, qui est la premiere Vallée de Chily, il tomba tant de Neige & fit si grand froid, que plusieurs, tant Indiens qu'Espagnols, en furent transis avec leurs cheuaux; Et le mesme aduint à quantité de Negres. Il fut remarqué pareillement, que parmy ceux qui

en reschapperent, il y en eut à qui les doigts des mains, & des pieds tomberent, tant leur fut nuisible l'interperie de ce Climat. Cinq mois apres, Ruiz Dias, & Jean de Herreda suivirent encore cette routelà, menant avec eux les gens qu'ils auoient leuez dans le Peru, par l'ordre d'Almagre, avec lesquels ils furent reduits à souffrir, comme ils firent, la faim, le froid, & les autres incommoditez du chemin : Et d'autant qu'on n'escauroit aller si viste à passer ce destroit, qu'il ne faille du moins y mettre quatre ou cinq iours ; ils se hasterent le plus qu'ils purent pour gagner le temps, qui ne fut neantmoins que trop long, pource que les viures vinrent à leur manquer, les Indiens en estant tout à fait despourueus. Comme ils furent hors de ces mauuais chemins ; ils en trouuerent d'autres vn peu plus fauorables, & où neantmoins le froid les traitta si cruellement, que quelques-vns d'entr'eux en moururent : Quant à la faim qu'ils souffroient, & qui estoit grande, ils y remedierent par la chair des cheuaux, dont il est parlé dans l'Histoire, qui ne se trouua nullement gaste'e, ny mesme tant soit peu corrompue.

Almagre, comme il a esté dit, ne s'en retourna point par la Montagne, mais par la coste de la Mer, qu'on nomme autrement le plat pays, qui est maintenant le chemin ordinaire. Là depuis Atamaca, dernier Bourg du Peru, iusques à Copaiapu, qui est la premiere Ville de Chily, à 60. lieues d'estenduë l'un de l'autre ; Se void vn Desert, où il y a par les chemins quelques sources d'eau, qui n'est point courante : d'où il aduient, & de ce qu'on n'en tire point, qu'elle est tousiours croupie, & puante. Ces sources sont à 6. ou 7. lieues de distance, tant du plus que du moins, & se tarissent assez souuent. Ce qui fit qu'Almagre, se doutant bien qu'il n'en pourroit tirer de l'eau à suffisance pour toute l'Armée, commanda aux gens de cheual qu'ils commençassent à passer le Desert 5. à 5. ou 6. à 6. Et d'autant qu'à mesure que ceux qu'on auoit enuoyez deuant, pour visiter les Puits, en faisoient accroistre l'eau, à mesure qu'ils les nettoyoient ; cela donna moyen aux Fantassins, & aux Canoliers, d'en auoir autant qu'il leur en falloit pour eux, & pour leurs cheuaux. Ainsi Dom Diego d'Almagre, bien aisé à estre hors de ce Desert, s'embarqua dans vn Vaisseau, qui auoit porté Nuguerol de Vlloa, l'un de ses Capitaines, Fils du Gouverneur de Simanca, qui auoit tué l'Euesque de Samora. Cependant, Hierosme d'Alderete, qui eut depuis le Gouvernement de Chily, & qui estoit alors à Copaiapu, voyant les neiges diminuées, & les chemins ouuerts, s'aduisa d'aller avec luy, & plusieurs autres en firent de mesme, pour voir s'ils ne trouueroient point sur ces Montagnes quelques Enseignes, ou quelques marques de cette mor-

salité si grande, aduenüe quand Almagre les passa: En effet, par vne merueille bien estrange, ils rencontrèrent auprès d'un Rocher, vn Negre, & vn Cheual, tous deux debout, & tellement fixes, qu'à les voir de loing, il sembloit que ce fussent quelques pieux qu'on y auoit plantez, le Negre ayant encore en ses mains les resnes du cheual toutes pourries: ce qui arriva cinq ou six ans apres que Valdiuia fut fait Gouverneur du Pais, auquel succeda Hierosme d'Aldereté. C'est iusques icy que s'estendent les paroles du Conquerant susdit, qui a fait des Obseruations sur l'Histoire de Gomare, dequoy ie parleray plus particulièrement dans le Chapitre suiuant.

ALMAGRE SORT DV ROYAVME DE
Chily, pour s'en retourner à Cozco, le Prince Manco Ynca demande pour la seconde fois d'estre restably dans son Empire. Responſe des Piſarres. Arriuée d'Hernand Piſarre au Peru, & Emprisonnement de l'Ynca.

CHAPITRE XXII.

A P R E S que Dom Diego d'Almagre eut fait dessein de retourner au Peru, sans prendre garde qu'il s'y en alloit allumer la Guerre; considerant l'affection, & la bonne volonté que l'Ynca Paullu tesmoignoit auoir pour luy, il le pria de le conseiller sur ce qu'il auoit à faire, & luy dire en Amy quel chemin il deuoit prendre; ce qu'il luy sembla necessaire d'apprendre, pour ne tomber dans vn nouveau peril semblable au premier, où pour n'auoir suiuy le conseil de l'Ynca, il s'estoit engagé si auant, que vray-semblablement il n'en fut iamais eschappé, si Dieu tout bon, & tout misericordieux, ne l'eut desliuré de ces trauerses, comme des autres que nous auons veües, & que nous verrons cy-apres, le reseruant pour prescher son saint Euangile, & la Foy Catholique à ces Peuples Infideles.

L'Ynca Paullu ayant pris l'aduís de ses Indiens, sur toutes les routes qu'on deuoit tenir, entretenit Diego d'Almagre du chemin, & des obstacles qu'il rencontreroit, allant le long de la

Coste,

Coste, & luy dit en suite, que depuis les Guerres des deux Freres Yncas, Huascar, & Atahualpa, l'on auoit fermé ce chemin-là: que cependant, les Fontaines, & les Puits qui seruoient à l'usage des Voyageurs, estoient deuenus inutiles, & se trouuoient à present enseuclis dans le sable que le vent y auoit iecté; qu'ain-si on y trouuoit difficilement de l'eau, encore estoit elle si puante, & si corrompue, qu'on n'en pouuoit boire: que neantmoins, il enuoyeroit deuant des Indiens pour les nettoyer, & que suivant le rapport qu'ils luy feroient de la quantité d'eau qui s'y trouueroit, il pourroit faire filer peu à peu ses gens par petites esquadres, & en augmenter le nombre, à mesure que l'eau s'augmenteroit aussi, pource que tant plus on en tiroit, tant plus il y en auoit: Que ses gens au reste ne deuoient point craindre de marcher en petit nombre, pour n'y auoir par les chemins aucuns ennemis; & que pour suppléer au defaut des Fontaines, qui estoient à six ou sept lieuës les vnes des autres, ils se seruiroient d'Oultres qu'ils rempliroient d'eau, pour n'en manquer point, s'il estoit possible, l'assurant que c'estoit l'ordre que les yncas auoient accoustumé d'observer en semblables occasions. Dom Diego d'Almagre, & ses Capitaines, trouuerent excellent cét aduis de l'ynca paullu; & se reposant sur sa fidelité, le prierent de regler cette affaire-là comme il luy plairoit, pour leur commune conseruation, puis qu'il ne pouuoit faillir, imitant les yncas ses Ancestres. Alors l'ynca paullu bien aise en son ame de ce que le Gouverneur, & ses gens, se fioient en luy, enuoya des Indiens en diligence pour curer les Puits, & nettoyer les Fontaines, avec ordre exprés de l'aduertir de ce qui en arriueroit. Il commanda par mesme moyen, qu'on escorchast plusieurs brebis pour en auoir les peaux, afin d'en faire des Oultres, & qu'avec cela on eût les prouision de viures, qu'on iugeroit à peu près estre necessaires, pour leur subsistance, durant le temps qu'il leur falloit employer à faire vn chemin de quatre-vingts lieuës de Desert.

Tandis qu'on donnoit ordre à ces choses, les Indiens qui estoient allé deuant, enuoyèrent dire que les Fontaines estoient nettes à peu près, & partant, que les Espagnols pouuoient commencer à marcher. Mais Dom Diego d'Almagre ne voulant pas aller si viste en besogne, ny se fier aux Indiens d'une affaire de si grande importance, où il y alloit de sa vie, & de celle de tous

ses gens, sans auoir premierement sondé le gué; fut d'aduis de s'informer si le rapport qu'auoient fait les Indiens estoit veritable: Pour cét effet, il enuoya quatre Caualliers, avec ordre exprés de l'aduertir eux-mesmes par escrit, & non par la bouche d'autrui, tant de la qualité du chemin, que de tout ce qu'ils y rencontreroient; tellement que sur le rapport qu'on eut depuis de ces Espagnols, les soldats se mirent en chemin, les vns apres les autres, si bien qu'il n'en demeura pas vn seul dans Chily; & ne cesserent d'aller, iusques à ce qu'ils arriuerent à *Tacama*. Ce fut où Almagre apprit, qu'assez près de là, venoit d'arriuer Nuguerol de Villoa, qui estoit venu descourir les Ports de cette Coste-là, par la Commission du Marquis Dom François Pigarra, qui l'auoit expressément chargé de s'en aller aussi iusques à Chily, pour y apprendre l'estat des affaires de Dom Diego d'Almagre, afin de luy enuoyer du secours, en cas qu'il en eut besoin, & pour s'informer à son retour des particularitez de ce Royaume là. Almagre escriuit à Nuguerol, qu'il seroit bien aise de le voir, pour apprendre de luy ce qui s'estoit passé dans le Peru en son absence: Aussi s'aboucherent-ils vn peu apres, & sans que l'Armée laissast de marcher, ils s'entretinrent ensemble du succez de tous les deux Royaumes. Mais pour en parler plus à loisir, & regaler Nuguerol de Villoa, Dom Diego d'Almagre luy dit, qu'il vouloit entrer dans son Nauire, pour luy seruir de soldat, & de Marinier, durant trois ou quatre iours; à la fin desquels, quoy que ses gens ne discontinuassent point leur marche, il scauroit bien les aller ioindre. Dans ce comble d'allegresse, ils cheminerent par mer, & par terre; & apres auoir mis fin à leur navigation, qui ne fut pas longue, ils se separerent. Almagre fut retrouuer ses gens, que son esloignement commençoit de mettre en impatience; & parmy lesquels nous le laisserons, pour parler du souleuement general des Indiens, aduenü durant que Dom Diego estoit à Chily.

De
Chily.
Pour s'esclaircir mieux de cette affaire, il faut scauoir, qu'aussitost qu'Almagre fut sorty de Cozco, pour s'en aller en ce Royaume-là, & que les autres Capitaines, comme il a esté diccy-deuant, s'en furent allés de mesme à d'autres Conquestes; le Prince Manco ynca voyant le Gouverneur en repos plus que de coustume, apres le partement de Dom Diego d'Almagre, le somma pour la seconde fois, de la promesse qu'il luy auoit faite,

de satisfaire à la Capitulation accordée entre les Indiens, & les Espagnols, & de le vouloir reſtablir dans ſon Empire; A quoy il adiouſta, Que la parole que ſa Seigneurie luy auoit donnée, luy faiſoit eſperer qu'il l'accompliroit, & que quand les Indiens ſçauoient de quelle façon ils auroient à viure avec les Espagnols, ils en ſeroient plus pacifiques, & plus contens.

Le Gouverneur, & ſes Freres, ſurpris par cette demande, en demeurèrent confus, & ne ſceurent plus quelle reſponſe faire à l'Ynca, pour l'entretenir d'eſperance, comme ils auoient fait juſques alors; neantmoins, pour luy oſter tout ſujet de ſe défier d'eux, ils luy remonſtrèrent le mieux qu'ils pûrent; Qu'ils n'auoient garde de manquer à executer poſtuellement les Articles accordez, puis qu'ils regardoient le commun bien, des Indiens, & des Espagnols; mais que les troubles pafſez, & les occasions preſentes leur en auoient fait differer l'accompliſſement; Que la principale cauſe de ce delay procedoit de ce qu'ils eſperoient d'heure en heure la Reſponſe de l'Empereur leur Maiſtre, qu'ils auoient aduertiy au long, tant des Capitulations faites entr'eux, que de la reſtitution de l'Empire; Qu'ils ſe promettoient qu'en fort peu de temps Hernand Piçarte leur Frere, leur en apporteroit vne Reſponſe, qui ſeroit au gré de ſon Alteſſe, n'eſtant pas poſſible qu'un Prince ſi juſte, & ſi religieux ne ratifiât les Capitulations dont ils ſ'agiſſoit: Et partant, qu'en ſe donnant vn peu de patience, les vns, & les autres ſeroient deſſiluez de tous leurs ſoings par le Mandement de l'Empereur.

Ce furent là les belles eſperances, dont ils entretenirent l'Ynca par l'eſpace de quelques iours, pendant leſquels des nouuelles vinrent, qu'Hernand Piçarte auoit pris terre à Tumpiz. Le Marquis voyant alors qu'il ſe preſentoit vne ſi bonne occasion, tant pour ſortir de Cozco, comme il deſiroit, & ſe deſſiluer des importunitéz de l'Ynca, que pour retourner en la Ville des Rois, qu'il ſouhaittoit paſſionnément de peupler, apres l'auoir bien aduancée, luy dit; que pour executer plus promptement les Ordres de ſa Majeſté, touchant la demande de ſon Alteſſe, eſtant neceſſaire qu'ils ſ'en allât recevoir ſon Frere Hernand; il le ſupplioit de luy en donner la permiſſion: qu'à ſon retour, qui ſeroit en peu de temps, il ſatisferoit à toutes choſes; Et que cependant pour le repos de ſon Alteſſe, & vne plus grande ſeureté des Espagnols, il luy plut ſe retirer en ſa Fortereſſe Royale,

où ses Freres, & ses autres Compagnons le seruiroient, comme ils y estoient obligez. Le Marquis luy dit cela par l'aduis de ses Freres, & de tous les siens, qui le iugerent absolument necessaire, pour auoir recognu en la personne de Manco Ynea vn courage grand, vne humeur altiere, & vn Esprit adroit à dissimuler, comme il auoit fait iusques alors. Ainsi apprehendant qu'il ne tramast quelques nouueautez, fâsché des longueurs qu'on apportoit à luy mettre le Sceptre en main, & à executer ce qui estoit porté par les Articles accordez; ils furent bien aises de le mettre en lieu où ils pussent s'asseurer de luy. Cependand il ne voyoit que trop que ce n'estoit pas là le moyen de satisfaire à sa demande, ny de luy rendre son Royaume; Et toutesfois dissimulant cette iniure le mieux qu'il pût, avecque la Prudence qui luy estoit ordinaire; pour empescher que le Marquis ne le traitât encore plus mal, il ne se monstra nullement reuesche à ce qu'il demandoit, ou qu'il desiroit de luy: Car dès l'heure mesme, sans faire semblant de rien, il prit le chemin de la Forteresse, où il s'en alla à pied, sans vouloir qu'on l'y portast en Chaire, pour monstre par là qu'il ne se desffoit de quoy que ce fut; Mais lors qu'on le tint dedans, on l'arresta prisonnier, comme le rapporte Gomare en ces termes. *Manco, fils de Huayna Capac, à qui François Picarre donna dans Villeas la Bordure rouge, monstra qu'il estoit altier, & homme de cœur; ce qui fut cause qu'on le retint prisonnier dans la Forteresse de Cozco, &c.*

Les Indiens s'offencerent grandement de la captiuité de leur Prince, & de voir reduites à neant les belles promesses, & les grandes esperances que les Espagnols leur auoient données: Aussi firent-ils sonner hautement par leurs lamentations & leurs plaintes, le iuste ressentiment qu'ils en auoient. Mais le Prince Manco Ynea les consola, disant, *Qu'il vouloit obeir aux Espagnols en toutes choses, & qu'à son exemple ils en deuoient faire autant: Que son Ynea Huayna Capac l'auoit ainsi commandé par son Testament: Qu'ils ne se missent en peine de rien, iusques à la dernière resolution de ces succez: Que ceux qui le tenoient prisonnier maintenant, le faisoient pour en paroistre plus genereux à l'aduenir, pource qu'en le relaschant, & luy rendant à mesme temps son Empire, ils donneroient à cognoistre par là, qu'ils estoient vrayz Viracochas, auxquels il se deuoit fier, comme à des gens venus du Ciel, qui rendroient par ce moyen leur magnificence plus grande, & plus esclatante par toute la Terre.*

Le Marquis partit ainsi d'avec l'Ynca, dont il recommanda la personne, & la garde à Iean & Gonçalo Piçarre, ses Freres, & s'en alla droit en la Ville des Roys, où il receut avecque de grandes demonstrations de ioye son Frere Hernand, & les nouvelles gratifications qu'il luy apporta de la part de sa Maiesté, dont Gomare parle ainsi.

Ch. 133.

Vn peu apres qu'Almagre fut party pour Chily, Piçarre arriva en la Ville des Roys, apporta d'Espagne à son Frere * le tiltre de Marquis des Atánilles, & à Dom Diego d'Almagre le Gouvernement du nouveau Royaume de Toledo, d'environ cent lieues d'estendue, à le prendre depuis les bornes de la nouvelle Castille, de la Iurisdiction de Piçarre, iusques au Sud, & au Levant. En suite de cela, il demanda un nouveau Tribut aux Conquerans, de la part de l'Empereur, qui disoit qu'en qualité de Roy ils luy deuoient toute la Rançon d'Atabaliba, qui l'estoit aussi. La Responce qu'ils firent fut, Qu'ils auoient payé le Quint appartenant de droit à sa Majesté, dont il y auoit eu desia bien du bruit en Espagne, où l'on les traitoit d'Auares, & de Vilains, leur reprochant qu'ils ne meritoient pas d'auoir part à de si grandes Richesses: En effet cela passa depuis en Proverbe dans le Peru mesme, où l'on disoit qu'on ne deuoit point escouter les plaintes de ceux qui venoient aux Indes, d'autant qu'ils se faisoient paures, quoy qu'ils fussent plus riches qu'ils ne meritoient; Mais François Piçarre leur respondist pour les appaiser, Que leur vaillance les rendoit dignes des Richesses acquises, & qu'on ne leur deuoit pas de moindres prééminences qu'à ceux qui ayderent iadis Dom Pelayo, & les autres Roys, à tirer l'Espagne d'entre les mains des Mores: Surquoy il aduersit son Frere Hernand, de chercher quelque autre moyen d'accomplir ce qu'il auoit promis, puis que personne ne vouloit rien donner, & qu'il n'estoit pas homme à leur offer ce qu'il leur auoit donné luy-mesme. Cela n'empeschoit pas néanmoins qu'Hernand Piçarre ne prit vn droit qu'il s'attribua pour chaque cent d'or, & d'argent, qui se fondoit, ce qui le rendit odieux à tous; mais il tesmoigna de ne s'en soucier pas beaucoup, & s'en alla à Cozco, où il en prit autant, sachant avec cela de gaigner l'affection de Manco Ynca, pour tirer de luy quelque quantité d'or pour l'Empereur, qui auoit enuoyé des sommes immenses, sans à son Couronnement à Vienne, qu'à soustenir les forces du Turc, Voila ce que dit Gomare: A quoy j'adiouste, que le Marquis enuoya son Frere à Cozco, avec vn ample pouuoir de gouverner cette Ville-là, luy recommandant de plus, de bien faire garder l'Ynca, puis que pour luy il n'y pouuoit soigner,

* C'est
estoit François
Piçarre.

pource qu'il s'en alloit passer quelque temps en la Ville des Roys, afin de la peupler, & de l'agrandir.

GRANDES PRECAUTIONS DV PRINCE

Manco Ynca, pour se reſtablir dans ſon Empire.

CHAPITRE XXIII.

LE Prince Manco Ynca ſe voyant arreſté dans la Fortereſſe de Cozco (que ſes Anceſtres auoient baſtie avec tant de Grandeur & de Maieſté, comme vn Trophée de leurs Victoires, ne ſ'imaginant pas qu'elle deût iamais ſeruir de Priſon à leurs Deſcendans) tacha de ſe rendre ſa captiuité ſupportable par toute ſorte d'inuentions & de tours de ſoupleſſe, qu'il ſceut ingenieuſement pratiquer. Pour cette fin il ſe mit à caſſer & à regaler plus qu'il n'auoit iamais fait, non ſeulement les Princi-
 paux d'entre les Eſpagnols; mais encore les moindres, auxquels il fit diuers preſens, de fruits, de gibier, de venaiſon, & meſme d'une grande quantité d'or, d'argent, de fines turquoises, & de precieufes Eſmeraudes. Outre cela, quand il traittoit avec eux, c'eſtoit avecque tant de douceur, & ſi peu de reſſentiment de ce qu'ils le tenoient priſonnier, qu'il les obligea par ce moyen à ne ſe point deſier de luy, & à le laiſſer aller librement par tous les lieux de la Fortereſſe. Il ſceut cependant qu'Hernand Piſarre ſ'en venoit à Cozco, pour en eſtre Gouverneur; Et alors ayant demandé permiſſion aux Eſpagnols de deſcendre à la Ville, pour demeurer dans l'une de ſes maiſons; il l'obtint d'eux d'autant plus facilement, que de la façon qu'ils l'aimoient, pour le bien qu'ils en receuoient, ils ne luy pouoient rien reſuſer. Or ce que l'Ynca deſira ſi ardemment de ſortir de la Fortereſſe; fut ainſi qu'Hernand Piſarre le trouuant priſonnier, ne le contraignit à luy payer Rançon, & qu'il n'entrât en deſſiance de luy, quelques demandes, ou quelques promeſſes qu'il luy pût faire. Auffi ſe trouua r'il bien d'en auoir vſé de cette ſorte, comme le remarquent Gomare & Carare, dont les paroles ſont preſque ſemblables. Voicy celles de Carate. *Hernand Piſarre eſtant arri-
 ué à Cozco, y contracta vne amiſſe tres-eſtroite avecque l'Ynca,*

Liv. 3.

Ch. 3.

bien que neantmoins il fit tousiours soigneusement prendre garde à luy. Quelques-vns creurent que ce qu'il faisoit ainsi la cour à l'Ynca, n'estoit qu'afin de luy demander quelque quantité d'or pour sa Maiesté, ou pour luy-mesme. Quoy qu'il en soit, quelques mois apres son atriuee à Cozco, il fut sollicité par l'Ynca de luy permettre d'aller en la Contrée d'Yncaya, pour y estre à la solennité de quelque Feste qu'y faisoient les Indiens, avec promesse de luy apporter à son retour vne Statuë d'or massif, qui representoit au naturel son Pere Huaynacana : * * C'e-
 Mais apres qu'il s'y en fut allé, il conclud ce qu'il s'estoit desia
 proposé, dès que Dom Diego partit pour Chily. stoit
Huayna
Capac.

Celieu, qu'on appelloit Toucay, comme il a esté dit ailleurs, estoit vne Maison de Plaisance, où il y auoit quantité de beaux Iardins, pour le diuertissement des Roys du Peru, à vne lieuë desquels on enterroit leurs Entrailles, apres qu'on auoit embaumé leur Corps, & il y auoit apparence que là mesme estoit la Statuë d'or, dont nous venons de parler. Comme donc l'Ynca s'y fut rendu, sous pretexte de solenniser la Feste, il y fit vne Assemblée de quelques vieux Capitaines, & d'autres Seigneurs principaux, qui auoient tousiours seruy son Pere, & leur déclara d'abord la perfidie, & l'estrange obstination des Espagnols, à n'accomplir pas les Capitulations que son Frere Tilu Ausachi auoit faites avec eux : Que leur malice s'estoit portée iusques à l'emprisonner, & le tenir dans les fers, sans leur en auoir iamais donné sujet : Que leur Generals estoit absenté deux fois, pour l'entretenir de fausses esperances, afin de ne le point remestre dans ses Estats. Qu'encore que dès le commencement il n'eut que trop cognu ce mauuais dessein, il l'auoit dissimulé neantmoins, pour iustificier sa cause enuers Dieu, & denant les hommes, afin qu'on ne luy pût reprocher à l'aduenir, d'auoir rompu les Articles de Paix accorder entre luy, & les Espagnols ; Mais qu'à present qu'il auoit satisfait à son deuoir, il ne vouloit plus s'attendre à de vaines promesses : Qu'il scauoit trop bien que les Espagnols partageoient ses propres terres entr'eux à Cozco, à Rimac, & à Tumpix, signe euident qu'il les vouloient usurper ; Qu'il ne vouloit plus se mettre en danger d'estre retenu Captif, & accablé de chaines, sans scauoir pourquoy ; Et partant, qu'ils luy feroient plaisir, comme ses bons, & fideles subiets, de luy dire librement ce qu'il faloit qu'il fit en vne chose de si grande importance : son intention estant de se reestabli dans son Empire par les Armes, sur la confiance qu'il auoit que le Pachacamac, ny

son Pere le Soleil ne permettroient iamais qu'elles fussent v'surpées par des Estrangers, qui n'y pouuoient pretendre aucun droit.

Les Capitaines, & les Curacas choisirent vn des plus anciens d'entr'eux qui parlast pour tous; Ce qu'il fit de cette sorte, apres auoir fait vne profonde reuerence à son Roy, à la façon du País.

Vnique Seigneur, ceux qui ont l'honneur d'estre du Conseil de vostre Maiesié, n'ont iamais trouué qu'il y eut ny bienseance ny seureté pour vostre Personne, de l'exposer à la mercy de ces Estrangers, ny d'esperer non plus qu'ils vous deussent rendre vostre Empire. Mais quoy ! le Malheur a voulu qu'ils se soient rendu Maistres de vostre Volonté, pour auoir veu vostre inclination entierement porée à la Paix, que vostre Frere Titu Autachi a faite avec eux : Quel succez en deuons nous esperer, apres auoir veu si clairement, que ces Parjures ayant receu de vostre Frere Atahualpa la Rançon qu'il leur auoit promise pour sa libertié, n'ont pas laissé de le mettre à mort ? Que s'ils n'en ont fait de mesme de vostre Maiesié, la tenant sous leur pouuoir dans vne prison; c'a esté sans doute vne faueur du Ciel, & vne grace particuliere de Pachacamac. D'esperer au reste qu'ils vous fassent restitution de vostre Couronne, c'est à quoy il n'y a point d'apparence : Car il n'est pas à croire que des gens qui ont desja commencé de cueillir le fruit de desiré, se puissent resoudre d'en rendre l'Arbre à son Maistre; Au contraire, il est bien plus vray-semblable qu'ils procureront vostre mort, & telle de tous les vostres, afin que pas vn d'eux ne puisse aspirer à l'Empire. Puis donc qu'ils nous enseignent eux-mesmes à estre incredulés, vostre Maiesié ne se doit nullement fier à leurs promesses, mais faire mettre sur pied le plus de gens qu'on pourra leuer, & commander qu'on donne ordre aux prouisions necessaires, afin de ne perdre l'occasion qu'ils nous presentent aux mesmes de nous en deffaire; ce qui nous sera d'autant plus facile, que pour estre separez les vns des autres, & n'auoir pas leurs forces unies, ils ne nous scauroient iamais resister. Il est à propos aussi de les combattre tout d'un temps, pour leur oster le moyen de se pouuoir donner du secours; Et de bien garder les aduennés, afin qu'ils ne s'aduertissent point de ce qui se passera. De cette façon, il ne faudra qu'un seul pour les tailler tous en pieces; estant bien certain qu'en quelque part qu'ils soient, des Soldats tels que les vostres, veu leur grand nombre, & l'ardeur de leur courage, les écraseront contre les Monsagnes, si vostre Maiesié le commande. D'ailleurs, quand nous les aurons vne fois assiégés, si vos subiects propres ne les secourent, comme il y a grande apparence qu'ils ne le feront pas, il faudra sans doute qu'ils meurent par les mains, ou par la

derniere

derrière violence de la faim. Il n'est donc plus question d'autre chose, que de hâter cette entreprise, du succès de laquelle nous ne devons nullement douter.

Ce fut la Harangue de ce Capitaine, qui des l'heure même les fit tous résoudre à prendre les Armes, & à despescher des Coutriers par les Prouinces, avec mandement exprès aux Principaux, de mettre sur pied tout ce qu'il y auroit de gens de Guerre, pour se trouver au iour assigné au Massacre general des Aduenturiers de Castille. Ils eurent ordre aussi de tirer des Magasins publics tous les viures qu'ils y trouueroient, ou de les prendre dans la Maison des particuliers, en cas que les Guerres d'Atahuallpa eussent espuisé les prouisiōs des Magasins Royaux, avec promesse aux subjets du Roy, qu'après qu'on se seroit defait de ces communs Ennemis de leur repos, on les desdommageroit de toutes les pertes qu'ils se trouueroient auoir faites. Aquoy il fut adjousté, pour les mieux encourager, Que la liberté, le bien, & la vie de tout ce qu'ils estoient de gens, depuis le plus grand iusqu'au moindre, & particulièrement de leur Roy, dependoit de l'execution de cette entreprise. là.

A ce Mandement du Prince Manco Ynca, se souleuerent tous les Soldats Indiens, depuis la Ville des Roys iusques aux *Chichas*, qui sont à la distance de 300. lieuës de longueur, & d'auantage. L'autre costé du Royaume, depuis la même Ville des Roys iusques à *Quitu*, ne pût donner aucuns hommes, pour estre tous morts, ou dans les Guerres d'Atahuallpa, ou par le Massacre qu'en firent les Espagnols, quand ils l'arrestèrent prisonnier. Outre ce que ie viens de dire des Courtiers, l'Ynca en enuoya d'autres au Royaume de Chily, où ils s'acheminèrent comme incogneus : Leur commission portoit, de publier par tout, Qu'ils venoient là pour s'enquerir de la santé de l'Infant Paullu, & du grand Prestre Villachumu, afin de les aduertir en secret de la resolution de l'Ynca, qui estoit, que pour appuyer son entreprise ils missent à mort Dom Diego d'Almagre, & tous ses Soldats, estant nécessaire que cela fut, pour le reestabli dans son Empire, dont il n'y auoit aucune apparence que les Castillans luy deussent iamais faire restitution.

Après qu'on eut leué ces Soldats, dont furent faits plusieurs Corps d'Armée, l'Ynca commanda que ceux d'*Antahuallas*, & de la coste de *Hanascá*, non loing de *Chinchafuyu*, s'en allassent

à Rimac, pour y tuer le Gouverneur, & ses gens, & que ceux de Quintisuyu, de Collasuyu, & d'Antisuyu, prissent la route de Cozco, pour se dessaire de mesme d'Hernand Pigarre, de ses Freres, & des autres Espagnols, qui estoient en tout 200. ayant nommé des Capitaines, & d'autres Officiers, pour l'une, & l'autre Armée. Nous raconterons au Chapitre suivant les diuers succez du siege de Cozco, qui furent sans doute autant de miraculeux effets de la Misericorde Divine, tant pour la conseruation des Espagnols, que pour la Conuersion, & le salut de ces Idolatres.

SOVSLEVEMENT DV PRINCE MANCO
Ynca; & deux signalez Miracles faits en faueur
des Chrestiens.

CHAPITRE XXIV.

A PRES auoir mis les choses en l'estat que j'ay dittes, l'Ynca commanda que les deux principales Armées s'en allassent, l'une à Cozco, & l'autre en la Ville des Roys, pour y mettre les Espagnols au fil de l'Epee. Il voulut de plus, qu'on eut à faire main basse de tous ceux d'entr'eux qu'on trouueroit espars dans les Prouinces, où ils ne cessioient de chercher de l'or dans les Mines, la discontinuation de la Guerre, & le bon traitement des Indiens estant cause qu'ils ne se soucioient non plus de se tenir sur leurs gardes dans les terres d'autrui, que s'ils eussent esté dans leur pais propre; D'où il aduint aussi, qu'il y en eut plusieurs detuez: Ayant ainsi commencé, ils se rendirent deuant Cozco le plus secrettement qu'ils purent, au iour assigné; Et la nuit suivante faisant vn estrange bruit, pource qu'ils se trouuerent en tout plus de deux cens mille Indiens; ils donnerent l'alarme aux Espagnols, qu'ils attaquèrent de tous costez; La plus part estoient armez d'Arcs, & de Flesches, frotrées d'une matiere combustible, avec vne mesche allumée à l'entour. Ils en lancerent d'abord vne gresle epaisse sur toutes les Maisons de la Ville, sans respecer mesme celles de leurs Yncas. Toutesfois ils s'empescherent le mieux qu'ils purent, de ne

point brusler nyle Palais, nyle Temple du Soleil, & conseruer de mesme la Maison des Vierges esleuës, ensemble les autres logis qui en dependoient, dans les aduenües des quatre ruës prochaines. Que s'ils ne toucherent point à ces deux grands Bastimens, ce fut pour monstrer, qu'encore qu'on les eut desnuës de leurs Richesses, & despeuplées de la plus-part de leurs Hostes, ils ne laissoient pourtant pas de les auoir en singuliere veneration, pour ne tomber dans vn Sacrilege, qu'ils eussent creu commettre en brulant ces Maisons, dont l'une estoit dediée au Soleil, & l'autre aux Vierges, qu'ils luy auoient consacrées. Et d'autant que là mesme se voyoient encore trois grandes Places en forme de Halles couuertes, où ils celebroident leurs Festes aux iours pluieux, ils les conseruerent de mesme, sur l'esperance qu'ils eurent d'y faire de grandes solennitez, & des resiouïssances publiques, apres qu'ils auoient coupé la gorge à tous les Espagnols. La premiere de ces Halles estoit à la haute Ville, ioignant le Palais du premier Ynca Huyna Capac, comme ie l'ay remarqué en la description que i'en ay faite: La seconde, appelée *Cassana*, releuoit des prochaines Maisons del'Ynca Pachacutec; Et la troisieme, nommée *Amarucaneha*, où est à present le College des Peres Iesuites, dependoit de celles de Huayna Capac. Ils eurent soing par mesme moyen de garentir du feu vn fort beau Dosme, fait en rond, qui estoit deuant les Maisons que ie viens de nommer; & bruslerent toutes les autres, sans qu'il en demeurast vne seule sur pied. Les plus vaillans de tous ces Indües, qu'on auoit choisis exprés, pour brusler celle del'Ynca Viracocha, où les Espagnols auoient leur departement, y accoururent avec violence; & à force de fleches enflammées, qu'ils y tirerent de loing, ils la bruslerent entierement. Il y eut pourtant cela de remarquable, que la grande Salle, qui est maintenant l'Eglise Cathedrale, où les Chrestiens auoient alors vne Chappelle pour y ouïr la Messe, fut preseruée de cét Embrassement, presque general, par vn Miracle d'en haut. Car bien qu'ils tiraissent contre elle vne infiniré de fleches flamboyantes, & que mesme le feu s'y mit à tout coup par plusieurs endroits; si est-ce qu'il s'esteignoit aussi-tost, comme si l'on y eut ietté del'eau par dessus. Ce qui fut, à vray dire, vne merueille bien grande, que Dieu fit en cette Ville-là, pour y establir son saint Euangile, dont elle a si bien profité quelle est aujourd'huy vne des plus

charitables qui soit en tout le nouveau Monde, peuplée d'Espagnols & d'Indiens.

Cependant Hernand Pigarre, & ses deux Freres, avec les 200. Soldats qu'ils auoient, voyant qu'ils estoient si peu de gens, se tenoient tousiours serrez ensemble; & comme gens accoustuméz à la fatigue des Armes, ne dormoient point du tout, mais se tenoient soigneusement sur leurs gardes, ayant tousiours des sentinelles posées autour de leur logement, & sur le haut de la Maison. Ainsi, dés qu'ils ouyrent le bruiet des Indiens, ils prirent leurs Armes, & briderent leurs cheuaux, dont il y en auoit tousiours 32. sellez, pour estre prests, s'il se donnoit quelque alarme. Ils furent les premiers qui sortirent, pour aller recognoistre les Ennemis; Mais ne pouuant iuger, à cause de leur trop grand nombre, quelles Armes ils auoient, pour en blesser les cheuaux, que les Indiens craignoient par dessus toute autre chose, ils resolurent de se rallier tous dans la place, qui pour estre grande leur donnoit plus d'auantage sur l'Ennemy, qu'ils n'en pouuoient auoir, espars dans les ruës. Ils s'y rangerent donc en forme de Bataillon, où les gens de pied, au nombre de six vingts, tenoient le milieu, & les Cavaliers, qui estoient 80. se mirent 20. à 20. tant aux deux costez, qu'au front, & à la queue du Bataillon; ce qu'ils firent iudicieusement, afin de pouuoir mieux resister aux Indiens, de quelque costé qu'ils les vinssent charger: en effet, ils ne manquerent pas de les attaquer de toutes parts avec beaucoup de furie, pensant de les mettre à bas à la premiere rencontre: mais les Cavaliers s'en allerent à eux, & leur resisterent d'un grand courage. Le Combat fut opiniastré toute la nuit, & le lendemain matin les Indiens s'y obstinerent encore plus fort. Ils faisoient pleuvoir sur leurs Ennemis des flesches, & des caillous tirez pêle melle avecque des frondes, dont les Espagnols se vangeoient à coups de Lances, & à la faueur de leurs cheuaux, ne se faisant iamais aucune attaque, qu'ils ne laissassent morts sur la place plus de 200. Indiens; ce qui leur estoit d'autant plus aisé, que leurs Ennemis n'auoient aucunes Armes defensives, ny aucunes piques, pour les opposer aux cheuaux, n'ayant accoustumé que de combattre pied à pied avec Armes esgales; Leur grand nombre neantmoins les rasseroit, dans les aduantages que les Espagnols auoient sur eux; Et quoy qu'ils en fussent fort mal traittez, pour la prodigieuse quantité de gens

qu'ils leur tuoient, si est-ce qu'ils adoucissoient cette amertume par l'esperance qu'ils se donnoient de les tailler tous en pieces.

Les Indiens tinrent ainsi assiegez les Espagnols dans la Place de Cozco 17. iours tous entiers, sans leur donner moyen d'en sortir. Mais eux, sans perdre courage, demurerent fermes dans leur Bataillon, & de iour, & de nuit, sans se destacher iamais, soit qu'ils s'en allassent boire dans le Ruisseau, qui passe par le milieu de la Ville, soit qu'ils fissent reueuë dans les Maisons bruslées, pour voir s'ils ne trouueroient point quelque Mahis pour eux, & pour leurs cheuaux, dont la faim leur estoit plus sensible que la leur propre. Comme en effet ils y rencontroient souuent diuerses sortes de prouisions; Et quoy qu'elles fussent à demy bruslées, si est ce que leur grand appetit les leur faisoit trouuer tres exquisés. Augustin de Carate dit à ce propos ce qui suit.

L'Inca vint donner ainsi avecque toutes ses forces sur la ville Imperiale de Cozco, qu'il tint assiegeé plus de huit mois, luy donnant à chaque pleine Lune diuerses attaques de toutes parts, bien qu'Hernand Picarre & ses Freres la deffendissent tres-vaillamment: Aussi auoient-ils de fort bons seconds, qui estoient plusieurs braues Capitaines, & entre autres Gabriel de Rojas, Hernand Ponce de Leon, Dom Alonso Henriquez, & le Tresorier Riquelme, que leurs Compagnons ne cessoiens d'assister, avecque des soins infatigables: car ils se tenoient iour & nuit sous les Armes, comme gens qui ne pensoient pas iamais eschapper de la furie des Indiens, qu'ils scauoient s'estre reuoltéz par tout le païs; ce qui les obligeoit par raison à combattre en vrais hommes de cœur, qui attendoient tout leur secours du Ciel, & de leurs propres forces, bien que les Indiens les affoiblissent de iour en iour, par les blessures, & la mort de leurs gens.

Ce sont les paroles d'Augustin de Carate, par lesquelles il montre succinctement, combien furent grandes les extremitéz où ces Conquerans se virent reduits au siege de Cozco: & à vray dire, quelque grand soin qu'ils prissent de chercher de part & d'autre de quoy subsister; dans la desolation où ils se trouuoient, ils n'auoient pû esuiter de mourir de faim, si leurs Valets Indiens ne les eussent assisteés à ce besoin; Car ils estoient si fideles à leurs Maistres, que feignant de les auoir abandonnez, ils s'alloient rendre aux Indiens leurs Ennemis; Et pour se mettre en

confiance avec eux, ils faisoient semblât tous les iours de se battre contre les Espagnols, auxquels la nuit suivante ils apportoit tout ce qu'ils pouuoient trouuer de viures. Gomare, & Carateraeontent le mesme, & en cecy, comme en l'autre description des euenemens de ce siege, 'il me semble ne s'estendre pas assez, principalement au recit des hautes merueilles qu'il pleut à N. Seigneur de faire en faueur des Espagnols, lors que la fureur des Indiens les auoit reduits à n'en pouuoir plus du tout. Comme ils eurent soustenu le siege onze ou douze iours durant, eux & leurs cheuaux se trouuerent si accablez de faim, & de lassitude, qu'il n'y auoit plus moyen qu'ils pûssent resister à la fatigue des Armes, ny à des incommoditez si pressantes. On leur auoit desia tué trente hommes, & presque tous les autres estoient blesez, sans auoir dequoy se penser: tellement qu'ils n'apprehendoient pas sans suiet de perir bien-tost miserablement, pour n'auoir plus ny la force de combattre, ny aucune esperance d'estre secourus, si ce n'estoit de Dieu, dont ils imploroient à tout moment l'assistance, par l'intercession de la sainte Vierge sa Mere, avec des gemissemens continuels, & des prieres ardentes.

Cependant les Indiens ayant pris garde que les logemens des Espagnols estoient sauuez de l'embrasement general de la Ville, s'y en allerent pour les brusler, n'y ayant personne qui l'empeschast. Pour cet effect, il ne se passa presque point d'heure ny iour, ny nuit, qu'ils ne taschassent d'y mettre le feu, sans pouuoir iamais venir à bout de leur dessein, ny mesme en scauoir la cause, dont ils s'estonnoient extrêmement; ce qui leur faisoit dire que le feu auoit perdu sa force contre cette Maison-là, pource que les *Viracochas* y auoient demeuré. Mais enfin, les Espagnols se voyant tenus de si près, resolurent de finir leurs iours en vaillans Hommes, & de faire vne attaque generale, sans attendre de mourir de faim, ou des blesseures receuës, quand leur foiblesse seroit si grande, qu'elle leur feroit tomber les Armes des mains. Avec ce dessein, ils se tinrent prests de donner sur les Indiens, quand ils en seroient assaillis, & à respondre en combattant, iusques à la derniere goutte de leur sang. Ils prirent donc leur temps, pour se confesser les vns aux autres, & à trois Prestres qu'ils auoient, selon que les Indiens le leur permettoient; & se recomanderent tous à Dieu, pour finir leur vie en bons Chrestiens.

Le lendemain, si-tost qu'il fut iour, les Indiens se presenterent à leur accoustumée, avec des cris, ou plustost des hurlemens effroyables, se tenant pour affrontez de ce que leurs Ennemis auoient tenu si long-temps, quoy qu'ils fussent en si petit nombre, qu'il n'y auoit qu'un seul Espagnol contre mille Indiens; ce qu'ils fit resoudre de ne point quitter lo Combat, qu'ils n'en eussent fait vn massacre vniuersel. Les Espagnols ne se monstre-
rent pas moins asseurez, qui faisant de necessité vertu, s'en alle-
rent fonder sur les Indiens, inuoquant à haute voix le nom de la
Vierge, & celuy de leur Patron l'Apostre saint Iacques. Les
vns & les autres opiniastrerent le Combat, où il y eut beaucoup
d'Indiens mis à mort, & quantité d'Espagnols blessez. Mais, en-
fin, apres cinq heures de combat, ils perdirent tout courage,
voyant qu'eux ny leurs chevaux ne pouuoient plus resister. L'I-
mage de la Mort se presentoit à eux à toute heure, sans qu'ils s'i-
maginassent de la pouoir esuiter, tant elle estoit proche. Les
Indiens au contraire deuenoient plus furieux à toute heure, & la
foiblesse de leurs Ennemis estoit ce qui les fortifioit dauantage
à vanger la mort qu'ils auoient donnée à leurs Compagnons.
Dans ces entrefaites, le Prince Manco Ynca, qui regardoit le
Combat du haut d'une petite Colline, encourageoit les gens lo-
mieux qu'il pouuoit, les appellant par le nom de leurs Prouin-
ces, & de leurs Nations, avec vne extrême confiance de se voir
ce iour-là remis dans son Trosne: Cela n'arriua point toutesfois,
d'autant qu'à ce dernier besoin, il pleut à Dieu d'assister mira-
culeusement les Fidelles. Le bien-heureux Apostre *Saint Iac-
ques*, Patron d'Espagne leur apparut visiblement, & les In-
diens le virent aussi monté sur vn cheual blanc, tenant de la
main gauche vn Bouclier, avec la Deuise des Cheualiers de son
ordre, & de la droite vne Espée, qu'on prenoit pour vn Es-
clair, tant elle estoit resplandissante. Les Indiens bien eston-
nez de voir ce nouveau Cavalier, se demandoient l'un à l'au-
tre, qui pouuoit estre ce formidable Gendarme portant en
main *l'Illapa*, c'est à dire l'Esclair, le Tonnerre, & la foudre.
Comme en effet ils en estoient tellement esblouis, que n'en pou-
uant supporter l'esclat, ils se croyoient tous perdus; Et quel-
que part que le Saint combattit, ils s'enfuyoient qui çà qui là,
espouventez d'une chose si extraordinaire: Ce qui les effrayoit
encore plus, estoit que lors qu'ils pensoient faire retraite, ils

uyoient tousiours deuant eux ce Guerrier celeste, la presence duquel leur faisoit perdre tout iugement, & les mettoit entierement hors de garde. Ainsi les Espagnols reprenant courage, firent de merueilleux Exploicts de valeur, d'où il aduint que leurs Ennemis ne pouuant se deffendre en aucune sorte, deuinrent si lasches, & si abbatus, qu'ils furent contrains d'abandonner le Combat.

L'Apostre saint Iacques secourut ainsi les Chrestiens, en faueur desquels il osta la Victoire à leurs Ennemis, pour la leur donner ce iour-là. Il en fit de mesme le lendemain, & toutes les autres fois que les Indiens les voulurent combattre: car alors ils se trouuoient si esperdus, que ne scachant par où commencer leur attaques, ils estoient contrains de s'en retourner à leurs postes, où ils vzoient de ces mots en leur langue, *Vtic, Campa, Llaella?* comme s'il eussent voulu dire, *Quel malheur est cecy? Faut-il que nous soyons si estourdis, si lasches, & si poltrons comme nous sommes?* Mais pour tout cela ils ne leuerent point le siege, & demurerent deuant la Place plus de huiet mois, comme nous le monstrerons cy-apres.

*MIRACVLEUSE APPARITION DE LA
Vierge, en faueur des Chrestiens, & Duel remarquable entre deux Indiens.*

CHAPITRE XXV.

LEs Indiens s'estant retirez dans leurs Carriers, furent tous estonnez de voir que l'Ynca fit venir leurs Capitaines, qu'il rança publiquement d'auoir si mal fait ce iour-là, & de ce qu'eux-mesmes, & leurs Soldats s'en estoient fuis, tant ils estoient lasches, d'une poignée de Virachocas, qui estoient presque morts de faim & de lassitude. Il leur dit en suite, *Que leur grand nombre contre si peu de gens les deuoit faire rougir, & que si le iour d'apres ils ne combattoient en Hommes, il les enuoyeroit siffler avecque les Femmes, ou mesme qu'il en mettroit d'autres à leur place, qui s'acquitteroient mieux de leur charge.* Les Indiens alleguerent pour excuse, *Qu'un nouveau Virachoca, qui portoit*

portoit la foudre en ses mains, les espouuanoit de telle sorte dans la meslée, qu'ils ne sçauoient s'ils combattoient, ou s'ils fuyoient; & que neantmoins ils faisoient à l'aduenir le mieux qu'ils pourroient, pour corriger la faute passée. A quoy l'Ynca repartit, Qu'il leur commandoit de se renir prests, pour combattre la troisieme nuit suiuaute, afin que l'obscurité les empeschast de voir ce Cheualier inconnu, qui leur donnoit tant de peine. Cependant les Chrestiens, tous consolez entr'eux de la faueur particuliere qu'il auoit pleu à Dieu de leur faire, luy en rendirent graces rres-humbles, qu'ils accompagnerent de plusieurs vœux & promesses, pour en resmoigner la reconnoissance. Ils se sentirent depuis si courageux, & si forts, qu'ils ne doutèrent plus que le Royaume ne leur demeurast; comme en effet, ils auoient raison de le croire, assistez, comme ils estoient, de la faueur du Ciel. Ainsi tenant leurs Armes, & leurs cheuaux prests, pour les occasions qui se presenteroient, ils se promirent vne victoire assurée, apres en auoir desesperé iusques alors.

La nuit assignée par le Prince estant venuë, les Indiens se presenterent en Armes, avec de grandes menaces qu'ils firent aux Espagnols, de les mettre tous en pieces, & de vanger par leur mort les injures qu'ils en auoient receuës. Mais les Espagnols aduertis desia par les autres Indiens leurs domestiques, qui leur seruoient d'Espions, de la venuë de leurs Ennemis, se trouuerent tous sous les Armes, & deuant que passer outre, inuokerent à leur secours avec vn grand zele, nostre Seigneur IESVS-CHRIST, la sainte VIERGE sa Mere, & leur Protecteur l'Apostre S. IACQUES. Apres leur priere, comme ils estoient sur le point de donner, ils apperceurent en l'air la glorieuse Vierge, avecque son Fils IESVS entre ses bras, l'vn & l'autre si agreables, qu'il ne se pouuoit rien voir de plus beau, ny de plus resplendissant. Les Infideles prenant garde à cete merueille, en furent rous pasmez, & encore plus, quand ils sentirent qu'aux rayons qui se lançoient d'un si diuin Object, s'entremessoient des Atomes imperceptibles, qui pareils à la poussiere, au sable, & à la Rosée, leur couuroient les yeux de telle sorte, qu'ils ne sçauoient plus ce qu'ils faisoient; Ce qui fut cause, qu'ils s'en retournerent en leurs quartiers, auant que les Espagnols les vissent charger. Ils se donnerent si fort l'alarme depuis, qu'ils furent plusieurs iours sans oser sortir. Cette nuit fut la dix-septiesme du Siege, du.

rant lequel les Indiens auoient tenu iusques alors les Espagnols si à l'estroit dans la place, où estoit leur poste, qu'ils ne pouuoient ny l'abandonner entièrement, ny les Indiens mesmes se detacher de leurs Bataillons, où ils se tenoient clos, & couuerts, iour & nuit : Ce qui procedoit de la crainte continuelle, où les tenoit l'Apparition merueilleuse qu'ils auoient eüe. Neantmoins, comme l'Infidelité se peut appeller vne Fureur au eugle, qui oste le sens à ceux qu'elle possède; apres que par vn relasche de quelques iours, ses Ministres forcenez eurent perdu vne partie de leur apprehension, elle les incita temerairement à retourner au Combat contre les Fideles. Ce qu'ils firent aussi-tost, avec vn ardent desir de reestabli le Prince Manco Ynca dans son Empire; mais leur courage n'esgaloit point leur enuie, pource qu'apres le succez miraculeux, dont ils auoient esté tesmoins oculaires; toute leur valeur n'estoit plus qu'en leur langue, dont ils ne cessoient de menacer leurs Ennemis, iour & nuit, pour les tenir en alarme, sans les oser plus attaquer, tant ils estoient espouuantez. Les Espagnols voyant que ces Infideles commençoient à les laisser en repos, apres les auoir tousiours fatiguez, retournerent à leur logement * ordinaire; où dès qu'ils entre-

* Ils
l'appel-
loient
Galpon.

rent, ils remercierent Dieu de toute leur Ame, de les auoir mis en possession de ce lieu-là, pour y pouuoir penser leurs Blesez, mal-traitez iusques alors, & mettre à couuert les sains, qui auoient grand besoin de se donner vn peu de relasche. Surquoy ils se proposerent de faire de ce lieu-là vn Temple, & vne Maison de priete à nostre Seigneur, apres que les Ennemis auroient leué le siege.

Cependant leurs seruiteurs Indiens ne se lassoient point de les assister en tout ce qu'ils pouuoient; Et n'est pas à croire combien ils leur furent vriles en cette occasion de soulager les Blesez, ausquels ils apportoit des viutes, & des herbes mesmes pour les penser de leurs playes, estans, comme i'ay dit ailleurs, tres excellens Herboristes; dequoy les Espagnols estoient si contents, qu'ils aduoüoient franchement qu'ils n'auroient iamais pû subsister, sans le secours qu'ils receuoient d'eux: Car ils leur estoient si bons & si fidelles, qu'ils leur alloient chercher de toutes parts du Mahis, & d'autres prouisions, qu'ils s'ostioient eux mesmes de la bouche, pour en assister leurs Maistres, ausquels ils seruoient encore d'Espions, pour les aduertir de iour & de nuit

par signes, & contresignes, de tous les desseins de leurs Ennemis; toutes lesquelles choses estoient par eux attribuées à vn Miracle euident; comme en effet c'estoit vne chose miraculeuse que ces Indiens seruissent ainsi les Espagnols, & dans leur País propre, & contre ceux de leur Nation. Mais outre que c'estoit vn effet de la Prouidence Diuine, l'on peut dire encore, comme ie l'ay remarqué cy-deuant, Que ces Peuples tiennent cela de leur naturel, que ceux d'entre eux qu'on a faits prisonniers de guerre, tels que ceux-cy dont ie parle, sont ordinairement si fidelles à leurs Maistres, qu'ils tiennent à gloire de mourir pour eux, quand l'occasion s'en presente: D'où il aduint aussi, qu'apres que ce souleuement de Cozco, & des autres Peuples qui se trouuerent presens à ce siege, se fut calmé, ceux qui eurent le bonheur de voir l'Image de la Vierge, qui par sa seule apparition les vainquit, & dont les yeux furent comme charmez de cette agreable Rosée qu'elle y respandit, eurent depuis vne si deuote affection pour elle, qu'ayant esté instruits en la Foy, ils ne cessèrent de recourir à son aide; ce qu'aujourd'huy mesme leurs Descendans s'estudient de pratiquer avec tant de zele, que ne se contentant pas d'oïr de la bouche des Prestres les noms, & les glorieux Attributs qu'ils donnent en Latin, & en Espagnol à cette Reyne des Anges, ils les traduisent en leur langue generale, & y adjoûstent ce qui leur semble plus à propos, pour pouoir mieux s'exprimer par les propres termes de leurs pays, quand ils implorent les faueurs, & les Bontez de la Vierge; surquoy ie ne trouue pas hors de propos de rapporter icy quelques vns de ses Attributs de la façon que les Indiens les traduisent.

Ils l'appellent *Mamanchic*, qui signifie, *nostre Mere*, *Coya* Reyne; *Nusta*, Princeesse du Sang Royal, *Copay*, Vnique; *Turay Amancay*, Lys blanchissant; *Chasca*, Esttoile du Matin; *Citocoyllor*, Astre resplendissant; *Huarcarpaña*, sans tache; *Huchanac*, sans peché; *Mana Chancasca*, inuiolable, *Taxque*, Vierge pure; *Diospa Maman*, Mere de Dieu; *Pachacamac Maman*, Mere de Celuy qui a créé le Monde, & qui le soutient. A quoy ils adjoûstent encore le mot de *Huachacuyac*, qui ayme les Pauures, & qui leur fait du bien; comme s'ils disoient *Mere de Misericorde*, & *nostre Aduocate*; vsant de semblables Periphrases, à faute de termes propres, pour les bien traduire en leur langue. De cette deuotion enuers la Vierge ils passent à celle de sainte

Anne, qu'ils nomment *Mamanchiapa Maman*, c'est à dire, Mere de nostre Mere; *Coy inchiapa Maman*, Mere de nostre Reyne: Et ainsi des autres Noms, dont nous venons de parler, y adioustant celuy de *Diospapas*, qui est le mesme qu' *Ayeule de Dieu*, Où il est à remarquer, que le mot *Paya*, signifie *Vieille*: Et pource qu'il faut necessairement que les Ayeules le soient, & qu'elles l'estoient encore plus au Peru qu'ailleurs, pource que les Femmes s'y marioient fort tard; tant s'en faut que le mot de *Vieille* s'y prit en mauuaise part, qu'au contraire on le tenoit à grand honneur, pource qu'il signifie *Ayeule*, ou *grand' Mere*.

Pour reuenir maintenant au Prince Manco Ynca, & à ses Soldats, & Capitaines, il faut sçauoir, qu'ils estoient si estonnez des Merueilles qu'ils auoient veües, qu'ils n'osoient pas mesme en parler, apprehendant que le seul recit ne renouuellât leur peur, leur en renouuellât la memoire. Ils ne laissoient pas neantmoins de tenir la Ville assiegée, pour voir si leur malheur ne changeroit point de face, sans qu'ils osassent en venir aux mains, pour auoir rousiours presente en leur Ame l'Image de la Crainte, que le Diuin saint Iacques auoit fait voir à leurs yeux: de sorte qu'ayãt cognu par espreuue, que ce Cavalier seul les auoit mis en desroute, plus que tous les autres ioints ensemble, ils crioient de temps en temps aux Espagnols, *O que vous dureriez peu de temps contre nous, si ce Capitaine au cheual blanc ne vous deffendoit!*

Le siege auoit desia duré cinq mois, quand il aduint vn succez assez remarquable. Ce fut qu'un Capitaine Indien estimé vaillant, afin d'encourager les autres par son exemple, voulut s'esprouuer en vn Combat singulier, pour voir s'il n'y réussiroit pas mieux qu'en pleine Bataille. Avec cette presomption il demanda congé à son General d'aller deffier vn *Viracocha*, pour le couper la gorge avec luy; Et d'autant qu'il voyoit combattre les Cavaliers Espagnols avec des Lances, il en prit vne aussi, & vne petite hache d'Armes, par eux vulgairement appellée *Champs*: S'estant ainsi équipé, il s'en alla droit au Corps de Garde des Espagnols, qui estoit à l'entrée de la Place, assez proche de leur logement, où il se mit à crier, *Que s'il y auoit quelque Viracocha, qui eut la hardiesse de se battre contre luy, qu'il sortit de son Bataillon, avecque des Armes pareilles aux siennes*. Mais pas vn Espagnol ne voulut accepter ce Deffy, tenant à bassesse de se battre en Desesperé contre vn seul Indien.

Voilà cependant, qu'un Canarin de ceux qu'ils appellent Nobles dans leur País, qui dès son enfance auoit esté nourry Page du grand Huayna Capae, & que le Marquis Dom François Pigarre, ayant fait depuis son Prisonnier de Guerre, auoit receu à son seruice, le nommant comme luy Dom François, qu'il mouroient d'auoir conneu, & laissé plein de vie à Cozco, lors de mon voyage en Espagne; demanda permission à Hernand, à Iean, & à Gonçalo Pigartes, de faire raison à ce Temeraire, qui la demandoit, disant, que puis qu'il estoit si effronté que de venir luy seul de la part des Indiens, deffier les Viracochas, qu'il luy en vouloit faire passer l'enuie, comme leur seruiteur qu'il estoit; & qu'il se promettoit au reste, que leur bonne Fortune luy donneroit la victoire. Hernand Pigarre, & ses Freres ne louèrent pas moins son bon naturel que son bon courage, & luy accorderent ce qu'il demandoit: Le Canarin sortit alors armé, du mesme que l'Indien. Ils combattirent tous deux un long-temps, & en vinrent trois ou quatre fois aux prises. Leur adresse seondoit la force de leur bras; tantost ils quittoient la lutte, tantost ils la renouelloient: puis comme ils voyoient qu'ils ne se pouuoient abbatre l'un l'autre, ils recommençoient le Combat, faisant de rudes efforts, pour voir à qui demeureroit la victoire. Mais enfin le Canarin la gaigna, & d'un coup de lance, qu'il porta droit dans le cœur de son Ennemy, l'estourdit par terre tout roide mort; puis il luy coupa la teste, qu'il empoigna par les cheveux, avec laquelle il fut retrouver les Espagnols, qui le receurent avec honneur, comme son action le meritoit.

Cette victoire du Canarin despleut beaucoup plus à l'Ynca, & à ses gens, que si c'eut esté un Espagnol qui l'eut emportée, expliquant à ces mauvais Augures ce bon succès d'un Indien leur Vassal: d'où il aduint que comme ils estoient grandement superstitieux en matiere de presages, celui-cy les troubla tellement, qu'ils ne firent depuis durant tout le siege, rien qui leur pût agréer, que la mort infortunée qu'ils donnerent à Iean Pigarre, dont ie parleray tout maintenant.

Certes, ie ne repasse iamais dans ma memoire, tant de faueurs signalées que Dieu fit aux Espagnols, & dans ce siege de Cozco, & en celuy de la Ville des Rois, que ie ne m'estonne en mesme temps de ce que les Historiens n'ont daigné faite mention de toutes ces choses, si memorables, & si cognues de tout le Mon-

de. Je diray à ce propos, qu'en mon Enfance ie les oyois souvent raconter aux Indiens, & aux Espagnols, qui n'en pouuoient parler sans estonnement : Aussi arriua-t'il depuis, qu'apres que le siege fut leué, pour memoire aux siecles à venir, ils dedierent à la sainte Vierge le grand Logis où ils faisoient leur demeure, qui est aujour'd'huy l'Eglise Cathedrale, sous le tilere de *sainte Marie de l'Assomption*, & mirent la Ville sous la protection de l'Apostre *saint Jacques*, Patron d'Espagne; de sorte que pour digne recognoissance de ses bien-faits, ils en celebrent tous les ans la Feste par vne Procession solennelle, vne grande Messe, & vne Predication à sa louange; puis, apres midy il y a des jeux de Canes, des courses de Taureaux, & d'autres resioüissances publiques. Apres vne si grande Victoire obtenuë par son secours, en cët endroit du Temple qui aboutit à la Place, les Espagnols firent peindre ce grand Saint, monté sur vn cheual blanc, tenant vne Targe d'vne main, de l'autre vne Espée flamboyante, & sous ses pieds plusieurs Indiens, tant blessez que morts: Depuis, quand les Indiens consideroient cete peinture, *Voyez*, disoient-ils entr'eux, *ce fut vn Viracocha comme celuy, qui nous deffist tous en cete Place.* J'ay veu souvent ce Tableau, & on le voyoit encore en l'an 1560. qui fut le temps auquel ie m'en allay en Espagne. Or est-il que le souleuement de l'Ynca commença en l'année 1535. & finit en l'an 1536. & moy ie nasquis l'an 1539. si bien que j'eus moyen de cognoistre comme ie fis plusieurs, tant Indiens qu'Espagnols, qui se trouuerent en cete Guerre-là, où ils virent les merueilles que nous auons dites, & que ie leur ay mesme oüy dire, n'ayant iamais manqué cinq ans durant de me trouuer avec eux aux jeux de Canes; ce qui me fait repetter encore, que ie m'estonne bien fort de ce que ceux qui s'estoient rencontrez parmy tant d'euenemens remarquables, n'auoient daigné en enuoyer les Relations aux Historiens de leur temps, si ce n'est qu'ils voulussent s'attribuer eux-mêmes l'honneur de cete Victoire-là.

Plusieurs iours apres que j'eus escrit ce Chapitre, comme ie vins à feüilleter le Liure du Reuerend Pere Acosta, i'y rencontray de bonne fortune vne Relation de plusieurs Miracles signalez, que nostre Seigneur *IESVS-CHRIST*, & la sainte Vierge sa Mere ont faits dans le nouveau Monde, en faueur de la Religion Catholique, parmy lesquels il estoit, fait mention de

ceux-cy de Cozco, que ie fus extrêmement aise de lire. Car bien qu'il soit veritable que ie me pique d'escrire ces choses, comme les plus essentielles parties de l'Histoire, ie ne laisse pas pourtant d'estre fasché, quand ie voy que les autres Historiens Espagnols n'en ont point parlé du tout, ny en partie, pour le desir que i'ay d'appuyer de leur autorité ce que ie dis, de peur qu'on ne le prenne pour quelque Fable; ce qui ne m'agréeroit pas beaucoup, n'estant pas moins amy de la Verité, que ie suis ennemy du Mensonge, & de la Flatterie. Voicy donc le tesmoignage du Pere Acosta.

Des hommes dignes de foy, ausquels ie l'ay moy-mesme oüy dire, assurent qu'au temps que la Ville de Cozco estoit si estroitement assi-gée par les Indiens, les Espagnols qui estoient dedans, ne se fussent iamais tirez d'un si apparent danger, sans une assistance particuliere du Ciel. Ils rapportent là dessus, que les Infidelles laxoient à tout coup des feux d'artifice sur le logis des Espagnols, où est à present la grande Eglise, & qu'encore que le toit fut d'une certaine paille, qu'ils appelloient Chico, ou Tchou, outre que les matieres qu'ils y iettoient estoient fort cõbustibles; si est-ce que iamais le feu ne s'y pût mettre, pource qu'une Dame de singuliere beauté, qui estoit en haut, l'esteignoit incontinent, ce que les Indiens virent eux-mesmes, & le publicrent avec estonnement. Il y a dans l'Histoire plusieurs autres Relations, qui assurent au vray qu'en divers Combats que les Espagnols ont eus, tant en la nouvelle Espagne, que dans le Peru, les Indiens ont encore veu en l'air un Cavalier monté sur un Cheval blanc, & qui tenoit en main une Espée, avec laquelle il combattoit pour les Espagnols leurs Ennemis, à où est venuë cette grande veneration que tous les Peuples des Isles ont aujourdhuy pour le glorieux Apostre saint Iacques. D'aut'esfois aussi en de semblables Combats, s'est apparue miraculeusement l'Image de la Vierge, de qui les Chrestiens de ces Pays esloignez, ont receu des bien faits incomparables: Que s'il faisoit desdire amplement ces oeuvres du Ciel, la Relation en seroit trop longue, &c. Voilà ce qu'en dit Acosta, qui assure d'auoir appris ces Miracles, dans le Peru mesme, où il passa quarante ans apres qu'ils y arriuerent. Mais reuenons maintenant aux Espagnols, desquels on pourroit dire à bon droit, qu'assistez de si hautes faueurs, ils estoient assez forts pour conquerir cent Mondes nouueaux.

LES ESPAGNOLS GAGNENT LA
*Forteresse de Cozco, où Jean Pizarre est
 mis à mort.*

CHAPITRE XXVI.

Liv. 8. **N**OUS avons promis en nostre premier Volume, de racon-
 ter l'extrême fidelité des Canarins envers leurs Rois, Yncas,
 Cap. 5. & comme ils y renoncèrent depuis, en considération de
 l'amitié qu'un des leurs tesmoigna véritablement. Apres
 1. Part. avoir donc montré à quel point ils estoient Fideles, il reste
 Liv. 9. maintenant à desdire la cause pour laquelle ils renoncèrent à
 Ch. 37. ceux de leur propre Nation. Les faueurs que les Espagnols fi-
 rent à ce Canarin, * & durant la Victoire, & apres, furent si
 C'est ce- considérées par tous les autres Compatriotes, que pour les
 luy mes- considerer, non seulement ils secouèrent le joug de l'obéissance
 me qui connoistre, non seulement ils secouèrent le joug de l'obéissance
 se bat- qu'ils deuoient à leurs Yncas, dont ils estoient Vassaux. mais ils
 tit avec en deuinrent encore cruels ennemis, au grand aduantage des
 l'Indien Espagnols, auxquels ils seruirent depuis d'Espions, de Mou-
 dôt i'ay chartes, & de Bourreaux mesme, contre les autres Indiens. Ad-
 parlécy- joustez à cecy, qu'aux Guerres Ciuiles qu'eurent les Espagnols
 deuant. les vns contre les autres, iusques à celle de François Hernandez
 Giron, plusieurs Canarins demeurant à Cozco, où ils recon-
 noissoient pour Chef ce Dom François Canarin, seruoient
 d'Espions doubles, tant à ceux du Party du Roy, qu'aux gens du
 Tyran; car ils estoient si rusez, que se partageans, & pour le
 Prince, & pour celuy qui luy estoit rebelle, ils vsoient de cette
 inuention, afin que quand la Guerre seroit terminée, les Cana-
 rins du Party vaincu, se pussent garentir de la mort à la faueur du
 Vainqueur, disant qu'ils auoient tous esté de mesme faction. Et
 à vray dire, il ne leur estoit pas beaucoup difficile de dissimuler,
 ny de se desguiser ainsi, pource que n'y ayant que leurs Chefs
 qui se messassent d'agir pour les Espagnols; de là s'ensuiuoit
 qu'ils passoient tous pour Fideles, quelques Traistres qu'ils fus-
 sent, à cause que pour estre Amis, & de mesme intelligence, ils
 s'aduertissoient ordinairement de tout ce qui se passoit dans les
 deux

deux Armées. Voilà quel estoit leur stratageme, dont ie me souuiens d'auoir ouy faire le conte autres fois à vn Canarin mesme, qui vn peu apres la Guerre de François Hernandez, en declara le secret, interrogé par vn Indien comme quoy s'estoient pû eschapper ceux qui-auoient suiuy le Tyran. Ce mesme Dom François Canarin, deuint depuis si altier, & si aueuglé par sa bonne Fortune, qu'il osa bien entreprendre (du moins on en faisoit courir le bruit) d'empoisonner l'Ynca Dom Philippe, Fils de Huayna Capac, dont nous auons parlé cy-deuant, ce que l'euénement qui s'en ensuiuit, rendit encore plus vray semblable, d'autant qu'il se maria depuis à la Femme de Dom Philippe, qui estoit fort belle, & qu'il n'espousa pas tant par le bon gré de cette Dame, que par les menaces qui luy furent faites par les Amis du Canarin, au grand scandale des Yncas, qui le souffrirent neantmoins, pource qu'alors ils n'auoient point de commandement en main. Nous rapporterons cy-apres vne estrange temerité de ce mesme Indien, qui fut vne grande pierre d'achoppement à tous les autres de sa Nation, qui demouroient dans cette Ville-là.

Les Espagnols voyant qu'à mesure qu'ils augmentoient en courage, fortifiez par le bras du Tout-puissant, les Indiens diminuoient de cœur, & de nombre, estant deuenus si lasches, qu'ils n'osoient plus attaquer, & tenoient cependant tousiours bloquée la Ville de Cozco; s'aduiferent de faire vne sortie, pour les obliger de leuer le siege, & leur monstrent qu'encore qu'ils fussent beaucoup moins de gens qu'eux, ils ne les craignoient aucunement. Voulant donc leur en rendre des preuues, ils donnerent vertement sur eux, & les menerent battant iusques où ils voulurent, sans qu'ils fissent iamais aucune sorte de resistance; Ce qui arriua tant de fois, qu'à la fin il se trouua que 25. ou 30. Espagnols suffisoient pour mettre en desroute vn Bataillon d'Indiens, quel que grand qu'il fust, & à les escarter qui ça qui là, comme si c'eussent esté des Enfans: de quoy neantmoins il ne faisoit pas beaucoup s'estonner; car Dieu estant pour eux, quel qu'un pouuoit-il bien combattre contre eux? De cette façon, ils les repousserent si bien des aduennés, & de tous les dehors de la Ville, qu'ils n'oserent plus paroistre qu'en quelques eminences des enuironz, & sur des Rochers, où ils ne croyoient pas que leurs cheuaux pûent iamais monter; mais l'experience leur fit

voir le contraire, & qu'ils y grimpoient comme Chevres. Cette comparaison est de moy, mais l'en ay ouy dire vne bien meilleure à vn Cavalier, appellé François Rodriguez de Villefort, l'un des treize Conquerans, qui demurerent avec François Pigarre, apres que ses 12. Compagnons l'eurent abandonné, comme il a esté dit cy-deuant. Ce Cavalier, & plusieurs autres, accompagnoient vn iour, sur le chemin d'Arequepa, quelques Gentilshommes qui s'en alloient en Espagne. Je les accompagnois de mesme, quoy que ie ne fusse encore qu'un ieune garçon, & il me souuient que c'estoit en l'an 1552. Comme donc François de Villefort s'entretenoit avec eux entre Cozco, & Cospecancha, où il y a trois lieues de l'un à l'autre; il se mit à raconter les diuers succez du siege que nous venons de descrire, & à marquer du doigt, les lieux où s'estoient passez les Exploits les plus memorables, dont il nommoit les Auteurs, disant; *C'est icy où vn tel fit cette action de courage, vn tel, celle là, & vn tel cette autre*, se faisant admirer de tous ceux qui l'escoutoient. Mais il en dit, entre autres, vn tres remarquable de Gonçalo Pigarre, que ie rapporteray en son lieu, & la raconta dans le mesme poste où il l'auoit veu arriuer, qui fut au milieu du chemin: Puis nous ayant fait vn long recit de toutes ces Aduentures là; *Assurément*, nous dit-il, *ce n'estoit pas merueille si nous faisons des choses si grandes, puis que Dieu mesme en estoit l'Auteur, & que par sa sainte Grace, il produisoit en nous des choses miraculeuses; l'une desquelles, estoit que nos cheuaux galeppoient si viste, & si aisément sur les Rochers, qu'ils sembloient voler comme les Pigeons qui s'y voyent d'ordinaire, quoy que la Montagne tournée du costé de l'Orient, fut grandement rude, & raboteuse.* François Rodriguez nous fit ces contes, & plusieurs autres, dont ie voudrois me pouuoir souuenir, pour estre bien assuré que ie remplirois plusieurs fucilles de papier des memorables Exploits que firent les Espagnols en ce siege là: Mais il me suffit de dire, que n'estant que 170. ils resisterent à deux cens mille hommes de Guerre, à la faim, au sommeil, à la fatigue, aux bleseures, qu'ils ne pouuoient penser à faute de Chirurgiens; & en vn mot, à toutes les plus grandes incommoditez, qui se voyent dans vne Place assiegée. Ainsi m'estant impossible d'exprimer naïuement de si estranges trauaux, ie les laisse à imaginer, s'il se peut, à ceux qui les liront dans cette Histoire: Et toutesfois quelques grands qu'ils fussent, les Espa-

gnols les supporterent, & les vainquirent par leur grand Courage, fortifiez de l'assistance de Dieu, qui les choisit pour prescher dans cét Empire-là son saint Euangile.

Après que les Espagnols se furent desueloppez des Indiens, ils trouuerent à propos d'attaquer la Forteresse, où estoit la plus grande foule des Ennemis, contre lesquels ils ne croyoient pas auoir beaucoup aduancé s'ils n'emportoient cette Place-là. Sur cette resolution ils s'y en allerent, ayant laissé dans leur logement vne bonne garnison pour le garder. Les Indiens se desfendirent si bien, qu'il fut impossible de les auoir de six iours: Mais il arriua par vn grand malheur pour les Espagnols, qu'eux, & leurs Ennemis ayant combattu tout vn iour, comme ils se reti-roient de nuit en leurs postes, Jean Piçarre, Frere du Marquis Dom François, ne pouuant souffrir la sallade sur sa teste, pour y auoir esté blessé depuis peu, la voulut quitter, auant qu'il en fut temps: Ce qu'il eut fait bien à peine, qu'atteint d'un coup de caillou, qui luy fut tiré par vn Frondeur, il en receut vne si dangereuse playe à la teste, qu'il en mourut à trois iours de là. Ce qui fut sans doute, au rapport d'Augustin de Carate, vne tres-grande perte pour tout ce pais-là, d'autant que ce Cavalier estoit vaillant au possible, fort experimenté aux Guerres des Indiens, & chery de tous generalement.

Ainsi mourut Jean Piçarre, au grand regret de tous ceux de sa cognoissance, qui ne purent s'estonner assez de voir qu'un homme de si haute reputation, si genereux, si vaillant, si affable, & si aymé, pour posseder toutes les vertus qu'on scauroit iamais desirer en vn excellent Homme, finit ces iours si malheureusement. Son corps fut enseuely sous vne grande pierre azurée, où l'on ne mit aucun Epitaphe, quoy qu'il le meritât autant que personne: mais ce fut ie m'assure à faute de Sculpteur, pource qu'alors on ne scauoit ce que c'estoit de ciseau dans mon pais, où l'on ne parloit que de Lances, d'Espées, & d'Arquebuses. Les Espagnols gaignerent ainsi, à leurs despens, & à leur grande perte, la Forteresse de Cozco, d'où ils chasserent les Indiens: Où ie trouue fort estrange que les Historiens aient escrit que cette action se passa deuant que toutes les autres de ce siege-là, puis que les Indiens en leurs Relations, la mettent dans le temps que nous venons de marquer, sans s'essioigner de la verité de l'Hutoire, qu'ils rendent conforme au sentiment des Espagnols,

*DIVERS EXPLOITS DE COURAGE,
qui se passerent au siege de Cozco, entre les
Espagnols, & les Indiens.*

CHAPITRE XXVII.

LES Indiens repritent courage, apres qu'ils eurent tué vn si braue Capitaine, comme estoit Iean Pigarre, qu'ils scauoient estre Frere du Gouverneur, & Homme d'vne valeur extraordinaire, qui estoit ce qu'ils estimoient par dessus tout. Alors ils s'animerent les vns les autres, à renoueller les Attaques, & les Combats; où bien qu'ils n'eussent rien gagné iusqu'alors, si est-ce qu'ils ne pouuoient perdre l'enuie qu'ils auoient de tuer les Espagnols, pour reestabliir leur Prince Manco Ynea dans son Empire. Sur cette confiance ils faisoient toute sorte d'efforts, pour fatiguer les Chrestiens, qui cependant pouuoient faire des courtes hors de la Ville, vne lieue à la ronde, sans que les Indiens y apportassent aucun obstacle. Mais d'vn autre costé ces Infidelles ne laissoient pas de les incommoder beaucoup, principalement en ce qu'ils empeschoient que ceux de leur Nation qui les seruoient, ne leur apportassent aucune sorte de provisions de bouche. Tellement que les Espagnols estoient contrains de courir la Campagne, pour y chetcher de quoy se nourrir, n'ayant iamais eu durant tout le siege ce qu'il leur falloit de viures, s'ils ne s'en fournissent eux-mesmes, aux despens de leurs bras, & de leur peine, car pour ce que leurs Indiens domestiques leur apportotent, quand ils venoient de la picorée, ce n'estoit pas chose qui pût suffire pour les faire subsister. Augustin de Carate parlant de ces courtes, en dit ce qui suit.

Durant le progres de ce siege, & de ceste Guerre, Gonçalo Pigarre suivy de vingt Cavaliers, courut la Campagne iusques au Lac de Chincheto, qui est à cinq lieues de Cozco, où sans d'Indiens allerent fondre sur luy, qu'encore qu'il leur resistas vaillamment, eux neantmoins l'auoient presque reduit à se rendre, & l'y auroient contrainct a la fin, si Hernand Pigarre, & Alonso de Toro, ne l'eussent tiré d'entre les mains des Ennemis, parmy lesquels ils estoit fourré trop auant, avec

plus de courtoisie que de prudence, veu le peu de gens qu'il avoit. Ce sont les paroles de Carate : où vous remarquerez que le Lac qu'il appelle avec les Indiens, Chinchero, ou Chincheru, est à deux lieues de Cuzco, du costé du Nord, & tres-agreable à voir. Ce fut de ce mesme Lac que les Yncas tiraient autresfois vn fort beau Canal, extrêmement utile pour arroser les Champs de la Vallée de cette Ville-là ; Mais les Guerres des Espagnols furent la cause qu'il tomba tout en ruine, à faute d'estre entretenu. Neantmoins il arriua depuis (à sçavoir aux années 1555. & 56.) que *Garcilasso de la Vega*, mon Pere, le fit remettre en son entier, comme il est à present, pour la commodité de tout le Public. Mais pour reuenir à ce qu'Augustin de Carate rapporte du peril extrême où se trouuoit Gonçalo Pigarre, lors que son Frere le secourut ; il faut sçavoir (comme ie l'ay remarqué dans mon Histoire de la Floride) que ce Cavalier fut sans contredit vn des meilleurs, & des plus vaillans Gens-d'armes qu'on eut veu passer encore dans le nouveau Monde ; de sorte qu'il est bien à croire, que luy & ses gens combattirent courageusement ce jour-là : Mais d'autant qu'ils se virent assiegez d'vn nombre prodigieux d'Indiens, qui les chargeoient de toutes parts, ils se fussent perdus enfin, sans le secours qui leur vint ; ce qui fut assurément vn grand effet de la Misericorde diuine, pource qu'il leur arriua, sans qu'ils l'eussent demandé, ny mesme sans qu'Hernand Pigarre sceut aucunement qu'ils en eussent besoin.

Quelques iours apres, il se donna entre les Indiens, & les Espagnols, vne fameuse Bataille dans la Plaine des Salines, qui est à vne petite lieue de la Ville, tirant vers le Midy. Plusieurs Exploits memorables s'y passerent de part, & d'autre : Mais quoy que les Indiens fussent en grand nombre, & acharnez au Combat ; si est-ce qu'ils furent vaincus à la fin, & abandonnerent aux Espagnols le Champ de Bataille. Quelques Capitaines Indiens se voyant engagez bien auant dans le Combat, aymerent mieux mourir deuant leur Yncas, qui les regardoit du haut d'vne butte, que de fuir en sa presence. Avec vn de ces Indiens, qui estoit au milieu du chemin de Collao, combattit vn assez long-temps, vn Cavalier de ma connoissance, & qui montoit vn fort beau cheual ; Comme il eut mis sa lance en arrest il fut aussi tost attendu de pied ferme par l'Indien, qui portant la

mine d'estre Soldat, n'apperceut pas plustost venir à luy l'Espagnol, qu'ayant destourné la lance avecque son Arc, il la luy saisit à force de bras. Alors vn autre Cavalier, que i'ay conneu encore, & qui n'auoit pas voulu seconder son Compagnon, dautant que c'estoit vn Duel singulier, apperceuant que son Ennemy l'auoit desarmé, luy voulut porter vne atteinte de sa lance; Mais l'Indien la para, & s'en fit maistre, comme de l'autre, se deffendant ainsi de ces deux lances qu'il auoit gagnées à ces Cavaliers, dont ie veux taire le nom par respect, & l'vn desquels auoit autrefois esté mon Compagnon d'Ecole. Comme cela se passoit ainsi, Gonçalo Pigarre ayant combattu ailleurs, & mis en fuite les Ennemis, survint fortuitement en ce lieu là; voyant ce qui s'y passoit, se mit à crier, *hors de là, hors de là*, pource qu'il prist garde que les deux Espagnols vaincus s'alloient ietter sur l'Indien; ce qui les obligea (pource qu'ils le conneurent) de luy ceder aussi tost la place, pour voir s'il n'auroit pas du meilleur, ou du pire qu'eux. Dés que l'Indien le vid venir, il s'appuya sur la premiere lance qu'il auoit ostée; & de la seconde qu'il tenoit en main, il combattit le troisiésme Cavalier: mais auant qu'il en receut aucune atteinte, il donna sur le nez du Cheual vn si grand coup de lance, qu'il le fit dresser sur les pieds de derriere, en grand danger d'abbattre son Maistre; ce qui fit qu'en mesme temps l'Indien, voyant le cheual ainsi embarrassé, posa l'vne de ses lances, & se ietra sur celle de Gonçalo Pigarre, pour la luy arracher comme il auoit fait les autres: mais pour ne la perdre, Pigarre se la mit en la main gauche; & de la droiète il tira son espée, pour en couper les mains à son Ennemy. L'Indien lascha prise aussi tost, se baissant pour prendre l'vne des lances qu'il auoit iettée à terre; & à l'heure mesme, les deux Cavaliers qui le regardoient faire, fort irritez contre l'Indien, coururent à luy pour le mettre à mort: mais Gonçalo Pigarre, criant le plus haut qu'il pût; *Laissez-le*, leur dit-il, *& gardez vous bien de luy faire mal, car il est plus digne de récompense que de punition*. A ces mots, les Cavaliers s'arrestèrent; & l'Indien connoissant que ces paroles de Gonçalo Pigarre luy auoient sauué la vie, ietta derechef la lance qu'il venoit de leuer, pour vne marque qu'il se rendoit. Cela fait, il courut à Pigarre, & luy baissant la cuisse droiète; *Tu es*, luy dit-il, *mon Yncá, & moy ie suis ton Vassal*. Gonçalo Pigarre le receut pour tel, & l'ayma tousiours depuis comme son fils,

iufques à ce que l'Indien mourut en la journée de la Canée, comme il fera dit cy. apres. l'ay oüy faire cecôte à plusieurs, qui s'estoient trouuez en cette Bataille-là, principalement à François Rodriguez d'Villefort, & Gonçalo Pigarro aduoüoit franchement, que jamais homme ne l'auoit si mal mené, ny mis en si grand danger que cét Indien, en quelque rencontre qu'il se fut trouué.

Vn peu plus auant deuers le Midy aduint vn autre fait bien estrange, que Villefort raconta le mesme iour. Ce fut qu'un Cauallier passant son chemin, sans faire rencontre d'aucun Indien fut tout estonné que son cheual s'abbatit soudainement sous luy Il vuida les arsons aussi-tost, sans que le cheual se pût releuer, & prit garde à mesme temps qu'il auoit l'un des pieds de deuant percé d'un coup de fleche. Cét euénement l'estonna fort, & ceux qui estoient avec luy : Ils regarderent de tous costez, sans qu'ils püssent descouurir d'abord aucune personne ; Mais en fin en l'une des aduenües du chemin, ils virent vn Indien au pied d'un Rocher, où il estoit appuyé, sans qu'ils se püssent imaginer qu'une fleche dardée de si loing eut pû porter iufques au lieu où ils estoient : Neantmoins, pource qu'il leur sembla par les apparences estre venuë de ce costé-là ; ils s'y en allerent pour s'en esclaircir, & trouuerent à leur arrivée vn Indien appuyé contre le Roc, tenant vn Arc à la main, & vne fleche en l'autre. Il auoit vn coup de Lance, qui luy prenoit à la poitrine, & sortoit par l'espaule, avec apparence qu'il luy venoit de la main d'un Espagnol, qui l'auoit reduit à gagner ce Rocher, pour estre à couuert de la poursuite de son cheual ; & que depuis s'estant veu blessé d'une playe incurable, pour se vanger auant que mourir, il auoit tiré la fleche susdite au Cauallier qui passoit son chemin. Que si la distance du lieu, & la faiblesse de son corps, si dangereusement blessé, n'eussent amorty son coup ; la visée qu'il auoit prise n'estoit pas mauuaise, pour donner droit au visage, ou au corps de l'Espagnol, au lieu qu'il n'y eut que son cheual de blessé. Voila deux Actes assez fameux, que firent les Indiens ces iours-là, qui furent des derniers du siege de Cozco : Mais nous discontinuerons ces Aduentures, pour passer à celles de Rimac, où estoit cependant Dom François Pigarre, bien affligé au commencement, des grands travaux qu'enduroient ses freres en cette Guerre-là ; mais dès qu'il ap-

prit que ses affaires alloient mieux, il fit tout ce qu'il pût en boa Capitaine, comme nous verrons tout maintenant.

*DV NOMBRE DES ESPAGNOLS QUE
les Indiens tuerent par les chemins, & des choses qui
se passerent au siege de la Ville des Roys.*

CHAPITRE XXVIII.

LE Marquis Dom François Pizarre voyant que ses Freres ne luy escriuoient plus à l'accoustumée, en soubçonna mal; & ne pouuant sçauoir au vray d'où en procedoit la cause, se vit fort en peine de l'expedient qu'il deuoit prendre pour s'en esclaircir; Mais enfin il n'en trouua point de meilleur que celuy qui se presentoit par l'entremise des Indiens domestiques, & qui conuersoient familièrement avecque les Espagnols; auxquels il enuoya dire qu'ils eussent à s'enquerir de leurs parens, des choses qui se passaient dans le Royaume, apprehendant que ce ne fut pas sans cause qu'on eut fermé les chemins, & les principales aduenues. Les *Tanacunas*, qui sont les Indiens nourris chez les Espagnols, ayant fait toutes les diligences possibles, pour s'acquitter de leur commission, sceurent que l'Ynca estoit souleué, & qu'il auoit à l'entour de Cozco quantité de gens de Guerre; mais ils n'en purent apprendre les particularitez, & n'en firent qu'une Relation confuse au Marquis.

Luy cependant ne perdit point temps, & sans vser d'aucun delay il escriuit à Nicaragua, à Mexique, & à S. Domipique, pour demander du secours; Ce qu'Augustin de Carate remarque en ces termes. *Le Marquis ayant veu tant d'Indiens qui s'en venoient fondre sur la Ville des Roys, tint pour certain qu'Hernand Pizarre, & tous ceux de Cozco estoient morts, & qu'en ce souleuement general, ny Dom Diego d'Almagre, ny ses gens n'en auroient pas esté quittes à meilleur marché dans le Royaume de Chily. Nean:moins, afin que les Indiens ne creussent pas que l'apprehension leur fit tenir leurs vaisseaux à l'ancre, pour s'enfuir au besoin, & pour empêcher d'ailleurs que les Espagnols n'esperassent de se pouoir sauuer par Mer, à la faueur des ces Nauires, si bien qu'ils en deussent plus lasches au Combat; il s'aduusi d'nuoyer*

à Panama les mesmes Vaisseaux, & par la mesme route il fit scauoir tant au Vice-Roy de la nouuelle Espagne, qu'à tous les Gouverneurs des Indes, le mauuais estat des affaires du Peru, & les grandes extremitez, où il se trouuoit reduit, le pria de le vouloir secourir au plustost, &c.

Outre ces diligences qu'il fit, par le moyen des plus fidelles d'entre les Yanacunas, il escriuit encore à Alonse d'Aluarado, qui estoit à la Conqueste des *Chachapuyas*, à Sebastien de Belalcázar, qui s'employoit à celle de *Quitu*, où tous deux auoient de fort bons succez, & à *Garcillasso de la Vega*, qui tout au contraire ne faisoit presque point de progresz dans la Prouince qu'on appelle communément par mespris la *Bonn'aduenture*, où s'engolfent dans la Mer les cinq grandes Riuieres que ceux du pais nomment *Quiximios*, chacune desquelles n'est pas moins grande, qu'elle est impetueuse, & rapide: Et toutesfois, si *Garcillasso* faisoit mal à ses affaires, ce n'estoit pas pour aucune resistance que luy fissent les habitans, mais pour l'incommodié du pays, qui est fort rude, & inhabitable, à cause de ses Montagnes inaccessibleles, comme nous le monstrerons plus auant, parlant de ce qu'il souffrit en son Voyage. Le Marquis escriuit pareillement à Jean Porcel, & ainsi il les aduertit tous quatre de se rendre le plustost qu'ils pourroient dans la Ville des Rois, afin que par leur jonction ils pussent resister courageusement aux forces des Indiens.

Dans cette conioncture, en attendant la venuë de ses Capitaines, le Marquis se despescha le plus viste qu'il pût, d'enuoyer du secours à ses Freres, quoy qu'il ne sceut pas, ny qu'ils fussent en de si grandes extremitez comme ils estoient, ny qu'ils eussent sur les bras vn si grand nombre de gens de Guerre: En tous cas neantmoins, il leua ce qu'il pût auoir de Soldats, & sous la conduite du Capitaine Dom Diego Pigarte son parent, il enuoya soixante dix Cavaliers, & trente Fantassins, selon ce qu'en dit Augustin de Carate.

Les Indiens, qui accouroient de diueres parts, pour faire vn massacre du Marquis, & des Espagnols, qui estoient avec luy, ayant appris par leurs Espions, qu'il enuoyoit des gens de secours à ses Freres, se desisterent d'aller en la Ville des Rois, avecque dessein de fermer les chemins, pour les resserrer dans de mauuais passages, dont il y en a quantité, depuis Cozco, iusques à *Quitu*. Sur cette resolution, & avec beaucoup de ruse,

ils laisserent marcher Diego Piçarre, & ses Compagnons, soixante & dix lieues, sans leur faire aucun mal, afin qu'ils s'esloignassent tousiours plus fort du Gouverneur. Car bien qu'il y eut en ce chemin plusieurs aduenues tres dangereuses, où ils les pouuoient attaquer à leur aduantage, de peur que la nouuelle ne luy en vint aussi-tost, ils ne le voulurent point pourtant, & iugerent plus à propos de temporiser, pour luy donner bonne opinion de leur arriuée à Cozco. Mais enfin, comme ils les virent bien empeschez à monter vne Colline fort rude, communément appellée *le Costau de Parcos*, ils leur ietterent d'en-haut vne si grande quantité de ces grosses pierres, nommées *Galgas*, que sans vser, ny de lances, ny d'espée, ils les tuerent tous, si bien que pas vn n'en reschappa. Ils en firent de mesme au Capitaine François Morguejo de Quinionez, qui menoit 60. Cheuaux, & 70 Fantassins: en suite dequoy ils mirent à mort aussi le Capitaine Gonçalo de Tapia, & avec luy 80. Cheuaux, & 60 Hommes de pied; sans exempter de ce massacre le Capitaine Alonse de Gahete, qui commandoit 40 Cheuaux, & 60. Fantassins: De maniere qu'en cette malheureuse route, demurerent morts en diuers passages 470. Espagnols, à sçauoir les 150. Cavaliers (bien que Carate en mette 300.) & 220. hommes de pied. Pedro de Cieça de Leon, faisant mention des Espagnols qui furent tuez par les Indiens dans ce souleuement general, en patle de

Ch. 81. cette sorte.

L'on tient que les Indiens de cette Prouince de Conchucu, estoient si vaillans, & si aguerris, que les Incas eurent bien de la peine à les subjuguers; quoy que la pluspart de ces Princes eussent accoustumé d'attirer les gens par belles paroles, & par bien-faits: les Indiens tuerent quelques Espagnols en diuers endroits, tellement que le Marquis Dom François Piçarre fut contraint de leur enuoyer des gens de secours par le Capitaine François de Chaucer; D'où il aduint qu'il se fit entr'eux vne guerre si espouuenteable, que le nombre des Indiens estant incomparablement plus grand que celuy des Espagnols, il y en eut quelques-uns d'Empalez, & mesme de bruslez. Aussi fust-ce en mesme temps, ou un peu deuant, qu'aduint la Reuolte generale de la plus-part des Prouinces; dans l'enclos desquelles, depuis Cuzco, iusques à Quiru, les Indiens firent masser de plus de 700. Chrestiens Espagnols, qu'ils faisoient mourir cruellement, quand ils les pouuoient auoir en vie, & les enluer parmi eux. Dieu nous garde de la fureur de ces Infideles, qui est

grande assurance, lors qu'ils peuuent executer leur dessein; & toutesfois pour la couvrir de quelque pretexte, ils alleguoient qu'ils ne combattoient que pour se deliurer de la Tyrannie des Espagnols, comme les Espagnols disoient de leur costé, qu'ils ne leur faisoient la Guerre que pour se les assujettir, & leur pais avec eux.

A ces paroles de Pedro de Cieça se rapportent entierement celles du Pere Blas-Valera, qui dit, Qu'en ce soulleuement, il y eut plus de 700. Espagnols de ruez, que les Indiens en assommerent environ 300. dans les Mines, où ils estoient espars en diuers endroits, y cherchant à faire leur profit: Et que les autres 470. furent tous gens de secours. Le Marquis les enuoya file à file, selon qu'il les pût leuer, sur l'esperance qu'il eut qu'ils en arriueroyent plustost, & que les vns iroient ioindre les autres, ne s'estant pas imaginé que les dangers deussent estre si grands par les chemins, ny les Indiens assez forts, pour tuer dix hommes de cheual, & par consequent encore moins, 60. 70. & quatre vingts ioints ensemble, sans y comprendre les gens de pied. Mais bien qu'il eut tant de confiance en la valeur des siens, il estoit neantmoins fort affligé de n'entendre point de leurs nouuelles, pource que ny les premiers, ny les derniers, ne luy en demandoient aucunes. Pour se tirer de cette peine, & s'asseurer de l'estat de ses Freres, il enuoya vn autre Capitaine appellé François de Godoy, natif de Cacerez, avec 45. Caualliers armez à la legere, non pas pour aller iusques à Cozco, mais pour s'en retourner, apres auoir appris en chemin qu'estoient deuenus leurs Compagnons. Gomare dit à ce propos ce qui suit.

Picarro s'estonnoit fort de ce qu'il ne receuoit aucunes lettres, ny de ses Capitaines, ny de ses Freres; de sorte qu'apprehendant qu'il ne leur fut arriué quelque mal, comme il n'estoit que trop veritable, il dispatcha 40. Caualliers, menez par François de Godoy, pour estre aduerty au vray de tout ce qui se passoit. Mais ce Messager s'en reuint tout confus, ayant avec luy deux Espagnols de Gahete, qui s'estoient sauuez au grand galop, & qui apportèrent à Góngalo Picarro de si mauuaises nouuelles, qu'il ne sceut plus à quoy se résoudre. Sur ces entrefaites, Diego Daguerro ayant pris la fuite, vint en La Ville des Roys, où il fit scauoir que les Indiens estoient tous en armes, qu'ils l'auoient voulu brusler dans leurs Bourgs, & que leur Armée estoit fort proche de la Ville. Cette nouuelle les mit tous en alarme, & ce d'autant plus qu'il n'y auoit alors que peu d'Espagnols. Le remede que Picarro s'adonna d'y mettre,

fut d'enuoyer deuant Pedro de Lerma de Burgos, avecque soixante dix Cheuaux, & plusieurs de ses Amis, tant Indiens que Chrestiens, pour empêcher, s'il estoit possible, que les Ennemis ne vinssent point en la Ville des Roys, & luy-mesme suiuit apres avec les autres Espagnols. Lerma fit tres-bien en cette occasion, & relança les Ennemis en vn grand Rocher, avec apparence qu'il en fut venu à bout, si Pigarre n'eut fait sonner la Retraite.

Plusieurs Espagnols furent blesez en cette rencontre: Pedro de Lerma y eut toutes les dents cassées, & vn Cavalier y perdit la vie. Cependant les Indiens rendirent graces au Soleil de les auoir d'sliurez d'un si grand danger, & luy firent plusieurs sacrifices, puis s'en allerent camper en vne Montagne proche de la Ville des Roys, ayant la Riviere entre deux. Ils passerent là dix iours entiers en continuelles Escarmouches contre les Espagnols; Car pour les autres Indiens, ils ne vouloient point les attaquer, &c. Augustin de Carate dit le mesme que Gomare, & si l'on remarque bien les paroles de l'un, & de l'autre, on trouuera, ce me semble, qu'elles donnent la V.étoire aux Indiens, plustost qu'aux Espagnols. Quoy qu'il en soit, il est veritable que les Indiens se croyans victorieux par la deffente de tant de Chrestiens qu'ils auoient tuez par les chemins, prirent leur marche droit à la Ville des Roys, avec grande confiance de se desfaire du Marquis, & de tous ses gens. Comme ils marchoiert ainsi resolus, ils rencontrerent à dix lieues de la Ville, Pedro de Lerma, & ses Compagnons, si bien que les vns, & les autres combattirent vaillamment: Et d'autant que le Combat se donna d'abord en rase Campagne, les Cavaliers y tuerent quantité d'Indiens, pour le grand aduantage que leurs Armes, & leurs Cheuaux leur donnoient sur eux, d'où il s'ensuiuit que les Indiens se retrancherent en la prochaine butte, où à force de s'appeller à grands cris, entremeslez au bruit des Trompettes & des Tambours, ils se trouuerent enfin plus de 40000. Or d'autant que le Terrain estoit tout raboteux, & que les Espagnols ne pouuoient pas aller aussi viste avecque leurs Cheuaux, comme ils auoient fait au commencement, les Indiens donnerent sur eux avecque furie, & les traiterent fort mal; car avec ce qu'ils casserent les dents à Pedro de Lerma d'un gros caillou qu'ils luy tirerēt avec vne fronde, ils en bleferent quantité d'autres, 32. desquels moururent depuis, au grand regret de leurs Compagnons. Il y eut aussi huit Cheuaux de tuez, sans

que dans la chaleur du Combat on y eut tué sur la place qu'un seul Espagnol avec son cheual. Durant tout cecy, le Gouverneur, qui les suiuiot d'assez loing, les voyant prests à donner do rechef, fit sonner la Retraite, tant pour se rallier avec eux, en venant à leur secours, que pour mettre les Indiens en alarme, & les obliger à ne plus combattre; Comme en effect la Bataille cessa tout à mesme temps, & fut grandement sanglante. Les Espagnols s'estant ralliez, prirent leur marche à la Ville, & les Indiens de mesme se rallierent, s'appellant les vns les autres; si bien qu'à la fin ils se trouuerent plus de 60000. conduits par leur General *Tiu Youpangui*, que Carate nomme *Tiço Youpangui*, & Gomare *Tizoyo*.

Pour estre plus à couuert des Cheuaux, ils s'aduiferent d'aller camper assez près de la Ville, n'y ayant que la Riuierre entre deux. La premiere chose qu'ils y firent, fut de redoubler leurs sacrifices au Soleil, en recognoissance de ce qu'il leur auoit donné l'aduantage sur les Espagnols, puis qu'ils s'estoient retirez du Combat, & retranchez dans la Ville. Mais quelques Historiens disent, qu'ils le remercierent pluost de les auoir retirez d'un peril si euidet: Ce qui est vne contradiction manifeste, puis qu'en peu apres ils adioustent, Qu'ils chargeoient les Espagnols sans relasche, & ne vouloient nullement combattre contre les autres Indiens; ce qu'apparamment ils ne desiroient point, à cause qu'ils desdaignoient d'en venir aux mains avecque leurs Vassaux, ayant attaqué desia les Espagnols qu'ils combattoient tous les iours; Mais ils n'aduancerent pas beaucoup; pource qu'estans en vn pais plat, dès qu'ils pensoient approcher, ils voyoient venir à eux les Cheuaux, qui les contraignoient de reculer. Avec tout cela neantmoins, comme les Indiens estoient en grand nombre, ils leur donnoient de continuelles alarmes, & les fatiguoient, nuit, & jour, sans leur donner vn seul moment de relasche; Mais le pire estoit, qu'ils ne scauoient plus que deuenir à faulte de viures, n'en pouuant auoir aucuns que par la seule adresse des Indiens leurs Domestiques, & leurs Amis. Comme ceux de Cozco, ils se mesloient à la faueur des tenebres dans la foule des Ennemis, ausquels ils faisoient accroire qu'ils auoient quitté leurs Maistres, puis comme la nuit estoit venue, ils s'en retournent vers eux, pour leur apporter à manger, & les aduertir de ce que les Ennemis pretendoient faire;

Ce qui leur seruoit grandement pour en destourner les desseins, quand ils venoient les atraquer : si bien qu'ils auoient grande raison d'aduoir, qu'ils deuoient beaucoup à de si bons seruiteurs, qui leur sauuoient si souuent la vie, tesmoins Diego d'Agüero, & plusieurs autres Seigneurs, qui au rapport de Carate ne se fussent iamais sauuez, comme ils firent, dans la Ville des Roys, si leurs Indiens Domestiques ne les eussent aduertis du souleuemēt de l'Ynca, & de la venuë des gens de Guerre, qu'ils vouloient massacrer; tellement que ce fut à la bonne heure, qu'en vn temps, où ces Espagnols iouissoient paisiblement des Departemens que le Marquis leur auoit donnez; ils se garentirent des traits de la Mort, par la fidelité de leurs Indiens.

Outre cescours humains, il y eut encore des effectsextraordinaires & miraculeux en ce siege-là, comme en celuy de Cozco, qui furent faits en faueur des Chrestiens. Tel fut celuy qui se remarqua sur la Riuiere, dont les Infidelles auoient fait la principale fortification de leur Armée, & qui ne seruit neantmoins qu'à leur commune ruïne. Car durant le siege, toutes les fois qu'ils la passoient, pour aller nuire aux Fidelles, & qu'ils la repassoient pour s'en retourner, elle se grossissoit aussitost, & leur sembloit estre vne grande Mer, où toutes sortes de malheurs les accompagnoient. En effet, soit qu'en la trajectant, ils se sentissent blessez par les Ennemis, soit qu'ils ne le fussent point du tout; tant y a qu'ils ne laissoient pas de se noyer la pluspart du temps, bien qu'il s'en fallut beaucoup que la Riuiere ne fut si rapide que plusieurs autres de cette Coste-là, horsmis en temps d'Hyuer, où ses courants sont extrêmement dangereux; mais les Espagnols la passoient sans crainte en quelque temps que ce fut, comme s'ils eussent marché sur la Plaine. Cependant les Indiens prenant garde à l'un, & à l'autre, comme gens qui tiroient de toutes choses des presages, ou bons, ou mauuais, disoient entr'eux, qu'autant que les Elemens leur estoient contraires, autant se monstroient-ils fauorables aux *Viracochas*: A quoy ils adiuoient, que le *Pachacamac* (ils nommoient ainsi le Protecteur du Monde) les abandonnoit entierement, pour assister leurs Ennemis; pource, disoient ils, qu'aussi tost qu'ils se voyoient au Champ de Bataille, ils estoient saisis d'un si grand effroy, qu'ils en perdoient tout courage, & toute enuie de combattre: D'où ils concludoient; Qu'il ne faloit nullement douter,

qu'une si haute merueille, comme estoit celle de voir que tant de milliers d'hommes ne pouuoient vaincre si peu d'Espagnols, ne fut vn effet de la volonté du souverain Createur de toutes choses, qui les conseruoit, & les deffendoit ainsi.

Aussi à vray dire, des succez si admirables, qu'on ne pouuoit mieux nommer que de vrais ouurages de la main de Dieu, abbatirent tellement le courage aux Infideles, qu'ils ne firent depuis aucune chose qui fut remarquable, se contentant de tenir la Ville assiégée, plustost pout obeïr à leurs Chefs, que pour aucune esperance qu'ils eussent de l'emporter, ne pouuant rien dire, ny faire, dont les Espagnols ne fussent aussi-tost aduertis par les autres Indiens leurs seruiteurs. Ils auoient donc bien raison de remercier Dieu, comme ils faisoient, de tant de graces qu'ils en receuoient, qui passoient mesme iusques à la connoissance de leurs Ennemis; & de dire que la Riuiere, dont nous venons de parler, auoit esté pour eux contre les Indiens, ce que fut autrefois la Mer rouge aux Enfans d'Israël, contre les persecutions de Pharaon, & des Egyptiens. Or pource que le plus grand combat, & les plus signalées Victoires qu'ils gagnerent, aduintrent d'un bord à l'autre de cette Riuiere-là; ce fut la raison pour laquelle ils tesmoignerent depuis auoir vne particuliere deuotion enuers le bien heureux saint Christophle, se remettant en memoire ce qui se raconte ordinairement, & ce qu'on void peint dans les Eglises, touchant la grace que receut aussi, au passage d'une Riuiere, ce grand, & admirable seruiteur de Dieu; à cause dequoy dans toutes ces rencontres, & ces Batailles, les Espagnols inuquoient deuotement son nom, avecque celui de l'Apôstre Saint Iacques, & mesme depuis ce Siege là, ils nommerent la Colline où leurs Ennemis auoient eu leurs plus grandes forces, *le Mont de saint Christophle*, qui est près de la Ville des Rois, à l'autre bord de la Riuiere, d'autant qu'en ce lieu-là ils acheuerent de vaincre, & d'exterminer les Indiens.

*FVITTE DE VILLAC-HVMV, ET CHASTI-
ment fait de l'Interprete Philippe. Le Prince Manco
Ynca se bannit de son Empire.*

CHAPITRE XXIX.

NOVS auons dit cy-deuant, que le Prince Manco Ynca auoit enuoyé des Messagers à Chily, pour aduertir son Frere Paullu, & le grand Prestre Villac-Humu, qu'il estoit resolu de faire vn massacre general de tous les Espagnols du Peru, afin de se reestabli par ce moyen dans son Empire, les sollicitant d'en faire de mesme de Dom Diego d'Almagre. & de tous ceux de sa suite; Il faut sçauoir maintenant, que les Messagers susdits estans arriuez à Chily, auant que Dom Diego en fut sorty, les aduertirent tous deux de la part de leur Prince. Mais Paullu & les siens, ayant bien consulté là dessus, ne trouuerent aucunement à propos de rien entreprendre contre les Espagnols, à cause qu'il leur sembla que pour les combattre à descouuert, ils auoient trop peu de forces, la rigueur du froid, & de la neige leur ayant fait mourir sur la Montagne plus de dix mille Indiens, comme nous l'auons ven cy-deuant. Ils ne furent non plus d'avis de les attaquer en secret, ny de nuit, pour estre bien assurez que les Espagnols estoient si vigilans, & si pleins de precaution dans leur Milice, qu'ils leur ostoient toute esperance de venir à bout d'aucune entreprise qu'ils pussent faire contre eux: Ces considerations furent cause qu'ils resolurent de dissimuler, & de seruir tousiours fidelement les Espagnols, iusques à ce qu'il se presentât vne occasion fauorable pour executer leur dessein. Et d'autant que Paullu, & Villac-Humu se trouuoient à Tacama, pais de la Iurisdiction du Peru, hors des Deserts de Chily, dont il a este parlé dans ce mesme Liure; ils trouuerent à propos que le grand Prestre des Indiens s'enfuit, & que Paullu demeurât avecque les Espagnols, afin que s'il se passoit quelque chose entr'eux contre l'Ynca son Frere, il luy en pût donner aduis: C'est pourtant l'opinion de Gomare, Qu'ils s'enfurent tous deux: Mais Augustin de Carate ne fait mention que

Ch. 27.

Liv. 3.

que de la fuite du Prestre ; Et en vn autre endroit parlant de Paullu, il en dit ces mesmes paroles. *Dom Diego d'Almagre donna la Bordure Imperiale à Paullu, apres que son Frere Mango Ynca, suiuy d'une grande quantité de gens de Guerre, se fut exilé parmy les Rochers presque inaccesibles des Montagnes qu'ils appellent Andez.* Voilà ce que dit Carate, sur le sujet duquel nous auons fait remarquer cy-deuant, que lors que ces deux Auteurs se trouuent differens en quelque chose, il vaut mieux suivre celui-cy, qui a esté au Peru, que s'attacher opiniastrement au sentiment de l'autre.

Le Truchement Philippe, qui auoit esté avec Almagre, s'enfuit de mesme; car depuis la mort d'Atahualpa, il vescu tousiours en si grande apprehension, qu'il eut voulu estre bien loin des Espagnols; Et voilà pourquoy en ayant maintenant trouué l'occasion, il les quitta là; non pour auoir sceu l'intention des Yncas, qui s'estoient tousiours bien donné garde de luy, mais pour imiter la fuite des autres Indiens; & par mesme moyen se voir libre de ceux qu'il haïssoit mortellement; Mais comme il ne sçauoit pas bien le País, il fut si malheureux, que de tomber fortuitement en la puissance d'Almagre. Luy donc se souuenant comme il s'en estoit allé d'avec Dom Pedro d'Aluarado; & le soubçonnant à cette fois d'estre Complice de la fuite du Prestre, dont il n'auoit daigné l'aduertir, commanda qu'on le mit par quartiers; & c'est sur ce mesme endroit, bien qu'anticipé, que Gomare dit les paroles suiuanes.

Ce meschant homme estant sur le point d'estre executé à mort, confessad'auoir accusé faussement son bon Roy Atabaliba, pour posseder en seureté vne de ses Femmes; & ainsi l'on pouroit bien dire, que ce Philippille de Pocchos, n'auoit rien de bon dans l'Ame, puis qu'en effect, il estoit Inconstant, menteur, scandaleux, Amy des Robellions, Cruel, & peu Chrestien, bien que neantmoins il fut baptisé, &c. D'où l'on peut voir aisément le grand malheur que ce fut pour cet Empire-là, d'auoir eu pour premier Truchement, vn homme tel que celui-cy, pour la Predication de la Foy Catholique. Almagre sans se soucier de la fuite de Villac-Vmu, puis qu'il auoit Paulu avec luy, marcha tousiours du costé de Cozco, bien assuré du sousleuement de l'Ynca; Car quoy qu'il s'en fut desia bien douté, si est-ce qu'il ne le pouuoit croire, à cause des soins, & de la bonne volonté que Paullu, & ses gens apportoitent sans cesse

à le servir. Il s'en alla par le *Collao*, sans rencontrer aucuns Indiens qui le troublassent, joint qu'il pouuoit bien s'en deffendre au besoin, pource qu'allant par vn País plat, & où les passages n'estoient pas mauuais, comme ceux de Cozco, iusques à la Ville des Rois, il n'apprehendoit pas qu'on pût l'attaquer avec aduan tage.

A son arri uée à Cozco, il trouua que le Prince Manco Ynca, bien aduert y qu'il venoit au secours de ses gens, auoit tout à fait leuë le Siege, sans sç auoir toutesfois quelle intention il pouuoit auoir pour les Piçarres Dom Diego fit représêrer à l'Ynca, (desirât de l'attirer à son Party) qu'il eut bien voulu qu'ils se fussent abouchez ensemble, à cause qu'ils se connoissoient de long-temps: comme en effet, l'Ynca demeura d'accord de le voir, & de parler à luy, bien qu'avec dessein de le prendre, & de le tuer s'il pouuoit, sur l'esperance de se faciliter ainsi le moyen d'en faire de mesme des autres Espagnols. Ils se virent donc tous deux, sans que l'Ynca branlast iamais, pour executer son dessein; Aussi le pouuoit-il difficilement, Dom Diego (comme Soldar plein de cœur, & d'experienec) n'estant allé là qu'accompagné d'un bon nombre de Caualliers, & de gens de pied; si bien que les Indiens n'eurent point l'assurance de l'attaquer, ny l'Ynca non plus ne voulut iamais se ietter du costé de Dom Diego: Ce qui luy fit dire, en s'en allant d'avec luy; *Que dans le desir qu'il auoit de se faire rendre son Empire, il ne luy sembloit pas equitable de se declarer pour vne Faëtion, plustost que pour l'autre. A quoy ses gens ayant respondu, Qu'ils luy conseil loient d'accepter la demande, pour entretenir la Guerre cependant, iusqu'à ce que ces mesmes Espagnols se fussent entretuez, & qu'alors il pourroit avec plus de facilité donner sur les autres, & les tailler tous en pieces; il leur repartit genereusement, Que ce n'estoit pas la coustume des Rois Incas de manquer iamais de parole, quand ils l'auoient vne fois donnée, ny de traiter mal ceux qu'ils auoient receu en leur protection; Et partant, Qu'il ay moit mieux perdre son Empire, que de faire aucune chose qui fut indigne de sa Naissance.*

Tandis que Dom Diego d'Almagres s'entretenoit avec l'Ynca, Hernand Piçarre enuoya solliciter Jean de Sahauedra, qui estoit resté avecque les gens du mesme Dom Diego, de les luy vouloir liurer, avec promesse qu'il luy feroit de grands aduan tages, tant en Richesses qu'en Charges. Mais Sahauedra, Caua-

lier d'une des plus nobles Maisons qui s'honorent de ce nom-là dans Seuille, & l'integrité duquel n'estoit pas moindre que la grandeur de son Extraction, ne tint compte des offres qui luy furent faites, pour ne blesser en rien sa reputation: Et ainsi les trois Partys furent en butte l'un de l'autre, sans se vouloir accorder. L'Ynca considerant alors que Dom Diego d'Almagre estoit de retour de Chily, & que bien qu'en la Conqueste de ce Royaume-là, il eut perdu au passage de la Montagne près de 200. hommes, il en auoit ramené pourtant plus de 150. tous Espagnols; conclud de là, Que puis qu'il n'auoit pû durant plusieurs mois, vaincre 170. de leurs Soldats, il n'y auoit aucune apparence qu'il en pust assujettir 600. maintenant; Qu'au reste, quelques diuisez qu'ils fussent, & en mauuaise intelligence, ils ne laisseroient pas de s'accorder tous enfin, pour se ietter sur les Indiens, & que de porter plus auant la Guerre, ce n'estoit à proprement parler, que ruiner ses Peuples de fond en comble; Qu'il n'auoit que trop veu par esprenue, que depuis vn an qu'ils s'estoient souleuez, ils auoient perdu plus de 40000. des leurs, partie de la main des Ennemis, partie de faim, de misere, & d'autres persecutions, inseparables d'avecque la Guerre; & qu'il ne falloit pas laisser mourir tous les autres, pour obtenir vne chose, qui de iour en iour deuenoit plus espineuse, & plus mal-aisée.

Après qu'il eut mis en deliberation avecque ses plus proches tout ce que ie viens de rapporter, il se resolut de quitter la Guerre, & fit assembler ses Mestres de Camp, ses Capitaines, & ses autres Officiers, auxquels il dit ces paroles.

MES Freres, & mes Fils, j'ay assez veu vos bonnes inclinations, *Harau* & vostre ardente affection en mon endroit, puis qu'avec tant de courage du Prince rage, & de promptitude, vous avez hazardé vos Femmes, vos Enfants, vos biens, & vos vies, pour me remettre dans le Trofne de mes Ancestres; Mais ie me trompe bien fort, si le Pachacamac ne s'y est visiblement opposé. Puis qu'il ne veut donc pas que ie sois Roy, ie serois peu raisonnable de luy vouloir contredire: Ie ne pense pas qu'il y ait ce- *Manco* *Inca.* luy de vous qui ne sçache: que si j'ay desiré de me releuer de ma chute; ce n'a pas tant esté pour regner, que pour faire iouyr mes Roiaumes de cette douce tranquillité, dont ils iouissoient autrefois, sous le Gouvernement de mes Peres. Croyez-moy, mes Amis, ce doit estre toute l'Estude des bons Princes, que de procurer le bien, & la prosperité de leurs subiecs, comme l'on a fait la plus-part de nos Yncas; Mais j'ay belle

peur qu'il n'en soit pas de mesme de ces Hommes que nous auons appellez Dieux, & qu'au lieu d'estre venus du Ciel comme nous croyons, ils ne soient entierement attachez à la terre. Mais quoy ! Si ie ne puis auoir d'eux ce qui m'appartient de droit, j'ayme beaucoup mieux qu'il leur demeure, que de le demander inutilement aux dispens de vos vies : j'ayme mieux, dis-je, me voir despoüillé de mon Empire, que d'estre spectateur de la mort de mes subiets, que ie chers comme mes propres Enfans. Pour empescher donc que les Viracochas ne vous traittent mal, à cause de moy, pource que s'ils me voyent dans quelqu'un de mes Royaumes, ils s'imagineront tousiours que vous m'y voudrez reestabliir : j'ay resolu de m'en bannir moy-mesme, afin que pendant l'ombrage qu'ils ont, ils vous en traittent mieux à l'aduenir, & vous tiennent pour Amis. Certes, c'est bien maintenant que ie voy tout à fait accomplie la Prediction de mon Pere Huayna Capac, lors qu'il asseura un peu deuant que mourir, Que des Peuples incognus nous osteroient nostre Empire, aboliroient nos Loix, & ruineroient nostre Religion. Que si deuant que faire la Guerre aux Viracochas, nous eussions bien consideré ce que le Roy mon Pere nous auoit ordonné par son Testament, nous n'en serions iamais venus si auant ; Au contraire, nous cedions à obey sans murmurer, à sa derniere volonté, qui porte que nous sedions ces Estrangers, pource que leur Loy, & leurs Armes doiuent estre plus puissantes que les nostres. Nous auons cognu l'une & l'autre de ces Veritez, veu qu'à mesme temps qu'ils ont mis le pied dans nostre Empire, ils ont rendu muets nos Oracles, marque euidente qu'ils ont esté contraincts de se rendre aux leurs. Il en est aduenue de mesme de leurs Armes : Elles ont assuietty nos forces ; & bien que d'abord nous ayons tué quelques-uns de leurs gens, si est-ce que 150. qui sont restez, ont esté assez forts pour nous resister, & nous ont mesme vaincus, puis qu'ils nous ont reduits à faire retraite, sans auoir rien aduancé. Mais apres tout, ce ne sont pas eux qui nous ont subiuguez : Ce n'est pas à eux à s'attribuer cette gloire ; ils la doiuent plustost donner à ces merueilleux Effets que nous vismes en les tenant assiegez, par lesquels le Feu perdant sa force pour eux, ne pût rien sur les Maisons, où ils demouroient, au lieu qu'il brusla toutes les nostres : Depuis, quand nous les eusmes reduits à n'en pouoir presque plus, nous vismes paroistre cét Homme admirable, qui portoit en main des Esclairs, des Foudres, & des Tonnerres, ausquels nous ne pûmes resister. Nous appercûmes en suite cette Princeesse resplandissante, avecque son Fils entre les bras : qui de l'esclat de ses Rayons, où s'entremesloit une celeste rosée, nous esblouit

tellement, que nous ne pûmes trouuer nostre chemin, ny retourner à nos Logemens. Outre tout cecy, nous auons veu depuis que des hommes si peu considerables en nombre, ont soustenu l'effort de nos gens, dont la multitude estoit incroyable, sans que la faim, le sommeil, ny la fatigue des Armes les ayent iamais pû vaincre; ny sans auoir iamais eu le moindre relasche; Au contraire, ils estoient si agissans, & tellement infatigables, que lors que nous les croyoîs, ou morts, ou rendus, ils se descouvroient aussi-tost plus robustes, & plus forts qu'ils n'auoient iamais esté. Toutes lesquelles choses bien considérées, nous font voir clairement qu'elles ne sont pas l'ouurage d'un Homme, mais du seul Pachacamac. Puis donc qu'il les fauorise pour nous abandonner, rendons nous à eux de nostre bon gré, sans attendre que de plus grands maux s'en viennent fondre sur nous. De moy, i'y suis desia tout résolu, & m'en vay de ce pas sur les Montagnes des Antis, afin que toute ma puissance ne m'ayant pû deffendre de ces hommes nouvellement arriuez, ie ne pûsse mettre à couuert de leurs violences, dans ces vastes solitudes. Quelques affreuses qu'elles soient, ie ne laisseray pas d'y vivre content, pourueu qu'ils ne vous traittent plus mal à mon occasion; Mon Exil me sera plus doux que la Liberté, quand ie sçauray que vous vous trouuerez bien du nouveau Gouvernement des Espagnols. C'est pourquoy, sans me mettre en peine de vous declarer ma derniere volonté par mon Testament, me reglant par l'intention de mon Pere; ie vous recommande sur toutes choses de leur obeïr, & de les seruir le mieux que vous pourrez, afin de leur donner sujet de vous bien traiter. Je vous souhaite une bonne Paix, & voudrois de tout mon cœur vous pouuoir emmener avec moy, pour ne vous point laisser en la puissance d'autrui.

L'Ynca finit ainsi sa Harangue, à la fin de laquelle ses gens s'abandonnerent si fort aux souspirs, aux crys, & aux larmes, qu'ils ne pûrent, ny luy respondre, ny s'opposer à sa volonté. Ainsi les gens de Guerre furent aussi-tost licentiez, avec leurs Caciques, ayant ordre exprés de s'en retourner en leurs Prouinces, & pareillement d'obeïr aux Espagnols, & de les seruir. L'Ynca tira de la Famille Royale tout ce qu'il pût auoir de Femmes, & d'Hommes, avec lesquels il se retira des Montagnes des Antis, en vn lieu vulgairement appellé *Villacapampa*, où il vescu dans la solitude en Prince banny, & desherité, iusqu'à ce qu'il fut miserablement tué par vn Espagnol, auquel il auoit luy mesme sauué la vie, comme nous le raconterons en son lieu.

TESMOIGNAGE D'VN AVTHEVR TOV-
chant les Rois Incas, & leurs subjects.

CHAPITRE XXX.

LE Pere Blas-Valera parlant de l'Adresse, de l'Esprit, & du Courage des Indiens du Peru, en rend le tesmoignage suivant, qui pour autoriser ce que nous auons dit en diuers endroits de nostre Histoire, & ce que nous dirons cy-apres, me semble fort à propos d'estre icy rapporté.

„ Les Peruuens surpassent en adresse, & en viuacité d'Esprit la
„ plus-part des autres Nations du Monde: Car sans aucune co-
„ gnoissance des Lettres, ils peuuent comprendre plusieurs Arts,
„ que les Egyptiens, les Grecs, ny les Chaldées, n'auroient ja-
„ mais pû sçauoir sans elles. D'où il se void clairement, que s'ils
„ auoient aussi bien l'vsage des Caracteres, comme ils ont celuy
„ des Nœuds, ils emporteroient l'aduantage des Sciences, tant
„ sur les Romains, & les Gaulois, que sur les autres Nations les
„ plus raffinées: que s'ils n'ont pas aujourd'huy la Politesse des
„ Peuples d'Europe; cela ne procede point d'un defaut d'Esprit,
„ mais de n'auoir pas esté instruits, comme eux, aux Lettres hu-
„ maines, au lieu desquelles on ne leur apprend ordinairement
„ que le Trafic, & le Commerce du Monde. Mais il se void par
„ espreuue, que ceux d'entre eux qui se veulent donner le loisir,
„ & la patience d'apprendre ce qu'on leur monstre, ou d'imiter
„ seulement ce qu'ils voyent; y réussissent si bien, qu'ils en sçauent
„ plus que beaucoup d'Espagnols, non seulement en la Meeani-
„ que, mais aussi en matiere d'Escript, de Lecture, de Musique,
„ & de Latin mesme, quand ils y sont instruits. L'Experience
„ nous monstre encore, que nous sommes beaucoup moins capa-
„ bles de conceuoir ce qui est de leurs Liures, qu'ils ne le sont
„ d'entendre les nostres; Car il y a tantost plus de soixante dix ans
„ que nous conuersons avec eux, sans que nous ayons jamais pû
„ comprendre entierement les Regles de leurs Nœuds, ny cel-
„ les de leur Arithmetique. Eux au contraire apprennent en peu
„ de temps nos Caracteres, & nos Chiffres, ce qui est vne marque

de grand Esprit. Je ne parle point de leur Memoire, puis qu'en cette partie là les Espagnols qui en ont le plus sont contraincts de leur ceder, soit qu'elle se puisse dire naturelle, ou acquise, soit qu'ils sçachent l'Art de s'en former vne Locale, ou par leurs Nœuds, ou par les ioinctures de leurs mains, ou par d'autres inuentions semblables. Que si quelque chose m'estonne, c'est de voir qu'ils se seruent de mesmes Nœuds pour diuers suiets: tellement que si vous leur dittes ce que vous voulez sçauoir de quelque Histoire; ils en trouuent aussi tost l'endroit, & le lisent aussi couramment, comme vn bon Lecteur pourroit lire dans quelque Liure: Ce que pas vn Espagnol n'a pû conceuoir iusques icy, ny mesme s'imaginer cōment cela se peut faire; D'où il paroist bien que ce ne peut estre qu'un effect du grand Esprit, & de la prodigieuse Memoire des Indiens.

Pour le regard de l'Art Militaire, il est indubitable que les Indiens du Peru y excellent, & qu'ils surpassent mesme les Peuples d'Europe, si vous le prenez par l'esgalité des Armes. Que cela ne soit, donnez moy, ie vous prie, le plus fameux Capitaine, tant François qu'Espagnol, sans cheuaux, sans lance, sans Armes à feu, & n'ayant pour tout equipage qu'une chetive Camisole, & vn simple Calçon, où pende vne fronde; ny pour tout habillement de teste, qu'une guirlande de fleurs, ou de plumes: Donnez-le moy, dis-je, parmy les ronces, & les buissons, où l'on marche pied nud, sans se nourrir d'autre chose que de racines sauvages, ny sans auoir pour Bouclier qu'un lambeau de natte en sa main gauche, & l'exposez de cette sorte au Champ de Bataille, au milieu des Haches d'Armes, des Tridants de Bronze, des caillous lancez à force de bras, ou de frondes, des Flesches empoisonnées, tirées par des Archers si adroits, qu'ils les deschoient droit au cœur, & dans les yeux? Croyez-vous que des gens ainsi equipez, pussent gagner la victoire; Comme donc la plupart de ces Indiens n'estoient pas mieux armez que cela, il leur estoit impossible (à parler humainement) de resister à des ennemis, qui auoient de si grands aduantages sur eux. Au contraire, s'ils eussent eu les Armes des Peuples d'Europe, leur Artillerie, leurs Machines, & leurs forces sur Mer, & sur Terre; il est indubitable qu'on auroit eu plus de peine à les vaincre, que le grand Turc. Pour preuue dequoy ie n'ay qu'à monstrier que toutes les fois que les Indiens ont combattu avec armes esgales, ils

„ ont fait quitter le Champ de Bataille aux Espagnols, comme il
 „ aduint à *Pañ* en Mexique, où ils furent presque tous taillez
 „ en pieces. Je diray bien dauantage; c'est qu'avec leur nudité
 „ toute simple, & sans autres Armes, qu'un Arc & des Flesches,
 „ ils ont gagné sur eux plusieurs Batailles rangées, comme celle de
 „ *Quitu*, de *Chachapuya*, de *Chuquisaca*, de *Tucma*, de *Cunti*, de
 „ *Sausa*, de *Parcos*, de *Chili*, & ainsi des autres. L'on ne scauroit
 „ donc mettre en parallele en matiere de valeur, les Indiens de
 „ Mexique, & du Peru, avecque les Espagnols, à moins que de
 „ faire poser les Armes à ces derniers, ou d'en partager l'aduan-
 „ tage, puis que ce sont elles & l'Artillerie qui font tout à la Guer-
 „ re, & qui agissent par dessus les forces humaines. Ainsi les Victoi-
 „ res gagnées dans le nouveau Monde, & particulièrement au Pe-
 „ ru, se doiuent plus proprement attribuer à la Prouidence diuine,
 „ qui a cōbatu en faueur de son S. Euangile, qu'à la valeur, ny à la
 „ force des Espagnols. Que si l'égalité des Armes se peut trouuer
 „ quelque part; c'est assurément parmy les Peuples d'Europe, &
 „ d'Asie, avec lesquels i'aduouë que les Espagnols peuuent entrer
 „ en cōparaison. Mais si l'on en demeure dans l'esgalité des Armes
 „ entre Indiens, il n'y a point de doute que ceux du Peru emportēt
 „ la Palme sur les autres; ee qu'ils ont assez bien donné à connoi-
 „ stre, puis qu'ils ont pū en si peu de temps conquerir vne si vaste
 „ estenduë de terre, comme est celle que nous possedons mainte-
 „ nant. Où vous remarquerez, que ce n'est pas d'aujourd'huy
 „ qu'ils en sont les Maistres, comme quelques-vns s'imaginent;
 „ mais depuis 600. ans, & dauantage: Tellement qu'une si riche
 „ Conqueste est vn veritable tesmoignage de la valeur de leurs
 „ Rois; & entr'autres de celle de *Manco Capac*, d'*Tuca Roca de Vî-
 „ racocha*, d'*Tuca Pachacutec*, & de leurs Descendans, iusques au
 „ grand *Huayna Capac*, qui se fit Empereur, sans y comprendre
 „ plusieurs autres Capitaines du mesme Sang, dont nous trait-
 „ tons amplement en diuers endroits de nostre Histoire. Tout ce
 „ tesmoignage est tiré du Pere Blas-Valera: Reprenons mainte-
 „ nant le fil de nostre Discours.

DIVERS CONTRASTES ENTRE LES
*Almagres, & les Piçarres, suivis de l'Emprison-
 nement d'Hernand Piçarre.*

CHAPITRE XXXI.

DOM Diego d'Almagre, & Hernand Piçarre, voyant que l'Ynca s'estoit exilé luy-mesme, apres avoir licentié ses gens de Guerre, & renoncé volontairement à l'Empire, firent esclatter leurs animositez particulieres, & s'attaquerent à force ouuerte, l'un pour regner, & l'autre pour l'empescher, estant difficile que celuy qui aspire à la Souueraineté puisse jamais endurer de Compagnon, ny de plus grand que soy. Almagre sollicitoit Piçarre de luy ceder la Ville de Cozco, puis qu'il scauoit bien qu'elle estoit de son Gouuernement. Il alleguoit pour raison, que les deux cens lieuës de la Iurisdiction du Marquis deuoient estre mesurées depuis le cercle Equinoctial, iusques au Sud, ià le prendre le long de la Coste, & par la iuste dimention des Pointes, des Caps, des Golphes, & des langues de terre; que s'il estoit question de les mesurer par la terre mesme, il faloit que ce fut par le grand chemin, qui meine de Quitu iusques à Cozco. C'estoient les dimentions que les gens d'Almagre vouloient que l'on prit, alleguant que si on les prenoit par la Coste, les 200. lieuës s'estendroient à peine iusques à Tumpiz; Et qu'ainsi, quoy que l'intention de la Majesté fut qu'on y en adjoustast cent autres, il se trouueroit que le Gouuernement d'Almagre n'iroit pas si auant que la Ville des Rois. Le conte s'y trouuoit encore moins par terre, pource que de Quitu à Cozco on tient qu'il y a bien 500. lieuës: de sorte que de quelque façon qu'on le prit, la Iurisdiction du Marquis ne s'estendoit point iusques à la Ville des Rois; & par consequent elle s'auançoit encore moins iusques à Cozco, ce qui obligeoit Almagre de s'opiniâster à soustenir que le Domaine de cette Ville Imperiale luy appartenoir.

Almagre, & ses Partisans fondoient leurs raisons sur ces imaginations, afin que ce leur fut vn sujet d'abandonner mal à pro-

pos le Royaume de Chily, pour s'en retourner à Cozco, & au Peru, sans preuoir, comme ils deuoient, les grandes desolations que leur retour y apporteroit. Mais Hernand Pigarreleur dit pour responce, Qu'il n'estoit pas dans cette Ville-là de son Authorité propre, mais de celle du Gouverneur son General: Qu'il auoit presté serment de ne la rendre qu'à luy: Que de la liurer sans son ordre, & sans auoir desgagé sa parole; ce seroit faillir contre le deuoir de Cavalier, & violer les loix Militaires: Qu'ils n'auoient qu'à escrire au Marquis, & qu'aussi tost qu'ils auroient de luy vn contre-seing, & vn nouueau mandement, il seroit prest à rendre la Place. A cette responce il adiouta, Qu'on ne deuoit nullement mettre en doute que la Ville de Cozcone fut comprise dans le Gouvernement de son Frere: qu'on ne manquoit pas de raisons pour respondre à celles de Dom Diego d'Almagre: Que c'estoit folie de prendre des dimentions le long de la Coste par les Poinctes, & les Golfes, ou les Angles, puis qu'un Golfe que la Mer faisoit sur la terre, ou vne pointe que faisoit la terre en s'aduancant dans la Mer, occupoit la moitié de la distance iusques aux bornes, comme l'experience le monstroient en la mesme Coste, par les langues de terre, & les Caps qui s'aduangoient depuis l'Isle des palmes, iusques à celle de saint François: Qu'au surplus, il y auoit encore moins d'apparence de mesurer le Pais par les lieuës du grand chemin, pource qu'outre les tours, & les destours qui s'y rencontroient, tant du costé du Leuant que du Couchant, il y auoit encore plusieurs Valons, ou Fondrieres, & diuers Costaux de deux ou trois lieuës de montée, ou de descente; Et qu'à le prendre par l'Air, il n'y auoit pas demy lieuë d'une Montagne à l'autre. De toutes lesquelles choses il concludoit, Qu'il falloit en cela suiure l'exemple des Pilottes, c'est à dire mesurer la terre par les degrez du Ciel, comme ils font la Mer: Ce que les Pigarres ne demandoient pas, sans vne grande raison, pource que depuis l'Equinoctial, iusques à la Ville des Rois (si l'on faisoit chaque degré de 17. lieuës & demy, comme font les Mariniers, en allant Nord-Sud, ou au rebours) il y auoit de distance iusques à la Ville des Rois 92. lieuës & demy; Et iusques à Cozco, qui est à 14. degrez, il s'y en trouuoit 245. A raison de quoy ils pretendoient que ces deux Villes estoient scituées dans le Gouvernement du Marquis Dom François Pigarre, y comprenant celles que sa Maieslé y

auoit adjoustées, bien qu'elles ne fussent pas spécifiées. A quoy les gens du Marquis repliquoient, Que quand mesme ils les deueroient mesurer par l'Air; ce ne deuoit pas estre Nord-Sud, mais du Leuant au Couchant, à 80. lieuës par degré: Et qu'en tout cas, si cette mesure sembloit trop grande, on pouuoit partager ensemble les lieuës, de la façon que les Mariniers les marquoient, & en donner 49. à chaque degré, faisant suppléer ainsi vne mesure au defaut de l'autre; d'où il aduiendroit que le Gouvernement du Marquis ne s'estendrait pas plus loing que les six degrez de l'Equinoctial, faisant chaque degré de 49. lieuës; Et qu'ainsi, quelque mesure de ces trois que choisissent les Piçartes, ils ne trouueroient dans leur Gouvernement, ny la Ville des Rois, ny celle de Cozco.

Ils employèrent plusieurs iours à s'obstiner en ces demandes, & en ces responses, iusques-là mesme, qu'à force de contester, ils en fussent venus aux mains plusieurs fois, sans Dom Diego d'Aluaro, Cavalier des plus aduisez de son temps, Oncle de l'Adalento Dom Pedro d'Aluaro; car comme il auoit fait le Voyage de Chily, avec Dom Diego d'Almagre, il estoit bien aisé de le seruir en cette occasion: & d'ailleurs, preuoyant bien que de la desunion de ces deux Gouverneurs ne pouuoient s'ensuiure que de tres grands maux, il desiroit ardemment de les empêcher de rompre ensemble. A quoy s'estant employé souuent, il obtint enfin, que Hernand Piçarte aduertiroit le Marquis son Frere des pretentions de Dom Diego d'Almagre, & qu'en attendant response de luy, chacun demeureroit paisible dans son quartier: De cette façon, il y eut trêue de part & d'autre, & quelques iours se passerent sans la rompre. Mais enfin, la Discorde, qui ne pouuoit souffrir vne Paix entre ces deux Cavaliers, qui iusques alors auoient vescu comme Freres, mit en campagne les plus seditieux de ses Ministres, qu'elle sollicita de dire à Dom Diego d'Almagre, qu'il auoit mal fait de mettre en compromis, & en arbitrage, vne chose que l'Empereur luy auoit gratuitement donnée: Qu'il pouuoit bien croire qu'Hernand Piçarte n'escriroit iamais à son Frere, ce de quoy l'on seroit demeuré d'accord, pour ne se voir despossédé du Gouvernement de cette Ville là: Et que quand mesme il l'escriroit, son Frere n'auroit garde d'y faire response, pour n'allier de sa Iurisdiction vne Ville Imperiale, comme estoit celle de Cozco: Et par-

tant, que si suivant le Traitté qu'ils auoient fait de viure en paix, iusques à la response du Marquis, ils ne se remuoient point, pour mettre vne fin à cette affaire-là, ils pouroient bien l'attendre toute leur vie; Que puis qu'on n'ignoroit point que cette Ville estoit de son Gouvernement, il en deuoit prendre possession au plustost, sans s'amuser aux belles paroles de ses Concurrans; ny sans leur ceder vn Ioyau si precieux, & si riche; Qu'en vn mot, il aduifast bien à ce qu'il luy falloit faire, & qu'il pensast à l'executer, sans y appottet vn plus long delay.

Il ne falut pas beaucoup preschet Almagre pour luy eschauffer le sang; la moindre de ces raisons fut capable de luy embraser le courage, comme il ne faut que la moindre bluette, pour mettre le feu à la poudre, ou à telle matiere qui en est susceptible. Il accepta donc avec applaudissement les mauuais Aduis que des pernicious Compagnons luy donnerent, & ne pensa plus qu'à les executer, sans prendre le conseil de ses vrais Amis. Pourcét effet, à la faueur d'une nuit grandement obscure, il prit avec luy quelque nombre de gens bien atmez, avec lesquels il s'en alla tout droit au logis d'Hernand, & de Gonçalo Pigarres; La confiance qu'ils auoient mise aux trêues accordées, les faisoit si peu tenir sur leuts gardes, qu'encore qu'un peu auparavant quelqu'un des gens d'Almagre les eut aduertis que Dom Diego se deuoit bien-tost saisir d'eux, ils ne daignerent s'en esmouoir: Hernand Pigarre luy ayant fait response, qu'il n'estoit pas homme à croire qu'un Cavalier tel qu'Almagre, eut voulu pout rien rompre les trêues qu'ils auoient faites ensemble. Mais à l'instant mesme, le bruit qu'il ouit, luy fit esprouuer tout le contraire; & alors celuy qui les aduertissoit, se doutant bien de l'affaire; *Puis qu'il est ainsi*, leur dit-il, *que vous ne me voulez pas croire, n'en doutez plus desormais, car les voycy venir à vous.*

Les Pigarres, avecque leurs Hostes, & leuts Domestiques, s'armerent à l'heure mesme, & descendirent au bas de leur Logemens, qu'on auoit refaits depuis le parterment de l'Ynca, & plusieurs autres maisons aussi, où les Espagnols demeuroient. Ils firent de grands efforts, pour en deffendre les Portes; & alors, comme les Almagres virent qu'ils ne pouuoient entrer dans la maison, ils y mirent le feu de tous costez; ce qui fut cause que ceux qui se trouuerent dedans se rendirent aussi tost, pour n'e-

stre bruslez tous en vie. Hernand, & Gongalo Piçarres, furent les premiers dont on se faisit, & en suite de plusieurs de leurs Parens, & Amis, tous Compatriotes, & natifs d'Estremadure. Ils furent menez à *Cassava*, dans vne estroite Prison, & mesme on les mit aux fers, afin de mieux s'asseurer de leur personne. Cependant, les Ministres de la discorde, conseilloyent à Dom Diego d'Almagre de tuer Hernand Piçarre, & luy dirent pour mieux l'irriter, que dès son premier Voyage d'Espagne, il s'estoit tousiours montré son Ennemy, & n'auoit iamais bien parlé de luy: Qu'avecque cela, c'estoit vn Homme cruel, inexorable, & bien d'autre humeur que ses Freres: Qu'il ne laissoit iamais eschapper l'occasion de se vanger quand il le pouuoit: & qu'il valoit mieux se deffaire de cét homme-là, que d'en estre plus long temps embarrassé. En effet, Almagre en fut venu à l'exécution, si Diego, & Gomez d'Aluaro, Jean de Sahaedra, Barthelemy de Terrazas, Vasco de Gueuare, Hierosme de Costilla, & plusieurs autres personnes de condition, qui aymoient la Paix, ne l'eussent empesché de passer outre, en luy remontrant, Qu'il n'y auoit aucune apparence, qu'ayant esté iusqu'alors si bon Amy du Marquis, & son Compagnon en ses bonnes, & mauuaises Fortunes, il se deust porter à de si grandes extremitez contre luy; Que la possession qu'il auoit prise de son Gouuernement se pourroit possible souffrir, bien qu'il ne laisast pas d'estre blasmable d'auoir rompu les tréues faites ensemble; Mais que de tuer Hernand Piçarre, c'estoit chose qu'il ne pouuoit entreprendre, à moins que de se rendre à iamais infame, & odieux à toute la Terre; Qu'il se mit donc hors de l'Ame cette cruelle pensée, suiuant les mouuemens de la Raison, & de la Sageste, plustost que ceux de la Colere, & de la Vengeance, qui acheueroient de le ietter dans le precipice. Par ces raisons, & autres semblables, ces Cavaliers calmerent l'esprit de Dom Diego d'Almagre, qui sans tarder dauantage, se fit declarer par toutes les Communautéz de Cozeo, Gouverneur de cette Ville-là, & de cent lieues de pais à la ronde, suiuant les Patentés qu'il en auoit eues de sa Majesté. Mais en attendant que nous reuenions à luy, nous passerons à d'autres choses qui arriuerent en mesme temps.

DES GRANDES TRAVERSES ADVE-
nuës à *Garcillasso de la Vega.*

CHAPITRE XXVI.

Nous auons dit cy-deuant, que le Marquis Dom François Piçatte se voyant exposé à de grands dangers, par le souleuement general des Peuples du Peru, & trauaillé d'aill'eurs d'une extrême apprehension, qu'en la Ville de Cozco, & au Royaume de Chily, l'on n'eut coupé la gorge à ses Freres, enuoya demander du secours à Mexique, à Nçaragua, à Panama, à Saint Dominique, & aux autres Isles de Barlouento; Et que par mesme moyen il escriuit à ses Capitaines Alonse d'Aluarado, Sebastien de Belalcaçar, Garcillasso de la Vega, & Iean Porcel, *Que* quittant là leurs Conquestes, ils s'en vinssent à luy promptement, à cause du grand besoin qu'il auoit d'eux, pour resister à la puissance des Indiens.

Alonse d'Aluarado vint le premier, pour estre le plus proche de tous; mais non pas si tost qu'il ne trouuast que les Indiens auoient desia mis le siege deuant la Ville des Rois, qu'ils leuerent à son arriuée. Les Capitaines Sebastien de Belalcaçar, Bracamoros, & Iean Porcel ne pûrent venir, pour n'auoir receu le mandement du Gouverneur, à cause que les Indiens qui l'apportoient, furent mis à mort. Garcillasso de la Vega vint vn peu apres Alonse d'Aluarado, de la Baye, qu'ils nomment *de S. Matthieu*, & de la *bonne Aduenture*. Nous auons desia dit qu'il souffroit beaucoup en cette Plage là, pource qu'elle est inhabitable, & que ses gens s'y virent exposez à toute sorte de maux, & pour les Montagnes presque inaccessibles, & pour la vaste estendue des Forests, qui semblent estre autant de Remparts, qu'on ne peut rompre que mal-aisément, pour la merueilleuse grosseur des Arbres, dont il y en a tel, qu'à peine dix hommes pourroient embrasser, & où la Coignée ne scauroit mordre, tant la matiere en est dure; Outre qu'il y a si grande quantité de buissons, de brossailles, & d'autres arbrisseaux ferrez près à près: qu'au point où la Montagne en est remparée, comme d'vne

closture bien forte, il n'y a ny gens, ny bestes, qui puissent y aller bien auant, & il semble mesme que le feu n'y ait point d'Empire, pource qu'il y pleut sans relasche.

Quand nos Aduenturiers entreprirent cete Conqueste, ils creurent d'abord qu'en aduancant dans le païs, ils le trouueroient peuplé d'Indiens, ce qui fut cause qu'ils y entrerent le mieux qu'ils pûrent, s'ouurant vn chemin à trauers les Arbres, à force de bras, & d'industrie, & suiuant comme pour Guides les diuers ruisseaux qu'ils rencontroient, ainsi que l'observent ordinairement ceux qui voyagent par ces Montragnes. Ils s'obstinèrent à marcher plusieurs iours, malgré ces obstacles, & ces trauerses, bien que les Indiens de seruite, qu'ils auoient amenez du Peru, les aduerrirent à toute heure des'en rerourner; sinon, qu'ils estoient perdus: Qu'il y auoit vn fort grand chemin à faire, auant que pouuoir trouuer vn seul homme en ce païs-là, & que les Rois Yncas n'auoient daigné le peupler, sçachant qu'il estoit inhabitable; Mais quelques raisons qu'ils alleguassent, iamais ils ne purent persuader les Espagnols, qui s'imaginoient qu'ils le dissent exprés, afin de s'en rerourner chez eux. Ils marcherent ainsi plus de cent lieuës, durant lesquelles ils se virent si persecutez de la faim, qu'ils furent cōtraints de se nourrir d'herbes, de racines, de Crapaux, de Couleures, & d'autres Reptiles, qui leur sembloient aussi bons, à ce qu'ils disoient, que des Leurauds, des Lapins, & de la Venaïson la plus exquise, Et quoy qu'il fut difficile que les Couleures ne fussent venimeuses, si est ce qu'ils ne laissoient pas d'en manger, principalement des grandes, pource qu'elles leur sembloient moins mauuaises que les petites.

Durant vn si long, & si penible voyage, les incommoditez duquel s'augmentoient de iour en iour par celle de la faim; les Officiers de l'Armée, & des Finances du Roy, dirent franchement à leur Capitaine, Que puis qu'ils n'auoient que trop cogné par esprouue que les trauaux de cete descouuerte estoient insupportables, & que depuis cinq mois tous enriers qu'ils rodoient sur ces Montragnes, ils n'auoient veu, ny aucuns Indiens à conquerir, ny aucune terre à culriuer, & peupler, mais seulement des Rochers, des Lacs, des Riuieres, des Torrens, & vne pluye continuelle; Il estoit bien temps qu'il songeât à sa conseruation, & à celle de ses gens; Que de la façon qu'il y al-

loit, il sembloit qu'il eut pris à tasche de les faire mourir de faim, & de misere; Que c'estoit vne chose bien estrange, qu'en tuant les autres, il voulut encote se tuer soy-mesme; & que pour empescher que cela n'aduint, le meilleur estoit de s'en retourner, sans se hazarder dauantage à des perils si grands, & si manifestes.

La Responce de Garcillasso fut, Qu'il auoit desia pensé dès long temps à ce qu'ils luy remonstroient, touchant les difficultez de cette Conqueste-là; Que deux mois apres s'estre engagé dans ces Montagnes, il s'estoit veu tenté d'en sortir; Mais que de pressantes considerations, & de son honneur, & du leur, l'auoient tousiours retenu: Que cette meisme raison l'obligeoit encore à passer outre, & à ne point relascher de son entreprise, de peur que ses Enuieux ne luy reprochassent, que les delices du Peru l'auoient rappellé; Qu'il les prioit, & les coniueroit ensemble, de ne se point rebutter de la fatigue, puis que tant plus elle seroit grande, tant plus il leur en reuindroit d'honneur, & de gloire; Que la bonne reputation estant la recompense de la Victoite, ils deuoient s'estudier à l'acquerir, & ne point desmordre de leurs genereux desseins, mais empescher que les Meschans ne prissent leur trop prompt retour par vn sujet de médisance, & de calomnie; Qu'ils ne deuoient point douter au reste, que le mal du moindre d'entre eux, ne luy fut aussi sensible que le sien propre; Et que puis qu'il ne fuyoit point la fatigue, qu'ils luy fissent la faueur de le suiure, comme leur Capitaine, obeïssant en vray Espagnols aux loix de la Milice, & aux veritables maximes, à quoy le deuoir, & le tiltre de Nobles les obligeoient.

Ces braues Soldats se rendirent à ses paroles, & passerent outre en leur Conqueste, qu'ils continuerent environ trois mois: Mais comme les incommoditez, & les trauaux en deuiurent tout à fait insupportables; aussi reduisirent-ils ceux qui les souffroient à n'en pouuoir plus; Car plusieurs d'entre eux, tant Indiens qu'Espagnols, en moururent, & n'eurent point de plus grand fieu que la faim. Voyant donc que le nombre des Malades, & des Morts s'augmentoit de iour en iour, & qu'ils ne pouuoient passer plus outre, ils resolurent tous d'un commun accord de s'en retourner, non par le chemin qu'ils auoient pris, mais tournant du Leuant au Midy; ce qui fut la route qu'ils aduiferent de prendre, pour voir s'ils ne rencontreroient point quelques Indiens. Le malheur voulut pour eux qu'il leur falut

traverser

traverfer encore d'autres Montagnes, auffi mauuaises que celles qu'ils venoient de passer, & encore pires, si elles le pouuoient estre. Cependant à mesure que la famine croissoit, le nombre des Morts augmentoit de mesme, si bien qu'ils furent contraincts de tuer les moindres de leurs cheuaux, pour en assister les Fameliques, & les Malades, la plus part desquels attenez de foiblesse demcuroient au milieu des chemins, & sans se pouuoir assister les vns les autres. Il y eut mesme tel iour qu'il s'en trouua vnze d'abandonnez : Quand la faim, & la foiblesse les accabloient, leur machoire d'embas s'abattoit de telle sorte, qu'ils ne pouuoient nullement fermer la bouche ; Et ainsi quand ils voyoient que leurs Compagnons leur disoient en les quittant là, *Dieu demeure avecque vous*, ces pauures affligez leur respondoient ; *Allez avec Dieu*, ne faisant que remuer vn peu la langue, sans prononcer qu'à demy la parole ; ce que i'ay plusieurs fois oüy dire, (outre le commun bruit qui en courtoit) à vn Soldat appellé Torralua, qui ne racontoit iamais ces choses, qu'il ne pleurât de ce qu'on auoit abandonné ses Compagnons en vie, ce qui luy faschoit plus que si c'eut esté apres leur mort. De cette façon moururent de faim, & de misere plus de quatre vingts Espagnols, sans y comprendre les Indiens, qui furent en beaucoup plus grand nombre.

L'adjouste à cecy, qu'il n'est pas à croire combien ils eurent de peine à passer les Riuieres, par eux appellées *Quiximú* ; Ce qui procedoit sur tout, de ce que le bois qu'ils coupoient, pour en faire des radeaux, ne leur seruoit presque de rien, pour estre verd, & trop pesant, ce qui le faisoit couler à fonds : D'ailleurs, outre que ces Riuieres-là, naturellement rapides, n'estoient nullement gueables ; elles auoient encore vne incommodité bien dangereuse, pour estre remplies de certains Lezards nommez *Caymanes* de 25. à 30. pieds de long ; & d'autant plus à craindre, qu'ils estoient fort carnaciers. Ils faisoient leurs radeaux de longues perches entrelacées de ramée, & de grosses branches jointes ensemble, gagnant ainsi l'autre bord, avec toutes les peines imaginables. Je rapporteray à ce propos vne chose bien remarquable, qui est qu'ayant vn iour à passer vne de ces Riuieres, ils y trouuerent fortuitement deux grands Arbres qui se regardoient de front, & se touchoient mesme par le haut de leurs branches : ce qui les fit aduiser de couper vne partie du pied de

celuy qu'ils auoient de leur costé, afin que soustenu sur son tronc, il vint à tomber sur l'autre; & qu'ainsi de tous les deux il se fit vne maniere de pont: Aussi arriva-t'il, en effet, comme ils se l'estoient imaginé, si bien que les Espagnols, & les Indiens, passerent tous à la file sur l'arbre, trois à trois, & quatre à quatre, se tenant fermes aux branches le mieux qu'ils peurent. Ceux qui resterent pour le dernier Voyage, furent trois Indiens, & trois Espagnols, avec le Capitaine qui les voulut suivre. Il fit marcher tous les premiers les Indiens, qui portoient ses Armes, & celles de ses deux autres Compagnons, ensemble deux selles à picquer; & ils se mirent ainsi à passer l'eau. Mais comme ils furent au bout de l'arbre coupé, qui alloit ioindre l'autre, il esclata par en bas, comme s'il eut voulu se desgager de son tronc; ce qui fit que les deux Espagnols, & les trois Indiens, pensant d'en estre plus asseurez, se tinrent le plus fortement qu'ils peurent aux branches, qui leur seruoient d'appuy; Alors le Capitaine, prenant garde qu'il y auoit du danger, voulut sauter à eux, pour les empescher de cheoir dans l'eau; Mais la pesanteur des branches, qui l'emporta, le fit tomber luy-mesme, & les autres à mesme temps, que le courant de la Riuere entraigna, sans qu'on les vid plus depuis: Cependant, deux ou trois camarades du Capitaine, qui estoient à l'autre bord, voyant qu'il s'alloit noyer, luy tendirent des lances, à l'une desquelles il se prit: de maniere que celuy qui la tenoit, & les deux autres qui accoururent pour l'assister, firent si bien qu'ils le tirerent à terre, rendant tous ensemble graces à Dieu, de l'auoir desliuré de la Mort, dont il estoit menacé.

Or pource qu'en tous les lieux où ils trouuoient quelques fruits sauuages, & quelques racines vn peu meilleures que les ordinaires, ils auoient accoustumé de s'arrester deux ou trois iours, pour en cueillir, & en faire prouision; Apres auoir todé plus d'un an sur ces hautes Montagnes; il aduint enfin, qu'il prit enuie au Capitaine de monter sur vne eminence, pour voir s'il ne pourroit point descouurir quelque aduenuë, pour se tirer de ces precipices: Mais quoy qu'il eut atteint le sommet du Mont; si est-ce que ne se croyant pas encore assez haur, il s'aduisa de grimper sur vn arbre, qui paroissoit vne tour, d'où il ne descouurit encore qu'une vaste estenduë de Montagnes, où il ne sembloit pas qu'il y eut aucune sortie. Il portoit ainsi la veuë de tou-

tes parts, quand il vid passer fortuitement vne grande vollée de Perroquets, qui faisoient vn bruit estrange, & suiuioint tousiours vne mesme route, entre le Leuant, & le Midy, que les Martiniers appellent *Suest*; Mais enfin, comme ils eurent bien vollé, ils allerent fonder à terre loing de là; de sorte que le Capitaine ayant remarqué l'endroit, iugea qu'il y auoit à peu près iusques là six ou sept lieues, & que comme les Perroquets aymoient le *Mahis*, il se pouuoit faire qu'il y en auoit où ils s'estoient arrestez. Sur ces imaginations, & ces foibles esperances, ayant remarqué l'endroit le mieux qu'il pût, il s'en alla retrouver ses gens, auxquels il dit, Qu'ils prissent courage, & que par les coniectures qu'il auoit eues, il esperoit qu'ils arriueroyent bien tost dans vn Pais habité. Ces bonnes nouuelles les réjoüirent: si bien que le iour d'apres ils sortirent de celieu-là, d'où à coups de haches, & de longues perches, ils s'ouurirent la meilleure partie d'un chemin de huit lieues, qu'ils auoient à faire; à quoy ils employèrent trente iours entiers, à la fin desquels ils arriuerent dans vn petit Bourg, d'environ cent feux, peuplé d'Indiens, & dont le terroir grandement fertile, donnoit du Mahis, & des Legumes, en beaucoup plus grande quantité qu'il n'en falloit pour si peu de gens. A leur arriuée ils rendirent grâces à Dieu, de les auoir tirez d'un lieu de desesperoir, pour leur donner desormais quelque sorte d'esperance. Durant tout cecy, les Indiens voyant des hommes qui leur estoient nouveaux, avecque de longues barbes, tous nuds, ou du moins si deschirez, que leurs habits tomboiēt par lambeaux, pourris par les pluyes, le mieux équipé d'entre eux n'ayant en lieu de calsons que des feüilles, & des escorces d'Arbre; se trouuerent bien estonnez à l'abord de ces objets de misere; & le furent encore bien plus, quand ils virent des cheuaux, car les Espagnols ne les auoient pas tous mangez encore. Ils s'appellerent les vns les autres, pour se retirer à la Montagne; mais quoy qu'ils fussent tous en alarme, ils demurerent paisibles, quand on leur eut fait entendre par signes, qu'ils n'eussent aucune peur. Alors ils s'en allerent chercher leur Cacique, qui estoit à la campagne; d'où estant venu il les receut fort courtoisement, & avec vne extreme compassion de les voir tous nuds, pleins d'escorcheures par tout le corps, & si foibles au reste, si passes, & si deschatnez, qu'on les eut pris pour la vraye Image de la Mort;

Il les regala, comme s'ils eussent esté ses Freres, leur donna des Mantes de cotton, pour s'en couvrir, & tesmoigna tant de bonne volonté pour eux, sur tout pour le Capitaine, qu'il le prioit à tout coup de ne point sortir de son pais, ou de l'emmener avec luy. Ils demurerent là 30. iours, & y eussent demeuré dauantage, pour le grand besoin qu'ils en auoient, n'eut esté de crainte d'affamer ces pauvres Indiehs, & de leur manger toutes leurs provisions, qu'ils leur donnoient avec vne incroyable franchise. S'estans donc vn peu refaits de tant de trauaux passez, ils s'en allerent de ce Bourg-là, du nom duquel ils ne daignerent s'enquerir, pource qu'ils ne cherchoient qu'à gagner pais. Le Cacique sortit avec eux, pour leur seruir de guide, & mena de plus pour les accompagner, 30. Indiens, chargez de tout ce qu'ils pûrent auoir de viures, qui leur firent grand besoin, pour passer vn Desert assez vaste: A quoy leur seruit encore beaucoup la compagnie des Indiens, & pareillement à leur aider à faire des radeaux, pour traicter vne des plus grandes Riuieres qu'ils eussent à trauffer, ce qu'ils n'entendoient pas si bien que leurs guides; par la bonne conduite desquels ils arriuerent à la premiere Vallée du Destroit de *Puerto-Viejo*. Ce fut là que le Cacique, & ces Indiens leur dirent à Dieu, les larmes aux yeux, & avec vn desplaisir extrême de quitter leur compagnie, principalement celle du Capitaine, pour qui ils auoient vne affection particuliere, à cause de son accortise, & de son humeur affable. Les Espagnols entrerent à *Puerto-Viejo*, au nombre d'environ 160. quelques quatre vingts estant morts de faim, des 250. qui auoient mis le pied dans ce pais-là, pour en faire la Conqueste. Ils apprirent à *Puerto-Viejo* le sousteuement de l'Ynca, & ne sceurent rien pourtant de ce qui s'estoit passé. Cette nouvelle leur fit doubler le pas droit à la Ville des Rois, & se haster encore plus fort, par la rencontre qu'ils firent en chemin de ceux que le Marquis enuoyoit, pour leur dire qu'ils vinssent bien-tost à son secours; tellement que par la diligence qu'ils firent, ils arriuerent à Rimac, quelques iours apres le Capitaine Alonso d'Aluaredo; & y furent fort bien receus du Marquis, pour le grand besoin qu'il auoit d'eux, dans les extremitez où il se trouuoit.

ALONSE D'ALVARADO EST ENVOYE
au secours de Cozco. Succes de son Voyage.

CHAPITRE XXXIII.

SI-TOST qu'Alonse d'Aluarado, & Garcillasso de la Vega, furent de retour de leur Voyage, le Marquis les ayant prés de luy, mit ordre d'enuoyer du secours à ses Freres, ne sçachant rien de tout ce qui estoit aduë dans Cozco, non plus que de la retraite du Prince Manco Ynca, ny du retour de Dom Diego d'Almagre du Royaume de Chily, ny de l'emprisonnement de ses Freres, aduenü depuis peu de temps. Il fit tenir prests 300. Hommes de Guerre, des meilleurs que ses Capitaines eussent amenez, & qu'il eut avecque luy. Cette troupe estoit composée de six vingts Caualliers, & de 180. Fantassins, desquels il fit General Alonse d'Aluarado, à la place de Pedro de Lerma, natif de Burgos, qui durant tout le temps du souleuement de l'Ynca, auoit tousiours exercé cette Charge, comme bon Soldat, & tres-vaillant Capitaine; ce qu'il auoit donné à connoistre en toute sorte d'occasions, principalement en ce Combat d'Indiens, & d'Espagnols, dont nous auons parlé cy-deuant, où il eut les dents cassées d'un coup de caillou, qui luy fut tiré dans une fronde. De plus, ne se contentant pas de luy auoir osté sa Charge, pour la donner à un autre, il voulut qu'il suiuit Alonse d'Aluarado, quoy qu'il l'eut nommé Capitaine de Cavalerie; ce qui sembla bien estrange à plusieurs, qui ne sçachant s'ils deuoient imputer ce procédé à inaduertance ou à mauuais conseil, disoient franchement, qu'apres luy auoir osté sa Charge, il l'eut beaucoup moins offensé en le tenant prés de luy, qu'en le donnant pour Soldat à son Concurrent: Comme en effet, il ne fut pas si sensible à Pedro de Lerma, de ne commander plus, que d'estre sous le commandement d'un homme, dont il estoit Compatriote, & Gentilhomme comme luy. Et à vray dire, c'est un Vice naturellement attaché à l'arrogance des hommes, de souffrir plus volontiers pour Chef un Estranger, bien que de moindre condition, qu'ils ne souffriroient un homme de leur país,

quand mesme ils seroient esgaulx; Dequoy s'ensuit ordinairement vn grand desordre, comme il aduint en cette occasion, où le mespris que fit le Marquis de Pedro de Lerma, fut cause de la perte de cette lournée, comme il se verra cy. apres.

Garcillasso de la Vega, voyant que le iour du partement approchoit, pria le Marquis de luy permettre d'aller au secours de ses Freres, avecque ses Capitaines. Mais la responce qu'il eut de luy, fut, *qu'il se donnast patience, & qu'en peu de temps il enuoyeroit d'autres gens, dont il le feroit Capitaine.* Garcillasso repartit, *qu'il l'obligeroit de ne le pas remettre, pource qu'il ne desiroit point d'estre des seconds, en vne occasion où il s'agissoit de secourir ses Freres, en vne neecessité pressante: Que la Patrie, & l'Amitié qu'ils auoient ensemble ne souffroient point de delay, & qu'il se trouueroit assez d'Officiers pour commander ceux qu'il luy plairoit d'enuoyer.* Ces raisons firent trouuer bon au Marquis, que Garcillasso fut de la partie, avec Alonso d'Aluarado; & ainsi tous deux se tinrent prests pour ce Voyage, qu'ils se resolurent de faire par la Coste, iusques à Nanascar, pour esuiter les mauuais passages, qui se rencontroient dans le chemin ordinaire. Mais comme ils furent à quatre lieues de la Ville des Rois, dans l'agreable Vallée de Pachacamac, ils eurent vne sanglante Bataille contre les Indiens, qui ne laissoient pas d'estre tousiours souleuez, bien que leur Prince se fut retiré dans les Montagnes. La Victoire n'aguere emportée sur les gens de secours enuoyez à Cozco, leur donna la hardiesse d'attaquer Alonso d'Aluarado; ce qu'ils firent avec beaucoup de courage, & vn assez long. temps. Plusieurs des leurs neantmoins y laisserent la vie, pource qu'aux lieux où il n'y auoit aucunes Montagnes qui les deffendissent des Cheuaux, leurs affaires alloient tousiours mal: comme au contraire, elles alloient tousiours bien sur vn terrain raboteux, & couuert de pierres; Et toutesfois ils ne laisserent pas de se venger aussi en cette rencontre, pource qu'ils y tuerent vnze Espagnols, & sept de leurs Cheuaux. Apres cét eschee, Alonso d'Aluarado continua sa marche; & pour faire plus de diligence, il chemina tout vn iour, contre l'advis des Indiens, qui luy remonstroient, *Qu'on ne pouuoit aller que de nuit, à cause que la reuerberation du Soleil sur ces terres sablonneuses, estoit si grande de iour, que les Voyageurs estoient en danger de mourir de soif, s'ils n'auoient*

prouïſion d'eau. Mais les Eſpagnols ne ſe payerent pas de cette raiſon; Au contraire, ils ſ'imaginèrent qu'ils ne demandoient qu'à reculer, d'autant que cette Expedition eſtoit contre leur Ynca; ce qui fut cauſe qu'ils les menacerent de les tailler tous en pieces, ſ'ils ne marchoiſent comme il faloit: D'où il aduint que les Indiens, humbles de leur naturel, obéirent auſſi toſt; Mais ſur la fin de cette journée là, enuiron vne heure de nuit, eux, & les Eſpagnols ſe trouuerent ſi eſchauffez, & ſi alterez enſemble, à raiſon de la grande ſecherelle, qu'ils ne ſçauoient plus quel remede y mettre. Les Indiens neantmoins en eurent le plus de mal, pource qu'ils eſtoient chargez: de ſorte que ne pouuant ſ'aider, ny ſe ſoulager, ils ſe trouuerent iuſques à 500. qui eſtoufferent de ſoiſ. Il eſt bien à croire auſſi qu'il en eut pris de meſme aux Eſpagnols, ſi de bonne fortune pour eux les gens de cheual, ſçachant qu'il y auoit vne Riuiere aſſez près delà, n'y fuſſent courus à toute bride, chercher de l'eau, dont ils firent prouiſion, comme le teſmoignent ces paroles d'Auguſtin de Carate.

Liu. 5.
Ch. 6.

Alonſe d'Aluaro ſ'en allant à Cozco, paſſa par un Deſert ſablonneux, où il eut beaucoup de mal, pource que plus de 500 de ſes Indiens de ſernice y moururent de ſoiſ: Que ſi les gens de cheual n'eſſent eſté chercher de l'eau, dont ils rapporterent pluſieurs Vaſes pleins, & en ſecoururent les gens de pied, il y auoit grande apparence qu'ils fuſſent tous morts, tant ils eſtoient fatiguez, &c.

Les Indiens qu'ils venoient de perdre, furent cauſe qu'ils ſ'arreſterent là quelques iours, iuſques à ce qu'ils en eurent trouué d'autres auxquels ils firent porter le bagage. Alors, pour ne ſe plus voir à l'aduenir en la meſme peine où ils ſ'eſtoient veus par le paſſé, ils quitterent le chemin des ſables, pour prendre celui de la Montagne, où ils furent ioints par deux cens autres Soldats, dont il y en auoit ſoixante dix à cheual, & tous les autres eſtoient gens de pied, commandez par Gomez de Tordoya de Vargas, fort proche parent de Garcillaſſo de la Vega, que le Marquis enuoyoit pour renfort aux gens d'Alonſe d'Aluaro, qui ſe trouuoient en tout cinq cens Eſpagnols. Ils aduançoient le plus qu'ils pouuoient, en eſcarmouchant contre les Ennemis, qui ſe preſentoient touſiours en face, ſe ſervant de l'aduantage du païs qui eſtoit fort rude pour les Cheuaux, & fauorable aux gens de pied. Mais les Eſpagnols inſtruits aux deſpens des au-

tres gens de secours leurs Camarades, que les Indiens auoient mis à mort, se tenoient soigneusement sur leurs gardes, de peur qu'il ne leur en prit de mesme. Auecque ces precautions ils arriuerent enfin à *Rumicacha*, mot qui signifie *Pont de pierre*, pource qu'en effet c'en estoit vn, où les Indiens tacherent de faire vn derniereffort contre leurs Ennemis; Et pour cét effet se saisi-
rent de quelques-vnes des plus dangereuses aduenuës. Les Espagnols en firent autant de leur costé; Et pour gagner des passages qui leur sembloient importants, ils ne trouuerent point de meilleur expedient que d'enuoyer vne cinquantaine d'Arquebusiers, avec vne bonne troupe de leurs Indiens de seruite, pour guider leurs gens, afin d'envelopper l'Ennemy par derriere, tandis qu'il se tireroit du chemin: Cela ne pût empescher pourtant, qu'ils ne se vissent chargez d'un nombre incroyable d'Indiens, qui combattirent d'un grand courage; Mais les Espagnols en resinoignerent encore plus; Et apres vn long Combat, se rendirent Maistres du Champ de Bataille, où ils laisserent morts sur la place plusieurs Ennemis, pour le grand aduantage qu'auoient sur eux les Arquebusiers, qui estant plus de cent separez les vns des autres, les tiroient des lieux les plus resserrez, & les plus dangereux, où ils s'estoient mis en embuscade; de maniere que sans eux les affaires des Espagnols alloient mal, pource que les Indiens rendoient leurs cheuaux inutiles, à cause del'aduantage du lieu; & ainsi, ce furent les seuls Arquebusiers qui gagnerent la Victoire, bien que ce fut avec perte de 28. de
Ch. 132. leurs Compagnons, de plusieurs Indiens de seruite, & de neuf Cheuaux, comme le rapporte Gomare par ces paroles.

Aluarado marcha sans obstacle, avec 500. Espagnols, iusques à Lumichaca, qui estoit vn Pont de pierre. Là plusieurs Indiens le chargerent, croyant de le desfaire au passage, & ses gens aussi, ou du moins de les mettre en desfronte; Mais luy, & ses Compagnons, bien qu'enveloppez de tous costez par leurs Ennemis, combattirent si vaillamment, qu'ils les vainquirent, & en tuerent vne grande quantité. Ce Combat neantmoins cousta beaucoup aux Espagnols, pource qu'ils y perdirent de braues hommes, & plusieurs Indiens leurs Amis, qui les assistoient, & les seruoient, &c.

De *Rumichaca*, le Capitaine Aluarado passa plus auant pour gagner païs, escarmouchant tousiours auecque les Indiens; car bien qu'il seussent esté battus, si est-ce qu'en tous les passages
les

les moins accessibles, & les plus dangereux, ils ne laissoient pas d'attaquer les Espagnols, sinon pour les vaincre, du moins pour les fatiguer. Comme en effet, encore que ces Combats ne fussent que simples escarmouches, & legeres rencontres, il y auoit tousiours de la perte de part & d'autre. De cette façon, ils firent quelques vingt lieues iusques au Pont d'*Amançay*, où Alonse d'Aluarado sceur des Indiens la retraite del'Ynea, le retour de Dom Diego d'Almagre du Royaume de Chily, la prison d'Hernand Pizarre, la mort de Iean Pizarre, & celle de plusieurs qu'on auoit tuez à Cozco, avec les autres euenemens de ce Siege-là, dont Alonse d'Aluarado n'auoit encore rien sceu. Il ne voulut point passer outre, suiuant le conseil des siens, sans auoir nouvel ordre du Marquis, qui l'aduertit de tout ce qu'il venoit d'apprendre: En suite dequoy, pour n'estre pris au despourueu, en cas que Dom Diego s'en vint l'attaquer, il se fortifia le mieux qu'il pût de munitions, & de viures.

Cependant, Dom Diego d'Almagre, ayant sceu qu'Alonse d'Aluarado estoit au Pont d'Amançay avec des gens de Guerre, enuoya vers luy Dom Diego d'Aluarado, & autres huit Caualliers des principaux de sa suite, pour le rechercher de paix, & d'amitié; disant, que puis qu'il n'ignoroit pas la gratification que sa Maiesté luy auoit faite du Gouvernement de Cozco, il luy feroit plaisir de s'en retourner, & de le laisser en repos, sinon, qu'il protestoit contre luy de tous les dommages, & de toutes les morts qui en arriueroyent. Mais Alonse d'Aluarado, se saisit d'abord des Deputez, en leur donnant Audience, & leur dit en suite, Que ce n'estoit pas à luy qu'il faloit faire cette Declaration & cette Requeste, mais bien au Gouverneur, sans l'ordre duquel il ne pouuoit rien resoudre. Surquoy Garcillasso de la Vega, Peraluarez Holguin, & les autres principaux Chefs de l'Armée, l'aduertirent qu'ils luy conseilloyent de les relascher, afin qu'ils pussent aller presenter leur Requeste au Marquis; Qu'il considerast que parmy les plus barbares Peuples du Monde, quelques cruelles que fussent les dissensions, & les guerres, les Ambassadeurs, & les Agents des Princes estoient tousiours priuilegez & qu'on ne leur faisoit iamais de mal: Que s'il n'en vsoit de mesme, ce seroit là vn moyen d'allumer entre les deux Gouverneurs le feu des dissensions, plustost que de l'estouffer, & de l'esteindre; Qu'il se representast combien leur auoit cousté

à tous la Conqueste de cét Empire-là, & qu'apres tant de tra-
 uaux qu'ils y auoient employez, il n'estoit pas iuste qu'au lieu
 d'en auoir le fruiſt, & d'en iouir en paix, on s'entretuât pour le
 partager; Et qu'asseürément ils seroient en execration à tout le
 Monde, quand on ſçauroit que pour ce ſujet-là, ils auoient at-
 tisé la discorde entr'eux, & tourné les Armes les vns cõtre les
 autres. Mais toutes ces raisons-là ne purent rien sur l'Esprit d'A-
 lonse d'Aluarado: Au contraire, au lieu d'y donner les mains, il
 ne voulut iamais relascher de son humeur, naturellement fa-
 rousche, & se roidit plus fort en sa premiere resolution; dequoy
 tous ceux de sa ſuitte eurent vn extrême desplaisir, pource
 qu'ils ne demandoient qu'à posseder en paix les Richesses du
 Peru, qui leur auoient tant cousté de sueur, & de sang.

LA BATAILLE DONNEE PRES DE LA
*Riuere d'Amançay, où Alonse d'Aluarado, & ses
 gens sont faits prisonniers.*

CHAPITRE XXXIV.

DOM Diego d'Almagre, qui estoit sorty de Cozco, pour
 aller apres ces Ambassadeurs, voyant qu'ils ne reuenoient
 point au temps qu'il faloit, en eut mauuaise opinion, & s'en re-
 tourna dans la Ville, où il se vid en grande peine, craignant qu'il
 ne leur fut arriué quelque malencontre: En effet il ne l'appre-
 hendoit pas sans raison, & ce n'estoit pas seulement la peur du
 present qu'il trouuilloit, mais encore celle de l'aduenir. Il con-
 ſideroit qu'Alonse d'Aluarado auoit beaucoup plus de gens que
 luy, qu'ils estoient mieux armez que les siens, à la plus-part des-
 quels il ne pouuoit se fier, pour estre des Soldats d'Hernand
 Pigarre, & que par consequent ils le quitteroient, dès qu'ils se
 verroient avec ceux de leur Party. D'ailleurs, ses Deputez dete-
 nus prisonniers le mettoient dans vne estrange inquietude, &
 luy faisoient croire que par là se deuoient fermer les Portes de la
 Paix, & s'ouuir celles de la Guerre. Il estoit comme assiégé de
 ces ennuis, sans ſçauoir de quel costé se tourner, quand il re-
 ceut des lettres de la part du Capitaine Pedro de Lerma, qui

apres le mauuais traitement receu du Marquis, ainsi que nous auons dit n'aguere, voyant qu'il se presentoit vne occasion favorable pour s'en venger, escriuit à Dom Diego tout ce qu'il tenoit caché dans l'Ame, l'aduertissant de l'ingratitude d'Aluorado en son endroit, & del'emprisonnement de ses Ambassadeurs, que pas vn de ses Compagnons n'auoit approuué, Qu'il y alloit de son honneur de tirer raison de cette injure: Que s'il vouloit, il le pouuoit faire facilement: Qu'il s'offroit à luy presser main fort; Qu'il auoit cent amis qui se ietteroient dans son Party dès qu'ils le verroient: Et qu'en vn mot il iugeoit par toute sorte d'apparences, que les autres en feroient de mesme, tant ils estoient mal satisfaits de leur Capitaine.

Cette nouuelle fit prendre courage à Dom Diego d'Almagre, de sorte qu'ayant mis ordre à se pouruoir de munitions, & de viures, à quoy il employa plus de 15. iours, il sortit de Cozco, pour aller chercher Alonso d'Aluorado, & prit en chemin Pedro Aluarez Holguin, qui s'en alloit battre l'estrade, & scauoir en quelle posture estoit Almagre. Il luy fut facile de s'en saisir, pource que la plus-part de ceux qui le suiuoient estoient subornez par Pedro de Lerma, qui auoit aussi gaigné les autres, demeurez avec Alonso d'Aluorado: Luy cependant sachant que Pedro Aluarez Holguin estoit pris, fut sur le point d'arrester aussi Pedro de Lerma, *pource*, comme dit Gomare, *qu'il se desbanda, outre qu'il estoit de Burgos, & qu'il cognoissoit Aluorado*: Cesont les propres mots de l'Autheur. Pedro de Lerma l'en empescha, pource qu'ayant aduis d'heure en heure des plus secretes consultations d'Aluorado, il s'enfuit presque à descouuert, avec quelques-vns des ses Amis, ayant tant de pouuoir sur les Compagnons, que si l'on eut encore tardé quatre iours, il les eut tous emmenez avecque luy: La premiere chose qu'il dit à Dom Diego fut, Qu'il s'auançât, & que pour le surplus, il ne doutat nullement de la Victoire. Il l'aduertit par mesme moyen de l'ordre qu'il deuoit tenir, de ce qu'il luy falloit faire, de l'heure la plus commode au Combat, & de plusieurs autres circonstances, qu'il auoit secretement proietrées. La nuit luy sembla le temps le plus propre, & il le guida luy-mesme iusques au Pont, où il scauoit que se trouueroient plusieurs des Conjurez, assurant au reste les gens de cheual, qu'ils pouuoient passer la Riuiera sans crainte, par vn endroit qui estoit gueable.

Ils marcherent ainsi, avec de grandes esperances de la Victoire: Alonse d'Aluarado, ses Capitaines, & les autres Officiers donnerent ordre à tout ce qu'il falloit faire pour combattre, & se bien deffendre; Mais ils ne furent point obeïs, pource que comme il estoit nuit; & la pluspart de mesme intelligence; les Hommes de Cheual, sous pretexte qu'on auoit desrobé, ou ieté dans la Riuiere leurs Lances, & les gens de pied feignant de ne sçauoir pas ce qu'estoient deuenus leurs piques, leurs Arquebuses, & leurs Arbalestes (quoy qu'il ne fut rien, ny de l'un, ny de l'autre) ne se trouuerent point au mandement de leurs Capitaines; au contraire ils se desbanderent, pour aller où ils voulurent. Cependant ceux qui estoient accourus pour deffendre le passage du Pont, & empescher que les gens d'Almagre ne passassent à gué la Riuiere, leur disoient qu'ils la pouuoient trajecter asseurement, & mesme aller par le Pont s'ils vouloient, n'y ayant personne qui l'empeschast: Et d'autant que ceux d'Almagre n'osoient pas entrer dans l'eau, à cause qu'il estoit nuit, & que d'ailleurs ils ne sçauoient point le gué, ceux de l'autre Party le leur monstroient, & leur seruoient de guides, comme ils leur en seruirent encore sur le Pont, en leur disant qu'il n'y auoit rien à craindre. Dom Diego d'Almagre vainquit de cette façon Alonse d'Aluarado, qu'il fit son prisonnier de Guerre, & avec luy Garcillasso de la Vega, Gomez de Tordoya, le Capitaine Vilalua, & les autres Officiers de cette Armée là, sans y comprendre cent Soldats, qui n'estoient point de la Coniuration; ce qui arriua, sans qu'il y eut dans les deux Partys ny morts, ny blesez. Rodrigo Dorgonos fut le seul qui paya pour tous, pour auoir esté blessé d'un coup de pierre, qui luy fut tiré, sans sçauoir d'où, dont il eut les dents cassées. Voila quelle fut la Victoire d'Almagre, & des siens, qui apres l'auoir gagnée, s'en retournerent à Cozco, transportez d'une incroyable allegresse: Aussi les rendit elle insolents à tel point, qu'ils ne pûrent s'empescher de parler licentieusement des Pigarres, iusques à dire par raille-rie, qu'ils ne laisseroient désormais dans tout le Peru vne seule

Ou v-
ne seule
pierre
d'achou-
pement,
allusion
Pigarre * où l'on pût choper: Et que s'ils desiroient si fort vn
Gouuernement, qu'ils allassent prendre possession de celuy des
Manglars, & de ces hautes Montagnes qui sont le long de la
coste de la Mer, sous le cercle Equinoctial. A leur arriuee, ils
se saisirent de ceux dont ils se deffioient; Et d'autant qu'ils

estoiẽt plusieurs, ils en mirent prisonniers les vns dans la Forteresse, & laisserẽt les autres dans la Ville, en la Maison appellee *Cassana*.

du mot
Espa-
gnol, *Pi-
catta*,
qui si-
gnifie *v-
ne pierre
d'ardoise*.

se.

Nous auons dit cy-deuant, parlant du Marquis Dom François Picarte, qu'ayant despesché au secours de ses Freres Alonso d'Aluaro, & un peu apres Gomez de Tordoya; il se tint dans la Ville des Rois, pour y receuoir les gens quiluy venoient de tous costez des lieux où il les auoit enuoyé demander, comme le remarque Gomare par ces paroles. *Alonse de Funmayor, Euesque, & Gouverneur de Saint Dominique, manda sous la conduite de Diego de Funmayor, son Frere, natif d'Yanguas, plusieurs Arquebusers Espagnols, arrivez en mesme temps avec Pedro de Vergara; Fernand Cortez enuoya pareillement Rodrigo de Rialua, dans un de ses propres Nauires, arrive de la nouvelle Espagne, avec quantité d'Armes, de harnois, de munitions, de vestemens de soye, & une robe de Maries. Outre ceux cy, le Licencié Gaspar de Spinosa mena de Panama, de Nombre de Dios, & de terre ferme un bon nombre d'Espagnols, & Diego d'Ayala plusieurs bons hommes, de Nicaragua, & de Quahutemallan. Il y en eut encore qui vinrent de plusieurs autres endroits; Et ainsi Picarte eut une fort belle Armée, & plus d'Arquebusers qu'il n'en auoit iamais eu, tellement qu'encore qu'il n'en eut pas besoin contre les Indiens, ils ne laisserent pas de luy seruir grandement, pour se defendre de Diego d'Almagre, comme nous dirons cy-apres, &c.*

Le Marquis se voyant donc avec tant de bons soldats (car au rapport de Carate il en auoit plus de 700. tant Caualliers, que gens de pied, & tous Espagnols) se resolut d'aller en personne secourir ses Freres, pour se tirer de la peine où sont d'ordinaire ceux qui attendent des nouvelles de loing. Il prit sa marche avecques ses gens par le plat país; & quand il en fut à quelques iournées, il eut aduis de la part d'Alonse d'Aluaro, de la retraicte de l'Ynca, du retour d'Almagre, de la prison de ses deux Freres, & de la mort du troisieme; ce qui luy fut grandement sensible. Mais afin qu'il ne pleurast point à demy, il eût nouvelles deux iours apres de la perte de ses gens, & de l'emprisonnement d'Aluaro, dont il s'affligea plus qu'on ne scauroit croire. Et d'autant qu'il auoit creu se seruir des gens de Guerre qui luy estoient venus, pour combattre les Indiens, & non pas pour les mener contre les Espagnols, il s'aduisa de retourner à la Ville

des Rois, bien qu'il en fût esloigné desia de vingt-cinq lieus, afin de s'y pourvoir d'armes, & d'autres munitions necessaires pour sa nouuelle entreprise. Il ne voulut pas mesme en hazarder l'execution, qſ'il n'eut fondé premierement s'il n'y auroit point moyen de faire quelque ouuerture de paix, pource qu'ayant desia receu deux reuers de Fortune extrêmement rudes, il auoit grande raison d'apprehender le troisieme. Comme il voyoit doncſon Concurrent abondamment pourueu de soldats, de chevaux, d'armes, & de tout l'équipage qu'il luy falloit, il desiroit fort d'esteindre ce nouveau feu de dissention, & de renoüer avec Almagre l'amitié qu'ils auoient eue ensemble, & tant de fois promise & iurée. Car puis que par leur association ils auoient gagné le riche Empire du Peru, il luy sembloit bien plus à propos d'en iouyr en paix le reste de leurs iours, qui estoient tantost à leur declin, que de s'entre tuer inhumainement, par vn eſſet d'Ambition & d'Auarice insatiable.

Ces diuerſes conſiderations firent reſoudre le Marquis d'enuoyer à Cozcole Licentié Spinosa, pour moyennner, s'il estoit possible, quelque ſorte d'accommodement, entre luy & Dom Diego d'Almagre. Il l'aduertit entr'autres choses; de luy dire, Que ſi le Roy venoit à ſçauoir ce qui s'estoit paſſé, que ſes Gouverneurs ne pouuoient ſ'accorder ensemble, & qu'ils viuoient en perpetuelle animoſité, il pourroit bien enuoyer quelqu'vn à leur place, qui iouyroit gratuitement, & ſans peine, d'vn païs qu'ils auoient acquis au prix de leurs biens, de leur ſueur, & de leur ſang meſme; qu'il conſideraſt qu'à leur eſgard vne bonne Paix valoit touſiours mieux qu'vne mauuaïſe Guerre, quoy que ceux qui en aymoient le meſtier fuſſent d'vne opinion toute differente. A ces deux Aduis il en adiouſta vn troisieme, qui fut; que quand il ne pourroit obtenir autre choſe de Dom Diego, qu'il trouuaſt moyen de luy faire reſaſcher ſes Freres; & qu'o ſans ſe mettre en peine de le venir chercher dans la Ville des Rois, il ne bougeaſt de celle de Cozco, & en demeuraaſt Gouverneur à la bonne heure, iuſqu'à-ce que ſa Maieſté en ordonnaſt comme il luy plairoit, apres qu'elle en ſeroit aduerti.

Le Licentié Spinosa chargé de cette Commiſſion, en fit l'ouuerture à Dom Diego d'Almagre, & à ſes Capitaines. Mais eux que les Victoires paſſées rendoient orgueilleux, à cauſe de leur puiſſance, n'y voulurent iamais entendre; Et bien que Diego

d'Aluarado leur remonstra avec sa prudence accoustumée, de prendre bien garde aux offres qu'on leur faisoit, qui estoient les mesmes qu'ils auoient iusques-là desirées, puis qu'on les laissoit iouir paisiblement de la Ville de Cozco; si est-ce qu'ils ne voulurent aucunement suivre son aduis; Au contraire, ils luy responderent, Que ce n'estoit point à eux à leur donner des limites, ny à leur deffendre d'aller iusques à la Ville des Rois; Qu'en leur propre Iurisdiction, & dans vne si haute Fortune comme estoit la leur, ils deuoient faire la loy aux autres, & leur prescrire des conditions, au lieu de les prendre d'eux: Mais quoy que Diégo d'Aluarado repliquat, Qu'au point où les partys qu'on leur proposoit leur estoient vtils & favorables, c'estoit eux-mesmes qui donnoient la loy, bien loing de la receuoir; si est-ce qu'ils ne le voulurent point escouter. Où vous remarquerez que iusques icy l'un des Gouverneurs auoit demandé à l'autre de luy laisser la Ville de Cozco, & de prendre, depuis les Acqueducts de dehors, stout ce qui se trouueroit d'estenduë de pais dans son Gouvernement, tant au Septentrion que du costé du Midy; & que maintenant qu'on accorda cecy à Dom Diego d'Almagre, il en fit refus, pour luy sembler qu'estant desia maistre de Cozco, il n'auoit que faire qu'on luy cedast vne chose qu'il possédoit, & que l'offre que son Concurrent luy en faisoit de son bõ gré, estoit vne marque manifeste de l'extrême apprehension qu'il auoit de perdre tout son Gouvernement: d'où il concluoit, Que puis que la Fortune le fauorisoit à pleines Voiles, il deuoit voguer à la faueur du bon vent, & voir s'il ne pourroit point luy seul posséder tout cét Empire-là. C'estoit-là son ambition, & sa conuoitise, qui pour estre deux passions inseparables, & qu'on ne peut iamais assouuir, empescherent qu'il ne receut les partys que luy faisoit le Gouverneur Dom François Pizarre; A quoy contribuagrandement encore la mort inopinée du Licencié Spinosa, qui aduint dans la plus grande chaleur de cette negociation, qu'il eut apparemment terminée; Car il auoit tant de iugement, & tant de prudence, qu'il faisoit esperer à tous vn heureux succès, comme luy-mesme se le promettoit aussi; Mais Dieu par ses iugemens secrets, ne voulut point qu'il iouït du fruit de ses desseins, ny des traualx qu'il y auoit employez. Sa mort neantmoins fut comme vn presage de celle des deux Gouverneurs, & de la ruine de leurs pretentions, pour s'y prendre tout autre-

ment qu'il ne faloit. Dom Diego d'Almagre, pour tesmoigner qu'il n'acceptoit nullement les partis que le Marquis luy offroit, sortit avecque ses gens de la Ville de Cozco, où il laissa Gabriel de Royas pour son Lieutenant, & pour garde de tous les Prisonniers, dont les premiers pris avec Hernand Piçarre, & les seconds avec Alonse d'Aluarado, estoient en tout plus de 150. qui furent mis, comme l'ay dit n'aguere, en deux diuerses Prisons.

Dom Diego s'aduisa d'emmener avec luy Hernand Piçarre, qu'il n'osa point laisser avecque les autres Prisonniers, de peur qu'il ne s'eschappast. Il fit marcher son Armée par la Plaine, & sortit de la Frontiere de Cozco, d'où il entra dans celle de la Ville des Rois, iusqu'à ce qu'il arriva dans la Vallée de *Chincha*, qui est à vingt lieux de la mesme Ville. Là pour vne marque de la possession qu'il prenoit, il ietta les fondemens d'un Bourg, ou d'une Peuplade; ce qui donna secrettement à connoistre, qu'il pretendoit que les deux Gouvernemens luy deussent appartenir. Il y fit quelque séjour avec son Armée, pour voir ce que le Marquis en voudroit dire, & luy faire entendre, que si cela l'offensoit, il luy presentoit le Defy tout entier, & l'attendoit au Champ de Bataille, pour y demesler ce different en soldat, & en vray Capitaine.

*LE MARQUIS FAIT DIVERS CAPITAL-
nes; Gonzale Piçarre est tiré de Prison. Arbitres esleus,
touchant le Gouvernement, & ce qu'ils en ordonnent.
Entrevue des Gouverneurs, & desliurance de Her-
nand Piçarre.*

CHAPITRE XXXV.

SI-T-OST que le Marquis fut arriué en la Ville des Rois, il fit ses preparatifs, pour la Guerre qu'il pretendoit auoir contre Dom Diego d'Almagre. On battit la caisse en mesme temps, & il enuoya diuers aduis le long de la Coste, afin qu'on fut aduertuy des choses qui se passoient. Cependant, comme au bruit de ces nouvelles luy venoient tous les iours de nouveaux soldats; quand

quand il vid à peu près qu'il en pouuoit faire vn corps d'Armée, il nomma diuers Capitaines, & autres Officiers. Il donna la Charge de Mestre de Camp à Pedro de Valdiua, & celle de Sergeant Maior à Antoine de Villalua, fils du Colonel. De plus, il fit Capitaine de Cavalerie Perangures, Diego de Royas, & Alonso de Mercadillo. Diego d'Urbina, natif d'Orduña, & nepueu du Mestre de Camp, Iean d'Urbina, fut esleu Capitaine des Piquiers: Et quant aux Arquebusiers, il voulut qu'ils fussent commandez par Nuño de Castro, & par Pedro de Vergara, soldat qui auoit portté les Armes en Flandres, où il embarqua depuis pour les Indes, vne grande quantité d'Arquebuses, avec toutes les munitions necessaires. Ces Capitaines se trouuerent 800. Soldats d'Elite, dont il y auoit 600. Fantassins, & 200. Cheuaux, avec lesquels le Marquis sortit de la Ville des Rois, publiant par tout qu'il s'en alloit deffendre son Gouvernement contre Dom Pedro Diego d'Almagre, qui en estoit Vsurpateur.

Tandis que les choses dont nous venons de parler se passioient entre le Marquis, & Dom Diego, les Prisonniers demeurez à Cozco ne dormoient point, & comme gens qui ne respiroient qu'apres la liberté, qu'ils sçauoient estre vne des plus precieuses choses du monde, ils faisoient toute sorte d'efforts pour se l'acquérir. Et d'autant qu'il n'y a rien qui ne soit venal dans les Partialitez, & les desordres des Guerres Ciuiles, ils trouuerent des hommes de reste qui leur vendirent la fidelité qu'ils deuoient à leur Capitaine Dom Diego d'Almagre, & à son Lieutenant, Gabriel de Royas; Neantmoins ils ne receurent pour l'heure aucun argent comptant & se contenterent des promesses que Gonçale Pizarre, & Alonso d'Aluaro leur firent, avec autres 50. ou enuiron, qui estoient detenus Prisonniers comme eux. Les Soldats qu'on auoit mis pour les garder, iusques au nombre de 40. furent ceux mesmes qui leur donnerét moyen de s'eschapper; Car à mesure qu'ils entroient, & sortoient pour les visiter, ils leur laissoient les Armes qu'ils portoiēt, & leur ostoiēt leurs fers, & leurs chaînes: Auecque cela, pour les obliger entierement, ils firent en sorte d'auoir le plus de Cheuaux qu'ils pûrent des autres Soldats, qui ne se deffiant de rien, pour leur estre Amis, les accommodoient tres-volontiers de ce qu'ils leurs demandoient: Ainsi ces Prisonniers, & ceux de leur Ligue estoient

desia prests à sortir de prison à la faueur des tenebres, quand il arriua, la nuit estant desia bien auancée, que Gabriel de Royas les fut visiter à son accoustumée, Mais il fut tout estonné qu'ayât ouuert la porte, il les trouua tous relaschez & libres, si bien qu'il n'y en eut point de plus captif que luy-mesme, pource qu'ils l'environnerent, & luy dirent; *Qu'il faloit qu'ils venissent avec eux, on se resoudre à mourir à l'instant.* Gabriel de Royas ne pouuant faire autre chose, donna les mains à ce qu'ils voulurent, plustost par force que de son bon gré, tellement qu'ils furent bien environ cent hommes, qui s'en allerent chercher le Marquis Dom François Pigarre; Ce qui leur fut d'autant plus facile, qu'ils prirent le chemin de la Montagne, pour esuiter la rencontre de Dom Diego d'Almagre, qui estoit allé le long de la Coste. Quelques mauuais Esprits voulurent dire, que Gabriel de Royas auoit trempé à cette Coniuration; mais ils se trompoient sans doute, estant vray semblable que si cela eut esté, on n'auroit jamais laissé dans la Forteresse les autres Prisonniers, qui estoient bien près de cent, & entre-autres plusieurs des premiers Conquerants, à sçauoir François de Villefort, Alonse de Maçuela, Mancio Serra de Lequigamo, Diego Maldonat, Iean Iules de Hojeda, Thomas Vasquez, Diego de Truxillo, & Iean de Pancorua, que l'ay tous cognus, & qui auoient de grands Departemens d'Indiens dans Cozco; Outre lesquels furent pris encore Garcillasso de la Vega, Gomez de Tordoya, & Peraluares Holguin: Que si l'on eut pû emmener tous les Prisonniers, cette Victoire auroit esté grande assurement; mais, comme j'ay dit, il n'en eschappa que la moitié. Cependant il n'est pas à croire combien le Marquis fut satisfait de la desliurance de son Frere, & de ses Amis, apprehendant que ceux qui les auoient eus en leur puissance, transportez de haine, & de colere, ne les fissent tous mourir. Il se resiouit encore bien fort, de ce que le secours venu à ses gens leur redoubloit le courage; Et afin qu'il n'y eut plus rien à desirer dans son Armée, il fit General de la Cavalerie, Gonçale Pigarre, & donna l'Infanterie à commander à Alonse d'Aluarado, d'où il aduint que plusieurs Cavaliers se firent Fantassins, afin de se pouoir dire Soldats de Gonçale Pigarre, pource qu'il estoit aymé generalement, & de ses Ennemis mesme.

Dom Diego d'Almagre, sçachant que le Marquis auoit quan-

rité de bons soldats, que les Prisonniers auoient rompu leurs chaines, & qu'au contraire son propre Lieutenant General estoit en prison, viden vn instant tourner la chance qu'il pensoit auoir gaignée; ce qui fut cause que pour ne iouer à tout perdre, il demanda composition, se repentant de n'auoir accepté celle qu'on luy auoit offerte n'aguere. Il enuoya pour cét effet, avec vne ample Procuration trois hommes considerables; à sçauoir Dom Alonso & Henriquez, le Facteur Diego Nuñez de Mercado, & le Tresorier Jean de Guzman, tous trois Officiers de la Douanne Royale. Il les choisit à dessein, afin qu'ayant l'honneur d'estre au Roy son souuerain Seigneur, ils traitassent cette affaire là sans passion, selon qu'ils le iugeroient plus vtile au seruice de sa Majesté. Le Marquis les receut fort bien, & plusieurs partis aduantageux furent proposez de part, & d'autre; mais ils ne demurerent d'accord d'aucun, ce qui fit dire au Marquis, *Qu'il luy semblois à propos de faire Arbitre de leur differend vn homme de Science & de Conscience, & d'en passer par où il voudroit.* Dom Diego d'Almagre y consentit, & ainsi tous deux se soumirent au iugement de Frere François de Bobadilla, Provincial de l'Ordre de la Mercy. Les Autheurs se trouuent en cét endroit d'opinion differente, en ce que Carate ne fait mention que de ce Religieux, au lieu que Gomare en met en auant vn autre appellé Frere François Hufando; mais soit qu'il n'y en ait qu'un, soit qu'il en faille mettre deux, tant y a qu'il n'y a point de contradiction aux paroles de ces Historiens. Voicy celles de Carate.

Frere François usant du pouuoir qu'il auoit, ordonna qu'auant toutes Liv. 3.
choses Hernand Picarre seroit tiré de prison, & le Marquis r. stably Ch. 8.
dans son Gouvernement de Cuzco; Qu'on licenciéroit les gens de Guerre, ou qu'en l'ordre qu'ils estoient on les enuoyeroit par Compagnies à la
descouuerte de diuers Pais, dont on aduertiroit sa Majesté, pour en or-
donner comme il luy plairoit; & que pour s'aboucher ensemble, le Mar-
quis, & Dom Diego, ayant chacun de son costé douze Cavaliers, se ver-
roient dans vn Bourg appellé Malla, qui estoit entre les deux Ar-
mées. Cela fut conclud de cette sorte; & toutesfois Gonçalo Picarre, ne
sefiant ny à la trêue, ny à la parole de Dom Diego, ne laissa pas de par-
tir aussi-tost avec luy, que ses gens suivirent, & d'aller prendre poste se-
crettement près du Bourg de Malla. Cependant le Capitaine Castro
eut ordre de luy de s'aller mettre en embuscade en vn lieu maresageux,
& plein de Roseaux, par où Dom Diego deuoit passer, afin que s'il re-

connoissoit qu'il eut plus de gens qu'il n'estoit porté par la Conuention, il fit tirer ses Arquebusers, & qu'à ce signal il accourut. Voilà ce que dit Augustin de Carate, sans parler d'Almagre : Mais Gomare y supplée par les paroles suivantes.

Almagre dit, Qu'il estoit content de voir Picarre, bien qu'il se sentit interresse dans ce iugement, & alors s'estant mis en chemin avec douze de ses Amis, il recommanda sur tout à Rodrigo Orgoños son General, de se tenir tousiours sous les Armes, pour estre prest, si Picarre bransloit tant soit peu, & mesme de tuer Hernand Picarre qu'il auoit en son pouuoir, si l'on en venoit à la violence. Picarre fut au Rendez-vous, avec autres douze, & apres luy marcha Gonçalo Picarre, avec toute l'Armée: De vous dire s'il le fit, ou par la volonté de son Frere, ou sans en auoir ordre de luy, cela seroit difficile, pource que ie ne croy pas que personne l'ait secu; Mais quoy qu'il en soit, il est bien certain qu'il fut camper près de Malla, & que le Capitaine Nuño de Castro eut ordre de luy de se mettre en embuscade avecque ses quarante Arquebusers, dans un lieu tout couuert de roseaux, près du chemin par où Almagre deuoit passer. Picarre se trouua le premier à Malla, où Almagre & luy s'embrassèrent à leur arriuée, & s'entretenrent d'abord de choses plaisantes. Alors auant qu'ils eussent commencé de parler d'affaire, vn de ceux de Picarre s'estant approché de Dom Diego d'Almagre, luy dit à l'oreille. Qu'il se tirast de là sans autre delay, puis qu'il y alloit de sa vie. A ces mots il donna des esperons à son cheual, & s'en retourna sans dire vne seule parole du sujet qui l'amenoit là: Or pource qu'en s'en allant il descouvrit les Arquebusers en embuscade, cela le fortifia dans sa desfiance, & l'obligea de se plaindre grandement de François Picarre, & des Arbitres, le iugement desquels sembla si mauuais à tous les siens, qu'ils dirent tout haut; Que depuis celuy de Pilate il ne s'en estoit iamais donné vn plus iniuste; Quelques-uns conseillerent à Picarre de courir apres, & de se saisir de luy, mais il n'y consentit aucunement, disant qu'il n'en vouloit rien faire, & qu'il estoit venu sur sa parole, & si iuger de sa franchise par son procedé, disant qu'il n'auoit ny fait venir son Frere, ny suborné ceux qu'on auoit pris pour Arbitres. Gomare finit ainssi ce Chapitre. Carate dit le mesme de cette entreueuë; A quoy François Lopez de Gomare adiouste ces mots. Bien que cét Abouchement se fit en vain, & qu'il ne fit qu'irriter plus fort les deux Concurrents, il ne laissa pas d'y en auoir quelques vns qui eurent vn autre sentiment, & qui voulurent pallier cette passion, & cette animosité de l'vn, & de l'autre. Mais enfin, Diego d'Aluorado

moynna quelque sorte d'Accord entr'eux, aux Conditions qu'Almagre relascheroit Hernad Pizarre, & que François Pizarre donnoit à Almagre un Navire, & un Port assuré, afin qu'il pust librement enoyer ses Messagers, & ses despesches en Espagne; Qu'il n'entreprendroient rien l'un contre l'autre; Et qu'en attendant un nouveau Mandement de l'Empereur, ils demeureroient en bonne paix. Apres ces conuentions, Almagre fit sortir aussi-tost de prison Hernand Pizarre, à la priere, & sur l'assurance de Diego d'Aluvarado: ce qui fut fait contre l'aduis d'Orgoños qui s'y opposa fort, pource qu'il connoissoit le mauuais naturel de Hernand Pizarre: Aussi arriva-t'il à mesme temps qu'Almagre s'en repentit luy-mesme, de sorte qu'il leur bien voulu resenir, mais c'estoit trop tard. L'opinion commune fut, Qu'il ne faisoit que cee homme-là pour mettre tout en desordre, & cela ne se trouua que trop veritable; car depuis sa desliurance, ce ne furent que troubles, & que nouueaux mouuemens: Que si Pizarre n'alla pas bien rondement dans les Conditions accordées, ce fut pource qu'il auoit desia des Lettres du Roy, par lesquelles sa Majesté vouloit qu'ils en demeurassent tous deux à ce qu'elles ordonnoient, quand mesme l'un se trouueroit auoir empieté sur la Iurisdiction de l'autre. Quoy qu'il en fut neantmoins, Pizarre ne vuid pas plus tost son frere hors de prison, qu'à sa sollicitation, & par son conseil, il fit adueruir Almagre, Qu'il eut à sortir d'un país qui n'appartenoit qu'à luy, pour l'auoir descouuert, & peuplé. Outre qu'il estoit venu un nouueau Mandement de l'Empereur. A quoy Dom Diego d'Almagre fit response, ayant leu la Declaration du Roy; Qu'il obeissoit, puis qu'en effet il se tenoit en paix à Cozco, & aux autres lieux qu'il possédoit à present, suivant qu'il estoit porté par les Lettres de Mandement de sa Majesté; A raison dequoy, il le prioit de le laisser viure en repos, sans le troubler dans la possession qu'il auoit prise. Mais Pizarre repartoit, Qu'ayant peuplé luy-mesme, & pacifié la Ville de Cozco, Almagre s'en estoit saisi par la force, sous pretexte qu'elle estoit du Gouvernement de son nouueau Royaume de Toledo; Et partant qu'il eut à la luy ceder, sinon qu'il romproit le Traité qu'ils auoient fait ensemble, puis qu'il deuoit estre aboly par les nouuelles lettres du Roy. Almagre demeura ferme dans sa premiere response; Et alors Pizarre prit sa marche vers Chinchá, suiu de toute son Armée, sans en changer les Capitaines, ayant pour principal Consciller Hernand Pizarre, & pour pretexte, qu'il s'en alloit chasser ses Ennemis de Chinchá, qui estoit de son Gouvernement, comme il paroissoit assez. Almagre prit la route de Cozco, pour ne point combattre; toutesfoi, comme il vid qu'il le sui-

noit, il abrega le chemin en divers endroits, & s'en alla prendre poste à Guitara, montagne rude, & fort haute. Piçarre, qui auoit de meilleurs Soldats que luy, & en plus grand nombre, le poursuivit promptement, si bien que Fernand Piçarre, & ses Arquebusiers gaignerent le passage de la Montagne, à la faueur de la nuit. Ce qu'apperceuant Almagre, qui estoit adroit, il fit retraite à grands pas, & laissa Org. ños à l'arriere-garde, avec ordre de se retirer de mesme, sans en venir aux mains. Aussi obey-il ponctuellement, & ne voulut point s'arrester au conseil de Christophle de Sotelo, & de quelques autres, qui luy remonstroient, Que le plus court expedient estoit de donner bataille aux Piçarristes; pource, disoient-ils, que l'air de la Montagne les feroit malades assurément: Comme en effet, c'est vne chose ordinaire aux Espagnols, de se trouuer mal dès qu'ils passent d'une extremité à l'autre, c'est à dire de la chaleur des Plaines, à la froideur des Montagnes couuertes de neige. Almagre ayant ainsi rallié ses gens, prit sa marche à Cozco, rompit le Pont, fit faire des Arquebuses, & forger quantité d'autres Armes de toutes façons, tant de cuivre que d'argent, pouruent la Ville de viures, & la fortifia de quelques fosses, &c.

Voila les paroles de Gomare, vn peu plus longues que celles d'Augustin de Carate, & qui disent le mesme. Mais pource que ces Auteurs se sont rendus obscurs en quelques vns de ces endroits, pour auoir voulu fuir la prolixité, ie ne treuve pas hors de propos de les esclaireir dans le Chapitre suiuant, par vne espeece de Commentaire.

EXPLICATION DE CÉ QUE NOVS
auons dit, & Marche de l'Armée d'Hernand
Piçarre contre celle de Dom Diego d'Almagre.

CHAPITRE XXXVI.

DIEGO d'Aluarado estant, comme nous auons dit, vn des plus adroits, & des plus aduisez Cavaliers de son temps, entendit à peu près à quoy les animositez, & les passions de ces Gouverneurs aboutiroient, si on les laissoit aller plus auant; ce qui luy fit naistre le desir de les arrester, ainsi que nous auons yeu par les succez arriuez, & comme il se verra plus particulie-

remettre, tant par les euenemens presens que par les futurs.

Comme il cognut donc que le iugement des deux Religieux, pris pour Arbitres, auoit artisé le feu des dissensions, au lieu de l'esteindre; il se porta pour Mediateur en cette affaire-là, & fit tout ce qu'il pût, pour mettre la paix entre le Marquis, & Dom Diego d'Almagre, allant, & venant souuent de l'un à l'autre: De cette façon il n'eut iamais de repos, iusques à ce que par son adresse, & par ses bonnes raisons, il fit resoudre Dom Diego à tirer de prison Hernand Piçarre; Et le Marquis de donner à Dom Diego vn Nauire, & vn Port assure. Or afin que cette Paix fut de durée entr'eux, il les obligea de la iurer entre ses mains, & il se porta luy-mesme pour caution de part & d'autre, afin que cela les attachast dauantage à leur promesse, & à se rendre soigneux de ne point violer leur foy, comme ils y estoient tenus par le deuoir de bons Chrestiens, & de garder leur parole en vrais Cauteliers; Ce qui fait dire à Gomare, *que cette Paix fut faite à la priere & sur l'assurance de Diego à Aluaro, à cause qu'oultre l'instance qu'il en fit, il se declara Cantton de tous deux.* Quant au procedé d'Orgoños, qui fut de s'opposer directement à la desliurance d'Hernand Piçarre; il faut sçauoir que comme il vid qu'il ne le pouuoit, que Dom Diego estoit resolu de passer outre, & qu'il ne vouloit point gouter ses raisons, presageant sa ruine totale, *Souuenez-vous*, luy dit-il, *que vous deslachez vn Tanureau qui vous fera la guerre, & qui vous tuera, s'il peut, sans se soucier ny de parole, ny de serment.*

Pour ce qui est de cette remarque de Gomare, que les Piçarristes se trouuerent mal sur la Montagne; il faut sçauoir qu'il est ordinaire à tous les soldats nouvellement arriuez d'Espagne, que ceux des Isles de Barlouento nomment *Chaperones*, comme ils appellent *Baquianos* ceux qui sont accoustumez à l'air du païs, de tomber malades, s'il aduient qu'apres auoir esté long temps à la Coste de la Mer, ils se retirent à la Montagne: car il leur arriue encore pire qu'à ceux qui s'embarquent sur la Mer, où ils n'ont iamais esté, pource que selon la diuerse complexion des vns, & des autres, ils sont vn iour ou deux à vomir, sans pouuoir boire, ny manger, ny mesme se soutenir. A quoy i'adjouste, touchant les premiers, que la neige des Monragnes leur blesse tellement les yeux, que plusieurs d'entr'eux en perdent la veüe deux ou trois iours durant, apres lesquels ils la recourent.

Ceux qui en espluchent la cause, disent qu'elle procede du changement que l'on fait d'un pais extrêmement chaud, tel qu'est la Coste de la Mer, en un pais extrêmement froid, comme est la Montagne, d'où la neige est inseparable; outre que ce changement est si soudain, qu'il se fait en moins de six heures de distance d'un lieu à l'autre. Sur quoy l'on remarque, que cette incommodité n'arriue pas à ceux qui descendent de la Montagne à la Plaine.

Le Pere Acosta parlant de cette indisposition, qui suprend ceux qui n'ont pas accoustumé l'air de la Montagne, en desduit amplement les causes, & les effets, en homme sçauant comme il est, dans le troisieme Liure de son Histoire naturelle des Indes, où ie renuoye le Lecteur curieux. D'où il faut conclurre, que ce n'estoit pas un mauuais conseil que celui de Christophle de Sotelo, & des autres, quand ils disoient à Orgoños, Qu'il chargeast les Ennemis, & ne feignit point de leur donner bataille, puis que l'air de la Montagne les rendoit si foibles, que vraisemblablement ils seroient deffaits. Ce qu'Augustin de Carate tesmoigne encore par ces paroles. *Rodrigo Orgoños ne voulut point faire ce qu'on luy conseilla, pour ne contredire l'ordre de son Gouverneur, quoy qu'apparemment, s'il eut combattu, la victoire luy fut demeurée, dource que les gens du Marquis estoient malades, à cause des neiges de la Montagne; Voilà pourquoy le Marquis en ayant tiré son Armée, la mena dans le plat pais, & Dom Diego s'en alla droit à Cozco; &c.*

Or ce que Dom Diego d'Almagre deffendit à son General de combattre, monstre clairement que ces deux Capitaines taschoient tousiours de se rendre conformes en leurs pretentions, afin de ne rompre ensemble, comme ils le donnerent bien à connoistre, avant qu'à Dom Diego s'en allast à Chily, par leur entreueuë à Cozco, où ils s'accorderent aussi-tost, esloignant le feu que la Discorde auoit allumé entr'eux. Il en aduint de mesme en leur dernier abouchement de Malla, où, comme disent les deux Historiens, quand ils se virent ensemble, quelque contraste qu'ils eussent eu par le passé, ils l'oublierent aussi tost, s'embrasserent l'un l'autre, & ne parlerent que de choses diuertissantes. Les mauuais Conseillers qui leur souffloient tousiours aux oreilles, ne leur laisserent iamais la liberté d'agir comme il leur plairoit; Au contraire, ils les porterent à la plus violente de

de toutes les extremittez; qui fut de se ruiner miserablement, & de se perdre l'un l'autre; à quoy neantmoins ces Boute-feux ne gagnerent rien, puisque de leurs mauvais conseils ils ne cueillirent que des fruits encore pires, comme il arriue ordinairement à leurs semblables.

Augustin de Carate passant outre dans l'Histoire, dit les paroles suivantes. Au retour de la Montagne, le Marquis ayant gagné la Plaine, avec tous ses gens de Guerre, trouua leurs opinions différentes, touchant ce qu'il deuoit faire: mais enfin il resolut, Qu' Hernand Pizarre, avecque le Corps d' Armée qu'il auoit, s'en iroit à la Ville de Cozco, en qualité de son Lieutenant, & y meneroit pour Capitaine General Gonçals Pizarre son Frere: Que le pretexte de ce Voyage seroit, d'aller faire rendre Justice à plusieurs Seigneurs de Cozco qui l'accompagnoient, & qui s'estoient plaints que Dom Diego d'Almagre leur retenait par force leurs rentes, s'estoit emparé de leurs Maisons, de leurs Departemens d'Indiens, & de plusieurs autres biens qu'ils auoient dans la mesme Ville. Ils partirent ainsi pour s'y en aller, & le Marquis prit le chemin de celle des Rois. Hernand Pizarre arriva cependant près de Cozco, & ses Capitaines furent d'aduis d'aller passer la nuit dans la Plaine: mais Pizarre ne le voulut pas, & trouua plus à propos de camper sur la Montagne. Le lendemain, il ne fut pas plus tost iour, que Rodrigo d'Orgeños se trouua dans le Champ de bataille, avec tous les Soldats de Dom Diego; François de Chanes, Jean Tello, & Vincent de Gueuare (il veut dire Vasco de Gueuare) commandoient la Cavalerie: Et le Capitaine de Chanes, Cousin germain à un autre Cavalier de ce mesme nom, particulier Amy du Marquis, auoit pris le soing de faire venir du costé de la Montagne quelques Espagnols, avecque plusieurs Soldats Indiens, pour s'en seruir au besoin. C'estoit pitié cependant de voir tous les seruiteurs, & les Amis du Marquis, & de ses Freres, qui estoient dans la Ville de Cozco, emprisonnez dans deux basses fossés de la Forteresse, en si grand nombre, & si à l'estroit, qu'il y en eut quelques-uns d'estouffez.

Le matin suivant, apres la Messe, Gonçale Pizarre, & ses gens descendirent à la Plaine, où ils dressèrent leurs Bataillons, & marcherent du costé de la Ville, avecque dessein d'aller camper en vne eminecie au dessus de la Forteresse, sur la creance qu'ils eurent, que Dom Diego les voyant si forts, avecque tant de gens de Guerre, n'oseroit point luy donner Bataille; Ce que l'un & l'autre ne desiroient pas aussi trop volontiers, pour les maux qui s'en deuoient ensuiure; Mais Rodrigo d'Or-

goños, bien éloigné de cette pensée, se tenoit prest cependant, avec ses Troupes, & son Artillerie, &c.

Voilà ce que dit Augustin de Carate, qui ne differe en rien de François Lopez de Gomare, au sentiment desquels nous adiousterons quelques particularitez qu'ils ont obmises, bien qu'elles soient remarquables, afin que l'Histoire en soit mieux entenduë. La premiere, en faueur de ceux qui n'ont pas veu le Champ de Bataille, est qu'il faut sans doute que ce fut vne faute d'impression, de dire que les Piçarres gaignerent vne eminence au dessus, de la Forteresse, estant certain que la Bataille se donna en vne Plaine appellée des Indiens *Cachipampa*, comme qui diroit *Campagne de Sel*, qui est à plus d'vne lieuë & demie de la Forteresse, près d'vne tres-belle Fontaine, de l'eau de laquelle, qui est fort saine, les habitans de la Ville, & ceux de la Frontiere font de tres-bon Sel, dans des Salines fort grandes qu'on y a faites, suiuant le courant de l'eau: Et dautant qu'elles se treuuent entre la Ville, & le lieu, où l'on se battit; ce fut à raison de cela qu'on nomma ce Combat *la Bataille des Salines*.

Orgoños se mit en Bataille avecque ses gens, resolu de mourir les Armës à la main, bien qu'il n'ignorât point que ses Ennemis estoient forts en hommes, & en Armes, sur tout en Arquebuses, dont ils auoient quantité; Mais il passoit par dessus toutes ces considerations par son extrême valeur, dont il auoit donné de grandes preuues en Italie, & remporté en vn Combat à cheual vne Victoire signalée. Comme il estoit donc courageux, & vaillant, il se sentoit piqué en son Ame d'un Defy qu'Hernand Piçarre luy auoit fait faire deux iours auparavant, l'aduertissant que luy, & vn second qu'il prendroit, se feroient remarquer au Champ de Bataille, par des Casques decoupées sur du Velours orangé, qu'ils porteroient par dessus leur cuirasse ou leur cote de Maille, & qu'il luy donnoit cet aduis, afin que si luy ou quelque autre le vouloient chercher, ils le recognussent par ces enseignes: Que si quelque chose obligea Hernand Piçarre de l'enuoyer deslier ainsi, ce fut le secret ressentiment qu'il auoit de quelque piece indigne de luy, qu'il pretendoit luy auoir esté jouée dans la prison. Orgoños accepta le Cartel; & s'adressant au Capitaine Pedro de Lerma, que les Piçarres auoient offensé, comme nous auons dit, bien qu'il s'en fut reuanché depuis en la iournée d'*Amanca*, luy tint ce dis-

couts. Nostre Ennemy se croid si puissant, que desia mesme, il vient chanter la Victoire qu'il pense gagner contre nous; ce qu'il nous fait seavoir par les marques qu'il nous donne de sa personne. Puis qu'il s'assure donc de nous vaincre, à cause de l'aduantage qu'il a sur nous, il fuit que nostre courage y supplée, qu'il nous mette la Victoire en main, & que par ce moyen-là nous fassions plus que luy avecque toutes ses forces. Ils sont deux, & nous autant; les Enseignes qu'ils se vantent de s'en donner nous les feront cognoistre. Chargeons les donc verement, & faisons en sorte qu'ils perdent la vie entre nos mains, vengeance ainsi par leur mort l'affrons qu'ils croient nous auoir fait. Ayant pris ensemble cette resolution, il ne fut question que de l'excuter, & de se tenir prests, comme ils firent, pour la iour de la Bataille, où il y eut beaucoup de sang respandu, comme il se verra par les Chapitres suiuaus.

LA SANGLANTE BATAILLE DES Salines.

CHAPITRE XXXVII.

RODRIGO Orgoños, comme braue Soldat qu'il estoit, rangea le plus matin qu'il pût ses Soldats, & commença par vn Bataillon qu'il fit des gens de pied, aux deux costez desquels il mit ses Arquebustiers, bien qu'en petit nombre, à comparaison de ceux de ses Ennemis, qui furent cause de sa destourte, & de sa desfaite. Il auoit pour Capitaines d'Infanterie Christophle de Sotello. Hernand d'Aluarado, Iean de Moscoso, & Diego de Salinas. Les gens de cheual furent par luy diuisez en deux Esquadres, dont l'une estoit commandée par Iean Tello, & Vasco de Gueuare: l'autre par François de Chaues, & Ruy Diaz. Orgoños, comme General, voulut aller separément avecque son Compagnon Pedro de Lerma, sous pretexte d'en mieux donner les ordres, bien que ce qu'il en faisoit ne fut que pour pouuoir plus librement passer d'un Party à l'autre, afin de se reneontrer avec Hernand Pigarre. Il dressa ses batteries en l'un des costez de son Escadron, qu'il iugea propre à battre en ruine ses Ennemis, auxquels il opposa par deuant vn lieu maref.

cageux, & vne petite Riuiera, qui trauersoit ceste Plaine-là, se persuadant que ce passage seroit autant d'embarras à ceux qui l'alloient combattre.

Le Mestre de Camp Pedro de Valdiuia, & Anthoine de Vilalua, qui faisoit la Charge de Sergent Major, rangerent leurs gens à peu près de mesme que Rodrigo Orgoños rangea les siens. Ils fortifierent leur Bataillon d'une quantité de bons Arquebusiers, qui furent cause, comme j'ay dit, de la perte des Ennemis, & firent outre cela deux Escadrons de cent Cheuaux, qu'ils opposerent à ceux d'Orgoños. Hernand Pigarre avecque son Camarade, qu'on appelloit François de Barahona, tint l'Auant-garde d'un Escadron de Cavalerie, Alonse d'Aluado celle des autres, & Gongale Pigarre, comme General de l'Infanterie, ne voulut combattre qu'à pied. Avecque cét ordre ils s'en allerent à la rencontre de Iean d'Almagre, ayant gaigné l'autre bord, & de la riuiera, & du marescage, sans aucune difficulté; à quoy leur seruit beaucoup, auant que de passer outre, vne descharge qu'ils firent sur leurs Ennemis, qui les endommagea grandement, pource qu'il mit en desroute, & les Fantassins, & les gens de Cheual, qui abandonnerent leurs rangs, pour estre à couuert de la gresle des Arquebuses; ce qu'apperceuant Orgoños, il commença de se deffier de la Victoire, & fit iouer si à point l'Artillerie, qu'un seul boulet donnant dans le Bataillon des Ennemis, en emporta cinq: ce qui espouuenta si fort les autres, qu'il n'eut falu que quatre ou cinq coups semblables, pour perdre le Bataillon tout à fait: mais Gongale Pigarre, & le Mestre de Camp Valdiuia accoururent pour y donner ordre, encourageant les Soldats par leur Exemple, auxquels ils commanderent en suite de se seruir de l'aduantage que leur donnoient sur leurs Ennemis les bales doubles dont ils auoient leurs Arquebuses chargées, & de tirer contre les Piquiers; Car les gens d'Almagre, à faure d'Arquebuses, auoient pris des Piques, que les *Pigarristes* tascherent de leur oster, afin que leurs Cheuaux en pussent rompre le Bataillon avec plus de facilité; comme en effet par les descharges qu'ils firent ils en rompirent plus de 50. ainsi que le remarquent Augustin de Carate, & François Lopez de Gomare.

Les bales doubles, & ruineuses (pour l'apprendre à ceux qui ne le sçauent pas) se font dans un mesme moule que les ordinai-

res. On coupe du fil d'archal en petites pieces, de chacune desquelles on fait vne espee de hameçon crochu, quel'on met en l'une & en l'autre moitié du Moule, qui est separé entre deux par vne feuille de cuiure, ou de fer, aussi deslée que du papier. Cela fait, on y verse le plomb fondu, qui s'incorpore avec les crochets de fil de fer dans le Moule, d'où la bale sort diuisée en deux demy ronds, que l'on joint ensemble, quand on les veut ietter dans l'Arquebuse, comme si c'estoit vne bale entiere: & ainsi, quand on vient à faire la descharge, le fil de fer se desachant de ces deux moitez de bale, coupe tout ce qu'il rencontre; ce qui fut la principale cause, pour laquelle (ainsi que le remarquent les Historiens) Gonçale Pizarre, & Valdiuia, commanderent aux soldats d'vser de ces bales, pour rompre les piques de leurs Ennemis; Comme en effet ils en rompirent quantité; ce qu'ils n'eussent iamais pû faire avec les bales ordinaires: Que s'ils netirerent aux Piquiers, ce fut pour monstrier les grands aduantages que leurs Arquebuses leur donnoient sur eux, & sur leurs Compagnons.

Le Capitaine Pedro de Vargara, ayant embarqué, comme l'ay dit cy-deuant, vne grande quantité d'Arquebuses pour le Peru, y apporta par mesme moyen cette inuention de bales de fil d'archal; i'en ay veu quelques vnes en mon país, & mesme en ay fait depuis en Espagne, où ie me souuiens d'auoir connu vn Cavalier qu'on nommoit Alonse de Loaisa, natif de Truxillo, qui s'estant trouué dans cette Bataille, y auoit eu la machoire d'en bas, & toutes les dents emportées d'une de ces bales. Où il est à remarquer, que ce mesme Cavalier estoit Pere de ce mesme François de Loaisa, qui est auourd'huy viuant dans Cezco, & l'un des fils (dont le nombre est fort petit) de ces fameux Conquerans, qui iouissent du Departement de leurs Peres. Que si l'on me demande mes sentimens touchant l'inuention de ces bales, ie diray qu'il est vray-semblable qu'elle est tirée des pieces de chaisnes rompuës, & d'autre ferraille, dont on charge souuent le Canon, afin que les Ennemis en soient plus endommagez.

Mais pour reuenir à nostre Bataille, nous disons qu'apres que Rodrigo Orgoënis, & son Compagnon Pedro de Lerma eurent bien consideré l'estrange degast que les Arquebusiers auoient fait parmy leurs gens, ils donnerent sur l'Escadron de Gual-

lerie, où estoit Hernand Pigarte, pour voir s'ils ne le pourroient point mettre à mort; ce qu'ils desiroient par dessus tout, pource qu'ils voyoient desia pancher la Victoire du costé des Ennemis. S'estant donc tournez de front, & le plus à l'opposite qu'ils pûrent de ces deux Cavaliers qui leut en vouloient, & qu'ils ne pouuoient manquer de connoistre par leurs Casques de velours orangé, ils les allerent charger, & furent receus d'eux avec beaucoup de courage, & de fougue. Rodrigo Orgoños, qui estoit armé d'une lance ordinaire, à la rencontre qu'il fit de François de Baraona, luy porta vne atteinte dans la barbutte, ou la mentonniere de son Habillement de teste, où vous remarquerez qu'en ce temps là les Cavaliers, à faute de salades, appliquoient aux Bourguignotes des gens de pied de grandes plaques, en forme de mentonnières dont ils se couuroient le visage. La Lance ayant donc rompu la barbutte, qui estoit d'argent, & de cuiure, luy ouurit la teste, & l'abbatit de dessus son cheual; d'où passant outre il atteignit l'autre droit à l'Estomach; puis avant mis la main à l'Espée, il fit des merueilles de sa personne; Mais cela ne dura guere, pource que d'un coup d'Arquebuse qui luy fut tiré vn peu plus bas au dessous du front, il perdit ensemble la veüe & les forces.

Pedro de Lerma, & Hernand Pigarte, se rencontrerent en suite avecque leurs lances; & pource qu'elles estoient autres que les communes, il est necessaire que nous rapportions icy de quelle façon ils en vsoient. Il faut donc sçauoir qu'en ce temps-là (ce que les Espagnols obseruerent depuis en toutes les Guerres Ciuiles) les Cavaliers auoient deuant l'arçon de la selle vne grande Bourse de cuir, attachée avec des courroyes extrêmement fortes, dans laquelle ils mettoient le bout de la lince qu'ils guidoient du bras à l'ordinaire: ce qu'on pouuoit dire estre vne façon de combattre de beaucoup d'adresse, & de violence, pource que le coup estoit poussé de toute la force du Cheual, & du Cheualier, comme il se remarqua tousiours dans toutes les Guerres que les Indiens, & les Espagnols eurent ensemble; Car pour le regard des Indiens, on n'vsoit de Lance contre eux qu'à la maniere accoustumée: Que s'il aduenoit qu'apres la premiere atteinte, la Lance fut demeurée en son entier, ils en tiroient le bout hors de son Estuy, & s'en seruoient comme on fait des Lances ordinaires: Cette digression particu-

liere ne tend qu'à monstrier quelles estoient les Armes tant offensives que defensives, dont on se battoit alors dans mon País; afin que cela serue d'une maniere d'esclaircissement à ce que ie ditay cy-apres. Pour reuenir donc à Hernand Pizarre, & à Pedro de Lerma, il faut sçauoir, que pour la longueur de leurs Lances, les atteintes n'en furent pas telles qu'ils eussent voulu: Toutesfois, elles ne se trouuerent enfin que trop rudes pour l'un, & pour l'autre. Car Hernand Pizarre blessa dangereusement son Ennemy en vne cuisse, l'ayant pris au deffaut de la cuirasse, & luy rompant sa cotte de Maille. Quant à Pedro de Lerma, il donna vn si grand coup sur la teste du Cheual de Hernand Pizarre, que le fer de sa Lance passa plus auant que la peau, rompit la testiere, & choqua de relle sorte l'arçon de deuant, que la Selle d'Armes en fut desmontée, la cotte de Maille percée, & Hernand Pizarre blessé au petit ventre. Mais par vn extrême bon-heur pour luy, certe playe ne se trouua point mortelle, pource que son Cheual s'estant esrené par l'effort qu'il fit, s'abbatit à mesme temps; tellement que par sa cheute il empescha que le Cavalier ne fut tué, & que la Lance ne luy passast à trauers le corps. Les deux Historiens loüant en cét endroit la valeureuse adresse d'Orgoños, vsent presque de mesmes paroles. Voicy celles d'Augustin de Carate. *Rodrigo Orgoños combattoit en homme de cœur, quand il recut au front vne Arquebuse, qui luy perça son habillement de teste; Et alors se sentant blessé, il tua deux hommes, & porta droit à la bouche vn grand coup d'Estoc à vn seruiteur de Hernand Pizarre, le prenant pour Pizarre mesme, pource qu'il estoit en fort bon equipage.* Ce sont les propres termes de Carate, sur lesquels il faut remarquer, que le Fourbe qui apporta le premier en Espagne la Relation de cette Bataille, deuoit estre asseurément du Party contraire à celuy de Pizarre, pource qu'en son particulier il raconta la chose tout autrement qu'elle n'estoit. Car il fit acroire par vne malice bien noire, qu'Hernand Pizarre fit prédre à vn de ses gens la Casaque, & les Liurées qu'il auoit dit qu'il porteroit au iour de la Bataille, afin que ceux qui le chercheroient le voyant paré de ces couleurs, le prissent pour Pizarre mesme, suiuant les enseignes qu'il en auoit données: D'où il s'ensuiuit qu'on le voulut faire passer pour vn homme sans cœur, & que le bruit mesme en vint du Peru iusques en Espagne; de sorte que le Conseil Royal des Indes, pour sçauoir

au vray si cela estoit, fit venir vn fameux Soldat appellé Situestre Gonçale, qui s'estoit trouué dans cette Bataille, auquel il demanda entr'autres choses, si dans le Peru on tenoit Hernand Piçarre pour vn poltron. Surquoy le Soldat, bien que du Party contraire, parla tres-aduantageusement du mesme Piçarre, ensemble de son duel avec Orgoños, & de leurs seconds, autorisant tout ce que nous auons dit par son propre tesmoignage, & par celuy de la voix publique. Ce que ie viens de dire arriua sur les dernieres années de la captiuité de Piçarre, qui dura 23. ans, & le Soldat mesme, qui fut ouï là dessus, me raconta ce qui s'estoit passé dans le conseil Royal des Indes; à quoy la calomnie pensa donner beaucoup de credit, en appellant seruiteur de Piçarre celuy qui estoit son second effectiuelement. Elle ne se trompoit pas neantmoins, de dire que son equipage estoit leste, puis qu'il auoit la mesme Liurée de Piçarre, à sçauoir vne Casaque de Velours orangé, decoupée à grandes taillades, d'où il paroissoit visiblement qu'il encherissoit sur le Mensonge, & diminueoit beaucoup de la Verité, en faisant Valet celuy qui estoit Compagnon.

Les gens d'Hernand Piçarre le voyant tombé, & se faisant acroire qu'il estoit mort, chargerent ceux de Dom Diego d'Almagre, contre lesquels ils combattirent si vaillamment, qu'il en demeura de part, & d'autre quantité de morts sur la place. Car la Discorde irritée, allumant au profond de leurs cœurs vn feu plus ardent qu'ils ne croyoient deuoir estre, fit qu'abandonnez à la Rage, & au Desespoir, ils s'entretuerent inhumainement, comme s'ils n'eussent esté ny de mesme País, ny de mesme Religion, sans se souuenir qu'ils auoient porté les Armes ensemble, & partagé leurs trauaux entr'eux pour la Conqueste de cét Empire-là. Cette sanglante Bataille dura beaucoup plus qu'on ne s'estoit imaginé, sans qu'on pût connoistre à qui demeureroit la Victoire, à cause que les Almagres, quoy que le nombre en fut beaucoup moindre que des Piçarres, ne leur cedoient neantmoins, ny en resolution, ny en vaillance: si bien qu'ils resisterent ainsi aux puissans efforts de leurs Ennemis, sans s'estonner tant soit peu. L'apprehension de la Mort n'eut point de pouuoir sur eux; & quelque aduantage que donnassent à leurs Ennemis les Armes à feu, ils vendirent tousiours cherement leur vie, iusqu'à ce qu'ils la perdirent enfin à force de blessures receuës. Ceux
qui

qui se purent sauuer, eurent recours à la fuite; & ce fut alors que la rage de leurs Ennemis s'irrita plus fort qu'auparauant. Car bien qu'ils les vissent vaincus, & reduits à leur demander quartier, ils ne laissoient pas de faire main-basse par tout, sans pardonner à vn seul. De cette façon l'animosité des Vainqueurs s'augmentoit par la deffaitte des Vaincus, comme le remarquent Liu. 3.
 presque en mesmes termes Augustin de Carate, & François Lopez de Gomare, par les paroles duquel ie donneray commence- Chap. 12.
 ment au Chapitre suiuant. Cha. 4.

*SVCCÈZ LAMENTABLES, ADVENVS
 apres la Bataille des Salines,*

CHAPITRE XXXVIII.

LES gens d'Almagre chargerent à mesme temps ceux de Gonzale Pizarre, & combattirent tous en vrais Espagnols, c'est à dire vaillamment: Mais enfin, les Pizarres demeurèrent victorieux, & vserent cruellement de la Victoire; Dequoy neantmoins ils imputerent la faute à ceux qu'on auoit vaincus avec Aluaro, au Pont d'Amanay, le nombre desquels n'estoit pas grand, & qui ne cherchoient qu'à se vanger. Orgoños s'estant rendu à deux Cavaliers, il en vint vn troisieme qui l'abbatit de dessus son cheual, & le mit à mort. Vn autre que le Capitaine Ruy Diaz portoit en croupe, apres s'estre rendu, perdit la vie d'un coup de Lance. Les Victorieux firent main-basse de plusieurs qu'ils trouuerent de fermez, & mesme le Capitaine Pedro de Lerma, fut misérablement poignardé par Samaniego, qui le fut chercher de nuit iusques dans son Lit. Outre ceux-cy, moururent encore dans le Combat les Capitaines Moscoso, Salinas, Hernand d'Aluaro, & beaucoup d'autres Espagnols: Que si les Indiens eussent donné sur les Blesez, & sur ce peu de gens qui restoient, il leur eut esté facile de les acheuer; Mais ils s'amuserent à despoiller les Morts, qu'ils laissoient nuds, & à piller tout ce qu'ils trouuerent d'argent, que personne ne gardoit, pource qu'à mesure que les Vaincus fuyoient, les Vainqueurs les poursuioient. Almagre ne pouuant combattre, à cause de ses blessures, regarda faire les autres du haut d'un Costau, & s'alla ietter dans la Forteresse, comme il vid ses gens deffaits. Mais Gonzalo Pizarre, &

Alonse d'Alvarado le pourſuivrent ; & l'ayant arreſté, le mirent dans la meſme Priſon, où luy les avoit tenuſ n'aguere.

Ces dernieres paroles font la conſclusion de ce Chapitre de Gomare; Mais pource qu'il oublie beaucoup de choſes qui ſe paſſerent ce iour-là, nous en rapporterons icy quelques-vnes: l'une deſquelles fut, qu'un Cavalier ayant pris en ctoupe Hernand de Sotello, parent de Chriſtophle de Sotello, qui s'eſtoit rendu; fut atteint par un Soldat d'un coup d'Arquebuſe, qui le bleſſa, & qui mit à mort celuy qu'il portoit ſur ſon cheual. Ils uſerent de cette cruauté contre Hernand de Sotello, le prenant pour ſon parent Chriſtophle, que les Piſarres ne ceſſoient de guetter, pour ſe vanger de ce qu'il avoit conſeillé à Orgoños de donner Bataille à Hernand Piſarte, quand luy & ſes gens, au ſortir du plat pais, ſe trouveroient malades ſur la Montagne. Un ſoldat fut cauſe de ſa mort, pour avoir dit ces mots, *Voila Sotello que l'on amene.* Car alors un Arquebuſier, ſans le recognoiſtre, ſe mit à tirer ſur luy, ſ'imaginant de rendre un ſervice agreable à ceux de ſon Party, qui le haïſſoient tous. I'obmett pluſieurs autres cruautez que firent les Victorieux, tout à fait indignes de la Nation Eſpagnole, & qui furent telles, qu'on tient qu'il y en eut plus de tuez de ceux qui ſe rendirent, que des autres qui moururent les Armes à la main.

Mais ſ'il y eut de l'inhumanité dans quelque'une de ces Actions: elle parût principalement en la mort de Pedro de Lerma, dont i'ay deſia touché quelque choſe, & qui pour avoir eſté tragique au dernier point, metite bien d'eſtre icy rapportée. Ce Cavalier ayant eſté dangereuſement bleſſé dans la Bataille, tant par Hernand Piſarte, que par quelques autres; s'alla faire traitter de ſes playes en la maiſon d'un de ſes Amis, que i'ay cognu dès mon Enfance, nommé Pedro de los Rios, d'une Famille des plus conſiderables de la Ville de Cordoue. Il ſe trouva cependant un ſoldat, qu'on appelloit Jean de Samaniego, qui ſe reſſentant de quelque affront, qu'il diſoit avoir receu de luy, le fut chercher apres la Bataille, avecque deſſein de ſ'en venger. Ayant donc appris qu'il eſtoit malade de ſes bleſſeures, au logis de Pedro de los Rios, il ſ'y en alla tout plein de fougue, en homme que la Victoire rendoit insolent au dernier point. Il trouva la maiſon abandonnée de gens qui luy pûſſent reſiſter, & la parcourut toute, iuſqu'à ce qu'ayant recognu dans un pauvre liſt

celuy qu'il cherchoit; il luy dit, avec vne action pleine de sang, & de flegme. *Seigneur Pedro de Lerma, ie viens icy satisfaire mon honneur, & tirer raison par vostre mort, d'un soufflet qu'il y a quelque temps que vous me donnastes en tel lieu.* Pedro de Lerma bien estoigné d'estre ainsi surpris par son Ennemy; Monsieur, luy respondit-il, vous sçavez bien que vous fûtes l'Agresseur en cette querelle, & que vostre mauuais procédé m'obligea, ne pouuans faire de moins, à vous traiter comme ie fis. Mais apres tout, ce ne sera pas vne grande satisfaction à vostre honneur, de tuer au liét un homme que vous y trouuez à demy mort des blessures qu'il a receuës: toutesfois, ie vous engage ma foy, que si Dieu me conserue la vie, ie vous satisferay de telle façon que vous voudrez, soit de parole, ou par escrit, soit avec toutes les formalitez qui se pratiquent en tel cas, à toute rigueur, entre gens de nostre profession. Ce n'est pas cela, dit Samaniego en blasphemant, ie ne suis pas homme à delay; mon honneur m'ordonne de vous tuer tout maintenant. Si vous le faistes, repartit Lerma, ce sera le perdre plustost que de le reconurer, puis qu'en l'estat où vous me voyez, il y a peu d'apparence que ie puisse tarder beaucoup à mourir. Neantmoins ie vous promets de rechef de vous satisfaire entierement, si Dieu me fait la grace de viure. Ils repeterent tous deux trois ou quatre fois les mesmes paroles; l'un ne parlant que de mort, & l'autre que de satisfaction. Enfin sur le point que Pedro de Lerma croyoit auoir reduit son Ennemy à se payer de la promesse qu'il luy faisoit de le contenter à toute rigueur de soldat; cét homme de sang se leua du liét où il estoit assis, & portant la main à vne dague, en donna plusieurs coups au malade, iusqu'à ce qu'il le vid mort. Cela fait, il sortit en pleine Place, où il se vanta publiquement d'auoir tué Pedro de Lerma, pour se venger de l'affront qu'il en auoit receu. Il ne se contenra pas de cela; mais s'imaginant d'encherir beaucoup sur vne action qui luy sembloit estre heroïque, il se mit à raconter mot à mot les paroles qu'ils auoient eües ensemble, & combien de fois ils les auoient repetées. A quoy il s'accoustuma si bien, que par tout où il se trouuoit, il repetoit tousiours le mesme langage, iusqu'à ce qu'en fin sa propre vanité luy cousta la vie, pour punition de l'auoir ostée indignement à son ennemy. Je rapporteray icy comme cela se passa; Et quoy que ce recit soit hors de son lieu, si est-ce que ie le iuge à propos, pour faire perdre au Lecteur vne partie de l'ennuy que luy peuvent auoir causé les cruautéz de Samaniego, qui furent estran-

ges, à vray dire, & du tout abominables. Il faut donc sçauoir, que cinq ans apres que les choses dont nous venons de parler se furent passées, le Royaume estant desia libre des animositez, & des factions aduenues entre les Almagres, & les Pigarres; Jean de Samaniego, qui demouroit alors à Puerto Viejo, ne perdoit aucunement le souuenir de l'Acte tragique qu'il auoit commis: Aucontraire, il l'auoit perperuellement en la memoire, & en la bouche, ne cessant de le loier, comme si ç'eut esté quelque action qui le deuit rendre recommandable: à quoy pensant donner plus d'esclat, il repettoit à tout moment, *Que pour reparet son honneur, il auoit poignardé vn Capitaine, autresfois General du Gouverneur Dom François Pigarre, sans se soucier de ce qu'on en pourroit dire; adioustant à ces vanitez quantité d'autres langages insupportables: d'où il s'ensuiuit que le Iuge ordinaire du lieu, lassé d'en auoir les oreilles battues, le fit aduertir par vn de ses Amis, qu'il ne tint plus tous ces discours-là, qui n'estoient ny bien-seants, ny aduantageux pour luy; Et que puis qu'il s'estoit vengé, cela luy deuoit suffire, sans en parler d'auantage. Mais au lieu de prendre cét aduis en bonne part, Samaniego fit tout le contraire, & sortit à la Place; où trouuant le Iuge, & vne vingtaine d'Espagnols (n'y en ayant presque pas d'auantage dans tout le Bourg) qui s'entretenoient ensemble, il alla droit à eux, & leur dit tout en colere. *Je me mocque de tous ceux qui s'offencent de la satisfaction de mon honneur, & de la mort que i'ay donnée à Pedro de Lerma. Si quelqu'un en a mal au cœur, qu'il parle clairement, & deuant le monde, non par Interpretes, & par petits messages secrets: Car ie iure, que sans me soucier de sa condition, ie suis homme à luy respondre, & à luy donner autant de coups de poignard, que i'en ay donné à mon Ennemy.* Le Iuge voyant qu'il entendoit parler de luy, le saisit au collet, & pour faire assembler le peuple, *A l'aide du Roy, s'escria-t'il, & main forte à la Iustice contre vn Traistre, & vn Meurtrier.* A ces mots ceux qui se trouuerent presens, lassez des impertinences de Samaniego, le menerent dans vne Maison prochaine, qui luy tint lieu de Prison. En suite dequoy, le Iuge fit vne Information de quatre Telsmoins, qui deposerent d'auoir ouy dire au Prisonnier, qu'il auoit poignardé Pedro de Lerma, Capitaine de sa Majesté: Qu'il s'estoit tousiours porté dignement en la Conqueste du Pais, faisant la charge de General du Marquis Dom François Pigarre, & qu'il l'a-*

uoit tué traistrement, non pas au Champ de Bataille, mais au list, où il estoit sans desiance, & tout couuert de blesseures. Apres que l'affaire fut verifiée, le Iuge le condamna à la mort; & pour cette execution, fut dressé à mesme temps en la place vn Gibet à trois pieux, où le traïnerent les Indiens, qui faisant l'office, & de Crieurs en leur langue, & de Bourteaux mesme, le pendirent à la commune satisfaction de ceux qui le virent, ou qui ouyrent parler de cét Acte de Iustice.

Ayant à reprendre le fil de nostre Histoire, ie dis, Que si les Indiens n'executerent point ce qu'ils auoient entrepris de faire contre les Espagnols, qui estoit de les tuer tous apres la Bataille; ce fut sans doute par la permission de Dieu. Car comme sa Prouidence eternelle les reseruoit pour instruire ces Gentils en la Doctrine salutaire, il permit que la Discorde se mit entr'eux, & que leurs Compatriotes, qui se trouuerent estre seruiteurs domestiques des Espagnols, ne consentissent point à ce massacre, pour ne violer la fidelité qu'ils auoient naturellement iurée à leurs Maistres: Aussi protesterent-ils de mourir plustost pour les deffendre, que pour les offencer, se remettant en memoire, que leur Roy Huayna Capac, & Manco Ynca son fils, leur auoient expressement enjoint d'obeïr aux Espagnols, & de les seruir; de sorte que ce contraste entre les Indiens leurs Domestiques, & ceux qui ne l'estoient point, destourna les mauuais desseins qu'auoient ces derniers. A quoy i'adjouste encore, que s'ils ne le firent, ce fut pource que pas vn d'eux ne se declara pour estre leur Chef, estant certain, comme le remarque l'Histoire, que si quelqu'un se fut déclaré pour tel, les Vaincus, & les Vainqueurs s'en fussent fort mal trouuez.

Cette Bataille se donna le 6. d'Avril, l'an 1538. le lendemain du Vendredy du Lazare; en memoire dequoy, par vne deuotion particuliere enuers luy, les Espagnols bastirent en son nom vne belle Eglise, dans la mesme Plaine, où l'on se battit. Là furent enseuelistous ceux qui par le sort des Armes y laisserent la vie, tant de l'un, que de l'autre Party; Et bien que quelques-vns tiennent que ce fut le 26. du mois susdit, si est-ce qu'il s'en faut tenir à la premiere opinion, estant vray-semblable que l'Imprimeur, ou celuy qui en a fait la Relation, a mis 26. au lieu de six. Le Pere Blas-Valera dans la description qu'il fait des grandeurs de Cozco, parlant de cette Bataille, en dit ces paroles. // y a

dans cette Plaine-là vne Eglise dediée à Sainct Lazare, où les corps de ceux qui furent tuez en combattant, demurerent enseuëlz vn assez long-temps. Comme donc vn Gentil-homme Espagnol, grandement deuot, & du nombre des Conquerans, s'y en alloit souuent prier Dieu pour les Trespassez; il aduint qu'apres auoir continué ses deuotions durant plusieurs iours, il ouït dans l'Eglise plusieurs voix plaintiues, & qu'en mesme temps vn de ses Amis deffunets s'apparût à luy, sans luy dire autre chose, sinon. Qu'il le visitast souuent de iour, & de nuict, à certaines heures. L'Espagnol se trouua saisi d'abord d'une grande frayeur: mais il la perdit enfin, & par la custume, & par les salutaires aduis de son Confesseur Pere André Lopez, de la Compagnie de IESVS. Ainsi sans relascher de sa premiere deuotion, il continua de prier à son accoustumée, non seulement pour son Amy, mais pour les autres Deffunets, sollicitant tous ceux de sa cognoissance de le vouloir seconder par leurs Oraisons, & par leurs Aumosnes. Depuis l'an 1581. par son conseil, & ses suings, les Mestifs, fils d'Espagnols, & d'Indiennes, transporterent les os de leurs Peres en la Ville de Coxco, & les enterrerent dans vn Hospital, où ils firent dire plusieurs Messes, & faire quantité d'Aumosnes, & d'autres œures pieuses, où tous ceux de la Ville accoururent, avec vn merueilleux zele, accompagné d'une ardente charité; si bien qu'à la fin cette diuision cessa, &c.

En suite de ces paroles du Pere Blas-Valera, il me reste à deduire sommairement les cruautéz estranges qui se passerent apres cette Baraille sanglante; la principale desquelles fut la mort du braue Dom Diego d'Almagre, qui causa la ruïne totale de ces deux Gouverneurs; celle de leurs Partisans, & generalement de tout le Peru. Les deux Historiens la racontent d'une mesme façon, à sçauoir Augustin de Carate, & François Lopez de Gomare, de qui i'ay tiré mot à mot le Chapitre suivant.

Liv. 3.

Ch. 12.

LA MORT DEPLORABLE DE DOM
Diego d'Almagre.

CHAPITRE XXXIX.

PAR la Victoire des Pigarres, & l'emprisonnement d'Almagre, les vns s'enrichirent, & les autres devinrent pauvres, telle estant la coustume de la Guerre, principalement de celle qu'on nomme Ciuile, pour estre faite entre Citoyens, Voisins, & Parens. Fernand Pigarre se mit en possession de Cozco, sans contredit; & mesme sans que personne en mutmurast, il fit quelque bien à plusieurs, luy estant impossible d'en faire à tous. Mais comme c'estoit peu de chose, à l'esgal de ce que pretendoit vn chacun de ceux qui l'auoient suiuy dans la Bataille, il en enuoya la plus part à la Conqueste d'un nouueau Païs, où ils pûssent faire leur fortune; & pour ne se trouuer exposé, ny à de nouueaux soucis, ny à de nouueaux dangers, il fit partir pesselles les Amis d'Almagre avecque les siens. Il s'aduisa par mesme moyen d'enuoyer à la Ville des Rois, en qualité de Prisonnier, le ieune Dom Diego d'Almagre, pour empescher que les Confidens de son Pere ne se souleuaissent avecque luy. Apres ces precautions il fit le Procez d'Almagre, semant le bruit, que c'estoit pour l'enuoyer avecque le Prisonnier, droit en la Ville des Rois, & de là en Espagne. Mais soit qu'il apprehendast l'effet de ce qu'on luy auoit dit, que Mesa, & plusieurs autres, deuoient l'attendre en chemin, pour le desliurer; soit que ce fut pour quelque autre cause, tant y a qu'il le voulut ainsi, pour se tirer de l'apprehension où il se trouuoit. Les griefs dont il le chargea furent, Qu'il estoit entré dans Cozco à main armée; Que plusieurs de ses Compatriotes ne seroient pas morts sans luy; Qu'il s'estoit fait d'intelligence avecque Mango Ynca contre les Espagnols; Qu'il auoit donné, & osté des Departemens, sans la permission de l'Empereur, rompu la trêve, faussé son serment, & combattu dans *Amançay*, & aux Salines, A quoy ie pourrois ioindre quelques autres accusations qu'il forma, qu'il passe sous silence, pour estre moins criminelles que celles-cy;

Cette sentence de mort perça le cœur à Dom Diego d'Almagre, & luy fit dire des choses si tristes, qu'elles eussent pû tirer des larmes des yeux les moins sensibles à la pitié. Il en appella deuant l'Empereur, mais Fernand ne s'en voulut iamais tenir à l'Appel, quelques instantes prieres qu'on luy pût faire: Ce qu'apperceuant Almagre, il le conjura au nom de Dieu, de ne le point liurer à la mort; & pour l'y obliger dauantage, il luy remonstra, Que luy pouuant oster la vie, il ne l'auoit point fait, ny respendu le sang d'aucun Parent, & Amy qu'il eut, quoy qu'il en eut tenu plusieurs en sa puissance: Qu'il considérât que son cher Frere François Piçarre luy deuoit la meilleure partie de sa Fortune: Que les incommoditez de l'aage, de la goutte, & des maladies l'auoient tantost reduit à n'en pouuoir plus: Qu'il luy feroit iustice de renuoyer la cause par voye d'Appel, & que cependant il le pourroit laisser s'il vouloit, dans vne obscure Prison, pour y passer ce peu de iours qui luy restoient à pleurer ses pechez.

Ces paroles, bien que capables d'amollir vn cœur d'Acier, ne firent qu'endurcir dauantage celuy de Piçarre, qui luy dit pour toute response, Qu'il s'estonnoit grandement de ce qu'un homme qui passoit pour courageux comme luy, redoutoit ainsi la mort. Piçarre luy respondit, Qu'il ne deuoit pas s'en estonner, puis que *JESVS-CHRIST* meisme l'auoit bien apprehendée; Mais que si quelque chose le consoloit, c'estoit que sa vieillesse ne pouuoit pas souffrir qu'il veseut long-temps. La repugnance qu'il auoit contre la Mort, luy fit de la peine à se resoudre à la Confession, s'imaginant que cela l'exempteroit d'une chose qui luy estoit inescuitable; Mais bien-tôt apres il changea d'aduis, fit son Testament, & laissa pour heritiers le Roy, & son Fils Dom Diego. Il s'opiniastra tousiours contre la Sentence de l'execution, & Fernand Piçarre contre l'Appel, pource qu'il apprehendoit qu'on ne la reuokaist au Conseil des Indes, ioint qu'il auoit ordre exprés de François Piçarre, de passer outre comme il fit, sans s'arrester à l'Appel. Apres que plusieurs se furent bien employez pour luy, il fut enfin estranglé dans la prison, & eut depuis la teste tranchée dans la place de Cozco, l'an 1538. Sa mort fut grandement sensible à plusieurs; mais celuy de tous qui le regretta le plus apres son fils, fut Diego d'Aluaro, qui auoit tiré de prison

Fernand

Fernand Pigarre, iufques à luy fauuer la vie, fans que neantmoins il pût rien obtenir de luy en cette occafion, quelque priere qu'il luy pût faire. Ce qui le defpita fi fort, qu'il fe refolut enfin de s'en aller en Efpagne, pour s'y plaindre tant de François Pigarre que de fes Freres, & fommer Fernand deuant l'Empereur, de la foy qu'il luy auoit engagée, Mais le mal-heur voulût pour luy, qu'allant à Vailladolid où eftoit la Cour, il fut preuenü de mort : Quelques-vns le foubçonnerent d'auoir eſté empoifonné.

Diego d'Almagre eftoit natif du lieu * dont il portoit le nom. * d'Almagre. On ne ſceut iamais qui eftoit fon Pere, quelque peine qu'on y prit, & les meſchans Efprits diſoient que c'eſtoit vn Preſtre. Quoy qu'il ne ſceut ny lire, ny eſcrire, il ne laiffoit pas d'auoir pluſieurs bonnes qualitez; Car il eſtoit homme d'honneur, Amy de la bonne reputation, plein de franchiſe, genereux au poſſible; & toutesfois avec ce defaut, qu'il ſe picquoit de la gloire de ſemer par tout le bruit de ſes bien-faits. Les Soldats l'aymoient, parce qu'il leur faiſoit du bien, quoy que d'ailleurs il les traitaſt pluſieurs fois fort mal, & de la langue, & des mains. Il deſchira pour plus de cent mille ducats de promeſſes, & d'obligations, que ſes gens luy auoient faites, pour de l'argent qu'il leur auoit preſté en diuerſes occaſions, dans le Royaume de Chily; ce qui fut, à vray dire, vne liberalité de Prince, pluſtoſt que d'un Soldat de Fortune: Et toutesfois, ô ingratitude extrême! pas vn de ceux qu'il auoit obligez ne l'aſſiſta d'un chetif linceul, apres qu'il fut executé. Sa mort fut d'autant plus indigne de luy, qu'il ne voulüſt iamais tuer aucun qui appartint à François Pigarre. Il paſſa tout le temps de ſa vie, ſans ſe marier, & ne laifſa pas d'auoir d'une Indienne de Panama vn Fils, qu'il fit nommer de meſme que luy, & qu'il prit le ſoin de faire fort bien inſtruire, mais qui finit mal, comme nous dirons cy-apres.

Ce teſmoignage de Gomare que ie viens de rapporter, eſt confirmé par Auguſtin de Carate; Et pour vn plus grand eſclairciſſement de tous les deux enſemble, ie feray les remarques ſuiuantes. Apres que Pigarre eut gagné la Victoire, ſa principale intention fut d'eſloigner ſes Ennemis, pour mettre ſa vie en ſeureté: Car les grandes cruautez qu'exercerent ſes gens en ſuite de la Bataille, furent ſi eſtranges, que ceux de l'un, & de l'autre Party ſe declarerent irreconciliables; tellement qu'il fut impoſſible

à Hernand Piçarre, quelque peine qu'il y employast, de se bien remettre dans l'esprit des principaux: Au contraire, plus ils alloient en avant, plus ils faisoient esclatter leur haine; iusques à dire tour haut, *Qu'ils se vangeroient, ou tost, ou tard.* D'ailleurs, les Amis mesmes deuenoient Ennemis, comme ils se voyoient frustrez de leurs esperances, le moindre d'entr'eux s'estant promis toute vne Prouince; Er bien que Hernand Piçarre, comme dit Gomare, eut donné quelque chose à plusieurs, ne se pouuant faire qu'il donnast à tous; si est-ce que ceux qui l'aymoient, ne furent pas moins mescontens que ces autres qui le haïssoient: tellement que pour se desliurer tout à la fois, & du soin de recompenser ceux-cy, & de la crainte de se garder de ceux-là; il se resolut d'enuoyer les vns & les autres à de nouvelles Conquestes, comme il sera dit dans le Chapitte suivant.

On condamna Dom Diego d'Almagre à perdre la vie, & les biens, qui furent confisquez au Roy; où il est à remarquer que d'abord ce ne fut pas le dessein d'Hernand Piçarre de le faire mourir, sinon de l'enuoyer en Espagne, avec les Informations qu'on auoit faites contre luy. Mais il changea d'aduis, comme il vid que ses Amis murmuroient de sa prison, & qu'ils disoient tous haut, *Que luy-mesme n'estoit pas si coupable qu'Almagre, des eas dont il le chargeoit, quoy que nul autre que luy n'eust esté eause de leurs communes discordes: Que s'il n'eut irrité le Marquis son Frere, contre Almagre, leurs animositez ne se fussent iamais portées si auant; Qu'il auoit voulu vanger son depit, en se faisant Iustice à soy-mesme, & despoüiller de son Gouvernement celuy qui par raison y auoit eu la meilleure part, & employé plus de bien que rous les Piçarres ensemble à la Conqueste de cét Empire-là; Que ces outrages ne se deuoient pas souffrir, & que les pierres s'eleueroient contre ceux qui en estoient les Autheurs.* De toutes lesquelles choses Hernand Piçarre n'estant que trop aduerty, & scachant mesme en particulier, que Gonçale de Meza (autresfois Capitaine de son Artillerie) fâché de ce qu'on luy reuenoit sa paye, & qu'avec cela on le traitoit fort mal, auoit fait party avec ses Amis, pour desliurer Almagre sur le chemin, lors qu'on le meneroit prisonnier; il se precipira dans le dessein de faire mourir Dom Diego, se persuadant que par la fin de sa vie se termineroient toutes sortes d'animo-

sitez, & qu'ainsi les vns & les autres viuroient en repos; mais tout le contraire arriua depuis, comme il se verra par l'Histoire.

Quant à ce que dit Gomare, Qu'on ne pût iamais sçauoir au vray, quelque peine qu'on y prit, qui estoit pere de Dom Diego; Augustin de Carate raconte le mesme, & y adiouste, *Qu'il fut expose à la porte de l'Eglise*; ce qui ne fait rien pourtant contre luy, puis que cela n'empesche pas que l'Eglise Catholique n'aduocie tels enfans trouuez, & qu'elle ne les admette mesme à toutes ses Dignitez; Mais ce que Gomare met en auant, quand il le veut faire passer pour fils de Prestre, ne se peut aucunement souffrir, & c'est vne pure calomnie de gens mal nais, & qui luy estoient mortels Ennemis; car ne pouuant ternir autrement l'esclat des Actions illustres de ce grand Homme, ils darderent contre sa Naissance des traits de leur langue venimeuse, sans preuue, & sans apparence de verité. Certes, quand il est question de parler des Fils dont on ne cognoist point les Peres, il en faut iuger par leur Vertu, & par leurs beaux Faits: que s'ils se rencontrent tels que ceux du Gouverneur Dom Diego d'Almagre, on ne doit point mettre en doute qu'ils ne soient fort bien nais, puis qu'ils sont comme le bras droit, & les Creatures de la Vertu. Car de quoy sert la Noblesse à ceux qui degenerent de celle de leurs Peres, par leurs actions vicieuses? Assurément elle leur est inutile, puis que c'est la seule Vertu qui la produit, & qui luy sert de support. D'où l'on peut conclure veritablement que Dom Diego d'Almagre n'a pû sortir d'une Tige plus illustre, que celle de ses propres actions, qui ont enrichy tous les Princes du Monde, comme ie l'ay amplement prouué cy-deuant.

Auec tout cela neantmoins cét Homme, si grand, & si Heroïque, eut tant de mal-heur, qu'apres auoir esté cruellement estranglé dans vne Prison (ce qui deuoit bien suffire) il eut depuis la teste tranchée en Place publique. Ce qui fut, à vray dire, vn spectacle d'autant plus triste à ceux qui s'y trouuerent presens, que cét excellent Capitaine estoit âgé d'environ 66. ans, & tellement indisposé de sa personne, que quand on n'eut point hasté sa mort, assurément il en estoit fort proche. Ce qui donna sujet à plusieurs, de dire que ses Ennemis l'auoient fait mourir deux fois, pour mieux donner à cognoistre sa haine mortel-

le qu'ils auoient conceuë contre luy, & l'insatiable desir de s'en venger. Le Bourreau, pour iouïr de ses droits, & de sa despoüille, le mir presque nud, à la reserue de la chemise, qu'il luy auroit ostée, si on ne l'eue empesché. En ce deplorable estat il fut exposé publiquement durant la meilleure partie du iour, sans qu'il y eut, ny Amy, ny Ennemy, qui l'ostat delà; Et à vray dire les Amis vaincus, ou rendus, ne le pouuoient pas, & les Ennemis, parmy lesquels il y en eut plusieurs qui le regrettent, n'oserent iamais l'entreprendre en public, pour ne se faire haïr de ceux avec lesquels il estoit en bonne intelligence. Ce qui monstre assez, à mon aduis, combien est mauuaise la monnoye, dont le Monde paye la plus-part de ceux qui l'ont tousiours bien seruy.

Almagre ayant ainsi demeuré presque tout le iour, il suruint enuiron la nuict, vn More, autresfois son Esclaue, avec vn cheuif linceul, que sa pauureté luy pouuoit auoir fourni, ou qu'il auoit eu possible d'aumosne, dont il l'enueloppa le mieux qu'il pût, assisté de quelques Indiens, qui auoient seruy le Deffunct, & qui tous ensemble le porterent dans l'Eglise de Nostre-Dame de la Mercy, où les Religieux fondant en larmes, l'enseuelirent charitablement dans vne Chappelle, qui se void dessoubz le grand Autel. Ainsi mourut le grand Dom Diego d'Almagre, dont il n'est resté autre memoire que celle de ses bien-faits, accompagnée d'vneternel regret de sa mort. A la bien considérer, il semble qu'elle fut vne coppie, & vn Portrait de celle, qui pour la vanger, fut depuis donnée au Marquis Dom François Pizarre, tant elle luy ressambla, comme il sera monstré cy-apres; Ce qu'on eut dir estre aduenü parie ne sçay quel Decret du Destin, afin de rendre esgaux, & associez en toutes choses, ces deux Gouverneurs, & ces Conquerans du riche Empire du Peru.

DIVERS CAPITAINES SONT ENVOYEZ
*à de nouvelles Conquestes. Hernand Pizarre arrive
 en Espagne, où il demeure long temps en Prison.*

CHAPITRE XL.

HERNAND Pizarre ayant arresté Dom Diego d'Almagre, despescha plusieurs Capitaines, pour s'en aller descouvrir de nouvelles Terres; Ce qu'il s'aduisa de faire, afin de se desliurer ensemble, & de l'importunité de ses Amis, & du subçon qu'il auoit de ses Ennemis. Pedro de Valdiuia, son Mestres de Camp, fut enuoyé avec plusieurs bons hommes de Guerre à la Conqueste du Royaume de Chily, que Dom Diego d'Almagre auoit abandonné, où le mesme Valdiuia eut la Fortune aussi fauorable, comme il l'auoit eue contraire, au temps de l'*Tnca Toupanqui*, X. Roy du Peru. François de Villagra que l'ay cognu, & Alonso de Montroy l'y accompagnerent; Et à la Baye de saint Mathieu, où auoit esté Garcillasso de la Vega, s'achemina le Capitaine François Dolmos. Gomare parlant de ces Conquestes en dit ce qui suit.

Gomez d'Aluarez s'en alla conquerir la Prouince de Guanucu. François de Chaves faire la Guerre aux Conchucos, qui persutoient ceux de Truxillo, & des environs, portant vne Idole en leur Armée, à laquelle ils offroient la despoüille de leurs Ennemis. & mesme le sang des Chrétiens. Pedro de Vergara fut aux Bracamores, pais près de Quitu, tirant vers le Nord. Jean Perez de Vergara aux Chachapoyas. Alonse de Mercadillo à Mullubamba, & Pierre de Candie vers le haut du Collao; mais il ne pût entrer dans le Pais, soit pour estre mauvais naturellement, soit pour le souleuement de ses gens, qui semuterent la plus-part, pour estre Ami d'Almagre, avec le Capitaine Meza, qui commandoit l'Artillerie de Pizarre. Fernand Pizarre s'y enestant allé, luy fit trancher la teste, l'accusant de Rebellion, d'auoir mesdit de Pizarre, & de s'estre vanté qu'il enleueroit Diego d'Almagre d'entre les mains de ses Ennemis, s'ils le menoient prisonnier dans la Ville des Rois. Il donna les trois cens hommes de Pierre de Candie à Perançurez, qui fut enuoyé à la mesme Conqueste, & ainsi

s'escarterent les Espagnols, qui deçà, qui delà; si bien qu'ils conqui-
rent plus de trois cens lieues de pais en longueur, avec vne diligence in-
croyable, mais non pas sans y perdre beaucoup de gens. Fernand, &
Gonzale Picarre subinguerent le Collap, Pais si abondant en or, que
les habitans couurent en lieu de tapisserie leurs Chambres, & leurs
Oratoires des Plaques de ce riche Metal. A quoy i'adiouste; qu'il s'y
treuve vne incroyable quantité de brebis, & de moutons, semblables
pardenant à des Chameaux, & qui neantmoins ressembloit encore plus
à des Cerfs.

Voila ce que dit Gomare, qui adiouste vn peu apres ce qui
suit. Fernand Picarre reuint à Cozco, où il s'aboucha avecque Fran-
çois Picarre, quoy qu'ils se fussent desia veus deuant qu'Almagre fut
arresté prisonnier. Ils s'entretinrent plusieurs iours des choses passées,
& de celles qui regardoient le Gouvernement. Surquoy ils conclurent,
que Fernand s'en iroit en Espagne, pour y rendre conte de tous les deux à
l'Empereur, ensemble du procès a' Almagre, & de La Recepte des
Quints, & des autres Droicts Royaux. Plusieurs Amis de Picar-
re, qui scauoient le vray trein des affaires, luy conseillerent de ne
partir point, disant qu'ils ne preuoient rien de bon du iugement
que l'Empereur pourroit faire de la Mort d'Almagre, sur tout du-
rant la residence de Diego a' Aluaredo en cette Cour-là, où il se de-
noit porter pour Accusateur contre luy: D'où ils concluoient que ces
affaires-là se traitteroient beaucoup plus seurement, dans le Pera
qu'en Espagne. Mais Fernand Picarre, bien loing de se laisser per-
suader, mettoit en auant que l'Empereur luy feroit de grandes gra-
tifications, pour auoir pacifié le Pais, & puny par Justice ceux qui
en troubloient la tranquillité. Sur ceste esperance, il se mit en chemin,
priant son Frere sur toutes choses, de ne se fier à pas vn Almagri-
ste, principalement à ceux qui auoient esté avec luy à Chily, qu'il
auoit tousiours trouuez inestrançables dans l'Amitié du Dessus: Et
partant, qu'il ne souffrit en aucune sorte leurs approches, de peur qu'ils
ne l'estassent du Monde, estant bien certain qu'il y en auoit cinq tous
d'une Ligue, qui auoient conspiré sa mort. Fernand partit là-dessus,
& fut receu d'abord en Espagne avec applaudissement, pour les grandes
Richesses qu'il y auoit apportées; Mais ce bon-heur ne luy dura pas
long-temps, pource qu'un peu apres on l'arresta dans Valladolid, pour
le mener à la Mort de Medina del Campo, d'où il n'est pas encore sorti.
Gomare finit ainsi ce Chapitre, pour vne plus ample intelligen-
ce, duquel, il faut scauoir, Qu'encore que Gonzale de Mesa

eut seruy à Hernand Piçarre de Capitaine d'Artillerie, il ne laissa pas, comme plusieurs autres, d'estre fort mal satisfait de luy, & pour n'en auoir receu aucune gratification, & pource qu'il l'auoit enuoyé à la Conqueste de nouuelles Terres, sous la Banniere de Pierre de Candie, au lieu qu'il pretendoit luy-mesme le premier commandement en cette Expedition. Se voyant donc sans honneur, & sans profit, il fit de mauuais contes d'Hernand Piçarre, iusques à dire; *Qu'il enleuerois en dépit de luy, Dom Diego d'Almagre, quand on le menerois Prisonnier dans la Ville des Rois*: d'où il sensuiuit que tout à descouuert, & sans cōsiderer en quel danger il se mettoit de sa vie; il assembla ses Amis, qu'il sollicita de se faire du Party d'Almagre, comme en effet, il y en eut plusieurs qui s'y ietterent. Ce qui obligea Hernand Piçarre de s'en aller en diligence au Collao, où estoit alors Gonçale de Mesa, avec Pierre de Candie; car tous deux s'en estant premierement allez en la Contrée de *Mussus*, ils trouuerent ce País, qui est à l'Orient de Collao, enuironné de hautes Montagnes, & de Riuieres impetueuses, comme nous auons dit au long en la Vie du Roy *Inca Youpanqui*; Ce qui fut cause que ces Espagnols n'en ayant pû faire la Conqueste, rebrousserent au Collao; où Hernand Piçarre les ayant trouuez, fir trancher la teste à Gonçale de Mesa, & mit hors de Charge Pierre de Candie, dont il donna la Compagnie à vn Cavalier, qu'on appelloit *Peransurez du Champ-rond*, qui auoit esté des premiers, & des plus vaillans, à l'entrée de ses Compagnons dans les País de Conqueste, & dont les travaux, quelques grands qu'ils fussent, ne luy seruirent de rien, tant le país se trouua mauuais, & presque inaccessible. Cependant, Pierre de Candie s'offensa fort de ce qu'on luy auoit osté ses gens pour les donner à vn autre; si bien que dissimulant ce desplaisir secret, il passa depuis dans le party des Almagres, où il fit vne mauuaise fin, comme il sera monstré cy-apres.

Durant tout cecy, de quelque façon que Pierre de Candie se déguisast, & qu'il tint caché le dépit de son Ame, Hernand Piçarre ne laissa pas de le descouurir: Aussi à vray dire, la langue del homme a beau se taire, quand le cœur est fasché; le visage supplée au silence, & fait paroistre au dehors ce qu'il y a de plus secret au dedans. D'où il aduint que Piçarre voyant que tant plus il pensoit mespriser ses Ennemis, tant plus le nombre s'en

augmentoit; resolut pour la dernière fois de tuer Dom Diego d'Almagre, comme il fit, après estre de retour à Cozco du Voyage de Collao; à quoy le poussa particulièrement cette considération; Qu'après qu'il auroit vne fois osté la cause de ces dissensions, & de ces Reuoltes, l'effét en cesseroit aussi-tost, & tout le Monde viuroit en paix, quoy qu'il arriuât tout le contraire. Car après la Mort déplorable de Dom Diego d'Almagre, Hernand Piçarte deuint si odieux à tous, que pour se garentir de cette haine, il trouua plus à propos, & de plus grande seurérè pour luy, de s'en aller plaider en Espagne (bien que Diego d'Aluaredo s'y fut déclaré Partie contre luy) que de ne bouger du Peru; où par toute sorte d'apparences, il voyoit que les gens d'Almagre le mettroient à mort: Tellement qu'après auoir bien considéré qu'en donnant des preuues des seruices par luy rendus à sa Majesté en la Conqueste de cét Empire, des diligences apportées à le pacifier, & des traualx incroyables qu'il auoit employez au siege de Cozco; adjoustant à cela les grandes Richesses qu'il apportoit à sa Majesté; il creut qu'il feroit tousiours mieux d'agir par cette voye-là, que d'attendre que ses Ennemis luy vinsent couper la gorge chez luy: & voylà pourquoy, sans s'arrestet au sentiment de ses Amis, il n'en trouua point de meilleur pour luy, que de prendre, comme il fit la route d'Espagne. D'où il aduint que ses Ennemis le voyant hors du Royaume, & qu'ils ne pouuoient par consequent en prendre vengeance, passerent de la haine qu'ils luy portoient à celle du Marquis son Frere, si bien qu'ils n'eurent iamais de repos iusqu'à cé qu'ils l'eurent mis à mort, comme vous l'apprendrez par la suite de cette Histoire.

Hernand Piçarte estant arriué en Espagne, fut accusé de plusieurs crimes par Diego d'Aluaredo, qui demanda qu'on luy fit Iustice, en l'une des deux Chambres qu'il plairoit d'ordonner à sa Majesté, à sçauoir en la Civile, ou en la Militaire. Surquoy il conclut; Qu'il le défoit en vn Combat singulier, où les Armes à la main, il luy prouueroit; *Que c'estoit vn Traistre, qui auoit meschamment violé sa Foy, & qu'il se pouuoit luy-mesme dire coupable des choses qu'il auoit imputées à Dom Diego d'Almagre.* l'obmets, pour n'estre ennuyeux, plusieurs autres accusations qu'il mit en auant; pour lesquelles Hernand Piçarte fut arresté prisonnier à la Motte de Medina del Campo. Dom Diego d'Aluaredo n'en demeura pas là; Mais continuant son Procez, il mit en
auant,

auant, que pour faire trouuer sa cause meilleure, sa Partie auoit fait plusieurs riches presens d'or, d'argent, & de pierrierie; de quoy il donna de si bonnes enseignes, qu'il y eust des personnes de condition qui en furent mises en vn estrange desordre; Ce que ie suis bien aise de dire confusément, pource que cette maniere est odieuse d'elle-mesme, & que Diego d'Aluarado venant à mourir vn peu apres, dans la plus forte instance de sa demande; sa mort vn peu trop soudaine, fut cause, au rapport de Gomare, que plusieurs se persuaderent qu'il auoit esté empoisonné. Neantmoins, ses plaintes se trouuerent si iustes, & si bien fondées, que plusieurs Sentences tres-iudicieuses & tres-equitables s'en ensuiuirent depuis. Mais enfin, l'on y apporta de la moderation; & l'an mille cinq cens soixante-deux, on fit sortir de prison Hernand Pigarre, apres y auoir esté vingt & trois ans, avec vne incroyable force d'esprit & de courage, dans toutes les trauerses que luy donna la Fortune, soit par la mort de ses Freres, & de ses Neveux, soit par l'allienation de ses Departemens d'Indiens, & par les grandes despences qu'il luy falut faire à plaider, & à s'entretenir durant sa longue prison. Ce fut là tout ce que le monde luy donna, pour recompense de tant d'exploits signalez, & de tant de soins infatigables, qu'il auoit pris d'assister son Frere en la Conqueste de cét Empire-là, faisant, comme il fit tousiours, la charge de General; Et c'est où nous mettrons fin à ce second Liure, rendant tres-humbles graces à Dieu de nous auoir fait arriuer iusques icy.

FIN DV SECOND LIVRE.

Rr *



HISTOIRE

DES

GVERRES CIVILES

DES ESPAGNOLS,

DANS LES INDES.

LIVRE TROISIÈSME.

SOMMAIRE.

CE LIVRE CONTIENT LA CONQVESTE
*des Charcas; Celle que Gonçale Piçarre entreprit de
 faire de la Canele; La peine qu'il eut en ce Voyage; La
 perfidie de François d'Orellana; Vne Conspiration contre le
 Marquis Dom François Piçarre, & sa Mort
 tragique; La résolution de Dom Diego d'Almagre, pour
 se faire proclamer Roy du Peru; Les diuers contrastes
 qui s'y rencontrerent; L'arriuée du Licencié Vaca de
 Castro; Le choix qu'il fit de plusieurs Capitaines pour
 la Guerre; Le Retour de Gonçale Piçarre à Quitu;
 La cruelle Bataille des Chupas; La mort de Dom Diego
 d'Almagre; Les nouvelles Loix qui se firent à la*

Cour d'Espagne, pour le Gouvernement des deux Empires de Mexique, & du Peru; avec les heureux succcez du premier, causez par le bon iugement, & par la prudence de celui qui en fit la visite.

DE LA CONQVESTE DES CHARCAS,
 & de quelques Combats qui s'y passerent entre
 les Indiens, & les Espagnols.

CHAPITRE I.

DE vaillant Marquis Dom François Pigarre se trouua chargé de tout le faix de la Conqueste, & du Gouvernement du Peru, tant par la mort de Dom Diego d'Almagre, que par l'absence de Hernand Pigarre. Ayant donc à soutenir vn si pesant fardeau, pour lequel il auoit assez de force & d'adresse, Dieu l'en ayant abondamment pourueu, si les mauuais Conseillers ne l'eussent troublé dans ses desseins; La premiere chose qu'il fit, ce fut de pacifier le Païs, enuoyant diuers Capitaines aux Conquestes, dont il a esté parlé au Liure precedent; Et entre autres son Frere Gonçale Pigarre à celle du Collao & des Charcas, qui deuers le Midy sont à douze lieuës de la Ville de Cozco.

Il luy donna pour l'accompagner, la plus-part des Caualliers que l'on auoit enuoyez avec Pedro d'Aluarado, pour descouurir & gagner de nouuelles Terres: Car celles qu'on auoit gagnées iusques alors, à qui les Villes de Cozco, & des Rois, seruent maintenant de bornes; Ensemble toutes les Vallées de la coste de la Mer, iusques à Tumpiz; furent d'abord partagées aux premiers Conquerans, qui se trouuerent à la prise d'Atahualpa, Si bien qu'il falloit conquerir plus de païs, pour en mettre en possession les seconds, qui auoient suiuy Dom Diego d'Almagre, & Dom Pedro d'Aluarado, en la descouuerte de ces nouueaux Royaumes.

Gonçale Pigarre entra dans le païs de Collao, avec vn bon nombre d'hommes de Guerre, fort courageux, & fort lestes:

Les Indiens leur firent d'abord peu de resistance : mais quand ils les virent sur la Frontiere des Charcas, & loing de Cozco de cent cinquante lieues, ils les traiterent fort mal ; & en soustinent les efforts avec beaucoup de courage. Ils les attaquèrent mesme à diuerses fois ; D'où il aduint, que dans le Combat demeurerent morts de part & d'autre plusieurs vaillants hommes. Les Indiens y tuerent encore quantité de Cheuaux ; & le firent avec dessein, pource qu'en cela principalement, ils meritoient toute l'esperance de la Victoire. Car s'imaginant d'auoir vn grand aduantage sur les gens de pied, il leur sembloit qu'il leur seroit facile de venir à bout des Caualliers, apres en auoir eue les Cheuaux : Cela n'arriua pas icy neantmoins, pource qu'en vne Bataille qui se donna, où les vns & les autres firent vaillamment ; les Indiens ayant perdu quantité de gens, furent contrains à la fin de ceder la Victoire aux Espagnols. Eux cependant, pour la pousser plus auant, se diuiserent par troupes : Et ce fut alors que trois Chefs des plus considerables, resolurent de s'aller ioindre à Gonçale Pizarre pour Compagnons d'Armes.

Le premier fut Garcillasso de la Vega ; Le second, Iean de Figueroa ; & le troisieme Gaspar Iara, qui auoient tous vn departement d'Indiens, dans la Ville communément nommée de *la Plata*, & en langue Indienne *Chuquisaca*, qu'ils eurent meilleur depuis à Cozco, qui fut le premier lieu où ie les cognûs.

Ces Caualliers s'en alloient tous quatre par vne plaine, sachant le mieux qu'ils pouuoient de soulager leur Cheuaux, encore tous fatiguez de la dernière Bataille, du champ de laquelle ils se trouuoient assez esloignez ; quand ils apperceurent au bas d'vn Vallon sept Gentil-hommes Indiens, tous aiustez à leur mode, enjolieuiez de plumes de diuerses couleurs, & armez d'Arcs, & de Flesches, avec apparence qu'ils alloient ioindre les leurs dans la Place d'Armes. Ils ne virent pas plustost les Espagnols, qu'ils se rengèrent en aïsle, chacun s'esloignant de son compagnon d'environ dix ou douze pas : Ce qu'ils firent iudicieusement, afin de diuiser leurs Ennemis, & les reduire à combattre separément. Ils se tingent prests à l'heure mesme, avec resolution d'en venir aux mains : Et bien que les Espagnols leur fissent signe de loing, pour leur donner à cognoistre qu'ils ne deuoient rien craindre, puis que leur dessein estoit de les auoir pour Amis, & non pas de les combattre ; Les Indiens n'y voulurent iamais

entendre; si bien que les vns & les autres commencèrent à se charger, avec beaucoup de courage, & d'une façon extraordinaire.

Les Espagnols (comme ils aduoient depuis) estoient tous honteux, & tous confus, de se voir quatre Cavaliers bien montez, armez à l'aduantage, & la Lance à la main, contre sept Indiens à pied, presque tous nus, & sans auoir esgalement de quoy se deffendre; Eux neantmoins ne laisserent pas de les receuoir d'un aussi grand courage, que s'ils eussent eu des Armes à l'espreeue; les vns soustenant les autres dans le Combat, avec vne adresse merueilleuse. Car celuy d'entr'eux qui se trouuoit libre des attaques de son Ennemy, secondoit l'autre qui en estoit aux mains avec luy, donnant de flanc & de queue, si adroitement, & avec tant d'ardeur, que l'Espagnol se trouuoit bien empesché de quelque costé qu'il se tournast, pour le bon ordre que gardoient les Indiens, dont il y en auoit presque toujours deux sur vn Espagnol. Mais enfin apres que le Combat eut duré vn assez long-temps, la Victoire demeura aux Espagnols; chacun desquels mit à mort vn Indien. Il y en eut vn pourtant, qui se vengea deuant que mourir: Car se voyant pourfuiuy par son Ennemy, & trouuant fortuitement vn gros caillou, il le rua contre luy d'une si grande roideur, qu'il en demeura tout estourdy, avec apparence qu'il en fut mort, si son habillement de tescne l'eut preserué; ce qui fit, que l'Espagnol mal traité, se ietta sur luy, & acheua de le tuer.

Les trois autres Indiens se sauuerent, ayant pris la fuitte, & les Espagnols en furent bien aises, apres le hazard où ils estoient veus au premier & second choc; Ce qui fut cause qu'ils desdaignerent de les poursuiure, estimant indigne d'eux vne Victoire de quatre Cavaliers qu'ils estoient, contre trois hommes de pied.

Après s'estre demeslez de cette rencontre, & joints tous ensemble, trois d'entr'eux se trouuerent blesez de deux ou trois playes, qui n'estoient pas grandes; mais le Cheual du quatriesme en receut vne si dangereuse, d'une Fleche qui luy fut tirée; que de plusieurs iours il n'en pût estre guery. A raison dequoy, le maistre du Cheual parlant de cette aduenrute; *Je suis plus à plaindre*, dit-il, *que pas vn de ceux qui ont esté blesez, & voudrois tres-volontiers auoir receu sur mon corps, le mal qu'on a fait à mon Che-*

mal, pour le grand besoin que j'en ay eu depuis, pour ne m'en pouuoir seruir; ce que ie me souuiens d'auoir ouy dire moy-mesme, lors que i'estois encor en bas âge.

Mais ce n'est pas chose dont il faille s'estonner, puis que l'ordinaire de tous les Espagnols, qui auoient eu quelque part à la Conqueste du nouveau Monde, estoit de se fâcher moins de leurs propres blesseures, que de celles de leurs Cheuaux; & voilà pourquoy ce Cavalier auoit quelque raison de se plaindre. En suite de cette aduenture, ils retournerent ioindre l'Armée, où ils raconterent à leurs Compagnons, Que leur Combat avec sept Indiens seulement, auoit esté plus dangereux & plus opiniastré, que celuy qu'ils auoient eu n'aguere, contre six ou sept mille d'entr'eux. En cette mesme iournée, se donnerent plusieurs autres escarmouches, & petits combats, en l'un desquels arriua ce que nous auons raconté au dernier Chapitre du premier Liure de cette seconde Partie, parlant de l'extreme fidelité que les Indiens gardoient à leurs Maistres, apres s'estre donnez à eux en quelque Bataille. Ils s'en alloient ainsi cheminant, & renouelloient les escarmouches de trois en trois iours, iusques à ce qu'ils arriuerent à *Chuquisaca*, lieu peuplé de gens extrêmement aguerris. Là, ils furent rudement chargez par vn nombre incroyable d'Indiens, qui les fatiguerent d'une estrange sorte, à force de les assaillir, & de les combattre. Ils en blesserent mesme plusieurs, & en tuerent quantité d'autres, comme le rapportent succinctement les Historiens qui en ont escrit; & entr'autres, Gomare, & Carate. Ces deux Auteurs demeurent d'accord, que Gonzale Pizarre s'en alla iusques à la Prouince des Charcas, & que sur cette Frontiere, il se vid enuélépé de quantité d'Indiens, tous soldats aguerris; qui l'ayant attaqué, le reduisirent en de si grandes extremitez, qu'il fut contraint d'implorer le secours du Marquis son Frere, qui ne manqua point tout aussi-tost de luy enuoyer vn assez bon nombre de Caualerie; Et afin de la faire hastier, il fit semblant qu'il s'y en alloit en personne, & sortit à trois iournées de la Ville.

Les Espagnols ainsi assiegez par leurs Ennemis, furent en si grande peine, que tous apprehendant de perir, ils en aduertirent le Marquis, par le moyen des Indiens leurs Domestiques, qui leur seruoient ordinairement comme de Courriers, & de Messagers, en de semblables perils. Ce qui fit qu'ils en depes-

Ch. 143.

Li. 3.

Ch. 12.

cherent plusieurs en diuers endroits, afin que si les Ennemis en tuoient les vns, les autres se püssent eschapper.

Pour remedier à vne si pressante necessité de Gonçale Pigarre, & de ses Soldats, le Marquis luy enuoya, comme i'ay dit, des gens de secours, sous la conduite d'un bon Capitaine, & fit sembler (ainsi que le remarque Augustin de Carate) de vouloir luy mesme estre de la partie, afin d'obliger à vne plus grande diligence les hommes qu'il enuoyoit : Mais tous ses soins, ny toutes ses ruses n'eussent nullement esté capables d'empescher en cette occasion que les Espagnols ne mourüssent de la main de leurs Ennemis, si Dieu n'eut combattu pour eux : Car auant que le secours qu'ils attendoient fut venu, ils se virent si pressez par les Indiens, qu'ils furent sur le point de se rendre, & l'auroient fait sans doute, si par vn Miracle euidant, le grand Saint Jacques, Patron d'Espagne, ne les eut visiblement assiste, en combattant pour leur deffenso, comme il auoit desia fait au Siege de Cozco.

Ce fauorable renfort, venu si à point aux Chrestiens, en vn si grand besoin, leur fit reprendre courage, avec tant de bon succez, qu'ils se trouuerent victorieux à l'arriuée des gens de secours : D'où il s'ensuiuit, que pour memoire de cette gräte que Dieu leur auoit faite, ils resolurent de fonder en ce lieu là vne Ville, qui est aujourd'huy peuplée de Chrestiens, ayant vne Eglise Cathedrale, & vne Chancellerie : A quoy i'adjouste, qu'à dixhui< lieux de là, sont les Mines de Potosy, si fameuses par tout le Monde, pour la grande quantité d'or & d'argent qu'on en tire. Le Pere Blas-Valera, desduisant sommairement les memorables Combats, qui dans les Royaumes du Peru se passerent entre les Indiens, & les Espagnols, fait vne Description tres-particuliere de celuy qui fut donné en cette Prouince, en laquelle il dit, que Dieu combattit visiblement pour son Euan-gile.

LE MARQUIS PARTAGE AUX SIENS
*les Terres de la Pronince des Charcas, & Gonçale
 Pigarre s'en va à la Conqueste de la Canelle.*

CHAPITRE II.

APRÈS que cette Guerre fut terminée, & les Indiens pacifiés, le Marquis fit partage d'eux & de leurs terres, aux principaux Espagnols qui se trouuerent en cette Conqueste. Son Frere Hernand Pigarre fut des mieux pourueus, & apres luy, Gonçale Pigarre, dans la Jurisdiction duquel se descourirent depuis à Potosy, les Mines d'argent. Comme donc Hernand Pigarre estoit Seigneur de ce lieu là, quoy qu'il fut alors en Espagne, on ne laissa pas de mettre en possession pour luy d'une de ces Mines vn de ses Officiers, pour luy en faire tenir l'argent: Ce qui réussit si aduantageusement pour luy, qu'on tient qu'en huit mois l'on tira de terre vne prodigieuse quantité de ce metal, extrêmement fin, & à toute espreuue, sans qu'il fut besoin d'y apporter autre artifice que de le fondre; Ce que i'ay bien voulu rapporter icy, pour auoir oublié d'en faire mention en son lieu, dans la premiere Partie de ces Commentaires.

A Garcillasso de la Vega mon Pere, escheut en partage le lieu qu'on appelle *Tapacry*, & Gabriel de Royas en eut vn autre fort bon; comme eurent aussi plusieurs autres Cavaliers, dans vne estendue de plus de cent lieues de pais, qui releuoit de la Ville principale, à quoy ils donnerent depuis vne part à celle qu'ils nommerent de *la Pax*, ou *Ville de Paix*.

Ces Terres ainsi partagées, ne furent pas au commencement de grand rapport, quoy qu'elles fussent assez fertiles, & peuplées de quantité d'Indiens: Mais depuis qu'on eut descouuert les Mines de Potosy, les tentes se monterent à dix pour vn; de sorte que ce qu'on affermoit quatre mille liures d'or, ou d'argent, fut affermé depuis iusques à trente & à quarante mille.

Le Marquis Dom François Pigarre ayant fait ietter les fondemens de la Ville, qu'on nomme vulgairement de *la Plata* (comme qui diroit *Ville d'argent*) partagea par mesme moyen,

entre

entre les Conquerans de ce Pais là, les terres des Indiens, qui deuiurent ainsi Vassaux de ces nouueaux Seigneurs; ce qui aduint aux années 1538. & 39. En suite dequoy, comme il se fut reposé deux ans des longs trauaux que luy auoient causé les Guerres Ciuiles, & les Conquestes passées, il resolut d'en faire d'autres nouuelles, bien plus ennuyeuses, & plus penibles, comme il sera dit cy-apres. Car sa bonne Fortune ayant voulu que par la mort de Dom Diego d'Almagre, estant resté seul Gouverneur d'un Pais, qui à le prendre Nord-Sud, depuis les Charcas iusques à Quito, auoit d'estenduë plus de sept cens lieues, bien qu'il y pût auoir de l'exercice de reste à pacifier les Peuples, & remedier aux desordres de ses Capitaines, dans le Pais de Conqueste, y entretenant par ce moyen la Iustice, & la bonne intelligence; Neantmoins, comme l'appetit de commander, & de se rendre Maistre par tout, est insatiable en la plus-part des Grands; celuy-cy tourna ses pensées à des Conquestes nouuelles, au lieu de se contenter de ce qu'il auoit, comme si son Courage aguerry n'eut pas esté satisfait, si à tant de bons succez il n'en eut adjousté d'autres, en portant ses Armes plus auant en des Terres inconnues.

Ayant donc appris, que hors des Frontieres de Quito, & de l'Empire des Yncas, il y auoit vn Pais extrêmement vaste, & qui produisoit de la Canele en grand'abondance, à cause dequoy il portoit le nom de cette sorte d'espicerie; il s'aduisa de faire vn effort pour le conquerir, & d'y enuoyer pour cette fin Gonzale Pizarre, afin qu'ils fussent aussi grands Seigneurs l'un que l'autre. Mais auant que de passer outre, par l'aduis de ses plus secrets Conseillers il se desmit du Gouvernement de Quito, pour le donner à son Frere: Ce qu'il fit exprés, afin que ceux de cette Ville, l'accommodassent des choses dont il auroit besoin. Car c'estoit par là qu'il luy falloit entrer necessairement dans la Canele, pour estre seituée au Leuant de Quito. Comme il l'eut donc ainsi resolu, il manda Gonzale Pizarre, qui estoit alors en la Prouince des Charcas, où il s'occupoit à faire peupler la Ville de la Plata, & à s'establir dans le Despartement d'Indiens qui luy estoit escheu. A cette nouuelle de son Frere, il ne manqua point de l'aller trouuer incontinent à Cozco; & n'eut pas plustost appris son intention, touchant la Conqueste de la Canelle, qu'apres l'auoir tres-volontiers acceptée, il se pre-

para pour l'aller faire, tesmoignant par là, ce que valoit son courage en de semblables Emplois.

Il leua dans Cozco plus de deux cens Hommes, dont il y auoit cent Cavaliers, & tout le reste consistoit en Infanterie, à quoy il employa plus de soixante mille Ducats. S'estant mis en chemin avecque ses troupes, il fit enuiron 500. lieuës, auant qu'arriuer à *Quitu*, où Pedro de Puellas commandoit en qualité de Gouverneur. En ce Voyage, il combattit les Indiens mutinez: Et quoy que d'abord les Escarmouches en fussent legeres; si est-ce qu'en fin, ayant à faire à ceux de *Huanachu*, il s'en trouua si mal, qu'il fut reduit à demander secours au Marquis son Frere, qui luy enuoya François de Chaues, comme le remarque

Liv. 4.
Ch. 1.

Augustin de Carate. *Gonzale Pigarre* desliuré de ce danger, & de plusieurs autres, qui ne furent pas si grands, se rendit à la Ville de *Quitu*, dont Pedro de Puellas luy cedale Gouvernement, dès qu'il eut veu les Lettres de prouision du Marquis son Frere. Comme il en eût donc pris possession, il mit ordre aux choses necessaites à son Voyage, & fit de nouuelles leuées de gens de Guerre; tellement que tous ensemble estoient enuiron 340. soldats, dont il y auoit 150. Cavaliers, & les autres estoient tous Hommes de pied.

Il leua de plus iusques à 4000. Indiens Volontaires, tous pourueus d'armes, de prouisions, & d'autres choses qu'il leur faisoit auoir, comme de coignées, hachettes, ou couperets, cables, ou cordages de chanvre, & ferremens diuers, pour s'en seruir au besoin. A quoy i'adjouste, qu'ils emmenerent de plus, vne grande quantité de Bestail, comme pourceaux, brebis &

* Tout ce trou-
peau es-
toit d'en-
uiron
4000.
bestes.

* des plus grands qui fussent dans le País, qui leur serui-
rent aussi à porter vne partie du Bagage, & des Munitions.

En suite de tout cecy, le nouueau Gouverneur laissa dans *Quitu* Pedro de Puellas; Et apres qu'il eut mis ordre à certaines choses, qui auoient besoin d'estre reformées, il sortit de *Quitu*, l'an 1539. Les Indiens le traiterent le mieux qu'ils pû-
rent, & le laisserent aller en bonne paix, ce qui luy dura tout le long du chemin, iusques à ce qu'il fut hors de l'Empire des *Yncas*; Au sortir duquel, il entra dans vne Prouince, que les Historiens appellent *Quiscos*. Or d'autant que François Lopez de Gomare, & Augustin de Carate, racontant tous deux ce qui se

passa dans ce voyage de la Canelle, le desduisent presque en mesmes termes, & que ie me souuiens d'en auoir oüy faire le recit à plusieurs de ceux qui auoient suiuy Gonzale Pigarre en la descouuerte de ce pais-là; Je rapporteray icy sommairement ce que i'ay appris des vns & des autres.

Il est tres-certain, qu'aussi-tost que Gonzale Pigarre eut mis le pied dans la Prouince de Quixos, qui est au Nord de Quiru, il apperceut quantité d'Indiens, tous gens de Guerre, qui accoururent pour le charger. Mais comme ils virent que le nombre des Espagnols n'estoit pas petit, & que la plus-part estoient montez sur des Cheuaux, ils se retirerent plus auant dans le pais, sans qu'ils parussent depuis. Peu de iours apres aduint en ce mesme lieu vn si estrange tremblement de terre, que plusieurs maisons de la Ville, où estoient alors les Espagnols, en furent abattuës. Cette violence fut d'autant plus grande, que la Terre s'ouurit par diuers endroits, avec des Esclairs, des Esclats de Foudre, & des Tonnerres si furieux, que ces nouueaux Conquerans en estoient tous effrayez; Comme encore de voir qu'il tomboit vne si grosse rauine de pluye, qu'il sembloit qu'on la versât à plains sceaux; ce qui leur sembla nouueau tout à fait, pour n'auoir rien veu de semblable dans le Peru. Ce mauuais temps dura 40. ou 50. iours; apres lesquels ils se resolurent de passer la Montagne, en tout temps couuerte de neige, & non moins effroyable, pour ses estranges precipices, que pour sa hauteur presque inaccessible: Ils se hazarderent neantmoins, & s'en trouuerent fort mal: car il y tomba tant de neige, & le froid y fut si grand, que la plus-part des Indiens, qui vont ordinairement vestus à la legere, en furent gelez. Ce qui fut cause que les Espagnols, pour se tirer plus promptement d'un si mauuais pais, & des incommoditez d'un si rigoureux temps, abandonnerent tout leur Bestail, & leurs prouisions de bouche; s'imaginant d'en recouurer d'autres dans la premiere Bourgade d'Indiens qu'ils trouueroient; mais tout le contraire leur aduint; Et comme ils eurent passé la Montagne, ils ne sceurent où prendre des viures, pour auoir trouué tout le pais despourueu d'habitans, à cause de la sterilité du terroir. Ils se hasterent donc d'en sortir, & arriuerent en la Prouince de *Summaco*, qui est encore le nom de la principale Ville, scituée au bas d'une Coste, où s'ils trouuerent de quoy viure, ce ne fut pas sans peine, & sans beau-

coup d'incommodité: Car durant deux mois qu'ils y furent, il ne se passa point de iour sans pluye: D'où il aduint que leurs habits se pourrissent tous sur eux, outre le dommage qu'ils en receurent en leurs personnes.

En cette mesme Prouince de Summaco, qui est sous l'Equinoctial, ou fort près, croissent les Arbres qui produisent la Cannelle, qu'ils s'en alloient chercher. Ils sont fort hauts, ayant leurs feuilles telles à peu près que le Laurier, & leur fruit semblable à de menuës grappes de raisins, en forme de glands; or bien que les feuilles, l'écorce, & les racines de ce mesme Arbre, soient Cannelle en effet; si est-ce que la meilleure, & la plus parfaite est celle du fruit: Il y en a quantité sur les Montagnes desertes; mais elle n'est iamais si bonne que celle des Arbres, que les Indiens plantent, & cultiuent dans leurs terres, pour en faire commerce & traficq avec leurs Voisins. Ce n'est pas toutesfois avec les Perruuiens qu'ils font ce traficq, sçachant bien que de ce costé-là, ils ne gagneroient rien avec eux; à cause qu'ils n'ont, & ne veulent auoir pour toutes espiceries, que leur *Vehn*, que les Espagnols appellent *Axi*, dans le Peru, & en Espagne, *Pimiento*, ou Poivre.

DES TRAVAUX INCROYABLES QUE
Gonzale Pizarre, & ses gens souffrirent; Ensemble
d'un Pont de bois, & d'un Brigantin qu'ils
firent, pour passer une grande Riuere.

CHAPITRE III.

Les Espagnols arriuez à Summaco, trouuerent que les habitans de cette Prouince, & les autres Indiens leurs voisins, alloient ordinairement tous nus, hormis que les Femmes portoient pardeuant vne maniere de chiffon, pour en estre plus honnestement. Ils vont ainsi nus, à cause qu'il y fait grand chaud; & que d'ailleurs il y pleut si fort, que s'ils s'habilloient, la pluye feroit pourrir leurs habits sur leurs dos: Ce qui faisoit dire aux Espagnols, qu'avecque granderaison, les Indiens desdaignoient les habits, puis qu'ils ne pouuoient en porter au-

cuns, & qu'ils n'en auoient pas besoin aussi.

Gonçale Piçarre laissa la plus-part de ses gens à Summaco, prenant avec luy les plus dispos, & les plus capables de la fatigue : Avec ceux-cy, il s'en alla voir s'il ne pourroit point trouuer quelque nouueau chemin, pour passer outre, & se rendre son voyage moins difficile. Car dans vne estenduë d'environ cent lieues de país, qu'il auoit trauersé depuis son parterment de Quitu, il n'auoit trouué que des Montagnes sans aduenues, & mesme sans aucuns sentiers; si bien qu'en diuers endroits luy & les siens, estoient contrains à trauers les brossailles, de se faire vn chemin à force de bras, & à coups de haches. A cette incommodité en estoit iointe vne autre bien grande : Car les Indiens leurs Guides, les faisoient esgarer à tout coup; Et pour les empêcher d'entrer, ou dans leur país, ou dans celuy de leurs Alliez, ou de leurs Amis, les menotent tout autrement qu'il ne faisoit. Ce qui estoit cause qu'ils se trouuoient souvent dans des lieux deserts, & inhabitables, où les incommoditez de la faim, les contraignoient de se nourrir d'herbes, de racines, & de fruits sauages; encore s'estimoient-ils bien heureux, quand ils en pouuoient auoir.

Parmy ces trauaux, & ces miseres, qui se peuuent mieux imaginer que descrire, ils arriuerent en vne Prouince appelée *Cuca*, vn peu mieux peuplée que les precedentes, & où ils trouuerent des prouisions. Le Seigneur du País les accueillit fauorablement, les traitta le mieux qu'il pût, & leur donna de quoy manger; dont ils auoient besoin plus que de toute autre chose. Dans cette mesme Prouince passe vn grand Fleuve, que l'on die estre le principal de tous ceux qui se vont rendre ensemble dans la grande Riuiere d'*Orellana*, appelée par quelques-vns *Marañon*.

Gonçale s'arresta là enuiron deux mois, en y attendant les Espagnols qu'il auoit laissez à Summaco, avec ordre de le suiure à la piste, en cas qu'ils manquassent de Guides : Aussi le firent-ils, & arriuerent enfin où estoient leurs Camarades. Apres les auoir ioints, & s'estre vn peu reposez de la fatigue passée, ils marcherent tous ensemble le long du bord de cette grande Riuiere, où ils firent plus de cent lieues de chemin, sans pouuoir trouuer, ny Guay ny Pont pour la trauerser; le Fleuve ne permettant ny l'vn ny l'autre, tant il estoit rapide.

Aptes vn si long chemin, ils trouuerent enfin que d'un Rocher, qui auoit plus de cent brasses de hauteur, cette mesme Riuiere faisoit vn saut si estrange, & si espouuantable, qu'ils en ouïrent le bruit à plus de six lieues, auant que d'y estre arriuez. Vne merueille si extraordinaire les surprit tous; mais ils furent encore bien plus estonnez, lors qu'arriuez à 40. ou 50. lieues plus bas, ils apperceurent que cette vaste estenduë d'eau ainsi ramassée, s'escouloit par le Canal d'un autre Rocher extrêmement grand.

Ce Canal neantmoins estoit si estroit, que d'un bord à l'autre, il n'y auoit pas plus de vingt pieds. Il estoit taillé dans le Roc, & si merueilleux, que du costé par où les Espagnols passerent depuis, il y auoit autres deux cens brasses de hauteur, comme en l'endroit où la Riuiere faisoit le saut, dont ie viens de parler. Certainement il y a de quoy s'estonner, qu'il y ait en ce pais là des choses si grandes, & qui sont au delà de tout ce qu'on en pourroit dire, comme ces deux passages, & autres semblables, qu'on peut remarquer dans cette Histoire. Gonzale Pigarte, & les Capitaines, ayant iugé qu'il n'y en auoit point de plus facile, * pour gagner l'autre bord de la Riuiere, & en considerer le pais (d'autant que celui qu'ils auoient veu iusques alors estoit du tout sterile, defagreable, & malencontreux) furent d'aduis de faire vn Pont sur le Canal, & de mettre promptement la main à cette besongne. Mais les Indiens de l'autre costé du Fleuve les voulurent trauerser dans leur dessein; Et quoy qu'ils fussent en petit nombre, ils ne laisserent pas d'agir courageusement; de maniere que par leurs efforts, ils contraignirent les Espagnols de les combattre; ce qu'ils n'auoient point encore fait contre aucuns Indiens de cette Contrée; Ayant donc tiré sur eux, ils en tuerent quelques vns à coup d'Arquebuses, & firent fuir les autres, ausquels ce fut vne merueille bien estrange, de voir qu'on leur tuoit ainsi leurs Compagnons, à cent & à deux cens pas de distance: De sorte qu'ils s'en allerent publiant de toutes parts l'extrême valeur de ces nouueaux venus, qu'ils disoient auoir des Escairs, des Tonnerres, & des Foudres en main, pour en tuer ceux qui refusoient de leur obeïr. Ainsi les Espagnols s'estant rendu le passage libre, se mirent à traualier, & à faire vn Pont de bois, où il est à remarquer combien ils eurent de peine à traverser la premiere poultre d'un bord à l'autre: la hauteur des deux

* Cela
s'entend
du Pas-
sage.

Rochers, depuis leur sommet iusques au bas de l'eau, estant si prodigieuse & si effroyable, qu'on ne pouuoit y porter la veüe, à moins que de passer pour temeraire, & de se mettre en vn extrême danger; Ce que n'espreuua que trop à son dommage, vn soldat Espagnol, qui du haut de l'vn des Rochers, ayant voulu regarder ce furieux courant d'eau, qui passoit par le Canal, ne sentit pas plustost que la teste luy tournoit, qu'il se vid precipité dans cét Abisme; A raison dequoy, les autres Espagnols instruits par cette disgrâce de leur Compagnon, se monstrerent plus retenus que luy, & firent si bien, que par leur prudence, ayant vaincu les obstacles qui se rencontrerent dans ce traual, ils ietterent enfin la premiere poultre, & en suite de celle-cy toutes les autres, qui estoient necessaires à venir à bout de ce Pont. Comme ils l'eurent acheué, ils le passerent tous seurement, tant hommes que Cheuaux, & le laisserent en estar pour le repasser en cas de besoin. Cela fait, ils prirent par terre le bas de la Riuiere, & marcherent par des Montagnes si rabouteuses, & si peu battues, qu'ils furent contraints en diuers endroits de se faire vn passage à grands coups de haches.

Après ces trauaux insupportables, ils arriuerent en vn país qu'on appelle *Gnema*, qu'ils trouuerent plus infertile & plus pauvre, que les autres lieux, par où ils auoient passé; Aussi n'estoit-il habité que de fort peu d'Indiens, qui se retiroient dans les Montagnes, à mesure qu'ils voyoient les Espagnols, & ne se presentoient plus deuant eux.

Cependant, il n'est pas à croire combien de maux enduroient les Espagnols dans ces terres steriles & infructueuses, où à faute de meilleurs viures, eux & les Indiens leurs seruiteurs domestiques, se nourrissoient d'herbes, de racines, & de rejets de d'arbres sauuages, eomme si c'eussent esté des bourgeons de vigne: D'où il aduint que pour la fatigue du chemin, & les incommoditez de la pluye, plusieurs d'entr'eux tomberent malades, & en perdirent la vie; Mais pour toutes ces difficultez, & tous ces dangers, ceux qui resterent ne laisserent pas de passer outre; si bien qu'après plusieurs lieues de chemin, ils se renderent en vne Contrée, dont ils trouuerent les Habitans plus ciuilez que les autres. Ils se nourrissoient de pain de Mayz, & s'habilloient de robes de cotton; quoy qu'elles ne leur seruissent pas pourtant de beaucoup contre les incommoditez de la pluye, qui n'estoit

pas moins grande en leur païs qu'en celuy de leurs Voisins. A leur arriuée, ils enuoyerent de toutes parts des hommes exprés, pour voir s'ils ne trouueroient point quelque chemin ouuert; mais estant de retour, ils firent tous vn mesme rapport, qui fut, qu'ils n'auoient veu que Montagnes, que Precipices, que Fondrières, que Lacs, & que Marefcages, qu'on ne pouuoit ny passer à gué, ny trouuer moyen de sortir d'un si mauuais païs, de quelque costé qu'on se tournast. Apres cette Relation, ils trouuerent bon de faire vn Brigantin, pour s'en seruir à gagner l'autre bord de la Riuiera, qui estoit si grande en cét endroit-là, qu'elle auoit plus de deux lieues de largeur. Ils dresserent donc vne maniere de Forge pour les ferremens necessaires, & firent du charbon avec toutes les peines du monde, pource que les pluyes continuelles empeschoient le bois de brusler; à quoy neantmoins ils trouuerent vn assez bon remede, qui fut de faire des toits haut esleuez, & pareillement de grandes huttes, pour s'y mettre à couuert de la pluye, qui ne laissoit pas d'estre grande en ce païs-là, quoy que d'ailleurs il soit extrêmement chaud, pour estre sous la ligne Equinoctiale. Ils firent vne partie de la ferrure de leur Brigantin, du fer qu'ils auoient en masse, qui leur estoit plus precieux que l'or; & l'autre des fers de leurs cheuaux, qu'ils auoient tuez pour la nourriture des malades, & des sains, à faute de meilleurs alimens.

Durant ces choses, Gonçale Pigarre, pour encourager les siens par son exemple, estoit le premier à couper du bois, à forger le fer, & à faire du charbon; s'employant iusques aux choses les plus basses, afin que les autres l'imitassent, sans se pouuoir excuser: Et d'autant qu'ils n'auoient point de gauldron, pour en poiser leur Brigantin, ils firent suppléer à ce défaut la rezine des arbres, qu'ils trouuerent là en grande abondance: Par mesme moyen, à faute d'estoupes, & de chanvre, ils se seruient des mantes les plus vscées, & de leurs vieilles chemises, dont les plus pourrie se estoient les meilleures, tous les donnant à l'enuy, & tres-volontiers, pource qu'ils iugeoient qu'il importoit entièrement à leur commune conseruation, que le Brigantin s'acheuast bien-tost. En effet, apres beaucoup de peine ils l'acheuerent enfin, & le mirent sur l'eau, avec vne incroyable réjouissance; se persuadant que par le moyen de ce Vaisseau, se termineroient tous leurs trauaux; mais à quelques iours de là, ils souhaiterent
de

de ne l'auoir point fait, comme il se verra dans le Discours suivant.

FRANCOIS D'ORELLANA S'ESTANT
embarqué dans le Brigantin, s'en va en Espagne,
où il demande la Conqueste du Pais descou-
uert, & meurt depuis sur la Mer.

CHAPITRE IV.

ILs mirent dans le Brigantin tout ce qu'ils auoient d'or, qui estoit du poids de cent mille liures, ensemble plusieurs Esmeraudes fort riches, avec le fer en masse, la ferrure, & toutes les autres choses qui leur sembloient estre de plus grand prix; Par mesme moyen, ils embarquerent les plus malades d'entr'eux, qui pour leur grande foiblesse ne pouuoient aller par terre, & sortirent ainsi de ce parage, où deuant que d'arriuier, ils firent plus de deux cens lieues de chemin. Ceux du Brigantin se mirent par eau, & leurs Camarades par terre, sans s'esloigner les vns des autres, se ioignans ensemble pour passer la nuit. Dès le poinct du iour ils continuoient leur route, avec vne peine incroyable; Car d'un costé ceux qui alloient par terre, estoient reduits à se faire vn passage à grands coups de haches; & ceux du Brigantin, bien empeschez à resister au courant de l'eau, pour ne quitter leurs compagnons. Souuent aussi, quand ces derniers ne pouuoient s'ouuirir vn chemin, en costoyant la Riuiere, à cause que la Montagne y seruoit d'obstacle, ils passoient d'un bord à l'autre au Brigantin, dans quatre Canôs * qu'ils auoient; Que si quelque chose les affligeoit alors, c'estoit d'estre deux ou trois iours en ce trajet, & de languir de faim cependant. Apres auoir esté plus de deux mois à voyager ainsi dans les miseres que nous auons dites, sans sçauoir où ils alloient; ils prirent enfin, quelques vns du pais, qui partie par signes, partie en leur langue, que les Indiens leurs seruiteurs domestiques entendoient assez bien, leur donnerent à connoistre, qu'à dix iournées de là, ils entreroient dans vn Pais fort peuplé, abondant en viures, riche en or, & qui ne manquoit point de toutes les choses qu'ils s'en al-

Petits
bateaux
tous d'un
ne pie-
ce, &
faits la
pluspart
d'escor-
ce d'ar-
bres, d'où
les In-

diés ont
accou-
sumé
d'yfer.

loient cherchant. En suite dequoy, ils leur firent sçauoir, que cette Contrée dont ils leur parloient, estoit sur le bord d'une autre grande Riuere, qui se ioignoit à celle où ils nauiguoient. Cette nouuelle remit le cœur aux Espagnols, & fit qu'à l'heure mesme, François Pigarre nomma pour Capitaine du Brigantin, François d'Orellana, auquel il donna 50. soldats, avec ordre exprés de le suivre au lieu que les Indiens leur auoient marqué, iusques où il pouuoit y auoir quatre-vingt lieues. La Commission d'Orellana portoit encore, qu'aussi-tost que luy, & ses gens, seroient arriuez en ce mesme endroit, où les deux grandes Riuieres se ioignoient ensemble, ils posassent là tout leur bagage, & qu'apres auoir chargé de prouisions à suffisance le Brigantin, ils s'en reuinssent à mont la Riuere, secourir leurs Compagnons, dans la necessité la plus pressente qu'ils eussent iamais eue: car ils estoient si abbatus de lassitude, & de faim, qu'il ne se passoit point de iour, auquel ils n'en perdissent quelqu'un, bien que neantmoins il mourut beaucoup moins d'Espagnols que d'Indiens: estant veritable, que de 4000. qui s'estoient hazardez à ce voyage, il y en auoit desia plus de 2000. de morts.

François d'Orellana continua sa route, si bien qu'avecque le seul courant de la Riuere, sans employer ny voile, ny rame, il fit les quatre vingts lieues, qui à son aduis, en valloient bien cent: Et dautant qu'en ce partage il ne trouua rien moins que cette grande abondance de toutes choses, dont les Indiens luy auoient fait tant de recit, si bien qu'il luy sembla, que si pour en aller dire des nouuelles à Gonçale Pigarre, il vouloit rebrousser à contre-mont la Riuere, il ne feroit point en vn an le chemin qu'il auoit fait en trois iours, tant l'impetuosité du courant de l'eau estoit grande; & que d'un autre costé s'il l'attendoit là, ce ne pouroit estre qu'inutilement pour les vns & pour les autres; il se resolut de tourner ailleurs ses pensées. Ne pouuant donc pas sçauoir ce que Gonçale Pigarre deuoit employer de temps pour l'aller ioinde, il haussa les voiles; & sans prendre conseil de personne, il alla plus auant, avecque dessein d'abandonner Gonçale Pigarre, & de prendre terre en Espagne, afin d'y demander pour luy-mesme le Gouvernement de ce Pais nouuellement descouuert, & qu'il pretendoit auoir conquis luy seul. Mais quelque peine qu'il prit à tenir cachée sa mauuaise intention, il ne pût si bien faire, qu'elle ne donnast de l'ombrage à plusieurs

de ceux qui le suiuoient : tellement qu'ils ne pûrent s'empescher de luy dire, qu'il ne deuoit point passer les ordres de son General, ny le quitter à cét extrême besoin, sçachant trop bien que ce Brigantin luy estoit si necessaire, qu'il ne pouuoit s'en passer. La mesme chose luy fut plus particulièrement confirmée par vn Religieux qu'on appelloit Frere Gaspar de Caruajal, & par Hernand Sanchez de Vargas, jeune Cavalier, natif de Badajoz, que les Contredisans prirent pour Chef de leur Party; ce qui ne se fit point, sans vne grande apparence que les vns & les autres en seroient venus aux mains, si François d'Orellana ne l'eut empesché par belles paroles: Mais vn peu apres, ayant gaigné à force de promesses ceux qui n'estoient pas pour luy, il traita mal le bon Religieux; Et il est à croire que sans sa profession d'Ecclesiastique, il luy eut fait vn aussi mauuais party qu'à Hernand Sanchez de Vargas: car pour luy faire trainer long-temps sa vie en langueur, il ne le tua point, mais le laissa dans ce Desert effroyable, enuironné d'vn costé de hautes Montagnes, & de l'autre d'vne grande Riuiere: Ce qu'il fit exprés, afin que ne pouuant sortir de ce lieu, ny par Mer, ny par Terre, il fut reduit impitoyablement à mourir de faim. Apres vne action si noire, François d'Orellana continua sa nauigation; & le iour d'apres, pour faire paroistre plus à descouuert sa mauuaise intention, il renonça deuant tous au pouuoir & aux ordres, qu'il auoit eus de Gonzale Pizarre, afin qu'on ne luy pût reprocher d'auoir agy en qualité de subiet; & se fit eslire Capitaine de sa Maiesté, sans dependance d'autre; Ce qui fut sans doute vn procedé qu'on ne sçauoit autrement nommer que Trahison; Et peut-on bien dire qu'en cela l'ont imité laschement plusieurs autres Chefs, aux commandemens qu'ils ont eus dans les Conquestes du nouveau Monde. Dequoy ie pourrois sans doute rapporter icy quelques Exemples; mais il me suffit de vous renvoyer à ce qu'en a escrit le Capitaine Gonzale Hernandez d'Quiedo Valdez, Historiographe de l'Empereur Charles V. Et certainement ce n'est pas sans vne grande raison que cét Auteur dit, Qu'il est rarement aduenu que ceux qui ont commis de semblables perfidies, n'ayent esté payez en mesme monnoye que ceux qui ont succédé à leurs Charges; pour confirmation dequoy il allegue de des fort à propos ce Prouerbe, *S'il s'aduient de tuer; tu seras tué de Indes. mesme; & l'on tuera pareillement ceux qui s'auront tué.* Que s'il fa-

Lib. 17.
Ch. 20.
De son
Histo-
re des
Indes.

loit encherir sur ce que le mesme Autheur a dit là dessus, ie pourtois produire icy quantité d'autres euenemens de Trahison, & de Barbarie, qui se sont passez en de pareilles rencontres; mais l'ayme mieux n'en parler point, pource que telles actions ne sont pas bonnes à dire, & qu'elles sont dignes de la Foudre, & du Tonnerre; ioint que ceux qui les ont faites s'en pourroient mettre en colere.

Dans cette Nauigation, François d'Orellana, voguant vers le bas de la Riuiera, eut diuers combats contre les Indiens du Pais, qui luy tesmoignerent en cette occasion qu'ils ne manquoient pas de cœur; Car en quelques lieux les Femmes seconderent leurs Marys, & se meslerent courageusement avec eux en toute sorte d'attaques. Ce qui donna sujet à Orellana, pour faire mieux esclarer son Voyage, de dire qu'il auoit esté iusques dans la Contrée des Amazones, dont il demanda la Conqueste à sa Majesté. Mais apres qu'il fut entré plus auant dans ces Prouinces, au bas de cette mesme Riuiera, il trouua d'autres Indiens plus appriuoisez que ces derniers; car ils le receurent courtoisement; & bien estonnez de voir dans le Brigantin des hommes qui leur sembloient si estranges, ils firent amitié avec eux, & leur donnerent autant de viures qu'ils en voulurent. Les Espagnols sejournerent là quelque temps, & firent vn autre Brigantin, à cause qu'ils se trouuoient trop pressez dans le premier. Apres ces preparatifs, ils se remirent à la voile, & entrèrent dans la Mer, à 200. lieuës de l'Isle de la Trinité, selon la Carte de Nauigation, ayant souffert les trauaux que nous auons dit, & couru de si grands dangers dans cette effroyable Riuiera, qu'ils se virent souuent sur le point d'y estre miserablement submergez. En cette Isle fameuse, Orellana se pourueut d'vn Nauires, dans lequel il prit la route d'Espagne; où estant arriué, il demanda à sa Majesté le Gouvernement du Pais, qu'il se vanroit d'auoir conquis, & dont il encherissoit la Conqueste, en disant, que c'estoit vne Prouince extrêmement vaste, où il y auoit quantité d'or, & d'argent, outre les piegreries qui s'y trouuoient, qui estoient d'vn prix inestimable. Ce qu'il luy fut bien aisé de faire accroire par les riches eschantillons qu'il monstra de toutes ces choses. D'où il s'ensuiuit que sa Majesté luy accorda sa demande, & voulut qu'il fut Gouverneur de tout le Pais qu'il auroit conquis, ou qu'il pourroit conquerir. Pour hastier donc l'e-

exécution de son entreprise, il leua plus de quinze cens hommes fort lestes, & parmy lesquels il y auoit plusieurs Cavaliers considerables, avec qui il s'embarqua à S. Lucar, mais il eut tant de mauuaise Fortune, qu'il mourut sur la Mer, où les siens furent iettez en diuerses plages; Et voilà quelle fut la fin de cette Nauigation, qui se trouua conforme au mauuais commencement qu'elle auoit eu.

Mais c'est assez parlé de François d'Orellana: Reuenons à Gonzale Pizarre, que nous auons laissé en des extremités à peine croyables. Si tost qu'il eut mis dans le Brigantin le Capitaine Orellana, il fit dix ou douze Canôs, & autant de Radeaux, pour passer d'un bord à l'autre de la Riuere, en cas qu'il se trouuaist arresté par les Montagnes, comme il luy estoit aduenu autresfois, & à ceux de sa suite. Ils partirent tous ensemble, sur l'esperance qu'ils eurent, que leur Brigantin arriueroit bientôt avec les viures qui leur estoient necessaires, pour se deffendre de la faim qui les pressoit, & qui estoit en effet le plus cruel Ennemy qu'ils eussent eu en tout leur Voyage. Ils arriuerent au bout de deux mois, au lieu, où les Riuieres se rendoient l'une dans l'autre; croyant d'y trouuer leur Brigantin, avec des provisions, & qu'apparemment il n'auoit pû reuenir à eux, à cause des grands Courans de la Riuere; Mais ils se trouuerent bien loing de leur compte, & hors de toute esperance de pouoir iamais sortir de cét Enfer (car ils pouuoient bien appeller ainsi ce malheureux Pais, où ils auoient tant souffert de maux) sans sçauoir ny quel remede y mettre, ny par quel moyen s'en desliurer. A la jonction des deux grandes Riuieres, ils trouuerent le bon Hernand Sanchez de Vargas, qui sans s'estonner auoit enduré courageusement, & avec vne constance digne d'un vray Gentilhomme, les incommoditez de la faim, & quantité d'autres miseres. Il rendit compte à Pizarre de la perfidie qu'auoit commis Orellana, & contre son General; & contre luy-mesme. * De toutes lesquelles choses Gonzale Pizarre fut grandement estonné, ne pouuant croire qu'il y eut dans le Monde, des hommes chez, assez perfides, pour respondre si mal au bien qu'on leur vouloit, & aux esperances qu'on en auoit conceuës; Mais les Capitaines sur tout, & les soldats avec eux, s'affligerent si fort d'auoir esté si meschamment trompez, que ne pouuant y remedier, ils furent presque reduits au desespoir.

Or bien que leur General prit grande part à leur desplaisir, qui augmentoit de beaucoup le sien, il s'efforça neantmoins de les consoler le mieux qu'il pût, en leur disant qu'ils prissent courage; Qu'ils souffrissent comme vrais Espagnols, toutes les traverses qui leur arriueroyent, & que tant plus grandes elles estoient, tant plus considerable aussi seroit aux siecles à venir la gloire qu'ils en auroient: Qu'au reste, puis que le bon-heur auoit voulu pour eux d'estre Conquerans d'un si grand Empire, qu'ils se comportassent en hommes, que la Diuine Prouidence auoit esleus pour vne si haute entreprife. Ce raisonnement les toucha bien auant dans l'Ame; & mesme il adoucit vne partie de leur amertume; sur tout, quand ils vinrent à considerer que leur Capitaine general, à qui cette disgrace deuoit estre plus sensible qu'à personne, l'enduroit neantmoins avec vne patience incroyable. Ils continuerent donc leur Voyage le long des bords de cette grande Riuere, tantost d'un costé, & tantost de l'autre; Mais ce ne fut pas sans beaucoup de peine: n'estant pas imaginable, combien ils auoient de mal à faire passer dans les radeaux leurs cheuaux tous harassés, & dont le nombre n'estoit plus que d'environ quatre-vingts, de cent cinquante qu'ils en auoient emmené de Quitu. Ils en pouuoient dire de mesme des Indiens par eux tirez du Peru, iusques au nombre de 4000. qui s'estoit diminué de la moitié. Ceux-cy ne rendoient pas de moindres deuoirs à leurs Maistres, que s'ils eussent esté leurs propres Enfans, & les seruoient dans leur extrême necessité, avec vne ardeur qu'on ne scauroit assez loüer; Car pour soulager vn peu leur faim, ils estoient tousiours en queste apres des herbes, des racines, & des fruits sauuages, sans reietter, ny erapaux, ny couleuvres, ny tout ce qu'ils pouuoient trouuer d'Insectes, & de Reptiles sur ces Montagnes, dont ils faisoient provision pour les Espagnols, qui en mangeoient sans degoust, à faute de chose meilleure.

GONCALE PICARRE FAIT DESSEIN
de retourner à Quitu; Et ceux de Chily conspirent
la mort du Marquis son Frere.

CHAPITRE V.

DANS le comble de toutes ces miseres, ces pauvres Adven-
turiers firent autres cent lieues de chemin, tirant tousiours
vers le bas de la Riviere, sans esperance de trouver vn meilleur
païs, veu qu'ils alloient tousiours en empirant, & que par les ap-
parences ils ne pouuoient plus rien se promettre de bon, ny d'u-
tile. A raison dequoy, le General & les Capitaines, apres avoir
bien consulté entr'eux, se resolurent enfin de rebrousser vers
Quitu, si toutesfois ils pouuoient y retourner, apres s'en estre
esloignez de plus de 400. lieues. Et dautant que pour la rapidi-
té del'eau, il leur estoit impossible de naviguer à contre-mont
la Riviere, par où ils estoient venus, ils demurerent d'accord
de prendre leur route vers le Septentrion, pour s'estre apper-
ceus qu'il y auoit là beaucoup moins de Fondrieres, de Lacs, &
de Marescages qu'ailleurs. Ils entrerent donc par les Monta-
gnes, & s'ouurent vn chemin à leur accoustumée, à force de ha-
ches & de coignées : Chose à vray dire, extrêmement fascheuse
& penible; sur tout à des gens qui n'auoient pas dequoy man-
ger.

Mais nous les laisserons dans ce trauail, pour dire ce qui ad-
uint au Marquis Dom François Picarre, durant les traueses de
Gonzalo son Frere. Car à vray dire, il sembloit que comme ces
deux Cavaliers auoient esté destinez à de si fameuses entrepri-
ses; Aussi l'estoient-ils à souffrir vne infinité de pertes, & de des-
astres, qui ne se terminerent qu'avec leur vie; la fin de laquelle,
comme lamentable de soy, affligea plus qu'on ne scauroit croi-
re tous ceux de leur cognoissance. Il faut donc scauoir, qu'a-
pres que le Marquis eut partagé les Prouinces des Charcas aux
Conquerans de ce Royaume, & reformé à Cozco certaines
choses tres-importantes, que les animositez particulieres, & les
passions de ceux du Party d'Almagre auoient causées; il laissa

* Au Pe-
re d'Al-
magre.

tout le País dans vn grand calme, & s'en alla droit à la Ville des Rois, afin de la faire mieux peupler, & de la rendre plus considerable par sa presenco. Or pource qu'en ce lieu-là estoit alors Dom Diego d'Almagre le ieune, Hernand Picarre l'y ayant enuoyé, dès qu'on eut tranché la teste à son Pete, * comme nous l'auons remarqué cy-deuant, le Marquis s'apperceut que quelques-vns des principaux Partisans d'Almagre, ne bougeoient d'auceque Dom Diego le ieune, qui leur donnoit dequoy manger, & s'entretenir du reuenu qui luy venoit d'un fort bon département d'Indiens, que son pere luy auoit laissé; Et que ce qu'il en faisoit estoit, pource que les Indiens auoient abandonné tous les autres de son Party, les estimant Traistres, pour s'estre trouuez dans la Faction de Dom Diego d'Almagre; Ce qui fut cause que le Marquis, d'une humeur noble & genereuse, voulut traiter obligamment ces Caualliers, & leur donner dequoy subsister honnorablement, en les esleuant aux Charges de Iustice, & aux Offices annexez aux rentes Royales. Mais eux qui se promettoient tousiours de voir punis les Picarres, tant pour la mort qu'ils prétendoient auoir esté iniustement donnée à Dom Diego d'Almagre, que pour les cruautés qui s'estoient passées en la Bataille des Salines, & pour celles qui se firent depuis, ne voulurent receuoir aucune gratification du Marquis. Ce qu'ils firent, afin de ne luy estre point obligez, & de n'auoir vn sujet d'oublier la haine qu'ils luy portoient, & aux siens; Comme encore, pour empescher qu'on ne leur pût reprocher à l'aduenir, qu'ils traittoient ingratement vn homme qui leur auoit fait du bien. D'où il s'ensuiuoit que ceux de leur Faction s'assistoient les vns les autres, sans vouloir iamais, quelques incōmodez qu'ils fussent, receuoir aucune gratification de ceux du Party de Picarre: Dequoy s'estant apperceus quelques Confidens & mauuais Officiers du Marquis, ils luy cōseillerent mal à propos, que s'ils ne luy vouloient point estre Amis, en leur faisant du bien, il les y falloit reduire, en leur faisant du mal, afin qu'une extrême necessité les y obligeast. Le Marquis, pour plaire à ses Conseillers, plustost que pour suiure sa volonté propre (qui n'auoit iamais esté de faire du mal, non pas mesme à ses plus grands Ennemis) osta le département d'Indiens à Dom Diego d'Almagre, en la maison duquel ses principaux Confidens mangeoient d'ordinaire: ce qu'il s'aduisa de faire, afin que

a'ayant

n'ayant pas dequoy s'entretenir, ils sortissent de la Ville, & s'en allassent chercher ailleurs dequoy viure. Mais tout le contraire arriva, si bien qu'au lieu de les dompter par ce procédé, le Marquis les irrita davantage, effet ordinaire de la rigueur de la Tyrannie, principalement si on l'exerce contre ceux qui ne le méritent pas. Comme ils virent donc qu'on les traitoit si mal; au lieu de sortir de la Ville, ils escriquirent en plusieurs autres lieux, où ils sçauoient qu'il y auoit des Espagnols de leur faction, afin de les obliger à les venir joindre dans la Ville des Rois, & de les seconder en leurs desseins; où il est à remarquer, que parmy ceux qui paroissoient estre du Party des Almagres, il y en auoit plusieurs qui ne s'estoient point trouuez avec luy aux Guerres passées, & qui estoient seulement du nombre des nouveaux venus dans le País, dont les vns affectionnoient vn Party sans aucun sujet; Et les autres suiuoient l'autre, comme il arriue ordinairement en matiere de Factions. Ainsi plus de deux cens Soldats s'estant donné rendez-vous en la Ville des Rois, s'y rendirent en effet, & y vinrent de trois à quatre cens lieues. Comme ils se virent en si grand nombre, ils prirent courage, & la liberté de se fournir d'Armes, ce qu'ils n'auoient pas osé faire iusques alors, ny mesme y penser, estant obseruez de toutes parts, & traittez en Prisonniers; Mais le bon naturel du Marquis, qui dissimuloit tousiours avec eux, leur fit secouer le ioug. En suite dequoy, ils resolurent d'attenter à sa personne, & de venger la mort de Dom Diego d'Almagre, l'occasion leur en estant offerte par l'absencede Hernand Pizarre, qui estoit alors en Espagne, & qu'on pouoit nommer à bon droit le veritable Auteur des maux passez, comme des presens, & de ceux qui deuoient aduenir.

Les Coniurez consulterent entr'eux à diuerses fois, & ne le purent faire si secrettement, que les Conseillers du Marquis ne le descouvrissent: Voila pourquoy deslors, ils le sollicitèrent plus qu'ils n'auoient iamais fait, de chastier les Auteurs de ces souleuemens, & de ces mutineries, faisant mourir les principaux Boute-feux, & bannissant les autres du Royaume, auant qu'ils fissent de plus grandes reuoltes à son preiudice, & de ceux de son Party.

Mais le Marquis, comme dit Augustin de Carate, qui estoit Liv. 4.
si peu deffiant, & de si bon naturel, leur disoit pour toute res- 5. & 6.

ponse, *Qu'ils se denoient mettre toutes ces fantaisies hors de l'esprit, & que ses Ennemis estoient assez chastiez, tant par leur propre malheur, que par le regret de se voir pauvres, vaincus en Guerre, & hors d'esperance de se pouuoir restablir. Ceste bonté cependant, & ces excès de patience estoient si nuisibles au Marquis, qu'ils faisoient que Dom Diego, & ses gens s'assurant là dessus, luy portoitent si peu de respect, qu'ils en perdoient toute honte: si bien qu'il arriuoit quelques fois, que les principaux d'entr'eux passoient deuant luy, sans daigner luy offer leur chappeau, ny luy tesmoigner aucune sorte de civilité.*

Voilà ce que dit Augustin de Carate, parlant des Partisans d'Almagre. A quoy il faut adjoûster; Qu'ils estoient si pauvres, qu'une seule Chambre seruoit à sept, où ils viuoient en Camarades, sans auoir entr'eux qu'un chetif manteau, qu'ils prenoient chacun à son tour, quand ils vouloient allet à la Ville, apres que leur Camarade en estoit reuenu. Ils en vsoient de mesme en leur viure; Car ils mettoient entre les mains de Iean de Rada, tout ce qu'ils auoient d'argent, & ce qu'ils gaignoient au ieu, afin qu'il en fut comme Tresorier, & qu'il fit leur despesne en commun. Avec tout cela neantmoins, comme i'ay dit n'aguere, ils estoient si effrontez, qu'abusant de la douceur, & de la Clemence du Marquis, ils se portoitent à toute sorte d'indignitez contre luy. La plus remarquable de toutes, fut, lors qu'à la faueur de la nuit, il leur aduint d'attacher à la potence de la place publique trois diuerfes cordes, dont la premiere s'alloit rendre à la maison d'Anthoine Picado, Secretaire du Marquis; la seconde à celle du Docteur Iean Velasques, Intendant de la Iustice; Et la troisieme au logis du mesme Marquis: Ce qui fut sans doute vne insolence qui meritoit bien qu'on les pendit tous avecque les mesmes cordes. Mais le Marquis fut si genereux, qu'il ne voulut iamais permettre qu'on en recherchast les Auteurs, afin de les chastier; Au contraire, si l'on en accusoit quelques-vns, il les excusoit en mesme temps, disant que le desplaisir de se voir vaincus & reduits à neant, les portoit à ces actions, n'en pouuant faire de pires; & par ainsi, qu'on les laissast dans leur propre malheur, qui leur estoit vne punition assez grande. Ceste douceur pourtant, par vne contrarieté bien estrange, ne fit qu'agrir encore plus fort ceux de Chily; l'indignation desquels s'accrût tellement, qu'elle les poussa temerairement à ce qu'ils firent depuis, qui fut de tuer le Marquis, comme nous verrons tout maintenant.

CEUX DE CHILY ATTENTENT

la personne du Marquis, & le tuënt.

CHAPITRE VI.

BIEN que l'imprudence, & la temerité des Almagres, fussent montées au plus haut point où elles pouuoient atteindre, ils ne scauoient pourtant à quoy se résoudre. Ils estoient d'accord de tuer le Marquis, mais non pas du temps qu'il leur falloit prendre pour le faire: Il leur sembloit à propos d'attendre que sa Maiesté Imperiale enuoyast des gens exprés, pour faire Iustice de la mort de Dom Diego d'Almagre; lors qu'ils apprirent que Diego d'Aluaro, qui s'en estoit allé en Espagne pour y accuser les Pigarres, ainsi que nous auons dit ailleurs, auoit obtenu qu'il y auroit en cette cause vn Commissaire député. Par mesme moyen ils sceurent que le pouuoir qu'auoit le Iuge, ne s'estendoit, ny à chastier aucun, ny à depousseder le Marquis de son Gouvernement, mais à faire vne Information de ce qui s'estoit passé, pour la porter à sa Maiesté, afin de prononcer là dessus l'Attest des Coupables: Toutes lesquelles choses iointes ensemble, furent d'autant plus sensibles aux Almagres, qu'ils auoient esperé iusqu'à lors, qu'on leur enuoyeroit vn Iuge, qui de tort & de trauers, ou si vous voulez, à droict & à gauche, feroit couper le col à tous ceux qu'ils nommeroient, & dont les biens seroient confisquez à leur commun aduantage. Dans cette confusion de pensées, & de choses contraires, ils conclurent entr'eux, d'attendre que le Iuge fut arriué, pour voir si sa Commission estoit si limitée qu'on leur auoit dit, ou aussi ample qu'ils le desiroient; Car comme leurs intentions estoient mauuaises; aussi ne cherchoient-ils qu'à les executer à quelque prix que ce fust: Ce qui leur faisoit dire en leur Conseil secret, Qu'en cas qu'à son arriée, le Iuge ne se saisit du Marquis, & qu'il ne fit d'autres executions rigoureuses, il les falloit tuer tous deux; puis se souleuer avec ceux du Pais, se vengeant ainsi tout d'un temps de l'outrage receu du Marquis, & de la nonchalance de l'Empereur à chastier vn crime si noir, comme estoit (à ce qu'il

leur sembloit) la mort de Dom Diego d'Almagre. En effect, ils ne manquerent pas depuis d'executer cette pensée qu'ils auoient eüe, de se soufleuer avec ceux du païs, comme il se verra par la suite del'Histoire.

Cependant, par toute la Ville des Rois, il courut vn si grand bruit, que ceux de Chily auoient entrepris sur la vie du Marquis, que plusieurs de ses Amis le sceurent incontinent, & l'en aduertirent. Mais comme le remarque Augustin de Carate, il ne leur fit point d'autre responce, sinon, Que leurs testes conserueroient la sienne, se tenant si peu sur ses gardes, qu'il sortoit souuent avec vn seul Page, pour s'aller promener hors de la Ville, en certains Moulins qu'il y faisoit bastir: Que si quelquesfois ses Confidans luy disoient, Qu'ils s'estonnoient fort de ce qu'il n'auoit aucunes Gardes près de sa personne, il leur respondoit, *Qu'il le faisoit à dessein, afin qu'ils ne pensassent point qu'il apprehendast la venue du Licentié Vaca de Castro, qu'on enuoyoit pour estre son Iuge;* Ce qui fut cause que ceux de Chily, pour mieux amuser, & surprendre le Marquis, semerent le bruit que Vaca de Castro estoit mort.

Durant tout cecy, il aduint vn iour, que Iean de Rada, avec quelques-vns des siens, l'estant allé voir, & l'ayant trouué dans vn Verger, où il se promenoit, luy demanda, *Quel tort il luy auoit fait, pour le vouloir tuer avec ses Compagnons.* Surquoy le Marquis luy protesta, *Qu'il n'auoit iamais eu cette pensée dans l'ame, ayant appris au contraire, que c'estoit luy-mesme, & ses Camarades qui tramioient sa mort, & qui faisoient prouision d'Armes pour cette execution.* A quoy Iean de Rada repartit, *Qu'il ne falloit pas s'estonner, puis que sa Seigneurie achetoit des Lances, s'ils achetoient aussi des Cuirasses pour s'en defendre:* Ce qu'il ne feignit point de luy dire effrontement, sçachant qu'il auoit laissé près delà plus de quarante hommes tous bien armez. Il luy dit encore, Que pour se mettre à couuert de ce soubçon, il n'auoit qu'à permettre à Dom Diego, & à ses gens de sortir du Païs. Mais toutes ces paroles ne donnerent aucun ombrage au Marquis, qui plus esmeu de pitié que d'indignation contre ces Factieux, tascha de leur remettre l'esprit par des termes obligeans; les asseurant qu'il n'auoit nullement acheté des Lances, pour les tourner à leur ruïne: Là dessus, il cueillit luy-mesme quelques Oranges, qu'on estimoit fort alors, pour estre nouuelles dans le Païs; & les

luy presentant, luy dit à l'oreille, *Que s'il auoit besoin de quelque chose, il l'en assisteroit tres-volontiers.* Jean de Rada l'en remercia; Et prenant congé de luy, qui sembloit ne rien apprehender, se retira en son logis; où il ne fut pas plustost arriué que luy, & les principaux des Coniurez y tinrent conseil, où ils conclurent de le mettre à mort le Dimanche susuant, puis qu'ils ne l'auoient point fait le iour de la S. Jean, comme ils en estoient demeurez d'accord.

Ce que ie viens de dire est tiré d'Augustin de Carate, & se trouue tout à fait conforme au sentiment de François Lopez de Gomare. Par où l'on peut voir, que le Marquis n'apprehendoit pas tant d'estre tué par ceux de Chily, qu'ils apprehendoient eux-mesmes de ne le pouuoir tuer assez tost; tellement que s'ils retardoient leur meschant dessein, ce n'estoit (comme i'ay dit cy-deuant) que pour attendre l'arriüée du Iuge, & pour voir quel seroit son procedé dans cette affaire. Cependant, parmy tous ces delays, l'indignation des Almagres se vid portée iusques à la rage; par vne mauuaise action que fit alors Anthoine Picado, Seceretaire du Marquis. Car apres que ceux de Chily eurent attaché à la potence les cordes, dont i'ay parlé cy-deuant, l'une desquelles ne menassoit pas moins le Seceretaire que le Marquis; Picado voyant que les Factieux ne faisoient que fulminet en vain, & que (comme dit le Prouerbe) ils se moquoient d'un habit qu'ils n'osoient prendre; Pour se rire de leur lascheté, s'aduisa de porter sur son Chapeau vne riche Medaille d'or, avec ces mots à l'entour. *Pour ceux de Chily.* Dequoy ces Soldats, qui n'estoient pas gens à souffrir de semblables affronts, s'offenserent tellement, qu'ils resolurent pour la derniere fois de haster la mort du Marquis, sans attendre plus long-temps la venuë du President, & sans y apporter tant de circonspection qu'ils auoient fait iusques alors: D'où il aduint que le Marquis, aduertý au vray de cette Conspiration par le moyen d'un Prestre, qui auoit appris secretement en quel temps, & de quelle forte ils le deuoient tuer, en communiqua depuis avec le Docteur Vellasquez, son Intendant de Iustice, & pareillement avec son Seceretaire Anthoine Picado. Mais pour le rassurer de toute crainte, ils luy remonstrerent; *Qu'il se deuoit mocquer de ces Malheureux, plustost que de les apprehender; Et que ce qu'ils disoient ne faisoit qu'entretenir leur faim, & leur mauuaise For-*

tane. Le Marquis neantmoins relaschant de sa premiere opinion, se desista d'aller à la Messe en la grande Eglise, le iour de la S. Iean, auquel ils le deuoient mettre à mort en l'an 1541. Il en fit de mesme le Dimanche d'apres 26. de Iuin, s'excusant sur son indisposition : car il luy sembla necessaire d'en vser ainsi, & de se tenir clos & couuert durant quelques iours, afin d'aduiser cependant avec ses Amis & Confidens, aux moyens qu'il pourroit tenir, pour couper chemin aux trahisons, & aux insolences de ses Ennemis, qui auoient desia pris pied trop auant.

Le Dimanche ensuiuant, les principaux de la Ville, & particulièrement les Cavaliers, ayant ouï la Messe, où ils n'auoient point veu le Marquis, le furent trouuer chez luy; & apres l'auoir veu, s'en retournerent en leurs Maisons; si bien qu'avec luy ne demurerent que François de Chaups son intime Amy, & le Docteur Vellasquez. Cependant ceux de Chily s'apperceuant que le Marquis se tenoit couuert plus que iamais, & que ses Partisans coutoient en foule dans sa Maison, en prirent ombrage, & creurent qu'on y conspiroit leur mort. Sur cette apprehension, ce mesme Dimanche, à l'heure que tous estoient à table, & que le Marquis auoit à peine acheué de disner, ils sortirent par vne des aduennées de la Place, qui est à main gauche de l'Eglise Cathedrale, où demouroit Dom Diego d'Almagre, avec ses Confidens, & trauerferent toute la Place, iusques à la Maison du Marquis, scituée en vne autre aduennée. Ils estoient treize de nombre, bien que François Lopez de Gomare n'en compte que douze, sans dire le lieu de leur naissance; & ce sont les sui-uants.

Iean de Rada, Chef de tous les autres, Martin de Bilbao, Diego Mendez, Christophle de Soza, Martin Carillo, Arbolancha, Hinogeros, Naruaez, S. Millan, Porraz, Vellasquez, François Nuñez, & Gomez Perez, qui est celuy que Gomare n'a point nommé. Ils coururent l'Espée nuë à la main par toute la Place, où ils s'en alloient criant en hommes desesperés; *Meurre le Tyran; Meurre le Traistie, qui a fait tuer le Iuge, que l'Empereur enuoyoit pour le punir de ses crimes.* Où il est à remarquer, que ce qui les obligeoit à se declarer ainsi ouuertement, estoit, afin que ceux de la Ville, qui se tenoient clos chez eux, se persuadassent qu'il falloit bien que les Conjurez fussent plusieurs, puis qu'ils se hazardoient si publiquement à cette Entreprise; & qu'ainsi ils

n'osassent sortir de leurs Maisons, pour secourir le Marquis. Quo s'il en en faut parler veritablement, ce fut vne grande temerité que la leur. Mais le destin du Marquis le voulut ainsi; & permit que les Conjurez fortissent à la veüe de tous, pour vanger la mort de Dom Diego d'Almagre, comme il se verra cy-apres.

*LA MORT DV MARQUIS DOM FRAN-
çois Pigarre, & son pauvre Enterrement.*

CHAPITRE VII.

AV bruit que ceux de Chily faisoient, quelques Indiens, Seruiteurs domestiques du Marquis, accoururent où il estoit; l'aduerrissant de cette alarme des Seditieux, & de quelle maniere ils venoient. Le Marquis, qui auoit avec luy le Docteur Vellasquez, le Capitaine François de Chaues, qui estoit comme son Lieutenant General; François Martin d'Alcantara son Frere du costé maternel, & douze ou treize de ses Domestiques, se douta tout aussi-tost de ce que c'estoit, apres l'aduis, que les Indiens luy en donnerent. Il commanda donc à François de Chaues de fermer les portes, tant de la Salle, que de la Chambre où ils estoient, tandis que luy, & les autres s'armeroient, pour sortir quand il en seroit temps, & se deffendre de ceux qui le venoient attaquer. Mais François de Chaues se persuadant que c'estoit quelque querelle particuliere entre Soldats, & que son autorité seule suffiroit pour y mettre la paix; au lieu de fermer les portes, suiuant l'ordre qu'il en auoit, s'en alla au deuant, & trouua qu'ils montoient desia l'Escalier. Alors bien estonné de voir ce dequoy il ne se doutoit pas, il leur demanda, s'ils vouloient quelque chose, & receut pour toute responce vne Estocade. Il ne se sentit pas si-tost blessé, qu'il mit la main à l'Espée pour se deffendre, mais tous le chargerent à l'instant, & vn entre autres luy porta vn si furieux reuers sur le col, qu'au rapport de Gomarc, peu s'en salut, que de la violence du coup, il ne luy separast la teste d'avecque le corps, qui cheut au bas de l'Escalier. Ceux qui se trouuerent dans la Salle, à sçauoir les Officiers

& les autres Seruiteurs du Marquis, sortirent incontinent à ce bruit, & voyant qu'on auoit tué François de Chaues, prirent laschement la fuitte, & se ietterent par des fenestres, qui regardoient dans vn Iardin de la Maison. Le plus remarquable de ceux-cy, fut le Docteur Iean Vellasquez, qui pour ne s'embarasser les mains de la Cane qu'il portoit d'ordinaire, pour marque de sa dignité, se la mit à la bouche, pour la reprendre au besoin, s'imaginant que les Ennemis l'en respecteroient dauantage. Ils entrerent dans la Salle, & n'y trouuant personne, allerent droit à la Chambre. Le Marquis les sentant si proches de luy, sans estre armé qu'à moirié, & sans auoir eu loisir de s'attacher les corroyes d'une Cuirasse qu'il auoit prise, se ietta sur vne rondache qu'il empoigna d'une main, & de l'autre vne large Espée: Avec luy sortirent en mesme temps François Marrin d'Alcantara son Frere, & deux fors grands Pages, dont l'un se nommoit Iean de Vargas, fils de Gomez de Tordoya. Ils n'eurent pas le loisir de prendre aucunes armes defensives, & ne laisserent pas touresfois de seconder le Marquis le mieux qu'ils purent. Luy cependant, & son Frere, s'en allerent à la porte, qu'ils deffendirent vn assez long temps avec tant d'ardeur, qu'ils empêcherent l'entrée aux Ennemis. Alors le vaillant Marquis, pour mieux encourager son Frere, *Qu'ils meurent*, luy disoit-il à tout coup, *les Tristres qu'ils sont*, & ils combattoient ainsi courageusement les vns, & les autres: Ce qui ne pût empêcher pourtant que le Frere du Marquis n'y laissast la vie, pour n'auoir pas de quoy se defendre. L'un des Pages se mit incontinent à sa place, & tous deux ensemble deffendirent si bien la porte, qu'ils osterent à leurs Ennemis l'esperance qu'ils auoient de s'en rendre maistres, apprehendant, si le combat duroit beaucoup, qu'il ne vinr au Marquis des gens de secours, qui les fissent tous passer au fil de l'Espée. Cette crainte fut cause que Iean de Rada, & vn autre de ses Camarades, saisisrent par le corps Naruaez, & que luy faisant force la porte, ils le poussèrent dans la Chambre, afin que le Marquis ayant de quoy s'entretenir avec luy, donnât moyen aux autres d'entrer: Aussi arriva-t'il ainsi: Car à mesme temps le Marquis donna si vertement sur Neruaez, qu'il l'estendit mort par terre de plusieurs coups d'Espée. Les autres entrerent cependant, & furent à peine entrez, qu'ils se mirent à charger furieusement le Marquis, & les deux Pages. Ces vail-

lans Gargons firent des merueilles en ce combat : Mais enfin, apres s'estre bien deffendus , & auoir blessé dangereusement quatre des Ennemis , ils furent contraints de ceder à la force , & perdirent ainsi la vie. Le Marquis demeuré seul , eut à faire à tous les autres , qui l'enuelopperent aussi tost , & se deffendit vn assez long temps, avec tant d'adresse , & de cœur , que chamailant, tantost d'vn costé , & tantost de l'autre ; il blessa trois des Ennemis , non sans apparence qu'ils auroient peine d'en reschapper, tant il leur fit sentir rudement la force de son Espée. Neantmoins , pource qu'il auoit à faire à plusieurs , & qu'avec cela il n'estoit pas jeune, ayant 65. ans pâlez, il fut mis enfin hors d'haleine par vn de ses Ennemis , qui luy porta vne Estocade à la gorge, dont il cheut incontinent, criant le plus haut qu'il pult, Qu'on luy fit venir vn Confesseur. Alors estendu par terre , & sentant ses forces deffaillir , il fit avec les doigts de sa main droite vne maniere de Croix, qu'il porta à sa bouche , & rendit l'esprit en la baissant.

Ainsi mourut Dom François Piçarre, cét homme celebre & signalé; par dessus les plus fameux de son temps , pour auoir par sa conduite , & par sa vaillance, gagné vn Empire ; qui n'a pas seulement enrichy & agrandy la Couronne d'Espagne, qu'il enrichit encore auourd'huy ; mais le Monde entier, comme il se void par espreuue , & comme nous l'auons monsté cy-deuant en diuers endroits. Neantmoins , ô reuolution estrange ! parmy les grandeurs , & les richesses , vn si puissant homme mourut si despourueu de biens , que ses Amis l'abandonnant à ce dernier besoin , furent cause qu'on ne luy trouua pas de quoy l'enterrer, Par où l'on peut voir, qu'en moins d'une heure la Fortune rendit ses disgraces , & ses miseres, esgales aux prosperitez & aux faueurs, dont elle-mesme l'auoit comblé dans tout le cours de sa vie : Ce qui nous est confirmé par les paroles suiuanes, rapportées par Augustin de Carate.

Voilà quelle fut la fin du Marquis, avec qui moururent aussi deux de ses Pages, & du costé de ceux de Chily, il y en eut quatre de tuez, & quelques autres qui furent blessez. Le bruit en estant semé par la Ville, plus de deux cens hommes accoururent en faueur de Dom Diego; car bien qu'auparauant ils se tinssent prests; si est-ce qu'ils n'oserent point se monstrier, insqu'à ce qu'ils virent que l'entreprise auoit reüssi : Et ce fut alors qu'ils coururent par les rues, de s'armant tous ceux qui s'en al-

Liv. 4.
Ch. 8.

loient au secours du Marquis. Cependant, les Conjurez sortirent avec leurs Espées toutes sanglantes : En suite dequoy, Jean de Rada fit monter à cheual & pourmener par la ville Dom Diego ; devant lequel il s'en alloit criant ; Qu'en tout le Peru il n'y auoit point de Gouverneur, ny de Roy par dessus luy. Comme il eut pillé les Maisons du Marquis, de son Frere, & d'Anthoine Picado, il fit assembler les Communitez de la Ville, afin qu'elles eussent à recevoir Dom Diego pour Gouverneur : à quoy luy seruit de pretexte le Traité qui fut fait avec l'Empereur autemps que ces nouvelles terres furent decouuertes, par lequel il fut conclud, que Dom Diego auroit le Gouvernement de la nouvelle Toledé ; Et que la suruiuance en reniendrois à son Fils, ou à la personne qu'il nommeroit. Apres ces desordres, les Coniurez en firent d'autres, en la personne de quelques-uns, qu'ils mirent à mort, pour ce qu'ils les scauoient estre Seruiteurs & Creatures du Marquis : de sorte qu'en cette commune desolation, on ne pouuoit sans pitié, oïr les plaintes des Femmes, dont on auoit tué les Maris, & les cris de ceux dont on pilloït les Maisons.

Quelques Negres porterent à l'Eglise, ou pour mieux dire, ils'y trainerent tous en alarme, le corps du Marquis, que personne n'osoit enterrer. Mais enfin Jean de Barbaram, habitant de Truxillo, qui auoit seruy le Deffunct, luy rendit ce dernier office ; Car luy & sa Femme l'enseuelirent le mieux qu'ils pûrent ; & pareillement son Frere, apres en auoir obtenu permission du Gouverneur. Ce qui fut fait avec tant' de haste, qu'à peine eurent ils loïst de luy mettre, comme c'est la coustume en tel cas, le manteau & les esperons de Cheualier de l'Ordre de saint Iacques, pour auoir esté aduertis que ceux de Chily couvroient en foule, avec dessein de luy couper la teste, & de l'exposer au gibet public. Voila pourquoy Jean de Barbaram se hâta de l'enterrer, & pour cétte mesme fin fit à ses despens tous les honneurs, & toute la despenſe de ses funerailles. Ce qu'il n'eut pas plustost acheué, que luy-mesme & ses Amis, s'en allerent mettre en lieu de seureté les fils du Deffunct, qui se tenoient cachez & ne scauoient où se retirer ; ceux de Chily s'estans rendus maistres de la Ville.

Cette mort est vne exemple de la visſicitude des choses du Monde, & de l'inconstance de la Fortune : Car ce fut assurément vne merueille bien estrange, qu'un Cavalier de cette importance, qui auoit decouuert des terres si vastes, gouverné de

si beaux Royaumes, possédé tant de grandes richesses, & fait plus de bien à vne infinité de personnes, qu'en sçauoit faire, eu esgard au temps, le plus puissant Prince du Monde, vint à estre tué miserablement en plein iour, & par la main de douze hommes, sans auoir eu loisir de se confesser, de donner ordre à ses biens, & de pouruoir à ses Descendans. Que si quelque chose encore peut rendre plus lamentable cét euenement tragique, c'est qu'il se passa en vne Ville dont les habitans estoient tous, ou ses Parens, ou ses Soldats, ou ses Creatures: Car il les entretenoit par ses bien faits, en leur donnant liberalement dequoy viure; Et toutesfois pas vn d'eux ne le daigna secourir: au contraire, ils s'enfuyrent laschemēt, si bien qu'à cét extrême besoin, il se vid abandonné par ses propres Domestiques. Outre ces choses il n'y a pas moins dequoy s'estonner, de ce qu'il fut enseuely si pauurement, apres s'estre veu durant sa vie, dans le comble des prosperitez & des richesses du Monde: Car il est certain, qu'un seul moment le despoüilla de tous ses biens, sans que l'on sceut où en prendre pour l'enterrer: Toutes lesquelles choses ne laisserent pas de luy arriuer, apres plusieurs aduertissemens qu'il en eut, comme nous auons dit cy-deuant.

De ces dernieres paroles, que j'ay tirées d'Augustin de Carate, l'on peut inferer combien grande fut la conformité de la mort du Marquis Dom François Piçarre, avec celle de Dom Diego d'Almagre. Mais il y eut encore vne merueilleuse ressemblance dans tous les succez de leur vie, comme si le Destin eut voulu qu'en l'un & en l'autre, ils courussent tous deux mesme Fortune, comme ils se le iurerent ensemble, quand ils s'associerent pour la Conqueste de ce grand Empire: Tellement que ce n'est pas vne chose peu remarquable, que cette grande esgalité qu'ils eurent en toutes choses.

Long-temps apres, les Guerres ciuiles estant pacifiées en tout ce Royaume; pour honorer la memoire d'un si valeureux Cavalier, on tira ses os de terre, que l'on mit dans l'Eglise Cathedrale de cette Ville, à la main droite du grand Autel, où ie le laissay l'an 1560. qui fut le temps auquel ie m'en allay en Espagne: la mort du Marquis estant aduenüe le 26. de Iuin, en l'an 1541.

Augustin de Carate, comme excellent Historien, imitant le grand Plutarque, fait vn Parallele de ces deux celebres & infor-

tunez Espagnols, qu'on ne sçauoit iamais assez bien louer, & qui apres auoir tant obligé le Monde, n'en ont esté que fort mal payez. Dans ce Parallele ayant à rapporter la façon de viure, & la mort Tragique de l'un & de l'autre, il en fait vn Chapitre exprés, qui est le neufiesme de son quatriesme Liure, & qui sera le huietiemesme de cette Histoire. Car bien qu'il ne soit pas de moy, ie ne laisseray par de le mettre icy mot, à mot avec son mesme tiltre.

DES QUALITEZ, ET DES MOEVRS DV
Marquis Dom François Pizarre, & de l'Adalento
*tado * Dom Diego d'Almagre.*

CHAPITRE VIII.

* Tiltre
 donné
 par le
 Souuerain,
 pour v
 ne mar
 que
 d'honneur,
 cōme
 qui disoit
 Gene-
 ralissi-
 me, ou
 Gouverneur
 de Province.

P V I S Q V E la descouuerte du Peru, principal sujet de cette Histoire, se doit à ces deux fameux Capitaines, dont nous auons parlé iusques icy, qui sont le Marquis Dom François Pizarre, & l'Adalento Dom Diego d'Almagre; il n'est pas hors de propos, ce me semble, de rapporter icy leurs qualitez & leurs mœurs, en les comparant ensemble, comme fait Plutarque, quand'il escrit les illustres faits de deux grands Chefs de Guerre, qui ont quelque ressemblance. Laisant donc à part leur Extraction, pour en auoir dit cy-deuant tout ce qu'on en peut sçauoir; Je diray, quant au reste, que l'un & l'autre estoient également courageux inuincibles à la peine, extrêmement vertueux, & qui se plaisoient à obliger tout le Monde, sans auoir esgard à la despense. Ils auoient mesmes inclinations en leur façon de viure, n'ayant iamais esté mariés, quoy que le plus jeune d'entr'eux mourut à l'âge de 65. ans.

Ils aymoient également la Guerre, bien qu'il fut vray neantmoins, que n'y ayant point d'occasion de la faire, Dom Diego s'appliquoit volontiers au Commerce, pour y faire valoir ses deniers. L'un & l'autre estoient presque vieux, quand il commencerent la Conqueste du Peru, en laquelle ils se virent exposés à diuers trauaux, & à d'extrêmes dangers, qui neantmoins furent beaucoup moindres en la personne d'Almagre,

qu'en celle de Pigarre. Ce qui nese pouuoit autrement, puis «
que cependant que l'un estoit tousiours en campagne, pour «
descourir de nouuelles terres, l'autre ne bougeoit de Panama, «
pour y faire les prouisions necessaires.

Tous deux auoient le courage grand, & des pensées si nobles, «
que iamais ils n'aspiroient qu'aux plus hautes entreprises, dont «
ils venoient à bout glorieusement, par leur constance dans le «
travail, par leur humeur affable, & par l'amitié qu'ils tesmoi- «
gnoient à leurs gens. Il eut esté difficile de dire lequel des deux «
estoit plus genereux en effet, bien qu'en apparence l'aduantage «
sembloit estre du costé d'Almagre, pource qu'en faisant du bien, «
il aymoit fort qu'on le publiast. Le Marquis tout au contraire «
voulloit qu'on ne parlast point de ses liberalitez, & tachoit de les «
tenir cachées, se piquant plus de faire plaisir que d'en tirer «
vanité.

Entre plusieurs preuues qu'il en donna durant sa vie, en voicy «
vne qui ne fut pas des moindres. Ayant sceu qu'un cheual estoit «
mort à un soldat, il descendit en un jeu de longue paume, qu'il «
auoit deuant sa Maison, où il le pensoit trouuer; ce qu'il fit en «
intention de luy donner de sa main vne plaque d'or, du poids de «
dix liures, qu'il tenoit cachée sous son pourpoint, mais ne l'y «
rencontrant pas, il fit cependant partie; & de peur qu'on n'ap- «
perceut la plaque, qu'il tint cachée plus de trois heures durant, «
il iouta sans poser son pourpoint, iusqu'à ce que par l'arriuée du «
soldat, il quitta le jeu, & le tirant à l'escart, luy fit present de «
cét or, disant, *Qu'il symeroit mieux luy en donner trois fois au- «*
tant, que d'estre derobes en la peine, où il auoit esté en l'attendant. «
L'obmets quantité d'autres Exemples, que ie pourrois produire «
icy touchant la generosité du Marquis, d'autant plus louable, «
qu'il ne donnoit rien que de sa propre main, & faisoit en sorte «
que personne n'en eut cognoissance. Comme il cachoit donc «
ainsi ses bien-faits, il ne falloit pas s'estonner s'ils paroissoient «
moins que ceux de l'Adelentado, qui prenoit plaisir à les mettre «
en euidence. Cela n'empeschoit pas toutesfois, qu'ils ne deus- «
sent estre estimez esgaux en generosité, puis que, comme disoit «
le Marquis, possédant tous leurs biens en commun, l'un estoit «
de moitié de ce que l'autre donnoit: tellement qu'on pouuoit «
dire, que celuy qui demeueroit d'accord du bien-fait, ne faisoit «
pas moins que son Compagnon, qui le distribuoit. Voilà pour

ce qui regarde leur magnificence, sur le sujet de laquelle ie diray ; qu'ayant esté tous deux si riches durant leur vie, soit en argent, soit en reuenus, qu'ils pouuoient plus acquerir & donner, qu'aucuns Princes qu'on ait veu de long-temps, ils moururent si pauures, que non seulement ils ne laisserent aucune memoire, ny de leurs Estats, ny de leurs Richesses, mais non pas mesme dequoy estre enterrez, comme nous lisons de Sylla, de Caron, & de plusieurs autres Capitaines Romains, qui furent enseuclis aux despens du public.

Ils eurent tous deux beaucoup de bonne volonté pour leurs gens, où se trouua ioint vn merueilleux soing de les enrichir, & de les tirer de peine. En quoy veritablement le Marquis sembloit pecher par excez, comme il luy aduint vne fois au passage d'une Riuiere, communément appellée *Barranca* ; où voyant qu'un Indien son seruiteur, du nombre de ceux qu'on nomme *Tanacanas*, alloit estre noyé, à cause de l'impetuosité de la Riuiere, il se ietta dans l'eau ; & s'estant mis à la nage, l'en tira par les cheueux. Ce que pas vn des plus ieunes & des plus hardis de toute son Armée, n'eut osé entreprendre : Et certainement comme cette action estoit hazardeuse, aussi estonna-t'elle quelques-vns de ses Capitaines, qui luy en dirent leur sentiment : mais il leur respondit, *Qu'ils ne scaueroient ce que c'estoit de vouloir du bien à vn seruiteur.*

Or quoy que le Marquis eut plus long-temps le Gouvernement en main, & qu'il fut plus paisible, Dom Diego pourtant le surpassa de beaucoup, soit en ambition, soit en desir de commander. I'adjouste à cecy, que l'un & l'autre furent si soigneux de s'accommoder à la vieille mode, qu'ils ne la changerent presque iamais, depuis leurs ieunes années : Ce qui fut particulièrement recommandable au Marquis, à qui l'on voyoit tousiours porter vn pourpoint de drap noir, vn Manteau long iusques aux talons, des souliers blancs, vn Chapeau de mesme couleur, avec vne espée & vn poignard à l'antique. Que s'il se faisoit quelque Feste publique, alors par l'importunité de ses Domestiques, il se paroît d'une robe de Marthe, que le Marquis de Val-le luy auoit enuoyée de la nouuelle Espagne ; mais dès qu'il estoit venu de la Messe, il la posoit pour se mettre en pourpoint, & portoit d'ordinaire vne seruiette au tour de son col, pour s'essuyer le visage, dans les exercices de la paume, & de la

boule, ausquels en temps de Paix, il employoit la plus part du iour.

Il n'est pas à croire, avec combien de patience ces deux excellens hommes enduroient la faim, & la fatigue : Ce que le Marquis sçauoit si bien tesmoigner, quand il s'exerçoit aux jeux dont nous venons de parler, qu'il y auoit peu de ieunes gens qu'il ne lassast. Il estoit plus enclin à ces diuertissemens que l'Adelentado, & s'y plaisoit tellement, qu'il passoit quelquefois le iour entier à la boule, sans se soucier avec qui il iouoit, fut-il, ou Meusnier, ou Matelot; & sans permettre iamais, ny qu'on luy leuast la boule, ny qu'on luy rendit telles autres defferences qui se deuoient à sa dignité.

Quelques affaires qu'il eut, quand il s'estoit mis vne fois au jeu, il ne le quittoit point, principalement quand il perdoit, à moins que d'ouir dire qu'il y auoit quelque souleuement d'Indiens: Car alors abandonnant tout, il prenoit promptement sa Cuirasse, sa Lance, sa targe, & courant par toute la Ville, il s'en alloit droit où estoit l'asmeute, sans attendre ses gens, qui courroient apres luy à toute bride.

Ils tesmoignoient tant de courage & d'adresse à combattre les Indiens, qu'une centaine d'entr'eux, n'estoit pas capable de faire lascher le pied ny à l'un ny à l'autre. Quant aux qualitez de l'Esprit, elles estoient si grandes en eux, qu'en temps de Paix & de Guerre, ils ne manquoient ny de iugement, ny de bonne conduite, en toutes les affaires où il falloit donner ordre, & qui regardoient le Gouuernement: chose d'autant plus merueilleuse, qu'elle se rencontroit en deux Personnes, qui ne sçauoient ny lire ny escrire, ny mesme signer leur nom : En quoy neantmoins, tant s'en faut que ie les vueille excuser, qu'au contraire ie tiens que c'estoit en eux un extrême defect: Car outre que cela lesembarassoit, quand il leur falloit traieter de quelque affaire d'importance; parmy tant de bonnes inclinations & de hautes qualitez qu'ils possedoient, ce manquement estoit vne tache, qui les empeschoit de paroistre Nobles, les plus sages d'entre les Anciens ayant tousiours pris cela pour vnemarque de basse naissance.

Le Marquis auoit tant de confiance en ses seruiteurs & en ses Amis, qu'en toutes les despeschés qu'il faisoit, soit pour le Gouuernement, soit pour quelque Département d'Indiens, il les tenoit pour bien liurées, apres qu'il y auoit fait deux marques :

autrement. Comme donc ils furent semblables en leur façon de viure, ils le furent aussi en leur genre de mort : Et comme Dom Diego fit mourir le Frere de Pigarre, celui-cy de mesme tua le fils de Pigarre.

Le Marquis fut encore fort soigneux de faire valoir les terres de ce pais-là : au labourage desquelles il apportoit vn merueilleux ordre, afin qu'elles fussent cultiuées sans y rien oublier. Il fit bastir de belles maisons en la Ville des Rois; & deux rangs de moulins en la Riuiere qui passe par là : employant à ces ediffices, dont il donnoit luy-mesme le dessein aux Ouuriers, tout ce qui luy restoit de temps de ses plus serieuses occupations.

Il apporta vne diligence incroyable au bastiment de la grande Eglise de la Ville des Rois; Comme encore à celui des Monasteres de S. Dominique, & de la mercy : voulant qu'on prist sur les Indiens le fonds qu'il leur falloit à peu près, pour l'entretenement, & pour les reparations de ces mesmes ediffices.

L'ay tiré d'Augustin de Carate tout le contenu de ce Chapitre: Dans le suiuant, ie desduiray ce que le mesme Auteur a dit, des autres bonnes qualitez du mesme Marquis, que l'on ne scautoit iamais assez louer.

DE L'HUMEUR AFFABLE DV MAR-
quis, & des inuentions dont il vsoit pour
assister les Necessiteux.

CHAPITRE IX.

LE Marquis Dom François eut vn Fils, & vne Fille, & Gonçale Pigarre vn Fils seulement, comme nous l'auons remarqué ailleurs : si bien qu'à ce compte-là Carate se trompe, quand il fait Pere de tous les trois le marquis. Où il faut remarquer, que la mere du Fils qu'il auoit, estoit Fille, & non pas Sœur d'Atahualpa. Pource que celle de sa Fille, il l'eut de celle de Huayna Capac, appelée *Doña Beatrix Huayllas Nusta*, ainsi que nous l'auons monstré au long en tout le Chapitre allegué cy-dessus.

Quant au tesmoignage du mesme Auteur, qui dit, Que ces

deux Gouverneurs ayant esté grandement riches durant leur vie, moururent si pauvres, qu'à peine trouua-t'on en tous leurs biens de quoy les faire mettre en terre, il ne choque nullement l'opinion des Hommes de ce temps-là, qui tiennent pour certain, que ces premiers Conquerans furent enseuelis d'aumosnes.

Dom Diego d'Almagre fut enterré par vn sien Esclau, & le Marquis par vn de ses Seruiteurs, comme le mesme Auteurs le remarque. Adioustez à cecy, Que ceux qui le porterent en terre, furent Negres, & Indiens, s'il en faut croire ce que les Historiens en ont dit: Ce qui doit suffire, ce me semble, pour faire voir de quelle monnoye le monde paye ceux qui le seruent, & comme il les abandonne à leur plus grand besoin.

Le Marquis fut si courtois, si obligeant, & si retenu, qu'il ne dit iamais mal de personne, & se monstra tousiours affable enuers tous: ce qu'il estoit soigneux d'observer, mesme en ses diuertissemens ordinaires: Car lors qu'il ioiotoit à la boule, il ne permettoit iamais qu'on la leuast de terre, pour la luy donner: Que si quelqu'un le faisoit, l'ayant prise, il la iettoit bien loing, & luy mesme couroit apres. Il luy aduint vne fois, comme il la voulut leuer, qu'elle luy saillir la main d'un peu de bouë qui tenoit contre, & qu'il essuya tout à mesme temps de l'un de ses Brodequins. * Car en ce temps-là les Soldats vsoient par galanterie de cette sorte de chausseure, plustost que de souliers, & en vserent mesme long-temps apres: Ge qu'un de ses Fauorys ayant aperceu; *Vostre Seigneurie*, luy dit-il, *eut mieux fait, ce me semble, de se toucher la main avec ce mouchoir qui luy pend à la ceinture, que non pas avec son Brodequin*: surquoy le Marquis s'estant mis à souffrir: *Je te iure*, luy respondit-il, *que ie l'aurois fait, n'estoit que ie l'ay veu si blanc, que ie n'ay osé le toucher*. Vne autre fois ioiuant de mesme à la boule, avec vn fort bon soldat, que l'ay cogneu, qu'on appelloit Alonse Polomarez, homme d'aussi belle humeur, que de bonnes mœurs, & se voyant en perte, il se despitoit contre luy, & se fashoit plus qu'à l'ordinaire; ce qui fut remarqué de plusieurs, qui ne sçauoient qu'en penser, ny si c'estoit ou par quelque desplaisir secret, ou pour la perte qu'il faisoit, qui se montoit à plus de huit ou neuf mille liures: D'où il aduint que le Marquis ayant laissé passer quelque temps, sans payer celuy qu'il auoit gagnées; & se fashât à la fin de ce qu'il l'importunoit là dessus: *Ne me les demandez plus*, luy dit-il, *car ie ne*

* L'Espagnol dit *Alpargate*, qui est aussi vne espece de chausseure faite de corde de laine ou de chaume, & mesme de soye, à la mode de ce pais-là.

vous les payeray jamais. Pour tout cela néanmoins Palomarez ne se rebuta point, & luy respondit de fort bonne grace : *si vostre Seigneurie ne me veut point payer cette somme, pourquoy m'a-t-elle donc si fort querellé en la perdant ?* Responſe qui fut si agreable au Marquis, qu'il commanda qu'on le payast sur le champ. Or comme il n'y auoit guere de ieu qu'il ne sceut ; il inuitoit ordinairement à iouier avec luy, ceux qu'il ſçauoit estre incommodez, & necessiteux : ce qu'il faisoit à dessein, afin d'auoir moyen de les secourir, en se laissant perdre ; car de cette façon, il les obligeoit doublement : en ee qu'il leur faisoit du bien, sans qu'il semblaſt leur donner l'aumosne, & que d'ailleurs, il les picquoit de la gloire d'auoir esté meilleurs Ioueurs que luy ; outre que cét argent qui leur reuenoit, sembloit auoir esté gaigné de droit, & comme tiré par force, plustost que donné par grace. Pour cette mesme fin, quand il iouoit à la boule avec eux, il ne daignoit approcher du but, & s'en esloignoit tousiours de quatre ou cinq pieds, sans se soucier d'abatre les boules, quoy qu'il le pût facilement : Il en faisoit de mesme des Cartes, sur tout quand il iouoit à premiere, où il enuioit tousiours, & couchoit du tout, lors qu'il n'auoit point de ieu : Que si de hazard, il luy venoit flux, ou premiere, il mesloit les Cartes sans les monſtrer, & feignoit d'estre fâché d'auoir perdu. D'où il s'ensuiuoit, que cette humeur officieuse, & ces inuentions si adroitement pratiquées pour obliger autrui ; le faisoient aymer vniuersellement de tout le monde, comme il le meritoit bien, pour sa Generosité, & pour ses autres vertus.

Gomare parlant de la mort d'un si grand Homme, qui meritoit veritablement d'estre appellé Prince, & plus que Prince, n'y ayant point de tiltre si haut qui ne fût au deſſous de ses grandeurs & de ses merites, dit de luy ce qui s'ensuit.

Il estoit Bastard de Gonçale Pigarre : Estant nay à Truxillo, il fut exposé à la porte d'une Eglise, & allaité par une Truye, durant quelque temps, ne se trouuant point de Femme qui luy voulut donner la mammelle. Son pere le reconnut depuis, sans en faire semblant toutesfoiſ, Et comme il fut grand, il l'enuoya garder ses Pourceaux ; si bien qu'il ne ſant point s'eslonner s'il ne ſcent pas lire, ayant esté si baſſement nourry. Mais un iour comme il les gardoit à la campagne, ils s'esgarerent les uns des autres, & se perdirent ; ce qui fut cause, que de crainte qu'il eut d'estre mal-traitté, il n'osa plus retourner au logis, & s'accosta de

Ch. 145.

quelques Passans, qui le menerent à Seuille, d'où il s'en alla aux Indes. Il fut à S. Dominique, à Vrana avec Alonso de Hojeda, à la descouuerte de la Mer du Sud, avec Vasco de Nuñez de Balboa, & à Panama avec Pedrarias. Luy mesme aussi descourut & conquist le País qu'on appelle Peru, &c.

Ce sont les termes de cét Autheur, où s'il nous estoit permis, nous pourrions trouuer beaucoup de choses à reprendre, tant à l'esgard de l'Historien qui les a escrites, que de celuy qui luy en a donné les memoires. Car à moins que de passer pour peu raisonnable, il ne pouuoit, & mesme ne deuoit pas dire ces bassesses de ce Cavalier, apres en auoir si hautement loüé les grandes qualitez, & les memorables faicts d'Armes: tellement qu'il eut beaucoup mieux fait, de taire ces choses, que d'en parler, n'estant ny vrayes, ny vray-semblables.

Pour preuue de cela, ie voudrois bien demander à l'Autheur de ces memoires, d'où il auoit pû sçauoir ces particularitez, touchant la naissance d'un Enfant si pauvre, & si abandonné, qu'il fut trouué à la porte d'une Eglise, & nourry du lait d'une truie. Certainement puis qu'il est aduenü autresfois quelque chose de semblable aux Enfans des grands Princes: & qu'ainsi cela n'est pas sans exemple, quand cette aduenture se trouueroit vraye; elle ne se seroit point ignominieuse pour cét Enfant-là. D'ailleurs, de dire, que son Pere l'ayant recognu pour son Fils, l'enuoyast garder ses pourceaux; c'est une pure extrauagance, qui descouure manifestement la malice, & l'enuie de celuy qui a donné cette relation. La raison est, pource qu'il n'y a point d'apparence, qu'un Cavalier tel que Gonçale Piçarre, Capitaine d'une Compagnie de gens d'Armes à Nauarre, Pere du Marcher, eut tenu si peu de compte de son Fils, que de le faire Porcher. C'est encore une calomnie, de mettre en auant, qu'apres la perte de ses pourceaux, arriuée par sa nonchalence; il changea de país, de crainte d'estre battu: Car ie puis dire veritablement, qu'ayant esté curieux de m'informer en particulier de la verité du fait; j'ay sceu depuis de plusieurs Laboureurs, & autres Paisans du lieu, accoustumez à nourrir ce Bestail, que telle chose n'estoit iamais aduenü.

Quoy qu'il en soit neantmoins, il ne faut pass'estonner de ce-cy, veu que l'ordinaire de l'Enuie est, d'inuenter tousiours de ces impostures, contre les plus vaillans hommes, qui se trou-

uent Chefs de Party, dans le País où il y a de la diuision : Et voila pourquoy tels Calomniateurs ne pouuant ternir le lustre des grandes actions de Dom François Pigarre, pour estre cognus de tout le Monde, s'aduiferent de faire ces pieces, touchant sa naissance, & sa nourriture, pource que ny l'une ny l'autre n'auoient pas esté si bien en leur iour, ny si esclatantes, que les preuues qu'il auoit depuis données de ses Vertus, & de la grandeur de son courage.

Que si de ces comptes fabuleux, il faut passer à des veritez toutes pures ; ie diray * que le Capitaine Gonçale Pigarre, * l'ay
ayant desbauché vne vieille Fille Chrestienne, depuis deue- tasché
nuë enceinte d'un Enfant qu'il recognut à l'instant estre de d'éclair-
son fait, auant mesme qu'elle en accouchast ; & qu'il fit nom- cir le
mer François Pigarre, la maria en suite à vn bon Laboureur, que i'ay
dit d'Alcantura, de qui elle eût vn autre Fils, qui fut aussi ap- pû cet
pellé François Martin d'Alcantura, & par consequent frere de endroit,
Mere, ou, comme dit Gomare, demy Germain de François Pi- qui dans
garre, Conquerant & Gouverneur du Peru ; &, estce luy. mes- l'Espa-
me dont i'ay parlé cy-deuant, qui fut tué avec le Marquis. D'où gnol me
ie concluds, que la bien-seance ne souffre pas, quand mesme ce semble
quel'on dit seroit vray, de faire ces comptes, d'un homme tel fort ob-
que celuy-cy ; qui par ses fameux Exploicts, est comparable aux scur.
plus grands Princes que la Renommée ait iamais vanté : Et partant ne pouuant luy donner les louanges qu'il merite ; il me suffit de dire, que ses beaux faits, & ses Conquestes heroïques, (la dernière desquelles fut celle du Peru) le loient assez. Surquoy ie reprens le fil de mon Histoire.

*DOM DIEGO D'ALMAGRE, S'ESTANT
fait proclamer Gouverneur du Peru, enuoye ses Lettres
de provision en diuers lieux du Royaume, d'où
s'ensuiuent plusieurs Diuisions.*

CHAPITRE X.

LE Marquis fut miserablement tué, comme i'ay dit, par la trop grande confiance de François de Chaves, ou
Y y iij

pluſtoſt par ſon imprudence. Car ſ'il eut fermé les portes, ſuiuant l'ordre qu'il en auoit, tandis que les Ennemis venoient pour les enfoncer; il eut donné loisir au Marquis & aux ſiens de prendre les armes : par le moyen deſquelles, ils fuſſent apparemment venus à bout des gens de Dom Diego; En eſſet, puis que n'eſtant que 4. à ſçauoir le Matquis, ſon Frere, & deux Pages, tous mal'armez; ils tuerent, comme diſent les Autheurs, quatre de leurs Ennemis, & en bleſſerent quelques-vns; il eſt bien à croire, que ſ'ils euſſent eu des Armes à ſuffiſance, & ſi ceux qui ſe iettetent par les ſeſneſtres, les euſſent ſecondez; ils ſe fuſſent trouuez aſſez forts, pour ſe deſſendre de leurs Ennemis, ou meſme pour les vaincre: Et en tout cas, quand cela n'eut pas eſté, il leur pouuoit à la fin venir du ſecours. Mais quoy! lors que le malheur nous accompagne, il eſt difficile qu'avec toutes nos precautions, & tous nos conſeils, nous en puſſions empeſcher l'eſſet. Le Negre dont parle Gomare, fut tué de cette ſorte par les Almagres. Comme il ouit le bruit de ceux qui pourſuiuoient le Marquis, il monta par l'Eſcalier, afin de ſecourir ſon Maiſtre, ou de mourir avec luy. Mais comme il le vid deſia mort, il luy vint en la penſée de verrouiller les portes, pour enfermer les meurtriers, & appeller la Juſtice: ce qu'il ne pût à ſon grand regret, pource qu'il ſortit à meſme temps vn des Conjurez, qui ſe doutant du deſſein de l'Eſclaue, le combattit, & luy oſta la vie à coups d'eſtocadoſ: Du coſté du Marquis il y en eut ſept de tuez, & parmy eux vn ſeruiteur de François de Chaves. Cela fait, les Almagres vinrent à la place, avec leurs eſpées toutes ſanglantes, & ſe mirent à publier leur Victoire. Voilà comme fut tué le Marquis, plus par la nonchalance & le peu de precaution de ſes gens, que par les forces de ſes Ennemis.

Cependant au bruit de ſa mort, voilà toute la Ville en alarme. Les vns s'en alloient criant: *Qu'on preſte main forte au Roy, ſ'en tué le Marquis: Et les autres: C'eſt ſait du Tyran, il eſt deſpiſché, & la mort de Dom Diego d'Almagre eſt vangée*: Durant cette conſuſion, & ce tumulte, les vns & les autres accoururent pour ſouſtenir leur Party; d'où il aduint qu'en la place il y eut quantité de reuoltes, de querelles, & de perſonnes tuées; outre qu'on y en bleſſa dangereuſement pluſieurs autres. Mais à meſme temps, les Partifans du Marquis ſe retirerent, apres qu'on les eut aſſeurez de ſa mort. Alors ceux de Chily, accompagnant à la place

Dom Diego d'Almagre le ieune, crioient avec applaudissement; *Qu'il n'y auoit point d'autre Roy que luy dans tout le Peru* : Comme en effet, apres que certe esmeute fut calme, il se fit reconnoistre par tous les Ordres de la Ville pour Gouverneur du Pais, sans qu'il y eut personne qui l'osast contredire ; Car bien que les Bourgeois fussent presque tous du Party contraire ; si est-ce qu'ils n'osoient dire mot, ny s'opposer à ce que les Victorieux demandoient. En suite de cela, il deposa de leurs Charges les Officiers de Iustice, pour y en mettre d'autres de sa Faction. Il se saisit de la personne des plus puissans, & plus riches Habitans de la Ville des Rois, pour estre du Party contraire au sien : & mesme il se fit Maistre de toute la Ville. Il s'empara de l'or & de l'argent qu'on auoit mis à part pour les droicts du Roy, qui faisoient vne somme notable; & en fit de mesme des biens des Deffuncts, & des Absens : De toutes lesquelles choses il auoit vn extrême besoin, pour en assister les siens, qui estoient reduits, comme i'ay dit, à vne extrême necessité.

Après tout ceuy, il declara Jean de Rada son Lieutenant General; & fit Capitaines Jean Tellode Guzman, natif de Seuille: comme encore François de Chaues, proche parent de cét autre qui fut tué avec le Marquis; les Guerres Ciuiles ayant cela d'effroyable, d'armer les Freres contre les Freres. Il nomma de mesme Christophle Sotelo, & fit plusieurs autres Officiers de Guerre.

Le bruit de cette Reuolution, qui fut aussi-tost semé de toutes parts, attira dans la Ville des Rois, tout ce qu'il y auoit dans le Pais d'Espagnols infortunez, & qui viuoient en Vagabonds, ne sçachant que deuenir: si bien que Dom Diego fit en peu de temps plus de deux cens Hommes de Guerre. Apres s'estre ainsi fortifié, il enuoya des Deputez par toutes les Villes du Peru, comme à Cozco, à Arequepa, aux Charcas, le long de la coste de la Mer, à Truxillo, & bien auant dans le Pais des *Chachopoyas*, pour commander absolument aux Habitans, qu'ils eussent à le receuoir pour Gouverneur de tout cét Empire: En effet, il y eut vne ou deux Villes, qui obeïrent plus par crainte que par amour, pour n'auoir des forces pour resister à 50. Hommes que Dom Diego leur enuoya; mais les autres se deffendirent, comme il sera dit en son lieu,

Dans le Peru, c'est vne commune façon de parler, que de di-

re la *Coste d'en bas*, la *Coste d'en haut*, & autrement *au al & à mont la Coste*, quoy qu'il n'y ait ny à monter, ny à descendre, estant comme elle est de figure ronde; Mais ce que l'on dit, la *Coste en bas*, est à cause de la nouvelle façon de nauiguer, que le vent cause sur cette Mer à ceux qui viennent du Peru à Panama, qui est comme venir *Coste en bas*, pource que le vent y soufflé tousjours, comme au contraire, allant de Panama au Peru, ils disent *Coste en haut*, à raison du contraste du mesme vent, qui les contraint dans leur route de nauiguer comme s'ils alloient *Coste en haut*.

Ord'autant que Jean de Rada faisoit absolument au nom de Dom Diego, toutes les choses que nous auons dites, sans daigner faire part du butin à ses autres Compagnons, ny aux Capitaines qui s'estoient trouuez à la Mort du Marquis; il attira leur hayne sur luy, par le mescontentement qu'ils en eurent, & avec eux, tous les autres principaux, qui resolurent entr'eux de le mettre à mort.

Durant cette commune Rebellion, ils estranglerent François de Chaues, principal Chef de la Ligue, & tuerent quantité de ses Partisans, & entr'autres Anthoine d'Orihuela, natif de Salamanque, bien qu'il ne fut que nouuellement arriué d'Espagne: A quoy toutesfois ils se portèrent, ayant appris que par le chemin il les auoit appelez Tyrans: Ce qui fut cause qu'il se vid depuis en si grande apprehension de sa vie, que pour tascher de la mettre à couuert, il se rangea dans leur Party. Entre les Officiers que Dom Diego enuoya le long de la *Coste*, pour prendre possession des Villes à son nom, faire des leuées pour l'exécution de son dessein, & tirer ensemble & des Cheuaux & des Armes des principaux Seigneurs qu'il auoit pour Ennemis, & qui fauorisoient le Parry contraire, n'estoit pas des moins remarquables vn Cavalier qu'on appelloit Garçia d'Aluarado. Il fut à Truxillo, où il osta l'Intendance à Diego de Mora, bien qu'il fut vn des Lieurenans de Dom Diego d'Almagre, pour auoir sceu qu'il donnoit auis de tout ce qui se passoit à Alonso d'Aluarado, qui tenoit pour les Pigarres.

De plus, en la Ville de S. Michel, il fit trancher la teste à François de Vozmediane, & pareillement à Hernand de Villegas, à quoy furēt ioinctes plusieurs autres inhumanitez. Dans Huanucuil osta la vie à Alonso de Cabreca, qui luy estoit doublement suspect,

suspect, pour auoir esté Maistre d'Hostel du Marquis Dom François Pigarte, & pource qu'il pratiquoit quelques autres de ses Compagnons, pour s'enfuir avec eux, & se jetter dans le Party du Roy. Vn autre Ministre de Dom Diego, qu'on appelloit Diego Mendez, fut au País des Charcas, en la Ville de la Plata, qu'il trouua dépeuplée, pource que les Habitans s'en estoient allez, les vns par vn costé, & les autres par l'autre, au Rendez-vous qu'ils s'estoient donné en la Ville de Cozco', pour se joindre avec ceux du Party du Roy, comme il fera dit en son lieu. Cependant Diego Mendez se seruant de l'occasion, prit en cette Ville-là vne grande quantité d'or, que les Habitans auoient caché, & laissé en la puissance de leurs Sujets Indiens, quise monstrent ordinairement si lasches, que la moindre menace est capable de leur faire descouurir tout ce qu'ils sçauent.

Il faistr encore plus de soixante mille liures de fin argët, tiré des mines de *Porto*, qu'on appelle ainsi vulgairement : car celles de *Potosy* n'estoient pas encore descouuertes : Il confisqua, au profit de Dom Diego d'Almagre, les grandes richesses du Marquis Dom François Pigarte, ensemble, les biens & les corps des Indiens ses Vassaux. Il en fit autant de ceux du Capitaine Diego de Royas, de Perangurez, de Gabriel de Royas, de Garcillasso de la Vega, & de tous les autres principaux de la mesme Ville, qu'il sçauoit estre Amis des Pigartes. Il enuoya pareillement vn autre Agent en la Prouince de *Chachacunya*, où s'acheminoit Alonso d'Aluarasa, pour empescher qu'elle ne se mutinast. Dès que celuy-cyeut veules Lettres de Prouision de Dom Diego, & celles qu'il luy escriuoit en particulier, par lesquelles il luy faisoit de grandes menasses, s'il le contredisoit : pour toute Responce il fit arrester le Messager, & trouuer bon à cent Espagnols qu'il auoit avec luy, de le suiure, & de combattre sous son Drapeau pour le seruice du Roy : Ce qu'ayant appris Dom Diego, il ne se rebuta point pourtant, & ne laissa pas de luy enuoyer d'autres Messagers, pour tascher de le gagner ; Mais il ne voulut iamais obeir, & luy respondit courageusement ; *Qu'il ne le reconnoit point pour Gouverneur, s'il n'en auoit expriés Commandement de sa Maiesté ; Qu'il estoit bien assuré que cela n'arriueroit point, & qu'auoc l'aide de Dieu & de ses Gens, il esperoit de vanger bien-tost la mort du Marquis, & de chastier les insolences commises contre l'Autorité du Roy.* Alonso d'Aluarado resuoina cette resolution,

pour se voir dans vn País, naturellement fortifié par ses hautes Montagnes, comme nous l'auons dit ailleurs: tellement qu'en-
core qu'il n'eut pas beaucoup de monde, il se promettoit neant-
moins de tenir bon, & de se deffendre, iusques à ce qu'il en vint
d'autres du Party des Pigarres, & qu'estans ioincts tous ense-
mble, ils en peussent mieux seruir l'Empereur. Il attendit donc
quel en seroit le succez: & cependant, il leua le plus de gens qu'il
pût par toute la Coste, où nous le laisserons, pour parler des au-
tres, qui firent le mesme que luy.

Quant aux Deputez, qui, pourueus des Lettres de creance, &
du pouuoir que leur donna Dom Diego d'Almage, s'en alle-
rent de sa part à Cozco; ils se garderent bien de faire les insolen-
ces qu'ils auoient faites aux autres Villes: Car bien qu'en celle-
cy, ils ne manquassent pas de Partisans; si est-ce que le Roy en
auoit incomparablement dauantage; avec cette difference,
qu'ils estoient tous hommes riches, puissans, & des principaux
du País, où ils auoient diuers départemens d'Indiens, qui le re-
cognoissoient pour Seigneur. Ceux de Dom Diego au contrai-
re, n'estoient que des chetifs Soldats, entrez depuis peu dans le
País, où ils ne demandoient pas mieux que de semblables Re-
uoltes, pour en pouuoir profiter.

Cette Ville auoit en ce temps-là pour principaux Officiers,
ce mesme Diego de Silua, dont ie me souuiens d'auoir autres-
fois parlé, qui estoit Fils de Felician de Silua, natif de Ciluda-
rodrigo, qui fut depuis Mestre de Camp de Gonzale Pigarre.

Dés aussi-tost que ceux-cy eurent veu les Lettres de prouision;
pour n'irriter ceux du Party de Dom Diego, & pour empescher
par ce moyen qu'ils ne se portassent à quelque Reuolte, ils res-
pondirent avec tout le Corps de Ville, en termes plains de mo-
deration; par où ils ne tesmoignerent ny d'obeyr, ny aussi de
contredire. Car ils alleguerent, que pour vne action si solemnel-
le, il falloit necessairement que Dom Diego leur enuoyast vn
pouuoir plus ample, & que dès qu'il l'auroit fait, ils le receuroiét
pour Gouverneur: Ils dirent cecy pourtant, avec dessein de ne
le point recevoir, mais de l'entretenir, pour gagner le temps, &
se donner loisir cependant de faire venir ceux de leur Party, la
plus-part desquels, absens de la Ville, estoient aux Mines d'or
en leurs Départemens, n'y en ayant presque point en toute la
Iurisdiction de Cozco, qui n'ait de ces Mines.

*PRECAUTIONS DES PRINCIPAUX
de Cozco, pour le service du Roy; Et de Dom Diego,
pour ses interests propres. Vaca de Castro est
Deputé d'Espagne, pour estre Juge de
ce qui s'est passé au Peru.*

CHAPITRE XI.

GOMEZ de Tordoya, ny les principaux du Conseil de Cozco n'estoient point à la Ville, quand les Lettres de provision y arriuerent de la part de Dom Diego d'Almagre. Tordoya se diuertissoit à la chasse, il y auoit sept ou huit iours; A la fin quelques vns de ses gens le furent trouuer, pour l'aduer-tir des choses qui se passoient: Comme il en eut veu la relation dans vne Lettre qui luy fut donnée, & sceala mort du Marquis, duquel il estoit intime Amy & seruiteur, de desplaisir qu'il en eut, il tordit le col à vn Faulcon qu'il auoit sur le poing, & dit ces paroles, *Il ne faut plus désormais penser à se diuertir: ce n'est plus un temps de Chasse, mais de Guerre, où il ne se doit parler que de feu & de sang;* Par où il voulut donner à cognoistre, comme prudent qu'il estoit, que de ce dernier euenement ne pouuoient s'ensuiure que de grandes Rebellions, & de cruels massacres. Alors sans autre retardement, il tira droit à la Ville, où il n'entra que de nuit, pour ne donner de l'ombrage aux Ennemis. D'abord il communiqua de cette affaire avec les principaux du Conseil, auxquels il dit, *Qu'il luy sembloit à propos de mander ceux d'Arequipa, des Charcas, & de toute la Contrée, qui depuis Cozco s'estendoient vers le Midy, pour ioindre ensemble les Espagnols, qui s'y trouueroient espars. Qu'il n'estoit plus question que d'aduiser à ceux qu'on enuoyeroit pour Messagers de ces Aduis: Et que pour luy, il s'offroit de tout son cœur d'estre du nombre des Courriers.* Apres que l'affaire fut ainsi con-cluë, il sortit de Cozco cette mesme nuit, & s'en alla chercher le Capitaine Nunio de Castro, qui estoit alors à quelques 15. lieues de la Ville, en son Département d'Indiens. L'un & l'autre depeschèrent des Courriers à Pedro d'Angures, & à Garcil-

lasso de la Vega, qu'ils aduertirent de tout ce qui estoit arriué iusqu'à lors, pour les obliger à s'en venir promptement à Cozco, afin d'y ioindre au plustost les seruiteurs de sa Maiesté, & de resmoigner en cette occasion, qu'ils luy estoient bons & fidelles subjets.

Après cet ordre donné, Gomez de Tordoya se remit en chemin; & avec toute la diligence possible, s'en alla en queste après le Capitaine Pedro Alvarez Holgoïn, lequel avec plus de cent Espagnols, auoit pris la route de Collao, du costé du Leuant, pour y descouuir quelques terres d'Indiens, qu'on n'auoit pas encore conquises. Il fit tant de diligence, qu'il rencontra celuy qu'il cherchoit, auquel il rendit compte de la mort du Marquis, & du dessein de Dom Diego d'Almagre, qui estoit de se faire Gouverneur de cet Empire-là; Qu'il le supplioit d'estre du Party de ceux qui le vouloient empêcher, & de ne point contredire sa iuste demande, en vne occasion de si grande importance, où ils s'agissoit de seruir Dieu & le Roy; Qu'il eut agreable de vouloir estre Chef de ceux qui se ioindroient en semble pour la deffense de cette cause; Et que pour luy, il s'offroit le premier à estre le moindre de ses Soldats.

Pedro d'Alvarez fut bien aise de se voir traité si obligeamment, par l'offre qu'on luy faisoit d'un Employ qui ne luy pouuoit estre que grandement honorable dans vne cause si iuste: Tellement qu'à l'heure mesme il desploya pour sa Maiesté l'Enseigne de Guerre, enuoyant aux Charcas, & à ceux d'Arequipa diuers Courriers, par le moyen desquels il leur declara son intention, qui estoit de faire filer peu à peu iusques à Cozco, ce qu'il auoit de gens, & de s'en aller deuant avec eux, afin de donner moyen aux autres, qui viendroient après luy, de l'atteindro auant qu'il entrât dans la Ville. Les Courriers rencontrèrent en chemin plusieurs de ceux qui venoient d'Arequipa, & des Charcas; toute la terre estant en esmeute, pour le bruit qu'on faisoit courir confusément, touchant la mort du Marquis.

Ceux d'Arequipa, & des Charcas, se ioignirent à Pedro Alvarez Holgoïn, & se rendirent à Cozco, au nombre d'environ 200. hommes: dequoy s'estant apperceus ceux qui tenoient pour Dom Diego; ils commencerent d'appréhender qu'on ne leur fit quelque mauuais traitement: Ce qui fut cause que plus de 50. d'entr'eux s'enfuirent de nuit, en intention d'aller ioin-

dre Dom Diego, sans que toutesfois il y eut dans leur troupe aucune personne considerable : Mais les Capitaines Nuño de Castro, & Hernand Bachicao, les poursuiuirent vn peu apres avec vingt Carrabins; & par vne embusche qu'ils leur dressèrent, s'estant saisis d'eux, les ramenerent à Cozco, sans leur faire autre mal. Pedro Aluarez Holguin arriua cependant à la Ville, avec vne Compagnie d'essire, & des Cavaliers principaux. Les Communautiez de Cozco les receurent avec vn merueilleux contentement; Et à l'heure mesme il fut proposé, tant par le conseil de la Ville, que par ceux qui venoient d'arriuer, d'essire vn General, pource que Pedro Aluarez Holguin ne fut pas plustost entré dans Cozco, qu'il renonça à la Charge de Capitaine. Ils furent vn peu longs en cette Election, à cause de la diuersité des voix; car ils ne pouuoient pas bien s'accorder ensemble, non pour aucune animosité qu'ils eussent, mais à raison de la preference, pource qu'il y auoit quantité de Cavaliers, esgaux en valeur, & en qualité, qui meritoient cette Charge, & d'autres plus grandes. Mais enfin, du commun consentement de ceux de la Ville, & des nouueaux venus, Pedro Aluarez Holguin, fut esleu Capitaine General du Peru, & Intendant de la Iustice, iusques à ce que l'Empereur y eut mis vn autre ordre plus ample. Cependant, à faute de Gouverneur nommé par sa Maiesté, ceux du Conseil, & de la Ville de Cozco, Capitale de cét Empire-là, pouuoient iustement créer des Ministres, tant pour la Guerre, que pour la Iustice. Ils choisirent pour Mestre de Camp Gomez de Tordoya: Pour Capitaines de gens de Cheual, Garcillasso de la Vega; Comme encore Pedro Ansurez, Nuño de Castro, & Hernand Bachicao, pour mener l'Infanterie; & Martin de Roblez, pour Enseigne de la Colonelle.

Ayant pourueu à ces Charges, ils declarerent la guerre à Dom Diego d'Almagre, pour l'entretienement de laquelle ceux de Cozco promirent de rembourcer à sa Maiesté tous les fraiz que Pedro Aluarez Holguin se trouueroit auoir faits des deniers Royaux, en cas que sa Maiesté ne tint ces deniers pour bien employez; pour assurance dequoy, ils s'offrirent d'obliger non seulement leurs biens, mais encore leurs personnes. Ceux des Charcas, & d'Arequipa, firent encore les mesmes offres, se monstrans tous si ardans, & si prompts à seruir le Roy, que plus de 350. Hommes de Guerre, tant Capitaines que Sol-

dats d'eslite, se trouuerent ioincts ensemble. Ces troupes estant composées de 150. Cheuaux, de cent Arquebusiers, & de cent Picquiers, Pedro Aluarez Holguin, ayant appris qu'Alonse d'Aluorado faisoit des Leuées pour sa Majesté dans le País des *Chachapuyas*, en receut vn extrême contentement avecque ses gens, pource qu'ils apprehendoient que toute la Contrée de Rimac, iusques à Quito, ne fut pour Dom Diego d'Almagre. Ils sceurent encore, qu'il s'en alloit en personne à Cozco, pour donner Bataille, & qu'il auoit avec luy plus de 800. Hommes de Guerre. Les Capitaines tintrent conseil là dessus, où ils conclurent, qu'il ne falloit pas l'attendre à Cozco, mais aller ioindre Alonse d'Aluorado par le chemin de la Montagne, tant pour empescher la rencontre que Dom Diego d'Almagre eut pû faire de luy, que pour assembler les Amis & les seruiteurs du Marquis, qui estoient espars en cette mesme Montagne, où ils cherchoient à se mettre en seureté.

Avec cette resolution, ils sortirent de Cozco, d'où ils ne voulurent point que bougeassent ceux qu'ils iugerent inutiles pour la Guerre, sous vn specieux pretexte, qu'ils mettoient la Ville sous leur garde, & en leur disposition. Ils y laisserent aussi pour Gouverneurs, les Officiers de Iustice que nous auons cy-deuant nommez. Cela fait, ils se mirent en Campagne, tous bien armez, & en fort bon ordre, faisant marcher leurs Coureurs deuant, avec dessein de combattre Dom Diego, s'ils ne pouuoient autrement se saisir de luy.

Pendant que ces choses se passioient dans Cozco, Dom Diego d'Almagre, & ses Capitaines, ne demeuroident point oysifs dans la Ville des Rois. Ils eurent aduis par des Lettres secrettes, que leurs Confidens leur enuoyerent, de tout ce que Pedro Holguin auoit fait, & comme il estoit resolu de prendre sa marche du costé de la Montagne, pour aller ioindre par là Alonse d'Aluorado, n'ayant pas assez de gens pour luy resister. Alors par l'aduis de tous ses Capitaines, Dom Diego conclud de s'en aller au deuant de luy; & pour ce mesme effet, il enuoya querir à l'instant Garcia d'Aluorado, l'un de ses principaux Chefs, qui par le bas de la Coste de Truxillo, estoit allé faire des leuées de gens de cheual & de pied. Ce Capitaine receut les ordres de Dom Diego, bien qu'il se fut desia proposé d'entrer au País des *Chachapuyas*, pour y charger Alonse d'Aluorado, croyant d'auoir de

l'aduantage sur luy. Au bruit de la venuë de Garcia d'Aluaredo, Dom Diego sortit de la Ville des Rois, pour aller contre Pedro Alvarez Holguin. Il auoit avec luy trois cens Hommes de Cheual, tous bien equippez, six vingts Arquebuziers, & plus de 160. Picquiers, qui faisoient en tout près de 600. Hommes, tous gens d'élite, & parmy lesquels estoient plusieurs Cavaliers de ceux que prit avec luy Dom Diego, quand il tua le Marquis, ausquels leur Naissance, & leur Richesses donnoient de l'esclat par dessus les autres. Avant que prendre sa marche, pour ne laisser aucuns Ennemis derriere, & empescher que ceux de la Faction du Marquis, ne prissent pour Chefs ses Fils, comme ceux du Party de son Pere l'auoient pris luy-mesme; il s'aduifa de les chasser du Pais, & pareillement ceux de Gonçalo Pigarte: puis pour tascher de sçauoir si le Marquis n'auoit point laissé quelque Tresor secret, il fit mettre à la gesne Anthoine Picado son Secretaire; Mais voyant qu'il ne confessoit rien, il commanda qu'on le pendit, se vengeant ainsi de l'affront autresfois receu de luy, par la Medaille dont i'ay parlé cy-deuant, qu'il auoit portée pour faire la Figure à ceux de Chily. En allant à Cozco, il fit garder à ses gens vn merueilleux ordre le long du chemin, où ie suis d'aduis de le laisser, & pareillement Pedro Alvarez Holguin dans le sien, pour parler des Ordres que sa Maiesté Imperiale donna en Espagne, ayant appris les Rebellions qui s'estoient passées dans le Peru, iusques à la mort de Dom Diego d'Almagre le vieil. L'Empereur donc nomma le Licencié Vaca de Castro, qui estoit de son Conseil, pour aller informer sur la mort de Dom Diego d'Almagre, avec Commission expresse de n'innouer aucune chose au Gouuernement du Marquis, & qu'en cas qu'il vint à mourir, il eut à prendre possession de sa Charge.

Cet excellent Homme, qui merita bien ce tiltre, pour les actions que nous verrons de luy cy-apres, estoit natif de la Ville de Leon, de la famille des Vacas de Castro, & des Guignons, Surnoms d'ancienne Noblesse, dont il y en a plusieurs autres dans cette Ville Royale. S'estant embarqué à Seuille, pour faire voile au Peru, il eut de si grandes trauerses sur cette Mer du Nord, qu'il arriua plus tard qu'il n'auoit creu à *Nembre de Dios*, d'où il prit la route de Panama: Là il se mit dans vn Nauiure assez beau, mais qui n'estoit pas si bien equipé, ny si bon de

voile, qu'il falloit, pour hastier vn voyage de cette importance: Ce qu'il n'esprouua que trop à son dommage, comme il fut à quelques lieuës de sa Nauigation, luy & ses gens s'estant veu contrains de relascher en la prochaine Coste, à cause du vent: Car il leur fut si contraire, qu'ils perdirent vne Ancre, à faute de laquelle le Nauire, emporté par les Courans, alla donner dans le Golphe qu'ils appellent la *Gorgonna*, du nom de son Isle; lieu si dangereux, que depuis qu'un vaisseau y est vne fois ietté, il est fort difficile qu'il s'en puisse tirer, principalement s'il prend sa route vers le Peru: Ce qui n'empescha pas toutesfois, que le Licencié Vaca de Castro, ne fût faire à ses Mariniers toutes les diligences imaginables, pour sortir de ce Golphe. Mais voyant qu'elles ne seruoient de rien, & qu'il ne pouuoit continuer sa route par Mer, il se resolut d'aller par terre. Ce chemin fut long, & grandement penible, si bien que le Licencié tarda beaucoup plus qu'il n'eut voulu, pource qu'il luy falut passer des Montagnes, & des Riuieres tres-dangereuses, tout incommodé qu'il estoit, & de viures & de santé: d'où il arriua que ce retardement fut cause en partie, de ce que Dom Diego d'Almagre hasta la vengeance de la mort de son Pere, s'imaginant que sa Maiesté en différoir la punition.

Avec les difficultez que ie viens de dire, le Licencié Vaca de Castro, arriua finalement en la Frontiere de *Quitu*, où Pedro de Puellas estoit Lieutenant de Gonzale Pigarre. Si tost qu'il se vid dans vn Pais annexé à son Gouvernement, & qu'il sceut ce qui se passoit dans le Peru, il depescha des Courriers de toutes parts; & par les Lettres qu'il escriuit aux Principaux, il les aduertit du pouuoir que sa Maiesté luy auoit donné, de prendre possession du Gouvernement. Pour ce mesme effet il enuoya des Commissions par toutes les Villes du Peru, y nommant pour Iuges ceux qu'il sceut estre les plus gens de bien, & les moins interessez dans l'un & l'autre Parry.

CEUX DE RIMAC, ET DE PLUSIEURS autres Contrées, reçoivent pour Gouverneur Vaca de Castro. Stratageme de Pedro Alvarez, & de ses Gens, qui sont d'une double intelligence, au preiudice de Dom Diego d'Almagre, & se joignent avec Alonso d'Alarado.

CHAPITRE XII.

ENTRE les Lettres de Creance, & de Prouision, que le Licencié Vaca de Castro enuoya de part, & d'autre; il y en eut vne particuliere, pour Frere Thomas de saint Martin, Prouincial de l'Ordre de saint Dominique: comme aussi pour François de Barçionueuo, & Hierosme d'Aliaga, par où le Licencié les aduertissoit, qu'en attendant son arriuée, ils prissent le soin du Gouuernement de cette Ville-là, & de quelques autres.

Les Depeschés furent données dans le Couuent de saint Dominique, quelques iours apres que Dom Diego fut sorty de la mesme Ville. Or bien que le Pere Prouincial en fut absent, Dom Diego l'ayant mené avec luy, pour authoriser son Entreprise, par le moyen d'une personne de cette consideration; ceux du Conseil neantmoins, ne laisserent pas de s'assembler de nuit: si bien que d'un commun consentement ils obeïrent tous aux Lettres de Mandement, receuant pour Gouverneur de cét Empire, le Licencié Vaca de Castro, & pour son Lieutenant Hierosme d'Aliaga, la teneur des Lettres le portant ainsi. Cela ne fut pas plustost fait, que les Principaux s'enfuyrent à Truxillo, pour l'apprehension qu'ils auoient de Dom Diego, qui n'estoit pas guere loing de là: En effet, dès qu'il eut appris ce nouueau souleuement de la Ville, il fut sur le poinct de s'en aller fondre sur elle, de la saccager, la desmolir, & y mettre le feu, pour se venger de ce qu'en moins de rien elle auoit ainsi quitté son Par-ty: Il se retint neantmoins, de peur qu'il eut, que tandis qu'il s'amuseroit à cela, Pedro Alvarez Holguin ne vint à passer: ce

qui estoit le principal butin qu'il desiroit faire, & la chose la plus importante. Il se remit donc à poursuiure Holguin, & trouua par les traueses qu'il eut, que ce n'estoit pas vne petite besogne. Car incontinant que les nouuelles furent venuës en son Armée, que le Gouverneur de sa Maïesté estoit dans le País, plusieurs des principaux s'enfuyrent, & ent'autres le Pere Provincial, Iean de Saavedra, le Facteur Yllen Suarez de Caruajal, d'Agôere, & Gomez d'Aluorado. Mais malgré tous ces contrastes, Dom Diego ne laissa pas d'aller plus auant; & ce qui redoubla son desplaisir fut, qu'à mesme temps Iean de Rada, son Lieutenant General, tomba malade: Accident fascheux pour luy, & qui le mit aussi dans vn estrange embarras, pource que de peur qu'il ne fut tué par ses Ennemis, il n'osoit point le quitter, & ne pouuoit non plus marcher avec luy. Il fit neantmoins tout ce qu'il pût, pour aller à la rencontre de Pedro Aluarez, ne desirant rien tant que de le trouuer.

Cependant Aluarez eut des nouuelles certaines que l'Ennemy approchoit, & qu'il le surpassoit de beaucoup en nombre de gens: ce qui fit, que pour n'exposer les siens à vn danger apparent, & pour conseruer son Armée, qui toute petite qu'elle estoit, ne laissoit pas d'importer grandement au seruice de sa Maïesté; il assembla ses Capitaines, qu'il pria de ne point combattre ouuertement Dom Diego, mais de l'amuser par quelque tour de souplesse, & par quelque hardy stratageme. Pour cette fin, ils choisirent vingt Caualliers des plus considerables d'entre eux, qui eurent ordre de se mettre deuant en diligence, comme s'ils eussent esté les Coureurs de l'Armée, & de faire en sorte de prendre quelque soldat de ceux de Dom Diego. Ils partirent aussi-tost, & firent si bien qu'ils se faïrent de trois Espions des Ennemis. Pedro Aluarez en fit pendre deux à mesme temps; & taschant d'attirer l'autre par de grandes promesses, l'assëura qu'outre le bien qu'il luy faïroit à l'aduenir, il luy donneroit à present trois mille liures d'or, s'il vouloit retourner au Camp de Dom Diego, pour y pratiquer quelques-vns deses Amis, afin qu'ils se iettassent dans son Party, & le secourussent dans le Combat qu'il auoit resolu de donner dès le poinct du iour, & du costé d'Orient, contre l'Armée de Dom Diego d'Almagres. Qu'il iroit par cét endroit de la Montagne, où il y a tousiours de la neige, qui est vn chemin dont le passage le pourroit moins

rendre suspect; Qu'il assurest ses Amis des mesmes promesses qu'il luy faisoit, & qu'il les contenteroit tous, en les comblant de graces, & de bien-faits, comme le meritoit le seruice qu'il fairoit en cette occasion à l'Empereur son souuerain Maistre. Apres ces belles esperances, ils luy firent iurer fidelité, & l'obligerent par serment de ne descouurir ces choses à personne, disant qu'ils se reposoient sur luy, comme sur vn bon Amy, du plus grand seeret qu'ils eussent.

Le Soldat s'en alla trouuer Dom Diego, qui ne sceut pas plus tost que les Ennemis auoient fait pendre les deux autres, & renuoyé libre celuy cy, sans aucune cause legitime, qu'il le soupçonna, le prit, & luy fit donner la gesne. Le Soldat confessa le secret qu'ils luy auoient communiqué, disant que le dessein de Pedro Aluarez estoit de le combattre en l'vne des aduenues de la Montagne; & qu'il alleguoit pour raison, que ses Ennemis estimant impossible de s'ouurir vn passage par là, se trouueroient surpris, à faute de se tenir sur leurs gardes. Dom Diego voyant que cè Soldat faisoit le mestier d'Espion double, commanda qu'on le pendit: & ne laissant pas neantmoins d'ajouter foy à ses paroles, qui estoit ce que ses Ennemis demandoient, s'alla mettre avec ses gens au passage de la Montagne neigeuse, où ils faillirent à geler de froid, durant trois iours qu'ils y furent; & cependant, il donna loisir à Pedro Aluarez Holguin de passer en assurance. Dom Diego d'Almagre alla quelques lieues avec luy; mais voyant qu'il ne pouoit l'attendre, il prit sa marche du costé de Cozco: de cette façon, Pedro Aluarez eut tout moyen de suivre son chemin; ce qu'il fit aussi, & s'en alla ioindre Alonso d'Aluaredo. Ils s'accueillirent avec vn mutuel contentement, & vne ioye d'autant plus grande, qu'eux & leurs gens, estoient presque tous les premiers qui auoient mis le pied dans le Pais, avecque Dom Pedro d'Aluaredo; tellement qu'ils s'estimoient depuis comme Compagnons, voire comme Freres.

Alors d'un commun consentement, ils escriuirent au Licencié Vaca de Castro, auquel ils rendirent compte de tout leur succez, le suppliant qu'il se hastast de venir à eux, pource que sa presence leur estoit entierement necessaire. Luy cependant, apres auoir despesché les Courriers dont nous auons parlé cy-dessus, s'en alla droit à la Ville de Quito, pour ioindre ceux qui auoient pris leur marche par là. Il fut receu par Laurens d'Al-

dana, Lieutenant du Marquis à Quito, & par Pedro de Puelles, qui l'estoit aussi de Gonzale Pizarre. Le Capitaine Pedro de Vergara, qui s'en alloit à la Conqueste de la Prouince de *Panamaria*, que les Espagnols appellent *Bracamoros*, le fut receuoir aussi, abandonnant vne Ville qu'il auoit fortifiée pour se deffendre de Dom Diego d'Almagre, en cas qu'il y vint, ou qu'il enuoyast des gens contre luy. Auant que le Licencié Vaca de Castro sortit de Quito, il enuoya Pedro de Puelles à Truxillo, afin qu'en cette Ville, & en toute la Frontiere, il eut à faire les preparatifs pour la Guerre. Il despescha de mesme Gomez de Royas, natif de Cuellar, en la Ville de Cozco, avec ordre exprés, qu'il autorisa par les Lettres qu'il luy mit en main, de faire en sorte avec ceux de Cozco, qu'ils le receussent pour Gouverneur: Aussi n'y manqua-t'il point, & courut si bien, qu'il se rendit dans la Ville plustost que Dom Diego d'Almagre, qui fut contraint de retarder quelque temps à Sauza, à raison de la maladie de Jean de Rada, qui mourut depuis en cette mesme Prouince. Gomez de Royas fut tres-bien receu à Cozco, où dès qu'il eut monsté les Lettres de Prouision, & le pouuoir de Celly qui l'enuoyoit, Vaca de Castro fut admis pour Gouverneur, sans aucune difficulté, pource que les Habitans de cette Ville-là, auoient tousiours persisté dans le seruice de sa Maiesté, & dans la mesme obeïssance, où Pedro Aluarez Holguin les auoit laissez.

Vaca de Castro sorty de Quito, prit le chemin de Truxillo, où furent au deuant de luy plusieurs Gentilshommes, de ceux qui estoient espars dans le pais, & plusieurs Soldats aussi, qui desiroient de seruir sa Maiesté. Pedro Aluarez, & ses gens, qui estoient desia dans Truxillo, trouuerent bon d'enuoyer deuant deux hommes exprés, pour aller au nom de tous rendre obeïssance au Gouverneur de sa Maiesté; car c'est ainsi que nous l'appellerons deormais. Ils nommerent pour cette Ambassade Gomez de Tordoya, & Garcillasso de la Vega. Le Gouverneur fut ray de les voir, & encore plus ioyeux de ce que son Party se fortifioit si bien de iour en iour, qu'avec ceux qu'il auoit joints à son arriué à Truxillo, il auoit plus de deux cens Soldats: parmy lesquels estoient les Desertteurs du party de Dom Diego d'Almagre; à sçauoir le Pere Prouincial, Yllen Suarez de Caruajal, Gomez d'Aluarado, Jean de Saavedra, & Diego d'Agüero, qui

estoyent des principaux du païs, sans y comprendre plusieurs autres, qui firent comme eux. On les receut à Truxillo, avec les réjouissances qui sont ordinaires aux gens de Guerre; c'est à dire, au bruit des Tambours, des Trompettes, des Fiffres, & de salues d'Arquebuzades, non pas avec des solemnitez de paix, pource qu'il estoit question icy du fait de la Guerre, plustost que des Loix.

LE GOVVERNEUR NOMME DES Capitaines; enuoye son Armée deuant, & met ordre à plusieurs autres choses, necessaires au service de sa Majesté; Retit de la Mort de Christopble de Sotelo, & de Garcia d'Aluorado.

CHAPITRE XIII.

PEDRO Alvarez Holguin, & avec luy, ses Capitaines, & ses Soldats, outrel'obeïssance par eux renduë au Gouverneur en son absence, luy en renouvelerent encore la protestation, par vn Acte solemnel & publicq, qu'ils luy en firent par escrit; mettant de plus toutel' Armée en sa puissance, & les Capitaines, leurs Charges, & leurs Drappeaux en ses mains. Les Officiers de Justice en firent de mesme, & furent tres bien receus du Gouverneur, qui les confirma de nouveau dans tous les Offices de Paix & de Guerre qu'ils auoient auparauant. Il nomma six Capitaines de Cavalerie, qui furent, Pedro Alvarez Holguin, Alonso d'Aluorado, Pedro Anzures, Gomez d'Aluorado, Garcilasso de la Vega, & Pedro de Puellas. Par mesme moyen il fit trois Capitaines d'Arquebuziers, à sçauoir Pedro de Vergara, Nuño de Castro, & Iean Vellez de Gueuare. Ce dernier estoit homme de Lettres, mais fort bon Soldat, & si ingenieux, qu'il auoit luy-mesme contribué beaucoup à faire les Arquebuzes des Soldats de sa Compagnie; ce qui n'empeschoit pas toutesfois, comme ie viens de dire, qu'à l'exercice des Armes, il n'adjoüst celuy des Lettres. Il en donna des preuues en ce temps-là, & mesme depuis. Car durant les Reuoltes de Gonçale Pizarre, dont il sera parlé cy-apres, estant esleu pour Officier de lu-

Liv. 4.
Ch. 15.

stice, il paroïssoit iusques à midy en Homme d'Estude, vacquoit aux affaires, & donnoit audience aux Parties: puis l'apresdisnée, il se faisoit voir en Soldat, vestu d'un habit de haute couleur, en broderie d'or & d'argent, avec vne plume à son Chapeau, & vne Arquebuzer sur son Espaul, dont il s'exerçoit avec ses gens à tirer au blanc; Et voilà ce qu'en dit Augustin de Carate. D'où il paroist bien, qu'il n'est pas incompatible que les Charges de la Milice, & de la Iustice, ne puissent estre exercées par vne mesme personne qui en est capable. Le Gouverneur choisit encore pour Capitaine d'une Compagnie de Picquiers, Hernand Bachicao, & pour Sergent Major, François de Caruajal, celuy mesme qui fut depuis Mestre de Camp de Gonzalo Pizarre. En la distribution de ces Charges, il n'oublia point Gomez de Tordoya, qu'il fit son Mestre de Camp, se reservant pour soy. mesme l'Estendard Royal, pour faire la Charge de General. Ainsi sous la conduite de tous ses Officiers & Capitaines, il enuoya deuant son Armée, où il y auoit en tout 700. hommes, à sçauoir, 370. Arquebuziers, 160. Picquiers, & tous les autres estoient gens de Cheual. Pedro de Puellas eut ordre de battre l'estrade avec 30. Cheuaux, pour voir s'il ne descouucriroit point l'Ennemy, & de s'en aller par la Montagne iusques à Saussa, où il le deuoit attendre, sans aller plus auant, pource que son intention estoit de prendre le chemin de la Coste, pour s'en aller à la Ville des Rois: Surquoy il voulut encore, que Diego de Mora demeurast vn de ses Lieutenans; & qu'il fit ensemble la Charge de Capitaine.

Comme il eut ainsi pourueu à tout, il fut à la Ville des Rois, où il fit la ionction des gens de Guerre, qui venoient à luy de toutes parts; puis y ayant laissé pour son Lieutenant François de Barrionueuo, & pour Capitaine de Marine, Iean Pedres de Gueuare, il prit la route de Saussa, pour y ioindre ceux de ses Gens qu'il auoit enuoyé deuant. Avecque cela, il laissa ordre, qu'en cas que Dom Diego d'Almagre vint à la Ville des Rois, le Capitaine Iean Pedres de Gueuare, & le Lieutenant François de Barrionueuo, fissent embarquer dans les Vaisseaux qui estoient au Port, les Femmes & les enfans des Habitans, avec tout ce qui s'y trouueroit de Gens inutiles, de peur que l'Ennemy ne les traitast mal, les assurant que Dom Diego l'auroit bien-tost en queu.

Nous le laisserons en chemin, pour parler des dissensions qui aduinrent depuis entre les Almagres: Car alors la Discorde ne se contentoit pas de mettre le feu entre ceux de l'une & de l'autre Faction; il falloit encore que l'Enuie s'en mēlât, & qu'elle aidât à semer de la zizanie, & respandre le sang des Principaux, cette Furie ayant accoustumé de n'en user point autrement.

Dom Diego d'Almagre, comme nous auons dit cy-dessus, prenant sa marche vers Cozco, mit à la place du Dēfunt, Iean de Rada, Christophle de Sotello, & Garcia d'Aluarado, qu'il voulut estre ses principaux Conseillers, & ses plus ptoches Ministres, pour auoir apres luy la premiere autorité dans son Armée. Il enuoya deuant Christophle de Sotello, avec des gens d'eslite, & vn ordre exprés de s'acheminer à Cozco; de prendre possession de cette Place-là, & de la reduire si bien à sa deuotion, qu'elle luy ouurit ses portes à son arriuée. Sotello n'eut point d'executer ses ordres, & d'entrer dans Cozco, pour auoir trouuē la Ville hors de deffence, & despourueuē de gens qui luy pussent resister. La premiere chose qu'il fit alors, fut d'interdire les Officiers de Iustice, que Pedro Aluarado y auoit laissez, & d'en mettre d'autres de son Party à leur place: En suite dequoy il fit prouision de viures, autant qu'il luy fut possible; car ces pauvres Indiens se les ostioient de la bouche, pour en assister les deux Partys, & se laissoient mourir de faim, pour leur donner à manger.

Dom Diego arriué à Cozco, y fit quantité de poudre excellente, pource qu'en ce quātier là, le Salpestre y est incomparablement meilleur, qu'en pas vn autre endroit du Peru. Outre cela, il y fondit quelques pieces d'Artillerie, par l'inuention & l'industrie de certains Leuantins (c'est ainsi qu'on nomme les Grecs dans les Indes) qui l'assisterent tres-volontiers, pour l'amour de Pierre de Candie, qui pour les affronts que Hernand Pigarre luy auoit faits, comme nous l'auons remarqué cy-dessus, s'estoit ietté dans le Party de Dom Diego d'Almagre. Il eut d'autant plus de moyen de faire du Canon, qu'il y a quantité de Metal en tout cēt Empire; Et s'estant ainsi fourny d'Artillerie, il en fit Capitaine Pierre de Candie. A quoy j'adjouste, que ces mēmes Leuantins, assistez par les Orseuvers Indiens, firent encore plusieurs Morions, & Corselliers d'argent, & de cuiure fondus ensemble, qui se trouuerent fort bons.

Cependant le Prince Manco Ynca, qui s'estoit banny volontairement dans les Montagnes, se souvenant de l'amitié qu'il auoit eüe avec Dom Diego d'Almagre le vieux, voulut assister son Fils à ce besoin. Comme il auoit donc en son pouuoir plusieurs sortes d'Armes, comme Cortes de mailles, Cuirasses, Salades, Lances, Espées, Selles d'Armes, & autres despoitilles, que les Indiens auoient gaignées sur les Espagnols, par eux tuez en chemin durant le siege de Cozco; Il l'en pourueut en si grande quantité, qu'il s'y trouua des Cuirasses seules iusques au nombre de deux cens pieces. Mais parmy tant de bonnes Fortunes, qui fauorisoient Dom Diego, par dessus ses souhaits, la Discorde, qui a coustume de se mesler dans les plus grandes prosperitez, troubla les siennes, par deux accidents tragiques, qui arriuerent depuis: Car comme Christophle de Sotello, & Garcia d'Aluaro, estoient Chefs, & Membres principaux de cette Armée, au lieu de s'vnir ensemble, & de s'accorder, pour mieux faire executer leurs Ordres en la Conqueste de cét Empire; ils se querelloient à tout propos, pour la moindre chose que ce fut. Comme donc il ne leur restoit plus rien qu'à se declarer ouvertement Ennemis, pource qu'ils l'estoient desia dans l'ame, & l'estoient si bien, qu'il ne se pouuoit rien adiouster à leur haines; ils se querellerent vn iour en place publique, & furent si pointilleux en ce contraste, qu'encore qu'ils ne pensassent pas d'en venir si auant, le malheur voulut pourtant, que Garcia d'Aluaro osta la vie à Christophle de Sotello. Or pource qu'en qualité de Chefs principaux, ils auoient tous deux quantité d'Armés, il y en eut aussi plusieurs, qui accoururent au bruit de cette querelle, où la Dissention se trouua si grande, qu'il y eut eu beaucoup de personnes tuées, si Dom Diego ne fut accouru. Il tascha d'abord de pacifier ce differend par belles paroles, & ne laissa pas toutesfois d'estre d'autât plus fâché de la mort de Christophle de Sotello, qu'il ne manquoit point aux occasions d'en estre assisté; Mais il n'en dit mot pour l'heure: & dissimulant le mieux qu'il pût, il en différa la punition à vn autre temps plus favorable. Toutesfois, quelque ingenieux qu'il se monstret à se desguiser, il ne sceut empescher que Garcia d'Aluaro ne s'en apperceut, & que son procedé ne luy donnât de l'ombrage: d'où il aduint, qu'apprehendant le malheur qui le menaçoit, & ne sachant par quel moyen appaiser Dom Diego, il se tenoit soigneusement

gneusement sur ses gardes ; Mais comme il vid que toutes les precautions ne luy seruoient de rien , & que tost ou tard Dom Diego se vengeroit de luy , il resolut de le tuer , sur l'esperance qu'il eut que le Gouverneur luy pardonneroit facilement cette mort , & qu'en outre elle luy feroit oublier les fautes passées , & celles de ses Amis. Il mit donc en deliberation avec eux , ce qu'il deuoit faire , pour venir à bout de son dessein : Sarquoy ils demeurèrent d'accord , que Dom Garcia d'Aluorado feroit vn Festin solennel , où il inuiteroit Dom Diego , qu'il le pourroit ainsi tuer aisément , en se seruant de l'aduan tage du lieu , & de l'assistance de ses Amis. Ils prirent donc iour pour ce Festin , où Dom Diego ne voulut point refuser d'aller , pour ne mettre en euidence l'animosité qu'il tenoit cachée : Neantmoins , comme aduisé qu'il estoit , il ne soubçonna rien de bon de cela , & fit semblant de se trouuer mal au iour assigné , afin que son indisposition luy seruit d'excuse. Augustin de Carate dit à ce propos ce qui s'ensuit.

Lin. 4.
Ch. 14.

Garcia d'Aluorado voyant routes choses prestes , & qu'il n'estoit plus question que d'exccuter son dessein , prit un bon nombre de ses Amis , pour aller importuner Dom Diego de se trouuer au Festin : Et comme il s'en alloit à luy , il rencontra par le chemin Martin Carillo , auquel il se descouurit , & qui luy dit pour resons , Que si il le vouloit croire , il n'iroit point plus auant , de peur qu'on ne le tuat : ce qui luy fut encore confirmé par vn autre soldat. Cela ne pût empescher qu'il ne fut trouuer Dom Diego , qui s'estoit mis sur son liét , ayant fait cacher dans sa Chambre vn nombre de Cavaliers secrettement armez. Dès que Garcia d'Aluorado fut entré dans l'Antichambre avec ses gens , s'adressant à luy : Ne plaist-il pas , dit-il , à vostre Seigneutie , de se leuer , pour se venir vn peu resioüyr ? Ce n'est rien que de vostre mal : quelque peu que vous mangiez , nous vous aurons tousiours pour Chef du Festin. A cela , Dom Diego luy fit responce , Qu'il le vouloit bien ; & demandant son manreau se leua du liét , où il estoit couché sur le costé , ne laissant pas d'auoir son Espée , & son Poignard , & sous son pourpoint sa cotte de Maille. Tous ceux qui estoient alors dans la Chambre , commencerent à sortir , à la reserve de Garcia d'Aluorado , & de Dom Diego , qui ne le prirent , pource qu'à l'instinct Jean de Rada ferma la porte , & se ietta sur Garcia d'Aluorado. Vous estes pris , s'écria-t'il , Dom Diego mit à desfin temps la main à l'Espée , & apres l'auoir frappé : Ce n'est pas assez , dit-il , de l'auoir fait Prisonnier , il faut

qu'il en meure. A ces mots sortirent de leur retraite Iean de Balsa, Alonse de Saluedra, Diego Mendrez, Frere de Rodrigo Orgonien, & quelques autres qu'on auoit fait cacher, ainsi que t'ay dit, qui luy donnerent unt de coups, qu'ils l'acheuerent de iur. Ce qu'on ne sceut pas plustost dans la Ville; qu'il y en eut quelque sorte d'esmeute, que Dom Diego appaisa neantmoins, estant sorti à la place: ce qu'il ne fit pas sans grande raison, apprehendant que parmy les Musins, il n'y eut quelques Amis de Garcia d'Aluarado, &c.

A ces paroles d'Augustin de Carate se rapportent à peu près, celles de François Lopez de Gomare, où ie vous renuoye, pour vous dire que l'autre Soldat, que Carate ne nomme point, qui aduertit Garcia d'Aluarado de ne point aller chez Dom Diego, s'appelloit Augustin Solado. Où vous remarquerez aussi que ç'a esté par mesgarde qu'on a mis en auant, que Iean de Rada (que nous auons dit estre mort à Saussa) auoit fermé la porte: puis que par consequent ce ne pouuoit estre luy & que ce fut veritablement Pedro Doniate, que Dom Diego auoit fait son Mestre de Camp, pour recompense de ce seruice qu'il luy auoit rendu si à poinct.

DOM DIEGO D'ALMAGRE VA CHER-
cher le Gouverneur, & Gonzale Pizarre sort de
la Canelle, apres y auoir souffert plusieurs
grands trauaux.

CHAPITRE XIV.

QUELQUES iours apres que le tumulte causé par la mort de Garcia d'Aluarado, fut appaisé, Dom Diego se resolut à aller contre le Gouverneur Vaca de Castro, ayant appris qu'au sortir de la Ville des Rois, il l'auoit demandé: C'est pourquoy il luy vouloit maintenant donner à connoistre, qu'il ne le craignoit point: Et qu'au contraire, c'estoit à luy à le craindre, pour les fortes troupes qu'il menoit: car son Armée estoit composée de 700. Espagnols, dont il y a voit 200. Arquebustiers, 250. Picquiers, sans y comprendre les Halebardiers mesléz parmy eux, & 250. Hommes de Cheual, armez de Cuirasses, de

cottes de maille, & des harnois mesmes que l'ay dit auoir esté
nouuellement forgez: ce qui fait dire à Gomare, *Que les gens* Ch. 14.
d'Almagre estoient plus lestes & mieux armez, que n'auoient iamis
esté ceux de son Pere, & de Picarre. Qu'il auoit au reste, pour
appuyer ses Forces, quantité de bonne Artillerie, en laquelle il se
fioit fort, & grand nombre d'Indiens, &c. A quoy cét Auteur
adjouste vn peu plus bas; *Qu'il fit Jean de Balsa General de son*
Armée, & Pedro Donate Mestre de Camp, &c.

Auec ces preparatifs & ces Forces, Dom Diego d'Almagre
s'en alla en queste du Gouverneur Vaca de Castro, en intention
de luy donner Bataille. Il fit 50. lieuës, auant que d'entrer en la
Prouince qu'on appelle *Vilca*, d'où l'Armée Royale, à ce qu'on
luy dit, n'estoit esloignée que de 30. lieuës. Mais nous les quit-
terons l'vn & l'autre, pour reuenir à Gonçale Picarre: Car assen-
rément nous l'auons laissé, & ses Gens avec luy, en des necessi-
tez & des travaux incomparablement plus grands, puis qu'ils
auoient à combattre des Riuieres extraordinairement im-
petueuses; des Lacs, & des Marescages qu'on ne pouuoit passer à
gué; & des Montagnes extrêmement rudes, & presque inacces-
sibles, couuertes d'arbres de prodigieuse grosseur, comme il est
remarqué par Gomare, qui dans la Relation de la descouuerte Ch. 35.
que Vincent Yañez Pinçon, fit de ce País, ayant raconté ses di-
uerfes Aduantures, dit pour conclusion de tous ces Prodiges.

*Que ceux qui descouuurent ces terres les premiers, porterent de l'escor-
te de certains Arbres, à peu près semblable à la Canelle, & la peau
d'un de ces Animaux, qui porte ses petites sur son estomach, dans vne
maniere de poche, que la Nature luy a donnée. Eux-mesmes encore di-
soient auoir veu des Arbres si gros, qu'il en falloit plus de 16. hommes,
pour en embrasser vn seul, & contioient cela pour vne merueille bien
estrangere. Outre ces difficultez, & ces obstacles, ceux de Gonçale Pi-
carre auoient aussi à resister à la Faim, cruelle Ennemie de la Nature,
& des Hommes, dont elle a fait mourir vn nombre incroyable dans ces
terres inhabitables.*

Gonçalo Picarre, ayant resolu, comme il a esté dit, de retour-
ner au Peru, quitta la Riuiere, tournant du costé du Septen-
trion, & chemina par des País montagneux, où se presentoi-
ent tousiours à luy de nouvelles traueses; de sorte que luy & les
siens, estoient contrains la plus-part du temps, de se faire pas-
sage à force de bras; ce qu'ils pouuoient bien à peine, à cause de

leur faiblesse; car ils ne se nourrissoient que d'herbes, & de racines sauvages, encore s'estimoient-ils bien-heureux lors qu'ils en pouvoient trouver. Quand ils rencontroient des Lacs, & des Marefcages qu'ils pouvoient passer à gué, les plus forts d'entr'eux chargeoient les Malades sur leurs espauls; à quoy Gonzalo Pigarte, & ses Capitaines, trauailloient avec ardeur, pour encourager les autres par leur exemple, & firent ainsi plus de 300. lieues, sans que leurs trauaux diminuassent en rien, & sans se pouoir tirer des peines que nous auons racontées: Par où l'on pourra s'imaginer, combien de maux ils souffrirent durant les 400. lieues de chemin qu'ils firent en allant, & les 300. qu'il leur falut faire de mesme pour s'en retourner. Sur quoy ie diray, que ce fut assurément vne faim estrange que la leur, puis que pour y resister, ils furent contraincts de manger iusques au dernier de leurs Cheuaux, apres auoir desia mangé les Leuriers, & les autres chiens qu'ils menoient, Animaux qui ont seruy beaucoup en la Cōqueste des Indes, ainsi que nous l'auons remarqué dans Nostre Histoire de la Floride. Ie diray bien dauantage: c'est qu'au rapport de Gomare, il y en eut qui furent tentez de manger leurs Compagnons morts, suivant la pernicieuse coutume des Barbares de ces Montagnes. Car en effet, il y en eut plusieurs qui moururent de faim, & qui ne pouuant auoir de la chair de Cheual qu'en fort petite quantité, se nourrissoient d'herbes inconnuës, qui leur manquoient bien souuent, à faute desquelles, il faloit qu'ils perissent: tellement que c'estoit vne chose fort pitoyable, de voir sur de si rudes Montagnes, des Espagnols & des Indiens, qui de trois en trois, & de quatre en quatre, tant du plus que du moins, s'en alloient traissant leur vie, sans pouoir à peine faire vn pas, tant ils estoient abbatuz de langueur, comme nous l'auons remarqué dans le Voyage de Garcilasso de la Vega.

Ce n'estoit pas vne de leurs moindres peines, que la faute qu'ils auoient de sel, faisant quelque fois, selon Carate, plus de deux cens lieues de chemin, sans en pouoir trouver. Car en ces terres desertes, ils ne sçauoient où en prendre, & personne ne leur pouoit enseigner le moyen d'y suppléer par quelque autre chose: De là s'ensuiuoit en leur personne, vne insupportable corruption d'humeurs, & de cette corruption, vne si grande faiblesse, qu'ils ne pouoient, ny trauailler, ny marcher: tellement

Ch. 14.

Liu. 4.

Ch. 5.

qu'ils pourrissoient tous en vie, & s'infectoient les vns les autres de puanteur, comme l'ay remarqué en l'Histoire de la Floride. Ces miseres s'augmentoient par les grandes incommoditez de la pluye, & d'un País plein de marescages; où ils ne furent pas long-temps qu'à cause de cette grande humidité, tous leurs habits se pourrissent sur eux, si bien que depuis le plus grand iusques au moindre, ils se virent contraincts d'aller nus, & de couvrir de feuilles d'arbres les parties que la pudeur, & la bien-seance veulent que l'on cache. Que s'il leur seruoit en quelque chose de se trouuer dans vn País fort chaud, il leur estoit d'ailleurs extrêmement incommodé, pource qu'en de si rudes Montagnes, il leur faisoit marcher, à tout coup, par des endroits tous plains de ronces & d'espines, qui leur deschiroient la peau, & les mettoient tous en sang.

Ainsi la faim, la misere & les trauaux que Gonçale Pigarres & ses gens souffrirent, priuerent de vie les 4000. Indiens, qui partirent pour la descouuerte de ces Terres, & par consequent avec eux mourut aussi ce braue Indien, qui osta les Lances aux deux Cavaliers dont j'ay fait mention ailleurs, & qui estoit si tendrement aymé de Gonçale, qu'il pleura sa Mort, comme il eut fait celle de l'un de ses Freres, qu'il n'aymoit pas moins aussi cōme il le dit plusieurs fois depuis. Dans ce mal heureux Voyage perirent de mesme deux cens dix Espagnols, de trois cens & quarante qui l'entreprirent, sans y comprendre les 50. Soldats que François d'Orellana leua. Les quatre vingts qui resterent en vie, apres auoir trauersé 300. lieues de Montagnes, arriuerent en vn País plus descouuert, & moins marescageux, où ils trouuerent plusieurs bestes Fauues, dont ils tuerent quelques-vnes à coups d'Arbalestes, & d'Arquebuses, employant à cette chasse ce peu qui leur estoit resté de poudre. Des peaux de ces Animaux sauages, ils en firent comme des Brayers, ou des Callons extrêmement courts, pour en couvrir leurs parties honteuses: Et pouuoit-on bien dire que c'estoit pitié de les voir ainsi deualisez, avec des Espées sans fourreau, & toutes rotillées; sans chausses, sans chemise, ny sans habits; tous noirs par le corps, & si descharnez, qu'ils ne se cognoissoient point les vns les autres.

En ce miserable equipage ils arriuerent à la Frontiere de Quitu, où ils rendirent graces à Dieu de les auoir desliurez de si

grands traux, & de si effroyables dangers. Or comme ils n'en pouuoient plus de faim, quand ils se mettoient à table, c'estoit avec vne si grande enuie de se saouler, qu'il falloit qu'eux-mesmes se preferiussent leur portion, pour ne trop manger, & se creuer ainsi, à force d'indigestions, & de cruditez d'estomach: Entr'eux neantmoins il s'en trouuoit d'autres, qui pour estre de complexion differente, ne pouuoient manger, comme ils eussent voulu, pource que leur estomach estoit si accoustumé à l'abstinence, & au ieusne, qu'il refusoit ce qu'ils luy donnoient.

Ceux de Quitu furent inconrinant aduertis de leur arriuee, & ce leur fut vn assez grand desplaisir de ne les pouuoir assister comme ils eussent voulu, pource que les Guerres de Dom Diego d'Almagre, où les principaux de leurs Habitans s'en estoient allez, auoient à moitié despeuplé leur Ville: Ceux qui s'y trouuerent pourtant, firent vn effort pour enuoyer à Gonçalo Pigarre, & à ses gens des habillemens, dont ils auoient besoin plus que de toute autre chose. Mais pour les raisons que ie viens de dire, ils n'en pûrent auoir que six complets, encore falloit-il que plusieurs y contribuassent, & que chacun apportat sa piece, à sçauoir l'un vne Cape, ou vne Casaque, l'autre vn pourpoint, ou des chausses, l'autre vn chapeau, & l'autre du linge. Comme ils eurent ces habits, il fut resolu entr'eux de les reseruer pour Gonçalo Pigarre, & pour autres cinq de sa suite, pource qu'il leur estoit impossible d'en donner à tous.

Ils se pourueurent apres d'une douzaine de Cheuaux, n'en pouuant recouurer dauantage, pour auoir esté tous emmenez par ceux qui s'en estoient allé seruir sa Maiesté contre Dom Diego d'Almagre. Avec ces Cheuaux, ils enuoyerent quantité de viures à Gonçalo Pigarre, auquel ils eussent donné, s'ils eussent pû, tous les mets les plus delicieux du Monde: Car ce Cavalier estoit si bien dans l'esprit d'un chascun, qu'il n'y en auoit point, & n'y en aura iamais de plus aymé que luy dans tout le Peru; aussi est-il vray que par les grandes Qualitez de son Amie, gaignant, comme il faisoit, les affections des Estrangers, il pouuoit bien à plus forte raison s'acquérir celles des siens.

Après cela, ils nommerent douze des principaux de la Ville, pour aller complimenter de leur part Gonçalo Pigarre, & luy faire leur petit present: Ils s'acheminèrent donc vers luy, qu'ils trouuerent à plus de 30. lieuës de la Ville, où les vns & les autres,

se receurent mutuellement, avecque tant de tendresse, qu'ils en resperdirent des larmes de ioye. Gonçalo, & ses gens, accueillirent ainsi ceux de Quitu, avec vne allegresse d'autant plus grande, qu'ils ne croyoient pas iamais les reuoir, apres tant de trauaux qu'ils auoient soufferts: Et d'un autre costé ceux de la Ville pleuroient de les voir en si piteux estat; & d'apprendre que ceux de leurs Compagnons qui manquoient, estoient les vns morts de faim, & les autres demeurez en vie sur les Montagnes, pour n'auoir pas la force de s'en tirer; Mais enfin, ils se consolèrent ensemble quand ils vinrent à considerer, qu'il n'y auoit point de remede au passé, & que toutes les larmes qu'ils pourroient resperdre à l'aduenir, leur seroient entierement inutiles.

GONCALO PICARRE ENTRE' DANS
*Quitu, escrit au Gouverneur, & luy offre sa Personne & ses Gens; Responſe du Gouverneur, & le Par-
 ty qu'il veut faire à Dom Diego d'Almagre.*

CHAPITRE XV.

GONCALO Picarre, & pareillement ses Capitaines, & ses Soldats, receurent avec reconnoissance le Present que ceux de Quitu leur enuoyent. Mais comme ils virent que les Habits, & les Viures qu'on auoit mis sur les cheuaux, n'estoient que pour les Capitaines; ils ne voulurent, dit Carate, ny se mon-
 strer autrement qu'ils estoient, ny monter à cheual, pour garder en tout, comme bons Soldats, cette iuste egalité qui leur doit estre recomman-
 dable: Estant donc entrez vn matin dans la Ville de Quitu, en l'equi-
 page que nous auons dit; la premiere chose qu'ils firent, fut de s'en al-
 ler droit à l'Eglise entendre la Messe, & rendre graces à Dieu, de ce
 qu'il luy auoit plu les destiurer de tant de miseres.

Liv. 4.
 Ch. 5.

C'est ce que dit Augustin de Carate: Mais il oublie vne chose bien remarquable, q'il ne souuient d'auoir ouy dire à des per-
 sonnes dignes de Foy, & qui en pouuoient parler pour l'auoir
 veüe C'est que les douz Deputez de Quitu, qui auoient appor-
 té le Present à Gonçalo Picarre, voyant que luy, ny les Capitai-

nes, n'auoient point voulu s'habiller, ny monter à cheual, & qu'ils estoient resolus d'entrer dans la Ville tous nuds, comme ils estoient, s'aduiferent d'en faire de mesme, & de les accompagner en cette Entrée, sans auoir non plus qu'eux, ny vestemens, ny souliers; posant les leurs à dessein, pour auoir part à l'estime, & à la gloire que meritoient de si vaillans hommes. Apres tant de trauaux, si constamment endurez, & si courageusement vaincus; ils entrèrent tous de compagnie dans la Ville, en aussi mauuaise equipage les vns que les autres; de quoy ceux de Quito sceurent fort bon gré à leurs Deputez. Ayant oüy la Messe, ils receurent Gonçalo Pigarre, avec tout le bon accueil qu'ils luy pûrent faire: resinoignant d'estre infiniment aises de le voir en vie avec ses gens, bien que d'ailleurs ils fussent extrêmement fachez de ce que leur mauuaise Fortune les auoit reduits en vn estat qui ne pouuoit estre pire. Ils firent leur entrée dans Quito, vers le commencement de Iuin, l'an 1542. ayant esté en leur Voyage deux ans & demy, bien qu'à faute de bons Memoires vn Autheur ait dit, qu'ils n'y furent que 18. mois. Ils s'arrestèrent quelque temps à Quito, où chacun d'eux s'equipa le mieux qu'il pût. Gonçalo Pigarre apprit cependant la mort du Marquis son Frere; ensemble la Rebellion de Dom Diego d'Almagre, & sa desobeïssance contre les Ordres de sa Maiesté. Il sceut pareillement l'arriuée du Licencié Vaca de Castro, nommé pour Gouverneur de ce grand Empire: Et comme ils'en alloit pour suivre Dom Diego d'Almagre, assisté de tous les Amis & Confidens du feu Marquis son Frere. Tellement qu'il creut estre de son deuoir, de ne point laisser échapper vne si bonne occasion de seruir sa Maiesté, & d'aller joindre son Armée, où la plus-part des Soldats auoient esté ses Compagnons, dans les plus fameux Exploits des Guerres passées. Il seruit donc au Gouverneur des Lettres fort-obligeantes, par lesquelles (apres luy auoir rendu compte de son Voyage) il s'offrit à le seruir avec ses gens, comme le moindre de ses Soldats.

Le Gouverneur luy fit responce aussi-tost, louant son courage, & son zele au seruice de sa Maiesté, qu'il dit ne deuoit pas estre sans recognoissance: Et pour ce qui le regardoit en particulier; il l'assura qu'il estoit tres content de l'offre qu'il luy faisoit, tant de sa Personne que de celle de ses Gens, qu'il

scauoit

ſçauoit eſtre infatigables dans les trauaux de la Guerre; Mais qu'il le prioit bieñ fort, & luy mandoit meſme au nom de ſa Maieſté, de ſe vouloir tenir à Quitu, pour ſ'y repoſer des peines paſſées, & qu'il ne manqueroit point de le mander, lors qu'il en ſeroit temps, & qu'on auroit beſoin de luy, pour le ſeruice de l'Empereur.

Le Gouverneur ne voulut pas que Gonçalo Piçarre allaſt à l'Armée, pour pluſieurs raiſons aſſez conſiderables. Car comme il ne deſeſperoit pas de reduire Dom Diego d'Almagre à quelque accommodement; il eſtoit bien aiſe d'en eſſoigner les obſtacles, pour n'en venir à vne Bataille; pource que de la façon qu'il voyoit ces deux Partys irritez, il apprehendoit la ruine entiere de l'un & de l'autre: voilà pourquoy, comme aduiſé qu'il eſtoit, il vouloit empeſcher le ſanglant maſſacre qui ſe deuoit fai- e apparemment de tant d'hommes de courage.

Il luy ſembloit d'ailleurs, que ſi Gonçalo Piçarre venoit à l'Armée, Dom Diego n'accepteroit iamais, & ne daigneroit pas meſme ouïr aucune des cōditions qu'on luy pourroit offrir: loint qu'il n'oſeroit non plus ſe mettre ſous le pouuoir du Gouverneur, de peur qu'il auroit que Gonçalo Piçarre ne ſe vengeaſt cruellement de luy, d'autant qu'il n'ignoroit pas, qu'eſtant ay-mé generalement d'un chacun, il gouverneroit tout dans l'Armée.

C'eſtoit là l'intention du Gouverneur, qui toute plauſible qu'elle ſembloit, ne laiſſoit pas pourtant de choquer quelques Eſprits malicieux, & de les porter à dire, qu'ils apprehendoient que ſi Gonçalo Piçarre venoit au Camp, il n'y fut eſlu General d'un commun conſentement: n'y ayant perſonne qui ne luy voulut du bien; ouere que ſon humeur aguerrie, & la grandeur de ſon Courage, le rendoient digne de cette Charge: quoy qu'il en fut neantmoins, il ne laiſſa pas d'obeïr au mandement du Gouverneur, & ſe tint dans Quitu, iuſques à la fin de cette Guerre.

Ceux à qui on auoit donné en charge les Fils du Marquis, & de Gonçalo Piçarre, eurent ordre auſſi de ne bouger des Villes de ſainct Michel, & de Truxillo; le Gouverneur leur enioignant, de ne point mener leurs Pupils en la Ville des Rois, qu'ils n'eufſent de luy de plus particulieres nouuelles ſur cét article: là: Sur quoy il leur remonſtra, que pour eſtre en paix, & en aſſeurance,

il estoit meilleur pour eux de se tenir loing que de s'approcher. D'où les Mefdisans conclurent malicieusement, Qu'il le faisoit exprés, pour les esloigner de luy, bien qu'ils ne fussent que des Enfans.

Le Gouverneur ayant mis l'ordre que i'ay dit, prit sa marche vers *Huamanga*, pour auoir sceu que Dom Diego approchoit de cette Ville-là, où il desiroit passionnément d'entrer; Car cette Place passoit pour forte, pour estre enuironnée de grandes Fondrières, & de profondes Creuasses, au lieu où le terrein s'esbouloit, ce qui en rendoit facheuses les aduenues. Il s'aduifa pour ceteffect, d'enuoyer deuant le Capitaine Castro, avec ses Arquebuziers, afin de se saisir d'un Coustau fort rude, qui est sur le chemin, que les Indiens appellent *Furcu*, & les Espagnols, *Parcos*.

Cependant, comme le Gouverneur passoit outre, on luy vint dire que Dom Diego estoit entré dans la Place; ce qui luy fut vne facheuse nouuelle, voyant qu'il auoit gaigné l'aduantage du lieu. D'ailleurs, ses gens qu'il faisoit marcher à la file, n'estoient pas encore tous venus: voilà pourquoy Alonse d'Aluaredo fut au deuant d'eux, & les halta si bien de marcher, qu'ils arriuerent enfin où estoit le Gouverneur: Les vns firent ce iour-là quatre lieuës, les autres cinq, les autres six, & se trouuerent tous fort las à leur arriuée, à cause de la rudesse du chemin. Ils furent toute cette nuit sous les armes, pour auoir appris que Dom Diego n'estoit qu'à deux lieuës de là: Mais le lendemain, ils sceurent de leurs Coureurs, qu'on leur auoit donné vne faulx alarme, & que l'Ennemy estoit loing de la Ville. Cette nouuelle leur mit vn peu l'esprit en repos, & les obligea d'aller à *Huamanga*, où neantmoins le Gouverneur ne fut pas longtemps, pource qu'il ne trouuoit point, qu'en cas qu'ils en salut venir à vne Bataille, comme on l'apprehendoit, il fut à propos de la donner en celieu-là, où l'on ne pouuoit faire bien manier les cheuaux, dont il auoit plus grand nombre que Dom Diego, & desquels aussi il esperoit de se preualoir beaucoup: Il sortit donc de la Ville, en la Campagne appelée *Chupas*, d'où il enuoya deux Deputez à l'Ennemy: l'un nommé François Dydiacaez, & l'autre, Diego Mercado, qui luy dirent, *Que le Gouverneur s'offroit au nom de sa Maiesté à luy pardonner tout le passé, si posant les Armes, il se vouloit mettre sous l'Estandart Royal, & qu'en*

ce cas-là, on l'assureroit d'une recompense. Dom Diego respondit, Qu'il accepteroit le Party, pourueu que l'abolition fut generale, tant pour luy, que pour les siens, & qu'on luy voulut donner de plus, le Gouuernement du nouveau Royaume de Toledé, les Mines d'or, & les Départemens d'Indiens que son Pere auoit eus.

Dom Diego fit cette folle demande, pource qu'un peu auparavant qu'on luy fit ces offres, vn Prestre * luy dit, Qu'on te- * Qui demeu- roit à Panama. mis en grace: Voulant de plus, qu'il eut le Gouuernement de la nouvelle Toledé, qui estoit à Cozco: Et qu'au reste il meritoit bien quelque douceur pour de si bonnes nouuelles.

Luy-mesme encore l'assura, Que Vaca de Castro auoit peu de gens de Guerre, tous mal armez, & mal contans. Or bien qu'il y eut peu d'apparence de croire ces choses; Dom Diego neantmoins ne laissa pas de le faire, pour luy estre fauorables; si bien qu'enflé de courage, il fit pour la response, la demande que j'ay dite, se persuadant que le Gouverneur, pour n'auoir (comme on luy auoit fait accroire) des Forces à suffisance, luy accorderoit ce qu'il voudroit.

Le Licencié Vaca de Castro ayant enuoyé les Deputez susdits, depecha par vn autre endroit vn soldat, qu'on appelloit Alonse Garcia, avec des Lettres de prouision, & de creance, adressées à plusieurs Capitaines & Caualliers principaux, par lesquelles il leur promettoit pardon du passé, & de grands Départemens d'Indiens. Ce Messager s'habilla en Indien, afin d'estre moins cogneu, & s'esloigna le plus qu'il pût des grands chemins, pour ne rencontrer personne; Mais il fut si malheureux, qu'ayant neigé tous les iours passez, les Coureurs de Dom Diego, qui auoient tousiours l'œil au guet, s'apperceurent de la trace que ses pieds auoient faite: si bien que le suivant à la piste; ils l'attraperent enfin, & le mirent entre les mains de Dom Diego, avec toutes ses depesches. Il n'est pas à croire, disent Gomare & Carate, combien il fut fâché de ce double stratageme qu'on luy iouoit: ce qui luy fit dire, Qu'il n'estoit pas seant à des Canalliers, ny à des Ministres de l'Empereur, de parler d'Accommodement d'un costé, & de l'autre, d'enuoyer sous main des Capitaines, & des Soldats, pour les faire mutiner: D'où il aduint, que de despit qu'il en eut, il fit pendre le Messager, tant pour s'estre desguisé, que pour auoir esté trouué saisi de lettres factieuses; Puis en la pre-

sence mesme des Deputez de l'Empereur, il commanda à ses gens de se tenir prests pour la Bataille. Il promit de plus à quiconque tueroit vn des Ennemis, qu'il auroit vn Département d'Indiens, la confiscation de ses biens, de sa Personne, & de celle mesme de sa Femme. Cela fait, il respondit au Gouverneur, *Qu'il ne luy obeyroit iamais, tant qu'il auroit avec luy les plus grands de ses Ennemis*, qui estoient Pedro Aluarez Holguin, Alonso d'Aluaredo, Gomez de Tordoya, Jean de Saaucedra, Garcillasso de la Vega, Yllen Suarez de Caruajal, Gomez d'Aluaredo, & tous les autres Cavaliers qui tenoient pour le Party des Pigarres.

Or ce que Dom Diego fit cette response, fut pour oster au Gouverneur toute esperance d'Accord, n'estant pas possible qu'es'il esloignoit de luy les principaux de la Faction contraire, il pût luy seul combattre Dom Diego. Il luy fit dire encore, *Qu'il ne deuoit nullement attendre qu'aucun de ses Soldats le quittât. Qu'ils estoient tous resolu de se battre courageusement, & de defendre le Pays contre tout le monde; Qu'en vn mot il le verroit par experience, s'il le vouloit attendre, & qu'il partoît à l'instant pour l'aller trouver.* Aussi n'y manqua-t'il pas en effet; & suiuy de ses Gens, qui se tenoient prests, il s'en alla droit au Gouverneur, avec dessein de luy donner Bataille; ce que non seulement luy, mais tous les siens desiroient, pour estre tous generalement fachez du double tour qu'on leur auoit ioué. Ce qui seruit grandement pour les fortifier dans le seruice & dans l'amitié de Dom Diego, tant s'en faut qu'ils eussent volonté de l'abandonner, alleguant d'vne commune voix, que le Gouverneur leur en pourroit bien faire autant, & violer la parole qu'il leur auroit donnée, sans se soucier de leur tenir promesse: D'où ils conclurent, de mourir tous les Armes à la main, sans vouloir ouïr parler d'Accommodement. A quoy neantmoins il est à croire qu'ils eussent presté l'oreille, moyennant vne Abolition signée de sa Maïesté, sans la surprise par eux faite du Messager de Dom Diego.

LE LICENCIE' VACA DE CASTRO,
 & Dom Diego d'Almagre, mettent en Ordonnance
 leurs Gens. Commencement de la Bataille, où le
 Capitaine Pierre de Candie est mis à mort.

CHAPITRE XVI.

LE Gouverneur prit garde, que par la Responce de Dom Diego d'Almagre, plusieurs des siens auoient esté rebutez de la Bataille, disant, Qu'ils estoient tous en alarme, & mesme scandalisez de ce que sa Maiesté n'auoit point approuué celle des Salines, puis que pour l'auoir donnée, Hernand Pizarre estoit detenu dans vne estroite Prison: Et que pour eux ils apprehendoient de tomber dans vne semblable faute. Tellement que pour remedier à l'inconuenient que pouuoit causer l'apprehension de ses Gens, & les satisfaire par ce moyen; il voulut qu'on informât de la vie de Dom Diego d'Almagre, qui auoit mis à mort le Marquis, & plusieurs autres personnes; confisqué les biens d'autrui, pour se les approprier, donné des Départemens d'Indiens, sans commission de sa Maiesté, mis sur pied des gens de Guerre contre l'Estendart Royal, & deffié le Gouverneur au Combat, à la teste de son Armée. Ce qui fut cause que pour iustifier son intention, en la presence de tous les siens, le Gouverneur signa la sentence, qu'il prononça contre luy, par laquelle il le declara atteint & conuaincu du crime de leze Maiesté, le condamnant pour punition, & ceux de sa suite, à perdre la vie, & les biens ensemble.

Comme il eut donné cette sentence, il requit les Capitaines, & les Soldats de son Armée, qu'ils eussent à luy prester main forte, pour l'exécuter en qualité de Ministre de sa Maiesté, & de Gouverneur de cét Empire-là: Et d'autant qu'il luy sembla, qu'après la Responce desesperée de Dom Diego d'Almagre, & sa Rebellion manifeste, ce seroit folie de luy parler d'auantage d'Accommodement; Il fit tenir prests ses Gens, pour le combattre, à cause qu'on luy vint dire que l'Ennemy approchoit.

Alors les voyant tous au Champ de Bataille, il les harangua

succinctement, & leur dit, *Qu'ils considerassent bien qui il estoit, d'où il venoit, & pour qui il combattoit, Que la possession de ce grand Empire dependoit de leur courage, & du valeureux effort qu'ils feroient en cette occasion, où ny luy ny eux ne pouvoient se sauuer de la mort, s'ils estoient vaincus: Qu'au contraire, s'ils demeueroient victorieux, pour le consentement qu'ils auroient d'auoir seruy le Roy, comme ils y estoient obligez, en qualité de fidelles subiets, ils se rendroient maistres de leurs biens, & de leurs Départemens d'Indiens; Et que ceux qui n'en auroient aucuns, seroient par luy-mesme recommandez à sa Maiesté, qui ne vouloit auoir ces Terres, que pour les donner à ceux qui l'auroient fidèlement seruy.*

A ces paroles, il adiousta, *Qu'il voyoit bien que ces exhortations ne seruoient de rien, pour animer de si braues Canaliers, & de si vaillans Soldats; & que c'estoit pluslost à eux à l'encourager luy-mesme par leur exemple, qu'il suiroit tousiours tres-volontiers; ne demandant pas mieux que de marcher à la teste de l'Auant-garde, & de rompre sa Lance tout le premier.*

Ils respondirent à ces paroles, *Qu'ils se laisseroient tailler en pieces, pluslost que d'estre vaincus, & que chacun en son particulier combattroit en homme de cœur, pour en remporter la victoire.* En suite dequoy, les Capitaines prièrent instamment le Gouverneur, de ne se point mettre à la teste de l'Auant-garde, pource que de sa conseruation dependoit celle de toute son Armée: d'où ils conclurent, *Qu'il feroit mieux de se tenir à l'arriere-garde avec 300 Caualliers, pour obseruer les Ennemis, donner sur eux quand il le faudroit, & soulager ainsi ses gens en les secourant.* Le Gouverneur sollicité par ses Capitaines, leur donna les mains, & consentit d'estre des derniers, bien qu'il desirât passionnement de commander à l'Auant-garde.

Après cette resolution, ils se tintent tous sous les Armes, n'attendant plus qu'après Dom Diego, qu'ils scauoient estre à deux lieues de là. Le lendemain il arriva des Coureurs, qui dirent qu'il n'estoit qu'à demy lieuë, & qu'il hastoit sa marche, en intention de donner Bataille. Le Gouverneur mit à mesme temps ses gens en ordonnance. L'Estendart estoit à main droite, où commandoit Alonse d'Aluarado, & entre les mains de Christophle de Barrientos, natif de Ciudad-Rodrigo, & des principaux de Truxillo, où il auoit vn Département d'Indiens. Pedro Aluarez Holguin, Gomez d'Aluarado, Garcillasso de la

Vega, Pedro Hansurez Capitaines de gens de cheual, tenoient la gauche de l'Infanterie. Les vns & les autres, comme dit Ca- Liv. 4.
rate, marchoient d'un bel ordre en la premiere file, porrant de Ch. 18.
fort bonne grace leurs Cornettes & leurs Drappeaux, & au milieu des deux Escadrons de gens d'Armes, estoient les Capitaines Pedro de Vergara, & Iean Velez de Gueuare, avec l'Infanterie. Nuño de Castro se mit deuant avec ses Arquebusers, pour commencer l'escarmouche, & faire retraicte quand il en seroit temps, du costé de la Caualerie : Cependant Vaca de Castro demouroit ferme à l'arriere-garde, & se tenoit vn peu à l'escart, pour obseruer les Ennemis, & secourir les siens au besoin, comme il fit tres-iudicieusement, & d'un grand courage.

Pedro Aluarez Holguin portoit sous ses Armes vne Casaque de Damas blane decoupée, disant, pour railler les Ennemis, *Qu'ils auoient accoustumé de tirer au terrain ; mais qu'ils ne s'entendoient point à donner au blanc.* Les gens du Gouverneur se tenoient ainsi en ordonnance, tandis qu'il estoit toujours apres à regarder s'il ne descouueroit point Dom Diego d'Almagre, qui parut enfin dans vne plaine, d'où il s'alla mettre sur vne eminence, assez loing de l'Armée Royale, si bien que les vns & les autres estoient hors de la portée du Canon. Son Sergent Major, qu'on appelloit Pedro Suarez, qui auoit appris son mestier en Italie, & qui le sçauoit fort bien, ayant reconneu l'aduantage que la scituation du lieu luy donnoit sur les Ennemis, rangea d'un costé les gens de cheual, & de l'autre les hommes de pied, avec leur General Iean Balsa, leur Mestres de Camp Pedro d'Oñate, & leurs Capitaines Iean Telles de Guzman, Diego Mendez, Iean d'Oña, Martin de Bilbao, Diego de Hojeda, & Malauez : Ils auoient tous des Compagnies fort lestes, & dont les soldats ne demandoient qu'à iouer des mains, pour gaigner le pais, & se faire des Vassaux. Le Sergent major dressa ses batteries, commandées par Pierre de Candie tout au deuant de ces Escadrons, & les pointes du costé d'où ses Ennemis le pouuoient combattre.

Ayant ainsi mis ses Hommes en ordonnance, il s'en alla droit à Dom Diego, & le trouuant entre des gens de cheual & de pied, avec neuf ou dix Cavaliers, qui luy seruoient comme de Gardes. *Vostre Seigneurie*, luy dit-il, *à ses gens en si bon ordre, & tant à aduantage, soit pour la nature du lieu, soit pour la*

force de son Artillerie, que pour venir à bout de ses Ennemis, sans y employer ny Lance ny Espée; elle n'a qu'à se tenir comme elle est dans son poste; Car ie suis bien assuré que de quelque part qu'ils puissent venir, ils seront mis en desfrousse, & en pieces, sans auoir moyen de s'approcher iusqu'à la portée d'une Arquebuzze. Où il est à remarquer, que lors que les gens de Dom Diego commencerent à se ranger en Bataille, il estoit desia sitard, qu'il n'y auoit pas deux heures de Soleil.

Ceux de Vaca de Castro ne furent pas bien d'accord s'ils deuoient combattre, ou non, ce iour-là. Mais François de Caruajal Sergent Maior, qui ne manquoit pas d'experience en semblables occasions, leur dit, *Qu'il ne falloit point differer plus longtemps la Bataille, quand mesme on eut deu combattre de nuit; Que de faire autrement, ce seroit donner courage aux Ennemis, & l'oster aux leurs, plusieurs desquels, voyant ceste lascheté, s'iroient ieter dans le Party de Dom Diego.*

Toutes ces considerations firent refoudre à la Bataille le Gouverneur, qui dit agreablement, *Qu'il eut bien voulu alors auoir la mesme puissance qu'ent autresfois Iosué de commander au Soleil.* Luy donc, & les siens marcherent contre l'Escadron de Dom Diego, qui fit à l'instant iouer son Artillerie. Mais pource que François de Caruajal cognut fort bien, que s'ils alloient droit à l'Escadron de l'Ennemy, ils receuroient en effet vn grand eschec de leur Artillerie, qui estoit fort bonne, il fit prendre vne autre route à ses gens, à la faueur d'vn coustau, dont l'éminence les mettoit à couuert. Par ce chemin-là, ils entrerent tous en vne raze campagne, où ils sembloient deuoir estre exposez à vn apparent danger du Canon. Cela n'aduint pas toutesfois: Car Pierre de Candie, qui commandoit l'Artillerie, la faisoit tirer de telle sorte d'en haut, que les coups n'en estoient nuisibles à personne. Dequoy s'estant apperceu Dom Diego, il le fut charger à grands coups de Lance, dont il le tua près des Canons mesmes. Cela fait, il seietta du cheual en bas; & transporté de rage d'auoir esté laschement trahy par son Capitaine, monta sur vne piece de Canon, & mesme iusqu'à la bouche, si bien que par la pesanteur de son corps l'ayant poinctée plus bas,

Liu. 4.

Ch. 19.

Ch. 130. il y fit mettre le feu, sans qu'il en bougeast: l'effet en fut tel, que le boulet donna dans l'Armée de Vaca de Castro, qu'il entr'ou-

urit, comme disent Carate & Gomare. Mais ces deux Autheurs

ne font mention, ny de la mort de Pierre de Candie, ny de ceux que ce boulet emporta, qui furent 17. de nombre; Que si Dom Diego d'Almagre se fut tenu dans son poste, il n'auroit pas eu besoin de combattre, mais il eut assurément gagné la Victoire, suivant l'assurance que Pedro d'Asuarez, son Sergent Maior, luy auoit donnée, tellement qu'il ne la perdit que par la trahison de son Capitaine. Il est necessaire de sçauoir à ce propos, que Pierre de Candie, considerant que Hernand Pizarre, qui l'auoit offensé, comme nous auons dit en son lieu, estoit Prisonnier en Espagne; & que d'ailleurs, le Marquis, du pouoir duquel il s'estoit seruy pour l'offenser, ne viuoit plus, si bien que par ce moyen il s'estoit vangé de l'un & del'autre; se mit dans l'esprit, que puis qu'il y auoit vn nouveau Gouverneur dans le Pais, ce seroit tres-mal fait à luy que de laisser perdre le fruiet des serui-ces, qu'il auoit rendus, en aidant à conquerir cét Empire; Et partant qu'il valoit mieux se resoudre de seruir sa Maiesté. Ce qu'il fit sçauoir depuis au Gouverneur, par vn Homme exprés qu'il luy enuoya secretement, pour luy dire, Qu'il n'apprehendast point l'Artillerie, Que c'estoit luy qui la commandoit, & qu'il seroit en sorte, que ses gens n'en receuroient aucun dommage, ainsi qu'il l'accomplit en effet; Et ce fut la principale cause qui obligea le Gouverneur à donner bataille, comme effectiue-ment il la donna, sans que toutesfois Pierre de Candie pût iouir de ses pretensions.

CONTINUATION DE LA CRUELLE

Bataille des Chupas; Desroute des Almagres;

Victoire du Gouverneur; Et fuite de

Dom Diego.

CHAPITRE XVII.

LEs Capitaines de sa Maiesté, & le Sergent Major Caruajal, voyant leurs Bataillons ouuerts, & leur Infanterie en alarme, se mirent à l'aduenue du sentier que le Boulet auoit fait, & firent tenir serrez leurs Gens; Puis, pour empescher par leur re-

tardement, qu'on n'eut loisir de tirer encore ; ils firent donner avec furie ; & abandonnerent mesme leur Canon , pour auoir moins d'embaras dans le Combat.

Les Capitaines de Dom Diego d'Almagre, comme gens mal entendus en leur Mestier, & maladuisez, en ce qui leur estoit le plus necessaire, voyant, que leurs Ennemis couroient en foule contre eux, semirent incontinent à crier. *Qu'ils viennent, dirent-ils, ces Poltrons, qui cherchant à gagner de l'honneur à nostre dommage, nous pensent surprendre; & s'imaginant que nous les craignons, parce que nous ne daignons bouger, nous veulent combattre en laches. A eux, à eux: nous ne scaurions plus souffrir cét affront.* Par ces paroles hautement proferées ; ces Brauaches obligerent Dom Diego à passer oultre avec ses gens, qui le firent avec tant d'imprudence, qu'ils s'allerent mettre deuant leur propre Artillerie: Ce qu'apperceuant leur Sergent Maior Pedro Suarez, il en fut si fâché, que s'adressant à Dom Diego, *Monseigneur, luy di-il tout haut, si vous eussiez voulu garder mon ordre, & suivre mon Conseil, vous eussiez assurément gagné la Victoire, au lieu que vous la perdrez, pour vous estre laissé gouverner par le caprice d'autrui. Mais pour moy ie ne suis pas d'aduis d'estre aujour'd'huy du nombre des Vaincus; Et puis que vostre Seigneurie ne veut pas que ie sois victorieux dans son Armée; il faut que ie voye si ie le seray dans celle de l'Ennemy.* Ce disant, il monta à cheual, & s'en alla trouuer Vaca de Castro, qu'il sollicita de donner sans relasche sur les Ennemis, luy rendant compte de leurs desordres, & de l'estrange embaras où ils s'estoient mis eux-mesmes.

Vaca de Castro commanda que ses gens hastassent leur marche; & sur la seule Relation de Pedro de Suarez, François de Carvajal se tint desia pour victorieux: Ce qui fit, que comme s'il eut triomphé de l'ignorance des Ennemis; il posa sa Cotte de maille, & son habillement de teste, & dit à ses gens, *Qu'ils ne deuoient pas apprehender le Canon, puis qu'il ne donnoit point sur luy, qui estoit aussi gros que deux des leurs joints ensemble.*

En ce mesme temps, vn homme de grande naissance, qui estoit dans la Cavalerie, voyant que ceux de l'vn & de l'autre Part y alloient choquer, pour n'estre qu'à la portée d'vne Arquebuse, & qu'ainsi ils ne pouuoient se desdire de combattre, se destacha de l'Escadron de Vaca de Castro, en disant tout haut: *Messieurs, ie suis de ceux de Chily, & n'y a celuy qui ne sçache bien*

que du viuant de Dom Diego d'Almagre le vieux, se fua avec luy dans le combat: si bien que comme ie ne sçay point maintenant avec les Almagres, aussi n'est-il pas raisonnable que ie me declare contre eux. Ce disant, il s'escarta de l'Escadron, & se mit en vn lieu, où il y auoit vn Prestre nommé Hernand de Luco, parent du Maistre d'Escole de Panama, celuy mesme qui fut autresfois Compagnon des deux Gouverneurs Almagre & Pizarre. Ce Prestre là tenoit compagnie à vn pauvre Cavalier malade, qui pour n'estre pas en estat de combattre, regardoit faire les autres. Cependant tous ceux de l'Armée blasmerent vniuersellement la poltronnerie de ce beau Gendarme, qui vouloit ainsi sauuer sa vie, en disant qu'il n'estoit de l'vn ny de l'autre Party, sans considerer que cette action le faisoit passer pour Infame. Ce qui fut cause, que les Cavaliers de Vaca de Castro se virent sur le point de le tuer. Aussi l'eussent-ils fait asseurement, s'il ne se fut ietté entre le Prestre, & le Malade, & n'eut ainsi empesché les Soldats de faire leur descharge, de peur qu'ils eurent de ne le pouuoir choisir, sans blesser les autres, au milieu desquels il estoit. Je l'ay autresfois cogneu, & me souuiens mesme, que ie le laissay plein de vie dans l'une des Villes du Peru, au temps que i'en sortis: Je pourrois dire son nom, si ie ne iugeois plus à propos de le taire, apres auoir parlé de sa lascheté, afin de la rendre à iamais odieuse aux hommes de cœur.

Les gens de Vaca de Castro hasterent si bien leur marche, qu'à la fin ils gaagnerent le haut, où estoit Dom Diego avec les siens, presque tous hors de file, & destachez des rangs qu'ils auoient pris au commencement. Les Arquebusiers de Dom Diego les receurent, avec vne furieuse descharge qu'ils firent sur eux, au grand dommage des gens de pied: Le Mestre de Camp Gomez de Tordoya y receut trois Arquebusades, dont il mourut à deux iours de là. Le Capitaine Nuño de Castro, y fut aussi dangereusement blessé, & plusieurs autres y laisserent la vie. Ce que François de Caruajal ayant apperceu, il commanda aux gens de cheval de donner, car il auoit mis toute sa confiance en eux, pour estre plus forts que ceux de Dom Diego. Ce commandement ne leur fut pas plustost fait, qu'ils chargerent ceux de Dom Diego: si bien qu'entr'eux & les autres, se fit vn rude Combat, qui dura vn assez long-temps, sans que l'on pût recognoistre de quel costé penchoit l'aduantage. Le Capi-

taine Pierre Alvarez Holguin y fut tué d'une Arquebusade, pour s'estre fait remarquer entre les autres par son habit blanc, qui estoit cause que les plus adroits d'entre les Arquebusiers, faisoient à l'envy pour le tirer & l'abattre. Les gens de pied de Vaca de Castro s'y porterent aussi vaillamment, & gaagnerent mesme le Canon, dont les Ennemis ne pouvoient s'aider, pour s'estre mis au deuant, soit par leur mauvais ordre, soit pour leur peu d'experience au fait de la Guerre.

Ainsi les vns & les autres s'opiniastrent si fort au Combat, qu'encore qu'il fut nuit close, ils ne laisserent pas de chamailler, sans se cognoistre par d'autres Enseignes, que par les noms de *Chily*, & de *Pachacamac*, qui estoient comme le mot du guet, dont ils se seruoient, pour dire les *Picartes* & les *Almagres*; comme en effet ces noms leur demeurèrent depuis. Le nombre des Morts, du costé de la Caualetie, fut d'aurant plus grand, que les gens-d'Armes, apres auoir rompu leurs Lances, en vinrent aux Espées, puis aux Massuës, & aux Haches d'Armes. L'interest de la Victoire les faisoit ainsi cruellement acharner entr'eux, pource qu'ils scauoient que les Vainqueurs demeureroient Maistres de cét Empire, & de ses grandes richesses: Comme au contraire, les Vaincus les perdroyent, & la vie ensemble. Deux heures de nuit s'estoient passées durant ce Combat, & il y en auoit bien quatre depuis son commencement, sans qu'ils le terminassent encore. Mais enfin le Gouverneur, & ses trente gens-d'Armes s'aduiferent de donner du costé gauche de l'Escadron de Dom Diego, où les Ennemis estoient plus espais: Ils les chargerent vertement; Et ce fut comme vn nouveau Combat, où les Almagres se deffendirent d'abord assez bien: Ils furent contrains pourtant de lascher le pied, si bien que le Gouverneur les mir en destroute, apres y auoir perdu dix ou douze des siens, dont les principaux furent, le Capitaine Ximenes, Mercado de Medina, & Nuño de Montaluo. Or bien que les gens de Dom Diego se trouuassent les plus foibles; si est-ce que dans le Combat, qn ne laissoit pas de part & d'autre de crier; *Victoire*, *Victoire*. Ce qu'oyant Dom Diego, il ioua de son reste, avec ce peu de gens qu'il auoit, & fit des merueilles de sa personne, s'estant meslé parmy les Ennemis sans rien craindre, avec dessein de mourir les Armes à la main: Il s'en demesla pourrant, sans estre ny rué, ny mesme blessé; aussi estoit-il armé à l'aduantage;

outre que les Ennemis ne le reconnurent pas, & que d'ailleurs, comme dit Gomare, il combattoit aussi courageusement qu'on eut peu faire.

Comme donc la Victoire penchoit du costé du Gouverneur, cela fut cause que les plus considerables du Party de Dom Diego, se mirent à crier : *Je suis un tel, & moy un tel, qui ay tué le Marquis* : De sorte qu'ils moururent ainsi, combattant en hommes desesperés, & qui se firent tailler en pieces : plusieurs aussi se sauverent à la faveur de la nuit, quittant leurs Escharpes blanches, & en prenant de rouges, qu'ils ostioient à ceux qu'on auoit tuez à Vaca de Castro.

Durant tout cecy, Dom Diego d'Almagre voyant que la Victoire luy auoit eschappé des mains, & que la Mort le fuyoit de mesme, se tira de la meslée, avec six des siens, qui furent, Diego Mendez, Iean Rodrigues Barragan, Iean de Guzman, & trois autres, dont j'ay oublié les noms. Ils s'en alla droit à Cozco, où pensant ne chercher pas la mort, que ses Ennemis ne luy auoient pû donner, il la trouua parmy ceux qu'il auoit faits ses Creatures dans les principales Charges de la Iustice & de la Milice. Car apres la perte de la Bataille, il ne fut pas plustost arriué à la Ville, qu'il se vid fait Prisonnier par Rodrigo de Salazar, natif de Toledo, son Lieutenant, & par Anthoine Ruys de Gueuare, qu'il auoit fait Iuge ordinaire dans la mesme Ville. De quoy n'estant pas contens, ils prirent encore ceux de sa suite, afin qu'il ne se pût rien adjouster à leur cruauté. Augustin de Carate le remarque par ces paroles. *Ainsi finit le Gouvernement de Dom Diego, qui se vid en un iour Seigneur du Peru, & fut pris le lendemain par un Homme qu'il auoit fait Iuge, & qui de sa propre autorité le fit Prisonnier. Cette Bataille se donna le seiziesme de Septembre 1542.* Liu. 4.
Ch. 19.

Voilà ce qu'en dit Carate, qui par ces termes-là, conclut le Chapitre cité cy dessus. Ce fut de nuit, & enuiron les neuf heures, que le Licencié Vaca de Castro gagna cette Victoire; mais si confusément, qu'il ne la tenoit point pour bien assurée, pource qu'on oyoit encore quelques - vns qui combattoient à la Campagne. De sorte que ne sçachant où estoit Dom Diego, & d'ailleurs, apprehendant qu'il ne se mit en estat de luy pouuoir nuire, il commanda, suiuant l'ordre de son Sergent Major, que les gens de Cheual & de Pied, se tinssent tousiours sous les

Armes, & en estat de combattre, iusques à ce qu'ils sceussent au vray si la Victoire estoit certaine, ou s'il la falloit regagner de nouveau; tellement qu'ils se mirent en ordre, pour n'estre surpris, en cas qu'on leur donnast quelque alarme.

DES PRINCIPAUX CAVALIERS QUI
se trouuerent en cette Bataille; Avec les noms des
Morts; Le chastiment des Coupables, &
la Mort de Dom Diego d'Almagre.

CHAPITRE XXIII.

LE Gouverneur employa la plus-part de la nuit à louer le Courage, tant de ses Capitaines, que de ses autres Cavaliers & Soldats, ausquels il disoit, *Qu'il ne pouuoit assez estimer leur Valeur dans le Combat, & leur Zele ardent au service de leur Roy.* De ces louanges il passoit à d'autres, en publiant les bonnes actions que quelques Particuliers, qu'il nommoit par leur nom, auoient faites en sa presence, monstrant bien par là, qu'ils auoient eu veritablement beaucoup d'affection & de fidelité pour le Marquis Dom François Pigarte, puis qu'ils s'estoient si franchement portez dans les dangers du Combat, pour ne laisser impuny le meurtre commis en sa personne. Il loüa de mesme la prodigieuse vaillance de Dom Diego, & les grands efforts qu'il auoit faits dans la meslée, pour vanger la mort de son Pere; Adjoüstant à cela, que ces merueilles estoient au dessus de son âge, ayant bien à peine atteint la vingtiesme de ses années. Il n'oublia point aussi quelques Capitaines de Dom Diego, qui s'estoient portez en gés de cœur. Mais il admira particulièrement l'adresse, & la bonne conduite de François de Caruajal, qui sans crainte des Atquebusades, ny du Canon mesme, marchant tousiours à la teste des siens, auoit par son industrie fourny du secours, où il en falloit necessairement auoir. Et à vray dire, le Gouverneur n'adiousta rien du sien à ces louanges qu'il leur donna: Car comme il eut moyen d'observer tout ce qui se passa durant le Combat; aussi en pût-il voir & remarquer les particularitez, comme il les rapporte l'une apres l'autre. Les Principaux, qui du costé du Roy

se signalerent en cette Bataille; furent ceux-cy. Le Mestre de Camp, Gomez de Tordoya, le Fauteur Yllen Suarez de Caruajal, & son Frere Benoist de Caruajal, Iean Iules de Hoyeda, Thomas Vasquez, Laurens d'Aldana, Iean de Saavedra, François de Godoy, Diego Maldonado, qui fut depuis surnommé le Riche, Iean de Salas, Frere de l'Archeuesque de Séuille, Inquisteur general, Valdez de Salas, Alonso de Loafiza, Frere de l'Archeuesque de la Ville des Rois, Hierosme de Loayza, Iean de Pancoruo, Alonso Maçuela, Martin de Menezes, Iean de Figueroa, Pedro Alonso Carrasco, Diego de Truxillo, Alonso de Sotto, Anthoine de Quiniones, avec son Frere Suero de Quiniones, & son Cousin Pedro de Quiniones, vieux soldat d'Italie, tous trois proches parens du Gouverneur; Gaspar Iarra, Diego Ortiz de Guzman, Garcia de Melo, qui perdit la main droite au Combat, Pedro de los Rios, & son Frere Diego de los Rios, natifs de Cordoite, François d'Ampuero, Dom Pedro Puerto Carrero, Pedro de Hinoyosa, Diego Centeno, Alonso de Hinoyosa, Iean Alonso Palomino, Dom Gomez de Luna, Cousin germain de Garcillasso de la Vega, Gomez d'Aluarado, Gaspar de Royas, Melchior Verdugo, Lopé de Mendoza, Iean de Barbaran, Michel de la Cerna, Hierosme d'Aliaga, Nicolas & Hierosme de Ribera, qu'on appelloit autrement, pour les distinguer l'un d'avec l'autre; *Ribera le Jeune, & Ribera le Vieux.*

Tous ceux-cy, & plusieurs autres, dont j'ay oublié les noms, se firent remarquer en cette Bataille par leur extrême Valeur, se trouvant tousiours dans les premieres files, où ils furent presque tous blesez. En vn mot, il n'y eut point d'homme considerable en tout le Peru, qui pour la deffense du Party de sa Maïesté ne se rencontrât dans cette Bataille, ainsi que le remarque Gomare. Trois cens Espagnols, qui tenoient pour le Roy, y demeurèrent sur la place: Il y en eut moins dans le Party contraire, & cette Bataille fut d'autant plus sanglante, qu'elle fut passionnément opiniastrée par les Capitaines, dont il y en eut peu qui s'eschappassent. Il y eut plus de 400. blesez, & plusieurs mesme y furent gelez, & comme percluz de leurs membres, à cause de l'extrême violence du froid. Toutes ces paroles sont de comare, qui dit que du costé de Dom Diego furent tuez environ 200. Soldats; Et qui n'appelle pas aussi sans raison cette

Bataille, *Carnaciere*, puis que de 1500. hommes qu'il y auoit en tout, il s'en trouua 500. de tuez, & autant de bleffez: Il est vray que de ces derniers il n'y en eut que cent du costé de Dom. Diego; Et que les autres 400. estoient du Party du Roy. Vn des Soldats de sa Maiesté s'acharna si fort dans ce Combat, qu'apres la Victoire mesme, il ne laissa pas de faire main basse des Almagres: de sorte qu'en ayant tué de sa main iusques à vnze, il le publioit hautement, disant, Qu'en tel & tel endroit, on luy auoit volé vnze mille pezos, & qu'il se tenoit pour vengé, puis qu'il auoit aussi mis à mort vnze de ses Ennemis.

Il se passa cette nuit quantité d'autres euenemens semblables; & ce qu'il y eut plusieurs Bleffez qui gelerent de froid, fut vn effet de la cruelle avarice des Indiens, qui les despoillierent, & de leurs Armes, & de leurs habillemens, les laissant ainsi tous nuds, sans respecter ny l'un ny l'autre Party: outre que l'obscurité de la nuit empeschoit qu'ils ne conneussent personne; Et quand mesme ils en eussent conneu quelqu'un, cela n'eut pas empesché leur vol, puis qu'ils iottoient à tout prendre. Les Vainqueurs n'y purent aussi rauoir leurs Bleffez, qui l'estoient si furieusement, qu'on ne pouuoit les penser, ny les mettre à couuert non plus, pource que l'équipage des Tentes n'estoit pas encore arriué: si bien qu'ils passerent presque tous la nuit au ferein: car on ne pût dresser que deux Tentes, pour le soulagement de Gomez de Tordoya, de Pedro Anzures, de Gomez d'Aluarado, de Garcillasso de la Vega, & d'autres Capitaines, si dangereusement bleffez, qu'on ne pensoit pas qu'ils en pussent reschapper. Tous les autres, comme ie viens de dire, passerent la nuit au ferein: si bien que c'estoit pitié d'ouïr les cris qu'ils faisoient, causez par la douleur de leurs playes, qu'on n'auoit pas moyen de penser. Les Indiens ne pardonnoient point encore aux Fuyards, qu'ils ne cessioient de poursuivre, n'y ayant rien qu'on n'entreprene sur les Vaincus. Ils tuerent par les chemins Iean de Balza, & dix ou douze soldats de sa suite, sans auoir esgard à sa qualité de Capitaine general. Ils en firent autant en plusieurs autres endroits, où ils ostèrent la vie à quantité d'Espagnols, auxquels il ne seruit de rien de s'enfuir du Combat.

Le lendemain, si tost qu'il fut iour, le Gouverneur enuoya chercher les Bleffez, & prit le soin de les faire penser. Il fit aussi
enterrer.

enterrer les Morts en quatre ou cinq grandes fosses, où ils les ietterent tous, à la reserue de Pedro Aluarez Holguin, de Gomez de Tordoya de Vargas, & d'autres Chefs principaux, dont les Corps portez à *Huamanga*, y furent enseuelis le mieux que l'on pût. Il y eut plus de cent Cavaliers, & enuiron 60. hommes de pied, qui s'enfuirent de la Bataille en la mesme Ville de *Huamanga*, où ils furent contraints de se ietter comme en vn lieu de retraitte. Mais les Habitans, dont il n'y en auoit que fort peu, rendus insolens par la Victoire, se ietterent sur eux aussitost, & les deualiserent tous, en leur ostant leurs Cheuaux, & leurs Armes, que les Vaincus leur cedoient tres volontiers, comme gens qui se rendoient pour auoir la vie sauue dans cette oeuvre charitable d'enseuelir les Morts; il se rencontra ce mesme iour dequoy chastier les Coupables. Car parmy ceux que l'on enterroit, se trouuerent fortuitement les corps de Martin Bilbao d'Arbolanca, de Hinoyeros, & de Martin Carrillo, qui estoient ceux mesmes, qui dans le Combat, comme ie l'ay remarqué cy-deuant, crioient, *Qu'ils auoient tué le Marquis*. Ce qu'ils disoient, ou par malice, ou par desesperoir, afin de mourir promptement; Et bien qu'alors ils fussent percez de coups, on ne laissa pas toutesfois d'en faire iustice; Car ils furent desmembrez, & trainez par les quartiers, vn Crieur marchant deuant, pour en faire scauoir la cause. Ils en firent de mesme de tous les autres qui estoient insolentement souleuez contre le Roy.

Le iour d'apres, le Gouverneur fut à *Huamanga*, où il trouua que le Capitaine diego de Royas, auoit fait trancher la teste à Iean Tello de Guzman, & à Pedro d'Onate, Mestre de Camp de don diego. Le Gouverneur remit le chastiment des autres Coupables au Licencié de la Gama, qui fit semblablement couper le col aux principaux Officiers de don diego, qu'il trouua Prisonniers dans *Huamanga*; qui furent, diego de Hocas, & Anthoine de Cardonas. Il fit pendre aussi Iean Perez, François Peces, Iean Monte, Martin Soto, & avec eux trente des plus Coupables, se contentant de bannir les autres en diuerses Contrées du Royaume.

Comme cette execution se faisoit dans *Huamanga*; le Gouverneur apprit que don diego d'Almagre estoit Prisonnier à Cozco. Ils y en alla tout à mesme temps; & n'y fut pas plustost arriué, qu'il fit executer la Sentence qu'on auoit donnée contre

luy. Car son Procez luy ayant esté fait auant la Bataille, on ne voulut pas perdre le temps à le faire de nouveau, bien que Carate dise le contraire: Il eut la teste tranchée au mesme lieu que son Pere, & par le mesme Bourreau, qui le despoüilla de ses habits, comme il auoit despoüillé son Pere des siens: Il est vray qu'il ne les eut pas tous, pource qu'un homme qui se trouua là, luy donna de l'argent, pour auoir ses Chausses, son Pourpoint, & sa Chemise, qu'il luy laissa. Son corps fut exposé presque tout le iour à la veüe du Monde: Mais enfin, on le porta au Couuent de Nostre dame de la Mercy. On l'enseuelit à costé du Tombeau de son Pere, ou selon quelques-vns, on le ietta dans la mesme Fosse, sans le couvrir d'autre chose, que de ce qu'il se trouua sur luy, & sans autre Office, que de quelques Messes, qu'on fit dire pour son Ame, des aumosnes, qui pour cét effect furent données.

Voila quelle fut la fin de dom diego d'Almagre le Jeune; fin à vray dire, qui fut si approchante de celle de son Pere, qu'il sembla que la Fortune voulût qu'il n'y eut rien de dissemblable entr'eux: Car en effet, & le Pere, & le Fils, eurent tous deux mesme nom; mesme Contage, mesme Hardiesse à la Guerre, mesme Prudence, & mesme Conseil dans la Paix; Estant certain qu'encore que le Fils ne fut qu'en la fleur de son aage, si estoit-ce qu'il ne manquoit point d'esprit, d'adresse, & de conduite, pour auoir esté des son enfance tousiours instruit avecque grand soin. Comme ils finirent leurs iours d'un mesme supplice, & en mesme lieu; aussi n'eurent-ils tous deux qu'un mesme Tombeau. De plus, apres auoir esté si riches & si puissans, ils moururent si pauvres, qu'il les falut enterrer d'Aumosnes, afin qu'il n'y eut rien d'inesgal entr'eux. La perte de l'un & de l'autre arriva par celle de deux Barailles, qui furent données vn Samedi.

Ainsi finit le pauvre dom diego d'Almagre le Jeune, le meilleur Mestif qui nasquit iamais dans tout le nouveau Monde, s'il eut obey au Ministre de son Roy. Il estoit beau de visage, bien fait de sa personne, bon homme de cheval; Et tel en vn mot, qu'il fut grand dommage que sa Rebellion luy coustast la vie, qu'il finit Chrestienement, & avec beaucoup de repentance des fautes commises. Apres sa mort, l'on fit pendre Jean Rodriguez Barragan, l'Alfier Enrique, & autres huit Factieux, qui deuoient aller voir dom diego à Cozco; Gomez Perez, diego

Mendez, & vn autre de leurs Camarades, s'enfuirent de la Prison; Et ne croyant pas de pouuoir iamais trouuer aucun lieu de seurété dans tout le Peru, s'allerent cacher dans les Montagnes, où le Prince Manco Ynga s'estoit retiré. Cinq autres en firent de mesme, & chercherent vn Azile chez l'Ynga, qui les receut courtoisement, mais qui fut en fin fort mal payé par de si mauuais Hostes, l'vn desquels le mit à mort, comme nous dirons cy-apres.

*LA PAIX S'ESTABLIT DANS LE PERU
par le bon Gouvernement du Licencié Vaca de Castro.
Cause essentielle des troubles de ce Royaume-là.*

CHAPITRE XIX:

TOVT ce grand Empire se vid en paix, & dans vne pleine tranquillité, tant par la mort de don diego d'Almagre le Jeune, & de ses principaux Officiers les plus coupables, que par le Bannissement de ceux qui l'estoient le moins. Dès lors il ne se parla plus ny du Nom; ny de la Faction des Almagres dans le Pays. Le Licencié Vaca de Castro, homme des plus aduisez de son temps, le gouverna depuis, avec vne intégrité merueilleuse, & au commun contentement des Espagnols & des Indiens: car il fit des Ordonnances tres-vtiles aux vns & aux autres; de quoy les Indiens particulièrement furent fort satisfaits, disant que les Loix estoient tout à fait conformes à celles de leurs Rois Yncas. Il distribua les départemens d'Indiens qui se trouuerent vacans, à ceux qu'il en iugea les plus dignes, pour les seruites rendus au Roy, durant la Guerre passée: Par mesme moyen il en donna d'autres plus fauorables à leurs Possesseurs, par les Echanges qu'il fit, en les tirant d'une Ville, pour les establir dans l'autre, selon qu'ils le desiroient. Il y eut alors plusieurs Seigneurs, qui du Pais des Charcas s'en vinrent à Cozco, du nombre desquels fut Garcillasso de la Vega, lequel, comme j'ay dit cy-deuant, quitta la Prouince de *Tapacry* pour celle de *Quechua*, de la Nation *Cosanera*, & *Ilusamaphispa*. Or bien qu'en ce passage, tous aduouassent que le Gouverneur ne faisoit rien qui ne

Liv. 4.
Chap. 3.

fut de Iustice, il ne laissa pas toutefois d'y en avoir quelques-uns, qui se croyant meriter les meilleurs départemens qui fussent dans le Peru, dirent tout haut qu'on les avoit oublié. De ce nombre fut un Cavalier qu'on appelloit Hernand Mogollon, natif de la Ville de Badajoz, dont nous avons fait mention dans nostre Histoire de la Floride. Celuy-cy sachant qu'il meritoit beaucoup pour les grands services par luy rendus dans les Conquestes des nouvelles terres, & pour s'estre porté en homme de cœur à la Bataille des Chupas, comme le Licencié Vaca de Castro l'avoit remarqué luy-même, sans que néanmoins il luy fust escheu aucun département d'Indiens, s'en alla trouver le Gouverneur, & luy dit: *Monseigneur, vostre Seigneurie sçaura, s'il luy plaist, que tous viuent en ce Pais aux despens de Mogollon, puis qu'ils luy ostent ce qui luy appartient de droit. Il n'y a que luy, qui meure de faim, apres s'estre trouué à la descouverte de la Floride, comme encore en d'autres Conquestes tres importantes, à la Couronne d'Espagne, & tout nouvellement en la Bataille des Chupas, sous l'Estandard de vostre Seigneurie: C'est pourquoy il est raisonnable, ce me semble, qu'elle ait mémoire de moy, s'il luy plaist, puis que ie n'ay point oublié de servir sa Maïesté.* En effet, le Gouverneur voyant que la demande estoit iuste, luy fit grace d'un département d'Indiens, qui n'estoit pas pourtant des plus grands. Apres cela, pour remedier aux Plaintes des autres Malcontents, & des pauvres Soldats, dont il y avoit quantité, il s'advisa de preucher les Seditions qu'ils y eussent pu faire, les envoyant, & leurs Capitaines, à l'imitation du Marquis don François Pizarre, à la Conqueste de nouvelles terres en ce Pais-là, afin qu'apres avoir esté gaignées & peuplées, elles servissent à l'advenir de nouveaux départemens d'Indiens.

Le Capitaine Pedro de Vergara, eut ordre de s'en retourner en la Prouince *Pacamaru*, qu'il estoit allé conquerir, quand il fut mandé pour venir servir le Roy en cette dernière guerre, d'où il emmena quantité de fort bons hommes. Diego de Rôyas, Nicolas de Heredia, & Philippe cuttierez, natifs de Madrid, furent envoyez en la Prouince que ceux du Pais appellent *Mussu*, & les Espagnols les *Moxos*, où ils engerent plusieurs bons Soldats, qui souffrirent tous beaucoup en ce Voyage, iusques à leur arrivée en la Riviere de la Plâta, dont il sera parlé cy-apres. Le Gouverneur trouva bon aussi, que Gonzalo de Montroy, s'en al-

last au Royaume de Chily, pour y secourir le Capitaine general Pedro de Valdiuia, qui estoit à la Conqueste des Nations de ce Pais-là. Il enuoya parcelllement en la Prouince de *Mullupampa*, le Capitaine Iean Perez de queuare, pour la conquerir s'il pouuoit, apres l'auoir descouuerte luy-mesme, & sceu par diuerfes Relations, qu'il y auoit là du costé du Leuant quantité d'autres Contrées fort vastes, entre les Riuieres d'Orellana Marañon, & de la Plata; Mais que ce Pais-là estoit presque inhabitable, à cause de ses grandes Montagnes, & de ses larges Marefcages: Qu'au reste parmy ce peu d'Indiens qui demeuroident-là, il n'y auoit ny Ciuilité ny Religion, essant si Brutaux qu'ils se mangeoient l'un l'autre, & le Pais si chaud, qu'ils alloient tous nuds.

Le Licencié Vaca de Castro ayant ainsi desambarrassé de Soldats & de nouueaux venus, tout le Pais qu'on nomme Peru, qui depuis Quito, iusques aux Charcas à plus de 700. lieues de longueur, se vid libre par ce moyen, des importunitéz & des fastecheries qu'ils luy donnoient: si bien que depuis il gouerna le Royaume en Paix, & au gré des Habitans, qui luy en donnoient des applaudissemens continuels. Auant que de faire les Loix dont il a esté parlé, il fit venir les Curacas, & les vieux Capitaines, par le moyen desquels il s'enquit avec grand soing, de l'ordre & du Gouvernement de leurs Rois defunts, recueillant de leurs Auis ce qui luy sembloit le meilleur, & pour la conseruation des Espagnols, & pour l'accroissement des Indiens. Il fit venir en suite Gonçalo Pizarre, qui n'auoit bougé de Quito: & l'ayant particulièrement loué des grands travaux qu'il auoit soufferts en ses Conquestes, l'affeura de la part de sa Maiesté, qu'il en auroit récompense: puis il l'enuoya chez luy, au département d'Indiens qu'il auoit aux Charcas: luy disant, Qu'il alast vn peu gouter le repos, qu'à l'aduenir il eut soing de sa santé, & qu'il prit garde à son bien.

Les Indiens se voyant desliurez des troubles & des persecutions des Guerres passées, que deux Factions contraires auoient allumées aux despens des biens, & des vies de ceux du Pais, dont il estoit pery plus de 150000. hommes, comme le remarque Gomare: s'addonnerent tous à cultiuer leurs terres, dont ils recueilloient des prouisions en grande abondance. Cependant, par la diligence des Espagnols, qui iouissoient aussi de la Paix, & se monstroient infatigables à faire valloir leur bien; su-

rent descouuertes plusieurs riches Mines d'or, en diuers endroits du Peru. Les plus precieuses furent celles qui se trouuerent en la Prouince de *Callahuya*, que les Espagnols appellent *Calanaya*, d'où ils tirerent quantité de fin or à 23. & 24. Carrats, comme on le titre enoore aujourdhuy, mais non pas en si grande abondance. Au Ponent de Cozco, en la Prouince de *Quechuya*, qui est peuplée de plusieurs Nations du mesme nom, dans la Contrée qu'ils nomment *Huallaripa*, ils descouurerent pareillement d'autres Mines d'or, non pas si fin que celuy de *Callahuya*, mais qui neantmoins estoit de 20. Carrats, & en si grande quantité, que ie me souuiens qu'apres la descouuerte de ces Mines, les Indiens, Vassaux du Seigneur, à qui elles estoient escheuës en partie, luy apportoint tous les Samedys 2000. liures d'or en poudre. Ils appellent ainsi celuy qu'ils titent comme ils le trouuent, qui est tel que pourroit estre la limeure des autres Metaux: Il est vray qu'il y en a qui n'est pas si menu, & qui ressemble à peu près au son de la farine, parmy lequel se trouuent encore quelques grains qu'ils nomment *pepins*, ou pour mieux dire *graines*, comme peuuent estre celles des Melons, ou des Citrouilles, qui valent trois, quatre, cinq, & six Ducats, tant du plus que du moins, selon qu'elles se rencontrent. D'une si grande quantité d'or il en reuenoit beaucoup aux Fonderies, pour le quint de sa Maiesté, qui estoit vn Tresor innombrable, veu que de cinq Marcs, le Roy en auoit vn, de cinq liures vne; & ainsi de suite, iusques au dernier denier, le mesme droit s'observant en toutes les Marchandises qui venoient d'Espagne.

Parmy ces prosperitez, causées par la bonne conduite d'un Gouverneur si Chrestien, si noble, si prudent, & si zelé au seruice de Dieu & du Roy; tout le Pais du Peru, alloit tousiours de bien en mieux, & se pouuoit dire l'un des plus florissans Empires du Monde, principalement en la Doctrine de nostre sainte Foy Catholique. Car les Espagnols ne se lassoient point de la prescher: Et n'est pas à croire combien les Indiens estoient soigneux de l'apprendre; à quoy ils se plaisoient d'autant plus, qu'ils connoissoient visiblement qu'elle contenoit plusieurs choses, que leurs Rois Yncas leur auoient enseignées en leur Loy naturelle, leur commandant de les observer le plus ponctuellement qu'ils pourroient.

Durant cette felicité publique, qui s'augmentoit de iour en

pour par la predication du saint Euangile, & dans ce haut comble de biens, tant spirituels que temporels, dont les Espagnols du Peru & les Indes iouissoient; l'Ennemy commun du genre humain fit iouer tout à coup d'estranges ressorts, & de furieuses machines. Car pour troubler de si bons succez, il suscita ses Ministres, qui sont, l'Ambition, l'Enuie, la Conuouitise, l'Auariance, la Colere, l'Orgueil, la Discorde, & la Tyrannie, afin que chacun en son particulier empeschast la Conuersion de ces Gentils à la Foy Catholique, qui estoit celle de toutes les choses dont ce Tyran infernal s'affligeoit le plus, d'autant qu'il perdoit par là les Ames qu'il auoit desia gaignées, & qui luy estoient tributaires. Mais nostre Seigneur le permit ainsi par ses Iugemens secrets, & pour la punition de plusieurs, comme il se vid depuis par espreuue. Car quelques personnes, sous pretexte d'estre zelées pour le commun bien des Indiens, sans considerer les grands incōueniens, & les maux encore pires qu'elles cauioient par leur imprudence, lors qu'elles pensoient y remedier; proposerent au Conseil Royal des Indes, que pour le bon Gouvernement des deux Empires de Mexique & du Peru, il falloit faire d'autres Loix, & de nouuelles Ordonnances: à quoy s'opiniastra plus que tous les autres, vn Religieux appellé Frère Barthelemy de las Casas, qui du temps qu'il estoit Prestre seculier, auoit esté dans les Isles de Barlovento, & en la Mexique. Celuy-cy estant depuis entré dans le Cloistre, s'aduisa de proposer plusieurs choses, qu'il dit estre necessaires pour le salut des Ames, & l'accroissement des Droits du Roy: surquoy nous rapportons ce qu'en ont escrit François Lopez de Gomare, Chapelain de sa Maiesté Imperiale, & Augustin de Carate, Controolleur & Tresorier general des Droits Royaux dans le Peru. A quoy i'adiousteray ce qu'un autre Autheur, nommé Diego Fernand, habitant de la Ville de Palence, en a dit dans l'Histoire qu'il a nouuellement faite des affaires des Indes. Là parlant des Diuisions qu'apporterent à Mexique, & au Peru les nouuelles Loix & les Ordonnances faites à la Cour d'Espagne, matiere qu'il prend pour commencer son Liure, il en rend le succez tout à fait conforme au sentiment des autres deux, sans choquer aucunement la Verité, Je diray ce que tous trois en escriuent, & allegueray l'Authoité d'un chacun en particulier: ce que ie trouue à propos pour me contenter, d'autant que ie n'ayme

Ch. 152.
Liu. 5.
Ch. 4.

point à me faire Auteur des choses odieuses, comme sont la plus-part de celles qu'on est contraint nécessairement de dire pour ne dementir la Verité. Et d'autant que celles-cy furent les causes effectiues des grands mal-heurs qui aduinent aux Principaux de cét Empire-là, soit dans l'un, soit dans l'autre Party, ie les produiray icy-suiuant le tesmoignage de leurs Auteurs. Car bien qu'il me pourroit suffire de les alléguer en marge, comme i'ay fait cy-deuant, en scitant le Liure & le Chapitre, si est-ce qu'il me semble plus à propos d'en rapporter le passage mot à mot, de peur que quelque Mefdisant ne me vienne faire accroire que i'ay adiousté à ce qu'ils disent, ou mesme que i'en ay retranché quelque chose: Je n'observeray ceuy pouruant que dans les matieres odieuses; En tout le reste ie leur fourniray de Commentaire, soit en expliquant ce qui s'y trouuera de confus, soit en adioustant ce qu'ils n'auront pas esctit, & que ie scauray estre veritable, pour l'auoir appris de ceux mesmes qui se sont trouuez à ces souleuemens: Car comme ie n'auois que quatre ans, quand le Vice-Roy Blasco Nuñez Vela vlntray Peru, à mesure que ie creus en âge, ie connus plusieurs de ceux dont il est fait mention dans l'Histoire.

Ie patleray donc premierement des grands desordres que ces Ordonnances causerent dans la Mexique, & du bon succès qu'elles ne laisserent pas d'auoir, par la Prudence & le sage Conseil du Iuge député pour les faire executer: Puis ie reuiendray au Peru, & raconteray succinctement les disgraces, les ruines, & les morts qui furent causées en ce Pais-là, par la rigueur, & l'imprudence du Vice-Roy, qu'on enuoya pour les y establir, & pour estre Gouverneur de cét Empire. Or bien que les euene-mens de la Mexique ne soient point de nostre Histoire, si est-ce qu'il me semble à propos de les rapporter icy, pour faire voir combien contraires en ont esté les succès, quoy que ce ne fut qu'un mesme sujet; par où les grands Princes, les Rois, & les Monarques pourront apprendre (puis que c'est l'Histoire qui leur fournit d'Exemples pour bien gouverner leurs Sujets, à ne permettre iamais qu'on fasse des Loix si rigoureuses, ny qu'on establisce des Iugés si seueres, qu'ils obligent, & forcent mesme leurs Sujets, à perdre le respect & l'obeissance qu'ils leur doiuent: Car c'est de là qu'il arrive quelque fois, qu'ils se donnent à d'autres Princes, pour en estre gouvernez: de quoy nous ne de-

ons pas nous estonner beaucoup, puis que l'Histoire anoiennē, & moderne, tant sacrée, que prophane, nous enseignent par diuers Exemples, que iamais aucun Royaume ne s'est reuolté contre son Souuerain, pour aucun bon traitement qu'il en ait receu, mais bien pour ses cruantez & ses tyrannies. Il n'en faut point d'autre preuue que le Peru, qui pour la rigueur qu'on y exerça, fut sur le point de se perdre, & de s'alliener de la Couronne d'Espagne: Ce qu'il eut fait apparemment, si par la Clemence, & la bonté del'Empereur, il n'eust esté restably, comme il se vetra par la suite de cette Histoire.

NOUVELLES LOIX, ET ORDONNANCES
faites à la Cour d'Espagne, pour le Gouverne-
ment des deux Empires de Mexique,
& du Peru.

CHAPITRE XX.

FRERE Barthelemy de las Casas estant venu de la nouvelle Espagne, l'an 1539. & arriué à Madrid, où la Cour estoit alors, se mit incontinent à publier non seulement dans ses Sermons, mais dans ses discours familiers, Qu'il estoit grand Defenseur des Indiens, & fort zelé à leur commun bien. Mais quoy qu'il mit en auant, & soustint mesme des choses, qui sembloient bonnes & saintes, il s'y trouuoit neantmoins ie ne sçay quoy de forterude, & qui en rendoit l'exécution extrêmement difficile. Il les proposa dans le grand Conseil des Indes, où elles ne furent pas bien receuës, mais reiettees, par la prudence du bon Cardinal de Seuille, Dom Garcia de Loaysa, qui presidoit au mesme Conseil, ayant fort long-temps gouverné les Indes. Comme il en auoit donc plus de connoissance que ceux qui les auoient conquises & habitées; aussi sçauoit-il fort bien ce qu'il falloit à ces peuples: Et partant, ce ne fut pas sans quelque grande raison, qu'il ne voulust iamais consentir à la demande de Frere Barthelemy: Luy neantmoins ne relascha point de sa Pretention. qu'il tint cachée dans son Ame iusques en l'an 1542. que l'Empereur Charles V. reuint en Espagne, d'un fort long Voyage.

ge qu'il auoit fait par la France, par le Pais-bas, & par l'Allemagne. Ce grand Prince, comme tres-Catholique se persuada facilement ce que le Frere luy dit, pour le scrupule & les charges de Conscience qu'il luy proposa, s'il ne faisoit traualier aux nouvelles Loix, & à l'execution des Ordonnances qu'il soustenoit deuoir estre faites pour le commun bien des Indiens. Sa Maiesté Imperiale ayant donné là dessus vne longue Audience aux Religieux, fit assembler ses Conseils, & plusieurs Prelats, en qui la suffisance & l'integrité de vie se trouuoient iointes ensemble. L'affaire estant donc proposée, & mise en delibération, alla si auant, qu'en fin la demande de Frere Barthemy eut lieu. Cela se passa pourtant contre les sentimens du Cardinal & du President cy-dessus nommez, ensemble de l'Euesque de Lugo, Dom Iean Suarez de Caruajal, que i'ay autresfois cogneu; du grand Commandeur François de los Cobos, Secetaire de sa Maiesté; de Dom Sebastien Remirez, Euesque de Cuença, & President à Vailladolid, apres l'auoir esté à saint Dominique, & à Mexique, & de Dom Garcia Manrique, Comte d'Ozoruo, & President d'Ordencz; lequel, comme dit Gomare, auoit eu long-temps de grands Employs dans les affaires des Indes, en l'absence du Cardinal Dom Garcia de Loaisa. Car tous ces excellents Hommes, qu'une longue experience auoit rendu capables des plus grandes Negociations des Indes, contredirent les nouvelles Ordonnances, qui furent faites au nombre de 40.

Ch. 52. L'Empereur neantmoins, comme dit Gomare, les signa dans Barcelonne, le 20. Nouembre, l'an 1542. Et la Bataille des *Chupas*, entre le Gouverneur Vacca de Castro, & Dom Diego d'Almagre le Jeune, fut donnée le 15 de Septembre de la mesme année, deux mois & cinq iours auant que les Ordonnances fussent signées. D'où il se void clairement l'extrême soing que prenoit le Diable, d'empescher la Predication du saint Euangile dans le Peru, puis que bien à peine vn si grand feu, comme estoit celuy des Guerres ciuiles, venoit de s'esteindre, qu'il taschoit d'en allumer vn autre plus grand, comme il se verra par les malheurs que causerent plusieurs de ces Ordonnances. Nous en produirons icy quatre seulement, dont les Auteurs font mention. Ce sont les suivantes, qui me semblent conuenables au sujet de nostre Histoire.

La premiere Ordonnance fut, Qu'apres la mort des Conque-

rans, qui se trouueroient auoir des Départemens d'Indiens, dont sa Maiefté les auroit pourueus, ny leurs Femmes, ny leurs Enfans, n'y pûssent succeder; mais que les mesmes Départemens vinsent au Roy, donnant aux Enfans quelque portion du reuenu qui en prouindroit.

La seconde, qu'on ne fit faire aux Indiens aucunes couruées, horsmis aux endroits, où l'on auroit necessairement besoin d'eux; Qu'ils fussent payez de leurs iournées; Qu'on ne les contraignit point aux Mines, ny à la pescherie des Perles; Et qu'on fit la taxe des tributs qu'ils deuoient donner à leurs Seigneurs, en leur laissant libre le trauail de leurs personnes.

La troisieme, Qu'on ostât non seulement les Commanderies & les Départemens d'Indiens, qu'auoient les Euesques, les Hospitaux, & les Monasteres, à ceux qui auroient esté, ou qui seroient à present Presidents, Auditeurs, & Scindies, comme aussi à leurs Lieutenants; Et pareillement aux autres Officiers, tant de la Iustice, que des Droicts Royaux: Et qu'ils ne pussent à l'aduenir auoir sous leur subiection aucuns Indiens, quand mesme ils declareroient de vouloir renoncer à leurs Charges.

Le quatriesme, Que tous les Seigneurs & Commandeurs du Ceuu Perou, qui se trouueroient auoir esté Partisans de la Faction, ou se doit de François Pigarre, ou de Dom Diego d'Almagre, perdroyent enten leurs Indiens de seruiue; Ordonnance, comme dit Diego Fer- dre de nandez, par laquelle personne presque ne pouuoit auoir ny ceux qu' biens, ny subjects dans le Pais: A quoy i'adjoûste que les hom- auoient mes de qualité, soit en la nouuelle Espagne, soit dans le Peru, des In- en estoient aussi frustrez d'ailleurs par la troisieme Loy; pour- diés sous ce qu'ils auoient esté presque tous Officiers de Iustice, ou des leur sub- Droicts Royaux, dans les Charges de Presidents, de Iuges, de ou qui Lieutenants, & de Controolleurs, ou Scindies: de sorte que ces leur e- deux seules Loix, qui s'estendoient par routes les Indes, estoient stoient comme des filers à tout prendre, qui despoillioient ainsi des Re- vassaux- tenus & des terres, ceux qui en estoient possesseurs.

Mais pour mieux entendre ces Ordonnances, il est à propos que nous disions quelque chose de l'intention & du motif, qu'eurent ceux par l'aduis desquels elles se firent, ou qui en furent Autheurs.

Il faut donc sçauoir, touchant la premiere Ordonnance, que les premiers Conquerans des Indes, pour recompense de leurs

seruices, furent gratifiez de plusieurs Despartemens d'Indiens, pour en iouir leur vie durant, & apres eux leur Aîné, ou leur Fille aînée, s'ils n'auoient point d'enfans masles. Depuis, en consideration de ce qu'il leur fut enjoint de se marier, pource qu'on iugea qu'estant dans leur mesnage, ils auroient plus de soing de cultiuier la terre, & de viure en paix, sans se mesler ny de factions, ny de nouveautez, ils adiouterent au bien-fait de ces Despartemens d'Indiens, vne nouuelle grace, qui fut, qu'à faute de Fils, la Femme en pourroit iouir successiuellement, sa vie durant.

La seconde Ordonnance, qui veut, Qu'on n'ait à fouler les Indiens, ny à les charger d'aucunes Couruées, fut pareillement acceptée: pource que l'on fit accroire qu'on ne les payoit point de leurs journées; Et sans mentir, ceux qui mirent cecy en auant, eurent quelque raison, puis qu'en effet ils le pouuoient dire de quelques Espagnols en particulier, qui n'auoient pas la Conscience trop bonne, mais non pas de tous en general; Car il y en auoit plusieurs qui les payoient de leur travail, & qui les traitoient comme leurs propres Enfans: aussi est-il vray, que les Indiens d'alors, & ceux d'aujourd'huy, ne demandent pas mieux, sinon qu'on leur donne de quoy s'entretenir par leur travail, estât comme les Mannœures des Espagnols, dont ils mangent le pain, en les seruant, lors qu'ils se loient à eux pour labourer la terre, ou pour faire la Recolte, & ainsi du reste. D'où il s'ensuit, que d'enjoindre par ordonnance qu'on ne leur donnast aucune besogne; c'estoit leur faire grand tort, & leur oster leur gain, si ce n'est qu'on'imposast vn chastiment à ceux qu'on auroit veritablement conuaincus de les auoir employez sans les payer.

Quant à ce qui est deffendu par la Loy, de faire travailler aux Mines les Indiens, il n'est pas besoin que ie die rien là dessus, mais que ie m'en rapporte aux Indiens mesmes, qui par l'ordre exprés du Gouverneur en la presente année 1611. travaillent aux Mines * de Potosy, & à celles de vif argent, en la Province *Huan-*
 * Cela
 s'entend
 des Mi-
 nes d'ar-
 gent.
ca: Quel'Espagne ne tiretoit point cette grande quantité d'or, & d'argent, qui luy vient tous les ans de ce grand Empire.

Po ut ce qui est de la taxe des Tributs qu'ils deuoient donner à leurs Seigneurs; i'aduoue que cette Ordonnance ne fut point mauuaise: aussi la receut-on avec applaudissement,

lors que le President Pedro dela Gasca, en fit la taxe au Peru: Dequoy ie fus telmoin oculaire. Quant au seruice personnel, i'ay dit qu'en cecy particulierement ils se tromperent, au rapport qu'ils en firent: Estant veritable, qu'à chaque Seigneur on donnoit pour vne partie du tribut, quelque nombre d'Indiens pour le seruice de sa Maison. Adioustez à cela, qu'outre le Département principal, on leur assignoit encore quelques Villages de 40. 50. ou 60 feux, & quelquesfois de plus, avec obligation du seruice qu'ils appelloient personnel, qui cōsistoit à pouruoir la Maison de leurs Maistres, de bois, d'eau, & d'herbes pour leurs cheuaux, car alors il n'y auoit point de paille: Et voila tout le tribut qu'ils leur donnoient; Ce que ie puis prouuer par l'exemple de mon Pere, qui auoit trois de ces Villages dans la vallée de Cozco; l'un desquels s'appelloit *Cayra*, & plusieurs autres des Principaux en auoient aussi aux Frontieres de la mesme Ville. Que s'il arriuoit qu'ils n'eussent aucun de ces hameaux à leur donner, pour leur seruice personnel, ils commandoient en tel cas à ceux du principal Département, que pour vne partie du tribut, ils eussent à donner des Indiens pour le seruice susdit; à quoy il consentoient volontiers, & s'en acquittoient avec non moins de contentement, que de facilité. Ce qui fut cause aussi, que le President Gasca, voyant qu'en cecy particulierement les Seigneurs, & les Vassaux, s'accordoient fort bien, & ne sercbutoient point del'Ordonnance, la laissa comme elle estoit, & n'en voulut point faire mention.

Pour le regard de la troisieme Loy, qui vouloit qu'on ostast aux Euesques, aux Monasteres, & aux Hospitaux, les Départemens d'Indiens, que les Gouverneurs leur auoient donnez, elle sembla si raisonnable, que tous aduoüerent qu'on ne leur faisoit point de tort de leur en ôster la possession: La raison est; pource qu'en les donnant, l'intention des Gouverneurs ne fut nullement de sortir des bornes de la Commission qu'ils auoient de sa Maiesté, qui portoit, comme i'ay dit ailleurs, que la iouissance de ces Départemens ne fut que durant la vie de deux personnes. Or est-il que les Monasteres, les Prelatures, & les Hospitaux estant à perpetuité, ce n'estoit point leur faire iniustice, que de les mettre en esgal partage avec les Conquerans de ces deux Empires.

Le surplus de la troisieme & quatrieme Ordonnance, s'ex-

pliquera cy-apres, dans le Discours des querelles & des Dissensions qui en artiuèrent.

*DES MINISTRES QUI FURENT EN-
uoyez en la Mexique & au Peru, pour faire exe-
cuter les Ordonnances susdites; Avec vne descri-
ption de la Ville Imperiale de Mexique.*

CHAPITRE XXI.

A TOUTES ces Ordonnances on adiousta, que la Iurisdic-
tion de Panama seroit abolie, Qu'il y en auroit vne autre
nouuelle dans les Confins de *Guatemala* & de *Nicaraga*, du pou-
uoir delaquelle releueroit toute la Prouince de Terre ferme.

L'on ordonna pat mesme moyen, Qu'il y auroit dans le Peru
vne autre Chancellerie, composée de quatre Audienciers, &
d'un President, qui porteroit le tiltre de Vice-Roy, & de Genera-
lissime; Q'en là nouuelle Espagne on enuoyeroit vn homme ca-
pable, & tel qu'on aduiseroit, pour y faire vne visite generale;
Que par l'Ordre de sa Commission il auroit pouuoir de regler la
Iustice à Mexique; de communiquer avec tous les Eueques;
d'ouir les Officiers des Droicts Royaux; d'examiner l'estat de
leur Residence; & de pouuoir generally à toutes les Iurif-
dictions de ce Royaume-là.

Toutes ces Patentes & Lettres de Prouision, furent expedies
avec les Ordonnances, dont il y en eut plus de quarante. Or
comme il y auoit tousiours à la Cour des hommes de toutes les
Contrées des Indes, on enuoya le plustost qu'on pût en la Mexi-
que, & au Peru, plusieurs Coppies de ces mesmes Ordonnan-
ces, & de ces Lettres: dequoy les principaux Seigneurs, & les au-
tres Habitans de ces deux Empires, furent si mescontens, & si
scandalisez tout ensemble, qu'au rapport des trois Historiens
susnommez, ils commencerent deslors d'aduiser aux remedes
qu'on y pourroit mettre.

Quelques iours apres que les Ordonnances furent publiées,
sa Muesté Imperiale nomma pour Visiteur general Don Fran-
çois Tello de Sandoval, natif de Seuille, qui auoit esté Inquisi-

teur de Toledé, & qui estoit alors du Conseil Royal des Indes; Personnage prudent, & de grande probité, qui eut ordre exprés, de s'en aller en la nouvelle Espagne, avec ces Loix, & ces mesmes Ordonnances, pour les faire mettre en execution en cét Empire, où s'adressoit sa visite,

L'Empereur choisit de plus, pour Gouverneur, & Vice-Roy, des Royaumes, & des Prouinces du Peru, Blasco Nuñez Vela, natif de la Ville d'Auila, & qui estoit pour lors Controolleur general des Gardes de Castille. Carate parlant de luy, le louë fort, & dit; *Que sa Maieité scauoit par espreuue, qu'en cette Charge, & en plusieurs autres de Indicature, par luy exercées dans les Villes de Malaga & de Cuença, il auoit tousiours tenu la Balance droite: Car c'estoit en effect un homme d'une integrité irreprochable, qui administroit la Iustice sans favoriser personne, & qui executoit ponctuellement les Ordres du Roy.*

Liv. 5.
Ch. 2.

Sa Maieité prit encore pour Auditeurs & Conseillers de la Iustice du Peru, le Licencié Diego de Cepeda, natif de Tordezillas, lors Auditeur aux Isles de Canarie; Lizon de Texeda, né à Lagroña, Iuge de la Noblesse en la Cour Royale de Valladolid; Le Licencié Alvarez, Aduocat en la mesme Cour; & Pedro Ortiz de Carate, de la Ville d'Ordoña, principal Iuge à Segouie.

Ces quatre Officiers, tous hommes de Lettres, furent deputez par l'Empereur, qui voulut pareillement qu'Augustin de Carate, Secrétaire du Conseil Royal, fust Tresorier, & Controolleur general de ses Finances, dans tous ces Royaumes, & Prouinces de Terre-ferme: Pour ce mesme effet, les Ordonnances luy furent mises en main, afin qu'apres qu'on auroit establi la Chambre de Iustice en la Ville des Rois, où sa Maieité entendoit que ses derniers Deputez residassent; on eut à les faire obseruer, comme Loix inuiolables, ainsi qu'il estoit porté au bas de la Patente; Et voilà ce qu'en dit Diego Fernandez; Les paroles duquel se rapportent à peu près, à celles d'Augustin de Carate: où il est à remarquer, que ces Lettres de Prouision furent données au mois d'Auril de l'an 1543. pour estre par tout signifiées.

Nous desduirons maintenant en peu de paroles les heureux succès que ces Ordonnances causerent dans la Mexique; & raconterons en suite les grands mal-heurs qu'elles apporterent au

Peru: car elles furent malencontreuses, & comme fatales à tous ceux de cét Empire-là, tant Espagnols qu'Indiens.

Au mois de Novembre de la mesme année 543. le Vice-Roy, ensemble ses Auditeurs, & ses autres Ministres, avec le Visiteur Dom François Tello de Sandoual, s'embarquerent à saint Lucar de Barrameda. La Flotte estoit de 52. Vaisseaux, tous lestes, & en fort bon équipage: si bien qu'allant de conserue, à la faueur du bon vent, ils furent mouiller en douze iours aux Isles de Canarie, où apres s'estre rafraischis, ils se remirent à la voile, & prirent diuerses routes; les vns à main droite, pour aller en la nouvelle Espagne: Et les autres à gauche, du costé du Peru.

Mais laissant sur Mer le Vice Roy, ie diray cependant ce qui aduint au Visiteur General, dans le Royaume de Mexique: & renuoyetay ceux qui en voudront sçauoir dauantage à l'ample Relation que Dom Fernandez Palentin a faite de son Voyage.

Il faut donc sçauoir qu'au mois de Feurier, de l'an 1544. il aborda heureusement à saint Iean de Vlva, d où il fut à Vera Cruz, & continua sa route iusques à Mexique. Il eut ce bon-heur en ce Voyage, d'estre receu dans toutes les Villes par où il passoit, avec tout le respect, toutes les soumissions, & tout le bon accueuil qu'il eut sceu desirer. Ceux de Mexique au contraire, sçachant quelles Ordonnances il leur apportoit, & qu'il estoit desia près de la Ville; resolurent entr'eux, comme dit Diego Fernandez, de luy tesmoigner combien sa venuë les affligeoit, & de s'en aller au deuant de luy tous couuerts de bouë: Mais le Vice-Roy Dom Anthoine de Mendoza, qui sceut leur dessein, empescha qu'ils ne l'executassent: Au contraire, il ordonna qu'ils eussent tous à le recevoir avec de grandes demonstrations de ioye: à quoy luy mesme les incita par son exemple, estant sorty accompagné de tous ceux du Conseil Royal, des Officiers de Iustice des Communantez de la Ville, & des Deputez, tant du Clergé que de la Noblesse, parmy laquelle il se trouua plus de 600. Cavaliers, tous richement vestus, qui le furent recevoir à demy-lieuë de la Ville. Le Vice Roy & le Visiteur, s'accueillirent obligamment; Et tous les autres en firent de mesme. Apres ces complimens mutuels, ils s'acheminèrent au Monastere de saint Dominique, où le Reuerend Pere Dom Iean Cumarraga, premier Euesque de Mexique, de l'Ordre de saint François, vint recevoir le Visiteur, & la suite. Vn peu apres, il se separa d'avec le

le Vice-Roy : & tous s'estant retirez, il prit logement dans ce Monastere. Ce que j'ay dit iusques icy, est tiré de Diego Fernandez, qui fait en suite la Description de la Ville de Mexique, que vous me pètmiettrez aussi de faire avec luy, comme Indien que ie suis, & passionnément amoureux des Grandeurs de cette mesme Ville, qui ne fut pas moins admirable autresfois que l'ancienne Rome. Elle est bastie sur vn Lac, ainsi que Venize sur la Mer, ayant comme elle vn grand nombre de Ponts. Or bien que l'eau de ce Lac paroisse semblable, elle ne l'est pas toutesfois : car en vn endroit elle se trouue amere & salée ; Commeau contraire, elle est douce en l'autre, & fort bonne à boire : La salée croist & descroist : & la douce est plus haute, si bien qu'il n'y a que la bonne qui tombe dans la mauuaise.

Cette partie du Lac qui est salée, a cinq lieuës de largeur, & huit de longueur : Il en est presque de mesme de la douce.

Sur l'vn & l'autre de ces Lacs se voyent ordinairement deux cens mille petits Batteaux, que ceux du Païs appellent *Acatez*, & les Espagnols *Canoes*, tels à peu près que des Huches, & qui sont grands, ou petits, selon les Arbres dont ils sont faits.

Elle auoit en ce temps-là 700. grandes Maisons en forme d'Hostels, basties, comme l'on dit, à chaux, & à sable, & de bonne pierre de taille. Ces Maisons sont d'ordinaire sans toit, mais elles ont de bonnes terraces, où l'on peut marcher dessus.

Les ruës y sont bien paüées, sans qu'il y ait rien de rabotteux ; extrêmement droites, & si larges, qu'il n'y en a point, où sept Cavaliers ne puissent aller de front avec leurs Rondaches, & leurs Lances, sans que l'vn empesche l'autre : Dans le Palais de l'Audience Royale il y a neuf Basse-cours, vn fort beau lardin, & vne Place si vaste, qu'on y peut à l'aise courir les Taureaux : tellement que ce n'est pas merueille, si dans le mesme Palais pouuoient loger, sans incommodité, le Vice-Roy Dom Anthoine de Mendoza, le Visiteur, Dom François Tello de Sandoual, trois Auditeurs, & le Tresorier, ou le Maistre des Comptes.

Il y a pareillement dans le mesme enclos la Prison Royale, la Fonderie pour les Cloches, & pour le Canon, & la Maison de la Monnoye.

Ce Palais a quatre diuerses Aduenuës, dont l'vne respond à la rue appellée *Tacuba* ; l'autre à celle de sainct François, la troisieme, qui est par derriere, à la grand-rüe ; & la quatriesme re-

» garde à la Place, où l'on court les Taureaux. En vn mot, pour
 » faire voir cōbien ce Palais est vaste, ie n'ay qu'à dire, sinon qu'en
 » tout son enclos, il y a iusques à quatre vingts grandes Portes, de
 » plusieurs Maisons, habitées par les Principaux du Païs.
 » Les Indiens de cette Ville-là, font leur demeure en deux
 » Quartiers, appelez *Saint Jacques*, & *Mexique*, où peuuent lo-
 » ger à present deux cens mille Indiens. Ils entrent dans cette Vil-
 » le, & en sortent par quatre Chaussées, dont l'vne, qui regarde
 » le Midy, est celle mesme par où entra Hernand Cortez: l'autre
 » a vnelieuë, & les autres en ont moins.

C'est la Description qu'en fait Diego Fernandez; où ie vou-
 drois bien qu'on remarquast, qu'en l'endroit où il rapporte qu'il
 y auoit en ce temps là 700. fort grandes Maisons; il eut dit plus
 proprement, ce me semble, 700. Parcs, ou grands Enclos, com-
 me il se preuue amplement, par la Relation qu'il fait luy-mes-
 me de l'Hostel où logeoient le Vice-Roy, & le Visiteur: outre
 lesquels y demeuroient encore les Auditeurs, & les autres Of-
 ficiers de Iustice: Ioint que là mesme estoit la Prison Royale, &
 la Fonderie, pour y faire du Canon & des Cloches; pour toutes
 lesquelles choses il ne faloit pas vn petit lieu. Ce que le mesme
 Auteur monstre aussi, quand il parle de la vaste estenduë de
 tout le Palais. *Cars il est si ample*, dit-il, *qu'en toutes les aduenues qui*
se vont rendre aux ruës & à la Place, il y a quatre vingts Portes de
diuerses Maisons, où les principaux Bourgeois demeurent. D'où l'on
 peut voir aisément, combien il faloit que fussent grands les logis
 d'alors, puis que celuy-cy se pouuoit mieux appeller vn Parc
 qu'vne Maison; & ainsi des autres à proportion. Tellement que
 l'on peut dire de cette Ville Imperiale de Mexique, qu'elle est,
 sinon la premiere, du moins vne des principales Villes de l'Vni-
 uers: Ce qu'il me souuient d'auoir appris d'vn Cavalier Fla-
 mand, qui pour contenter sa Curiosité, ayant veu les plus ce-
 lebres Villes du vieux Monde, fit vn Voyage exprés au nou-
 ueau, pour voir celle de Mexique: de maniere qu'outre le con-
 tentement qu'il en receut, cela luy valut encore vingt mille
 Ducats, qu'il gaigna en diuers Partys qu'on fit avec luy, en cas
 qu'il fut homme à s'en aller iusques là. Mais de peur que i'ay de
 faire vne trop longue digression, ie passe sous silence les particu-
 laritez qu'il me dit là-dessus, le grand chemin qu'il fit, & le long
 temps qu'il fut à voir toutes ces merueilles; Il me suffit de dire,

qu'il y employa plus de quatorze ans. l'adjouste à toutes ces choses, que le Palentin n'encherit point sur la verité, quand il asseure que le Vice-Roy fut au deuant du Visiteur, accompagné des Officiers de Iustice, des Communautéz de la Ville, du Clergé, & de la Noblesse, où estoient remarquables de plus, 600. Caualliers, richement vestus, & couuerts de pierrerie. Car il est certain, qu'entre les autres magnificences qui se faisoient dans Mexique, tous les Dimâches & les iours de Festes, on voyoit ordinairement par les Ruës cinq ou six cens Caualliers, tous lestes, qui laissant à part le jeu des Canes, se contentoient de se diuertir paisiblement dans les pourmenades qu'ils faisoient par les Ruës. D'où il faut conclurre, qu'encore qu'il n'y ait point de Cour à Mexique, pource que son Roy n'y est point present; les grands neantmoins ne laissent pas d'en estre Royales.

CEUX DE MEXIQUE APPELLENT
des Ordonnances nouvelles; Elles sont publiées, & causent du trouble dans la Ville; mais le Visiteur l'appaise; & par sa Prudence, comble, d'un bon heur extrême tout cet Empire-là.

CHAPITRE XXII.

POUR reuenir à nostre Histoire, nous auons à dire que le iour d'apresque le Visiteur fut entré dans la Ville de Mexique, il y eut vn murmure general, & mesme vn manifeste scandale parmy tous les habitans, qui disoient tout haut; *Qu'il n'estoit venu dans le Pais que pour y establir de nouvelles Loix*: Surquoy les vns & les autres parloient de son Arriuée, avec des sentimens particuliers, selon que leur passion les dictoit.

Ils firent donc vne Assemblée publique, où ils traitterent entre eux du remede qu'ils deuoient mettre à ce mal en se plaignant du grand tort qu'on leur faisoit. Mais enfin ils demurerent d'accord d'appeller de ces nouvelles Ordonnances deuant le Visiteur mesme A raison dequoy toute cette nuit-là, & le lendemain, qui estoit vn iour de Dimanche, les Deputéz de la Ville,

les Officiers des Droits Royaux, & les Seigneurs principaux, ne parlerent d'autre chose que de cette affaire-là. Le lendemain matin ils s'appellerent les vns les autres. Et alors les Officiers de la Ville suivis du Greffier, & de quantité de personnes, s'en allerent au Conuent de saint Dominique, où ils portèrent leur Appel en bonne & deuë forme. La foule y fut si grande, qu'encore que le Monastere fut spacieux, il ne l'estoit pas assez pour tant de Monde. Or bien que d'abord le Visiteur ne parût point, apprehendant que leur insolence ne se portast plus auant; si est-ce qu'enfin il se fit voir à eux, avec vn visage serein, & s'en approcha pour leur donner audience. Ils luy parlerent incontinent du sujet de son Voyage: Et alors en termes fort doux, il reprit les Deputez de la Ville, auxquels il dit, *Qu'il n'auoit pas encore presenté sa Commission, ny le pouuoir qu'il auoit, qu'ainsi ils ne pouuoient point estre asseurez des causes de sa venue: Et partant, qu'il s'estonnoit fort de cét Appel qu'ils faisoient, sans connoissance de cause; Qu'il les prioit donc de se retirer; & de nommer cependant pour Deputez de la Ville, deux ou trois Iuges, qui le vinssent trouuer sur le soir, pour traicter de cette affaire, sur laquelle il les escouteroit, & leur respondroit.*

Ils s'en allerent à mesme temps, & prirent pour Deputez le Procureur General, deux Iuges, vn Greffier, & avec eux Michel Lopez de Légaspy, qui deuoit parler pour les Communauttez. Ils furent trouuer le Visiteur au Conuent, à deux heures apres midy. Leur ayant fait vn fort bon accueil, du moins, ils le iugerent ainsi à sa mine, il les fit passer dans sa Chambre, où d'abord il les reprit de l'estrange esmeute qu'ils auoient faite au matin: sur quoy il leur remonstra combien leur faute estoit grande, & les inconueniens qui s'en pouuoient ensuiure, contre le seruice de Dieu, & du Roy; *Qu'au reste il n'estoit pas venu là pour ruiner le Pais, mais bien pour les assister en tout ce qu'il pourroit; Qu'il se porteroit en faueur d'eux, pour Intercesseur enuers sa Maiesté; Qu'il luy escriroit au long, touchant la suspension des Ordonnances; & qu'il les asseuroit de ne travailler iamais à l'execution des plus rigoureuses.*

Par ces Promesses & ces Raisons, il les persuada si bien, qu'ils se retirerent fort contents, sans faire depuis aucunes diligences en la Commission pour laquelle on les auoit deputez. D'où il s'ensuiuit, qu'eux mesmes furent cause que le Peuple s'appaisa, & qu'il n'eut plus les inquietudes qu' auparauant il auoir eues. Quelques iours se passerent dans ce calme, iusques au Lundy

24. de Mars, qui fut le iour auquel on publia les nouuelles Loix, en la presence du Vice Roy, du Visiteur, & de tous les Officiers de Iustice: Car alors, à la fin de la Publication, le Procureur General de la Ville, voulant prendre la parole au nom du Public, & s'endant la presse, s'adressa au Visiteur, pour luy presenter vne Requête; Cependant, plusieurs des Assistans donnerent manifestement à connoistre, qu'ils se scandalisoient fort de ce qu'on les vouloit ainsi violenter en leur liberté: Ce qui fut cause que le Visiteur, apprehendant quelque mutinerie, s'excusa le mieux qu'il pût deuant tous; leur tesmoignant d'estre bien fâché de leur commun desplaisir, & de ce qu'il auoit esté réduit par force, & non de son gré, à faire publier ces Ordonnances: Tellement qu'il leur promit, & mesme les assura de ne passer aucun des Articles, qui se trouueroient estre au preiudice des Conquerans, & des principaux Habitans, & de ne failliren aucune chose de toutes celles qu'il auoit promises aux Deputez du Corps de la Ville.

Auec cela il leur fit cognoistre, Qu'il luy desplaisoit fort de ce qu'ils n'auoient toute la confiance qu'ils deuoient auoir en luy; Et auec des protestations qu'il accompagna de sermens solennels, il leur remonstra qu'eux-mesmes ne desiroient pas tant que luy, l'aduancement & le commun bien de tous ceux de la nouvelle Espagne.

Pour les en mieux assurer, il leur iura derechef, *Qu'il escriroit amplement au Roy, en faueur des Conquerans du Pays, & de ceux qui l'auroient peuplé; Qu'il seroit en sorte que sa Maieité ne leur diminueroit rien des reuenus qu'ils auoient, & que les Traitez qu'ils auroient faits demeureroient en leur entier, iusques-là mesme, qu'il ne tiendroit pas à luy, qu'ils ne fussent confirmez de nouveau dans leurs Priuileges; qu'on ne leur fit de nouuelles graces, & que tout ce qu'il y auroit de vaquans dans le Pays, ne leur fut entierement partagé.* Voilà quelles furent les protestations du Visiteur, que l'Euesque de Mexique, qui se trouua là present, appuya le mieux qu'il pût, pour l'extrême desplaisir qu'il auoit luy-mesme de voir la Ville si triste & si desolée: de sorte, que pour remettre l'Esprit des Habitans, il les conuia tous pour le lendemain 25. de Mars, iour de l'Annonciation de la Vierge, à se trouuer en la grande Eglise, où il preschoit, & le Visiteur diroit la Messe.

Ces choses s'estant ainsi passées, ils se retirerent tous fort tri-

ites, sans qu'il leur restast pour toute consolation, qu'une douteuse esperance des promesses qu'on leur auoit faites, & dans ces inquietudes, & ces apprehensions, ils passerent toute la nuit suivante.

Le lendemain matin, le Vice-Roy, les Auditeurs, les Deputez, & tous les autres Principaux de la Ville, se trouuerent dans la grande Eglise, où le Visiteur dit la Messe, & l'Euesque de Mexique prescha. En sa Predication il rapporta plusieurs Authortez des saintes Lettres, touchant l'affliction presente: & traitta cette matiere avec tant d'esprit, que tous les Assistans en furent fort consolez: Ils commencerent deslors à se rassurer un peu; & à traiter de cette affaire avec plus de vigueur qu'auparuant. Pour en hastier le succez à leur aduantage, le Procureur General, & les Officiers deputez visitoient souuent Dom François Tello, & conféroient ensemble des moyens qu'ils pourroient trouuer enuers sa Maiesté, pour remedier à cela. D'où il aduint, qu'apres plusieurs consolations, ils nommerent par son Aduis deux Religieux des plus considerables, & deux Deputez, au nom des trois Ordres du Royaume, d'où l'on trouua bon qu'ils partissent pour leur Deputation vers l'Empereur, en Allemagne, qu'ils scauoient estre en ce Pais-là, perpetuellement occupé apres la Guerre qu'il faisoit aux Lutheriens. Le Visiteur s'offrit à escrire avec eux à sa Maiesté, afin de luy faire entendre combien la suspension de ses Ordonnances estoit importante au seruice de Dieu, & au sien: Comme encore à la Paix, & à la commune conseruation de l'Empire de Mexique; A quoy il s'aduifa d'adiouster aussi les grands dommages, & les dangereux inconueniens qu'apporteront l'execution de ces nouvelles Loix.

En effet, il ne promit rien qu'il n'accomplit ponctuellement: Car dans la Relation qu'il fit par escrit à l'Empereur, tant de son Voyage, que de ce qui luy estoit aduenü à son arriüee en la nouvelle Espagne, il l'aduertit de plusieurs choses. touchant la Declaration & l'execution des Ordonnances susdites, y'adjoüstant en particulier, ce qui luy sembloit deuoir estre augmenté, ou retranché sur chacune de ces Loix. Dans cette Relation, il y auoit vn ample Discours, en faueur des Conquerans du Pais, & de ceux qui l'auoient peuplé, pour leur faire auoir des Departemens d'Indiens, & des recompenses de leurs seruices: sur quoy il blasmoit extrêmement les Gouverneurs, de n'auoir par

le passe donné des Départemens, avec la circonspection & l'exquité qu'il y falloit apporter. Cette Recommandation estoit suivie d'un aduis de vingt-cinq Chapitres, contenant les Conditions qui regardoient ceux, auxquels on donneroit des Indiens pour Vassaux, tant pour la conservation du Pais, que pour l'accroissement des Habitans; & ces Chapitres estoient presque tous en faveur des Conquerans.

Les Deputez s'embarquerent avec ces Lettres, pour prendre la route de Castille: Ce que firent aussi avec eux plusieurs autres personnes, pour se garantir de la rigueur des nouvelles Ordonnances. Quelques iours apres qu'elles furent publiées, le Procureur rascha peu à peu d'en faire mettre à execution quelques-unes: ce qu'il n'entreprit pourrant, qu'apres y avoir meurement pensé, & par les moyens qui luy semblerent les moins difficiles. Ainsi fut executée la troisieme sur les Officiers du Roy, qui estoient à present, d'autant qu'en ceux-cy l'execution luy sembla iuste, & non pas en ceux qui l'auoient esté, ny en leurs Lieutenans non plus: tellement qu'il les destitua de leurs Charges, & leur laissa les Indiens: Comme au contraire, il osta les leurs aux Prelats, aux Hospitaux, & aux Monasteres, dequoy il rendit compte aussi tost à sa Maiesté Imperiale.

Les Procureurs Deputez, ensemble les Religieux, & les Officiers, qui estoient partis de la nouvelle Espagne, arriuerent à bon port à Castille, d'où ils s'acheminèrent en Allemagne, pour y traiter des affaires avec l'Empereur Catholique: ce qu'ils n'entreprirent toutesfois, qu'apres auoir posé leurs habits de Religieux, pour en prendre d'autres, qui les fissent paroître soldats, d'autant qu'en ce pais-là, l'Herésie faisoit d'estranges persecutions, en la personne des Religieux, & des autres gens d'Eglise. Ils réussirent fort bien dans leur Negociation; de sorte qu'apres auoir eu leurs expéditions signées de la main du Roy, ils escriuirent par la premiere Flotte qui partit pour la nouvelle Espagne; où ils firent sçauoir tous ces bons succez, & les grandes graces que sa Maiesté leur auoit faites, par la recommandation, & le bon rapport du Visiteur.

Après qu'on eut receu ces Despesches à Mexique, & qu'on les eut veüs en l'Assemblée de la Maison de Ville, le Secretaire & les autres Officiers sortirent tout aussi tost, pour aller trouuer le Visiteur. Ils l'aborderent alors, avec un visage bien different

de celuy qu'ils tesmoignerent auoir, quand ils luy signifierent qu'ils appelloient de ces Ordonnances. Ils luy rendirent tres-humbles graces, pour la Lettre qu'il luy auoit pleu d'escrire en faueur de tous, & luy monstrerent les Patentes de sa Maiesté, par lesquelles il luy estoit expressément enjoint de traualier à la suspension des nouuelles Loix, & d'en surseoir l'executiō, iusques à ce qu'il y eust là-dessus vn nouuel ordre: Et dās ces mesmes Lettres il estoit encore porté, que sa Maiesté auroit soing touchāt le Partage des terres, en faueur de ceux qui les auroient conquises & peuplées. Comme en effect, par la premiere Flotte qui vint, l'Empereur donna pouuoir à Dom Anthoine de Mendoça, de distribuer tout ce qu'il y auroit de vaquant dans le País. En suite de tout cecy, ce ne furent dans la Ville, que jeux de Canes, que courses de Taureaux, & que solempnelles rejoyssances, qu'une si bonne nouuelle y causa, du commun consentement de tous. Ces diuertissemens continuerent depuis parmy eux, avec tant de satisfaction & de contentement, qu'ils ne pensoient plus qu'à se rejoyir. Or ce qui les confirma dauantage dans la bonne esperance qu'ils auoient desia, qu'on seroit soigneux d'executer ponctuellement ce qui estoit porté par les Patentes du Roy, touchant la suspension de ces nouuelles Loix; fut, qu'au mesme temps, vn des Conquerans, marié dans le País & pourueu d'un Département d'Indiens, sans auoir aucuns Enfants, estant venu à mourir, le Vice-Roy & le Visiteur, mirent sa Femme en possession, tant du Département, que des Indiens du defunct: dequoy les autres Seigneurs furent extrêmement aises, pource qu'ils estoient tousiours en doute, si l'on executeroit ces Ordonnances.

Dom François Tello de Sandoual, ayant fait en la nouuelle Espagne ce que nous venons de dire, & toutes les autres choses qui luy furent commandées par l'Empereur, s'en retourna en Castille, où sa Maiesté le fit depuis President des Cours Royales de Grenade, & de Vailadolid, & Chef du Conseil Royal des Indes; Outre que l'Euesché d'Osma venant à vaquer, elle l'en pourueut au mois de Decembre, l'an 1566.

Tout ce que nous auons diren ces derniers Chapitres, regardel'establissement des Ordonnances dans la Mexique. C'est à nous maintenant à monstrier, que les mal-heurs qu'elles causent au Peru furent estranges, & du tout contraires aux prospere-

ritez de ces autres peuples : Ce qui proceda sans doute, du propre defastre de cét Empire, de ses grandes Richesses, & de l'extrême seuerité de ses Gouverneurs, d'où s'ensuiuirent aussi, tant de voleries, de pertes, de cruautéz, & de morts tragiques, que ceux qui ont traité des souffrances des Espagnols, & des Indiens en ce Païs-là, n'en ont pas escrit la dixiesme partie : Aussi n'est-il pas possible, de raconter entierement les calamitez estranges, où par les desordres de la Guerre, furent exposées des personnes de tout aage, & de tout sexe, dans vn Païs de 700. lieues d'estenduë.

FIN DV TROISIESME LIVRE.





HISTOIRE

DES

GVERRES CIVILES

DES ESPAGNOLS,
DANS LES INDES.

LIVRE QVATRIESME.

SOMMAIRE.

VOYAGE DE BLASCO NVNEZ VELA,
au Peru ; Et ce qu'il fit deuant & apres son arriuée ;
Desordres causez par les nouuelles Ordonnances ; Re-
ception faite au Vice-Roy ; Emprisonnement de Vaca
de Castro ; Dissentions entre le Vice-Roy, & ses Offi-
ciers ; avec la Mort deplorable du Prince Manco Yn-
ca ; Gonçalo Pigarre est esleu Procureur General ;
Leuées de Gens de Guerre , faites par le Vice-Roy,
qui prend derechef Vaca de Castro ; Rebellion de Pe-
dro de Puelles ; & de plusieurs autres , suivie de la
mort du Facteur Yllen Suarez de Caruajal ; Le Vice-
Roy sort de Prison ; & Pigarre est déclaré Gouver-

neur du Peru; Guerre entre l'un & l'autre; Stratagemes iouëz au Vice-Roy, par Gonzalo Pizarre, & à Diego de Centeno par François de Caruajal, iusques à son entiere deffaite; Bataille de Quito; Mort du Vice-Roy, & ses Funerailles.

DE CE QVE FIT BLASCO NUÑEZ
Vela, des qu'il fut entré en la Terre ferme, & aux
confins du Peru.

CHAPITRE PREMIER.



PRES auoir raconté dans le troisieme Liure de nostre Histoire, les prosperitez, & les bons succez du Royaume de Mexique, causez par la prudence, par les sages aduis, & par la grande moderation du Visiteur Dom François Tello de Sandoual; Il est raisonnable, ce me semble, que nous rapportions icy les disgraces, les calamitez, & les mortz estranges arriuées dans l'Empire du Peru, par la rigueur excessiue, & par les autres mauuaises qualitez du Vice-Roy Blasco Nuñez Vela: Car ce fut luy mesme, qui malgré les aduis de ses propres Officiers, voulut que les Ordonnances nouuelles fussent mises à execution, sans considerer pas vne des choses auxquelles il deuoit prendre garde pour le seruice de son Roy. Il faut donc sçauoir, qu'apres que les deux Flottes du Peru & de la Mexique se furent séparées au Golphe des Dames, le Vice Roy continua sa nauigation: si bien qu'à la faueur du bon vent, il se rendit à Nombre de Dios, le 10. Ianuier de l'an 1544. De là il prit la route de Panama, où dès qu'il fut arriué, il en fit sortir quantité d'Indiens de seruice, & les renuoya en diuerses Prouinces du Peru, d'où les Espagnols les auoient tirez. Plusieurs trouuerent ce procedé bien estrange, pour lo peu d'apparence qu'il y auoit d'oster ces Indiens à leurs Maistres; apres les auoir instruits & fait Chrestiens, outre qu'ils n'y consentoient eux mesmes que par force: Ce qui fut cause que pour en detourner le Vice Roy, ils luy en parlerent souuent,

& luy dirent que cela n'estoit bon, ny pour le service de Dieu, ny pour celuy de sa Maïesté, puis qu'on scauoit bien que la principale intention estant de faire les Indiens Catholiques; cela ne se pouuoit, tant qu'ils seroient sous la puissance de leurs Caciques : Outre que personne n'ignoroit, que si quelque Indien, apres s'estre conuertey, tomboit sous le pouuoir de son Cacique, c'estoit comme vne Victime qu'il sacrifioit au Diable: Qu'au reste ce procedé choquoit grandement l'intention de sa Maïesté, qui vouloit par mandement exprés, que les Indiens fussent libres : A quoy le Vice-Roy Blasco Nuñez auoit peu d'esgard, puis qu'il ne pouuoit souffrir que ceux qu'il auoit trouuez à Panama, demeurassent en cette Prouince-là, & que contre leur volonté, il les enuoyoit au Peru, avec si peu d'assistance, qu'il estoit comme impossible que plusieurs d'entreux ne mourussent, auant que d'y pouuoir arriuer.

A toutes ces choses le Vice-Roy fit responce, Quel'Empeur le vouloit ainsi; Et partant qu'il n'en seroit autre chose; tellement qu'à l'heure mesme il commanda à tous les Espagnols, qui auroient des Indiens de seruice, qu'ils eussent à les renuoyer à leurs propres frais. Il salut obeïr à ce mandement; de sorte qu'il se trouua insques à trois cens Indiens, qui furent réduits à quitter leurs Maîtres. Il les fit incontinent embarquer, afin d'estre portez au Peru; mais comme l'ay dit n'aguere, il en mourut la plus-part, à faute de viures, ou pour auoir esté miserablement abandonnez. Il y en auoit d'autres aussi, qui apres auoir considéré, combien il seroit difficile & dangereux ensemble au Vice-Roy, de proceder à l'execution des Ordonnances, faisoient tout leur possible pour l'en destourner par diuerses raisons; luy representant les grandes Guerres aduennës au Peru, & les inclinations de ses Habitans, qui n'estoient que trop portées à la Reuolte, pour les déplaïrs, & les mescontentemens qu'ils auoient.

Cependant toutes leurs raisons, bien que veritables, déplaïsoient si fort au Vice-Roy, qu'il leur disoit à tout coup, *Que s'il eut esté aussi bien dans sa tur-sédition, cōme il n'y estoit pas, il les eut fait tous pendre.* Paroles qu'il leur repetoit pour les tenir en bride, & empescher qu'on ne l'osast plus choquer en sa resolution.

Blasco Nuñez fut vingt-deux iours à Panama, pendant lesquels les Auditeurs s'informerent au long des choses qui se pas-

soient au Peru: Ils en apprirent deux entre les autres, dont la principale regatdoit les domniages que les Ordonnances deuoient causer aux Conquerans du Pais, & l'extrême danger qu'il y auroit à les vouloir mettre à execution, en vn temps auquel le Licencié Vaca de Castro, ayant donné Bataille à Dom Diego d'Almagre le ieune, luy auoit fait trancher la teste apres la Victoire, & où plus de 350 Soldats estant demeurez sur la place, ceux qui estoient restez s'attendoient tous d'auoir recompense des grands seruites par eux rendus à sa Maiesté. Ces Nouuelles surprirent vn peu les Auditeurs, qui neantmoins apres auoir bien considéré l'affaire, & l'humeur du Vice-Roy, ne le voulurent point presser là-dessus, leur semblant plus à propos d'attendre leur arriüée au Peru, où possible il se rendroit plus souple à leurs conseils, lors qu'il auroit vne fois conneu la nature du Pais, & de ses Habitans; Mais comme il ne falloit que la moindre chose, pour luy donner l'alarme; despité de ce qu'ils luy auoient desia dit, il resolut de partir auant eux: leur iurant qu'il leur feroit voir en peu de temps quel homme il estoit, & qu'auant leur arriüée au Peru, ils y trouueroient les Ordonnances establies. Or pource qu'au mesme temps le Licencié Carate estoit detenu malade au liët, le Vice Roy ne voulut point partir sans le voir. Il le fut donc visiter; & alors le Licencié luy dit *Que puis qu'il auoit resolu de s'en aller sans eux, qu'il le supplioit tres-instamment de n'agir dans le Peru que par la douceur, & de ne parler point d'y faire executer aucune Ordonnance, qu'apres que le Siege Royal seroit estably dans la Ville des Rois, & luy mis en possession de son Gouvernement: Que sa pu.s.sance le rendroit alors plus considerable, & luy donneroit moyen de mieux travailler à l'execution des Loix qu'il iugeroit les plus conuenables, soit pour la Consience de sa Maiesté, soit pour le bon Gouvernement, & la commune conseruation de ceux du Pais; Qu'il se souuint au rest, que parmy ces Loix, il y en auoit de trop rudes, & d'autres nullement propres, à cause dequoy il en deuoit informer sa Maie.té, afin que si elle vouloit ainsiement qu'elles subsistassent, il se mit en deuoir d'en venir à bout; Chose qui ne luy seroit pas si mal aisée qu'auparauant, pource qu'il auroit alors plus de pouuoir dans le Peru; & qu'avec cela ce seroit luy-mesme qui establiroit dans les Villes, & les Iurisdic.tions, & les Offici.rs.*

Le Licencié Carate dir au Vice-Roy ces choses, & quantité d'autres, qui ne luy plurent auouement: Bien au contraire,

* pour
de Peru.

elles le fâcherent fort, & le firent derechef iurer, Qu'il feroit passer les Ordonnances, sans y alterer quoy que ce fut, ny sans y apporter aucun delay, & que les Auditeurs se trouueroient quittes de ces peines, quand ils seroient arrivez au Peru. Apres cette responce, il s'embarqua seul, * ne daignant attendre, ny les Auditeurs, ny pas vn de leur suite, quelque priere qui luy fut faite: tellement que le 4. de Mars, il fut prendre terre au Port de Tumbes, d'où il continua sa route par terre, au grand desplaisir des Habitans: car à mesure qu'il passoit d'une Ville à l'autre, il y faisoit publier les Ordonnances, mettant à la taxe la pluspart des Vassaux Indiens, & ostant les autres, aux Seigneurs, au profit de sa Maïesté. Il en fit autant à *Pisura* & à *Truxillo*, où pendant l'exécution des nouvelles Loix, il ne voulut iamais recevoir aucune Requête. Les Principaux du País auoient beau luy dire, que cela ne se pouuoit faire sans connoissance de cause, & sans que l'Audience Royale fut establie, puis que l'Empereur l'entendoit ainsi dans l'une des Ordonnances, où il disoit en termes exprés; *Que pour les faire exécuter, il enuoyoit vn Vice-Roy, & quatre Auditeurs.* Toutes ces raisons ne le touchoient point: tellement qu'au lieu d'escouter ceux qui les disoient, ou qui le choquoient dans sa volonté, il les intimidait par sa mauuaise humeur, & par ses menaces. Cependant, il n'y auoit celuy qui ne perdit courage, qui ne s'affligeast dans l'Âme, & qui ne demeurast confus, de voir que ces Loix estoient si rigoureuses, qu'elles ne pardonnoient à personne, & s'estendoient generallyment sur tous: ce qu'ils ne sçauoient desia que trop à leur grand regret: Car dès le moment que le Vice-Roy aborda la Côte du Peru, il enuoya deuant des hommes exprés en la Ville de *Cuzco*, & en celle des Rois, pour y signifier ses Lettres Partentes, & le pouuoir qu'il auoit, afin que ces Villes eussent à le receuoir: & que le Licencié *Vaca de Castro* se desmit de son Gouvernement, pour le luy ceder, puis que sa Maïesté l'enuoyoit pour Vice-Roy: Desia mesme, auant que cette nouvelle vint en la Ville des Rois, on y sçauoit l'Eslection que l'Empereur auoit faite de *Blasco Nuñez Vela*, & le contenu de toutes ces Ordonnances, par le moyen d'une Copie qui s'en estoit faite: de sorte que les Communaurez auoient desia député pour cette mesme affaire, *Dom Anthoine de Ribera*, & *Iean Alonso Palomen*, auccordre exprés d'aller trouuer le Licencié *Vaca de Castro*,

qui estoit alors à Cozco; Luy-mesme aussi auoit receu des Lettres d'Espagne, qui l'aduertissoient de la nomination de Blasco Nuñez Vela, & parcelllement des nouuelles Ordonnances: ces Lettres luy ayant esté apportées d'Espagne en grande diligence, par Diego d'Aller, qui auoit autresfois esté son Seruiteur Domestique. J'ay tiré cecy de Diego Fernandez Palentin, & tous les autres Historiens en disent de mesme.

*LE LICENCIE' VACA DE CASTRO
s'achemine en la Ville des Rois, & renuoye ceux qui
l'accompagnoient. Desordres causez, à raison
des Ordonnances, & de ce qu'on en di-
soit publiquement.*

CHAPITRE II.

LE Gouverneur Vaca de Castro, ayant sceu que le Vice-Roy Blasco Nuñez Vela, estoit dans le País, & qu'il faisoit executer à toute rigueur les Ordonnances qu'il auoit apportées, sans vouloir ouïr personne. ny admettre aucune Requeste, fut d'aduis de pouruoir à la seureté de son Party: Pour cette fin, il luy sembla tout à fait à propos d'aller à la Ville des Rois, pour y recevoir Blasco Nuñez, sans entendre à l'Ambassade que Dom Anthoine de Ribera, & Iean Alonso Palomen luy auoient faite de la part des Communautéz de Rimac, ny sans vouloir escouter non plus ce que luy disoient les Deputez de l'Assemblée de Cozco, & les autres Seigneurs d'Indiens, qui venoient à luy de toutes parts: car ils taschoient de luy persuader de ne point recevoir le Gouverneur, & d'appeller au nom de tous, de ces nouuelles Ordonnances, pour estre trop rigoureuses, Comme encore, de l'Eslection qu'on auoit faite de Vice Roy. Ils alleguoient pour principales raisons, son insuffisance, & son humeur insupportable, toutes deux incompatibles, avec vne si haute Charge que celle de Vice-Roy, dont il se rendoit indigne, pour ne vouloir administrer la Justice, ny mesme donner audience aux Sujets de sa Majesté, enuers lesquels il se monstrois impitoyable pour la moindre chose que ce fut: surquoy ils concludoient, Que s'il ne vouloit point se charger

de cette Commission, il s'en trouuerois quelqu'autre qui ne refuseroit point de l'accepter

Cependant, il ne se parloit d'autre chose dans le Peru, que de l'humeur trop imperieuse du Vice-Roy, & de l'excessive severity qu'il apportoit à l'exécution de ces Ordonnances: aussi mettoient elles en desordre tous ceux du País, pource que les mesmes Courriers que le Vice-Roy auoit enuoyez en diuerses Contrées, pour les faire receuoir, les auoient hautement publiées; à quoy la Renommée, comme c'est son ordinaire, auoit adjousté beaucoup de choses du sien, pour aigrir plus fort l'esprit de ceux qu'en entendoient parler. Le Licencié Vaca de Castro y donna donc les mains, & ne laissa pas de se tenir prest, pour s'en aller à la Ville des Rois. En ce voyage l'accompagnèrent plusieurs Seigneurs d'Indiens, & diuers Soldats demeurans à Cozco: Car tous les Bourgeois l'affectionnoient si fort, que s'il l'eut voulu permettre, il ne s'y en fût pas trouué vn seul qui ne l'eut suiuy tres-volontiers. Par le chemin les Lettres de Prouision luy furent signifiées de la part du Vice Roy, afin qu'il eut à luy ceder le Gouvernement du Royaume, & à le mettre en sa place. Vaca de Castro obeit ponctuellement, & se desmit de sa Charge; Mais auant que de signer la Demission, il pourueut de plusieurs départemens d'Indiens, diuerses personnes qu'il en iugea dignes, pour les bons seruices tendus à sa Maiesté: ce qu'aucun ne pouuoit sçauoir mieux que luy, qui en auoit esté tesmoin oculaire, touchant la plus part: Et quant aux autres, il prit le soin de s'informer, s'ils auoient bien seruy, auant son arriuée en cét Empire.

Ceux qui apporterent ces Patentes, raconterent en particulier le procedé du Vice-Roy, en l'establissement de ces Ordonnances; Comme ayant osté aux Espagnols leurs seruiteurs Indiens, il les auoit fait embarquer pour le Peru, contre leur volonté propre, & malgré celle de leurs Maistres; Et qu'outre cela, dans saint Michel, à Tumpiz, & à Truxillo, il auoit mis à la taxe quelques Départemens, & osté les autres à leurs Possesseurs, pour les annexer aux Droicts du Roy, conformément aux Ordonnances, sans vouloir ouïr ny prieres, ny raisons, disant pour toute responce, que sa Maiesté l'ordonnoit ainsi. Cette nouuelle troubla si fort ceux qui accompagnoient le Licencié Vaca de Castro, que plusieurs d'entr'eux s'en retournerent à

Cozco,

Cozco, sans se destacher pourtant du Party du Gouverneur, disant qu'ils n'osoient paroistre, ny se presenter deuant vn homme si rude comme estoit le Vice-Roy, de peur qu'ils auoient qu'il ne les fit tous pendre, sans luy en auoir iamais donné sujet; Et partant qu'ils gaigneroient mieux d'attendre la venue des Auditeurs, & l'establissement d'un siege Royal, afin d'y faire oüyr leurs Raisons, & de pouuoir demander Iustice. Mais quelque chose qu'ils dissent, pour pallier leur sentiment, il ne laissoit pas pas de paroistre sur leurs visages, qu'ils s'en alloient fort faschez dans leur Ame; Comme ils le descouurent bientôt apres, lors qu'arriuez à *Huamanga*, ils y prirent l'Artillerie, qui estoit là demeurée, depuis la defaite de Dom Diego d'Almagre. & la firent transporter à Cozco : ce qui fut de l'inuention de l'un des principaux Habitans, appelé Gaspar Rodriguez, qui fit assembler vne grande quantité d'Indiens, pour l'enleuer au grand scandale de ceux qu'il virent, ou qui en oüyrent parler. Vaca de Castro ne sçachant rien de cette mauuaise action, passa plus auant, & dans son chemin il fit recontre d'un Ecclesiastique nommé Balthazar de Loaísa, qui porté d'affection enuers luy, s'aduisa de l'aduertir, qu'en la Ville des Rois, on ne trouuoit pas bon qu'il y vint accompagné de tant de gens, & à main armée; D'où il aduint que le Licencié pria ceux qui estoient demeurez avec luy, de se retirer chez eux : comme en effet, plusieurs s'en retournerent; Et ceux qui ne refuserent de le quitter, furent requis par luy-mesme de vouloir du moins poser les Lances & les Arquebuses qu'ils portoient, pource qu'alors on ne marchoit guere sans ces Armes-là : ce qui fut vne coustume qu'on obserua depuis vn assez long-temps.

Les ayant pesées, ils continuerent leur route, & deux ou trois iours apres ils arriuerent dans la Ville des Rois. Vaca de Castro y fit son entrée, accompagné de Laurens d'Aldana, de Pedro de los Rios, du Licencié Benoist de Caruajal, de Dom Alonso de Montemajot, & de Hernand Bachicao. Ils firent tous receus avec de grandes demonstrations de ioye, où ne laissoit pas pourtant de s'entremesler vne fascherie secrette, par le déplaisir qu'ils auoient de ces nouuelles Ordonnances, & de la seuerité du Vice-Roy, si contraire à la douceur de celuy, à la charge duquel il succedoit. Vaca de Castro depecha en mesme temps son Maistre d'Hostel, appelé Hierosime de la Serenne, & son

Secrtaire Pedro Lopez de Cassalla, avec des Lettres au Vice-Roy, par lesquelles apres l'auoir complimenté sur sa bien venue, il luy faisoit offre de sa personne, & de son bien, pour le seruice de sa Maiesté, & de sa Seigneurie.

Mais tandis que ces choses se firent, durant le voyage de Vaca de Castro, depuis la Ville de Cozco iusques à celle des Rois, il en arriua bien d'autres plus fascheuses, du costé du Vice-Roy, le lōg du chemin qu'il prit par la Coste de Tumpiz, d'où il se rendit à Rimac: Car en tous les lieux, qu'il iugea propres pour y establir les Ordonnances, il ne manqua point de le faire à toute rigueur, sans vouloir entendre aucune raison de celles qu'on luy disoit, pour la defense, & en faueur des Conquerans de ce g'ād Empire: surquoy il leur repetoit tousiours vne mesme chose, qui estoit, *Que son Roy le commandoit ainsi, & qu'il luy vouloit obeyr.*

Cette responce irritoit tousiours plus fort les principaux Seigneurs, & les autres Habitans du Royaume, pource, comme dit Diego Fernandez, qu'ils se trouuoient tous interessez dans ces nouuelles Ordonnances, depuis le plus grand, iusques au moindre: Aussi fulminoient ils effrontément contre elles; disant que ceux qui auoient conseillé à sa Maiesté d'y faire travailler, estoient, les vns enuieux, de la prosperité des Conquerans du Peru; Et les autres de vrais Hippocrites, qui pour leurs interests propres, auoient comme contraint l'Empereur de les signer, & d'enuoyer pour leur establissement vn Iuge si opiniastre, & si rigoureux, qu'il ne vouloit donner Audience à personne, comme le remarque Gomare dans vn Chapitre qu'il en a fait apres, dont le tiltre est tel; *De ce que fit Blasco Nuñez avec ceux de Truxillo, & de leurs communes plaintes contre les Ordonnances.*

Blasco Nuñez entra dans Truxillo au trop grand regret des Espagnols. Il y fit d'abord publier les Ordonnances; faire les Taxes touchant les Tributs; & affranchir les Indiens, avec defenses de les faire travailler par force, & sans les payer; ostant aux Seigneurs le plus de Vassaux qu'il pût, au grand déplaisir de leurs Maistres, & au profit du Roy. Toutes les Communautés de la Ville appellerent de ces Ordonnances, à la reserue de celle des Taxes touchant les Imposts, & de cette autre qui portoit. *Qu'on n'eus à contraindre les Indiens au travail*, approuuant l'vne & l'autre pour bonnes. Mais sans auoir esgard à l'Appel,

il impoſa de nouvelles peines aux Officiers de Juſtice, qui ſeroient au contraire des Ordonnances, alleguant toujours, qu'il auoit vn Mandement tres-expres de l'Empereur, de les faire executer, ſans accepter ny appel, ny oppoſition quelconque. Ce quin'empeschapastoutesfois, qu'il ne leur dit, *Qu'ils auoient quelque raiſon de ſe ſeſcher de ces Ordonnances, mais que c'eſtoit à eux à former leurs plaintes par deuers ſa Maieſté, à laquelle ils pouuoient enuoyer des Deputez, & qu'en tel cas il luy eſcriroit, que ceux qui luy auoient conſeillé de faire ces Loix, auoient eſté tres-mal informez.*

Mais ces dernieres paroles, quelques bonnes qu'elles ſemblaffent, ne le faiſoient relachet en rien de ſon obſtination, & de ſa rigueur accouſtumée. Ce que ne voyant que trop les principaux Seigneurs, & les autres Habitans, ils commencerent tous à ſe porter dans le deſeſpoir. Les vns diſoient, Qu'ils abandonneroient leurs femmes, & poſſible l'euffent ils fait, ſi cela leur eut ſeruy à quelque choſe: car pluſieurs d'entr'eux s'eſtoient mariez à leurs Maiſtreſſes, qu'ils auoient deſbauchées du ſeruice de leurs Dames, pour y auoir eſté contraincts ſur peine de perdre leurs biens: Les autres, Qu'il leur vaudroit bien mieux n'auoir ny Enfans, ny femme, que de manquer de commoditez pour les entretenir, comme il aduiendroit ſi on leur oſtoit leurs Eſclauſes, qui les nourriſſoient de leur travail, s'employant aux Mines, à cultiuer la terre, & à tel autre Commerce. Quelques-uns auſſi demandoient que les Eſclauſes qu'on leur oſtoit, leur fuſſent payez, puis qu'ils les auoient acheptez dans le Quint du Roy, dont ils porroient le ſignal; Et pluſieurs ne ſeignoient point de dire, Que leurs ſeruices, & leurs travaux, ne pouuoient paſeſtre plus mal employez, puis qu'en leur extrême vieilleſſe, il falloit qu'ils ſe ſeruiffent eux-mefmes. Il y en auoit auſſi qui monſtroient leurs machoires toutes deſgarnies de dents, pour n'auoir mangé que du Mahiſtoſty, durant la Conqueſte du Peru: Et d'autres qui deſcouuroient les cicatrices reſtées deſſus leurs corps, des playes, des coups de pierre, & de prodigieuſes morſures de Lezards, qui dans la deſcouuerte de ces terres, auoient failly à les engloutir. Les Conquerans ſe plaignoient encore, de ce qu'apres auoir employé leurs biens, & reſpandus leur ſang, en la Conqueſte du Peru, l'Empereur leur oſtoit ce peu de Vaffaux dont il les auoit gratifiez. Les Soldats de meſme, diſoient, qu'ils s'empescheroient bien à l'aduenir de ſe peiner

tant qu'ils auoient fait à la descouuerte de ces terres, puis qu'on leur faisoit perdre l'esperance d'auoir des Indiens sous leur subjection; & que pour suppléer à ce defaut, ils voleroient à droid & à gauche par tout où ils pourroient mettre la main.

Les Lieutenans & les autres Officiers du Roy, ne pouuoient souffrir non plus d'estre priuez de leurs Départemens, sans auoir mal-traité les Indiens, apres auoir eu cette recompense, non pas en pur don, mais pour leurs trauaux, & leurs seruices. Les Religieux de mesme, & les autres Ecclesiastiques, aduoioient franchement, Qu'il leur estoit impossible de seruir dans leurs Eglises, si en leur ostant leurs Reuenus, on leur ostoit aussi de quoy viure. Mais celuy de tous qui declama plus haut, & contre le Vice Roy, & contre le Roy mesme, fut Frere Pierre Muñez de la Mercy: Car il disoit sans aucune crainte, *Que sa Maisté payoit fort mal ceux qui l'auoient si bien seruy; Qu'il y auoit plus d'interest que de sainteté dans ses Loix, puis qu'elles vouloient que les Esclauues fussent vendus, sans en rendre l'argent à leurs Maistres, & qu'elle souffroit avec cela que l'on annexast au Domaine du Roy, les biens des Eglises, des Hospitiaux, & des Monasteres; & pareillement les terres qu'on auoit données aux Conquerans, apres les auoir gaignées.* De toutes lesquelles choses, la pire, & la plus insupportable estoit, *Que sous pretexte d'accroistre les Droicts du Roy, ils imposoient vn double tribut aux pauvres Indiens, à qui ces impôts, & ces extorsions tiroient les larmes des yeux.* Les paroles de Gomare s'estendent iusques icy.

DE CE QV'ON DISOIT DANS LE PERU,
de ceux qui auoient conseillé de faire les nouuelles
Ordonnances; Et particulierement contre
le Licencié Barthelemy de las Casas.

CHAPITRE III.

CES Peuples ainsi esmeus, passant plus auant dans leur imprudence, & dans leur effronterie, faisoient mille compres au mespris de ceux qui auoient conseillé de faire les nouuelles Ordonnances: Mais ils en vouloient sur tout, à Frere Barthele-

my de las Casas, qui est celuy mesme, que Diego Fernandez met au nombre des vieux Conquerans des Indes, qu'il scauoit auoir esté Solliciteur, & mesme Inuenteur de toutes ces Loix. A raison dequoy, pour se vanger de luy, ils en disoient des choses estranges, qu'il auoit faites comme ils assureoient, auant que d'entre en Religion; Ils luy reprochoient ses particulieres extrauagances; sa pretendüe Conqueste de l'Isle *Cumana*; Comme encore les disgraces mortelles d'un grand nombre d'Espagnols, aduenüs par les fausses Relations, & par les vaines promesses qu'il auoit faites à l'Empereur, & aux Estrangers ses Sujets, d'accroistre les Reuenus de sa Maiesté, & d'enuoyer en Espagne quantité d'or & de perles, tant aux Flamands, qu'aux Bourguignons, qui estoient en cette Cour là: Cary ayant dans le Peru plusieurs Espagnols, autresfois Conquerans de diuerses Isles, iointes à celles de Barlouento, qui auoient conneu Frere Barthelemy de las Casas, auant qu'il fut Moine, ils publioient de luy beaucoup d'euenemens dignes de blasme: Et entr'autres, ce qui luy estoit arriué en la Conuersion qu'il auoit promis de faire des Indiens del'Isle *Cumana*. Ce que Lopez de Gomare décrit si naïfement dans son Histoire, que ie me trompe bien fort, s'il n'en a eus les Memoires de quelqu'un de ces premiers Conquerans: Et d'autant que ses sentimens sont du tout conformes à ce que disoient ceux du Peru; ie les rapporteray icy, tels que cét Autheur les a escrits dans le mesme Chapitre, intitulé comme il s'ensuit. *Chapitre 77. De la mort de plusieurs Espagnols qui se croysrent, pour suivre Barthelemy de las Casas, &c.*

Au temps que les Monasteres de *Cumana* & de *Chiriquichy*, fleu-
 rissoient le plus, le Licencié Barthelemy de las Casas, estoit
 Prestre à S. Dominique. Apres auoir loué plusieurs fois la fer-
 tilité du País, la douce humeur de ses Habitans, & la gran-
 de quantité de Perles qui s'y trouuoient, il vint en Espagne, où
 il demanda à l'Empereur d'estre fait Chef de cette Isle, & luy
 promit là dessus d'accroistre de beaucoup les Reuenus de sa
 Maiesté: au lieu que les autres Gouverneurs des Indes les dimi-
 minuoient, & qu'ils ne faisoient que le tromper. Iean Rodri-
 guez de Fonseca, le Licencié Louis Sapata, & le Secretaire
 Lope de Conchillos, qui connoissoient fort bien les Indes,
 le contredirent ensemble dans l'information qu'ils firent de
 luy, le delarant incapable de la Charge qu'il auoit deman-

„dée, pour estre Ecclesiastique, & peu versé en la cognoissan-
 „ce du País, & des choses qui en dependoient. Mais pour
 „rompre ces obstacles, il eut recours à la faueur de *Monsieur*
 „de la Quaul, premier valet de Chambre de l'Empereur, & à cel-
 „le de quelques autres Gentils hommes, partie Flamands, par-
 „tie Bourguignons: tellement qu'il obtint sa demande, sous vn
 „specieux pretexte du commun bien de la Chrestienté, ayant fait
 „croire que par le moyen d'vn certain ordre qu'il disoit auoir, il
 „conuertiroit luy seul plus d'Indiens que tous les autres ense-
 „mble; Qu'avec cela il enrichiroit le Roy, par la grande quantité
 „de Perles qu'il enuoyeroit en Espagne: En effet, il y en venoit
 „alors en telle abondance, que la Femme seule de Xeures en
 „auoit 170 Marcs, prouenus du Quint de sa Maiesté, si bien que
 „tous les Flamands de cette Cour-là faisoient à l'enuy pour les
 „auoir. Ainsi Barthelemy de las Casas hastant sa Nauigation en
 „l'Isle Cumana, n'attendoit plus qu'apres des Manœuvres pour
 „les mener avec luy, disant qu'ils ne feroient pas tant de mal
 „comme des Soldats escrocs, auares & desobeïssans: Mais ce ne
 „fut pas assez de les auoir; il voulut qu'on en fit des Cheualiers
 „aux Esperons d'or, & à la Croix rouge, différente de celle de
 „Callatraue: Et qu'outre cela, on les ennoblit, en leur donnant
 „les mesmes franchises qu'aux Gentils-hommes. On luy fournit
 „à Seuille, aux despens de sa Maiesté, l'équipage & les Nauires
 „qu'il luy falloit, où il s'embarqua tout aussi tost, avec 300. Ma-
 „nœuvres, tous croisez, comme ie viens de dire, & se rendit en
 „l'Isle Cumane, au temps que Gonçalo d'Ocampo y faisoit tra-
 „uailer à la Citadelle qu'on appelloit le fort de Toledé. Il luy
 „fâcha grandement d'y trouuer avec ce Canalier quantité de
 „Soldats Espagnols, que l'Admiral y auoit enuoyez par l'aduis
 „des Officiers de l'Admirauté, & de voir que le País estoit rout
 „autre qu'il ne l'auoit depeint à la Cour. A son arriuée il presen-
 „ta ses Lettres de Prouision, requerant qu'on luy laissast le País
 „libre, afin qu'il le pût peupler, & le gouverner à sa mode. A quoy
 „Gonçalo d'Ocampo respondit, Qu'il ne refusoit pas d'obeïr,
 „mais qu'il ne le pouuoit faire, sans l'exprés commandement du
 „Gouverneur, & des Auditeurs de saint Dominique, qui l'en-
 „uoyoient là. Cependant, comme il le cognoissoit de longue main
 „pour certaines choses qui s'estoient passées, il se mocquoit sans
 „cesse de luy, & de ses nouueaux Cheualiers, qui portoient des

Croix, en forme de celles de saint Benoist.

Ces railleries déplaissent fort au Licencié, qui neantmoins les dissimuloit, & ne laissoit pas de se dépiter en son Ame de toutes les veritez qu'on luy disoit. Or comme il ne pût entrer dans le Fort de Toledo, il fit assez près du lieu, où fut autrefois le Monastere de saint François, vne maison de bois & de terre, où il logea ses Manœuvres, & y mit ce qu'il auoit d'Armes de munitions, & de viures. Cela fait, il s'en alla former sa plainte à saint Dominique, où Gongalos s'achemina de mesme; Et ie ne sçay sice fût pour le subiet du Licencié, ou pour le mescontentement receu de quelques vns de ses Compagnons, qui furent tous apres luy. Le Fort de Toledo se trouua par ce moyen abandonné, & les nouveaux Cheualiers en demurerent Maistres. Mais les Indiens extrêmement aises de ces dissensions entre les Espagnols, prirent leur temps là dessus, & attaquèrent valeureusement ces Champions dorez, qu'ils taillerent presque tous en pieces: Que s'il s'en sauua quelques vns, ce fut bien à point pour eux qu'ils trouuerent de quoy s'embarquer, pource que de tous les autres Espagnols il n'en resta pas vn seul en vie en toute cette Coste des Perles.

Après cét euenement tragique, Barthelemy de las Casas sçachant la mort de ses Amis, & considerant d'ailleurs la despense inutile qu'il auoit faite au Roy, se fit Religieux à saint Dominique, & ne pût par ce moyen, ny acroistre les Rentes du Roy, ny annoblir ses Manœuvres, ny enuoyer des Perles aux Flamands. Ces paroles sont iusques icy de Lopez de Gomare.

Toutes ces choses, & plusieurs autres encore, bien plus piquantes que les paroles de Gomare, estoient reprochées au Licencié Barthelemy de las Casas, par les Malcontents à cause des Ordonnances. Mais ceux du Peru passoient bien plus outre, & disoient, Qu'il s'estoit fait Moine, de peur que sa Maiesté ne commandast qu'on le punit, pour les fausses Relations par luy faites de l'Isle Cumane, sans l'auoir veüe, ny sans la cognoistre; Et que pour faire restitution à sa Maiesté des fraiz de son Embarquement, il luy auoit proposé ces Ordonnances, sans se desister de ses poursuites, sous pretexte d'estre grandement zélé au bien des Indiens; Mais que les effers de ce pretendu zele auoient assez tesmoigné que c'estoit vn Fourbe. A quoy ils adioustoient quantité d'autres reproches, qui grossiroient par trop

ce Volume, s'il me les faloit tous escrire. Diego Fernandez dit que l'Empereur fit Euesque de Chuapa, qui est dans Mexique le mesme Barthelemy de las Casas, mais qu'il n'osa iamais aller prendre possession de cét Euesché, pour les grands desordres qu'il auoit causez dans les Indes. Il me souuient que l'an 1562. ie le rencontray à Madrid, où il me donna ses mains à baiser, ayant ouï dire que l'auois pris naissance dans les Indes; mais il ne me tint pas long discours; quand il sceut que i'estois du Peru, & non pas de Mexique.

*RAISONS DES MALCONTENS DV
Peru, contre les nouuelles Ordonnances; & Prepara-
tifs diuers, pour la Reception du Vice-Roy.*

CHAPITRE IV.

ON disoit quantité d'autres choses, sur le subiet de ces Ordonnances, non seulement dans la Ville des Rois, mais encore par tout le Peru. Or pour mieux entendre d'où procedoient ces Plaintes, & ces mescontentemens Publics; il faut sçauoir, qu'en la Mexique, & au Peru mesme, s'obseruoit vne Coustume bien remarquable, & qui n'estoit pas encore abolie quand i'en partis; ce qui fut en l'an 1569. auquel l'on n'auoit pas encore déclaré les Offices hereditaires; Car en chasque Villé d'Espagnols, l'on esliuoit quatre Caualliers des principaux, & des plus gens de bien, pour Officiers de la Douïanne Royale, & pour estre Gardiens du Quint, reuenant au Roy de ce qu'on tiroit d'or & d'argent des Mines du Pais; Ce qui fut le premier Tribut que les Rois Catholiques imposèrent à tout le nouveau Monde. Il y auoit dans cette Douïanne quatre Officiers principaux, à sçauoir, vn Tresorier, vn Maistre des Comptes, vn Facteur, & vn Comroolleur, qui deuoient non seulement receuoir le Quint du Roy, mais faire payer encore les tributs que donnoient les Indiens, lors qu'ils venoient à vacquer par la mort de leurs Maistres, pour rapporter le tout au profit de sa Maïesté.

Outre ces Officiers, estoient creez tous les ans en chaque Vil-

le d'Espagnols, deux Juges ordinaires, vn Juge Criminel, avec son Lieutenant, & six, huit, ou dix Commissaires, tant du plus que du moins, selon l'estenduë de la Ville, sans les autres Officiers qu'on eslissoit, selon qu'il sembloit necessaire pour le bien public.

Sous ce tiltre d'Officiers, comme il est porté par la troisieme Ordonnance, estoient encore compris les Gouverneurs, Presidents, Auditeurs, & autres Ministres de Justice, avecque leurs Lieutenans, de sorte que par ladite Ordonnance, il estoit dit qu'on osteroit leurs Indiens à tous ceux qui auroient exercé lesdits Offices, ou qui les exerçoient effectivement.

Pour response à cette Ordonnance, ceux qu'elle fouloit, alleguoient les Raisons suiuentes : *Nous auons, disoient-ils, gagné cet Empire à nos propres frais, & mesme au peril de nos vies, & agrandyl la Couronne d'Espagne de quantité de Prouinces, & de Royaumes qu'elle possède auourd'huy; Pour recompense de ces seruices, l'on nous a donné pour Vassaux les Indiens que nous auons auourd'huy, & l'on nous les a donnez pour deux vies * seulement; au lieu que ces gratifications deuoient estre à perpetuité comme en Espagne: Avec tout cela neantmoins, on nous les oste maintenant, & toute la raison est, à cause qu'on nous a esleus pour estre Officiers des Droits Royaux, Administrateurs de la Justice, & Intendants de la Police des Villes. Que si dans tous ces Offices, nous auons fait nostre deuoir en gens de bien, sans que pas vn se plaigne de nous, puis que c'est nostre probité qui nous en a fait iuger dignes, quelle apparence y a-t'il de nous oster maintenant nos Indiens, sous pretexte de nous laisser iouyr de nos Charges? Cela n'est qu'un leurre assenrément, pour nous mieux attirer, afin de nous oster à l'aduenir ce que nous auons gagné. Ainsi dans le miserable estat où nous sommes reduits, il nous eut mieux valu estre Voleurs, Adulteres, & Assassins, que de viure en hommes d'honneur, puis que les Ordonnances ne parlent point au preiudice des Meschans, mais au dommage des gens de bien.*

C'estoient les langages qu'ils tenoient ouuertement, & sans rien apprehender. Mais l'on oyoit bien encore parler avec plus de liberté ceux qui se trouuoient condamnés par la 4. Loy, qui vouloit, Qu'on eut à priuer de leurs Vassaux Indiens, tous ceux qui se feroient trouuez engagez dans les deux Fastions, tant des Picarres, que des Almagres. D'où il s'ensuiuoit, comme dit Diego Fernandez, que cette Ordonnance venant à s'exécuter,

aucun ne pouuoit auoir dans tout le Peru, ny biens, ny Vaux.

Ils respondoient à cecy, *Qu'on ne les deuoit point blasmer d'auoir obey à deux Gouverneurs de sa Maïesté, puis que l'un & l'autre estoient de droit, & qu'ils n'auoient agy que par leurs Ordres: Qu'ils n'auoient rien entrepris contre la Couronne d'Espagne, mais seulement travaillé pour satisfaire leurs querelles, & les animositéz particulières que le Diable leur auoit inspirées, touchant le partage de leurs Gouvernemens; Que si les uns pour auoir failly, meritoient de perdre leurs biens, il s'ensuiuoit de là, qu'on ne deuoit pas confisquer ceux des autres, pour auoir dignement seruy le Roy; Et partant, que de condamner également ceux des deux Partys à estre despoillez, de toutes commoditez, c'estoit plustost imiter Neron, & ses semblables, que procurer l'aduanacement des subjets.*

Ils disoient en suite mille maux, & mille choses estranges contre les Auteurs de ces Ordonnances, qui par leurs artifices persuadoient premierement à l'Empereur de les signer, puis de les faire executer à toute rigueur, sous pretexte que son seruiue le requeroit ainsi.

Là dessus ils mettoient en auant, *Que s'il leur fut aduenu de se trouuer à la Conqueste du Peru, & de souffrir les peines que ses Conquerans auoient eues, au lieu de faire de telles Loix, ils se feroient de la- rez contre elles. Surquoy, pour autoriser leur dire, & leurs inuectiues, ils produisoient quantité d'Histoires, tant anciennes, que modernes, semblables à celles des Guerres que les Pizarres & les Almagres auoient allumées: Certes, disoient-ils, si durant les troubles aduenus en Espagne, entre les deux Roys, Dom Pedro le Cruel, & Dom Henrique son Frere, ceux qui acoururent pour les seruir, comme firent les principaux Seigneurs, avec les Aïnez des Maisons, & qui l's seruirent en effet, iusques à la mort de l'un d'eux; il eut fallu qu'après la fin de cette Guerre, les successeurs de la Couronne eussent osté leurs Estats, & leurs Heritages à ceux qui auoient suuy l'un ou l'autre Party; qu'est-ce qu'ils n'eussent point dit? Et qu'est-ce que n'eussent point fait encore les plus puissans de toute l'Espagne? A cét exemple ils adioustoient celuy des Guerres entre la Castille, & le Portugal, touchant les Droicts de succession de celle qu'ils appellerent Beltraneja, deux fois declarée Princesse de Castille, dans le Party de laquelle s'estoient iettez plusieurs Seigneurs du País, que la Reïne Doña Izabelle appelloit Traistres. Ce que*

le Duc d'Albe ayant vne fois ouï, *Vostre Altesse*, dit-il, *peut bien prier Dieu que nous demeurions Vainqueurs; Car s'il leur aduient de l'estre, il se trouuera que nous serons nous-mesmes les Traistres.* D'où ils tiroient cette consequence, *Que si le Successeur eut priuô de leurs Estats, tous ceux qui s'estoient trouuê dans cette Guerre, c'eust esté vne chose bien déplorable que leur condition, apres n'auoir eu d'autre dessein que le bien public.* Ils faisoient plusieurs autres inuestiues; d'où ils en vinrent à des querelles entr'eux, & de ces querelles à de dangereux effets, qui s'en ensuiuirent depuis. Mais pource que plusieurs pourroient s'offenser de ces indignitez, ie les passe sous silence, pour reuenir au Vice-Roy Blasco Nuñez.

Comme il continuoit son chemin en la Ville des Rois, il fut extrêmement satisfait des Deputez que luy enuoya le Licencié Vacca de Castro: Aussi leur fit-il vn fort bon accueil, & les despescha le plustost qu'il pût, afin qu'ils s'en retournassent en la Ville des Rois, où ils ne furent pas plustost arriuez, qu'ils y raconterent avec combien de seuerité le Vice-Roy faisoit executer les Ordonnances, dans le dessein qu'il auoit de les establir par tout le Peru, sans vouloir escouter pour cette fin ny Requestes, ny destais, en matiere d'exécution.

Cette Nouuelle alluma vn nouveau feu dans la Ville des Rois; en celle de Cozco, & generalement par tout le Royaume; Tous estoient d'aduis de ne point receuoir le Vice-Roy, ny les Ordonnances non plus, alleguant que dès l'instant qu'il seroit entré dans leur Ville,* & qu'il les auroit publiées, ils se trou-
* dans la Ville des Rois.
 ueroient despourueus, & de Vassaux Indiens, & de toutes autres commoditez: Surquoy ils mettoient en auant, qu'outre la perte de leurs Indiens, expressément portée par les Ordonnances, elles contenoient tant de choses diuerses, & tant de Mandemens insupportables, qu'ils ne pourroient jamais empescher qu'on ne leur ostast leurs biens, & peut-estre mesme leurs vies. Car concludoient-ils, Il n'est pas incompatible que pour le mesme sujet, pour lequel ils nous rauissent nos Indiens, qui est pour nous estre trouuê à la Guerre des Pigarrès, & des Almagres, ils ne nous fassent perdre la teste: ce qui n'est pas à souffrir, quand mesme nous serions des Esclaves.

Toutes ces Intpertinences, & ces beaux comptes, dont ils s'entretenoient dans la Ville des Rois, firent vne si forte impression

dans les Esprits, que les Habitans furent presque en resolution de ne point recevoir le Vice-Roy. Mais le Facteur Yllen Suarez de Caruajal, & Diego d'Aguero, leurs principaux Chefs, esgalement affectionnez & estimez de tous, pour leurs bonnes qualitez, les appaiserent par leurs raisons. Il fut donc resolu entre eux, de luy faire la plus belle & la plus magnifique entrée qu'il leur seroit possible, pour voir si par leurs services, leurs soumissions, & leurs tres-humbles hommages, ils ne pourroient point fleschir son humeur imperieuse. Car tout leur dessein estoit de les reduire par ce moyen à les escouter en leurs iustes plaintes, & à les maintenir en leurs anciennes franchises, suivant les Loix que les Rois Catholiques, & l'Empereur mesme, auoient faites en faueur des Conquerans du nouveau Monde: Loix, à vray dire, qui regardoient plus aduantageusement que les autres, ceux du Peru, en consideration des grandes richesses, & de la vaste estenduë de cét Empire.

Après cette resolution, ils firent provision de toute sorte de galanteries, comme de belles Liurées, de riches habits, & de precieux Ioyaux, pour s'en parer au iour que le Vice-Roy feroit son entrée dans leur Ville; Et cependant, ny le Facteur Yllen Suarez de Caruajal, ny le Capitaine Diego d'Aguero, ne purent empescher qu'on ne murmuraît contr'eux à tout propos. On leur reprochoit d'auoir persuadé & sollicité cette Reception du Vice-Roy, pour leur profit particulier, à cause que l'un pour estre Facteur de la Doüane Royale; l'autre pour auoir eu commandement aux Guerres passées, & tous deux pour estre Officiers, auoient perdu leurs Vassaux Indiens; Et qu'ainssi ce qu'ils en faisoient, n'estoit pas tant pour le service de l'Empereur, que pour leurs interets particuliers.

Durant tout cecy, le Vice-Roy passoit tousiours son chemin, ne laissant perdre aucune occasion de faire mettre en execution quelque partie des Ordonnances, selon les lieux où il se trouuoit; à quoy n'apportoient aucun obstacle les plaintes publiques qu'il oyait faire par tout, nonobstant lesquelles il ne laissoit pas de passer outre: Car au lieu de s'adoucir, il s'aigriroit plus fort de iour en iour, contre les Mal-contens, pour leur donner à connoistre par là, qu'il ne les craignoit point, & qu'il vouloit estre fidele Ministre, suivant l'ordre qu'il en auoit de son Roy, qu'il disoit à tout propos estre la seule personne à laquelle il vouloit obeir.

Continuant ainsi sa route, il arriva en la Vallée du *Huaura*, où quand se vint au giste, il ne trouua ny provisions de bouche, ny aucuns Indiens de service. Or bien qu'il en falut imputer la principale faute à ceux de la Ville des Rois, le deuoir desquels estoit de donner ordre que les chemins par où le Vice-Roy deuoit passer, ne fussent point despourueus de viures; il ne s'en prit neantmoins qu'à vn Homme particulier, nommé Anthoine Solar, natif de Medina del Campo, & lors habitant de la Ville des Rois, auquel appartenoit cette Vallée; à raison dequoy il conceut vne tres-grande haine contre luy: Mais elle deuint bien encore plus grande, lors que regardant sa Maison, il apperceut que sur la muraille (qu'on n'appelle pas sans raison le papier des Fols) on auoit escript, ces paroles: *Je ne m'espargneray point de faire du pis que ie pourray, pour oster du Monde quiconque viendra pour me mettre hors de mon bien, & de ma Maison.* Et d'autant que ces mots se trouuerent escripts au logis de Solar, il s'imagina qu'il l'auoit fait luy-mesme, ou quelque autre pour luy; contre lequel il conceut depuis vne si grande haine, qu'encore qu'il le dissimulast alors; si est-ce qu'il ne manqua pas de s'en vanger, comme il se verra cy apres.

ENTREE DV VICE-ROY, ET EMPRI-
sonnement de Vaca de Castro; Avec vn Recit des
desordres publics, dont le Vice-Roy ne fut
pas exempt.

CHAPITRE V.

QUELQUE peine que prit le Vice-Roy, de dissimuler les ennuis & les fâcheries de son Ame; il ne laissoit pas toutesfoiſ d'en auoir vn desplaisir tres-sensible; Apres s'estre bien entererenu dans sa Melancholie, il arriva finalement à trois lieuës de la Ville de Rimac, où il trouua plusieurs Cavaliers principaux, venus au deuant de luy; Et entr'autres, le Licencié Vaca de Castro, avecque l'Euesque Dom Hierosme de Loaísa, qui fut depuis Archeuesque. Comme leur dessein estoit de l'accompagner en son entrée dans la Ville, ils furent accueillis par luy-

mesme, avec vn visage fort ferein, principalement l'Euesque, & le Licencié Vaca de Castro : Ils marcherent donc de compagnie, le Vice-Roy s'entretenant avec eux du beau paisage, & de la fertilité de cette Vallée.

Quand ils furent près de la Riuiere, ils trouuerent Garcidia d'Arias, qu'on auoit esleu Euesque de Quitu; ensemble ceux du Chapitre de cette Eglise-là, & le reste du Clergé, qui le saluerent tous avec beaucoup de soumissions, & de grandes demonstrations de ioye : puis assez près de la Ville, ils rencontrerent les principaux Deputez & les plus considerables de la Noblesse. Alors, comme le remarquent les trois Auteurs susnommez, le Facteur Yllen Suarez de Caruajal, premier Deputé de tout le Corps, prit serment du Vice-Roy, au nom de la Ville, qu'il maintiendrait les Conquerans du Peru dans leurs Priuileges, & leurs Franchises, sans diminuer en rien les gratifications, & les Recompenses que sa Maiesté leur auoit faites; & qu'outre cela, il leur rendroit Iustice, touchant ce qu'ils auoient à dire sur le fait des Ordonnances. Et d'autant qu'il sembla y auoir de l'equinoque dans le serment qu'il fit, par lequel il iura simplement de faire tout ce qui luy sembleroit conuenable, tant au seruice du Roy, qu'au bien du public; cela donna sujet à plusieurs de dire tout haut, *Que son serment n'estoit qu'artifice, & que tromperie.* Voilà ce qu'en dit Diego Fernandez.

Ainsi, pour les auoir si peu satisfaits en leur demande, il fut cause que tous les Habitans, Ecclesiastiques & Seculiers, s'attristerent d'une façon estrange, & qu'ils changerent en déplaisirs secrets toutes les marques de ioye qui auoient paru iusques alors sur leurs visages. Ils disoient tous, *Que de cette sorte de serment ils ne deuoient esperer aucun bien, mais plustost apprehender beaucoup de mal; Qu'au premier iour ils se verroient priuez de leurs Départemens d'Indiens; Que par ce moyen ils n'auoient plus de quoy subsister, durant le temps qui leur restoit à viure, ny de quoy gagner leur vie non plus, pour estre non seulement vieux, mais tous cassés par les fatigues souffertes.* Ils voulurent neantmoins aller, comme l'on dit, iusques au bout; Et pour faire plus d'honneur au Vice-Roy, le mirent sous vn riche Daiz de Brocatel. Les principaux Iuges qui en soustenoient les bastons, estoient vestus de riches robes de velours cramoisy, doublées de satin blanc. Toute la Ville retentissoit du

bruit des Cloches : & l'on n'oyoit qu'Instrumens de Musique dans les Ruës, qu'on auoit ionchées de feuillages, & embellies de plusieurs Arçes de Triomphe, faits de diuerſes ſortes de fleurs entremêſſées : en quoy les Indiens excellent comme nous auons dit ailleurs ; & toutesſois quelque agreable que ſemblait eſtre cette magnificence, on l'eut pluſtoſt priſe pour vne Pompe funebre, que pour vne Entrée de Vice-Roy, rant il y auoit de ſilence, & de triſteſſe interieure parmy tous ceux qui ſ'y trouuoient preſens.

Le Vice-Roy fut ainſi conduit en la grande Eglife ; & apres l'Adoration du Saint Sacrement, on l'accompagna iuſques au Palais du Marquis Dom François Piçarré, où il fut logé avec tout ſon train. Mais le iour ſuiuant, ayant appris le bruit qu'auoient fait dans Cozco, ceux qui ſortis de cette Ville là, pour accompagner le Licencié Vaca de Caſtro, ſ'y enſtoient retourné depuis ; il apprehenda, comme dit Carate, & les autres Auteurs avec luy, *Que ce Concurrant de ſa gloire n'eut preſté la main à cette Mutinerie, ou pluſtoſt, que luy-mème ne l'eut cauſée ; ſi bien que pour empêcher qu'il n'en vint plus auant, il le fit mettre dans la Priſon publique, & même ſaiſir ſes biens.*

Or quoy que ceux de la Ville fuſſent aſſez mal avec Vaca de Caſtro, ils ne laſſerent pas toutesſois d'aller parler pour luy au Vice-Roy, auquel ils remonſtrèrent, *Qu'il n'y auoit aucune apparence, qu'un Homme de cette condition, qui auoit eſté leur Gouverneur, & du Conſeil du Roy, fut arreſté dans vne Priſon publique ; Qu'au reſte, quand même il ſeroit deſtiné pour auoir le lendemain la teſte tranchée, on le pouuoit loger plus honneſtement, & avec non moins de ſeureté. D'où il aduint, que le Gouverneur touché de ces paroles, le fit transporter en la Maiſon du Roy, apres qu'il eut donné pour ſumtions de la ſomme de cent mille eſens, les principaux Habitans de Lima ; Ce que ceux de la Ville des Rois ne voyoient point, qu'avec vn extrême déplaiſir de tant d'injuſtes rigueurs : ſi bien qu'ils faiſſient tantost de ſecrettes Aſſemblées ; & tantost ſortant de la Ville, les vns apres les autres, ils prenoient le chemin de Cozco, où le Vice-Roy n'auoit pas encore eſté receu. A ces paroles de Carate ſont tout à fait ſemblables celles de Diego Fernandez, qui adiouſte, *Que Vaca de Caſtro ne bougea de la Priſon publique, Et dit ce qui ſuit.**

Ceux de la Ville des Rois faiſoient à tout conp de ſecrettes Aſſemblées, où ils ſ'entretenoient des grands maux qui menaſſoient le País,

Et ceux qui l'auoient conquis, disant, Qu'il ne faisoit plus parler à cette fois, ny de Liberté, ny de Richesse, ny de Domination sur autrui; Que les Conquerans des Indes auoient maintenant tout perdu; Qu'on ne deuoit esperer autre chose, sinon que tout le Pais seroit deormais desert, & iroit tousiours en decadence; Que l'on ne pouuoit en façon quelconque, souffrir ce que l'Empereur vouloit, ny penser non plus à decouurir de nouuelles Terres; à conseruer celles qu'on auoit decouuertes, à les peupler d'Habitans, & à maintenir le Commerce d'ins tout le Pais. Parmy ces inconueniens, ils en mesloient quantité d'autres; & dans ces communs desordres, où la Confusion, & la Crainte se glissoient par tout; à peine scauoient-ils à quoy se refoudre: Quelques vns des Principaux neantmoins essayoient assez accortement de remedier à ce mal; & sous pretexte de visite, s'en alloient trouuer le Vice-Roy, croyant de le pouuoir adoucir, ou luy faire relascher quelque chose de sa rigueur ordinaire, comme il auroit sceu l'estat deplorable du Pais, & la mauuaise disposition de ses Habitans. D'autres aussi, qui estoient vn peu plus hardys, luy representoient quelques vns de ces inconueniens, avec le plus de moderation qu'ils pouuoient y apporter, pource qu'ils scauoient qu'il se piquoit au dernier point, quand on entroit dans cette matiere: Mais tout cela leur seruoit si peu, qu'au lieu d'en estre touché, il entroit incontinent en fougue, iettoit sa Canne, & rompoit là dessus, sous couleur de vouloir absolument accomplir la volonté de son Prince. De cette façon, il ne vouloit, ny escouter personne, ny respondre aux plaintes qu'on luy faisoit; & sans se soucier de donner la moindre satisfaction à qui que ce fut, il repettoit à tout coup ce mesme langage, Qu'il n'obissoit que par l'express commandement de l'Empereur, ce qui luy faisoit tousiours de nouueaux Ennemis.

Quelque temps apres qu'il eut fait son entrée en la Ville des Rois, trois de ses Auditeurs, qu'il auoit laissé derriere, arriuerent ensemble; Le Licencié Carate, qui faisoit le 4. estant demeuré malade à Truxillo. Il se resolut alors d'establi l'Audience Royale dans la mesme Maison, où il estoit logé, comme en vn lieu qui luy sembla le plus commode de tous, pour sa belle scituation, & pareillement pour la beauté de son edifice. Il ordonna en suite, que pour memoire de la nouuelle Iurisdiction qu'il introduisoit dans le Pais, on eut à faire vne magnifique Reception au Sceau du Roy; Comme en effet, on le receut avec

Pompe & Ceremonie; Car apres l'auoir mis dans vn riche Caſſe, ſous vne belle Couuerture de toile d'or, il fut porté ſur vn beau Cheual, ſuperbement harnaché, & ſous vn Daiz de Brocatel, dont les baſtons eſtoient portez par les principaux Officiers de la Ville, veſtus de robes de velours rouge, avec pareille ceremonie qu'on a couſtume de receuoir en Eſpagne, la perſonne du Roy; l'vn des Officiers menant le Cheual en main.

Alors ſe commença la ſeance des Eſtats, pour l'expedition des affaires du Gouuernement, & l'eſtabliſſement de la Juſtice. Les apparences firent iuger, que le Pais en ſeroit plus conſiderable. Et deſia meſme les moins pourueus des biens de Fortune ſ'en réjouïſſoient entr'eux, les Pauures eſtans ordinairement plus enthuſiaſmes que les Riches à la pluralité des Iuriſdictions, à cauſe qu'ils s'imaginent d'en eſtre mieux maintenus. Mais le commun Ennemy des hommes, iectant deſia les fondemens de l'amine du Vice Roy, qui ſ'en alloit ainſi ſemant le deſordre dans vn Pais où la Guerre venoit de ſe terminer, attifa ce feu de diſſention, à force de le ſouffler. Car pour en mieux accroître la violence, il mit mal enſemble le Vice Roy, & les Auditeurs: Tout le Royaume par conſequent ſe reſſentit de cette diuiſion, qui ne procedoit, comme j'ay dit, que de l'humeur obſtinée du Vice-Roy, qui vouloit que les Ordonnances paſſaſſent à quelque prix que ce fut, ſans daigner receuoir la Requeſte de la Communauté de Lima, ny celle non plus des Deputez des autres Villes. Ainſi le rapporte Diego Fernandez Palentin, ſuiuant Ch. 10. le ſentiment duquel; il eſt bien à croire, que l'Eſprit d'Erreur & de Menſonge abuſoit le Vice-Roy, en l'empêchant de connoiſtre les grands troubles que ſon opiniſtreté cauſoit dans le Royaume.

Mais le Diable, & le Diſcord, qui eſt ſon principal Miniſtre, en la deſtruction des Royaumes & des Empires, ne ſe contentent point d'allumer ce feu de Diuiſion; entre le Vice-Roy, & les Conquerans du Pais. Ils voulurent que les eſtincelles en vollaſſent plus auant, & que les quatre Auditeurs qu'on luy auoit donnez pour Conſeillers, en reſſenſſent les effets eux meſmes: Il ne tenoit pas à eux que le Vice-Roy n'allast vn peu plus doucement qu'il ne faiſoit, dans l'exécution des Ordonnances. Ces hommes ſages & deſintereſſez, qui preuoient les choſes de loing, venant à conſiderer que le ſeul bruit de ces nou-

uelles Loix, auoit estrange ment esmeu les humeurs de ceux du Pais; inferoient de là l'ineuitable ruine qu'elles y causeroient à la fin: n'y ayant pas d'apparence, qu'un Royaume qui auoit à peine posé les Armes, apres vne dangereuse Guerre, pût iamais souffrir que son repos fut troublé, par tant de rigueurs qu'on exerçoit contre luy, & qu'il eschappast de la desolation dont il estoit menassé. Ils en disoient donc leurs sentimens au Vice-Roy, & taschoient le plus doucement qu'ils pouuoient, d'apporter quelque moderation à son esprit: Mais il aduint, qu'au lieu de leur en sçauoir du gré, il en prit de l'ombrage contr'eux, & les soubçonna de s'estre laissé suborner & corrompre. Ainsi s'imaginant, comme il disoit d'ordinaire, que tous ceux qui luy alleguoient quelque chose, qu'ils croyoient deuoit empescher l'execution des Mandemens de sa Maiesté, se declaroient ses Ennemis; il leur enuoya dire, qu'ils eussent à se loger à leurs propres frais, & à ne plus incommoder les Habitans, dont ils tenoient les Maisons sans en rien payer.

Cependant, de ce que les Auditeurs luy disoient, touchant les inconueniens qu'apporteroit l'execution de ces Ordonnances, les vns, & les autres en venoient quelquefois à des paroles piquantes; Mais la continuelle communication qu'ils auoient en semble touchant les affaires du Gouvernement, seruoit d'une Digue à leur animosité: quoy qu'il en fut neantmoins, comme l'intention qu'auoit le Vice-Roy de ne point relascher de la publication de ces Ordonnances, alloit s'augmentant de iour en iour, ainsi voyoit-on pour ce sujet, s'accroistre plus fort le déplaisir, & la fâcherie de ceux à qui elles s'adressoient. Ils consideroient d'un costé, comme dit Diego Fernandez, *Que le Vice-Roy ne vouloit en rien desmordre de leur execution; & de l'autre, que l'Empereur estoit si esloigné d'eux, qu'il ne pouuoit pour remédier à leurs maux: A quoy se mesloit encore l'apprehension qu'ils auoient de ne pouuoir iamais rentrer dans leurs biens, apres qu'on leur auroit une fois osté leurs Départemens d'Indiens: ce qui leur en rendoit si sensible la perte, que la seule imagination de ces accidens, suffisoit pour les faire entrer en frenesie, n'y ayant parmy eux que desordres, que confusion, & qu'extravagance. Cette maladie ne trouuait pas seulement le Peuple: elle s'attaquoit encore au Vice-Roy mesme. Il voyoit que les Habitans se souleuoient; Que plusieurs s'enfuyoient de luy, & qu'ils estoient presque tous en alarme: tellement que ses propres*

inquiétudes naïssent des leurs, & luy faisoient faire ainsi mille extravagances : D'où il s'ensuivoit, qu'il irritoit tousiours de plus en plus le courage de ceux que les Ordonnances choquoient : iusques-là mesme, que dans le desespoir où ils se trouuoient, ils ne se soucioient plus d'abandonner, comme ils firent depuis, leurs biens, ou mesme leurs vies ; Et c'est icy que finissent les paroles du Palentin.

LE TEVPLE DESCOVRE LA HAINE
secrete, entre les Auditeurs & le Vice-Roy ; A qui
le Prince Manco Ynca, & les Espagnols, qui
estoient avec luy, escriuent des Lettres.

CHAPITRE VI.

LA Discorde ne se contenta point de s'estre glissée dans l'Âme du Vice-Roy, & des Auditeurs qui luy estoient donnez pour Adjoints : Elle voulut se monstrier à descouuert, comme estant d'humeur à courir les Ruës, & à se pourmener dans les Places publiques ; Voilà donc qu'elle remit en memoire au Gouverneur les mots qu'arrivé dans Ora, il auoit leus sur vne muraille de la Maison d'Anthoine Solar : tellement que sur le soupçon qu'il eut, comme i'ay remarqué ailleurs, que luy-mesme les auoit escrits, ou fait escrire, il l'enuoya querir ; & se voyant seul avec luy, comme le rapportent Carate, & Diego Fernandez en termes semblables, l'accusa d'abord d'auoir dit contre luy certaines paroles tres impertinentes ; & qui ne luy plaisoient pas : d'où il aduint, qu'en mesme temps ayant fait fermer les portes du Palais, il fit appeller vn de ses Chappellains, auquel il commanda de le confesser, son dessein estant de le faire pendre en l'vn des pilliers de la Galerie qui regardoit sur la Place. Anthoine Solar ne se voulut point confesser : Et cette contestation entr'eux dura si long-temps, que le bruit en fut semé par la Ville, & vint mesme iusques aux oreilles de l'Archeuesque de la Ville des Rois, avec qui plusieurs personnes de qualité, prièrent le Vice-Roy de faire suspension de cette Iustice ; et qu'il leur accorda pour ce iour-là, & fit cependant mettre en prison Anthoine Solar. Mais comme cette premiere fougue fut

passée, ne jugeant pas à propos de le faire pendre, il le tint en prison deux mois tous entiers, sans qu'il y eut, ny Enqueste, ny autre forme de procesz contre luy. En ces entrées faites, il aduint qu'un Samedi les Auditeurs furent à la Prison, où bien informez du fait, & mesme priez en faueur d'Anthoine Solar, ils le visiterent; luy demandant le sujet de son Emprisonnement: à quoy Solar fit réponse; Qu'il n'ensçauoit rien, comme en effet, il ne se trouua aucune Information contre luy dans le Greffe; Et le Juge enquis là-dessus, ne sceut que respondre, sinon que par l'ordre exprès du Vice-Roy on l'auoit mis dans cette prison.

Le Lundy suivant les Auditeurs, firent rapport au Vice-Roy; Qu'ils auoient trouué dans la Prison Anthoine Solar, sans qu'il y eut contre luy aucune poursuite. que luy seul estoit sa partie, à ce qu'on disoit, & que s'il ne se trouuoit point d'autres preuues, pour iustifier son Emprisonnement, suivant l'ordre de la Justice; ils ne pouuoient moins faire que de le tirer de ce lieu-là.

Le Vice-Roy leur fit réponse, Qu'il l'auoit non seulement fait prendre, mais encore voulu faire pendre, tant pour les beaux mots qu'il auoit escrits sur la muraille de sa Maison des Champs, que pour certaines indignitez par luy commises, au mespris de sa personne; Qu'auteste, bien qu'il n'eut daigné se mettre en peine d'en auoir des resindignages, ny des preuues; que neantmoins en qualité de Vice-Roy, il le pouuoit saisir, & mesme le mettre à mori, sans estre aucunement obligé de leur rendre compte de cette action. A quoy les Auditeurs repartirent. Qu'il n'y auoit ny Gouverneur, ny Vice-Roy que se pussent dire tels, s'ils n'agissoient suivant la Justice, & conformement aux Loix du Royaume. Ils se separerent dans ce differend, & le Samedi prochain, en la visite qui se fit des Prisonniers, ils firent sortir Anthoine Solar, auquel ils donnerent leur Logis pour Prison, & le relascherent entierement en la visite suivante. Le Vice-Roy prit cela pour un affront, & fût si fort irrité contre les Auditeurs, qu'ayant cherché les occasions de se vanger d'eux, il en trouua vne qui fut telle. Il sceut que chascun d'eux en particulier, auoit pris logemēt dans trois des plus riches maisons de la Ville, où l'on leur fournissoit & à leurs gens, des prouisions de bouche, & d'autres choses qui leur estoient necessaires; tellement qu'il se mit dans l'esprit, de leur oster deormais cette commodité; Car bien qu'au commencement il l'eut trouué bon luy-mesme, ce n'auoit

esté, disoit-il, que pour vn temps limité, & en attendant qu'ils eussent meublé des Logis, pour y demeurer; de sorte que ce terme luy semblant expiré, il leur enuoya dire; *Qu'ils eussent à se pourvoir de Logis, & à ne plus vivre aux despens des Bourgeois; Que cela ne se pouuoit faire sans les fouler, & que sa Maiesté ne l'en doit pas ainsi. Qu'au reste, il n'approuuoit nullement qu'ils souffrissent allans par la Ville, que les gens d'affaires, & mesme les principaux Habitans les accompagnassent.*

A toutes ces choses, les Auditeurs respondirent, *Qu'ils ne trouuoient point de Maisons à louer, pour ce terme-là, Qu'il en faisoit attendre vn nouveau; Que cependant ils viuroient à leurs despens, & que touchant l'honneur qu'on leur faisoit de les accompagner, ce n'estoit pas chose d'offensuë, ny qui fut nouvelle non plus, puis qu'elle se pratiquoit ordinairement en la personne des Conseillers de sa Maiesté, que les parties eussent accoustumé d'entretenir, allant & venant, pour les instruire de leurs affaires. Ces Diuisions s'entretenoient ainsi parmy eux, & les portoient si auant, qu'ils ne manquoient iamais de se nuire, quand l'occasion s'en presentoit. Ce que sceut bien tesmoigner le Licencié Aluarez, qui s'aduifa vn iour de faire prester serment à vn Procureur, sur vn bruit qui courroit de luy, qu'il auoit fourny à Diego Aluarez, beau Frere du Vice Roy, certaine quantité d'or, pour luy faire donner la nomination d'un Office par le Vice-Roy, qui s'offensa grandement de ce procédé.*

Ce dernier article est d'Augustin de Carate, & se trouue entierement conforme au tesmoignage de Diego Fernandez, auquel il adiouste, *Que le Vice-Roy, & les Auditeurs sembloient auoir formé deux Parties, tout à fait contraires l'un à l'autre. D'ailleurs, Anshoine Solar ne fut pas plustost sorti de prison, que pour rendre le Vice-Roy plus odieux, il fit du pis qu'il pût contre luy: Pour cette mesme fin, il faisoit secrettement assembler les Habitans, auxquels & aux guerres du Pais, il disoit des choses contre luy, qui ne luy estoient iamais tombées en la pensee: à quoy neantmoins on ne laissoit pas d'adiouster soy, pource qu'ils haïssent tous si fort Blasco Nuñez, qu'il ne se pouuoit rien adiouster à leur haine: Aussi est-il vray qu'à son occasion ceux de la Ville des Rois, auoient en si grande horreur le nom de Roy, que les Romains ne le hayrent iamais dauantage, après que Tarquin le Superbe fut chassé de Rome; bien que neantmoins Blasco Nuñez Vela, fut le premier qui prit au Peru ce tiltre, & cette marque d'honneur ennemie.*

L'addition de Diego Fernandez Palentin, va iusques icy, & ne contredit point le sentiment du Docteur Gongalo d'Yllencas, qui dans son Histoire des Papes, traitant du succès & de l'Empire du Peru, appelle insupportable l'humeur de ce Vice-Roy, & en dit les paroles suivantes. *Après que Vaca de Castro fut nommé Gouverneur du Peru, où il maintint la paix parmy tous ces Peuples, durant le temps de sa Charge, qui fut d'un an, & demy, on y enuoya pour prendre sa place, Blasco Nuñez Vela, Cavalier des principaux d'Auilla, qui s'y en alla, pour y apporter certaines Ordonnances tres-rigoureuses, mais qui ne l'estoient pas tant que celui qui les devoit mettre à execution, &c.* Où il est à remarquer, que ce Docteur tranche nettement en peu de paroles, ce que tous nos Historiens en general, n'ont pû, ny osé dire en tout ce qu'ils ont pareillement escrit sur cette matiere.

Tandis que ces choses se faisoient dans la Ville des Rois, il s'en passa d'autres encore plus grandes en des lieux, où il s'en faisoit beaucoup que l'Ambition, l'Enuie, la Tyrannie, & le desir de regner & de commander, n'eussent le mesme Ascendant, & le mesme Empire, qu'ils auoient en cette Ville. La Discorde pourtant ne laissa pas d'y trouuer place, & de troubler le repos commun, voire de mettre à mort le pauvre Prince Manco Ynca, dans vn Desert, où il s'estoit banny volontairement, après estre veu priué de son Empire : pour la iouissance duquel estoient aduenues tant de cruelles Guerres, & tant de sanglans massacres ; Ce qui en faisoit apprehender de semblables, & de plus funestes mesme, si toutesfois il y en pouuoit auoir de pires, dans le déplorable estat où l'on se trouuoit alors.

Pour mieux s'esclaircir de la disgrâce de ce Prince, il faut sçauoir que Diego Mendez, Gomez Perez, & autres six Espagnols, qui s'eschapperent, comme i'ay dit cy-deuant, de la Prison de Cozco, de la persecution des Piçarres leurs Ennemis, & de la Iustice que vouloit faire d'eux le Licencié Vaca de Castro, qui auoit naguere chastié les plus coupables de la mort du Marquis Dom François Piçarre ; furent aduertis par le moyen de l'Ynca, de l'arriuée du nouveau Gouverneur, & des grandes dissensions qu'il y auoit dans tout le Païs, où il venoit, à ce qu'on disoit, pour y faire de nouueaux chastimens, & changer les Reglemens qui regardoient la façon de viure des Espagnols ; chose qu'en effet le Prince Manco Ynca pouuoit sçauoir, ne se pas-

tant point de iour qu'il n'enuoyast quelques-vns de ses Vassaux, pour auoir des nouuelles, n'en pouuant apprendre auecunes autrement, pour estre enferm   entre des Montagnes o   personne ne frequentoit.

Ainsi Diego Mendez, & ses Compagnons, bien aises de la venue du Vice-Roy, persuaderent    l'Ynca de luy escrire, & avec cela luy demanderent permission de sortir de cette Solitude, pour aller seruir sa Maie  t  , dans les occasions o   son Gouverneur les moneroit. En effet, l'Ynca s'imaginant, comme ils luy faisoient accroire, que sa Lettre prepareroit l'Esprit du Vice-Roy    luy rendre, sinon tout son Empire,    tout le moins vne bonne partie, luy escriuit l   dessus, & les Espagnols en firent de mesme pour leurs affaires particulieres, luy demandant pardon du pass  , & vn sauf conduit pour aller seruir sa Seigneurie en toute sorte d'occurrences.

Gomez Perez fut deput   Ambassadeur de l'Ynca; Et accompagn   de dix ou douze Indiens, que le Prince luy auoit donnez pour l'assister, se presenta deuant le Vice-Roy, luy donna ses Lettres, & luy fit vn ample Recit, tant de l'estat present du Prince, que du dessein qu'il auoit de le seruir. Vne si bonne nouvelle reio  it le Vice-Roy, qui apres auoir donn   aux Espagnols vne ample abolition du pass  , respondit aux Lettres de l'Ynca, en termes magnifiques, & qui l'asseuroient d'autant plus de son affection, qu'il s  auoit qu'en quelque occasion qui se presentast ou de Paix, ou de Guerre, ce ne luy seroit pas vn petit support que d'auoir en sa compagnie ce Prince-l  . Avec cette Responce Gomez Perez s'en alla trouuer le Prince, & ses Compagnons, qui furent tous extr  mement aises des bonnes nouuelles qu'il leur apporra, & se resolurent d'aller trouuer le Vice-Roy l   o   il seroit; mais la mauuaise Fortune de Manco Ynca ne le permit pas, & luy fut entierement contraire, comme nous verrons dans le Chapitre suiuant.

LA MORT DEPLORABLE DV PRINCE

*Manco Ynca; & les Dissentions des Espagnols,
causées par les Ordonnances.*

CHAPITRE VII.

LE Prince Manco Ynca, pour se diuertir avec les Espagnols, fit faire vn beau jeu de boule, par leur aduis mesme, pour ce que les Indiens n'y iouïoient point dans leur Pais, auant que les Espagnols y vinssent. Il s'y exerceoit souuent avec Gomez Perez, qui pourestre peu Courtisan, & assez mal-aduisé, auoit certe mauuaïse coustume, que toutes les fois qu'il iouïoit avec l'Ynca, il contestoit avec luy sur la mesure des boules, & pour la moindre chose que ce fût. Or bien que cela desplût à l'Ynca, si est-ce, que pour ne sembler le desdaigner, il ne laissoit pas de iouer avec luy, comme avec les plus courtois, & les moins capricieux des leurs. Il arriua donc vn iour entre les autres, qu'en ce diuertissement Gomez Perez, se monstra plus incivil qu'il n'auoit encores esté, s'imaginant que pour les faueurs n'aguere receuës du Vice-Roy, & pour l'esperance qu'il auoit de fortir bien-tost de ce lieu-là, il pouuoit traiter avec l'Ynca, comme avec quelqu'un des Indiens de seruite, que le mesme Prince luy auoit donnez : tellement qu'en vne partie qu'ils auoient faite, ne trouuant pas bien son compte, il sortit entierement des bornes du respect; & au grand mespris du Prince, s'obstina si fort à luy tenir teste, qu'il le contraignit de luy donner vn soufflet, & vn coup de poing à l'estomach, en luy disant: *Oste roy de là; regarde à qui tu parles.* Gomez Perez, qui n'estoit pas moins colere que melancholique, sans apprehender, ny sa propre ruine, ny celle de ses compagnons, leua tout à mesme temps la main dont il renoit la boule, qu'il lança droit à la teste de l'Ynca, qui fut à l'instant porté par terre tout roide mort, par l'extrême violence de ce coup. Les Indiens là presens, se voulurent ietter aussi tost sur Gomez Perez; Mais luy & ses Compagnons s'enfuirent en leur Logis, où l'Espée à la main, ils empêcherent que ceux qui les pouruiuoient ne pussent entrer. Alors

tout le recours des Indiens, fut au feu, qu'ils mirent à la Maison, d'où les Espagnols sortirent, pour n'estre bruslez : Tout cela pourtant ne leur seruit de rien, pource qu'ils purent bien se sauuer de l'embrasement, mais non pas des fleches des Indiens, dont ils les percerent comme des bestes sauvages, avec tout le ressentiment que pouuoient auoir des gens furieux, & desesperes de la mort de leur Prince. Apres qu'ils le eurent tue, peu s'en salut qu'ils ne les mangeassent, tant leur rage estoit grande de maniere que pour l'assouir, ils resolurent de les brusler, & d'en jeter la cendre dans la tiuiere, afin qu'il ne restast plus rien de leurs corps; Mais ils changerent d'aduis, & les abandonnerent aux bestes farouches, pour en estre la proye dans ces Deserts, ne croyant pas de les pouuoir mieux punir.

Ainsi mourut le pauvre Princee Manco Ynca, par la main de ceux auxquels il auoit sauué la vie, & fait tous les bons traitemens qu'ils eussent pû desirer, sans que ny son Exil volontaire, ny ces hautes Montagnes naturellement fortifiées, & qu'il auoit choisies pour son Azile, le pussent garentir de la furie d'un Frenetique, qui luy osta miserablement la vie. François Lopez de Ch. 76 Gomare descriit cette Mort d'une autre façon; mais elle se passa comme ie viens de dire. Car assurément ie puis parler au vray de cette malheureuse action, pour l'auoir apprise des Yncas qui s'y trouuerent presens. Je me souuiens mesme de l'auoir ouy raconter à ma Mere, par ceux de ses parens qui s'en allerent avec l'Ynea Sayri Tucac, Fils de ce Prince infortuné, quand il sortit de ces rudes Montagnes, par l'ordre exprés du Vice-Roy Dom Andrez Hurtado de Mendoza, Marquis de Cañete, comme ie monstrey cy-apres, si Dieu me fait la grace de venir iusques-là.

Le Diable, nostre commun Ennemy, voyant tant d'occasions presentes, & si fauorables à son intention, qu'il estoit de faire cesser, ou du moins discontinuer pour vn long-temps, la Predication du S. Euangile, dans ce grand & riche Empire du Peru, ne les voulut pas laisser perdre: tellement qu'il enuoya des aussitost ses Ministres, afin que par des raisons, ou fausses, ou colorées, ils missent le fen dans tous les coings du Royaume, quelques esloignez qu'ils fussent; & qu'ainsi l'on n'y parlast de la Doctrine Chrestienne, non plus que de la Paix, & de l'vnion qu'on y auoit veu regner durant le Gouuernement du Licencié Vaca

de Castro. Or daurant qu'il luy sembla que le lieu le plus propre de tous, pour y faire souleuer enrierelement les Malconrens, à raison des Ordonnances, estoit la Ville de Cozco, pour y auoir iusques à quatre vingts Habitans, tous pourueus de bons Départemens d'Indiens; ce fut là particulièrement qu'il fit agir la malice, & la furie de ses Ministres. Auant que de passer outre, il se faut souuenir; comme nous auons dit au commencement, que les Copies qui furent faites des Ordonnances, courant par tout le Peru, mirent en alarme tous les Conquerans, pour l'extrême apprehension qu'ils eurent d'estre dépossédez au premier iour, & de leurs Vassaux Indiens, & de leurs richesses sans que pas vn d'eux en fût excepté: Que si quelque chose augmentoit cette crainte, & ce scandale public, c'estoit le seuer naturel du Vice-Roy, qui ne vouloit point absolument qu'aucune Ville luy presentast requeste sur le fait des Ordonnances, dans le dessein qu'il auoit de les faire executer à toute rigueur. A raison de ces choses, les Villes de Huamanca, d'Arequipa, de Chuquisaca, & de Cozco, qui n'auoient pas encore receu le Vice-Roy, se persuaderent qu'en eslisant vn Procureur General, qui parlât pour routes quatre, & par consequent pour tout le Royaume, puis que cette eslection se faisoit à Cozco, qui en estoit la Ville Capitale, ils pourroient destourner la ruine dont ils estoient menassez. Ces Communautés s'escriuirent donc les vnes aux autres, touchant la nomination d'une Personne qui eut les qualitez requises pour vne si haute entreprise; Et après auoir iecté les yeux de tous les costez du Royaume, elles n'y trouuerent point d'homme plus capable de cette Depuration, que Gonçalo Pigarte. Car laissant à part ce que la Naissance luy donnoit, pour estre Frere du Marquis Dom François Pigarte; nul ne pouuoit ignorer qu'il n'eut grandement contribué par sa valeur à la Conquête du Païs, & souffert ces prodigieux trauaux, dont nous auons raconté tant de merueilles, sans en auoir neantmoins dit assez. On sçauoit d'ailleurs, que sa Vertu ne le faisoit pas moins cognoistre que sa Condition; qu'elle-mesme luy auoir acquis l'amitié d'un chacun; Et que pour toutes ces causes, sans qu'il fut besoin que le Royaume le nommast, il estoit obligé de se rendre Protecteur, & Défenseur, tant des Indiens, que des Espagnols de tout cet Empire.

Pour des considerations si pressentes, les Principaux de ces

quatre Villes escriuirent à Gonçalo Pigarre, qui estoit alors à son Département en la Prouince des Charcas. Ils le prierent par leurs Lettres, de s'en venir promptement à Cozco, afin d'adjufer avec eux aux moyens qu'ils pourroient tenir pour remedier à leurs maux; luy representant, qu'il n'y auoit pas moins d'intérêt que les autres; & qu'au contraire il y perdrait plus que tous, puis qu'outre la perte qu'il feroit de son Département d'Indiens, il y auoit ordre exprez de sa Maiesté, de luy faire trancher la teste, & le Vice-Roy mesme s'en estoit vanté plusieurs fois.

Gonçalo Pigarre ayant leu ces Lettres, fit autant d'argent qu'il pût de son bien, & de celuy de son Frere, puis s'en alla droit à Cozco, avec dix ou douze de ses Amis. Tous ceux de la Ville, comme dit Carate, le receurent avec des applaudissemens vniuersels, tant ils furent aises de sa venuë. Cependant on apprenoit tous les iours quelques nouuelles des deportemens du Vice-Roy, par ceux qui sortis de la Ville des Rois se refugioient à Cozco, où ils encherissoient tousiours par dessus la verité, pour mieux irriter les Habitans contre les Porteurs des nouvelles Ordonnances. Plusieurs Assemblées se firent alors, tant par les Iuges & les autres Officiers de la Ville, que par les principaux Habitans, qui mirent tous en deliberation ce qu'ils deuoient faire sur la venuë du Vice-Roy: Les vns disoient, qu'il le falloit recevoir; Et touchant les Ordonnances, enuoyer des Deputez à sa Maiesté, pour y donner ordre: Les autres, qu'après qu'il setoit vne fois entré dans la Ville, & qu'il y auroit mis en execution les Ordonnances, comme il auoit desia fait; il leut osteroit leurs Départemens d'Indiens, où ils pourroient difficilement entrer, quand ils en seroient dehors. Mais enfin il demurerent d'accord d'eslire Gonçalo Pigarre Procureur de Cozco, & diego Centeno, Deputé par la Ville de Plata, son Substitut. Surquoy ils conclurent, *Que Gonçalo Pigarre en qualité de Procureur General, s'en iroit à la Ville des Rois, pour y appeller des Ordonnances en l'Audience Royale. Il fut mis d'abord en deliberation s'il meneroit avec luy des gens de Guerre; Et apres y auoir bien pensé, l'on iugea necessaire qu'il en menast en effet. L'on prit sur cela diuers pretextes pour collorer cette action, qui furent, Que le Vice-Roy auoit desia fait battre le Tambour en la Ville des Rois, sous un beau semblant; Qu'il le faisoit pour la punition de ceux qui s'estoient saisis de l'Artillerie; Que c'estoit un homme si rigoureux, & si rude, qu'il executoit ces Or-*

Lib. 5.
Ch. 4.

*donnances, sans en admettre l' Appel, sans appointer aucune Requête, & sans vouloir non plus qu'on s'adressast à l'Audience Royale, bien que des Officiers luy fussent donnez pour Adjoincts, afin d'excuter avec eux ce qui seroit de Iustice, Qu'au reste, il s'estoit vanté plusieurs fois d'auoir de sa Maieslé vn Mandement exprès de faire trancher la teste à Gonçalo Pigarre, à cause des Reuoltes passées, & de la mort de Dom Diego. D'autres encore, qui traittoient plus accortement cette affaire, prenoient pour excuse l'Armeement des gens de Guerre, qui deuoient aller ioindre l'Ynca, & que Gonçalo Pigarre pouuoit rencontrer sur le chemin de la Ville des Rois, où il s'en alloit: si bien que pour se defendre des surprises de ce Prince irrité, il faisoit nécessairement qu'il eut des forces avecque luy; Mais quelques-vns plus hardis, & qui en parloient sans desguisement, disoient, qu'on auoit leué ces troupes, pour les opposer aux embusches du Vice-Roy, comme artificieux qu'il estoit, ennemy de toute Iustice, & auquel il ne faisoit pas bon se fier. Il se trouuoit mesme des hommes de Lettres, qui faisant informer de toutes ces choses, pour preuue desquelles ils ne manquoient pas de Tesmoins; leur soustenoient qu'il n'y auoit point de mal en cecy, qu'ils le pouuoient faire equitablement, & repousser vn effort par l'autre, ou mesme empescher la violence d'vn Iuge, qui agissoit plus de Force que de Droit. Pour toutes ces Raisons, ils trouuèrent bon que Gonçalo Pigarre desployast l'Enseigne, & leüast des gens de Guerre: surquoy plusieurs des principaux de Cozco s'offrirent à le seruir, tant de leur personne, que de leurs biens; iusques-là mesme, qu'il y en eut quelques-vns qui dirent tout haut, *Qu'ils perdroient leur Ame en cette demande.* Voilà ce que i'ay tiré d'Augustin de Carate. Ce qui suit est de François Lopez de Gomate.*

CONTINUATION DES MESMES DES-
ordres ; Et Lettres escrites à Gonçalo Piçarre, par les
Communautez des quatre Villes ; Il est esleu Procureur
General du Peru, & leue des gens, pour les mener
avec luy en la Ville des Rois.

CHAPITRE VIII.

PLUSIEURS des Conquerans du Peru escriuirent tant de
choses à Gonçalo Piçarre, qu'ils luy esueillerent l'esprit.
dans le Pais des Charcas, où il estoit, & le firent aller à Cozco,
apres que Vacá de Castro fut allé de mesme en la Ville des Rois.
A son arriuée, il fut visité de plusieurs Hommes de condition,
dont les vns apprehendoient d'estre priuez de leurs Départemens
d'Indiens, & les autres n'aspiroient qu'aux nouueautez,
pour s'enrichir dans les soufseuomens & les desordres publics.
Ils le prierent de s'opposer aux Ordonnāces que Blasco Nuñez
auoit apportées, & qu'il faisoit executer, sans consideration
quelconque ; d'y proceder par voye d'Appel, ou mesme d'y employer
la Force, s'il en estoit besoin, & de se vouloir declarer
leur Chef, avec assurance qu'ils s'armeroient tous pour sa protection,
& le suiuroient en quelque lieu qu'il les voulut mener.
Or soit que Gonçalo le fit, ou pour les esprouuer, ou peut-estre
pour se iustifier, tant y a qu'il leur dit, *Qu'il les prioit fort de le dispenser de cet Employ, puis que de s'opposer aux Ordonnances, & mesme
par voye de Requeste, c'estoit choquer l'intention de l'Empereur, qui entendoit
absolument qu'elles fussent executées ; Qu'ils se souuinssent au
reste, que les guerres qui s'entreprenoient à la volée, auoient un milieu
penible, & une fin incertaine ; Qu'en un mot, il ne vouloit point leur
plaire, au preiudice du Roy, ny accepter la Charge de Procureur, non
plus que celle de General. Alors pour le persuader, ils luy representerent
plusieurs choses qui ne burtoient qu'à iustifier leur dessein : Les vns, Que la
Conqueste des Indes estant iuste ; ils pouuoient iustement aussi auoir pour
Esclaves les Indiens pris à la Guerre : Les autres, Que l'Empereur ne pouuoit
legitimement leur oster les terres,*

Et les Vassaux qu'il leur auoit vne fois donnez ; Et quand mesme cela seroit, que le terme de la Donation n'estoit pas encore expiré ; outre qu'elle tenoit lieu de Dotiaire à plusieurs, pour en auoir esté pourueus à condition de se marier. Quelques-vns encore mettoient en auant, Qu'il leur estoit permis de prendre les Armes, pour la deffense de leurs Vassaux, & de leurs Franchises ; comme il l'auoit esté à la Noblese de Castille, d'armer pour la conseruation de sa liberté, apres auoir assisté ses Princes à recouurer leurs Royaumes vsurpez par les Mores ; & que pour eux, ils n'estoient pas moins considerables, pour auoir tiré le Peru d'entre les mains des Idolatres. A quoy tous ensemble adioustoient pour conclusion ; Qu'ils ne croyoient pas que pour appeller des Ordonnances, ils en deussent estre en peine, ny mesme, disient quelques-vns, pour s'opposer à l'encontre, puis que rien ne les obligeoit de droit à y consentir, & les receuoir pour Loix. Il s'en trouuoit mesme d'assez hardis, pour dire, Qu'il ne se pouuoit imaginer rien de plus extrauagant, que d'entreprendre secrettement la Guerre contre son Roy, sous pretexte de vouloir deffendre ses Droicts, & de luy mettre dans l'esprit, des choses qui passoient la portée de ceux qui les luy conseilloyent, sans les entendre eux-mesmes, trahissant ainsi la fidelité que de vrais Subiets doiuent à leur Prince. Mais tous ces beaux comptes qu'ils faisoient, ne seruoient de rien à persuader celuy qui ne les vouloit pas escouter, pource qu'à toutes ces choses qu'ils alleguoient en sa faueur, ils en adoustoient d'autres qui luy desplaisoient, pour estre dites contre le respect qu'ils deuoient à l'ur Roy, auquel, comme dit le Prouerbe, ils pensoient ainsi tordre le bras, & l'espouuenter, en faisant les Brauaches. Outre tout cela, ils reprochoient à Blasco Nuñez d'estre naturellement farouche, Ennemy de la puissance des Riches, Cruel en ses executions, & tousiours prest à soustenir les Almagres ; Qu'il auoit fait pendre vn Prestre dans Tumbes, & escarteller vn Domestique de Gonzalo Picarte, pour s'estre declarez contre Dom Diego d'Almagre ; Qu'il auoit ordre exprés de faire mourir Picarte, avec ceux qui l'auoient suiuy dans la Baraille des Salines ; Et pour conclusion, que c'estoit vn Homme sans raison, qui deffendoit de boire du vin, d'vsr de sucre, & d'espiceries, de s'habiller de soye, & de se faire porter en litiere *

✧ L'ay
traduit
ainsi le
mot Es-
pagnol,

Pour toutes ces choses neantmoins, partie fausses, & partie veritables ; Gonzalo Picarte ne laissa pas d'estre bien-aïse de se voir Procureur, & Capitaine general, se proposant, ainsi que dit

le Prouerbe, & comme il le desiroit aussi; *d'entrer par la manche, & de sortir par le collet*: Comme donc les Communautéz de Cozco, Ville Capitale du Peru, & pareillement celles de Guamanga, de la Plata, & autres semblables, l'eurent choisy pour leur Procureur general; & les Soldats pour leur Capitaine, avec vne pleine authorité qu'ils luy donnerent sur eux; il presta serment à l'heure mesme, suivant les formalitez en tel cas requises.

En suite de cela, il desploya la Banniere, fit battre le Tambour, se saisit de l'or des Coffres du Roy, & s'empara des Armes qu'on auoit gaignées à la Bataille des Chupas. Il en équipa iusques à 400. hommes, tant de pied, que de cheual, au grand scandale de plusieurs, & des Principaux mesme, qui se repentirent de ce qu'ils auoient fait, voyant que Gonçalo Pigarre, ayant, comme l'on dit, pris la main, ne leur donnoit seulement que le doigt. Ils ne reuokerent pas pourtant les choses passées, bien que plusieurs d'entr'eux eussent protesté secrettement contre le pouuoir qu'ils luy auoient donné; Et entr'autres, Altamirano, Maldonado, & Garcilasso de la Vega.

Ce que ie viens de dire est le sentiment de Lopez de Gomare, dont j'ay suiuy l'intention mot à mot; Mais ny luy, ny les autres Autheurs, ne me semblent pas auoir esté bien informez, touchant l'endroit où ils disent, que ceux de Cozco se portoient ouuertement à la Rebellion. Car il est certain, que lors qu'ils nommerent Procureur General Gonçalo Pigarre, ce ne fut nullement leur dessein de l'enuoyer à main armée, mais seulement, comme Procureur des fideles Vassaux, qui auoient conquis cét Empire: là, pour l'agrandissement de la Couronne d'Espagne; & qu'ils se promettoient, que si on leur faisoit droit, on ne refuseroit point de les recevoir en leur demande, non pas mesme dans le Tribunal le plus inaccessible qui fut iamais.

Ce fut au commencement la veritable intention des Communautéz des quatre Villes, dont j'ay parlé cy-deuant, qui pour cét effet enuoyerent leurs Deputez, avec vn plain pouuoir d'agir en leur nom: Ainsi d'une commune voix, elles esleurent Gonçalo Pigarre. Mais l'estrange humeur du Vice-Roy, & les nouuelles qu'on apportoit tous les iours à Cozco, de ses deportemens insupportables, furent cause que Gonçalo Pigarre ne voulut point se fier de sa personne à des papiers ny à des Loix es-

crites, bien qu'elles luy fussent fauorables; & qu'il cherchast sa seureté dans les Armes, comme il sera dit cy-apres.

* Com-
meil s'e-
van-
toit
à toute
heure.

Après qu'on l'eut donc nommé Procureur General de cét Empire, & qu'il eut bien considéré, que pour traiter avec le Vice-Roy de la moderation des Ordonnances, qu'il faisoit executer avec tant de rigueur; Et par mesme moyen, pour se mettre à couuert de ses embuches, & empescher qu'il ne luy pût faire couper le col, * c'estoit à luy de chercher ses seuretez; il resolut d'auoir vne Compagnie de deux cens Soldats, qui fussent comme Gardes de sa Personne: il le fit sans bruit pourtant, sans mettre l'Enseigne au vent, & sans nommer aucun Capitaine, de peur qu'il ne semblast se porter à la Rebellion, & s'opposer à la Iustice Royale. Surquoy les Principaux de la Ville, & mesme tous les Bourgeois, luy presenterent, *Que leur intention, ny celle des autres Habitans de ce grand Empire, n'estoit nullement de resister par les Armes, à ce que sa Maiesié commandoit par ses Ordonnances, mais bien d'y faire apporter quelque temperament par leur soumission & leur tres-humble Requête; Qu'ils auoient tant de bon droit de leur costé, qu'ils ne pensoient pas que leur Prince refusast iamais de leur accorder leur iuste demande; Et partant, qu'ils le prioient de vouloir congédier ses gens, & d'aller à cette Commission comme Procureur du Pays, & non comme Capitaine, leur dessein estans de se tenir tous-jours dans l'obeyssance, comme fidelles Vassaux, ainsi qu'ils le protestoient publiquement.*

À tout ce Discours Gonzalo Pigarte fit responce, *Que puis qu'ils se auoient si bien l'humeur du Vice-Roy, & qu'il s'estoit vanié souvent d'auoir ordre expres de luy faire trancher la teste, il s'estonnoit grandement de ce qu'ils le vouloient ainsi enuoyer à la Boucherie, les mains liées; & que sans qu'il leur en reuint aucun profit, on le menaçoit de luy faire perdre la teste, sans l'auoir mérité, & sans l'ouyr comme Procureur du Royaume, Qu'il ayroit mieux renoncer à cette Charge, que de courir à vne mort certaine; Et partant, qu'il s'en demettrait tres-volontiers, & s'en retourneroit en sa Maison, où il attendroit ce que le Vice-Roy voudroit faire de luy; Qu'en vn mot il trouuoit plus à propos d'en user ainsi que de l'irriter, pour se garentir de la perte de sa vie, dont il estoit menacé.*

Comme il eut acheué de parler, ceux de Cozco & les Deputez des autres Villes, furent esbranlez par la force de ses paroles, & ainsi ne pouuant nier, que veu le cruel procedé du Gouverneur,

uerneur, qui ne relaschoit point de sa rigueur ordinaire, Gonzalo Pizarre n'eut grande raison; ils luy permirent d'auoir des Gardes; Et alors pour colorer son election à la Charge de leur General, ils prirent pour pretexte, qu'il ne menoit avec luy des gens de guerre, que pour se garentir des embusches du Prince Manco Ynca, ayant à passer près des Montagnes, où il s'estoit exilé. Voyant donc qu'on luy auoit permis de faire des Soldats, il leua, dit Gomare, plus de 400. hommes, tant Cavaliers que gens de pied: D'où il aduint que ceux de Cozco, qui n'entendoient pas qu'il deut auoir de si grandes forces, se repentirent de l'auoir esleu, pource qu'assisté de tant de gens, il sembloit plustost se declarer Rebelle, que demander Iustice: Ce qui fut cause que les trois qui sont nommez par Gomare, protesterent de nullité, & avec eux plusieurs autres, dont il sera parlé cy-apres.

Cependant Gonzalo Pizarre ne s'endormit point, & fit toutes les diligences imaginables, selon qu'il le iugeoit necessaire à l'execution de son dessein. Pour cette mesme fin, il despescha des Courriers en tous les endroits où il y auoit des Espagnols, & non seulement aux trois Villes susdites, mais encore aux Bourgades particulieres, & aux Départemens d'Indiens. Ceux auxquels il escriuoit, estoient par luy traittez dans ses Lettres, le plus obligeamment qu'il pouuoit; Car outre qu'il leur donnoit de bonnes paroles, il les appuyoit encore de fortes raisons, en offrant ses biens, sa personne, & tout ce qui dependoit à present de luy, ou qui en pourroit dependre à l'aduenir. Ce qui fit soupçonner, & croire à la fin, qu'il pretendoit faire renaistre le droit qu'il auoit au Gouvernement du Peru. Car, comme le remarquent les trois Historiens susnommez, le Marquis Don François Pizarre son Frere, luy en auoit obtenu la suruiuance, par vn Breuet de l'Empereur, qui portoit, Que sa Maiesté donnoit ce Gouvernement au Marquis durant sa vie, & à celuy qu'il nommeroit pour Successeur apres sa mort: D'où il se void que les Départemens d'Indiens estoient pour deux vies.

GONCALO PICARRE SORT DE COZCO

*avec une Armée; Armement du Vice-Roy, qui fait
Prisonnier Vaca de Castro, & plusieurs
autres des Principaux.*

CHAPITRE IX.

CETTE pretention qu'auoit Gonçalo Picarre, luy fit faire de si grands preparatifs, que par eux il donnoit à connoistre visiblement, qu'il n'alloit pas en Commission, mais bien à la Guerre. Pour mieux descouurir son dessein, il enuoya François d'Almendraz, mon Parrain de Baptême, sur le chemin de la Ville des Rois, afin qu'avec les vingr Soldats qu'il luy donna, & les Indiens qui luy presteroient main-forte, aux lieux où il se trouueroit, il empeschast avecque grand soin, de ne laisser passer aucun ny des Habitans de Cozco, ny de ceux qui viendroient de Rimac. Cela fait, il prit tout l'or & l'argent qui se trouua dans la Caisse du Roy: Il en fit autant des biens des Deffuncts, & de ceux qu'on auoit mis en depost, qu'il prit tous ensemble, sous pretexte d'emprumt, pour le payement & la subsistance de ses gens de guerre, par où il fit voir encore sa pretention plus à descouuert: D'ailleurs, il commanda qu'on tint preste l'Artillerie que Gaspar Rodriguez, & ses Compagnons, auoient transportée de Huamanca à Cozco, qui estoit fort bonne, & en quantité. Par mesme moyen il se pourueut abondamment de poudre, ayant la commodité d'y faire rauailler d'aurant plus grande, que le meilleur Salpêtre qui soit en tout le Royaume, est aux enuirs de Cozco. Il fit aussi plusieurs Officiers de gens de Guerre, dont les principaux furent, Alonso de Toro, qu'il nomma son Mestre de Camp, Dom Pedro Portocarrero, qu'il fit Capitaine de Cavalerie, Pedro Setmenio, qui commanda les Arquebuziers, Jean Velez de Gueuare, & Diego Gunnel, qui eurent deux Compagnies de Picquiers; Ensemble Hernand Bachicao, nommé Capiraine de l'Artillerie, composée de vingt pieces de Campagne extrêmement bonnes: Et ce fut ce mesme Bachicao, dit Carare, qui fit des provisions de poudre, de boulets, & d'autres munitions necessaires.

Pendant ces preparatifs, Gonçalo Pigarre ayant ses troupes à Cozco, taschoit de iustifier ou de colorer le mieux qu'il pouuoit, tant en publicq qu'en particulier, la cause d'une si mauuaise entreprise. Il disoit, *Que luy, & ses Freres auoient descouverts ce Pais - là, au peril de leurs vies, & aux despens de leurs biens; Que par eux, il estoit annexé aux Estats de sa Maieité; Que l'Espagne s'enrichissoit tous les iours, de l'or & de l'argent qu'il en tiroit, comme chacun scauoit bien, & que cependant, l'Empereur n'auoit pourueu de son Gouvernement, ny luy, ny son Fils, au preiudice du Traicté qui s'en estoit fait; Qu'au contraire, au lieu de ces recompenses, il leur enuoyoit ôster tous leurs biens, n'y ayant aucun qui d'une façon ou d'autre, ne fut compris dans ces Ordonnances; Qu'on n'ent pû deputer pour leur execution, un plus cruel Ministre que Blasio Nuñez Vela; Qu'il agissoit en cette Commission, avec une rigueur insupportable, sans les daigner ouyren leurs Requestes, ne leur donnant pour responce que des paroles iniurieus; Que de toutes ces choses, & de plusieurs autres, ils en estoient eux-mesmes tesmoins; & qu'il se disoit publiquement (ce qui deuoit sembler bien estrange) que l'Empereur luy enuoyoit irancher la teste, apres tant de seruices qu'on scauoit bien qu'il auoit rendus à sa Maieité. Qu'à raison de ces choses, il auoit resolu, si ceux de Cozco le trouuoient bon, de s'en aller en la Ville des Rois, pour y appeller des Ordonnances en l'Audience Royale, & d'enuoyer à l'Empereur des Deputez au nom de tout le Royaume, pour l'esclaircir de la verité de ce qui se passoit; Qu'il esperoit au reste que sa Maieité y donneroit ordre; sinon, qu'apres y auoir fait ses diligences, il laissoit en leur disposition de s'eschir le col sous le ioug qu'on leur vouloit imposer. Comme donc ils voyoient bien qu'ils ne pouuoient se fier au Vice-Roy, pour les menasses dont il vsoit contre eux, & pour les troupes qu'il auoit leuées; ils conclurent tous enfin, de luy enuoyer Gonçalo Pigarre, avec vne Armée, pour leur commune seurreté, & sans aucun dessein de le cōbattre, s'il n'estoit le premier attaqué. A quoy Gonçalo Pigarre s'accorda tres-volōtiers; si bien que pour mieux les en assurer, il les pria d'auoir agreable d'aller avec luy, pour se renger avec les autres Soldats sous la discipline; leur faisant voir que non seulement luy, mais ces autres Cavaliers; (Et ce disant, il leur monstra ceux qui l'accompagnoient) leur scauroient bon gré de cette fatigue, puis qu'elle auoit pour but, la iuste deffense de leurs personnes, & de leurs biens. C'estoient les langages qu'il tenoit à ces gens-là, pour se iustifier des leuées qu'il auoit*

faites; & l'effet en fut tel aussi, qu'ils s'offrirent tres-volontiers d'aller avec luy, pour le deffendre iusques à la mort: Et ainsi il sortit de la Ville de Cozco. Voilà ce que dit Augustin de Carate.

Avec ces preparatifs, & plus de cinq cens hommes de guerre, sans y comprendre vingt mille Indiens de service, douze mille desquels suffisoient à peine pour le transport, & la marche du Canon; Gonçalo Pigarre sortit de Cozco, pour s'en aller en la Ville des Rois, afin d'y faire, comme il disoit, la Charge de Procureur general. Le bon-heur voulust pour luy, qu'il n'eut point d'aduanture contraire par le chemin, & qu'il arriuaist à *Sacshuana*, à quatre lieues de la Ville, où nous le laisserons, pour dire ce qui se passa cependant entre le Vice-Roy, & ses gens, tant en la mesme Ville, qu'en plusieurs autres Contrées.

Bien que le Vice-Roy Blasco Nuñez Vela, eut pris possession du Throsne, & du Gouvernement de ce grand Empire; si est-ce qu'il n'estoit pas bien à son aise, ny dans le Throsne, ny dans la Monarchie, pour la grande haine qu'il scauoit que tout le monde luy portoit, à cause de son extrême rigueur en la publication des Ordonnances Royales: D'où il aduint que pour se mettre à couuert de quelque attentat qu'on eut pû faire sur sa personne, & pour mieux s'autoriser dans sa dignité; il commanda au Capitaine Diego d'Urbin, de faire cinquante Arquebusiers, qui le suiussent par tout, comme dit Gomare. Cependant, on osoit si peu luy parler de la suspension des Ordonnances; qu'encore que le Corps de la Ville luy eut présenté dans vne Requête diuerses Raisons, pour lesquelles on le prioit de les suspendre, il n'en voulut iamais rien faire pourtant, ainsi que le remarque Carate: Il leur promit neantmoins, *Qu'apres qu'il les auroit fait mettre à execution, il en escriroit ses sentimens à l'Empereur. Et qu'en la Lettre il deduiroit les raisons, pour lesquelles il importoit à son service, & à la conseruation de ceux du País, qu'elles fussent renouées; Qu'en effet, il aduoit franchement qu'elles n'estoient pas moins dommageables à sa Maesté, qu'à tout le Royaume du Pérou. Et que si leurs Auteurs eussent bien seen l'estat des affaires presentes, ils n'eussent iamais conseillé à l'Empereur de les faire; Qu'au reste, s'ils vouloient enuoyer des Deputez, à la Cour d'Espagne, il escriroit avec eux à sa Maesté ce qu'il luy sembloit deuoir estre fait, pour preuenir beaucoup d'inconueniens, auxquels il se promet toist que le Roy donneroit*

ordre; Mais que pour luy, il ne pouuoit ouyr parler de suspendre l'execution, puis qu'il luy faisoit achener comme il auoit commencé, pour n'auoir ordre de faire autre chose. Tout cecy est d'Augustin de Carate, qui passant outre dit ce qui suit: A quoy les autres Auteurs s'accordent.

Durant tout ce temps, les aduenues & les chemins de Cozco estoient si bien fermés, qu'on ne pouuoit nullement apprendre ce qui s'y passoit, ny par les Indiens, ny par les Espagnols non plus. Tout ce qu'on scauoit par un bruit commun, estoit l'arrivée de Gonzalo Picarre dans Cozco, où tous les Transfuges de la Ville des Rois, & des autres Contrées, auoient esté attirés par les nouvelles qu'on faisoit courir de la Guerre; Ce qui fut cause que le Vice-Roy, & les Officiers du siege Royal, despatcherent des Commissions en plusieurs endroits, avec un exprès Mandement à tous les Principaux de Cozco, & des autres Villes, de recevoir pour Vice-Roy Blasco Nunez, & faire un equipage de Cheuaux & d'Armes, pour le venir promptement seruir dans la Ville des Rois. Or bien que ces Lettres de Mandement se perdissent par le chemin; si est-ce que quelques-uns des Principaux de Cozco, ne laisserent pas de recevoir celles, que pour la mesme fin on leur auoit enuoyées; en vertu desquelles il y en eut qui s'en allerent près du Vice-Roy, pour luy rendre seruire, comme il sera monstré cy apres.

L'on en estoit en ces termes, quand le Vice-Roy receut des aduis certains des Reuolutions de Cozco: ce qui luy donna sujet de faire leuer en diligence de nouvelles troupes, pour les ioindre au Corps de son Armée; A quoy luy seruirent grandement les cent mille escus, que Vaca de Castro auoit pris à Cozco, & fait embarquer en suite, pour les enuoyer à sa Maesté; lesquels Blasco Nunez Vela, fit saisir dans le Nauires, les employant à la subsistance des gens Guerre, pour laquelle ils ne durerent guere: Il voulut que Dom Alonso de Montemayor, & Diego Aluarez de Quieto, son beau-frere, commandassent la Cavalerie; Que Martin de Roblez & Paul de Meneses, eussent la conduite des gens de pied; Et que Gonzalo Dias de Pinetta menât les Arquebusers. Avec cela, il fit General de son Armée son Frere Vela Nunez, Diego d'Urbín Mestre de Camp, & Jean d'Aguirre Sergent Maior; Toute l'Armée, sans y comprendre les principaux Seigneurs, estant composée de six cens hommes, dont il y auoit cent Cavaliers, deux cens Arquebusers, & tous les autres estoient Picquiers.

Il se pourueut de quantité d'Arquebuses, tant de fer que de fonte, & fit faire ces dernières de certaines Cloches qui furent tirées de la

NNn iij

grande Eglise. Apres tout cela, il voulut que ses gens fissent souvent monstre deuant luy, leur donnant mesme à tout coup de fausses alarmes, afin de iuger par là de la volonté qu'ils auoient à le seruir, pource qu'ils'en deffioit. Le Licencé Vaca de Castro, auquel il auoit donné la Ville pour prison, luy estoit encore fort suspect; Car il apprehendoit qu'il n'eut de secretes pratiques avec diuerses personnes, dont les vnes l'affectionnoient grandement, & les autres estoient comme ses Createurs. Cela fut cause qu'un iour enuiron midy, ayant fait donner vne fausse alarme, touchant la venue de Gonçalo Piçarre, & assembler ses gens à la place, il enuoya prendre Vaca de Castro, par Diego Aluarez de Quieto son beau-Frere, comme encore Pedro de Cabrera, avec Hernand Mexia de Guzman son Gendre; le Capitaine Laurens d'Aldana, Melchior Ramirez, & Baltazar Ramirez son Frere. Il les fit tous embarquer dans vn Vaisseau de Guerre, dont il nomma Capitaine Hierosme de Surbano, natif de Bilbao; mais à quelques iours de là, il renuoya libre Laurens d'Aldana, & bannit Dom Pedro de Cabrera, Hernand Mexia, & les deux Ramirez; les vns à Panama, & les autres à Nicaragua: Quant à Vaca de Castro, il le tint tousiours Prisonnier dans le mesme Vaisseau, sans auoir iamais fait signifier à ces Cavaliers, ny par escrit, ny de vive voix, pourquoy il les retenoit, & sans informer contr'eux en aucune sorte. Voila ce qu'en dit Augustin de Carate.

DEUX DES PRINCIPAUX D'ARQUEPA
amenent au Vice-Roy deux Vaisseaux appartenans
à Gonçalo Piçarre; de l'Armée duquel s'ensuyent
quelques Seigneurs de Cozco.

• CHAPITRE X.

LE Vice-Roy Blasco Núñez Vela, se trouuoit dans ces inquietudes & ces diuers embarras, lors qu'il aduint vne chose qui luy remit vn peu l'esprit, & qui luy plust grandement. Ce fut, que de la Ville d'Arquepa, vinrent à luy deux de ses principaux Habitans, dont l'un s'appelloit Hierosme de Cerna, & l'autre Alonse de Cacerez, lesquels desirant seruir le Roy, entrèrent en deux Nauires qu'auoit en ce Port là Gonçalo Piçar-

re, qui s'estoit aduifé de les acheter, tant pour flanquer son Artillerie, que pour se rendre maistre de la Mer, chose de grande importance pour luy. Mais ces deux Bourgeois d'Arquepa s'en faisièrent par leur ruse, ayant suborné les Mariniers, & firent voile à la Ville des Rois; où Blasco Nuñez les receut à bras ouuerts, pourée qu'il iugea par là, qu'il ne deuoit esperer que des bons succez, puis que les forces de son Ennemy, & celles mesme qui luy estoient plus aduantageuses, commençoient desia de se rendre à luy.

Il arriva cependant vne chose bien desagreable à Gonçalo Pigarre, que nous auons laissée à Sacahuana. Car les principaux Seigneurs de Cozco, qui en estoient sortis avec luy, voyant qu'il y auoit du mal entendu dans cét Armement; leur intention estant d'aller demander Iustice, avec toute sorte de soumissions, & non pas les Armes à la main; se resolurent enfin d'executer ce qu'ils auoient desia proposé secrettement entr'eux, à sçauoir de s'enfuir de l'Armée de Gonçalo Pigarre.

Les plus considerables furent Gabriel de Royas, Garcilasso de la Vega, Iean de Saauèdra, Gomez de Royas, Hierosme Costilla, Pedro del Barco, Martin de Florence, Hierosme de Soria, Gomez de Leon, Pedro Maniarez, Louys de Leon, le Licencié Caruajal, Alonse Perez d'Esquinel, Pedro Pigarre, & Iean Ramirez. Voila ceux qui sont nommez par les deux Auteurs, Augustin de Carate & Diego Fernandez, mais ces autres qu'ils ont oubliez, furent les suiuians. Iean Iule de Hoyeda, Diego de Silua, Thomas Basquez, Pedro Alonse Carrasco, Iean de Pancotuo, Alonse de Inoyosa, Anthoine de Quinionez, Alonse de Loaysa, Martin de Menesez, Mancio Serra de Lequigamo, François de Villefort, Iean de Figueroa, Pedro de los Rios, & son Frere Diego de los Rios, Alonse de Sotto, Diego de Truxillo, Gaspar Iara, & quelques autres, dont les noms m'ont eschappé de la memoire, faisant en tout le nombre de 40. dont s'en ay cognu plusieurs.

Tous ceux cy abandonnerent Gonçalo Pigarre, pour s'en retourner à Cozco, ou dés aussi-tost qu'ils furent arrivez, & pourueus de ce qui leur faisoit besoin pour leur Voyage, ils s'en allerent en diligence à Arequepa, où ils croyoient que fussent encore les deux Nauires de Gonçalo Pigarre, desquels ils pretendoient s'emparer, & sur l'un ou sur tous les deux ensemble, s'en

aller à la Ville des Roys, pour y seruir sa Maiefté, & à son nom le Vice Roy Blasco Nuñez Vela : Mais tout le contraire leur aduint; Pource qu'estant arriuez à Arequepa, ils se trouuerent tous deux preuenus par la diligence d'Alonse de Cacerez, & de Hierosme de la Cerna; qui auoient desia mis à bord les deux Vaisseaux en la Ville des Roys, avec mesme dessein qu'eux, qui estoit de seruir sa Maiefté.

Se voyant ainsi frustrez de leurs esperances, ils se trouuerent fort embarrassez; Car ils ne sçauoient quelle route prendre, pour l'apprehension qu'ils auoient que Gonçalo Piçarre ne se fut saisi, & des aduenuës de la Plaine, & de celles de la Monragne. Mais enfin, il fut resolu entr'eux d'aller par Mer à la Ville des Roys, & de faire pour cette fin vne grande Barque qui les y portat. Ils employerent 40. iours en certe besogne, qui ne leur reüssir point, pour n'auoir ny les materiaux propres, ny les ouuriers necessaires pour en venir à bout: bien qu'ils ne pussent se fier à cette Barque, à moins que de se mettre au hazard de couler à fonds avec elle. Ainsi, à faute de tout autre remede, ils conclurent de s'exposer au peril de tóber en lapuissance de leurs Ennemis, & d'aller à la Ville des Roys le long de la Coste: En effet, ils eurent le bon heur de rrouuer le chemin libre; mais ils furent mal-heureux d'un autre costé, pource qu'à leur arriüée dans la Ville, ils apprirent que l'on s'estoit saisi de la personne du Gouverneur, & qu'on l'auoir mis dans vn Vaisseau, pour le faire porter en Espagne, comme il se verra plus ample-ment par la suite de l'Histoire.

Cette disgrace du Vice Roy, fut causée par le malencontre de ces Fuyards qui l'alloient seruir, pour s'estre amusez à faire vne Barque, qui leur fut inutile, au lieu que s'ils fussent arriuez à temps; il est tres-certain que les affaires se fussent passées tout autrement. Car dès qu'on eust veu dans la Ville des Roys, que les principaux Seigneurs de Cozco, abandonnoient Gonçalo Piçarre, & se venoient rendre à Blasco Nuñez; les Bourgeois eussent assésurément perdu la peur qu'ils auoient de Piçarre, & ne se fussent point saisis du Vice-Roy; à quoy la seule crainte les porta, comme les Auteurs le remarquent: ce qui aduint avant que Gonçalo Piçarre fut arriüé à Rimac. Côme donc ces Transfuges trouuerent qu'il estoit pris, & mesme embarqué, ils se dissipèrent, qui ça, qui là, pour tascher de mettre leur vie à
couvert:

couuert : Et quelques-vns mesme, dont nous parlerons cyapres, ne bougerent de la Ville.

Gongalo Picarre se creut perdu, dès qu'il se vid quitté de ceux mesme auxquels il se fioit le plus, & qui donnoient le principal lustre à son Armée: Ce qui fit, comme disent les Historiens; qu'il resolut à part soy de s'en retourner aux Charcas, ou de s'en aller à Chilé avec 30. de ses Amis, qu'il connoissoit assez, pour s'asseurer qu'ils l'assisteroient iusques à la mort: Aussi n'eut il pas manqué d'exécuter ce dessein, sans les Nouvelles qu'il eut, que Pedro de Puellez le venoit ioindre, pour le servir dans son Armée. Cela luy fit si bien reprendre courage, que pour tesmoigner qu'il ne craignoit rien, ils'en alla droit à Cozco, ostant aux Transfuges leurs Indiens de seruice, qu'il prit pour luy-mesme. En suite dequoy il donna à Pedro de Puellez ceux de Garcilasso de la Vega, la Maison duquel fut en si grand dâger d'estre bruslée par les Soldars, qu'il y en eut vn qui prit vn tison, pour y mettre le feu: mais il en fut empesché par vn de ses Camarades, plus raisonnable que luy, & qui le rançant de ce dessein: *Que s'a fait cette Maison?* luy dit-il: *si nous en tenions le Maistre, nous pourrions nous venger de luy; mais à quel propos s'attaquer à ces maraillies?* Ils se desisterent donc de la brusler: mais au lieu du feu, ils en vinrent au pillage, qui fut si grand, qu'ils n'y laisserent que les murailles. Ils en firent sortir mesme tous les Indiens de seruice, tant hommes que femmes, & leur defendirent d'y rentrer iamais, sur peine de la vie. De cette façon nous y restames dedans, iusques au nombre de huit personnes; à sçauoir, ma Mere, ma Sœur, moy, & vne seruante, qui ayma mieux se mettre au hazard de perdre la vie, que de nous quitter: comme encore Iean d'Alcobaça mon Gouverneur, & avec luy son Fils Diego d'Alcobaça, ensemble l'un de ses Freres, & vne Indienne de seruice, qui non plus que l'autre, ne voulut iamais abandonner son Maistre.

Si quelque chose sauua la vie à Iean d'Alcobaça, ce fut sa probité merueilleuse, qui le faisoit connoistre par tout, pour vn homme franc, & qui ne s'interessoit nullement dans les Intrigues du Monde: Quant à ma Mere & à moy, c'estoit fait de nous asseurement, & par consequent de tous les autres: si sur le point qu'on nous vouloit tuer, ne fussent suruenus quelques-vns, qui empeschèrent cet acte tragique: c'estoient des Amis de

mon Pere, qui se pouuoient dite tels en effet, quoy qu'ils fussent du Party de Gonçalo Pigarte. Ceux-cy donc parlant pour nous: *Que nous ont fait ces Enfans*, dirent-ils, *voulez-vous qu'ils soient garcnds des actions des Vieillards*? Paroles qui furent cause qu'on nous laissa la vie: mais la faim nous l'eut fait perdre bien-tost apres, sans l'assistance des Yncas, & des Pallas nos Parens, qui par de secrettes voyes, nous enuoyoient à toute heure du iour dequoy manger; mais en si petite quantité, de peur des Tyrans, que cela ne pouuoit pas suffire à nostre nourriture.

Vn Cacique de ceux de mon Pere, qu'on appelloit Dom Garcia Pauqui, Seigneur de deux Villages scituez sur la Riuiera d'Aputimac, à sept lieuës de la Ville, l'un desquels se nomme *Huayllasi*; eut plus de naturel, & plus de fidelité que les autres, & s'exposa pour nous en vn manifeste peril de sa vie. Il vint en nostre logis à la faueur des tenebres, nous aduertissant de nous tenir aux aguets la nuit suivante, & qu'à l'heure qu'il nous nomma, il nous enuoyeroit 25. boisseaux de Maïs: Comme en effet, il ny manqua pas, & mesme à 7. ou 8. nuitës de là, il nous en fit tenir encore autant; Par où il nous donna dequoy nous nourrir, en vn rigoureux temps de famine, qui dura plus de huit mois, iusques à ce que Diego Centeno entra dans Cozco, comme nous dirons cy-dessous. Ce que i'ay bien voulu rapporter icy, quoy que ces particularitez semblent peu considerables: pour faire voir l'extrême fidelité de ce bon Curaça, * afin que ses Fils, & ses autres Descendans ayent part à la gloire qu'il a meritée pour vne si haute vertu.

* ou Seigneur.

Outre cettre assistance que nous donna le bon Dom Garcia Pauqui, nous en receusmes encore vne autre en particulier d'un Gentil homme qu'on appelloit Iean d'Escobar, qui n'auoit alors aucun Département d'Indiens, mais à qui le Licencié Castro en donna vn depuis, le mariant à la Fille de Vasca de Ceuuate, & de Doña Marie Henriquez, qui estoient personnes de condition, & considerables dans le País. Ce vertueux Cavalier, * qui demouroit alors en la Maison d'Alonse de Meza, vis à vis de celle de mon Pere, touché de pitié pour nous, & sachant que nous n'auions pas dequoy pouruoir à nostre nourriture, pria Iean d'Alcobaça, mon gouverneur, de m'amener tous les iours dîner & souper avec luy, offre qui fut acceptée, pour le finé seulement, afin de n'ouurer les portes à heure induë, dans l'ex-

* Iean d'Escobar.

trême apprehension où nous estions, qu'on ne nous vint couper la gorge à tout moment, comme à tout moment aussi nous en estions menacez. Hernand Bachicao, Capitaine de l'Artillerie, redoubloit encore nostre crainte, pource qu'il luy prenoit quelquesfois des bourades de tirer de son logis sur le nostre, qui estoit à l'opposite, comme nous auons dit, en la Description de la Ville, n'y ayant que les deux places entre deux : tellement qu'il ne tenoit pas à luy, qu'à force de Cannonades, il ne la desmolit, de la façon qu'il s'y prenoit; Mais il se trouua que nous eufmes encore des Amis, qui furent assez puissans pour l'empescher, & qui s'y portèrent de leur mouuement propre. Ils en firent de mesme des Maisons qu'auoient les autres Fuyards, qui ne furent pas pourtant battus si rudement que la nostre : Car les Ennemis de mon Pere, se voulurent vanger de luy particulierement, de despit qu'ils eurent de ce qu'il auoit esté l'un des deux Autheurs de cette fuitte, & Gabriel de Royas l'autre, qui fut exempt neantmoins de cette violence, pource qu'il auoit sa Maison à Chuquisaca, Ville de la Plata.

Après ce chastiment fait à Cozco sur les Maisons des Transfuges, Gonçalo Pigarre reprit le chemin de la Ville des Roys, pour receuoir Pedro de Puellez, & ceux qu'il menoit avec luy. Il fut long-temps en chemin, auant qu'arriuer à Huamanca, pour se trouver embarrassé après l'Artillerie. Or pource que Hierosime de la Cerna, & Alonse de Cacerez, arriuez à la Ville des Roys, dans les deux Nauires dont j'ay parlé cy-deuant, dirent d'abord au Vice Roy, entre autres choses, Qu'on auoit esleu pour Procureur General de cét Empire Gonçalo Pigarre, qui pour cét effet leuoit des troupes, & faisoit de grands preparatifs d'Artillerie, & de munitions de Guerre, pour aller à la Ville des Rois; Blasco Nuñez, & les Auditeurs furent extrêmement surpris de cette nouuelle; Car alors, à cause de l'incommodité des chemins qu'on tenoit fermez, comme nous auons dit cy-deuant, ils n'auoient pû sçauoir autre chose, touchant Gonçalo Pigarre, sinon qu'il estoit venu des Charcas à Cozco; Mais dès qu'ils apprirent, qu'il faisoit des leuées, ils despescherēt des Courriers aux quatre Villes, afin qu'elles eussent à receuoir pour Vice-Roy Blasco Nuñez Vela: Et qu'en suite elles enuoyassent à la Ville des Roys des Procureurs exprés, pour demander qu'on leur fit Iustice, touchant les choses dont ils auoient

Ch. 158. à se plaindre. Alors, comme dit Gomare, le Vice-Roy envoya Thomas de saint Martin à Gonçalo Pigarre, pour l'assurer qu'il n'estoit chargé de la part de l'Empereur d'aucune Commission contre luy; Qu'au contraire, l'Empereur le vouloit récompenser de ses services; Et partant qu'il le prioit de ne se mettre point en peine, & de le venir trouver, pour traiter ensemble de cette affaire-là. Ce sont les propres termes de Gomare: Venons maintenant à la Rebellion de Pedro de Puellez.

PEDRO DE PUELLEZ SE JETTE DANS
le Party de Gonçalo Pigarre; & plusieurs
autres en font de mesme.

CHAPITRE XI.

Ch. 16. **O**V TRE les Lettres de Prouision, enuoyées par le Vice-Roy aux quatre Villes dont i'ay parlé cy-deuant, & le Messager qu'il depefcha vers Gonçalo Pigarre, il fit sçavoir d'un autre costé à Pedro de Puellez, qu'il eut à venir servir le Roy.

LIII. f. deux vne mesme chose par les paroles suiuanes.

Ch. 10. Si-tost que le Vice-Roy eut fait son entrée en la Ville des Roys, il fut visité par Pedro de Puellez, natif de Seuille, & Lieutenant du Licencié Vaca de Castro en la Ville de Guanuco. Or d'autant qu'on l'estimoit beaucoup, pour estre des plus anciens Habitans des Indes, le Lieutenant le confirma dans sa Charge, par de nouvelles Lettres qu'il luy en donna, & voulut de plus qu'il fit tenir prests ceux de guanuco; afin que lors qu'il les manderoit, en cas qu'il en fut besoin, il les luy amenast, avec vn bon equipage d'Armes & de cheuaux.

Pedro de Puellez satisfit à ce Mandement du Vice-Roy; & ne fit pas seulement mettre en estat les Habitans de guanuco, mais il faisoit encore quelques Soldats, qui estoient là venus de la Prouince des Chapapoyas, en la Compagnie de comez de Solis, & de Bonifaz si bien qu'il n'attendoit plus qu'apres le Mandement du Vice-Roy, lors qu'il le receut vn peu apres, par le moyen de Hierosime de Villegas, qui luy rendit vne Lettre de

la part de Blasco Nuñez, par laquelle il le sollicitoit de le venir promptement trouuer, avec tout ce qu'il auoit de gens. Mais auant que passer outre, luy & Villegas communiquèrent ensemble de cette Lettre; & l'ayant bien examinée, ils trouuerent que s'ils alloient ioindre le Vice-Roy, ils pourroient bien estre cause que son entreprise eut vn bon succez; Qu'alors la defaite de Gonçalo Pigarte, le rendroit encore plus ardent à l'exécution des Ordonnances: Qu'elles choquoient vn peu trop leurs communs interests, puis que le tort, qu'elles leur faisoient, en les priuant de leurs Départemens d'Indiens, ne tournoit pas seulement au preiudice de tous; & particulièrement de ceux qui en estoient pourueus, mais encore au commun dommage des gens de Guerre, veu qu'on les priuoit par là de la subsistance que leurs Seigneurs auoient accoustumé de leur donner: D'où il aduint, qu'apres la consideration de ces choses, ils conclurent tous de s'en aller seruir Gonçalo Pigarte, & qu'à mesme temps, ils se mirent en chemin pour le ioindre.

Le Vice-Roy ne tarda guere d'en estre aduerty, par le moyen d'vn Capitaine Indien: qui s'appelloit Yllatopa. Le desplaisir qu'il en eut fut grand, si bien que s'estant persuadé qu'il y auoit moyen de charger ces gens en la Vallée de Xauxà, par où il falloit necessairement qu'ils passassent; il aduertit en diligence Vela Nuñez son Frere, qu'il eut à prendre avec luy 40. Carabins, pour s'en aller attendre au passage Pedro de Puellas, & ceux de sa suite. Il enuoya pour ce mesme effet Gonçalo Dias, Capitaine des Arquebusers, qui prit avec luy trente hommes de sa Compagnie. Or afin qu'ils pussent aller plus viste, le Vice-Roy leur fit acheter aux despens de sa Maiesté, trente-cinq Mulets, qui cousterent plus de douze mille Ducats; Et quant aux autres dix Soldats, qui manquoient pour faire le nombre de 40. Vela Nuñez les choisit parmy ses Amis, & ses parens les plus proches: En cet equipage ils partirent de la Ville des Rois, & marcherent iusques à Guadachile, qui en est à vingt lieues, ayant comploté, selon quelques vns, de mettre à mort Vela Nuñez, & d'aller seruir Gonçalo Pigarte. Il aduint cependant, que certains Coureurs qui alloient deuant, rencontrerent à quatre lieues de Guadachile, qui est en la Prouince de Pariacaca, Frere Thomas de saint Martin, Prouincial de saint Dominique, que le Vice-Roy, comme i'ay dit cy-deuant, auoit enuoyé pour

» traiter d'affaire avec Gonçalo Piçarre; Et alors vn Soldat natif
 » d'Auila, luy dit ce que ces gens auoient fait, afin qu'il en donnast
 » aduis à Vela Nuñez, & qu'il l'obligeast par ce moyen à se tenir
 » sur ses gardes; pource qu'autrement ils le tueroient cette
 » nuit-là.

» Cette Nouuelle fit haster le Prouincial, qui ramena les Cou-
 » reurs, pour luy auoir fait entendre, qu'il y auoit deux iours que
 » Pedro de Puellez & ses gens estoient passez à Xauxa, & qu'il
 » n'y auoit aucun moyen de les pouuoir ioindre: Comme il fut à
 » Guadachile, il dit la mesme chose aux autres, & qu'il ne leur
 » seruiroit de rien d'aller plus auant. Il prit son temps là-dessus, &
 » aduertit secrettement Vela Nuñez, du grand danger qu'il me-
 » nassoit, afin qu'il vst de precaution, pour s'empescher d'estre
 » surpris. En effet, Nuñez ne s'endormit point, & descouurit
 » aussi-tost l'affaire à cinq ou six de ses parens, qui l'accompa-
 » gnoient. Ils pourueurent incontinent à leur seurere, & tirant
 » leurs Cheuaux enuiron la nuit, sous pretexte de les aller abreu-
 » uer, se sauuerent à la faueur des tenebres, le Prouincial leur ser-
 » uant de Guide. Quelque temps apres leur fuite, Iuan de la Tor-
 » re, Pedro Hita, George criego, & quelques autres Soldats du
 » Complot la descouurent; de sorte qu'à l'instant mesme, ils alle-
 » rent fondre sur ceux qui estoient restez; qu'ils surprirent l'vn
 » apres l'autre, les menassant de les tirer avec leurs Arquebuses,
 » s'ils ne prenoient resolution de les fuire.

» Ils s'y accorderent tous, & mesme le Capitaine Gonçalo
 » Diaz, à qui l'on auoit lié les mains, & fort quantité d'autres af-
 » fronts, afin de l'intimider: mais bien qu'apparemment il eut au-
 » tant de peur que les autres, on ne laissa pas neantmoins de croi-
 » re qu'il estoit de ce Complot, & mesme qu'il en auoit fait l'ou-
 » uerture: aussi est-il vray que les apparences le firent iuger ainsi à
 » tous ceux de la Ville, pource qu'il estoit Gendre de Pedro de
 » Puellez, contre lequel ils enuoyoit, encore qu'il ne fut pas
 » vray-semblable qu'il eut voulu prendre son beau-pere, n'estant
 » pas mal avec luy. Ils se souleuerent donc tous ensemble; &
 » montant sur leurs Mules, qui auoient cousté si cher, s'en allerent
 » à Gonçalo Piçarre, qu'ils trouuerent auprès de Guamanca, y
 » ayant desia deux iours que Pedro de Puellez estoit arriué avec-
 » que ses gens. A son abord, il reconnust que l'Armée estoit si
 » troublée, à cause de l'indifference que Gaspar Rodriguez, & ses

gens auoient resnoignée; que vray-semblablement s'il eut tardé encore trois iours à venir, elle se fut dissipée. Mais Pedro de Puellas, encouragea si bien les Soldats, & par les langages qu'il leur tint, & par le secours qu'il leur amena, qu'ils resolurent de passer outre: Car il ne feignit point de dire, que quand mesme Gonçalo Pigarte & ses gens ne voudroient point marcher, il estoit homme à prendre le Vice-Roy, & à le chasser du Pais, pour la grande haine que luy portoit tout le monde.

Pedro de Puellas menoit avec luy enuiron 40. hommes de Cheual, & quelques 20. Arquebusiers, qui se fortifierent tous dans leur resolution, par l'arriuée de Gonçalo Diaz, & de ceux de sa suite. Vela Nuñez arriva cependant en la Ville des Rois, où il fit sçauoir au Vice-Roy ce qui se passoit; de sorte qu'il eut raison de s'en fâcher, pource qu'il vid bien par là que ses affaires alloient tous les iours de mal en pis; Le lendemain, se rendit pareillement en la mesme Ville Rodrigue Nyño, Fils de Hernand Niño, Gouverneur de Toledé, avec trois ou quatre autres, qui n'auoient point voulu suiure Gonçalo Diaz: Ce qui fut cause, qu'apres leur auoir fait tous les affronts imaginables, on leur osta leurs habits, leurs Armes, & leurs Cheuaux: tellement que l'infortuné Rodrigo Niño, se vid reduit en vn si pauvre equipage, qu'avec vn chetif pourpoint, vn vieux haut de chausse, des souliers de corde aux pieds, & vn baston à la main, il fut contraint de se presenter au Vice-Roy. Il le receut avec de grandes demonstrations de bien-veillance, & avec Eloge mesme: car il ne loua pas moins sa Constance, que sa fidelité; disant, que ce pauvre habit luy faisoit plus d'honneur, veu le suiet, qui le luy faisoit porter, que s'il fut venu couuert d'vn riche drap d'or.

Les deux Auteurs susnommez racontent en mesmes termes ce que ie viens de dire, & Diego Fernandez Palentin y adiousté ce qui suit.

Le Vice-Roy ne sceut pas plustost ce qui estoit aduenü, qu'il en fut extrêmement fâché, iugeant bien par là du mauuais succez, & de l'entiere decadance de ses affaires. Pour se venger donc d'vne si grande lascheté, comme estoit celle que luy auoit fait le Capitaine Gonçalo Diaz, personnage auquel il se fioit entièrement, & qui neantmoins luy auoit faussé la foy promise; comme il vid qu'en son absence, il ne pouuoit faire Iustice autrement, il fit traîner son Drappeau par toute la Place, en la pre-

sence des Capitaines & des Soldats, à la veüe de toute la Ville.
 " Il commanda mesme que tous les Sergents & Enseignes, tant
 " de la Compagnie de Gonçalo Diaz, que des autres, eussent à
 " deschirer son Drapeau avec la pointe des Armes qu'ils se trou-
 " ueroient en main, au mespris & à la honre du Capitaine absent.

Il n'est pas croyable combien cette action-là fut sensible à
 " Gomez Estacio, Enseigne de la Compagnie de gonçalo Diaz, &
 " à tous les autres Camarades: Mais ce qui desplaieut encore fort à
 " Gomez, fut que le Vice-Roy voulût que luy-mesme trainast
 " son Drapeau. Ce qui fit qu'en son Ame, il se declara deslors
 " contre luy, & se voïa d'inclination à gonçalo Picarre. Or com-
 " me les vns estoient faschez de l'action de gonçalo Diaz, de la-
 " quelle ils disoient qu'il auoit esté iustement puny en son hon-
 " neur; d'autres aussi s'en resioiissoient; Et pareillement de ce
 " que la puissance du Vice-Roy diminuoit, à mesure que celle de
 " Gonçalo Picarre augmentoit: Cars ils ne desiroient rien tant
 " que sa cheute, & de le voir honteusement chassé du País, & ain-
 " si quelque chose qu'il pût faire ils l'expliquoient tousiours en
 " mauuaise part: ce qu'il estoit contraint de dissimuler, encore
 " qu'il ne l'ignorast point. Icy finissent les patoles de Diego Fer-
 " nandez Palentin.

Durant ces choses, les Malcontents parloient en fort mauuais
 termes contre ceux qui auoient conseillé au Vice-Roy d'en-
 uoyer le Capitaine gonçalo Diaz contre son beau pere, puis que
 comme disent les Auteurs, ils n'estoient pas mal ensemble; &
 blasmoient aussi le Vice-Roy d'auoir suiuy ce conseil, sans con-
 siderer les grands inconueniens qui en pouuoient arriuer: Com-
 me au contraire, ils disoient à l'auantage de Gomez Estacio, En-
 seigne de gonçalo Diaz, qu'on luy auoit fait grand tort de luy
 faire trainer son propre Drapeau, n'ayant nullement trempé à
 la trahison de son Capitaine; Et voila comme ils se plaisoient à
 mesdire du Vice-Roy, à cause de sa rigueur estrange à executer
 les Ordonnances, qui entretenoit la haine qu'ils auoient con-
 ceuë contre luy.

ABOLITION DONNEE A GASPAR

*Rodriguez, & à ses Amis; Avec sa Mort,**& celle des autres.*

CHAPITRE XII.

POUR mieux expliquer ce que ces Auteurs disent tous ensemble de Gaspar Rodriguez, qu'Augustin de Carate nomme quelque fois Gaspar de Royas; Il faut sçavoir qu'il estoit Frere du bon Capitaine Perançurez *de Campo Redondo* *, qui * ou de fut en la Bataille de Chupas, & par la mort duquel il herita de *Champ-rond.* son Département d'Indiens, dont le gratifia le Licencié Vaca de Castro. Ce Cavalier fut celuy-mesme, qui sans consideration, fit transporter à Cozco l'Artillerie de Huamanca, & qui par cette action obligea fort Gonzalo Pizarre à luy vouloir du bien; Mais le voyant depuis abandonné de ses meilleurs Amis, il resolut de l'abandonner de mesme, pour ne succomber sous vn Party si mal appuyé. Il se trouuoit pourtant bien empesché, pource qu'il nesçauoit comme quoy faire sa paix, apres auoir enleué l'Artillerie au grand mescontentement du Vice-Roy. Son humeur portée à la vengeance, luy faisoit apprehender de l'aller trouver, sans aucune seureté de sa vie, & l'obligeoit mesme à dire, que quand il se seroit engagé à le servir, il ne deuoit attendre de luy que la mort, pour la faute qu'il auoit commise. Il n'en voulut pas demeurer là neantmoins, & se resolut de prendre avec luy quelques-vns de ses Amis, qui l'appuyassent en cette affaire, afin de mieux flechir Blasco Nuñez, quand il verroit que les plus considerables du Party de Gonzalo Pizarre l'auroient quitté.

Ils demeurerent d'accord entr'eux qu'il luy falloit demander au Vice-Roy vne Abolition du passé, & vn sauf conduit pour l'aller servir presentement. Pedro de Puelles les trouua dans ces Conferences, & c'est le cōmun sentiment des Auteurs, que s'il eut tardé encore trois iours à venir, les gens de Gonzalo Pizarre, se fussent eux-mesmes mis en desroute. Or bien que Gaspar Rodriguez & ses Amis vissent assez le nouveau secours qui arriuoit

à Piçarre, ils ne laissent pas neantmoins de porter leur dessein plusauant. Ils le descourirent à vn Prestre natif de Madrid, qu'on appelloit Balthazar de Loaisa, qu'il me souuient d'auoir cognu en la mesme Ville l'an 1563. & non pas dans mon País, pour n'estre en cetemps-là qu'un enfant, encore qu'il m'y cogneut-assez, estant amy de mon Pere, & de toute la Noblesse de cét Empire. Auecque ce Prestre, qui eut pû faire au besoin la Charge de Mestre de Camp, Gaspar Rodriguez *de Campo redondo*, & ses autres Amis, trouuerent tous à propos qu'ils s'en alast en la Ville des Roys, pour y demander ensemble vne abolition & vn sauf conduit, & luy rendre compte, tant de la qualité, que du nombre de ceux qui le viendroient seruir, par le moyen desquels, & de ceux quis'en estoient fuis, Gonçalo Piçarre seroit entierement desfait.

Balthazar de Loaisa se desroba secrettement du Camp de Gonçalo Piçarre, qui en estant aduertey, le fit incontinent suivre par des hommes exprés; mais ils ne pûrent l'attraper, pource qu'il alloit hors du grand chemin. Il vint à Rimac, où il fut fort bien receu du Vice-Roy, pour les bonnes nouuelles qu'il luy apporta: Car il sçauoit desia l'intention de Gaspar Rodriguez, & de ses Amis, pour l'auoir apprise de Hierosme de la Serna. Le Vice-Roy mesme l'auoit hautement publiée, pensant d'encourager par là ses gens: Tout le contraire arriua pourtant, à cause que Gonçalo Piçarre fut incontinent aduertey de toute cette menée, d'autant plus dommageable à Gaspar Rodriguez, qu'elle fut cause de sa mort, & de plusieurs autres, à qui on la donna, pour auoir reuelé ce secret. Balthazar de Loaisa eut l'abolition & le pardon qu'il demandoit: D'où s'ensuiuit, comme dit Carate (dont nous auons icy suiuy le sentiment, pour l'auoir creu plus veritable que celuy des autres, à cause qu'il fut present à cette action) que toute la Ville en eut incontinent cognoissance: Ce qui fut extrêmement sensible à plusieurs des Principaux, & à tous ceux en general, qui auoient de secretes inclinations pour Gonçalo Piçarre, d'autant qu'il leur importoit qu'il vint à bout de son entreprisse. Comme donc ils tenoient pour certain, que la venue de ces gens de secours seroit cause de la desroute de l'Armée de Gonçalo, & qu'ainsi le Vice-Roy n'auroit plus d'obstacle en l'execution des Ordonnances; ils s'affligeoient tous auecque grande raison. Ainsi Balthazar de Loaisa sortit de la

Ville des Rois, avec les Despesches qu'il auoit fauorablement eûes, & renouuella par cette sortie les iustes apprehensions des Habitans : car ils creurent tous que cette Abolition caueroit la ruine de Pigarre, & par consequent, qu'ils ne pourroient éuiter ce qu'ils apprehendoient le plus, qui estoit de perdre leurs biens, & leur Indiens de seruice. Ils se mirent si bien cela dans l'Esprit, que quelques-vns des principaux Chefs, assistez des Soldats, resolurent d'aller apres Loaisa, pour luy oster ses Despesches. Ils s'en allâ cependant, n'ayant pour toute compagnie que Hernandez de Sauallos; ce qui aduint au mois de Septembre de l'an 1544.

La nuit d'apres, vingt Caualliers le poursuuirent en diligence; Les principaux desquels furent Dom Balthazar de Castille, Fils du Comte de la Gomere, Laurens Mexia, Rodriguez de Salazar, (celuy mesme qui prit à Cozco Dom Diego d'Almagre le ieune;) Diego de Caruajal, surnommé le Galand, ou le Gentil, François d'Escobedo, François de Caruajal, & Pierre Martin de Sicile, autrement dit, Pedro Martin de Dom benit, avec quelques autres, iusques au nombre sus-mentionné. Ils se hasterent si bien d'aller, qu'à moins de 40. lieues de la Ville des Rois, ils attraperent Loaisa, auquel ils osterent ses Despesches, & les enuoyerent en toute diligence à Gonçalo Pigarre, par vn Soldat qui s'y en alla par des routes destournées du grand chemin. Les ayant receuës, il les communiqua le plus secretement qu'il pût, au Capitaine François de Caruajal, qu'il auoit vn peu auparauant fait son Mestre de Camp, à la place d'Alonse de Tauro, qui se trouuoit mal, & qui auoit desia cette mesme Charge, quand il sortit de Cozco. Il descouurit aussi cette affaire à quelques autres Capitaines, & aux principaux de son Cáp, qui n'estoient point compris parmy ceux qui auoient demandé sauf-conduit. Les vns par vne haine particuliere, les autres par enuie, & les autres par vn desir d'auoir de meilleurs Départemens, conseillerent à Gonçalo Pigarre, de faire vn si bon exemple de cecy, que tous les autres en fussent espouuentez, & apprissent à ne causer plus à l'aduenir de semblables reuoltes. Parmy tous ceux-cy les plus considerables, pour n'auoir trempé à cette affaire, ny demandé sauf-conduit, conclurent tous à la mort du Capitaine Gaspar de Royas, Philippe Guttierrez, fils d'Alonse Guttierrez Tresorier de sa Maiesté, demeurant dans

la Ville de Madrid, & Darias Maldonado. Cavalier de Galice, lequel avec Philippe Gutierrez s'estoit arresté deux ou trois iours en la Ville de Guamanga, sous pretexte de donner ordre à certaines choses, touchant son Voyage. Mais Gonçalo Piçarre les preuint, & leur enuoya le Capitaine Pedro de Puellas, avec vn nombre de gens de Cheual, si bien que les ayant tous attrapez à Guamanga, il s'en saisit, & leur fit trancher la teste. Or pource que Rodriguez estoit Capitaine dans la mesme Armée, où il commandoit enuiron deux cens Piquiers; Et qu'avec cela il n'estoit pas moins considerable pour sa naissance que pour ses Richesses, & pour estre bien dans l'esprit de tous; ils n'osèrent point executer ouuertement en sa personne ce qu'ils auoient proierté. Ils s'aduiserent donc d'yser d'vn stratageme assez adroit, qui fut; Qu'apres que Gonçalo Piçarre, eut fait tenir prests 150. Arquebusiers de la Compagnie de Sermeño, & mettre en estat l'Artillerie, il fit appeller tous les Capitaines, sous pretexte de leur vouloir communiquer certaines despeschés, qu'il disoit auoir receuës de la Ville des Rois.

Comme ils furent tous en presence, & entr'autres Gaspar Rodriguez, Gonçalo Piçarre le voyant hors de deffense, pource qu'on tenoit sa tente assiegée, contre laquelle on auoit pointé toure l'Artillerie; sortit à l'heure mesme, feignant qu'il s'en alloit à vn autre affaire. Alors, apres que tous les Capitaines furent assemblez, le Mestre de Camp Caruajal s'en alla droit à Gaspar Rodriguez, sans faire semblant de rien: puis saisissant tout à coup la garde de son Espée, la tira du fourreau, & luy dit; *Qu'il eut à se confesser, pource qu'il luy faloit mourir, & à mesme temps on fit venir vn Prestre.* Gaspar Rodriguez fut quelque temps sans se pouuoir resoudre, s'offrant à se iustifier, quelque faute qu'on luy pût imputer: Mais tout cela n'empescha pas qu'on ne luy tranchast la teste.

Ces executions sanglantes estonnerent tous les gens de Guerre, & ceux en particulier qui se sentoient coupables de la mesme chose, pour laquelle on auoit fait mourir les autres: Ce qui fut le premier acte que joua Piçarre, pour donner commencement à sa Tyrannie. Quelques iours apres, arriuerent au Camp Dom Balthazar, & ses Compagnons, qu'il menoit prisonniers, Balthazar de Loaisa, & Hernand Sauallos. C'est l'opinion commune, que Gonçalo Piçarre, ayant sceu le iour de leur arriüée,

enuoya le Mestre de Camp Caruajal sur le chemin, par où ils deuoient venir, avec ordre exprés de les faire pendre : Mais la Fortune voulut, qu'au lieu de suivre le grand chemin, ils en prirent vn autre, où ils s'esgarerent, si bien que le Mestre de Camp ne les pût rencontrer. Ils furent enfin menez à Gonçalo Piçarre, qui fut prié par tant de personnes de leur sauuer la vie, qu'il la leur donna en effet, renuoyant à pied Loaísa, sans aucunes prouisions, & se faisant suivre dans l'Armée par Hernand Sauolles. Voilà ce qu'en dit Carate.

Liv. 5.
Ch. 11.

De ce que ie viens de dire l'on peut inferer, que la ruine entiere de Gaspar Rodriguez, & de ceux qui furent executez avec luy, vint du fauf-conduit qu'ils demanderent, lors que pensant asseurer leur vie par ce moyen, eux & leurs Complices, se precipiterent à la mort ; où vous remarquerez avecque Gomare, *Ch. 164*
Que cette Action du Vice-Roy, d'auoir donné fauf-conduit à tous ; à la reserve de Piçarre, de François de Caruajal, du Licencié Benoist de Caruajal, & de quelques autres, irrita si fort Piçarre, & son Mestre de Camp, qu'à cause de cela, ils firent pendre Gaspar Rodriguez, & Philippe Gutierrez, avec quelques autres, Et voilà comme le pauvre Cavalier Rodriguez halta sa mort ; tellement que pour son iniquieude, & son impatience, il ne pût durer, ny avec ceux qu'on appelloit Tyrans, ny avec ces autres que l'on tenoit pour Fideles.

LA MORT DV FACTEUR YLLEN SUAREZ de Caruajal ; & le desordre qu'elle cause dans tout le Peru.

CHAPITRE XIII.

TANDIS que tous ces Actes sanglans, dont ie viens de parler, s'exécutoient au Camp de Gonçalo Piçarre, il aduint dans la Ville des Roys vne chose deplorable, que Gomare rapporte en ces termes. *Ch. 159*
Lonys Garcia saint Mames, qu'on auoit laissé pour Agent à Xauxa, apporta certaines Lettres en chiffre du Licencié Benoist de Caruajal au Facteur Suarez son Frere. Le Vice-Roy, qui vouloit mal au Facteur, eut quelque soupçon de ces chiffres, & mon-
P P p iij

stra les Lettres aux Auditeurs, ausquels il demanda s'il n'y auoit rien là dequoy le faire pendre : Ils luy respondirent que non, & qu'aparamant il en faisoit sçauoir le contenu. Ils manderent pour cét effet Yllen Suarez, qui sans s'estonner pour la peur qu'ils luy perserent faire par des paroles extrêmement rudes, se mit à lire les Lettres ; Le Licencié Jean Aluarez y prenant soigneusement garde. Il y estoit parlé des gens de Guerre, du dessein de Pigarre, & de ceux qui estoient mal avec luy, Qu'au reste, pour son regard, il ne manqueroit pas d'aller trouuer le Vice-Roy pour le seruir, comme luy mandoit le mesme Facteur. Apres cét esclaireissement, on luy demanda l'Alphabet, pour deschiffrer la Lettre, qui se trouua tout à fait conforme à ce qu'il venoit de lire. En suite dequoy le Licencié Carnajal arriva dans Lima, deux ou trois iours apres que Blasio Nunez fut pris, sans sçauoir la mort du Facteur ; Et c'est la Relation qu'en fait Gomare.

• *Q'ioy que cela deuit suffire au Vice Roy, pour luy oster tout ombrage contre le Facteur ; si est-ce que le soupçon qu'il se mit dans l'Esprit, pire qu'une peste, & qu'une Fureur enragée, le bourrela tellement, qu'il n'eut iamais de repos, qu'en sa Maison propre il n'eut commis le plus cruel Acte qu'on sçauoit iamais imaginer, qui fut la mort du mesme Facteur. Aussi causa-t'elle plus d'apprehension & d'horreur, que toutes les autres executions tragiques que Gonçalo Pigarre auoit fait faire en son Camp ; afin que de part & d'autre on ne manquât point de sujet des'attrister. Cette mort aduint la nuit apres la fuite de Dom Balthazar de Castille, & des autres nommez cy-deuant. Les trois Auteurs la racontant presque d'une mesme sorte. Nous rapporterons icy ce qu'en dit Augustin de Carate, & ferons suppléer aux choses qu'il a obmises, celles que les autres Auteurs en escriuent. Voicy ses paroles.*

» Pour reprendre le fil de l'Histoire, il faut sçauoir qu'un peu apres que Dom Balthazar de Castille fut sorty de la Ville des
 » Roys avec ses Compagnons, pour courir apres Loaísa, comme
 » il a esté dit cy-dessus, l'affaire ne pût estre si secrette, qu'elle ne
 » vint à la cognoissance du Capitaine Diego d'Urbain, Mestre de
 » Camp du Vice Roy : Car s'en estant allé faire la ronde par la
 » Ville, il entra dans les Maisons de ceux cy, où il ne les trouua
 » point, non plus que leurs Armes & leurs Cheuaux, ny mesme
 » leurs Indiens de service. Cela le fortifia dans le soupçon qu'il
 » auoit, & le fit aller au logis du Vice-Roy, lequel il trouua cou-

ché, & alors il l'assura que la plus-part des Habitans s'en estoient fuis, les apparences le luy faisant croire ainsi.

Le Vice-Roy s'esmeut grandement de cette nouvelle, comme il en auoit bien du sujet: Et s'estant leué tout aussi-tost, mit ordre que les Soldats se tinssent sous les Armes, manda ses Capitaines, & voulut qu'en toute diligence ils s'en allassent faire reuë de Maison en Maison, pour sçauoir ceux qui manquoient. Or pource qu'entre les absens, se trouuerent par mal-heur, Diego de Caruajal, Hierosime de Caruajal, & François d'Escobedo. Nepueus du Fauteur Yllen Suarez, qu'il soupçonnoit de fauoriser le Party de Gonçalo Piçarre; la desiance de Blasco Nunez s'en augmenta de beaucoup. Croyant donc que ses Nepueus s'en estoient allez par son ordre, ou du moins qu'ils ne l'auoient pû faire, sans qu'il en eut cognoissance, daurant qu'ils se retiroient en son logis par vne petite porte assez esloignée de la grande; pour s'esclaircir de toutes ces doubtes, le Vice-Roy enuoya Vela Nunez son Frere, suiuy de quelques Arquebustiers, avec ordre exprés de se saisir du Fauteur, & de le luy amener. Vela Nunez le trouuant couché, le fit habiller, & le mena droit au logis du Vice-Roy, qui pour n'auoir presque point dormy de toute la nuit, s'estoit ietté sur son liët, où il reposoit tout vestu, & sans auoir mesme posé ses Armes. Quelques-vns qui se trouuerent presens à cette action, disent, qu'aussi-tost qu'il vid entrer le Fauteur dans sa Chambre: *Ha Traistre*, luy dit-il, *c'est vous qui auez enuoyé vos Nepueus fruir Gonçalo Piçarre! Vostre Seigneurie m'excusera*, luy respondit le Fauteur, *& m'obligera bien fort de ne me pas appeller Traistre: car ie ne le suis point veritablement*. A quoy l'on tient que le Vice-Roy repartit: *Ie iure Dieu que tu es Traistre au Roy, & que le Fauteur luy repliqua: Je iure Dieu que ie suis aussi bon fruiteur du Roy, comme vous*.

Le Vice-Roy, tout transporté de ces paroles, mit la main sur vn poignard qu'il portoit, & selon quelques-vns, luy en donna dans le sein. Luy-mesme pourtant assura depuis, qu'il ne l'auoit point frappé; mais qu'il estoit bien vray que ses Domestiques, & ceux de sa garde, offensés de son peu de respect, & de la hardiesse de sa response, luy donnerent en suite tant de coups de Halebardes & de Pertuisanes, qu'il en mourut, sans se pouoir confesser, ny dire la moindre parole. Le Vice-Roy s'aduisa de le faire enterrer aussi-tost: Mais pource qu'il sçauoit qu'on

„ l'aymoit fort, & que si on le transportoit en la presence des gens
 „ de Guerte (y ayant ordinairement cent Soldats en gatde dans la
 „ basse court de son logis) il en pourroit arriuer quel que desordre;
 „ il fit descendre le corps par vne galerie de la Maison, qui regar-
 „ doit dans la Place, où il fut receu par quelques Negres & In-
 „ diens, qui l'enseuelirent en la prochaine Eglise, sans autre cere-
 „ monie, sinon qu'au lieu de suaire, ils le laisserent en terre enue-
 „ loppé d'une longue robbe d'escarlante qu'il se trouua sur le dos.
 „ D'où il aduint, comme il sera dit cy dessous, qu'à trois iours
 „ de là, les Auditeurs ayant pris le Vice-Roy, la premiere chose
 „ qu'ils firent, fut de mettre en auant la mort du Fauteur, com-
 „ mençant le procez par le rapport qu'on leur auoit fait, Qu'à la
 „ minuit on l'auoit mené dans le logis du Vice-Roy, Qu'il ne
 „ s'estoit point trouué depuis ce temps-là; & que ce meurtre auoit
 „ esté mis en euidence par les blesseures trouuées sur le corps du
 „ Defunct, apres l'auoir tiré de terre.

„ Cette mort scandalisa grandement tous ceux de la Ville,
 „ quand il vinrent à la sçauoir: Car ils la trouuerent d'autant plus
 „ estrange, qu'ils ne pouuoient ignorer que le Fauteur n'appuyast
 „ grandement les affaires du Vice-Roy, apres auoir veu de quel
 „ zele il estoit porté à le faire receuoir dans la Ville des Roys, con-
 „ tre les sentimens & la volonté des principaux Habitans. Ces
 „ choses aduinrent la nuit d'un Dimanche 13. iout du mois de
 „ Septembre, l'an 1544. *A ces paroles d'Augustin de Carate, Dis-*
 Ch. 17. *go Fernandez ayant du le mesme, adionste les suivantes.*

„ Ils en descendirent le corps par vne galerie, & l'enseuelirent
 „ en vn des coings de la prochaine Eglise, qui estoit là tour con-
 „ tre. Mais apres que l'impetueuse fougue du Vice-Roy fut pas-
 „ sée, & que la Colere eut fait place à la Raison; il n'est pas à croi-
 „ re combien il s'en affligea, iusques là mesme, qu'on tient qu'il
 „ en respandit des larmes. Ce qui fut cause aussi, qu'apres que cet-
 „ te mort fut cogneuë de toute la Ville, il manda les principaux
 „ Habitans, auxquels il iura pour se iustifier, qu'il auoit eu veri-
 „ ritablement vn legitime sujet dese porter à ces extremités, at-
 „ tribuant la cause de sa mort à sa responce indiscrete. Surquoy il
 „ conclūd, qu'ils ne deuoient pas s'en scandaliser si fort: Et que
 „ soit qu'il eut fait bien ou mal; tant y a qu'il en rendroit compte
 „ à Dieu & à son Roy; Paroles qui fascherent encore dauantage
 „ ceux de la Ville: Et ainsi l'absence des Fuyatds, fit naistre l'oc-

casion

casion de prendre le Vice-Roy : Ce qui fut, à vray dire, vn specieux pretexte, ou mesme vne secrette Tyrannie, qui n'auoit aucun fondement : car apres tout, il est certain que ceteuement troubla d'vne estrange sorte le Vice-Roy, qui s'en plaignoit à tout coup, disant que la mort d'Yllen Suarez, luy accabloit tellement l'esprit, qu'il en estoit hors de soy. Aussi fut-il oüy plusieurs fois, maudissant son Frere Vela Nuñez, qu'il appelloit infame, & brutal, pour luy auoir amené le Facteur, en vn temps auquel il ne pouuoit ignorer, qu'il ne fut passionnement irrité contre luy. D'où il concludoit, qu'il denoit auoir l'esprit de n'aller pas si viste en besongne : mais de dissimuler plus tost, & de dire qu'il n'auoit point trouué Yllen Suarez, iusques à ce que les premiers mouuemens de sa Colere fussent passez. C'estent les paroles de Diego Fernandez.

Gomare dit, *Que le Facteur s'estant voulu descharger des cas qu'on luy mettoit sus, receut deux coups de poignard du Vice-Roy, qui se mit à crier à mesme temps ; Qu'on le tuë, qu'on le tuë ; Et qu'alos ses seruiteurs accourus au bruit, acheuerent de le tuer en effect, bien que pour l'empescher quelques-vns tressassent des hardes sur luy. Ce mesme Historien adiouste, Qu'un estrange desordre s'ensuiuit de la mort du Facteur Yllen Suarez, pour estre des Principaux du Pais, & qu'elle mit tellement le peuple en alarme, que plusieurs des Habitans de Lima abandonnerent de nuit leurs propres Maisons. Le Vice-Roy mesme en fut si espouuanté, qu'apres auoir fait le coup, il dit franchement aux Auditeurs, Que cette mort seroit cause de la sienne, recognoissant la faute qu'il auoit faite, &c. Aussi luy fut-elle du moins vn sujet de se faire hayr d'un chacun : Car ses gens mesmes eurent vne si grande auersion pour luy, & tant de peur qu'il ne leur iouast quelque mauuais tour, apres le meurtre inopiné par luy commis en la personne d'Yllen, Suarez; qu'ils le fuyoient tous, & se cachoiert pour ne le point rencontrer : Comme au contraire, ses Ennemis profitoient de ses extrauagances, qui leur seruiert à se iustifier dans la mauuaise opinion qu'ils auoient conceüe de luy.*

IRRESOLUTIONS DV VICE-ROY, SVR

*la venue de Gôngalo Piçarre en la Ville des
Rois, manifestement contredites.*

CHAPITRE XIII.

A PRES le secours qu'amena Pedro de Puellez, & celuy des Transfuges du Vice-Roy, Gôngalo piçarre marcha plus courageusement, & avec plus d'assurance qu'à l'accoustumée, mais plus lentement aussi, à cause de l'embarras de l'Artillerie: Car comme elle estoit portée sur les espauls des Indiens, par des lieux extrêmement rudes, & des costaux où l'on ne pouvoit monter, ny en descendre non plus, qu'avecque beaucoup de peine; ny luy, ny les gens ne pouuoient pas faire de grandes journées. Cependant, le Vice-Roy connoissant que l'Ennemy approchoit de iour en iour, & que pour luy, tant plus il alloit en auant, tant plus aussi il mescontentoit ceux du païs, par l'exécution des Ordonnances; ne sçauoit quelle resolution prendre: Car bien que ses gens dissimulassent, ils le seruoient neantmoins avec tant de froideur, que leur desplaisir paroissoit à decouuert. Comme il eut donc bien considéré toutes ces choses, & que le mal conceu contre luy s'enuenimoit à toute heure; il s'aduisa (mais trop tard) de changer de batterie, & de suspendre l'exécution des Ordonnances. Il se resolut ainsi d'en faire publier la suspension, s'imaginant par là d'esteindre le feu des dissensions, que luy-mesme auoit allumées dans le païs, & que par ce moyen, ostant à Gôngalo piçarre le tiltre de procureur general il luy osteroit aussi ses gens de Guerre, qui se dissiperoient de part & d'autre; par où tous les troubles du païs seroient pacifiez. D'où il aduint, comme dit Fernandez, *Qu'il declara publiquement cette suspension, en attendant que l'Empereur, après en estre deuëment informé, en ordonnast comme bon luy sembleroit; Ce que ie trou-*

Ch. 158. *ue conforme au sentiment de Gomare, qui en parle ainsi.*

Il despleut extrêmement à Blasio Nuñez, que Gôngalo Piçarre eût tant d'Armes, tant d'Artillerie, & tant de bons hommes de Guerre. Ce qui fut cause qu'il suspendit les Ordonnances pour deux ans, attendant

quel l'Empereur en disposast autrement : Neantmoins , par les conventions de ce Traitté , il protesta qu'il ne faisoit cette suspension que par force , & qu'en pacifiant le Païs , il ne laisseroit pas d'exécuter les Ordonnances : Ch. f. qui le rendit encore plus odieux à tous. Apres cela , par un mandement exprès , qui fut signifié par des Crieurs publics , il donna pouuoir à toute sorte de personnes , de mettre à mort Gonçalo Piçarre , & ceux de sa suite ; promettant à ceux qui le tueroient , ses biens , ses Départemens , & ce qu'il se trouueroit auoir eu d'Indiens de service : Proposition , à vray dire , qui fâcha grandement les Habitans de Cozco , & qui ne plut pas à tous ceux de Lima. En effet , il donna dès l'heure quelques Départemens qui estoient escheus à Piçarre. Voilà le sentiment de Gomare.

Ot bien qu'il ne fit pas assez à temps cette suspension d'Ordonnances , elle n'eut pas laissé neantmoins d'estre agreable à plusieurs , s'il y eut apporté quelque sorte de moderation , sans en venir à de fâcheuses extremitez. Car dès aussi - tost qu'à la Nouvelle de la Suspension , se trouua jointe la Protestation qu'il fit , disant ; Que ce n'estoit point de son bon gré , & qu'à mesure qu'il appaiseroit les troubles du païs , il passeroit outre en l'exécution ; tous ceux qui le sceurēt en furent plus irrités qu'auparauant : pource qu'ils virent à descouuert , qu'au point où il s'opiniastroit à faire exécuter les Ordonnances , il n'estoit pas possible qu'ils ne fussent tous entierement ruinez ; Ce qui fit qu'ils serendirent plus obstinez qu'auparauant en leur commune Rebellion , & qu'ils resolurent de ne point relâcher de leur demande , mesme aux despens de leur vie. Dequoy Blasco Nuñez s'estonna fort , voyant par là que ce qui les deuoit appaiser , les irritoit dauantage , & que les gens manquant de cœur , panchoient au Party de Gonçalo Piçarre , la teste duquel il auoit mise à l'enquant , sous pretexte du commun bien de ceux du païs. Toutes lesquelles choses ensemble furent cause qu'il conclut à part soy de ne bouger de la Ville , & d'y soustenir vn siege , sans attendre l'Ennemy en raze campagne.

Sur cette resolution il fortifia la Ville , barricada les ruës , fit faire des Canonnières , & se pourueut abondamment de viures , pour auoir dequoy subsister , si le siege estoit long. Mais comme il sceut par des Nouuelles qui luy vinrent , que les forces de Gonçalo Piçarre augmentoient de iour en iour , & que ses gens irrités ne luy promettoient rien de bon ; il s'aduisa de quier-

ter la Ville des Rois, pour s'en aller à Truxillo, qui en est esloignée d'enuiron quatre-vingts lieuës. En ce voyage, il se proposa de faire embarquer les Femmes des Habitans, afin qu'elles allassent par Mer, tandis que ses gens iroient par terre le long de la Coste. Mais auant que de se mettre en chemin, il voulut despeupler & desmanteler la Ville, en abbatre les Moulins, & ruiner entierement tout ce dont l'Ennemy pourroit tirer aduantage. Il eut dessein mesme de faire souleuer les Indiens de la coste, & de les enuoyer plus auant dans le rais; pource qu'il luy sembla que Gonçalo Pigarre, ne trouuant ny de quoy subsister, ny aucuns Indiens de seruice, romproit son Armée, & quitteroit là son entreprisse.

S'estant imaginé toutes ces choses, il les communiqua aux Auditeurs, qui s'y opposerent ouuertement; en luy remontrant, *Que le Siege Royal ne se pouuoit transporter de cette Ville en vne autre: Que le Roy l'entendoit ainsi; & que pour eux, ils ne le pouuoient suivre, ny permettre qu'aucun abandonnast sa Maison.* De cette façon, les Auditeurs & le Vice-Roy rompirent ensemble, & formerent deux Factions cōtraires, où les Habitans se monstrerent plus enclins à suivre le party des Officiers, que celuy de Blasco Nuñez. A quoy les obligeoient particulièrement les bons Offices des Auditeurs, qui parlant en faueur d'eux, ne vouloient nullement qu'on embarquast, ny leurs Femmes, ny leurs Filles, de peur qu'elles ne fussent exposées à leur dommage, à la mercy des Soldats, & des gens de Marine.

Après que le Vice-Roy eut conféré long-temps avec que les Auditeurs, & qu'il se fut séparé d'eux sans rien resoudre, il voulust mettre en execution ce qu'il s'estoit imaginé, à sçauoir d'aller par Mer, & d'enuoyer par Terre son Frere Vela Nuñez, avec la Soldatesque. Pour ce mesme effet, comme le remarque Carate; il aduertit Diego Aluarez Cuelo, qu'auet quelque nombre de Cavaliers, il eut à se mettre en chemin, pour aller faire embarquer les Fils du Marquis Dom François Pigarre, prenant soigneusement garde à eux; & au Licencié Vaca de Castro; car il apprehendoit que Dom Anthoine de Ribera, & sa Femme, qui auoient sous leur Charge Dom Gonçalo, & ses Freres, ne les fissent euader, & cacher en quelque maison secrette.

Cette dernière action de Blasco Nuñez, fist ha grandement ceux de la Ville, & encore plus les Auditeurs; mais particulièrement le Li-

centié Carate, qui le fut prier instamment de ne point faire prendre la route de la Mer à Doña Francisca, pour n'y auoir aucune apparence de souffrir parmy des Soldats & des Mariniers, vne Fille de sa condition, fleurissante en âge, & qui n'estoit pas moins Belle que Riche. Mais quelque chose qu'on pût dire au Vice-Roy il n'y eut iamais moyen de le flesc hir; si bien qu'à la fin, il leur dit ouuertement qu'il vouloit fuir retraite, mais il les trouua bien estoignez de son intention. Ce sont les paroles de Carate.

Qu'es'il faut recueillir maintenant ce que châce Auteur dit là-dessus en particulier, on trouuera que les Auditeurs ennuyez, chargerent enfin Martin de Roblez, quoy qu'il fut vn des Capitaines du Vice Roy, de se saisir de sa personne: Dequoy s'estant voulu dispenser, pour le mal qui luy en pouuoit arriuer, il fut assuré par eux-mesmes, que le seruice du Roy le vouloit ainsi, pour pacifier cét Empire, & terminer les dissensions que le Gouuernement du Vice Roy y causoit. Mais cela n'empescha pas qu'auant que passer outre, ce Capitaine ne voulut auoir pour sa descharge vn Mandement exprés, signé par les Auditeurs, qui le luy donnerent aussi-tost, à condition de n'en point parler, iusques à ce qu'il en seroit temps. A celuy-cy ils en adiousterent vn autre, par lequel il estoit expressément enjoint aux Principaux de la Ville, & à tous les Habitans, de ne rien faire de ce qu'ordonnoit le Vice-Roy, de ne pas abandonner leurs Maisons, ny leurs Femmes non plus, que l'on vouloit embarquer; & de prester main-forte à Martin de Roblez, en l'execution d'vne Entreprise qui regardoit le seruice de l'Empereur, & le bien du País: tellement qu'eux-mesme encore, tinrent secrette cette Lettre de Mandement, en attendant qu'il fût temps de la publier.

Durant ce desordre des deux Partys, ceux du País estoient si confus, & si hors de garde, qu'ils ne sçauoient de quel costé se tourner. Le respect qu'ils deuoiēt à leur Prince, portoit leurs inclinations à suivre le Party du Vice-Roy; Mais leur interest propre, qui leur faisoit apprehender, qu'en cas que le Vice-Roy se trouuast le plus fort, on ne leur ostast leurs Départemens d'Indiens, les obligeoit à se ranger avec les Auditeurs; Pour ce qu'en matiere d'executer les Ordonnances, ils auoient des sentimens contraires à ceux de Blasco Nuñez.

Ils passerent tout le iour dans ces irresolutions, & ces confuses

pensées : d'où il aduint que le Vice-Roy, pour mettre à couuert
 sa personne de tout ce que les Auditeurs pourroient ordonner
 contre luy, assembla ses gens, & ses Capitaines, qu'il fit tenir en
 garde iusques à la minuit. Cependant les Auditeurs voyant
 qu'il faisoit tenir ainsi ses Soldats sous les Armes, dont il en
 auoit près de luy plus de 400. eurent peur qu'il ne les enuoyast
 prendre, & manderent pour leur secours leurs Amis particu-
 liers ; Mais ils se trouuerent en trop petit nombre, & par conse-
 quent peu capables de resister au Vice Roy. Les vns & les au-
 tres neantmoins, enfermez dans la Maison du Licencié Sepe-
 da, s'y fortifierent le mieux qu'ils pûrent, resolu de se bien de-
 fendre, si l'on venoit pour les arrester. Mais comme ils estoient
 dans ces apprehensions, vn des principaux d'entr'eux, que Go-
 mare appelle François d'Escobar, natif de Sahagun, les voulant
 rassurer par vne belle resolution ; *Courage, Messieurs, leur dit-
 il, sortons en plaine rue, aydons nous de nos Armes, & mourons en
 hommes, au lieu de nous laisser surprendre, enfermez comme des Pou-
 les.* Piquez de ces paroles, ils firent tous courage de desespoir,
 & les Auditeurs sortirent à la place, plustost avec apprehension
 d'estre pris, qu'avec esperance de le pouuoir esuiter : Tout le
 contraire arriua pourtant, à cause qu'il se trouua que le Vice-
 Roy, qui auoit passé la plus-part de la nuit parmy les gardes,
 s'estoit enfin retiré chez soy, par la persuasion de ses principaux
 Officiers. Ce qui fut cause qu'eux & les Soldats, se resiouyrent
 bien-fort de se voir libres du respect, à quoy sa presence les obli-
 geoit : Er qu'alors deux d'entre les Capitaines, à sçauoir Mar-
 tin de Roblez, & Pedro de Vergara, suivis de leurs Compag-
 nies, furent trouuer les Auditeurs, pour les aider à ce besoin.
 Ces derniers en attirerent d'autres, & d'autres encore, qui vou-
 lurent estre de la Partie : tellement qu'à la porte du Vice-Roy,
 il n'y eut plus personne qui pût deffendre son logis, à la reserue
 de cent Soldats qui estoient dedans, & qu'il auoit pris pour le
 garder.

EMPRISONNEMENT DV VICE-ROY,

*& diuers succez qui s'en ensuiuirent, sur mer,**& sur terre.*

CHAPITRE XV.

BIEN que les Auditeurs eussent dequoy se preualoir beau-
 coup des gens de secours qui les auoient ioints, & de ceux
 qui les alloient ioindre à toute heure, ils apprehendoient pour-
 tant de faire arrester le Vice-Roy, pour auoir appris qu'il estoit
 à la place, extrêmement bien suiu, & resolu de les faire pren-
 dre eux-mesmes. Ils s'y en allerent donc à diuerses fins, qui fu-
 rent, de se desliuer de crainte, de iustifier leur cause, & d'atti-
 rer de plus en plus du monde à la deffense de leur Party : Par
 mesme moyen encore, ils firent publier les Lettres de Mande-
 ment, dont il a esté parlé cy-dessus, le contenu desquelles ne
 fut ouï que de peu de gens, à cause du grand bruit de la foule.

Les Auditeurs, dit Carate, qui estoient presens quand le Vice-Roy fut pris, estant venus à la place, il arriva qu'environ le point du jour Liu. 5.
Ch. 14.
l'on tira quelques coups d'Arquebuzes de la galerie du Vice-Roy : Ce
qui fâcha tellement les Soldats, qui assistoient les Auditeurs, qu'ils
resolurent d'entrer par force dans la Maison, & d'y faire main basse
de tous ceux qui leur voudroient resister. Les Auditeurs les ayant
appaiez par belles paroles, deputerent Frere Gaspar de Carua-
jal, Superieur de sainct Dominique, & Anthoine de Roblez,
Frere de Martin de Roblez, pour dire au Vice-Roy, Qu'ils ne
demandoiens autre chose de luy, sinon qu'il ne les fist point embarquer
par force, ny contre l'ordre donné par sa Maieslé : Qu'ils leussent s'en ve-
nir à la grande Eglise, où ils l'alloient attendre; & que s'il ne le faisoit,
il mettroit en grand danger sa Personne, & tous ceux de sa suite. A
 l'arrivée de ces Deputez au logis du Vice-Roy, les cent Gardes
 qui estoient à la porte, s'allerent rendre au Party des Auditeurs,
 sans vouloir attendre dauantage : de sorte que les autres Sol-
 dats, voyant l'entrée libre, s'esslancerent pêle-messe dans la
 Maison du Vice-Roy, & se mirent à piller les Chambres des ser-
 uiteurs, dans le Département de la basse-court.

En ce mesme temps le Licencié Carate sortit de chez luy, pour aller trouuer le Vice-Roy : Mais pource qu'il rencontra les Auditeurs en chemin, & que la foule l'empescha d'aller plus auant, il les suiuit iusques à l'Eglise. Le Vice-Roy cependant, oüy ce que luy dirent les Deputés; Et voyant plaine de gens de Guerre sa propre Maison, que les siens mesmes, ausquels il se fioit le plus, auoient laschement abandonnée, il s'en alla droit à l'Eglise, où estoient les Auditeurs, & se mit entre leurs mains. Ils le menerent à la Maison du Licencié Sepeda, armé comme il estoit d'une Cuirasse, & d'une cotte de Maille; Et ce fut alors qu'ayant apperceu parmy les Auditeurs, le Licencié Carate, *Quoy! luy dit-il, Vous estes donc de la partie, & voulez aider à me prendre, vous en qui j'ay eu tant de confiance? A quoy Carate fit réponse, Qu'il soustiendrait à quiconque luy auroit dit cela, qu'il auoit parlé contre la verité; & que cette affaire estoit assez cognüe, pour sçauoir s'il y en auroit, ou non.*

Après l'exécution de ces choses, on mit ordre à faire embarquer le Vice-Roy, pour retourner en Espagne. Car ils apprehendoient que Gonçalo Pigaire ne le taillast en pieces, s'il luy tomboit entre les mains, & que d'ailleurs quelques-uns des plus proches d'Yllen Suatez ne le tuassent, pour vanger la mort de leur parent: si bien que de quelque façon que l'affaire arrivast, on en reietteroit tousiours la faute sur eux. Ils se desffioient d'ailleurs, s'ils l'enuoyoient seul, qu'il ne remit pied à terre, & ne vint fôdre sur eux: de sorte que parmy ces ombrages & ces soupçons, ils se trouuoient si confus, qu'ils ne s'entendoient pas les uns les autres, & sembloient estre fâchez de ce qu'ils auoient fait. Ils ne voulurent pas neantmoins en demeurer là; Et après qu'ils eurent esleu pour Capitaine General, le Licencié Sepeda, ils prirent le chemin de la Mer, avec resolution d'y embarquer le Vice-Roy: ce qu'ils ne purent faire pourtant, pource que Diego Aluarez Cueto, lors General del'Armée Nauale, voyant cette foule de gens qui venoient, & qui menoient, pris le Vice-Roy; enuoya Hierosime Curbano, l'un de ses Capitaines de Marine, dans une Fregate, où il y auoit quelques Arquebuziers, & quelques petites pieces d'Artillerie; avec ordre exprés de ramasser tout ce qu'ils trouueroient de petits Nauires, pour les mener au bord de la Capitane: Et luy cependant fit sommer les Auditeurs de rendre le Vice-Roy. Mais ils ne daignerent l'escouter,

coute, & ne luy respondirent point autrement qu'à coups d'Arquebuzes, qu'ils luy tirent de terre, & il en tira de mesme contr'eux de dessus la Mer, puis se remit à la voile. Les Auditeurs firent embarquer alors vn nombre de gens dans quelques fustes legeres, pour dite à Cueto, qu'il eut à liurer l'Armée Nauale avec les Fils du Marquis; Qu'en eschange, ils luy liueroient aussi le Vice-Roy dans vn Nauire; & que s'il ne le faisoit, il courroit grande fortune.

Ftere Gaspar de Caruajal fut chargé de cette Commission, par le consentement ptopre du Vice-Roy: tellement qu'il s'embarqua pour aller ttouuer Aluarez Cueto, auquel il dit le sujet qu'il amenoit là, comme il eut abordé la Capitane. Alors Diego Aluarez (en presence du Licencié Vaca de Castro, lequel, comme nous auons dit, estoit prisonnier dans le mesme Nauire) voyant le manifeste danger où se trouuoit le Vice-Roy, renuoya dans les mesmes fustes les Fils du Matquis, & pareillement Dom Anthoine avecque sa Femme: Pour tout cela neantmoins les Auditeurs ne firent point à l'heure ce qu'ils luy auoient promis, le menassant à tout coup, s'il ne liuroit l'Armée nauale, de couper la teste au Vice-Roy. Mais quoy que le Capitaine Vela Nuñez son Frete, fut deux ou trois fois ttouuer de sa part les Capitaines de la Matine; si est-ce qu'ils ne voulurent iamais faire autre chose; Et ainsi les Auditeurs s'en retournerent à la Ville, avecque le Vice-Roy, enuironné d'vne bonne garde: Cependant, ceux de l'Armée de Mer, aduettis à quelques iours de là, que les Auditeurs, & les autres Capitaines de leur suite, auoient dessein de mettre dans quelques Fustes, vne grande quantité d'Arquebusiers, pour s'en seruir à surprendre les Nauires; aduiserent à ce qu'ils deuoient faire pour l'empescher; car les autres auoient desja fait toute sorte d'efforts enuers Hierosme Curbano, & mesme plusieurs grandes offres, pour l'obliger à leur liurer les Vaisseaux; chose qu'il pouuoit faire beaucoup mieux que Cueto, pour estre plus fort que luy, comme ayant à sa deuotion tous les Soldats & les Mariniers, qui estoient Biscayns; Et partant les Capitaines de Marine furent d'aduis de sortir du Port des Rois, & de courir cette Coste, en attendant des nouvelles d'Espagne, & vn Mandement de sa Maiesté sur ce qu'ils auroient à faire. Ils consideroient qu'en la Ville des Rois, & par tout le Royaume, il y auoit quantité de seruiteurs, & de createurs.

• L'Espagnol
dit H.
1684.

tes du Vice Roy, ensemble plusieurs autres personnes, qui ne trempoient point à l'action qu'on venoit de faire, comme encore beaucoup de seruiteurs du Roy, qui s'embarquoient tous les iours dans les Nauires, qui n'estoient pas mal armées, ny despourueues de munitions : Car outre qu'elles auoient dix ou douze Fauconneaux de fer, quatre Canons de bronze, & plus de 40. quintaux de poudre; elles se trouuoient encore plus de quatre cens quintaux de Biscuit, cinq cens mesures de Mahis, chacune de six boisseaux, * & quantité de chair salée: de sorte qu'avec ces provisions ils auoient de quoy subsister long. temps, veu mesme qu'ils pouuoient faire aiguade en quelque lieu de la Coste qu'ils voulussent aborder. Mais pource qu'ils n'auoient que vingt cinq Soldats, & que d'ailleurs ils manquoient de Matelots, pour pouuoir gouverner dix Nauires, sans qu'il y eut apparence d'en laisser aucun, de peur qu'on ne s'y ietast dedans pour les suiure; le iour d'apres que le Gouverneur fut pris, ils en bruslerent quatre des moindres, afin qu'on ne s'en pût saisir, ensemble deux Barques de Pesccheurs qu'on auoit mises à bord; Et avec les six Vaisseaux qui leur restoient, ils se mirent à la voile. Les quatre Nauires furent tous bruslez, pource qu'il n'y eut pas moyen d'y entrer pour y donner ordre: Et quant aux deux Batques, elles ne furent pas beaucoup endominagées du feu, à cause qu'on l'esloigna de bonne heure. Les Vaisseaux restez, allerent surgir au Port de Gaura, qui est à 18. lieues de celuy des Rois, afin de s'y pouruoir de bois & d'eau douce, dont ils auoient besoin, menant avec eux le Licencié Vaca de Castro, & là mesme ils resolurent d'attendre le succès de l'emprisonnement du Vice-Roy. Sur ces entrefaites, les Auditeurs en furent aduertis; Et considerant que les Vaisseaux ne s'esloigneroient pas beaucoup de ce Port-là, s'il se presentoit vne occasion de faire vn effort pour la deliurance du Vice-Roy; ils conclurent d'enuoyer des gens par Mer & par terre, pour tascher par tous moyens de se saisir des Vaisseaux. Pour ce mesme effect, ils donnerent Commission de calfeutrer, & de tenir prestes les Barques qui estoient à terre, à Diego Garcia d'Alfaro, Habitant de la Ville des Rois, des mieux entendus en la Marine. Comme il les eut donc appréstées, il s'y mit dedans, avec trente Aquebusiers, & s'en alla coste à bas. Par mesme moyen, on enuoya par terre Dom Iuan de Mendoza, & Ventura Veltran, avec vne autre troupe de

gens: alors les vns & les autres, ayant reconnu que les Nauires auoient mouillé à Gaura, Diego Garcia ne pensa plus qu'aux moyens de les surprendre; Et pour certe fin, se mit de nuit avec ses barques à l'abry d'une Cale qui estoit au Port, fort près des Nauires, sans que neantmoins on le pût voir. Ceux de terre commencerent à tirer, croyant que ce fussent quelques serui-
 •eurs du Vice-Roy, ou d'autres gens qui voulussent s'embarquer. Alors Vela Nuñez ayant ordre de passer à terre dans vne Chaloupe, pour s'informer de ce qui s'y faisoit, ne voulut point se hasarder si auant, mais suiuit la Coste, sans faire aucune descente. Diego Garcia le descouurit cependant, & ses gens à mesme temps firent vne descharge sur luy, par le moyen de laquelle ils le presserent si bien, qu'il fut contraint enfin de se rendre, & la Chaloupe par consequent. Cela fait, ils enuoyerent dire à Cuero ce qui s'y passoit, & que s'il ne leur liuroit la Flotte, ils tueroient, & le Vice-Roy, & son Frere Vela Nuñez: tellement que Cuero, à qui cette menasse donna del' apprehension, liura tout à mesme temps l'Armée Nauale: Ce qu'il fit contre l'aduís de Hierosme Carbano, qui dans vn Vaisseau dont il estoit Capitaine, se mit à la voile, & gagna la terre ferme, Pource que deux iours auant la venuë de Diego Garcia, Cuero luy auoit mandé qu'il eut à nauiguer coste en bas, & à ioindre ensemble avec son Nauire, tous les autres qu'il rencontreroit, de peur qu'ils ne tombassent sous le pouuoir des Auditeurs, ce qui estoit bien à craindre pour eux.

Après qu'on eut amené les Nauires au Port de la Ville, * ces * Des
 Officiers principaux, craignant que les Parens du Facteur ne Rois.
 tuassent le Vice-Roy, trouuerent bon de le faire porter dans vne Isle, qui est à deux lieuës du Port, le mettant; & avec luy, vingt Soldats qui le gardassent, en vne Barque en forme de Bac, que les Indiens appellent *Henea*. Mais comme ils furent bien asseurez qu'on auoit liuré l'Armée de Mer, ils resolerent de l'enuoyer à l'Empereur, avec vne certaine Information qu'ils receurent contre luy, & sous la conduite du Licencié Aluarez, l'un des Auditeurs, qui eut ordre de le mener comme Prisonnier, & auquel ils donnerent huit mille escus de salaire, en attendant les Expéditions necessaires, que le Licencié Carate ne voulut point signer. Aluarez alla par terre, & le Vice-Roy par Mer; en l'une des Barques de Diego Garcia. A son arriuée à Gaura; ils le liure-

rent au Licencié Alvarez, avec trois Nauires, & alors il se mit à la Voile, sans attendre les Expéditions de l'Audience Royale, qui n'estoient pas encore arriuées. Quant au Licencié Vaca de Castro, ils le ramenerent au Port des Rois, d'ans l'un des Nauires qu'ils auoient pris.

Lin. 5.
Ch. 11

Ce que j'ay dit est tiré de Carate, auquel nous nous sommes particulièrement attachés, pour s'estre trouué present, quand le Vice-Roy fut pris: Et bien que les autres Auteurs ne s'esloignent point de la verité de cét euenement, nous ne les auons pas fuiuis neantmoins, pource que nous ne les citons point d'ordinaire, si ce n'est lors qu'ils disent quelque nouueauté, qu'Augustin de Carate a obmise.

*SVCCEZ DEPLORABLES DV VICE-
Roy; Conspiration faite à Rimac, contre les Audi-
teurs; Ce qui en aduint; Et Deliurance
du Vice-Roy.*

CHAPITRE XVI.

Ch 161.

GOMARE ayant rapporté dans son Histoire, bien que confusement, les choses que ie viens de dire, y adiouste les suivantes, qui meritent bien d'estre icy desduites, pour faire voir dans quel comble d'afflictions se trouua pour lors le pauvre Vice-Roy.

Ceux qui le menerent avec dessein de le mettre sur Mer, voyant qu'on ne l'auoit point voulu recevoir en eschange des Nauires, le traicterent fort mal de parole, disant, Qu'il receuoit le iuste salaire des iniustes Ordonnances qu'il auoit apportées, Qu'on l'eut adoré dans le Peru, s'il y fut venu sans elles, & que par cette prise faite du Tyran, leur Pais estoit hors de captiuité: Auec ces reproches & ces outrages, ils le menerēt à Sepeda; & l'ayant desarmé, le mirent entre ses mains, bien que sous la garde du Licencié Niño. Or pource que Blasco Nuñez dormoit dans le mesme liēt de Sepeda, & qu'il mangeoit mesme avec luy, il apprehendoit qu'on ne l'empoisonnast: Ce qui fut cause que la premiere fois qu'il se mit à la table de Sepeda, où

se trouuerent Christophle de Barrientos, Martin de Roblez, le Licencié Niño, & quelques autres personnes considerables, Seigneur Sepeda, luy dit. il, puis ie manger icy en assurance? Considererez ie vous prie que vous estes Cavalier. Sepeda bien estonné de cette demande; Et quoy Monsieur, luy respondit-il, croyez vous que si ie vous voulois iurer, ie ne le püsse faire sans tromperie? Assurez vous que ie ne suis point homme à cela: vostre Seigneurie peut manger avec la mesme securité que Madame Brianda de Acuña (ainsi se nommoit sa Femme) Et pour vous mettre hors de doute, ie veux moy mesme faire l'essay des viandes, comme il le fit aussi, durant tout le temps que le Vice Roy fut en sa Maison.

Il arriva cependant que Frere Gaspar de Caruajal fut trouuer vn iour Blasco Nuñez, auquel il dit, *Qu'il se confessast, & que les Auditeurs le vouloient ainsi*: Le Vice-Roy luy demanda si Sepeda s'estoit trouué present à ce Mandement: A quoy Caruajal respondit, *Que non, & qu'il n'y auoit en que les trois autres Seigneurs*. Nuñez fit à l'instant appeller Sepeda, & se plaignit à luy de ce procedé: mais Sepeda le r'assura de cette crainte, luy declarant que luy seul auoit ce pouuoir là: Ce qu'il disoit, parce qu'ils auoient partagé les Commissions entr'eux. Surquoy Blasco Nuñez se mit à l'embrasser, & le baisa mesme à la iouë, en la presence de Caruajal.

Cette action est rapportée par Gomare, dont ie n'ay aucunement changé les termes, pour monstrier que c'estoit veritablement vne chose deplorable de voir vn homme de cette importance, & qu'on auoit choisy pour Gouverneur d'un si grand Empire, comme celuy du Peru, estre si mal traité par les siens mesmes, & reduit en de si fascheuses extremitez. Frere Gaspar de Caruajal, dont nous venons de parler, estoit celuy mesme, qui tança rudement François d'Orellana, de s'estre reuolté contre Gonçalo Pigarre au Voyage de la Canelle. Il s'arresta depuis en l'Isle de la Trinité, & s'en retourna finalement au Peru, où il racontoit les traux qu'il auoit soufferts en la descouuerte de ces nouuelles Terres.

Il arriva enuiron ce temps-là, à Dom Iuande Mandoça, dont i'ay parlé cy-dessus, Cavalier des Principaux de Cozco, qu'il me souuient d'auoir autresfois cogneu, vne chose si estrange, qu'elle vaut bien que i'en fasse icy mention, pource que possible il n'en est iamais aduenü de semblable. Ce fut qu'au iour d'vne

Feste solennelle, s'exerçant au jeu de Canes, en la place de Mexique, deuant qu'il fut passé encore au Peru, (où il vint depuis avec le fameux Cavalier Dom Pedro d'Aluaro;) Apres que cette sorte de passe-temps eut cessé, & que ces Cavaliers (comme c'est l'ordinaire aux grandes solennitez) en furent venus aux traicts, qu'ils dardoient de part & d'autre, par maniere de galanterie; celuy-cy en voulut de mesme lancer vn, pour faire voir son adresse: Mais pource qu'il ne sceut pas bien prendre son temps, pour le tirer avec plus de force, le cheual sur qui il galoppoit, s'arresta tout court: D'où il aduint que Mendoca, qui auoit la taille haute, le corps gresse, & les iambes foibles, outre qu'il n'estoit pas si bon homme de cheual qu'il se le faisoit accroire, fut porté hors de selle sur le corps du sien, les pieds demeurant engagez dans les estriez; si bien que pour ne donner du nez contre terre, il y fit suppléer ses mains, dont il se soustint, demeurât embarrassé du reste du corps au dessous du poitrail: Accident, à vray dire, si peu commun, & si dangereux, que c'estoit fait de ce Cavalier, sans le secours que luy donnerent ceux qui estoient presens, à plusieurs desquels ie me souuiens d'en auoir ouï faire le recit; Et entr'autres à mon cher Seigneur Garcilasso de la Vega, qui estoit de cette partie: Que si j'ay fait cette digression, vous m'en excuserez bien ie m'aïseure, puis que ç'a esté pour vous diuertir par vn conte si rare. Ie reuiens maintenant à la suite de l'Histoire.

Pendant qu'on detenoit prisonnier le Vice-Roy, dans vne Isle qui estoit à deux lieuës du Port, arriuerent en la Ville des Rois (comme le remarque Augustin de Carate) Dom Alonso de Montemajor, & les autres qui auoient esté avec luy, pour aller prendre le Pere Eoaisa. Les Auditeurs se saisirent d'eux, & en desarmerent vne partie. Cela fait, ils les mirent prisonniers en la Maison du Capitaine Martin de Roblez, & en celle des principaux Habitans, où ils menerent aussi quelques Capitaines du Vice-Roy, & ceux qui estoient venus de Cozco. Comme donc ceux-cy se virent si mal traitez; ils conclurent entr'eux de tuer les Auditeurs, de desliurer le Vice-Roy, & de le retablir en sa dignité: Leur complot fut, qu'à la faueur de la nuit, seroient tirez dans la Maison de Martin de Roblez quelques coups d'Arquebuz: Et qu'alors le Sergent Francois d'Aguirre, (qui avec vn nombre de gens veilloit à la garde du Licencié Se-

Liv. 5.
Ch. 12.

peda) les mettroit à mort; Qu'on donneroit ordre cependant, de faire poser de bons Arquebuziers en toutes les aduenuës de la Place, par où il falloit necessairement que passassent le Docteur Texada, & le Licencié Alvarez, pour aller en la Maison de Sepeda, Qu'aussi-tost qu'ils les verroient arriuer, ils les mettroient à mort, & feroient en mesme temps souleuer la Ville, pour le Party du Roy; Toutes lesquelles choses eussent pû estre faites assez facilement, si vn Habitant de Madrid, à qui l'on auoit donné cognoissance de cette affaire, ne l'eut descouuerte au Licencié Sepeda, vne heure auant la nuit qu'elle deuoit estre executée. Sepeda fit promptement prendre les principaux Chefs de cette Conspiration, qui furent Dom Alonse de Montemajor, Paul de Menezes, Habitant de Talauera, le Capitaine Casserez, Alonse de Barrionueuo, & quelques autres seruiteurs du Vice-Roy. L'on fit informer du fait, pour faire le procez aux Coupables, entre lesquels Alonse de Barrionueuo fut condamné à la mort; Mais on reuqua depuis la sentence, & il eut la main droite coupée, pour auoir esté le principal Autheur de la Mutinerie, qui par ce moyen fut appaisée. Voila ce qu'en dit Carate.

A cecy nous adjousterons que les Auditeurs conuainquirent quantité d'autres personnes, qui trempoient à cette Coniuration, & qui par consequent auoient merité la mort. Mais pour empescher les nouvelles seditions que cette action sanglante pouuoit causer, & pour satisfaire aussi aux instantes prieres des Principaux de la Ville des Rois, on se contenta de condamner Alonse de Barrionueuo, à ce que nous auons dit cy-dessus; & de chasser de la Ville Alonse de Montemajor, qu'ils bannirent avec ses autres Complices en diuerses Contrées du costé du Septentrion. Ces Factieux s'allerent ioinde depuis au Vice-Roy, qu'ils accompagnerent en ses trauaux, dans l'euenement desquels plusieurs d'entr'eux se trouuerent plus en peine que luy. Augustin de Carate ayant raconté cette Conspiration, continué son Histoire, & y adjouste cecy.

Ils faisoient scauoir de iour en iour à Gorgalo Pigarre ce qui s'estoit passé, s'imaginant par-là de le reduire à licencié ses troupes: mais il en estoit bien esleigné, pource qu'il enuoit que tout ce qu'on racontoit de cette Prison de B'asco Nuñez, n'estoit qu'un faux bruit qu'on inuenoit à dessein, pour

* de Gô-
çalo Pi-
garre.

faire dissiper son * Armée, afin de le prendre, & de le chastier quand il seroit seul; Ce qui l'obligeoit à se tenir plus fort sur ses gardes, & à marcher tousiours en ordonnance, avec plus de retenuë qu' auparauant.

Ces choses s'estant ainsi passées, le mesme iour que le Licencié Aluarez se mit à la Voile, pour conduire le Vice-Roy, & son Frere, il s'en alla dans sa Chambre, pour se reconcilier avec luy, touchant les choses passées; Car il en auoit esté le principal Auteur, & celuy de tous qui s'estoit porté plus ardamment à le faire prendre, & à chastier tous ceux qu'il vouloit restablir en son Gouvernement, en les tirant de captiuité. Il l'assura d'abord, Qu'il ne s'estoit chargé de luy, qu'avec dessein de le mieux seruir, en le desliurant des mains du Licencié Sepeda, pour empescher qu'il ne tombast en celles de Gonzalo Pigarte, qu'on attendoit tous les iours; Que pour l'obliger à ne point douter d'une chose si veritable, il le mettoit en liberté, & le Nauire en sa puissance: qu'il ne vouloit desormais dependre que de luy; qu'il le supplioit de luy pardonner les fautes passées; qu'il n'auoit consenty à son emprisonnement, ny aux autres choses qui s'en estoient ensuiuies, que pour mieux luy assurer la vie, & moyenner sa desliurance, par où il croyoit d'auoir réparé le blâme qu'on luy pouuoit imputer. En suite dequoy, il commanda aux dix Soldats qu'on luy auoit donnez pour la garde du Vice-Roy, qu'ils eussent à faire ponctuellement ce qu'il leur diroit.

Le Vice Roy luy sceut bon gré de cette offre, qu'il accepta tres-volontiers, se saisissant du Nauire, & des Armes qui estoient dedans: Il ne laissa pas pourtant de le gourmander depuis, l'appellant Vaut rien, Boute feu, Seditieux, iusques-là mesme, qu'apres plusieurs autres choses semblables, il luy iura qu'il l'en-uoyerôit au gibet, & que s'il ne le faisoit à l'heure, c'estoit pour le grand besoin qu'il auoit de luy. Ce mauuais traitement dura tant qu'ils furent ensemble. Ainsi ils nauiguerent coste en bas, iusques à la Ville de Truxillo, où leur arriva ce que nous dirons cy-apres. *Tout cecy est de Carate, qui continuë de cette sorte.*

REQUESTE DES AUDITEURS À GON-
galo Piçarre; Et Succès infortuné de ceux
qui l'abandonnerent.

CHAPITRE XVII.

A PRES que le Licencié Alvarez se fût mis à la Voile, on se douta dans la Ville des Rois qu'il estoit d'intelligence avec le Vice-Roy, tant pour en auoir donné quelques indices auant son Embarquement, que pour estre party sans attendre les Expéditions des Auditeurs, qu'ils auoient différées, à raison de l'absence du Licencié Carate, & que mesme ils deuoient enuoyer le iour d'apres. Ce qui les fascha d'autant plus, qu'ils estoient certains qu'Alvarez auoit parlé le premier de faire prendre le Vice-Roy, & que pas vn d'eux ne s'estoit porté plus ardemment que luy à l'execution de cette Entreprise.

Tandis qu'ils attendoient des nouuelles certaines du succez de cette affaire, ils trouuerent à propos d'aduertir Gonçalo Piçarre de ce qui s'estoit passé. Ils luy remontrerent le pouuoir qu'il leur estoit donné par les Patentes du Roy: qu'ils estoient là venus au nom de sa Maiefté, pour apporter l'ordre necessaire à l'administration de la Iustice, & au bon Gouvernement du Pais: qu'ils auoient suspendu l'execution des Ordonnances, entheriné la Requête à eux présentée par les Communautez, & renuoyé en Espagne le Vice-Roy Blasco Nuñez. D'ou ils coneluoiert, qu'ils auoient plus fait qu'on n'esperoit d'eux, pour pacifier les troubles du Peru; Et partant, qu'ils luy enioignoient de licencier ses gens de Guerre au plustost, & de ne mener aucunes troupes en la Ville des Rois, en cas qu'il s'y voulut acheminer, bien que toutesfois on luy permit d'auoir avec luy iusques à vingt Cavaliers, pour la seureté de sa personne.

Les Auditeurs ayant expédié ces Lettres de Mandement, les voulurent enuoyer à Piçarre, par quelques Habitans, qu'ils deputerent exprés, pour les luy rendre, quelque part qu'ils le rencontraissent en chemin. Mais il ne se trouua personne qui se voulut charger de ceste Commission, tant pour le danger qu'il

" yauoit, qu'à cause du blasme que Gonçalo Pigarre & ses Capitai-
 " nes, pouuoient donner à tels Messagers, en leur reprochant,
 " qu'avec peu de raison ils se declaroient leurs Ennemis, sans con-
 " siderer qu'ils ne venoient-là que pour la defense de leurs biens, &
 " de leurs personnes. D'où il s'ensuiuit, que les Auditeurs demeu-
 " rerent d'accord, d'enuoyer à cette Commission Augustin de Ca-
 " rate, Tresorier general du Royaume, & de luy donner pour Ad-
 " joint, Dom Anthoine de Ribera, l'un des principaux Habitans
 " de la Ville des Rois. Apres auoir donc receu les Expeditions, &
 " des Lettres de creance particulieres, ils se mirent en chemin, &
 " arriuerent en la Vallée de Xauxa, où estoit alors l'Armée de
 " Gonçalo Pigarre. Or cōme il sçauoit desia qu'on luy deuoit en-
 " uoyer des Deputez, il apprehendoit que ses gens ne se mutinas-
 " sent, si cela venoit à leur connoissance, pour l'extrême desir
 " qu'ils auoient d'aller en corps d'Armée droit à la Ville de Lima,
 " qu'ils pretendoient saccager, quoy qu'il en arriuaist. Ce qui fut
 " cause que pour preuenir ce desordre, Gonçalo s'aduifa d'en-
 " uoyer sur le chemin par où venoient ces Deputez, Hierosme de
 " Villegas, avec quelques trente Carrabins. Il les rencontra tous
 " deux; & laissant aller au Camp Anthoine de Ribera, se saist
 " d'Augustin de Carate, auquel il osta les Expeditions qu'il por-
 " toit, puis le ramena par le chemin par où il estoit venu, iusques
 " à la Prouince de Pariacaca. Il l'y garda Prisonnier dix iours tous
 " entiers, durant lesquels ses Soldats tascherent de luy donner
 " toutes les apprehensions imaginables, afin qu'il se desistast de
 " son Ambassade; Et ainsi il ne bougea de là, iusques à l'Arrivée
 " de Gonçalo Pigarre, & de son Armée. *Ce sont les Paroles d'Augu-
 " stin de Carate.*

Les Communantez de la Ville des Rois, nommerent à cette
 Commission Dom Anthoine de Ribera, & le Tresorier Augu-
 stin de Carate, pour n'en auoir point trouué de plus propres, ny
 qui deussent estre moins suspects à Gonçalo Pigarre: Car outre
 que Dom Anthoine estoit comme son Beau-frere, pour auoir
 espousé la vefue de François Martin d'Alcantata, Frere du Mar-
 quis Dom François Pigarre; il se rencontroit de plus, qu'Augu-
 stin de Carate estoit des nouveaux venus dans le País: si bien
 qu'il n'auoit encore donné ses inclinations, ny à l'un, ny à l'au-
 tre Parrv. A raison dequoy, le Capitaine Hierosme de Villegas,
 laissa passer Dom Anthoine de Ribera, pour estre Allié de Pi-

garre, & retint Prisonnier le Tresorier Augustin de Carate.

Diego Fernandez Palentin ayant dit le mesme, y adjouste, Ch. 24.

Qu'au Conseil de Guerre que Gonçalo Pizarre, & ses Capitaines, tinrent ensemble, pour respondre à l'Ambassade des Deputez des Auditeurs, on ne fit point d'autre response que ce qui fut dit alors par François de Carvajal, grand Soldat, & digne Mestre de Camp: Que Messieurs les Auditeurs auoient quelque raison de dire qu'il ne falloit pas que Gonçalo Pizarre entrast dans la Ville des Rois avec plus de 15. ou 20. hommes, mais que cela se deuoit entendre de 15. ou 20. par chaque file: Paroles qui furent appuyées de cette Response generale des Capitaines: Qu'il importoit au bien du Public d'eslire pour Gouverneur Gonçalo Pizarre, & qu'ainsi les Auditeurs auroient ce qu'ils demandoient, ou qu'en cas d'opposition, l'on mettroit la Ville à feu & à sang, apres l'auoir succagée.

Cependant Gabriel de Royas, Garcilasso de la Vega, & les autres Principaux de Cozco, qui auoient quitté Gonçalo Pizarre, s'acheminèrent par Arequepa; Et ne pouuant aller par la Mer, prirent le bas de la Coste. Mais quand ils furent arrivez à la Ville des Rois, ils se creurent tous perdus, pource qu'ils trouuerent que le Vice-Roy qu'ils alloient seruir, estoit desia pris, & embarqué pour retourner en Espagne. Voyant donc que les Auditeurs s'estoient saisis de luy; ils ne voulurent point aller à eux, pour estre vray semblable par cette prise, qu'ils auoient plus d'inclination pour Gonçalo Pizarre, que pour Blasco Nuñez Vela.

Mais apres tout, quelque chose que les Mesdisans pussent dire, il est veritable que l'intention des Auditeurs ne fut jamais autre que d'empescher de nouueaux scandales, & de plus grands maux que les precedens; comme il fut aduenu, si pour satisfaire la haine qu'auoient pour le Vice Roy, tous ceux qui se sentoient interessez en leurs biens, par les Ordonnances qu'il vouloit mettre à execution; ils se fussent portez à luy oster la vie, & à tremper inhumainement leurs mains dans son sang. Ces Caualliers donc ayant consideré tout cecy, ne voulurent point se declarer pour les Auditeurs, de peur qu'on n'eut eueu par là qu'ils estoient du Party de Gonçalo Pizarre; Et ainsi n'y ayant personne qui osast se descouurir du costé du Roy, ils se trouuerent assiegez par leurs Ennemis, sans pouuoir s'esloigner d'eux par Mer, ny par Terre; pource qu'apres qu'on eut pris le Vice-Roy, tous

ceux de son Party se mirent à suivre Gonçalo Piçarre. Cela fut cause que ces Fuyards ne sçachant pas où se retirer, demeurèrent la plus-part en la Ville des Rois, où ils se tenoient cachez dans les Maisons de leurs Amis & de leurs Compagnons: Car comme ils auoient esté tous Camarades en la Conqueste de cér Empire, aussi se donnoient-ils vne mutuelle assistance. Ceux qui ne voulurent point demeurer dans la Ville, s'enfuirent le plus loing qu'ils pûrent, cherchât vn Azile parmy les Indiens: Comme en effet ils y en trouuerent vn, & se sauuerent du danger qui les menaçoit, au lieu que les autres faillirent tous à perdre la vie; & quelques-vns mesme la perdirent. Louys de Ribera, & Anthoine Aluarez coururent tous deux mesme Fortune, avec 24. ou 25. autres Cavaliers, Habitans de la Ville de Plara; Sa distance de trois cens lieues iusques à celle des Rois, ne les auoit point empeschez de venir de si loing pour seruir le Vice-Roy; Mais le mal-heur voulut pour eux, qu'apres plusieurs travaux endurez le long du chemin, qu'ils prenoient par les sentiers les plus destournez, pour s'exempter de la rencontre de Gonçalo Piçarre, & de ses gens; comme ils furent arriuez près de la Ville des Rois, ils sceurent que le Vice-Roy estoit pris, & embarqué sur la Mer, tellement que par vne si mauuaise nouuelle ils se creurent tous abandonnez & perdus.

Ils n'oserent pas entrer dans la Ville, pource qu'il leur sembla, que tout le Païs tenoit pour Gonçalo Piçarre, & qu'il n'y auoit aucune apparence de s'aller ierrer dans les pieges de leurs Ennemis: Ainsi chacun d'eux s'alla cacher, où il crût pouoir trouuer plus de seureté. Ce que firent encore plusieurs autres Cavaliers, qui estoient espars dans le Païs, apres y estre venus pour seruir le Roy, sous le Gouvernement de Blasco Nuñez. Mais quand ils sceurent qu'il estoit pris, ils firent retraite en diuers lieux escartez; iusques-là mesme que quelques-vns ne se tenant pas bien assurez dans le Peru, s'en allerent aux Montagnes des Antis, où ils moururent miserablement de faim, & deuinrent la proye des Tygres. Il y en eut d'autres aussi, qui pour s'estre refugiez dans les terres des Indiens, qu'ils n'auoient pas encore conquises, furent taillez en pieces par ces Inhumains, & sacrifiez à leurs Idoles. D'où l'on peut voir, ce me semble, qu'il falloit bien que la peur qu'ils auoient de mourir de la main de leurs Ennemis fût extrêmement grande, puis

qu'elle les faisoit retirer parmy ces Barbares, & dans les Forts des Bestes sauvages, se promettant qu'ils y trouueroiènt moins de cruauté qu'entre les Tyrans, qui sont en effet plus cruels que les vns & les autres. Mais apres tout, le mauuais Destin du Vice-Roy, & l'excez de son iniuste Colere, furent cause de tous ces malheurs: Car s'il eut eu plus de moderation & de retenüe, il ne fut iamais tombé dans les pieges de ceux qui le prirent. La raison est, d'autant qu'il se fut veu enuironné des gens de secours dont nous venons de parler, qui se pouuoient nommer à bon droit l'eslire de Cozco & des Charcas, pour n'estre pas moins considerables pour leur Extraction, & leurs Richesses, que pour leur grande puissance: de sorte que le Vice-Roy ne se perdit pas seulement soy-mesme, mais encore ceux cy, qui se virent tous reduits à la mercy des gens de Guerre leurs Ennemis, & aux cruantez estranges qu'ils executerent contr'eux.

GONCALO PICARRE ARRIVE PREZ
de la Ville des Rois, où le Deslay des Auditeurs à le
nommer pour Gouverneur, cause la mort à quel-
ques-uns des principaux Habitans.

CHAPITRE XVIII.

GONCALO Picarre ayant pris sa marche droit à la Ville des Rois, ne pût faire avec son Armée que de petites iournées, à cause de l'embaras de l'Artillerie, qu'on ne pouuoit transporter qu'avec d'estranges difficultez, & vne peine incroyable. Mais enfin il arriua dans la Prouince vulgairement appellée *Pariacaca*, où Augustin de Carate estoit detenu Prisonnier de Guerre. Il l'enuoya donc querir, pour sçauoir de luy quel sujet l'auoit amené là, comme il le raconte luy-mesme en ces termes. Or d'autant qu'on auoit aduisé Carate, qu'il courroit Fortune de sa vie, s'il luy aduenoit de parler des Lettres de Mandement, expédiées par les Auditeurs; apres auoir tiré à part Goncalo Picarre, pour l'entretenir de sa Commission; il fut mené par luy dans vne Tente, où tous ses Capitaines estoient assemblez. Alors Picarre luy commanda de leur dire à tous les memes choses.

" qu'il luy auoit communiquées : par où Carate comprenant son
 " intention, leur descourrit de la part des Auditeurs, quelques
 " particularitez qui regardoient le seruice du Roy, & le comman
 " bien de tout le País. Il y adiousta, Que l'ordre de sa Commis
 " sion portoit de leur dire, Que puis que le Vice-Roy estoit em
 " barqué, & l'execution des Ordonnances surfise, Qu'ils eussent
 " à rembourcer sa Maiesté de la despense que le mesme Vice-Roy
 " Blasco N.ñez Vela luy auoit faite, comme ils s'y estoient offerts
 " par leurs Lettres; Qu'avec cela, ils donnassent vne Abolition
 " aux principaux Habitans de Cozco, qui du Camp de Gonçalo
 " estoient passez au seruice du Vice-Roy, ayant eu iuste sujet de
 " le faire: Et qu'ils enuoyassent des Deputez à sa Maiesté, pour se
 " iustifier des choses aduenües, & de toutes les autres de cette na
 " ture: là A quoy l'Assemblée ne fit point d'autre responce, sinon,
 " Que le bien du País vouloit qu'on en fit Gouverneur Pigatte, &
 " que ce faisant on mettroit ordre à toutes les choses que les Au
 " diteurs demandoient, autrement qu'on donneroit la Ville au
 " pillage.

" Avecque cette Responce, Carate s'en retourna vers les Audi
 " teurs, apres auoir balancé long temps, s'il leur deuoit porter
 " vne si rude parole. Il leur facha grandement d'ouir vne si ma
 " nifeste Declaration du dessein de Pigatte, qui ne leur auoit point
 " dit iusques alors, qu'il pretendit autre chose, sinon que le Vi
 " ce-Roy s'en retournaist en Espagne, apres qu'on auroit surfis les
 " Ordonnances. A quoy les Capitaines adiousterent; Qu'ils
 " auoient forr bien ouy ce qu'on leur demandoit, mais qu'ils ne
 " pouuoient y consentir en aucune sorte, s'ils ne faisoient paroi
 " stre par escrire, qui estoit l'Autheur de cette demande, suiuant la
 " forme des Requestes ordinaires. Ce que tous les Procureurs des
 " Prouinces qui venoient au Camp, n'eurent pas plustost secü, que
 " se joignant aux Deputez des autres Villes, qui estoient en celle
 " des Rois, ils presenterent Requeste aux Officiers del'Audience
 " Royale, pour auoir communication par escrire de ce dont ils
 " auoient fait porter parole: Mais cela sembla trop dangereux aux
 " Auditeurs, pour n'auoir alors ny Commission, ny mesme loisir
 " de le faire, en vn temps où Gonçalo Pigatte estoit si près de leur
 " Ville, qu'il en tenoit tous les Passages, & toutes les Aduenües,
 " n'estant pas possible de sortir, sans estre à mesme temps arresté.
 " A raison dequoy, ils resolerent de communiquer l'affaire aux

Principaux de la Ville, & d'apprendre leur aduis là-dessus. "Après cela, ils firent vn Accord ensemble, qu'ils voulurent estre "monstré à Dom Frere Hierosime de Loaisa, Archeuesque de la "Ville des Rois, à Dom Frere Iean Solano, Archeuesque de "Cozco, à Dom Garcia Dias, Euesque de Quitu, à Frere Tho- "mas de S. Martin, Prouincial des Iacobins, à Augustin de Cara- "re, & au Tresorier & Controolleur general des Finances de sa "Maiesté. En quoy leur principale intention fut, qu'ils eussent à "bien examiner ce que demandoient les Procureurs du Royau- "me; Qu'au reste ils considerassent meurement leurs raisons, en "vne chose qu'il leur communiquoit franchement, non pour sui- "uire leur conseil, ny pour le negliger aussi, puis que l'un ny l'au- "tre ne pouuoient empescher qu'ils ne fussent reduits enfin à faire "ce que Gonçalo Pigarre, & ses Capitaines leur demandoient; "mais bien pour estre tesmoins de l'oppression, & de la violence "qu'on leur faisoit.

Pendant qu'ils traittoient de cette affaire, Gonçalo Pigarre "vint camper à vn quart de lieuë de la Ville des Rois, contre la- "quelle il dressa ses batteries: Mais comme il vid qu'on ne se ha- "stoit point de luy donner ses Expéditions touchant le Gouver- "nement, il enuoya son Mestre de Camp, avec trente Arquebu- "siers. Il se saisit d'abord de 28. hommes, & de quelques autres "qui auoient appuyé le Party du Vice-Roy. Les Principaux "estoint, Gabriel de Royas, Garcilasso de la Vega. Melchior "Verdugo, le Licencié Caruajal, Pedro de Barco, Martin de "Florence, Alonso de Casserez, Pedro de Maniarrez, Louis de "Leon, & Anthoine Ruis de Gueuare, sans y en comprendre "d'autres des plus qualifiez du Pais. Il les mit dans la Prison pu- "blique, deposant le Iuge de son Authorité propre. Il en prit mes- "me les clefs, sans qu'il se trouuast personne qui l'en empeschast, " & sans que les Auditeurs mesme le contredissent. Aussi n'y euf- "sent-ils rien gaigné; n'y ayant alors dans toute la Ville qu'enui- "ron cinquante hommes de guerre, pource que tous les Soldats, "tant du Vice-Roy que des Auditeurs, s'en estoient allez au "Camp de Gonçalo Pigarre; si bien qu'avec ceux-cy & les au- "tres, il auoit douze cens hommes, tous lestes & bien armez.

Le lendemain matin, quelques Capitaines de Gonçalo Pi- "garre s'en allerent à la Ville, & dirent aux Auditeurs, qu'ils euf- "sent à leur liurer les Expéditions qu'ils demandoient; sinon

qu'ils mettroient la Ville à feu, & à sang; & qu'ils commenceroient par eux ce massacre.

Les Auditeurs s'excuserent le mieux qu'ils purent, disant, qu'ils n'auoient pas le pouuoir de le faire. Ce qui fut cause qu'en leur presence, le Mestre de Camp Caruajal, tira de prison quatre de ceux qu'il y auoit mis, trois desquels, à sçauoir Pedro de Barco, Martin de Florence, & Iean de Saavedra, furent pendus par son ordre, en vn arbre qui estoit près de la Ville. Vn peu auant cette execution, il leur dit quantité de choses par raillerie, se vantant de ce qu'en ces dernieres approches de la mort, il ne leur donnoit point à tous trois vne petite demy-heure de temps, pour se confesser, & mettre leurs Ames en bon estat. Mais il se moqua particulièrement de Pedro de Barco, qui fut le dernier des trois qu'il fit pendre: Car il luy dit, qu'à cause qu'il auoit esté Capitaine, homme de marque, Conquerant, & des plus riches du País; il luy vouloit donner en sa mort vne prerogative bien haute, qui estoit de choisir celle des branches de l'arbre qui luy agreeroit le plus, pour y estre pendu. Mais quant au quatriesme, qui estoit Louis de Leon, il luy sauua la vie, pource qu'elle luy fut demandée par vn Soldat qui s'en alloit seruir Gonzalo Pigarre, joint qu'il estoit Frere du mesme Leon: ce qui l'obligea de luy faire grace.

Les Auditeurs ayant veu cecy, & que le Mestre de Camp les menassoit, s'ils ne bailloient promptement les Lettres de Prouision à Gonzalo Pigarre, de faire pendre les autres Prisonniers, & de donner aux Soldats la Ville au pillage, enuoyerent à ceux ausquels ils auoient communiqué l'affaire, qu'ils eussent à opiner là-dessus. Ils donnerent les mains aussi tost, & demourerent d'accord de ce que Pigarre pretendoit: Les Auditeurs conclurent donc, que Gonzalo Pigarre auroit le Gouvernement de cette Prouince, en attendant que sa Maiesté eut pourueu autrement; Qu'il reconnoistroit l'Audience Royale, obeissant aux chose qui de la part de sa Maiesté luy seroient eniointes par les Auditeurs; Qu'il feroit sa residence dans la Ville, & rendroit Iustice à ceux qui la luy demanderoient, quand ils seroient mal-traittez.

Les paroles d'Augustin de Carate s'estendent insques icy, où nous desduirons sommairement ce qu'il y adiouste, afin de ne nous rendre ennuyeux dans le Chapitre suiuant.

GONCALO

GONCALO PICARRE NOMME GOV-
 ernerneur du Peru, fait son Entrée en la Ville des Rois,
 Mort du Capitaine Gumiel, & Liberté donnée aux
 principaux Habitans de Cozco.

CHAPITRE XIX.

LA Mort de Pedro de Barco, de Martin de Florence, & de
 Jean de Saavedra, causa d'estranges desordres en la Ville
 des Rois, & dans l'Armée de Gonçalo Picarte; pource, comme
 dit Diego Fernandez Palentin, *Qu'on apprehenda deslors que*
François de Caruajal, ne fit mourir ceux qu'il auoit desja pris, &
en suite tous les autres qu'apparemment il deuoit prendre. Sur cette
 apprehension, plusieurs des Principaux de Rimac, & mesme diuers
 Capitaines & Soldats de son Armée, le surent prier de ne point souffrir
 qu'on mit à mort tant de braves gens, qui luy auoient seruy de seconds
 en la Conqueste de cét Empire; & de vouloir considerer, qu'apres qu'il
 leur auroit fait oster la vie, toutes les raisons qu'il pourroit mettre en
 auant pour iustifier cette action, n'empescheroient pas. qu'il ne se rendis
 odieux à tout le monde. Gonçalo Picarte les ayant ouïs, ne les vou-
 lut point contredire; & touché de compassion, à laquelle il
 estoit naturellement enclin, donna tout à mesme temps vne
 Medaille fort riche, & vne Bague assez conuüe, qu'il enuoya
 pour Enseignes à François de Caruajal, afin qu'il se desistast de
 ses sanglantes executions.

Je rapporteray à ce propos, sur le sujet de celles qu'il auoit
 desja faites, que ie me souuiens d'auoir souuent oüy dire à
 plusieurs de ceux qui s'y estoient trouuez presens; Que l'in-
 tention de Gonçalo Picarte ne fut iamais que son Mestre de
 Camp, fit mourir aucun des Habitans de la Ville des Rois, &
 qu'en l'enuoyant en la mesme Ville, il luy dit expressément ces
 paroles, *Ayez soing d'appaiser ces gens, entendant par là ceux*
qui s'en estoient fuis, afin que nostre venue ne leur soit point inutile.
 Ce qui fit que Caruajal iugeant aussi tost de quelles personnes
 il entendoit parler; Laissez moy faire, luy respondit-il, Je pro-
 mets à vostre Seigneurie, qu'en peu de temps ie les mettray en estat de

vous recevoir dans le grand chemin. D'où il s'ensuiuit depuis, que pour s'acquitter de cette promesse par les rigueurs de la Guerre, où il portoit les affaires sans remission, il fit pendre les plus Riches, & les plus Puissans de la Ville, sur le mesme chemin, par où Gonçalo Pigarre deuoit faire son entrée: Il voulut monstrier par là, Que ce qu'il en faisoit, estoit afin qu'ainsi esleuez, ils fussent presens à la reception; & que non seulement les Auditours, mais tous les Bourgeois, espouuentez de cét Acte ettagique, ne tardassent point dauantage à le pouruoit du Gouvernement, pour satisfaire au desir de tous les Procureurs du Royaume.

Gonçalo Pigarre ayant appris la mort violente de ces trois Caualliers, en eut vn extrême deplaisir. A quoy neantmoins ne pouuant point remedier autrement, il commanda qu'auant qu'il arriuaist iusques à eux, on eut à les destacher de l'arbre où ils auoient esté pendus, disant, *Qu'il ne vouloit point les voir à un Gibet, puis qu'il n'auoit iamais commandé, ny misme desiré qu'ils y fussent mis.*

Ch. 15. Cependant si les Lettres patentes du gouuernement du Peru ostroyées à Gonçalo Pigarre, furent tres-agreables à ses Soldats; elles ne le furent pas moins à ceux de la Ville: Car comme se remarque Diego Fernandez, *Il leur sembloit à tous generalement, que telle promotion estoit absolument necessaire au commun repos de cet Empire-là; Ce qui leur faisoit dire, qu'indubitablement sa Maesté se stabliroit dans cette Charge eminente, tant pour les seruices du Marquis son Frere, que pour plusieurs autres considerations, qu'ils alleguoient en faueur & à la louange de Gonçalo Pigarre. Comme en effet, en la conioncture presente, & dans l'apparence du bon succés des affaires, il commençoit desia de regner dans les volontez des Peuples, & ce doux nom de Liberté, dont ils se flattoient sous son Gouvernement futur, faisoit qu'ils luy donnoient leurs affections toutes entieres; A quoy contribuoit encore beaucoup l'aersion qu'ils auoient pour le Vice-Roy, se considerant comme vne personne odieuse à tout le public, pour n'estre attachée qu'à ses interets propres.*

Ch. 15. Apres auoir receu les Lettres de Promission de ceux de la Ville des Rois, Gonçalo Pigarre y fit son entrée solempnellement, comme le rapporte Augustin de Carate par ces paroles expresses. Ses gens de Guerre se tenant sous les Armes, furent comme rangez en bataille. Le-Capitaine Bachicao menoit l'Auant-garde, avec 22. Canons, que plus de six mille Indiens portoient

sur leurs espaules, de la façon que j'ay dit ailleurs, sans y com-
prendre les munitions, ny tout le reste de l'attirail qu'on esla-
loit par les rues.

Il y auoit de plus trente Arquebuziers pour la garde de l'Ar-
tillerie, & cinquante Canoniers, suivis des Compagnies des
Capitaines Diego de Guniel de Gueuare, & de Pedro Cer-
meño, dont la premiere estoit de deux cens Picquiers, la secon-
de de cent cinquante Arquebuziers, & la troisieme de deux
cens. Ces trois Compagnies d'Infanterie, estoient comme
gardes de Gongalo Pigarre, qui marchoit apres elles, monté sur
un fort beau Courcier, & n'ayant pour toutes Armes qu'une
Cotte de maille, couuverte d'une riche Casaque de Brocatel.
Trois Capitaines de Cavalerie le suivoient, parmy lesquels
estoit remarquable Dom Pedro Puerto Carrero, qui tenoit le
milieu entre eux, & portoit la Cornette Royale. A main droite
marchoit Anthoine Altamirano, avec l'Estandart de Cusco.
A gauche Pedro de Puellez, portant pour Guidon les Armes de
Gongalo Pigarre; & en queue, tout ce qui restoit de gens de
cheval, armez comme s'ils eussent voulu combattre.

Avec cet Ordre, le nouveau Gouverneur s'en alla droit au lo-
gis du Licencié Carate, où estoient assemblez avec luy les au-
tres Auditeurs, qui auoient fait les malades pour ne l'aller rece-
voir à l'Audiance. Comme il eut donc laissé sous les Armes
son Escadron en la grande Place, il monta où estoient ces Offi-
ciers, desquels il fut accusilly avec grand honneur; prenant
d'eux les seuretez accoustumées, & le serment de fidelité. De-là
il passa outre en la Maison de Ville, où estoient en Corps les
Magistrats, qui le receurent avec les ceremonies en tel cas re-
quises. Cela fait, il se retira en son logis, tandis que son Mestre
de Camp assigna quartier aux gens de cheval, & de pied, qu'il
mit dans les Maisons des Bourgeois, avec ordre exprès qu'ils
eussent à leur fournir des provisions & des viures.

Après cette reception, & cette Entrée, qui se fit vers la fin du
mois d'Octobre, l'an 1541. cinq semaines, ou environ après
l'Emprisonnement du Vice-Roy, Gongalo Pigarre tourna tou-
tes ses pensées aux affaires de la Guerre, & aux choses qui en de-
pendoient. Sans se mesler aucunement du fait de la Justice, dont
il laissa l'administration aux Auditeurs, qui tenoient leur Au-
diance dans la Maison du Tresorier Alonso Riquelme. En suite

dequoy il enuoya Alonso de Toro pour son Lieutenant à Cuzco, Pedro de Fuentes à Arequepa; François d'Almendras à la Ville de la Plata, & plusieurs autres Officiers en diuers lieux du País.

Ce que ie viens de dire est d'Augustin de Carate, A quoy Diego Fernandez Palentin adiouste; Que Diego Centeno, ayant suiuy Gonçalo Pigarre iusques à la Ville des Rois, en qualité de Procureur de la Ville de Plata; comme il vid qu'il s'en alloit pouruoir de la Charge d'Intendant de Iustice, François d'Almendras, que le mesme Centeno tenoit pour vn de ses meilleurs Amis; il le pria de faire en sorte enuers Gonçalo Pigarre, qu'il l'enuoyast avec luy en la Ville de la Plata, où Centeno auoit son Département d'Indiens: Comme en effect, François d'Almendras l'obtint ainsi de Pigarre; Mais ce fut à son plus grand malheur, pource que Centeno l'ayant mené depuis aux Charcas, le tua miserablement, apres qu'il se fut rangé dans le Party de sa Maisté; Adion, à vray dire, que le seruice du Roy ne pût exempter du blasme d'ingratitude; car Diego Centeno ne pouuoit nier; qu'en toute la Conqueste de cét Empire, où il auoit porté les armes fort ieune; François d'Almendras, homme riche, & des principaux du país, ne l'eut tousiours assisté en toutes ses incommoditez, & ses maladies, dont il en auoit eu de bien grandes; le traitant comme son propre Enfant; de telle sorte, que Diego Centeno luy rendoit vne reconnoissance publique de ses bien-faits, iusques-là mesme, qu'en particulier, il le nommoit son Pere, & François d'Almendras l'appelloit son Fils, Apres lesquelles choses, il ne faloit pas s'estonner, si en l'angoit de l'ingratitude de la plus noire qui fût iamais, de luy auoir si miserablement osté la vie: Avec tout cela neantmoins, le seruice qu'il creut deuoir à son Prince, & au bien public, l'emporta sur toutes les obligations qu'il auoit à son Bien faicteur.

Gonçalo Pigarre, se voyant gouuerneur de cét Empire, & par l'escrie qu'il en auoit du Marquis son Frere, & par la nomination que les Auditeurs auoient faite de luy; crea Capitaines, & Officiers de Iustice. ceux dont nous auons parlé cy-deuant. Il pourueut de plus par voye d'Audience, à l'expedition des affaires publiques, dont il s'acquitta fort dignement, & ne s'acquist pas moins de credit que d'estime, pour le soin qu'il eut de faire administrer la Iustice, au commun contentement de tous ceux qui la demandoient. A tant de bons succez neantmoins, dont toute la

Ville estoit satisfaite, ne laisserent pas de s'entremesler quel-
 ques mescontentemens particuliers. Car le Capitaine Diego
 Gumiel, ayant esté iusqu'à lors passionnement attaché au serui-
 ce de Gongalo Pigarre, l'abandonna tout à coup, & en mesdit
 mesme tout haut, pour n'auoir pû obtenir de luy vn Départe-
 ment d'Indiens, qu'il luy auoit demandé pour vn des ses Amis. Il
 se porta de plus à faire de mauuais contes des Auditeurs, disant
 qu'il auoient osté le gouuernement du Peru, au Fils du Marquis
 Dom François Pigarre, à qui son pere l'auoit laissé comme he-
 reditaire, & où sa Maiesté mesme l'auoit confirmé par vn Bre-
 uet; qu'ils estoient grandement à blasmer de l'auoir donné à vn
 homme auquel il n'appartenoit nullement, & qu'il ne tiendrait
 pas à luy qu'en cette cause il ne fit toute sorte d'efforts pour y
 establir le Fils du Marquis. Ces langages, & autres semblables,
 eschappoient ordinairement à Diego Gumiel, avec si peu de
 discretion, qu'il ne considéroit nullement, ny à qui il les tenoit,
 ny combien iniurieux en estoient les termes. D'où il s'ensuiuit,
 qu'estant venus iusques aux oreilles de Gongalo Pigarre; ils fu-
 rent cause qu'ayant mandé son Mestre de Camp, il luy donna
 charge de s'en enquerir plus particulièrement, d'estouffer ce
 bruit dans le silence, & de mettre à la raison ce Capitaine, qui
 n'en auoit aueune: Ce qu'il luy dit neantmoins, sans aucun des-
 sein qu'il attentast à sa vie. Mais comme François de Caruajal
 n'auoit pas besoin d'esperons, pour s'inciter à de semblables
 choses, ayant scen l'affaire au vray, & considéré l'extrême ef-
 fronterie du Capitaine Gumiel; sans marchander dauantage, il
 s'en alla droit à sa Maison, où il le fit estrangler; puis l'exposant
 en la place publique. *Messieurs*, dit il aux assistans, *voilà le Sei-*
gneur Capitaine Diego Gumiel, que ie vous liure, pour en disposer com-
me vous voudrez; car pour moy, i'ay juré de ne luy faire auire chose;
 Et voilà comme ce pauvre Malheureux perdit la vie par son trop
 de babil, qui a tousiours esté nuisible à ceux qu'il a maistrisez.

RESIOVYSSANCE DES PICARRES,
*suiuie d'une Abolition generale, donnée aux Fuyards;
 & particulièrement à Garcilasso de la Vega.*

CHAPITRE XX.

GONÇALO Pizarre, & ses Capitaines, ayant à rendre publique la secrete ioye qu'ils auoient d'estre Seigneurs du Peru, se mirent à faire plusieurs Festes solennelles, par des courses de Taureaux, des ieux de Cannes, & des Combats à la barriere, où les vns furent raillez diuersement, & les autres piquez iusques au vif; de traiçts Satiriques, dont i'en pourrois bien rapporter icy quelques-vns, si ie ne iugeois plus à propos de les passer sous silence.

Pour vne marque de cette ioye vniuerselle, Pizarre fit mettre en liberté tous les Caualliers Habitans de Cozco, qui s'en estoient fuis d'auec luy, au sortir de cette Ville, & que le Mestre de Camp Caruajal auoit faits prisonniers, comme il a esté dit cy-deuant. Auec cela, il ostroya vne Abolition generale à tous ceux qui nes'estoient point ioints auec luy, à la reserve du Licencié Caruajal, qui se disant son Amy, l'auoit neantmoins abandonné, & pareillement de Garcilasso de la Vega, comme le remarque Diego Fernandez Palentin; Ce que nous declarerons cy-dessous plus expressement; pource que ny luy, ny Augustin de Carate, ne desduisent point cecy de la maniere qu'il se passa. Outre ces choses, Gonçalo Pizarre ordonna qu'aucun n'eut à sortir de la Ville, sans en auoir permission de luy; & d'autant qu'elle luy fut demandée par Rodrigue Nuñez, & Pedro de Prado; cela fut cause qu'ils en moururent, pource qu'ils rendirent par là leur fidelité suspecte, & passerent pour gens qui s'en vouloient fuir; tellement qu'on peut bien dire, qu'il n'y eut alors, ny réjouissance sans mort, ny mort sans réjouissance des vns, & sans desplaisir des autres; tels euenemens se trouuant pour l'ordinaire confuslement meslez dans tout le cours des ouetres Ciuiles.

Pour s'esclaircir maintenant de ce qui aduint dans la Ville des Rois, auant qu'elle se rendit, il faut sçauoir que François de

Lju. 1.
 Ch. 27.

Caruajal se saisit de tous les Habitans qui se trouuerent auoir abandonné Gonçalo Pigarre; il est, vray qu'il en salut excepter Garcillasso de la Vega, pource, comme disent les Historiens, qu'il fut empesché de l'arrestier Prisonnier, par vn euénement assez remarquable: Car le mesme Caruajal estant venu de nuit à sa porte, où il l'appella par son nom, avec dessein de le prendre; la bonne Fortune voulut qu'elle luy fut refusée, par vn soldat qu'on appelloit Hernand Perez Tablero, natif de la Ville d'Almendral, dans la Duché de Feria, Frere de laiçt de Dom Alonso de Vargas, Frere de mon Pere; & par consequent mon Oncle: D'où il s'ensuiuit, que ce mesme Hernand Perez, tant en faueur du pais (car ils estoient tous d'Estremadure.) qu'à cause que ses predecesseurs auoient seruy dans la Maison des miens, & que luy-mesme estoit alors au seruice de mon cher Seigneur Garcillasso de la Vega; se resolut de luy sauuer la vie en vne occasion si pressante. Ayant donc reconnu François de Caruajal à sa parole, il ne luy respondit rien, & courut en aduertir mon Pere, qui sorty tout aussi tost par vne porte de derriere, se sauua le mieux qu'il pût dans le Couuent de saint Dominique. Les Religieux l'y receurent tres-volontiers, & le cachèrent sous vne voute, destinée à l'enterrement des Morts, où ils le tinrent enfermé plus de quatre mois, le plus secretement qu'ils purent; Or d'autant que le bruit courut aussi tost, qu'on l'auoit recelé dans vn Monastere, & que celuy de S. Dominique estoit le plus proche de son logis; Caruajal s'y en alla le lendemain, avec vne grande foule de gens. A son arriuée, il n'y eut ny coin, ny recoin, où il ne fouillast par toute la Maison, qu'il eut volontiers renuersée de fond en comble, tant il auoit enuie de le trouuer, pour le mettre à mort. Car c'estoit de luy que Gonçalo Pigarre se pleignoit le plus; pource, disoit-il, qu'ayant esté tous deux Camarades en la Conqueste de Collao, & des Charças, mangé en mesme table, & dormy sous vn mesme couuert; Garcillasso ne deuoit l'abandonner pour rien du monde, ny encore moins estre Cöplice, & Bourre feu des fuyards. Non content de cela, il le fut chercher encore trois ou quatre fois, iusques dans l'Eglise: Et pource qu'on l'auoit aduertty qu'il estoit caché dās vn lieu vuide, & profond, derriere le grand Autel, où estoit le S. Sacremēt, il en tira les rideaux, & y decouurit en effet vn fort bon Soldat, qu'il cognoissoit, & qui s'y tenoit caché, pour estre du nombre des

Fuyards; Mais pource que ce n'estoit pas luy que Caruajal demandoit, il fit semblant de ne l'auoir pas veu; & tirant derechef les rideaux; *Assurement*, dit-il tout haut, *l'Homme que nous cherchons n'est pas icy*; Mais bien à peine eut il preferé ces mots, qu'un de ceux de sa suite, qu'on appelloit Porras, faisant l'empresse, s'en alla leuer les nappes de l'autel, & descouurit à l'instant le mesme Soldat, auquel Caruajal auoit voulu pardonner, disant exprés qu'il n'y auoit là personne; d'où il aduint que l'imprudent Porras ne l'apperceut pas plustost, que sans considerer qui il estoit; *Le voicy*, s'escria-t'il, *le voicy le Traistre*, tellement que Caruajal fut fâché en son Ame de le voir ainsi descouuert, à cause qu'il l'eut bien voulu sauuer; Toutesfois, pource qu'il ne le pouuoit, sans subçon; pour estre des plus coupables contre Gonzalo Pigarre, il fut contraint par raison d'Etat de l'enuoyer au Giber, apres l'auoir fait confesser au Conuent; mais le Ciel ne laissa pas impunie cette action de Porras, comme il sera dit cy-apres.

Il aduint vne autrefois, que Caruajal s'en estant allé dans le Conuent à heure induë, Garcilasso de la Vega, qui ne pensoit point qu'il y deust venir alors, se trouua plus en peine qu'il n'auoit iamais esté; Ce qui fit qu'en vn danger si apparent, ne pouuant trouuer d'autre retraite que la Cellule d'un Religieux, il s'y fourra dedans, avec vn hazard d'autant plus grand, qu'il n'y auoit dans cette Chambre-là, ny meubles, ny autre embarras, qui empeschast la veüe, à la reserve d'une Bibliotheque, qui estoit vis à vis de la porte, où mon Pere s'aduifa de se cacher entre la muraille & les Liures: Ce qu'il fit à vray dire, à la bonne heure pour luy; pource que deux ou trois de ceux qui estoient en questé entrerent vn peu apres dans la Cellule, où s'imaginant que la Bibliotheque ioignoit la muraille, & qu'apparément il n'y pouuoit auoir personne derriere les Liures, ils en sortirent aussi-tost, disant qu'il n'estoit point là. A ces dangers & à plusieurs autres mon Pere se vid diuersement exposé, durant tout le temps que Gonzalo Pigarre fut en la Ville des Rois. Or bien que ses Confidens & ses Amis les plus intimes, eussent plusieurs fois prié Pigarre de luy vouloir faire grace; si est-ce qu'ils l'auoient tousiours trouué si obstiné à s'y resoudre, qu'ils commençoient d'en desesperer; Tout le contraire arriva pourtant, & à la fin il luy donna la vie, à condition qu'il n'eut iamais à se presen-

ter deuant luy, disant, *Que ses yeux ne pouuoient souffrir vne personne qui l'auoit abandonné sans raison, contre les devoirs dont la Patrie, & l'Amitié les obligoient d'estre inseparables.*

Après ce Pardon, mon Pere sortoit du Conuent de saint Dominique, & se retira dans sa Maison; d'où il ne bougea d'un assez long-temps: Toutesfois estant arriué depuis, que les instantes prieres de ses Amis, luy obtinrent vne Abolition entiere, & que Gonçalo Pigarre trouua bon qu'il le vid, il s'alla presenter deuant luy, qui demeura d'accord de luy pardonner, & d'oublier le passé; Ce qui n'empescha pas pourtant, qu'il ne le menast avec luy, comme Prisonnier de Guerre, & avec si peu de liberté, qu'il ne luy permettoit, ny de sortir de son logis, ny de manger hors de sa table, ny de passer la nuit ailleurs qu'en sa Tente, si bien qu'il le tint dans cette captiuité iusques au iour de la Bataille de *Sasichuana*: D'où il faut inferer ce me semble, que si pas vn des trois Auteurs qui ont escrit l'Histoire n'a fait mention de luy, c'a esté pour auoir tousiours suiuy Gonçalo Pigarre, en qualité de Prisonnier; mais de moy, i'en parle comme sçauant, à mon dommage, pour auoir eu bonne part à tous ces trauaux & ces incommoditez de mon Pere, qui fut trois ans rous entiers, sans iotir des reuenus de ses Départemens d'Indiens; durant lequel temps, luy & ses plus proches, iusques au nombre de huit, comme i'ay dit cy-dessus, ne vescurent que des aumosnes des gens de bien: que si Gonçalo Pigarre tenoit ainsi dans la contrainte mon Pere, & s'il ne luy permettoit pas mesme de sortir de sa Tente, c'estoit pour mieux s'asseurer de sa personne, afin qu'il ne l'abandonnast point derechef. A quoy i'adiouste, qu'il ne luy vouloit point souffrir de manger qu'à sa table; pource que mon Pere n'ayant pas alors de quoy viure, Gonçalo eut creu pecher contre la generosité, d'endurer qu'un autre que luy l'assistast; comme en effet il ne manqua point de luy estre secourable au besoin. Je rapporteray à ce propos, qu'après la mort du Vice-Roy, se trouuant en la Ville de *Quitu*, il acheta d'un Gendarme nommé *Salinas*, vn des plus beaux chevaux du Peru, qu'on appelloit *Salinillas*, du nom de son Maistre: Et d'autant qu'il promit d'en donner neuf cens soixante Ducats, quoy qu'il n'en eut pas vn seul, ny esperance d'en auoir, que par le moyen de ses Amis, l'un desquels luy en presta environ trois cens, n'en ayant pas dauantage: Gonçalo Pigarre n'en fut pas plustost

aduerty, qu'il enuoya payer le cheual de ses deniers propres; estant bien asseuré que mon Pete ne pouuoit pas fournir cette somme-là.

*CHASTIMENT RIGOREUX D'VNE
irreuerence enuers le Saint Sacrement, & de quelques
Blasphemes horribles; Ensemble l'Eslection qui fut faite
de deux Procureurs, pour estre enuoyez en Espagne.*

CHAPITRE XXI.

IE commenceray ce Chapitre par le Chastiment que le Ciel fit de Porras, trois mois apres son irreuerence enuers le S. Sacrement de l'Autel. Il arriua d'une façon bien estrange, qui fut, qu'ayant pris la route de Huamanga, où Caruajal l'enuoyoit en diligence, pour quelques affaires, comme il luy falut passer vn marais, qui n'auoit pas plus d'une coudée de profondeur, son cheual se trouuant las, & bruslant de soif, par vn excès de chaleur, se mit à boire en vn lieu où son Maistre le mena pour l'abbreuuer: D'où il aduint que dès qu'il eut beu, il se laissa cheoir dans la mare avec le malheureux Porras, l'une des iambes duquel se trouua engagée sous luy. Comme il tomba donc au mesme endroit, où se faisoit le plus grand amas d'eau, il ne pût avec tous ses efforts, ny faire leuer le cheual, ny desgager son pied, mais se noya miserablement en si peu d'eau, que la teste du cheual n'en estoit presque point mouillée; de sorte que quelques hommes qui passoient par là fortuitement, s'estant arrestez à cette aduerture, firent leuer le cheual, & voyant que c'estoit fait de son Maistre, l'enterrent sur le bord du marais; ce qu'on aduitta depuis estre vne iuste punition de son irreuerence, qui fut generalement blasmée par tout le Royaume.

A ce chastiment i'en puis adiouster d'autres semblables, que Dieu fit en ce temps là, contre les Impies, & les Blasphemeurs de son saint Nom: Ces Meschans auoient tellement tourné en coustume de iurer en leurs conuersations, que ne se contentant pas des sermens ordinaires, ils disoient avec execration, qu'ils ne croyoient point en Dieu, & qu'ils faisoient tout en

despit de luy. Mais de tous ces Miserables, dont i'en ay connu quelques vns, qui faisoient gloire de tels Blasphemes, il n'y en eut pas vn seul qui n'en fut puny comme par miracle; Car ils perirent tous des coups qu'ils receurent à la bouche, soit en leurs querelles particulieres, soit aux Combats qui se donnerent dans le Peru. On les trouuoit morts de coups d'Espées, de Lances, & d'Arquebuzes, qui les pergoient à iour par la bouche, d'où ils sortoient derriere le col. Cela fut remarqué dans le País, durant tout le temps que i'y demeuray: mais vn an deuant que ie fortisse de Cozco, il aduint entr'autres choses, qu'un certain d'Aguirre, Soldat de mauuaise vie, fit vne querelle mal à propos à Iean de Lira, qui tout au contraire de son Ennemy, estoit grandement courtois, & fort homme de bien. Ayant donc à le combattre, pour auoir plus d'auantage sur luy; il s'arma d'un Casque de fer, d'une Cotte de maille, de Brassars, & de Calçons de mesme. En cét equipage il fut attendre Iean de Lira en la Place de saint dominique, vn Vendredy, iour de Careême, auquel il se retiroit en son logis; apres auoir ouy le sermon dans la grande Eglise; Ils furent plus d'une demye-heure à chamail-ler l'un contre l'autre, pour n'y auoir personne qui les separast; Mais enfin Iean de Lira ayant ioint de près Aguirre, luy porta vne estocade dans la bouche, dont l'effet fut tel, qu'elle luy tra-uerça le col, par où son espée sortit à moitié. Surquoy d'Aguir- re, sans perdre temps, deschargea vn si furieux reuers sur le man-teau, dont Iean de Lira auoit enuéléppé son bras gauche, qu'il luy en coupa les replis en vnze diuers endroits, & luy emporta le poulce. La nuit suivante d'Aguirre mourut dans la prison, de la blesseure qu'il auoit receuë, & Iean de Lira guerit de la sién- ne dans le Conuent de saint Dominique, où l'ayant visité de- puis, ie vis sa main gauche sans poulce, & son manteau percé de coups.

De semblables peines finirent leurs iours plusieurs autres de ces Blasphemateurs, dont il y en eut de tuez deux ou trois en la Bataille des Salines; autant en celle de Chupas, quatre en celle de Huarma, dont l'un s'appelloit Mesquita: & ce chastiment, comme i'ay dit, leur aduint à tous ensemble par des playes re- ceuës à la bouche: Ce qu'un chacun ayant visiblement remar-qué; de là s'ensuiuit, que non seulement on se corrigea de ces Blasphemes horribles, mais qu'à l'aduenir on apporta plus de

moderation aux ordinaires; tellement qu'il se void auourd'huy, par vne particuliere grace de Dieu, que tous les Espagnols du Peru, sont si retenus en matiere de serment, qu'ils le font tourner d'ordinaire au mespris, & à la honte de leurs Autheurs; où il est à remarquer que cette loüable coustume, qui s'observe si religieusement dans ce grand Empire, s'est si bien introduite dans tout le reste des Indes, & particulièrement en la Mexique, qu'entre les gens de Guerre, les hommes accoustumez aux blasphemes, y sont tenus pour Infames: de maniere que par par vne espee de punition qui passe pour rigoureuse, ceux qui les font, sont contrains de s'en desdire, afin qu'ils aient soin de ne plus iurer vne autre fois. En quoy certes, on ne peut assez loüer les Capitaines, & les autres Officiers, qui tiennent la main à ce qu'un Reglement si salutaire, & si bon, s'establisfe fortement dans la Milice.

Le rapporterois icy en faueur des Mestifs, mes parens, que graces au Ciel, ils n'ont iamais esté sujets à ce vice là, si ie ne craignois de me rendre suspect de flatterie enuers eux; Et toutes-fois, pour en parler sans passion, ie ne feindray point de dire à leur loüange, qu'ils doiuent particulièrement estre estimez, en ce que dans nostre Race, & du costé de ma Mere, n'y ayant point eu de Blasphemateurs, leurs Descendans n'ont sceu que c'est de iurer, & tiennent encore auourd'huy comme hereditaire cette vertu de s'en abstenir, qu'ils semblent auoir succée avec le lait de leurs Meres.

Pour reuenir maintenant à Gonçalo Pigarre, ie diray qu'en-cores que par toute sorte de festes & de réjouissances publiques, il solemnisast ce nouveau tiltre de Gouverneur qu'il venoit de receuoir, il n'oubloit rien pourtant de ce qui le regardoit en particulier, pour s'en acquiter dignement dans la fonction de sa charge: A raison dequoy apres auoir conferé souuent en secret avec ses plus chers Confidens, & depuis en public, avec les Principaux de la Ville des Rois, & les Procureurs des autres Villes, qui le suiuiot d'ordinaire, il leur declara finalement, qu'il luy sembloit à propos d'enuoyer des Deputez à l'Empereur, pour luy rendre compte de ce qui s'estoit passé iusques alors; Qu'en suite de cecy, il le faisoit supplier, au nom de tout le Peru, d'en confirmer le Gouvernement à Gonçalo Pigarre, & de considerer que le bien de son seruice, & celuy tant des Indiens

que des Espagnols le requeroient ainsi: surquoy il conclut, que les Deputez eussent à faire cette Requête de la part de tous ceux du Royaume, & que pour luy, il enuoyeroit en son particulier vn autre Agent, pour demander au Roy cette mesme grace, en consideration de ses seruices, & des grands travaux qu'il auoit soufferts, pour l'agrandissement de la Couronne d'Espagne.

Cette proposition fut approuuée du commun consentement de ceux qui l'ouïrent; Car il leur sembla que sa Maïesté accorderoit d'autant plus aisément leur Requête, qu'elle regardoit directement son seruice, & l'vtilité publique, tant à l'esgard des reuenus de la Couronne, que du profit des Vassaux. François de Caruajal fut le seul qui s'y opposa; disant, comme le rapporte Diego Fernandez Palentin; *Que les meilleurs Agens, & les plus assurez Procureurs qu'on eut sceu auoir, consistoient en vne notable quantité d'Armes, de Cheuaux, & de gens de Guerre, qu'il falloit mettre sur pied; Que les Subiets ne deuoient iamais prendre les Armes contre les Rois; mais que lors qu'ils les auoient prises vne fois, il estoit assez difficile de les faire resoudre à les quitter; Et que dès le commencement ils deuoient enuoyer les Auditeurs à sa Maïesté, pour l'aduer-tir de l'emprisonnement du Vice-Roy, puis que c'estoient eux qui l'auoient fait prendre.* Ch. 18.

Voilà quel estoit l'aduis de Caruajal, qui fut approuué par Hernand Bachicao. Mais cela n'empescha pas qu'au nom de l'Audience, on ne deputast en Espagne le Docteur Texada, qui estoit vn des Auditeurs, & avec luy, de la part de tout le Royaume, François Maldonat, Maistre d'Hostel de Gongalo Picarte; avec vne ample procuration, & des Lettres expressees de l'Audience, pour agir & negocier comme ils aduiserent. Pour ce mesme effect, ils conclurent, n'y ayant point de meilleure commodité, de les faire embarquer au Port de la Ville des Rois, dans vn Nauire où estoit detenu prisonnier le Licencié Vaca de Castro, qui attendoit là ce que l'on feroit de luy; n'estant pas resolu de retourner en Espagne sans l'ordre exprés des vuisances, & sans sçauoir pourquoy le Vice Roy l'auoit fait emprisonner.

Il fut donc conclu entr'eux; Que Hernand Bachicao, avec l'Artillerie, & les gens necessaires, meneroit les procureurs à Panama, dans ce mesme Nauire; dequoy fut aussi-tost aduertty le Licécié Vaca de Castro, par l'vn, de ses parens, & de ses Amis,

qu'on appelloit Garcia de Montaluo: Ce qui fut cause qu'aprehendant que si on le tiroit du Navire, il ne s'ensuiuit de là quelque euénement peu-conuenable à sa Condition, & à son Authorité, il resolut, appuyé de la faueur de son parent Montaluo, & de l'assistance de ses seruiteurs, de se mettre à la Voile, & de se faire porter à panama: En-effet, il sortit du port, sans empeschement; pource que dans le Vaisseau il ne se trouua personne du costé de gonçalo pigarre, qui entreprit de s'y opposer; outre que les Mariniers furent bien aises que cette occasion se presentast de seruir Vaca de Castro, pource que tout le monde l'affectionnoit en ce pais-là; ce qui ne pleût guere cependant à Gonçalo pigarre, à cause que cét euénement fut vn obstacle au Voyage des Ambassadeurs, qui luy sembloit entierement necessaire pour ses interets particuliers..

DESPLAISIR EXTREME DE GONçalo Pigarre, pour la Desliurance de Vaca de Castro; Hernand Bachicao prend la route de Panama, & le Vice-Roy desliure des Commissions, pour faire des leuées de gens de Guerre..

CHAPITRE XXII.

LA desliurance du Licencié Vaca de Castro, embarrassâ d'vne estrange sorte Gonçalo Pigarre, qui se persuada tout aussi-tost; comme disent les trois Historiens qui en ont escrit, qu'elle ne pouuoit estre aduenüe sans le secours de quelqu'un: Pours'en esclaircir, il fit aussi-tost sonner l'allarme, & prendre tout autant de Caualliers qu'il s'en trouua de suspects dans la Ville des Rois, tant de ceux qui s'en estoient fuïs de Cozco, que de diuers autres endroits. Apres la proclamation du Vice-Roy; comme on se fut saisi d'eux, on les mit tous dans la Prison publique, & entr'autres, le Licencié Caruajal, auquel François de Caruajal Mestre de Camp, commanda en mesme temps, de se confesser, & de faire son Testament; pource, luy dit-il, que l'heure de sa mort estoit venuë. Le Licencié, sans perdre coura-

ge, fit incontinent ce qui luy estoit enioint; & tant plus il se voyoit pressé de se despeschier, tant plus il estoit long en sa Confession, tandis que le Bourreau estoit là present, avec vne corde en main, en estat de l'executer à mort. Plusieurs cependant renoient cette execution pour irreuocable, & veu la qualité de sa personne, se faisoient accroire qu'il y auoit peu d'apparence qu'on l'eut reduit en ces termes pour le laisser en vie. D'autres aussi apprehendoient, que si on le faisoit mourir, l'on n'en fit de mesme de tous ceux qu'on auoit arrestez, perte qui n'eut pas esté petite, pource que les Prisonniers estoient des principaux du Royaume, & qui auoient tousiours bien seruy le Roy.

Durant ce danger extrême, où se trouuoit exposé le Licencié Caruajal, il ne manquoit pas d'Amis, qui parloient pour luy à Gonzalo Pigarre: Ils luy remonstroient, Qu'il pensast bien à quel point estoit considerable dans le Païs le Licencié Caruajal; Que le Vice-Roy ayant tué le Facteur son Frere, sans qu'il luy en eut donné le moindre suier; puis qu'il confessoit luy-mesme, comme vn chacun scauoit bien, qu'il ne s'estoit deffait de luy pour autre raison, qu'à cause que le mesme Caruajal suiuoit Gonzalo Pigarre, il n'y auoit aucune apparence de le mettre à mort; Qu'au contraire, il le deuoit conseruer, sur l'esperance qu'il luy seroit plustost Seruiteur qu'Ennemy, quand ce ne seroit pour autre consideration, que pour vanger la mort de son Frere: Et partant, qu'il prit la peine d'examiner meurement ces choses, sans se precipiter à faire mourir hazardeusement vn homme qui luy pouuoit estre grandement vtile. Quant à la fuite de Vaca de Castro, ils luy representerent, Que ce leur deuoit estre vne assez grande satisfaction, que le Licencié Caruajal, ny les autres, n'y eussent point trempé; qu'il y auoit bien de la mauuaise intelligence en cela, & que toutes les inquietudes qu'ils se donnoient là-dessus, ne procedoient que de leurs soupçons.

Voilà ce qu'ils disoient à Pigarre, qui sans s'arrester à leur discours, estoit si despiré dans son Amie, qu'il ne daignoit les ouïr, ny leur dire pour response la moindre parole. Ce qu'aperceuant le Licencié Caruajal, luy & ses Amis s'aduiferent de mener l'affaire par vne autre voye, qui fut, de faire donner au Mestre de Camp, vne plaque d'or, de deux mille liures de poids, & de luy en promettre beaucoup plus secretement; de maniere que Caruajal ayant accepté ce present, fit en sorte enuers Gonzalo

Pigarre, qu'il ne se parla plus de cette affaire-là; & qu'ainsi le Licencié Caruajal & les autres Prisonniers, furent mis en liberté. En suite de quoy, on recommença de donner ordre au parlement d'Hernand Bachicao, en embrassant l'occasion qui s'en presenta; Car alors vn Brigantin estant arriué d'Arequepa, avec quelques autres Fregates, on les équipa le mieux que l'on pût, y mettant quantité d'Artillerie, de celle que Gonzalo Pigarre auoit tirée de Cozco. Apres ces preparatifs, Bachicao, le Docteur Texada, & François Maldonat, s'embarquerent ensemble, avec soixante Arquebuziers, tels qu'on les pût auoir, pour les accompagner en cette Nauigation: Ils s'en allerent ainsi costoyant la Mer, sur l'aduis qu'ils eurent que le Vice-Roy estoit dans le Port de Tumbes: D'où il aduint que le mesme Bachicao s'estant vn matin approché du Port, fut descouuert fortuitement par les gens du Vice-Roy, qui à mesme temps sonnerent l'allarme: Ce qui fut cause que le Vice-Roy s'imaginant qu'il venoit à luy par Mer, avec de puissantes forces, prit incontinent la route de Quito, avecque cent cinquante hommes qu'il auoit, quelques vns desquels s'allerent rendre à Bachicao, qui les receut volontiers: Cela fait, il se saisit des Nauires qu'il trouua dans le Havre, puis tourna du costé du vieux Port, d'où il alla en diuers autres lieux, & y ramassa vn assez bon nombre de gens,* qu'il fit embarquer dans ces Vaisseaux, tandis que le Vice Roy se hastoit d'aller vers Quito, comme ie viens de dire.

* cent
cinquante
hommes.

Toute cette Relation, qui est tirée d'Augustin de Carate, m'oblige d'en esclaireir quelques endroiets, qui me semblent fort obscurs: Pour commencer donc par la plaque d'or que Caruajal receut, ie diray qu'il ne refusoit point ce que luy donnoient ceux qu'on accusoit de quelque crime dont ils n'estoient pas véritablement coupables; Car alors afin qu'on ne fit mourir l'Accusé, il entiroit la cause de longue, & empeschoit sous main qu'on ne prononçast contre luy vne sentence de mort, pour donner loisir à ses Amis de luy obtenir grace de Gonzalo Pigarre, & c'estoit en ces occasions que Caruajal se prenoit de ces presents, en s'employant secrettement pour les Accusés. Mais quand le crime estoit hors de doute, c'estoit en vain qu'on s'adressoit à luy, pour en destourner le chastiment. Car alors sans se laisser flescibir, ny par prieres, ny par dons, il faisoit executer à mort les Coupables, & ne trahissoit iamais le Party qu'il sui-
uoit,

noit, ny en la punition de ses Ennemis, ny en la recompense de ses Amis & de ses Confidens. Avec tout cela neantmoins les Historiens ne laissent pas de le faire excessiuelement auare & cruel; Comme en effet, il fut sujet à l'un & à l'autre de ces Vices, mais non pas tant comme ils disent: que si de hazard il s'y laissoit emporter, c'estoit comme nous auons dit, pource que la Faction qu'il soustoit le vouloit ainsi, n'estant pas homme à rien faire qui desmentit sa qualité de Soldat, de Capitaine, & de Mestre de Camp: Mais ie me reserve à traiter plus particulièrement de cecy dans les endroits où l'occasion se presentera de parler de sa façon de viure, & de ses qualitez remarquables: Ce que ie puis faire facilement, pour l'auoir cogné, ensemble tous les Capitaines de Gonçalo Pigarre, & appris d'eux plusieurs particularitez de la bouche de ceux qui auoient de secretes familiaritez avec Caruajal.

I ay dit cy-deuant, comme le Licencié Aluarez mit en liberté le Vice-Roy Blasco Nuñez Vela, qui fut ioint à mesme temps par vn autre Nauire, qui portoit son Frere Vela Nuñez, tellement que l'un & l'autre furent ainsi dans le Port de Tumpiz, où ils desembarquerēt, & y establirent vne Audience Royale; Car, comme disent les Historiens, ils auoient par escrit vne Permission particuliere de sa Maiesté, de le pouoir faire, avec vn seul Auditeur. Ils desburerent plusieurs Commissions en diuers endroits, avec vne ample relation de leur prison, dont ils estoient dehors, ensemble de la venuë de Gonçalo Pigarre en la Ville des Rois, & de tout le reste qui s'estoit passé. A quoy ils adjousterent vn Mandement exprés à tous Espagnols, de venir seruir sa Maiesté le plus promptement qu'ils pourroient. Pour ce mesme effect, le Vice-Roy enuoya des Capitaines au vieux Port, à saint Michel, à Truxillo, pour y faire des leuées de gens de Guerre; & mit ordre de plus, que le Capitaine Hierosme de Berera, s'en alast iusques à la Prouince de *Pacamaru*, que les Espagnols appellent *Bucamoras*; Par mesme moyen il fit scauoir de tous costez, qu'on ne manquast point de luy fournir les provisions necessaires, avecquel'or & l'argent qui se trouueroient dans les Coffres de sa Maiesté, disant qu'il en auoit besoin, pour resister à la puissance de ses Ennemis, dont le nombre estoit fort grand. Cependant, dans les Villes où il adressa ses Commissions, s'estant trouué plusieurs gens du Party contraire au sien,

la plus part d'entr'eux s'en allerent vers Gonçalo Pigarre, & l'aduertirent de routes ces choses. Il y en eut d'autres aussi, qui pour ne tomber entre ses mains, s'enfurent sur les Montagnes & neantmoins malgré tous ces obstacles, plus de cent cinquante Espagnols, avec vn equipage de cheuaux, d'Armes, de Bagage, selon le moyen qu'ils en eurent, s'allerent offrir au Vice-Roy, qui fut exerément satisfait de voir qu'en vn temps si contrainte, ils fauorisoient ainsi les bons desseins. Mais ce contentement ne luy dura guere, pource que sa mauuaise Fortune se seruit du Capitaine Hernand Bachiao, comme d'un Instrument pour le trauerser, en le faisant retirer plus auant dans le Pais, où il souffrit de grands travaux iusques à sa mort, comme il sera dit plus amplement cy-apres.

Gonçalo Pigarre scachant que le Vice-Roy estoit à Tumpiz, où il leuoit des gens contre luy, iugea qu'il ne faisoit point s'endormir en vne occasion de cette importance; tellement qu'à l'heure mesme il enuoya des Capitaines pour le travailler, & luy resister par toute sorte d'efforts. Ce qu'il eut moyen de faire d'autant plus aisément, que les mesmes Lettres & Commissions que le Vice-Roy depeschoit, luy seruoient d'aduis, pour donner ordre à ses affaires; pource qu'elles tomboient la plus part entre ses mains, par celles des Messagers qui les luy apportent: A cause dequoy, il commanda aux Capitaines Hierosme de Villegas, Gonçale Dias, & Hernand d'Aluado, de s'en aller Coste à bas au Septentrion, pour y ramasser ce qu'ils trouueroient de Soldats en ces Quartiers-là, & empescher par ce moyen qu'ils n'allassent ioindre le vice-Roy: outre qu'ils eurent encore vn Mandement particulier de le fatiguer le plus qu'ils pourroient, sans tout esfois luy donner Bataille, bien qu'ils eussent assez de gens pour le pouuoit faire.

BACHICAO FAIT DIVERSES CHOSES
*dans Panama; Le Licencié Vaca de Castro arrive
 en Espagne, où il termine ses affaires, & le
 Vice-Roy se retire à Quito.*

CHAPITRE XXIII.

HERNAND Bachicao ayant, comme nous auons dit, pris le Nauires du Vice-Roy, qui l'obligea de se retirer plus auant dans le País, continua sa route droit au Port de Panama, & dans ce Voyage, se saisit de deux autres Vaisseaux, des Maistres, desquels nous ne parlons point icy, pour n'estre ennuyeux, ny des choses qui se passèrent en cette prise, que Diego Fernandez Palentin a descrites au long: Il nous suffit de dire, qu'il les emmena avec luy, & que comme ils nauiguoient, sans craindre que les Ennemis les troublassent, il s'en alla par tous les Ports, dont il y en a plusieurs en cette Coste-là, en chacun desquels il prenoit des rafraischissemens & des viures. Mais quand il fut arrivé en la Plage où sont les Isles des Perles, à quelques vingt lieues de Panama, il y trouua quelque sorte d'obstacle en son dessein. Car ceux du País, comme dit Augustin de Ch. 19.
 Carate, & particulièrement les Habitans de Panama, estans aduertis de sa venue, deputerent vers luy deux des Principaux, pour apprendre son intention, & le prier de n'entrer point dans leurs terres à main armée: A quoy Bachicao fit response, Qu'il ne mettoit là des gens de Guerre que pour les opposer au besoin aux forces du Vice-Roy; & qu'il n'auoit aucun dessein de nuire à personne, mais seulement de faire escorte au Docteur Tejada, Auditeur de sa Maiesié, du nombre de ceux de l'Audience Royale, qui s'en alloit rendre compte à l'Empereur de toutes les choses qui s'estoient passées dans le Perou; Qu'au reste il ne feroit seulement que le mettre à terre, & s'en retourneroit sans delay, apres s'estre pourueu des choses qui luy estoient necessaires.

Par cette Response, Bachicao leur semit l'esprit, & fit si bien qu'ils ne l'empescherent point d'entrer dans leur País: Mais bien à peine eue il mouillé dans le Port, qu'ayant apperceu deux Vaisseaux qui en vouloient partir, il donna la chasse à l'un d'eux.

auec vn Brigantin, & le contraignit de regagner le Havre, où il fit pendre à l'Antenne le Maistre, & le contre-Maistre: Action qui scandalisa grandement tous ceux de la Ville; voyant bien par là qu'il faisoit tout le contraire de ce qu'il leur auoit promis. Neantmoins ils ne se mirent point en estat de s'en deffendre, ne iugeant quetrop à leur dommage, qu'il n'estoit plus temps d'y penser; Ainsi, auec vne extrême apprehension, eux & leurs biens se trouuerent soubmis à la volonté de Bachicao, homme à vray dire, d'vne humeur assez estrange: d'où il s'ensuiuit qu'il entra dans Panama, sans que personne luy resistast, iusques-là mesme que le Capitaine Iean de Guzman, ne l'osa iamais attendre en celieu-là, où pour le seruice du Vice Roy, il leuoit des gens de Guerre; Mais il arriua que ce fut pour Bachicao, d'autant qu'ils s'allèrent tous rendre à luy, qui les receut aussi tost, s'empara de plus de l'Artillerie, que Vaca de Castro auoit là transportée dans le mesme Vaisseau, où ils'en estoit fuy. Non content de cela, il exerça dans ce Pais, toutes les Tyrannies imaginables, sans faire difficulté, ny d'vsurper comme bon luy sembloit le bien d'un chacun, ny de gesner si cruellement la Iustice, que personne n'osoit contredire ses volontez: par où s'estant rendu insupportable à ceux mesmes de sa suite, il fut cause que deux de ses Capitaines conspirerēt contre sa personne: Mais sur l'aduis qu'il en eut, il s'en saisit aussi tost; & à ces iniustices, en adiouta d'autres encore plus grandes, se seruant pour cēt effet de Crieurs publics, qui s'en alloient, disant tout haut ces paroles, *Le Capitaine Hernand Bachicao fait faire cecy, pource qu'il le veut*: En quoy il s'attribuoit imperieusement vne plaine puissance, & vne Authorité souueraine.

Auant que ces choses arriuaissent, le Licencié Vaca de Castro, ne fut pas plustost aduertey de la venue de cēt homme cruel, qu'il s'enfuit à *Nombre de Dios*, s'estant embarqué sur la Mer du Nord: Ce que firent aussi Diego Aluarez Cueto, & Hierosme Curbano, qui estoit Agent du Vice-Roy. Le Docteur Texada, & François Maldonat, prirent encore la mesme route; tellement que tous ensemble, bien que de trois Partys differends, se rencontrerent de compagnie, & firent Voile en Espagne; Mais le Docteur Texada mourut en chemin, sur le Canal de *Bahama*: comme au contraite, François Maldonat, & Diego Aluarez Cueto, arriuerent à bon Port; & ne furent pas plustost en ce

Royaume là que par la Poste qu'ils prirent, ils s'en allerent en Allemagne, pour y rendre compte à sa Maieſté de leur Ambassade. Quant au Licencié Vaca de Castro, il s'arresta dans les trois Isles Açores, d'où il se rendit à Lisbonne, & depuis à la Cour, disant qu'il n'auoit pas osé aller par Seuille, de peur de se mettre au hazard de sa personne, dans vn País où tenoient rang principal les Freres & les autres Parens du Capitaine Iean Tella de Guzman, à qui, comme nous auons dit cy deuant, il auoit fait couper le col, au temps de la deffaitte de Dom Diego d'Almagre le leune. Estant arriué en sa Maison, il fut aussi tost arresté par l'express Mandement de ceux du Conseil des Indes, qui le chargerent de quelques griefs, & le firent mettre en suite, pour mieux s'asseurer de sa personne, dans la Forteresse d'Arcualo, où il fut plus de cinq ans, tandis qu'on traitta de son affaire: Mais enfin, ils trouuerent bon de le faire transporter à Simancas, en vne maison particuliere; & depuis, à cause du changement de la Cour, ils luy donnerent pour Prison la Ville de Pénro, avec toutel'estenduë de sa Iurisdiction, iusques à ce que son Procez fut iugé. Voilà ce qu'en dit Augustin de Carate.

Mais il ne declare pas quel fut ce Iugement, à cause qu'auant qu'on le donnast, il se trouua qu'il auoit acheué son Histoire: quoy qu'il en soit neantmoins, il est tres certain, que comme Vaca de Castro eut beaucoup d'Ennemis; aussi le chargerent ils de plusieurs calomnies: voilà pourquoy l'on traifna son affaire en longueur, plus par enuie que pour aucun veritable suiet qu'on eut de le faire; & toutesfois, il ne s'en mettoit pas beaucoup en peine: Au contraire, il sembloiten estre fort aise, pour ce qu'il sçauoit bien qu'il en sortiroit à son honneur: Comme en effet, la chose luy réussit à souhait; car apres auoir esté déclaré fidele Ministre, & bon Gouverneur de cét Empire là, il fut restabli en sa Charge, dans le Conseil Royal de Castille: Ce qui fit, qu'à raison des longs delais qu'on auoit apportez au Iugement de la cause, quand il vint à reprendre son Siege, il se trouua le plus ancien Auditeur de tout le Conseil, comme ie le remarquay l'an 1561. lors que i'eus à Madrid. T'adjouste à cecy, qu'oultre qu'il fut renuoyé absous, & remis en sa premiere dignité; il receut encore vne gratification assez notable, pour les bons seruices qu'il auoit rendus dans le Peru: Car sa Maieſté Imperiale voulut que son Fils Dom Anchoine Vaca de Castro, Cheualier.

del'Ordre de saint Iacques, comme son Pere l'estoit aussi, eut vingt mille Ducats de rente dans le Peru, à prendre sur tels Despartemens d'Indiens, qu'on aduiseroit pouuoir donner cette somme. En effet, il arriua depuis, à sçauoir l'an 1560. que pour s'en aller iouir de cette Gratification, ce mesme Cavalier se rendit à *Nombre de Dios*, à la suite du Comte de Nieua, enuoyé pour Vice. Roy de cét Empire-là: Surquoy ie diray à sa loiange, sans le flatter, & sans offencer autrui, que du commun consentement de tous ceux du País, il fut tenu pour le meilleur Gouverneur qu'on eut iamais eu, comme il se peut verifier par tous les trois Historiens qui en font mention, pas vn desquels ne parle qu'aduantageusement de luy. Retournons maintenant au Peru, pour rendre compte de ce qu'y fit en ce temps-là, le Vice-Roy Blasco Nuñez Vela.

Ch. 15. Apres que le Vice-Roy, comme dit *Augustin de Carate*, se fut retiré avec quelques cent cinquante homes, au temps qu'*Hernand Bachicao* s'empara de son Armée nauale dans *Tutnbez*, il ne cessa de marcher avec eux, iusques à ce qu'il arriua en la Ville de *Quiru*, où il fut fort bien receu des Habitans. Il s'y rafraischit & ses gens aussi, dont il augmenta le nombre iusques à deux cens hommes, avec lesquels trouuant le País grandement fertile, & abondant en viures, il se resolut d'y tenir ferme, en attendant de nouueaux ordres de sa Maiesté: A quoy l'incita plus fort encore l'aduis que luy donna *Diego Aluarez de Cuetto*, touchant ce qui se passoit dans ces Contrées là, dont il sceut bien faire son profit, ayant tousiours de bonnes gardes, & des Espions par les chemins, pour apprendre d'eux ce que faisoit *Gonçalo Pigarre*; Car il ne le pouuoit sçauoir autrement, veu la distance des lieux, assez grande asseurement, puis que de la Ville des Rois, où estoit *Pigarre*, iusques à *Quiru*, il y auoit près de deux cens lieues, comme nous auons dit cy-deuant. Il arriua cependant que quatre Soldats de *Gonçalo Pigarre*, par ie ne sçay quelle sorte apprehension qu'ils eurent de luy, volerent vne barque, dans laquelle ils s'enfuirent Costé en bas, depuis le Port de la Ville des Rois, d'où ils ne cessèrent de ramer, iusques à ce qu'ils se virent en vn bon parage, pour s'en aller à *Quiru* par terre. Y estant arriuez, ils dirent au Vice-Roy, Que les Habitans de la Ville des Rois, & des autres lieux, estoient mécontents au dernier point, du mauuais traictement que leur faisoit *Gonçalo Pigarre*,

qui les mettoit hors de leurs biens, & de leurs Maisons, pour les donner en proye à des Hostes ennemis, leur imposant quantité d'autres charges pareilles, qu'ils ne pouuoient souffrir plus long temps; Et qu'en vn mot ils se trouuoient si lassés de ce ioug, que pour le secouer, ils n'auoient besoin que de quelque Homme considerable, auhorisé par sa Ma^{te}sté, auquel ils seroient bien aises de se iomdre, pour se deliurer de cette oppression, & d'une si grande Tyrannie.

Par ces paroles, & par quantité d'autres rapports semblables que ces Soldats firent au Vice Roy, ils furent cause qu'il sortit de Quito, avec ce qu'il auoit de gens, & qu'il prit sa marche vers la Ville de S. Michel, ayant élu pour General de son Armée vn des Principaux de Quito, qu'on appelloit Diego d'Ocampo, qui depuis son arriuée à Tumbez, l'auoit tousiours fidelement seruy, & de sa personne & de ses biens, ayant fourny pour l'assister, iusques à la somme de quarante mille Ducats. Cependant en tous ses voyages, le Vice Roy menoit avec luy le Licencié Aluarez, avec lequel il rendoit la Iustice, en vertu d'une permission que sa Ma^{te}sté luy auoit donnée par escrit, de pouuoir à son arriuée en la Ville des Rois, donner Audience à tous venans, quand mesme il ne seroit assisté que d'un, ou de deux Auditeurs, les premiers qu'il trouueroit, en attendant que tous les autres fussent venus, & de iouir du mesme droit, en cas que deux ou trois d'entr'eux vinssent à mourir: de maniere que pour la mesme fin, voulant establir vne Chambre de Iustice, il fit ouurer vn nouveau Sceau, qu'il mit entre les mains de Iean de Leon, premier Iuge de la Ville des Rois, qui par la nomination du Marquis de Camaraza, Adelantado de Cassorla, qui est le mesme que grand Chancelier des Indes, ayant esté esleu pour Garde des sceaux de cette Iustice là, s'en estoit fuy d'avec Gonzalo Pigarre: tellement qu'il expedioit ainsi les Lettres de Prouision, & les autres Patentes necessaires, sous le tiltre de Don Charles, apres qu'elles estoient sceellées du sceau Royal, & que luy & le Licencié Aluarez les auoient signées: d'où il s'ensuiuit que dans le Peru, il y auoit de cette façon, deux Iurisdiccions souveraines, dont l'une estoit dans la Ville des Rois, & l'autre celle du Vice Roy: ce qui estoit cause que bien souvent se rencontroient deux Lettres de Prouision, contraires l'une à l'autre, bien qu'elles fussent expedées sur vne mesme affaire. Ce que j'ay dit cy-dessus, est d'Augustin de Carate.

DEUX CAPITAINES DE PICARRE
font couper la teste à trois Officiers du Vice Roy, qui
se vange d'eux par les Armes. Embarquement de Gon-
galo Pizarre, qui prend la route de Truxillo.

CHAPITRE XXIV.

LE mesme Augustin de Carate passant outre en son Hi-
stoire, dans le Chapitre cy-dessus allegué; Quand le Vice-
Roy, dit-il, voulut partir de Quito, il enuoya Diego Aluarez
de Cueto son Beau-frere en Espagne, pour rendre compte à sa
Majesté de tout le passé, & luy demander secours, afin de
pouuoir entrer dans le Peru à main armée, & faire la guerre
puissamment à Gongalo Pizarre: En effet, Cueto traicta en
Espagne, avec la mesme Flotte, où estoient le Licencié Vaca
de Castro, & le Docteur Texada, comme il a esté remarqué cy-
deuant. Le Vice-Roy cependant, arriva en la Ville de S Michel,
qui est à cent cinquante lieues de Quito, avec resolution de ne
bouger de là, qu'il ne receut vn ordre plus ample de sa Majesté,
dont il auoit tousiours le nom à la bouche. Et à vray dire, il ne
trouuoit point de lieu mieux scitué que celuy là, ny qui fut plus
propre à ramasser en vn corps tous ceux qui partoient d'Espa-
gne, & des diuerses Contrées des Indes, pour s'en aller au Pe-
ru; car comme il a esté dit ailleurs, c'est vn endroit, par où il faut
que passent necessairement ceux qui voyagent par terre, princi-
palement s'ils ont des cheuaux & d'autres bestes de charge; ce
qui luy fit croire que son Armée en grossiroit facilement, & re-
couvreroit de iour en iour de nouvelles forces: En effet, les plus
considerables du Pais s'offrirent à luy volontairement; le loge-
rent fort bien, & le pourueurent le mieux qu'ils pûrent de tout
ce dont il auoit besoin: D'où il aduint, que comme il faisoit tou-
sours de nouveaux amas, d'Armes, de Cheuaux, & de gens de
Guerre, à la fin, il se trouua qu'il auoit sur pied enuiron cinq cens
Hommes, tous bien equippez, à la reserve de quelques vns qui
manquoient d'Armes deffensives, & qui au lieu de Corselets de
fer, en auoient de cuir de Bœuf seché.

Au temps que Gonçalo Piçarre enuoya le Capitaine Bachicao dans des Brigantins, pour s'emparer de la flote du Vice-Roy; il despescha par mesme moyen deux de ses Capitaines; à sçauoir, Gonçalo Dias de Piuiera, & Hierosme de Villegas, avec ordre exprés d'aller ramasser par terre ce qu'ils trouuoient de gens, dans les Villes de Truxillo, & de saint Michel: Comme aussi de ne bouger de cette Frontiere-là, pour s'y opposer aux forces du Vice-Roy; comme en effet, ayant ioint ensemble quelques quatre-vingts hommes, ils tintrent bon dans saint Michel, iusques à ce qu'ils apprirent la venue du Vice-Roy: Car alors n'osant pas l'attendre, ils passerent outre iusques à Truxillo, & s'arrestèrent en vne Prouince vulgairement appelée *Collico*, qui est à quarante lieues de saint Michel. De ce lieu-là, ils firent sçauoir à Gonçalo Piçarre, que le Vice-Roy approchoit; qu'il faisoit tous les iours de nouvelles leuées, & qu'ainsi son Armée grossissoit à veuë d'œil; d'où ils concludoient par les dommages qui s'en pourroient ensuiure.

En ce mesme temps, ces Capitaines eurent aduis que le Vice-Roy auoit enuoyé vn de ses Officiers, appelé Iean de Peyreya, en la Prouince des Chachapoyas, pour ramasser tout ce qu'on pourroit leuer de gens en ces quartiers-là, qui n'estoient peuplez que de fort peu d'Espagnols. Ord'autant que les apparences firent croire à ces Capitaines de Piçarre, que Peyreya & ses Compagnons, ne se tiendroient guere bien sur leurs gardes, ils resolurent de leur dresser vne embuscade sur le chemin: comme en effet, ils leur en dresserent vne à la faueur de la nuit: d'où il aduint que les sentinelles les ayant descouuerts, ils furent chargez incontinent, en vn lieu où ils s'estoient endormis, sans crainte des Ennemis: En suite dequoy, Pereya, & deux des Crainpoux qui le suiuoient, eurent la teste tranchée; & tous les autres Caualliers, qui estoient enuiron soixante, furent reduits par l'aprehension de la mort, à s'en aller seruir Gonçalo Piçarre. Les Capitaines s'en retournerent apres cette execution, qui fascha de telle sorte le Vice-Roy, qu'il se proposa dès lors, de faire naître l'occasion de s'en vanger, à quelque prix que ce fut. Sur cette resolution, il prit avec luy cent cinquante Caualliers, avec lesquels il sortit secrettement de saint Michel, & s'en alla droit au lieu, où les Capitaines Gonçalo Dias & Villegas estoient, avec moins de precaution, & de soin de leurs personnes, qu'il ne fal-

loit qu'ils en eussent, apres auoir depuis peu si mal- traité leurs
 Ennemis. Ayant pris la marche, sans discontinuer, il arriva de
 nuit à Collico, avecque si peu de bruit, qu'on ne l'ouït presque
 pas; Mais enfin, les Capitaines le sentant si proche d'eux, en pri-
 rent si fort l'alarme, qu'ils ne pûrent se mettre en ordre de Ba-
 taille, ny en desfence; Au contraire, ils se mirent tous en fuite
 le plus viste qu'ils purent, & s'e'carterent les vns des autres d'une
 estrange sorte. En cette desroute, Gonçalo Dias fut si mal-
 heureux, qu'ayant creu s'estre sauué presque tout seul dans vne
 Prouince de gens de Guerre Indiens, il fut chargé par eux aussi-
 tost, tellement qu'il y laissa la vie. Il en prit de mesme à Hernand
 d'Aluarado; Et quant à Hierosme de Villegas, ayant rallié de-
 puis quelques-vns des siens, il se rendit avec eux à Truxillo, & le
 Vice Roy s'en retourna droit à saint Michel.

Gonçalo Pigarte, ayât appris la desroute de ses Capitaines, &
 qu'il venoit tous les iours au Vice-Roy de nouvelles forces, &
 des munitions de gens de Guerre, se resolut d'en hastier la défaire
 par toutes les voyes imaginables; A quoy il se porta d'autant
 plus ardamment, qu'il estoit bien assuré que tant plus il iroiz en
 auant, & tant plus son Ennemy attireroit à luy de gens de ceux
 qui venoient d'Espagne, & de plusieurs Contrées des Indes;
 pource qu'il leur falloit necessairement prendre terre à Tumpiz,
 aux enuirs de cette Coste, où estoit alors le Vice-Roy. A toutes
 lesquelles apprehensions estoit iointe encore celle qu'il auoit,
 que sa Maiesté n'enuoyast cependant quelque nouuel ordre à
 son Ennemy, & que par ce dernier choc le courage de ses gens
 ne fût entierement abbatu.

Pour se satisfaire donc dans ses imaginations diuerses, & em-
 pescher que le mal qu'il apprehendoit ne prit pied plus auant; il
 conclut à part soy, de faire de ses Troupes esparles vn Corps-
 d'Armée; d'aller chercher les Ennemis en quelque part qu'ils
 fussent, & mesme de hazarder la Bataille, s'ils le vouloient at-
 tendre. Tellement que sans autre délay, il donna les ordres à ses
 Capitaines; fit faire monstre aux Soldats, & enuoya deuant à
 Truxillo les cheuaux & le bagage, se reseruant avec ses princi-
 paux Officiers pour donner en queue.

Durant tout cecy, il arriva au Port de Lima vn Brigantin d'A-
 reque, avec plus de cent mille escus pour Gonçalo Pigarte; &
 du costé de terre ferme il vint vn autre Nauire, appartenant à

Gongalo Martel du Pont, où il auoit embarqué sa Femme, & ses enfans, pour les faire porter à Cozco, où estoit sa Maison: Ce qui fit que par l'artiuée de ces Vaisseaux, & de si fauorables succez, dont Gongalo Picarre & ses gens auoient vn extrême besoin, ils deuinrent si altiers, & si plains de grandes esperances, que dans ces prosperitez, & ces ris de la Fortune, ils s'imaginoient d'estre assez forts pour combattre tout le Monde.

Les paroles d'Augustin de Carate s'estendent iusques icy: A quoy Diego Fernandez adiouste, *Que dans la haute opinion qu'ils auoient conceuë de leurs affaires, ils s'emportoient à des sottises estranges, & à des extrauagances qui degeneroient en Blasphemes. Il y en auoit mesme de si hardys, que de conseiller à Gongalo Picarre de prendre, & la Couronne, & le tiltre de Roy. Surquoy Sepeda mettoit en auant, Qu'il n'y auoit point de Roy, dont la Dignité n'eut pris origine de la Tyrannie; Qu'ainsi la Noblesse estoit descenduë de Cain, & le menu peuple du iuste Abel; ce qu'ils taschoient de prouuer par les Figures & les Blazons qui se voyent d'ordinaire dans la Chambre des Gentils hommes. A ce sentiment de Sepeda s'accoromoit fort eeluy de François de Caruajal, qui demandoit pour l'appuyer, s'il ne se trouuoit point quelque Testament, par lequel Adam eut destiné l'Empereur Dom Charles, ou le Roy de Castille, pour estre souverain Seigneur du Peru; Paroles que Gongalo Picarre oyoit volontiers, bien que toutesfois il le dissimulât par la froideur de sa Responce & de son Action, &c. C'estont les termes de Die.* Liu. 31.
go Fernandez, que j'ay tirez mot à mot, pour les rapporter icy. Ch. 34.

Après l'arriuée de ces Nauires, les Picarres y mirent dedans quantité de Picques, d'Arquebuzes, & d'autres munitions de Guerre. Ils s'y embarquerent apres, iusques au nombre de 150. des plus considerables, menant avec eux pour mieux autoriser leur affaire, l'Auditeur Sepeda, & Jean de Cacerez, Tresorier General de sa Maiesté. Cependant par ce voyage de Sepeda, se termina la Iurisdiction de la Ville des Rois, pource qu'il ne s'y trouua point d'autre Auditeur que le Licencié Carate, outre que Gongalo Picarre s'aduifa d'emporter avec luy le Sceau de sa Maiesté, afin qu'on ne s'en seruit à faire aucunes Patentes. Comme il auoit donc à sortir de la Ville des Rois, place qu'il iugeoit tres-importante pour l'execution de ses desseins, il s'aduifa fort à propos de n'en laisser le Gouvernement qu'à vn homme, qui fust capable de la bien garder pour luy, & de la defendre en tou-

tes les occasions qui s'en presenteroient. Il choisit pour eét effet, Laurens d'Aldana, Cavalier doué d'une grande prudence, discret au possible, aymé de tous, extrêmement riche, & qui auoit vn grand Département d'Indiens en la Ville d'Arequipa; luy laissant pour Gardes quatre vingts hommes, qui suffisoient pour la seureté de la place; pource que les principaux Seigneurs Indiens suiuoient Gonzalo Pigarre.

S'estant embarqué au mois de Mars, l'an 1545. il s'en alla par Mer droit au Port de Santa, qui est à 15. lieues de Truxillo, où il prit terre le iour de Pasques Fleuries. Il y fit quelque sejour, pour attendre que ses gens se ralliassent, ayant enuoyé pour ce mesme effet des Courriers exprez en plusieurs Contrées; Mais voyant qu'ils tardoient trop à venir, pour emmener ce qu'il auoit d'Espagnols en son Armée; afin de n'incommoder si fort ses Hostes, il prit sa marche en la Prouince appelée Collico, d'où il ne bougea, iusqu'à l'arriuée de ceux qu'il attendoit. Il leur fit faire monstre d'abord, & trouua qu'il auoit plus de six cens hommes, tant de cheual que de pied: Or bien que ce nombre ne fut pas fort aduantageux au Vice-Roy, si est ce que Gonzalo mettoit son principal aduantage en ses munitions de Guerre, en l'adresse de ses gens, qui estoient tous vieux Soldats; sçauans en la Milice, pour s'estre trouuez en plusieurs Combats, Outre qu'ils cognoissoient le País, & qu'ils se pouuoient dire inuincibles à la fatigue des Armes, pour l'auoir tousiours soufferte dans cét Empire-là, pour en faire la Conqueste. Mais tout au contraire de ceux cy; les gens du Vice-Roy, n'aguere venus d'Espagne, estoient ignorans en leur mestier, lasches au possible, & si mal armez, qu'ils manquoient la plus-part du temps de poudre, & d'autres semblables munitions necessaires à la Guerre.

GRANDES PRECAUTIONS DE GON-
galo Pigarre, pour trauerser vn Pais desert; Il se fait
voir au Vice Roy, qui se retire à Quitu; Merueil-
leuse prudence, & sage conduite de Laurens d'Al-
dana.

CHAPITRE XXV.

EN la Prouince de Collico, & en ses Frôtières, Gonçalo Pi-
garre ne perdit point temps, & fit toute sorte de diligences,
pour y recouurer le plus qu'il pût auoir de viures, & d'autres pro-
uisions necessaires à son Armée, ayant à passer par vn Desert de
plus de vingt lieues de longueur, où il n'y auoit ny eau, ny autre
rafraichissement; outre que le Pais, par tout sabloneux, y rendoit
la chaleur excessiue, & comme insupportable; Pour tascher
donc de se garentir d'un peril si euident, & des incommoditez
qui le menassoient, il mit ordre qu'on ne manquast point d'eau
par le chemin, commandant à tous les Indiens de la frontiere,
de se pouruoir d'une grande quantiré de Cruches, de Tinettes,
& de semblables Vaisseaux: En suite dequoy, ayant fait laisser
là tout ce que les Soldats auoient de bagage, comme liets, veste-
mens, vtenciles, & autres choses, dont il iugea qu'ils se deuoient
passer pour vn temps, il voulut que les Indiens, qui portoient or-
dinairement ce Bagage, le quittassent alors, afin de se charger
d'eau dans ce Desert, tant pour l'vsage des Hommes, que des
Cheuaux.

Suiuant ce Mandement, les Indiens se mirent à la legere, &
ne se chargerent point d'autre chose que d'eau, de peur qu'elle
ne vint à leur manquer. Cela fait, par le chemin ordinaire par où
l'on entre dans le Desert, on enuoya vingt-cinq Coureurs, avec
ordre exprés de se descourir au Vice-Roy, afin que ses Espions
luy fissent rapport, que Gonçalo Pigarre venoit par là. Il fit filer
cependant le reste de son Armée d'un autre costé, qui estoit de-
sert de mesme: tellement que les Coureurs s'en allerent ainsi,
portant sur leurs cheuaux ce qu'il leur falloit de provisions de
bouche. Mais le Vice-Roy, qui auoit ses Espions en l'un & en

l'autre de ces chemins, fut aduertý de la marche des Ennemis vn peu auant leur venuë; de sorte qu'à l'heure mesme il fit sonner l'alarme, disant, qu'il se faloit mettre en Campagne, & leur aller donner baraille: Il ne le fit pas pourtant; Car dès que ses gens furent hors de la Ville, il tira en grande diligence droit à la Coste de Cassa; ce qu'il ne pût faire si secrettement, que Gongalo Pigarre ne le sceut quatre heures apres; D'où il aduint, que sans entrer dans la Ville de Saint Michel, ny sans prendre d'auantage de prouisions, il commanda qu'on eut à suiure la piste du Vice Roy. Ils le suivirent cette nuit-là, dans vne estenduë de Pais de plus de huit lieux, & le mirent ainsi fort en peine: Car outre qu'ils emmenerent Prisonniers plusieurs de ses gens, dont ils firent pendre quelques-vns, pour l'auoir jugé necessaire, ils pillerent encore tout ce qu'ils trouuerent dans son Camp: Cela ne leur reüssit pas neantmoins, sans d'estranges difficultez; pour ce qu'il leur falût passer par des lieux si rudes, & si despourueus de toutes choses, qu'ils ne pouuoient s'en tirer qu'avecque peine, ny mesme y trouuer de quoy manger. Neantmoins, malgré tous ces obstacles, ils ne laisserent pas de nuire beaucoup aux Ennemis, dont ils arresterent plusieurs, qui ne pouuant suiure le Vice-Roy, furent contraincts de demeurer derriere. Ils'aduiferent d'ailleurs, d'escrire diuerses Lettres, qu'ils enuoyerent au hazard par des Indiens, aux principaux de l'Armée du Viceroy, avecque promesse de pardon, & de grandes recompenses, à quiconque le mettroit à mort. D'où il arriua depuis, que ces Lettres scandaleuses, & qui donnerent diuers soupçons, furent cause, comme il se dira cy apres, de beaucoup d'auantures tragiques, en la personne de ceux qui ne s'en pûrent iustifier: Car comme ces Guerres estoient Ciuiles, ceux qui couuoient dans l'ame des passions, & des animositez particulieres, enuoyoient de toutes parts des Lettres supposées au nom d'autrui, pour mettre mal dans l'esprit du Vice-Roy les personnes qui l'approchoient plus confidamment que les autres; Et toutesfois, quoy qu'en disent les Auteurs, il est tres certain, que ny Gongalo Pigarre, n'enuoya iamais des Lettres, pour faire tuer le Vice-Roy; ny les gens du Vice-Roy n'en escriuiet non plus à Pigarre: D'où il faut inferer, que les seules Trahisons furent la source des maux de cette Guerre-là, comme c'est leur ordinaire d'en causer vne infinité, pour assouuir les passios & les vengeances humaines.

Après que Gonçalo Pigarre eut suivi long-temps le Vice-Roy, avec non moins d'embarras, que de faim, & pour la rudesse des chemins, & pour n'y trouver aucunes provisions; pour ce que le Vice-Roy les enlevoit le premier, de tous les lieux par où il passoit; il arriva finalement en la Prouince d'*Atahuaca*: Là se dressant de faim le Vice-Roy, il s'arresta quelque temps pour s'y rafraîchir avec les gens, la fatigue & les incommoditez desquels estoient grandes; Outre qu'il y fut encore particulièrement obligé, pour avoir appris que son Ennemy estoit desjà si loing qu'il ne le pourroit atteindre. Sans se travailler donc davantage à courir après luy, il se fournit le mieux qu'il pût de toutes les choses les plus nécessaires qu'il trouua en cette Prouince-là, & en sortit à la fin, avec autant de diligence que de bon ordre, prenant la mesme marche que son Ennemy auoit prise. Le long du chemin il fit rencontre de quelques Soldats du Vice-Roy, qui se donnerent à luy, les vns pour estre trop harassés, & les autres pour le secret mescontentement qu'ils auoient: Luy cependant alloit tousiours du costé de Quitu, où il desiroit passionnément d'atriuer, pour y faire reposer ses gens, & les tirer de la nécessité où ils estoient, par le moyen des provisions & des viures qu'il se promettoit de trouuer en ce Pais-là, comme en effet il y en auoit vne tres-grande abondance.

Gonçalo Pigarre se remit alors à poursuivre le Vice-Roy, comme il auoit fait auparauant. Mais ce fut avec tant de precaution, Liu. 5.
 comme le remarque Carate, que de tous les Soldats qui s'estoient venus rendre à luy, il n'en voulut pas emmener vn seul, Ch. 20.
 tant pour ne se fier à eux, qu'à cause qu'il luy sembloit, que veu le peu de gens des Ennemis, il n'en auoit que trop de son costé, manquant de viures comme ils faisoient. Cependant, pour ne pecher point, à faute de precaution, il s'aduisa d'enuoyer ces Transfuges à Truxilló, en la Ville des Rois, & en d'autres Con-
 trées, où ils le prièrent de souffrir qu'ils se retirassent: Ce qui n'empescha pas toutesfois qu'il n'en fit pendre quelques-vns des Principaux, dont il auoit vn particulier sujet de se plaindre. Alors les autres Fuyards commencerent de semer de faux bruits en faueur du Vice-Roy, dans tous les lieux par où ils passioient, & à declamer contre la Tyrannie de Gonçalo Pigarre. Néanmoins, comme il auoit là plusieurs Partisans, aussi le soutenoient-ils, tant pource que son Entreprise leur sembloit iuste,

que pour ne pouuoir s'accommoder à l'humeur des Habitans de cette Prouince là, qu'il ſçauoit eſtre grands Amateurs des nouueautez, principalement les Soldats & les gens oïſifs; En cela bien eſſoignez du naturel des perſonnes de condition, & des principaux Seigneurs, qui reſmoignoient de ne deſirer rien ſi ardamment que la paix; Auſſi leur importoit-il extrêmement de l'auoir, ayant appris par eſpreuue, que la Guerre ne faiſoit que les incommoder, & les charger de nouueaux ſubſides, contre leſquels ſ'ils reſmoignoient la moindre auerſion, ils couroient vn hazard plus grand que les autres, d'autant qu'à la moindre occaſion, celuy du Gouuernement duquel ils dependoient, leur faiſoit couper la gorge, & conſiſquoit leurs biens, au profit de ceux qu'il vouloit fauoriſer. Or comme ces choſes ne pouuoient eſtre ſi ſecrertes, qu'elles ne vinſſent à la cognoiſſance des Lieutenans de Gonçalo Piçarre; autant qu'ils trouuoient dans ſa Iuriſdiction de ces Bontefeux, Semeurs de faux bruits; autant en puniſſoient-t'ils, ſelon qu'ils le iugeoient conuenable: de ſorte qu'en la Ville des Rois, où la plus-part de ces Vagabonds s'eſtoient retirez, il y en eut pluſieurs de pendus, par la main meſme du preuoſt ordinaire, qu'on appelloit Pierre Marrin de Sicile, grand Partisan de Gonçalo Piçarre, dont il embraiſſoit les intereſts plus paſſionnément que pas vn autre de la Ville: Car bien que Laurens d'Aldana en fut Lieutenant, ſi eſt-ce qu'il n'alloit pas ſi viſte en beſongne, de peur qu'il auoit de s'entremettre de quelque affaire qui attiraiſt ſur luy les plaintes publiques: ce qui eſtoit cauſe qu'il empeſchoit le plus qu'il pouuoit, qu'on ne condamnaſt perſonne à perdre la vie, ny les biens meſmes: Auſſi fut-il remarqué de rous, que durant tout le temps qu'il administra la Juſtice pour Gonçalo piçarre, bien que ſa Charge ſemblaiſt le deuoir obliger à pencher touſiours de ſon coſté; ſi eſt ce qu'il ne voulut iamais faire en faueur de luy, aucune choſe qui pût l'engager d'affection à ceux de ſon Party: Comme au contraire, il accueillit touſiours de bonne façon, rous ceux qu'il recognoiſſoit auoir de l'inclination pour le Vice-Roy; Ce qui obligeoit preſque tous ceux des autres prouinces de ſe tenir à ſa maxime, pour l'eſtimer la plus aſſeurée. De quoy cependant ſe plaignoièr avec grande raiſon, les vray Amis de Gonçalo Piçarre, comme le ſceut fort bien teſmoigner vn des Iuges de cette meſme Ville, appellé Chriſtophle de Burgos.

Car Laurens d'Aldana, s'estant mis à tancer son zele publicque. ment, le traitta si mal, que des paroles, il en vint aux coups, & le tint Prisonnier durant quelque temps. Or quoy qu'il vint tous les iours à Gonçalo Picarre, de nouueaux Aduis, qui luy deuoient rendre suspecte la fidelité de ce Personnage; si est-ce que toutes les assurances qu'on luy en donna, ne purent empescher qu'il ne se fiasst tousiours en luy, & ne le conseruast dans sa Charge; Car estant si esloigné comme il estoit, il crût par raison d'Estat, qu'il ne deuoit point la luy oster, à cause des gens de Guerre, dont il auoit avec luy vn assez bon nombre, outre que les volentez des Principaux de cette Ville là luy estoient acquises. Voilà comme en parle Augustin de Carate.

*GONCALO PICARRE S'OBSTINE A
poursuiure le Vice-Roy, auquel il donne d'estranges
trauerses; Grandes incommoditez dans les deux Armées; avec la Mort violente du Mestre de Camp, &
du Capitaine du Vice-Roy.*

CHAPITRE XXVI.

BIEN que Gonçalo Picarre nes'espargnast point à poursuivre le Vice-Roy, il luy sembla neantmoins qu'il le faloit presser dauantage, dans la marche qu'il auoit prise, & ne relascher point, qu'il ne l'eut entierement défait. Or afin de nes'embarrasser à le suivre avec toute son Armée, il enuoya François de Caruajal apres luy, avec cent cinquante Caualliers, pour marcher apres son Arriere-garde: D'un autre costé, il escriuit à Hernand Bachicao, qui se renoit à la Coste, qu'il eut à pouruoir à la seureté des Vaisseaux de Tumpiz, & à l'aller ioindre à Quito. Apres ces Ordres donnez, pour animer par son exemple François de Caruajal, son Mestre de Camp, il poursuivit avecque futie le Vice Roy, qui alloit tousiours plus auant, tout fatigué qu'il estoit, & encourageoir ses Soldats le mieux qu'il pouuoit. Ce mesme iour il fit avec eux huit lieux de chemin, apres lesquelles ils croyoient estre eschappez d'entre les mains de leurs Ennemis; Mais François de Caruajal, qui ne dormoit point, ar-

riua environ la minuit, où ils estoient, & leur fit donner l'alarme par vn Trompette.

Le Vice Roy s'estant leué tout à mesme temps, rallia ses gens, qu'il fit mettre en ordre, & continua sa marche: Alors Caruajal qui le suiuoit, en prit quelques-vns, qui pour manquer de chevaux, n'alloient que fort lentement, de sorte que dès le point du iour, les vns & les autres se recognurent: Et d'autant que la partie n'estoit pas esgale, le Vice. Roy voyant les Ennemis en fort petit nombre, fit alte aussi-tost, faisant deux Escadrons d'environ cent cinquante hommes: ce qu'apperceuant Caruajal, il ne voulut point hazarder le combar, & se resolut à la Re-
traite. Comme donc le Vice. Roy prit garde que l'Ennemy luy quittoit le champ, il se remit en chemin, au grand regret de ses gens, qui estoient si abbarus de faim & de lassitude, que les hommes ny les chevaux n'en pouuoient plus. Ce qui le toucha si fort, qu'il permit à ceux qui se voudroient retirer, de le faire, comme bon leur sembleroit; Mais pas vn d'eux ne le voulut abandonner, si bien qu'ayant protesté de mourir avec luy, ils passerent outre, malgré les obstacles de la faim, & leurs travaux ordinaires, qui s'augmentoient grandement de ne point dormir; pource que de la façon qu'on les hastoit d'aller, on leur estoit tout moyen de reposer. Gonzalo Pigarre sceut cependant cette aduanture du Vice Roy, & le peu d'effet de l'alarme que François de Caruajal luy auoit donnée; Ce qui fit que plusieurs, pour auoit des animositez particulieres contre ce Mestre de Camp, le blasmerent en diuerses façons; Car ils oserent bien dire, qu'au point où il auoit surpris les Ennemis, il eut pû sans cette alarme les tailler tous en pieces; & c'est dequoy les Historiens le blasment aussi: le ne suis pas neantmoins de leur sentiment, & n'ay garde de iuger si mal d'un si vaillant Homme, apres auoir ouy dire en sa faueur à plusieurs grands Chefs; *Que Jules Cesar n'auoit iamais esté plus Capitaine que luy.* En effet, s'il ne voulût combattre en cette occasion, ce fut pour ne s'exposer en vn danger eminent, estant certain, comme les Historiens le remarquent, que le Vice Roy auoit alors cent cinquante Hommes, au lieu que Caruajal ne s'en trouuoit que cinquante: à cause dequoy il dit alors courageusement; *Qu'il falloit faire vn Pont d'argent aux Ennemis qui fuyoient.*

L'adiousse à ceuy, *Que n'ayant pas eu ordre de combattre, il*

eut raison de ne le point faire, pour ne se perdre pas volontairement; Qu'au reste, en matiere d'Entreprise de guerre, auant que de condamner les Capitaines, il est necessaire de sçauoir le fondement de ce qu'on appelle faute en eux; chose, à vray dire, extrêmement difficile, pour le merueilleux soin qu'ils doivent auoir d'observer le secret, en ce qui regarde la Milice. Apres l'action de ce Mestre de Camp, Gongalo Pizarre luy enuoya le Licencié Caruajal, avec deux cens hommes de secours, qui poursuivirent le Vice-Roy, iusques en la Prouince & la Ville d'*Aahuaca*, gaignant tousiours sur luy du Bagage, des Cheuaux, & des Hommes, en telle quantité, qu'à son arriuée en ces quartiers là, bien à peine se trouua-til quatre-vingts Soldats. Ce qui fut cause que l'Ennemy se voyant talonné de si près, fit de necessité vertu, & se resolut de pousser iusques à Quitu, pour y assister ses gens des prouisions de bouche qu'il esperoit d'y trouuer, & dont ils auoient vn extrême besoin: Car la violence de la Faim les pressoit de telle forte, qu'à mesure que leurs Cheuaux ne pouuoient plus aller, ils estoient contrains de les manger; Ce que firent encore les Soldats de Gongalo Pizarre, n'estant pas moins affamez que ceux du Vice-Roy; pource qu'en tous les lieux par où passoit Blasco Nuñez, il y faisoit tour le degast qu'il pouuoit, pour empescher que son Ennemy ne put se preualoir de la moindre chose. Dans cét embarras Caruajal fit mourir quelques vns des principaux Prisonniers, à sçauoir Montoja, & Briseno, l'vn habitant de Pioura, & l'autre de Puerto Viejo: * * * * * comme encore Raphaël Bela, & vn certain autre qu'on appelloit Balassar. A ce dernier secours, Gongalo Pizarre en adiousta pareillement vn autre nouueau de soixante hommes, des mieux montez de son Armée, conduits par le Capitaine Jean d'Acosta, qui pour estre frais donna bien de la peine au Vice-Roy; qu'vne extrême fatigue auoit reduit à n'en pouuoir plus; Car, comme dit Diego Fernandez, il marchoit iour & nuict avec ce peu de gens qui luy restoient de tant d'eschets qu'il auoit receus; ce qu'il faisoit avec de si grandes incommoditez, qu'il ne trouuoit la plus-part du temps que de l'herbe pour tout aliment: Dequoy il se dépit si fort, que reduit au dernier desespoir, il maudissoit à tout moment le iour auquel il auoit mis le pied dans ce Pais là; comme encore, les hommes qui estoient là venus d'Espagne, & pareillement les Nauires qui les y

„ auoient portez; puis que pareux ils se voyoient exposez à des
 „ laschetz, & des trahisons si peu supportables. Cependant,
 „ Iean d'Acosta le courroit tousiours en diligence, tellement qu'il
 „ ne cessa de le poursuiure, iusques à ce qu'il le vid assez proche
 „ de Calua, où le Vice-Roy fatigué voulut vn peu se délasser, à
 „ la faueur de la nuict, s'imaginant que ceux qui l'auoient suiuy
 „ si long-temps, luy donneroient possible quelque loisir de se re-
 „ poser: Tout le contraire arriua pourtant; pource qu'auant le
 „ poinct du iour Iean d'Acosta s'en alla donner sur luy, & sur les
 „ gens; de telle sorte que se meslant parmy les premiers, il mit en
 „ desordre le Vice-Roy, qui neantmoins trouua moyen de se sau-
 „ uer avec ses Capitaines, & soixante dix hommes, des mieux
 „ montez de ses gens. Iean d'Acosta s'estant saisi des autres, & du
 „ Bagage, fit alte aussi-tost, & resolut d'en demeurer-là, ne pou-
 „ uant pas faire dauantage: Cela donna quelque sorte de relasche
 „ & de seureté à l'infortuné Vice-Roy, qui ne fut pas plustost ar-
 „ riué en la Prouince de Calua, qu'il y voulut passer sa colere fut
 „ Gaspar Gil, & Hierosme de la Cerna, deux de ses Capitaines.
 „ Il prit garde qu'ils s'estoient mis deuant, & destachez du gros de
 „ l'Armée; ce qui luy fit soubçonner, qu'ils l'auoient fait à des-
 „ sein, pour s'en aller rompre vne Chaussée, qui estoit sur le che-
 „ min, par où il deuoit passer, & laquelle à son arriuée à Pioura,
 „ il auoit fait estançonner avecque de grosses poutres, reparation
 „ qu'il n'auoit point faite sans beaucoup de trauail, ce passage se
 „ rencôtrant aux aduenues d'vn Rocher, près d'vne grande Riue-
 „ re, au bas d'vn dangereux precipice, en la Prouince appelée *Am-
 „ boca*: tellement qu'en cas qu'on vint à le rompre, on ne le pou-
 „ uoit refaire de nouueau, à moins que d'y trauailler long-temps.
 „ Et d'autant qu'à ces ombrages qu'il prit de ces deux Chefs, se
 „ trouuerent ioints quelques autres soubçons, fondez sur des Ad-
 „ uis qu'on luy donna, qu'ils se vouloient reconcilier avec Gon-
 „ çalo Pigarte, & que mesme ils luy auoient escript; Toutes ces
 „ choses ensemble furent cause qu'il se resolut de leur oster la vie.
 „ Comme en effet il n'y manqua pas, & leur fit couper le col, du-
 „ rant ce peu de relasche que luy donnerent les Ennemis. Cela
 „ fait, il se remit en chemin, avecque moins de trauail, & de crain-
 „ te qu' auparauant; de sorte qu'à quelque temps de là, il se rendit
 „ à *Tomebamba*, où il fit mourir pareillement Rodriguez d'Ocam-
 „ po, son Mestre de Camp, par luy reconnu iusques alors pour

l'un de ses plus intimes Amis; à quoy le porta sans doute le soupçon qu'il auoit eu des deux Capitaines executez à mort, bien qu'ils ne l'eussent iamais abandonné en tous ses travaux: D'où il aduint depuis, que si les sentimens qu'on eut dans le Peru de tous ces actes tragiques se trouuât diuers, les iugemens le furent aussi, les uns accusant les morts d'auoir esté coupables, & les autres les iustificans des trahisons dont on les chargeoit. Au sortir de Tomebamba, Blasco Nuñez entra dans Quito, apres auoir fait vn assez long chemin, sans souffrir les incommoditez de la faim, ny les autres miseres que iusques alors il auoit endurées. Or pour ce qu'auant son arriuée à Quito, il fut aduertý que François d'Olmos, qu'il soupçonnoit desia, & ceux qui estoient venus avecque luy de Puerto Viejo, auoient semé de fort mauuais bruits au desauantage du seruice de sa Maiesté; dès aussi tost qu'il fut arriué en cette Ville-là, il fit faire des informations, pour apprendre de quelle sorte ils estoient sortis de Puerto Viejo, & ce qu'ils auoient dit & negocié depuis: d'où il s'ensuiuit qu'apres auoir consulté l'affaire avec le Licencié Aluarez, les uns eurent la teste tranchée, & les autres furent pendus comme Traistres, parmy lesquels on executa de mesme Aluaro de Caruajal, le Capitaine Hoieda, & Gomez Estallio; car pour le regard de François Olmos, il eut la vie sauue, pour n'auoir esté trouué coupable. J'ay pris cette Relation de Diego Fernandéz Palentin, laquelle ne s'accorde aucunement à celle de François Lopez de Gomara, qui descriuant la mort de ces Capitaines, en parle comme ils s'ensuit.

Pizarro, dit-il, enuoya apres Blasco Nuñez, le Capitaine Jean d'Acosta, avec soixante Cheuaux legers, si bien que le Vice-Roy se voyant tenu de si près, se hastá d'aller à Tomebamba, tout en alarme, & non moins pressé de la faim, que de la fatigue qu'il luy falloit endurer: D'abord il se saisit de Hierosme de la Cerna, & de Gaspar Gil, ses Capitaines, qu'il fit mourir sur un simple soupçon qu'ils escriuoient à Pizarro, quoy qu'ils ne le fissent pas; du moins il est bien certain que Pizarro n'en receut iamais aucunes Lettres. Pour la mesme défense, il fit tuer en ore à coups d'Espées Rodriguez d'Ocampo, son Mestre de Camp, lequel au dire de tous, n'estoit nullement coupable, & meritoit vne meilleure recompense, apres l'auoir tousiours suivy & seruy. Comme il fut arriué à Quito, il mādá au Licencié Aluarez, qu'il eut à faire pendre Gomez Estallio, & Aluaro de Caruajal Habitans de Guayaquil,

disant qu'ils auoient conspiré contre sa personne, &c.

Voila ce que dit Gomare, touchant ces executions sanglantes, qui furent scandaleuses à tout le Peru, où les Mefdisans en parloient, suivant leur passion; Mais elles se trouuerent sur tout fort dommageables au Vice-Roy, d'autant que tel chastiment n'estant fondé que sur vn simple soubçon, sans qu'il y eut aucune preuue, obligea plusieurs de ceux qui se proposoient d'aller seruir le Vice Roy, de n'en rien faire pour tout, de peur qu'il ne leur arriuaist le mesme qu'aux autres,

Mais il est temps, ce me semble, que nous laissions le Vice-Roy dans *Quitu*, & Gonçalo Piçarte en estat de courir apres luy, pour dire les choses qui aduintent en la Prouince des Charcas, tandis que celles-cy se passerent dans le Royaume de *Quitu*, Pais esloigné l'vn del'autre de sept cent lieues, qui sont les bornes du Peru, merueille d'autant plus grande, qu'il est à peine croyable que cette Guerre deust s'estendre si loing en si peu de temps.

MORT DE FRANÇOIS d'ALMENDRAS;

*Et soustenement de Diego Centeno, arresté par la
résistance d'Alonse de Toro.*

CHAPITRE XXVII.

NOUS auons dit cy-dessus, que plusieurs des principaux Habitans de la Ville de Plata, mandez par les Lettres du Vice-Roy, se mirent aussi-tost en chemin, d'où ils s'en retournerent chez eux, comme ils sceurent leur emprisonnement. Où il est à remarquer, que Gonçalo Piçarte enuoya pour Lieutenant en cette mesme Ville François d'Almendras, personnage qui suiuoit veritablement le Party de Gonçalo, & qui se pouoit nommer son Confident. Comme tel aussi, sçachant qu'un Cavalier des principaux de la mesme Ville, auoit dit en sa maison, Qu'il n'estoit pas possible que l'Empereur ne regnast vn iour, il se saisit de luy, & le fit mettre dans la Prison publique, avecques de bonnes gardes. Or d'autant qu'il arriua depuis, que les plus considerables de cette Communauté, l'ayant prié de le vouloir

deſſiuer, ou de ſouffrir du moins qu'on le mit en vne autre Pri-
 ſon, qui fut plus conforme à la qualité de ſa perſonne, prirent
 garde qu'il ne leur fit pas la reſponſe qu'ils prétendoient en auoir
 ils luy dirent hardiment, *Que ſ'il ne le tiroit bien-toſt de là, ils l'en*
tireroient eux-mêmes ; dequoy le Lieutenant ſ'offenſa fort,
 & n'en voulut point pourtant faire de ſemblant pour l'heure ;
 mais il attendit que la minuit fut venuë, & alors il s'en alla luy-
 meſme à la Priſon, où il commanda qu'on donnast le gartot à
 Dom Gomez, puis le tirant à la Place, il luy fit couper la teſte.
 Comme donc cette Action, ainſi que le remarque Carate, fut Liu. 5.
 tout à fait tragique, auſſi deſpleût-elle grandement à tous les Ch. 27.
 Habitans, chacun deſquels s'en tint offencé en ſon particulier.
 Mais elle fut ſenſible ſur tout à Diego Centeno, natif de Ville-
 Rodrigo, & des plus grands Amis de Dom Gomez. Or bien
 qu'aux premiers ſouſſeuemens de Gonçalo Piçarre, ce meſme
 Centeno le ſuiuit, & qu'il fut avec luy, depuis Cozco, iuſques
 à la Ville des Rois, eſtant des principaux Deputez vers l'Armée,
 comme Procureur de la Prouince des Chareas ; ſi eſt ce qu'ayant
 remarqué depuis le mauuais deſſein de Gonçalo Piçarre, en ce
 qu'il eſtendoit ſon pouuoir beaucoup plus auant qu'il ne l'auoit
 publié d'abord, il luy demanda permiſſion de s'en retourner en
 ſon Département d'Indiens, où il reſidoit quand on luy appor-
 ta la mort de Dom Gomez. Il reſolut donc de la vanger, par la
 meilleure voye qu'il pourroit tenir, & d'affranchir des violences
 de François d'Almendras ceux qui viuoient ſous ſa Tyrannie.
 Ayant formé ce deſſein, il s'aduifa de le communiquer aux prin-
 cipaux Habitans, qui eſtoient Lopez de Mendoza, Alonſe Pe-
 rez d'Esquiuor, Alonſe de Camargo, Hernand Nuñez de Segura,
 Lopez de Mendieta, Iean Hortis de Carate ſon Frere, &
 quelques autres, auſquels il ſe fioit fort. Apres auoir conſulté
 entr'eux, ils reſolurent de tuer Almendras, comme ils firent, vn
 Dimanche matin, s'eſtant donné rendez-vous dans ſa Maiſon,
 ſous pretexte de le vouloir accompagner à la Meſſe ; Mais au lieu
 de cét office, ils le poignerderent ; & ſans attendre qu'il fut mort,
 le traſnerent à la place, où ils luy trancherent la teſte, comme
 à vn Traiſtre, ſe declarans tous pour ſa Maieſté : Ce qui leur fut
 d'autant plus facile de faire, qu'ils n'eurent pas beaucoup de
 peine à retenir le peuple, qui deſia ne vouloit point de bien à
 François d'Almendras ; Et ainſi qu'apres cette action, ils prirent

les Armes, & firent leur General Diego Centeno, qui en mesme temps fit diuers Capitaines de gens de cheual & de pied, leua des troupes; se munit des choses necessaires pour la Guerre, & mit des gardes sur les chemins, afin qu'on ne pût scauoir ce qu'il auoit fait. Auec cela, il enuoya à Arequepa Lopez de Mendoza, avec ordre de se saisir, s'il pouuoit, de Pierre de Fuentes, qui commandoit dans la Place, en qualité de Lieutenant de Gonçalo Piçarre. Luy cependant, ne sceut pas plustost par les Indiens ce qui venoit d'arriuer dans le País des Charcas, qu'il sortit de la Ville, où entra Lopez de Mendoza, lequel avec tout ce qu'il y pût trouuer d'armes, d'argent, de chevaux, & de gens de Guerre, s'en retourna ioindre Diego Centeno dans la Ville de la Plata. Il se trouua qu'il auoit 250. hommes bien equipez, lesquels Diego Centeno ayant ioints, il leur fit vn long discours de tout ce qui sur le faict des Ordonnances estoit arriué iusques alors, par les artifices de Gonçalo Piçarre. En suite dequoy, il condamna son dessein, cōme pernicieux à l'Estat, leur remettant en memoire les morts violentes qu'il auoit données à plusieurs bons seruiteurs du Roy: Il leur remonstra pareillement, comme par menaces, & par la force des Armes, il s'estoit fait nommer Gouverneur de cēt Empire-là; qu'il auoit vsurpé les deniers Royaux, & les biens de plusieurs particuliers; fait son propre de diuers Départemens d'Indiens, en les ostant à leurs legitimes Possesseurs; & mesme souffert qu'on parlat publiquement au desaduantage de sa Maieité. A toutes lesquelles choses il en adiousta quantité d'autres contre Gonçalo Piçarre; Et pour conclusion, leur representa qu'en qualité de Fidelles Sujets, ils estoient obligez de seruir leur Roy; au lieu que s'ils faisoient autrement, outre qu'ils failliroient contre leur deuoir, ils en seroient generalement hays de tous les gens de bien.

Par ces raisons, & autres semblables, Diego Centeno sceut tellement persuader ces gens-là, qu'ils s'offrirent tous à luy obeïr, & à le suiure tres-volontiers, par tout où il les voudroit mener.

La premiere chose qu'il fit alors, fut d'enuoyer vn Capitaine sur le grand chemin de Cozco, avecque des gens pour le garder, & empescher, s'il estoit possible, que le bruit de ce qu'il auoit fait, ne courut point à la Ville, iusques à ce qu'il eut leué beaucoup de gens, & fait de plus grands preparatifs d'Armes, de Cheuaux, de Poudre, & d'autres munitions de Guerre: Mais
quelque

quelque peine qu'il prit pour faire garder ponctuellement le secret, il ne pût jamais empêcher qu'il ne fut violé; pource que par le moyen des Indiens, la nouvelle de cét Armement vint droit à Cozco, d'où cent lieues plus avant dans le Septentrion, elles s'espandirent iusques à la Ville des Rois, où Alonse de Toro estoit alors Lieutenant pour Gonçalo Pigarre, tellement que par son ordre, il faisoit soigneusement garder les aduenües de ce costé là, dautant que Pigarre apprehendoit que le Vice-Roy ne prit le chemin de la Montagne, pour se rendre secretement à Cozco. Ce fut donc là qu'Alonse de Toro eut aduis, non seulement de la Rebellion de Diego Centeno, & de la mort de François d'Almendras; mais encore de toutes les particularitez des preparatifs qu'il auoit faits, comme du nombre des Fantassins, & des gens de Cheual par luy leuez, ensemble des Armes à feu, & de toutes les autres choses par luy faites iusques alors, dont les Indiens luy firent vn ample recit. Comme il s'en fut donc bien esclairey, il s'en alla en diligence à Cozco, leua des gens, & tascha de gagner ensemble les Iuges, & les principaux Seigneurs de cette Ville-là, en leur persuadant de prendre les Armes pour le deffence de Gonçalo Pigarre, contre le Capitaine Diego Centeno. Il leur declara pour cét effect, Qu'il estoit resolu de l'aller attaquer, puis qu'il se trouuoit dans la Ville assez de Soldats, d'Armes, & de Cheuaux, pour luy resister, voire pour le vaincre; Et pour mieux iustifier sa cause, il leur dit, *Que Diego Centeno auoit fait vne émeute, sans en estre authorisé, & sans y estre porté que par la seule consideration de ses intersts, bien qu'il eut pris pour pretexte le seruice du Roy; Que Gonçalo Pigarre estoit legitime Gouverneur en ce Royaume-là, & qu'il se deuoit tenir pour tel, puis qu'en attendant là-dessus l'ordre de sa Maiesté pour luy obeïr, il maintenoit le País en bonne Paix: Et partant que Centeno ayant osé se souleuer, sans aucune cause qui fut valable, meritoit bien qu'on le chastast d'une Action si scandaleuse. Outre tout cecy, pour mieux faire valoir le Párty de Pigarre, il leur remonstra, Qu'ils demorent bien se mettre en memoire, & pres. r exactement les signalez serui. es que cét excellent Homme auoit rendus à tous les Soldats, & aux principaux Habitans de tout cét Empire-là, & qu'il s'estoit employé pour leur commune conseruation, à faire reuocquer les Ordonnances, iusques à exposer ses biens, & sa pe sonne, pour le Public; Estant bien certain que si les Ordonnances eussent esté mises entierement à exécution, par*

vn des Habitans ne se fut trouué de quoy subsister, ny de quoy fournir à l'entretienement des gens de Guerre; ausquels ceux du Pais donnoient ordinairement à viure; Que pour recognoissance de ce bien fait, les vns & les autres estoient obligez de soutenir son Party; Qu'au reste, Gonzalo Pizarre n'auoit iamais rien fait contre les Ordres, & le service de sa Maiesté; Qu'il n'estant mis en chemin pour aller appeller des Ordonnances, & ayant trouué que l'Audience Royale auoit pris, & banny du Royaume le Vice-Roy, il n'auoit pas eu mauuaise raison de se rendre Protecteur de tout le Pais, pour le deffendre, comme il faisoit, & qu'il ne s'estoit déclaré contre luy, qu'à la sollicitation & par l'ordre exprés de l'Audience Royale. Pour preuue de quoy, il mit en auant l'exemple du Licencié Sepeda, le plus ancien Auditeur de sa Maiesté, qui s'estoit iecté dans le Party du mesme Pizarre. Surquoy il conclud, Qu'ils ne deuoient nullement s'enquerir si les Auditeurs auoient pû luy donner le Gouvernement, puis que sa Maiesté seule pouuoit iuger de cette affaire-là; Que iusques alors personne ne s'estoit opposé au contraire, & qu'il ne se trouuoit personne aussi, qui avec plus de merite qu'en auoit Gonzalo Pizarre, ny plus de satisfaction de tout le Public, pût gouverner cét Empire-là, Qu'il l'auoit conquis avecque ses Freres, aux despens de ses biens, & au hazard de sa vie; Queluy seul cognoissoit de bonne façon les autres Conquerans; Qu'il scauoit ce que valoit vn chacun d'eux, & ce que meritoient les travaux de tous; pour leur en donner la recompense; Ce que ne pouuoient faire les Gouverneurs nouuellement arriuez d'Espagne.

Toutes ces choses ardamment conceuës, & hardiment prononcées par vn homme qui ne craignoit rien, & qui scauoit l'art de se faire craindre, luy gaignerent les volontez de ceux qui l'ouïrent, pas vn desquels n'osa le contredire, & ainsi ils luy promirent tous de le suiure contre Diego Centeno. Sur cette esperance, Alonfo de Toro se declara leur General, leua des gens de Guerre, nomma des Capitaines, & prit tout ce qu'il trouua de cheuaux dans la Ville, qui appartenoyent à des personnes malades, ou inhabiles aux Armes, voulant de plus que les Principaux du Pais le suiussent en personne. Par ce bon ordre, & ces diligences ayant mis sur pied près de trois cens hommes, il sortit à six lieües de Cozco, & prit sa marche du costé du midy. Quelques vingt iours se passerent, sans qu'il pût scauoir aucunes nouuelles des Ennemis; à la fin desquels il se resolut de ne les plus attendre, & de les aller chercher, pour ne perdre da-

uantage le temps. Il alla donc plus auant, & se rendit à douze lieuës du Quartier où estoit Diego Centeno, qui se retira soudain, pour auoir diuisé ses troupes en deux; ce qui n'empescha pas neantmoins que l'un & l'autre ne s'enuoyassent des Entremetteurs, & mesme des hostages, pour voir s'ils ne pourroient point venir à vn Accommodement, plustost qu'à vne Bataille; Mais il se vid par espreuue, qu'il leur fut impossible de s'accorder, ny de conclure la Paix. Alonse de Toro se resolut alors de combattre l'Ennemy; mais Diego Centeno, & ses gens ne furent pas d'aduis d'aller si viste, en vne affaire de ceste importance, sans l'auoir auparauant bien examinée: Ils scauoient qu'ils ne pouuoient se hasarder à ce choc, sans y courir vn manifeste danger. Qu'un mauuais succez pourroit de beaucoup accroistre les forces des-Ennemis, & diminuer celles du Party du Roy, ou mesme les perdre tout à fait, pour peu qu'elles fussent affoiblies; ce qui fut cause que pour ne s'exposer à ce danger, ils firent retraite, menant avec eux vne grande quantité de moutons chargez de viures. Cependant, les principaux Curacas de ces Prouinces-là, s'acheminèrent par vn Pais extrêmement desert, & qui auoit en longueur plus de quarante lieuës d'estenduë: ce qu'ayant sceu Alonse de Toro, il les poursuiuit iusques à la Ville de Plata, qui est à cent quatre-vingts lieuës de Cozco. Mais d'autant qu'il la trouua toute deserte, & qu'avec cela il ne iugea pas qu'il s'y pût tenir commodement; pource qu'il n'y auoit aucunes provisions de bouche, & que les Indiens y estoient tous en alarme, à raison de l'absence de leurs Curacas; il se resolut de tourner à Cozco, & de ne les poursuiure pas dauantage. Il se hastia donc le plus qu'il pût, avec cinquante Gens-d'armes qu'il prit avec luy, & mit ordre que le Capitaine Alonse de Mendoza, suivy de trente hommes des mieux montez de son Armée, se tint à l'Arriere garde, pour faire marcher ceux qui estoient deuant, & les deffendre de Diego Centeno, en cas qu'il les attaquaist, afin qu'avec ceste precaution, ils se peussent rendre à Cozco, où il les trouueroit.

*DIEGO CENTENO ENVOYE DES GENS
apres Alonso de Toro; Soubçons de Rebellion dans la
Ville des Rois, appaisez par Laurens d'Aldana; Gon-
çalo Piçarre fait aller en la Prouince des Charcas,
François de Carnajal, son Mestre de Camp, & ce
qu'il fit en ce Voyage.*

CHAPITRE XXVIII.

DIEGO Centeno ayant appris par les Indiens, qu'Alonse de Toro s'en estoit retourné à Cozco, ne sceut qu'en penser, & s'estonna grandement de ce qu'estant venu à luy avec de si grandes forces, & à dessein de l'attaquer, il s'estoit ainsi retiré, sans aucune raison apparente; Mais enfin, apres y auoir bien pensé, vne si estrange nouueauté luy fit croire que ceste Retraite precipitée, & ce qu'il auoit diuisé ses gens en trois diuerses troupes, ne pouuoit proceder que de la desffiance qu'il se donnoit d'eux, croyant qu'ils eussent quelque mauuaise volonté pour luy. Se voulant donc preualoir de ceste occasion, il enuoya en queue des Ennemis, le Capitaine Lopez de Mendoza, avec cinquante hommes bien montez, & vn ordre exprés d'arrester tous ceux qu'il trouueroit en chemin. En effet, ce Capitaine en prit iusques à cinquante de ceux qui marchoient en la seconde Brigade, Alonso de Mendoza n'estant pas encore sorti de la Ville de Plata, en desarma d'abord la plus-part, & leur osta leurs cheuaux, qui neantmoins leur furent rendus depuis, & mesme on les assista de quelque argent, pource qu'ils promirent de seruir actuellement en la Bataille qui se deuoit donner; & toutes-fois cela n'exempra pas du gibet quelques-uns d'entr'eux (dont les Historiens ne disent pas le nombre) où il les enuoya comme suspects, & trop grands Amis d'Alonse de Toro. Alors Lopez de Mendoza se remit en chemin apres Alonso de Mendoza, qui sçachant ce qui s'estoit passé alla d'un autre costé, de maniere qu'on ne pust l'attraper. Cependant, Diego Centeno arriua en mesme temps à la Ville de Plata, où il fut trouué à propos de fai-

re quelque séjour, pour recevoir les gens de secours, se pourvoir d'Armes, & donner ordre aux choses les plus nécessaires. D'un autre costé Alonse de Toro entra dans Cozco, sans qu'on pût s'imaginer la cause de sa retraite, dont la précipitation & le desordre auoient donné sujet à son Ennemy, quoy qu'il fut assez embarrassé, de rebrousser contre luy, sur tout comme il vid qu'il luy donnoit des aduanrages, qui l'auroient obligé tres-volontiers à le suiure, s'ils eussent esté vn peu plus grands. Voilà quels furent de parr & d'autre, ces euénemens inopinez; les nouvelles desquels vinrent tout aussi-tost à la Ville des Rois. Comme il y auoit là des gens partagez des deux factions; ceux qui tenoient pour le Vice-Roy, osoient bien dire en public, Qu'ils estoient comme rentez d'aller ioindre Diego Centeno; si bien que ceux du Parry de Gonçalo Piçarte, voyant que Laurent d'Aldana souffroit ces choses, & ne daignoit en chastier les Auteurs, le soupçonnoient de s'entendre avec eux, pour le desir qu'il auoit d'estre leur Chef.

Sur cette apprehension ils le furent trouuer, & luy racontèrent par le menu à quel point d'insolence se laissoient aller ceux qui parloient si licentieusement; A quoy seruit encore beaucoup la nouuelle qui vint en mesme temps en la ville des Rois, de la mort violente que le Vice-Roy auoit donnée à ses gens, & des aduanrages gaignez sur luy par Gonçalo Piçarte, qui le tenoit de si près, qu'il ne sçauoit de quel costé se tourner. Toutes ces choses ensemble abbatirent le courage à ceux qui se vouloient declarer pour luy; & le releuerent de telle sorte aux Partisans de Piçarte, que les principaux d'entr'eux, iugerent à propos de se declarer à Laurens d'Aldana. Ils luy dirent donc, *Qu'il y auoit en cette Ville-là des hommes suspects, qui troubloient ceux de leur Par-ty par des paroles scandalieuses; Qu'on feroit bien de les chastier, ou par le Bannissement, ou par la perte de la vie; Et que pour eux, ils s'offroient à s'enquérir qu'elles gens c'estoient, & en quel nombre.* A quoy Laurens d'Aldana respondit, *Qu'il n'auoit point encore oüy parler de cela, & passant qu'on eut à informer soigneusement contre tels Factieux, afin de les faire chastier à toute rigueur.*

Les Denonciateurs se retirerent, ayant eu cette responce, & se saisirent vn peu apres de quinze personnes, à qui le Preuost Pedro Martin de Sicile, autrement appelé Dom Benir, se resolut de donner la gesne, & mesme de les executer à mort, pour

peu qu'ils confessassent le fait, tant il auoit d'affection, & de zele pour le Party de Gongalo Pigarre. Mais Laurens d'Aldana, qui en eut le vent, leur osta les Accusez d'entré les mains, & les rerira dans sa Maison, disant qu'ils y seroient en plus grande seureté qu'ailleurs, & qu'ils ne pourroient s'eschapper si facilement: cependant il leur fournissoit sous main tout ce dont ils auoient besoin: D'où il aduint depuis, que sous pretexte de les vouloir chastier, il les fit mettre dans vn Nauire qu'il leur donna, apres s'estre entretenu secretement avec quelques-vns d'entr'eux, ausquels il descouurit son intention, afin qu'ils la sceussent à l'aduenir.

Cela se passa de cette sorte, au grand mescontentement des Confidens de Pigarre, qui s'offencerent en leur Ame de ce que Laurens d'Aldana auoit si legerement puny, ou fait semblant de punir des hommes coupables, ce qui leur fit croire entierement qu'il estoit du Party contraire. Ils en aduertirent donc Gongalo Pigarre; mais il ne s'en esmeur pas plus fort contre d'Aldana, pource qu'il le tenoit pour son Amy, & que d'ailleurs, se trouuant dans vne Ville si esloignée, comme estoit celle de Quitu, où tout le monde l'aymoit, il iugeoit bien qu'il ne pourroit que difficilement l'en debusquer, sans quelque desordre.

Gongalo Pigarre sceut encore en ce mesme temps, le soulèvement de Diego Centeno, & les choses aduenues dans le Pais des Charcas, ausquelles il voulut mettre remede; cette affaire luy semblant plus importante que celle de la Ville des Rois: S'en estant donc conseillé à ses Capitaines, il donna pouuoir à son Mestre de Camp, François de Caruajal, d'agir dans cette entreprise, en qualité de son Lieutenant; dequoy ses Capitaines furent d'aduis, & mesme ils en prierent bien fort Pigarre, les vns pour gouverner eux seuls les affaires, & les autres pour l'apprehension qu'ils auoient de la mauuaise humeur de François de Caruajal: ce qui leur faisoit dire à tous, *Q'une execution si importante auoit besoin entierement de la Conduite, & de l'Experience d'un tel personnage.* Ainsi Caruajal sortit de la Frontiere de Quitu avecque vingt hommes de sa Confiance, qui luy tinrent compagnie, & arriua quelque temps apres en la Ville de saint Michel, où il fut receu avec applaudissement, comme les apparences le firent croire. Il y prit d'abord les six Principaux de cette Communauté, ausquels il declara, *Que*

Gonzalo Pizarre se plaignoit grandement d'eux, pour auoir perdu le respect qu'ils luy deuoiens, & fauorisé passionnément le Party du Vice-Roy. Qu'à raison de ces choses, il s'estoit proposé d'abord de mettre leur Ville à feu, & à sang, sans y laisser en vie vn seul homme; Qu'enauantmoins, apres auoir considéré depuis qu'il ne falloit imputer ces fautes qu'aux Principaux d'entr'eux, & non pas aux petites gens, il s'estoit resolu, (afin que la perte n'en fut pas si grande) de ne faire chastier que les plus notables, dont il auoit luy-mesme fait choix. Cela dit, il leur commanda qu'ils eussent à se confesser, & fit donner le garrot à l'vn d'eux, dont on se plaignoit plus que des autres, pour auoir donné l'inuention d'ouurir le Sceau Royal, dont le Vice-Roy se seruoit en ses depeschés; mestier qu'il n'ignoroit pas, pour la pratique qu'il en auoit. Mais les autres trouuerent moyen de s'eschapper du danger, par la diligence de leurs Femmes & de leurs Amis, iointes aux instantes prieres que plusieurs Prestres & Religieux firent à Caruajal, de leur vouloir pardonner: neantmoins, quelque grace qu'il leur fit, il ne laissa pas de les condamner à estre bannis de cette Prouince-là, à 4000. Ducats d'amende, & à la perte du reuenu de leurs Départemens d'Indiens durant leur Exil. De-là il passa droit à Truxillo; faisant de toutes pars diuerfes leuées de deniers, & de gens de Guerre. Apres s'estre ainsi pourueu des choses necessaires, le plus promptement qu'il luy fut possible, il prit sa marche en la Ville des Rois, où il trouua qu'il auoit deux cens hommes de Guerre bien equippez, avec lesquels ayant pris le chemin de Cozco par la Montagne, il vint à la Ville de Huamanca, où, comme disent les Auteurs, il exigea de nouueaux deniers, & fit les Habitans ses Tributaires.

Durant ces choses, il suruint vne autre esmeute dans la Ville des Rois, contre Laurens d'Aldana, que l'on voulut mettre à mort; Car alors les inclinations de ce peuple estoient tellement portées aux reuoltes, qu'à tout moment ils en faisoient de nouuelles, sans considerer ny quelle en seroit la fin, ny les moyens d'en venir à bout; Ce qui fut cause de la perte de la plus-part de ceux qui les esmeurent les premiers. Mais cette sedition, qui fut la troisieme de celles qui se firent en la Ville des Roys, fut appaisée par la mort de trois ou quatre de ses Auteurs: d'où s'ensuiuit celle d'autres cinq ou six, dont François de Caruajal se despescha dans Huamanca, à raison de l'accusation des Ha-

bitans de la Ville des Rois, contre ceux de sa suite. Luy-mesme encore ayant appris à Huamanka la Retraite de Diego Centeno, les traueses qu'Alonse de Toro luy auoit données, & comme quoy il s'en estoit retourné Victorieux à Cozco, se mit dans l'esprit que n'ayant rien à craindre du costé de Diego Centeno, il n'auoit que faire de passer outre: Et partant, il resolut des s'en retourner en la Ville des Rois; ce qu'il fit encore pour ne se rencontrer avec Alonse de Toro, qui sembloit estre Rival, & Concurrent de sa gloire: Car, comme nous auons dit ailleurs, à eause de l'indisposition de sa personne, Gonçalo Pigarre luy auoit osté la Charge de Mestre de Camp, pour la donner à Caruajal; ce qui les mit tous deux en mauuaise intelligence: En suite de ces euenemens, Caruajal s'aduisa de retourner à la Ville des Rois; Mais à peine y fut-il arriué, qu'il eut nouuelles, que Diego Centeno sorty des Montagnes, s'estoit mis à poursuire les gens d'Alonse de Toro, dont il auoit pris ou gagné à soy plus de cinquante hommes, & qu'Alonse de Mendoza s'estoit retiré par vn autre endroit; Cét aduis le fit resoudre d'aller contre Diego Centeno: Comme en effet, il l'executa, & pour ne voir Alonse de Toro, il se destourna de Cozco, & prit la route d'Arequepa, le long de la Coste: de quoy tout à mesme temps, Alonse de Toro, & les Habitans de Cozco ayant eu aduis, ils luy escriui-
rent, que pour aller contre Diego Centeno, il ne sortit point d'Arequepa, mais bien de Cozco, afin qu'il ne semblast vouloir desobliger cette Ville là, Capitale de l'Empire du Peru. Ce que Caruajal leur accorda, plustost pour se satisfaire, & leuer des gens dans Cozco, que pour s'accômoder à leurs sentimens: Et ainsi avec toutes les diligences imaginables, il se rendit bien-
tost apres à Cozco, où luy & Alonse de Toro se virent, avec ie ne sçay quelle contrainte, où le Soupçon & la Peur se mesloient ensemble de part & d'autre, sans que toutesfois il en parut rien en public. Pour tout cela neantmoins, le iour d'apres, Caruajal ne laissa pas de prendre quatre des principaux de Cozco, & sans en communiquer avec Alonse de Toro, les fit pendre de son autorité; pource qu'ils n'estoient pas de son Party: ce qui fut vn suiet de nouuelle plainte à son Concurrent. Cela fait, il sortit de la Ville, avec trois cens hommes tous bien armez, dont il y auoit cent Canaliers, & tout le reste consistoit en Infanterie. Avecque ces Forces, ils'en alla chercher Diego Centeno, & ne
cessa

cessa de marcher, iusques à ce qu'il fut à quelques dix lieües de luy. Centeno s'imaginant alors, comme tous les siens le croyoient aussi, que les Ennemis, qui n'estoient pas bien contens, se mettoient en déroute, s'aduisa de leur donner de nuit vne alarme, avec enuiron quatre vingts hommes, & s'aduança si près d'eux, qu'ils pouuoient parler les vns aux autres; Mais il se trouua bien loin de son compte, Caruajal ayant donné si bon ordte à ses gens, que pas vn d'eux ne rompit son rang; d'où il paroissoit assez qu'ils n'estoient pas si mal contens, comme on en faisoit courir le bruit: Car s'ils l'eussent esté veritablement, il est indubitable que Caruajal tout seul, n'eut pû resister à trois cens Soldars qu'il menoit, ny empescher que les vns & les autres ne prissent diuerses routes. Surquoy ie diray, qu'encore que les Auteurs mettent en auant qu'il n'aymoit guere ses gens, lesquels, disent-ils, il ne payoit que d'iniures, de menaces, & de mauuais traitemens, il me semble neantmoins, que les choses qu'ils racontent de luy, & de la façon qu'il en venoit à bout au grand contentement des siens, monstrent assez qu'ils n'estoient pas mal satisfaits de luy, puis qu'ils l'assistoient si courageusement dans l'execution de ses hautes entreprises: Ce n'est pas pourtant que ie le veuille iustifier de cruauté, veu qu'on sçait bien qu'il en vfa veritablement; mais ce fut contre ses Ennemis, encore ne punit-il que ceux qu'il appelloit ordinairement *Ioueurs de passe-passe, & Tisseurs*; pource qu'ils n'auoient non plus d'arrest en vn lieu, qu'en a la Nauette sur vn Mestier. Mais nous nous reseruons à parler de luy plus particulierement en d'autres endroits, où l'occasion s'en presentera; étant certain qu'il sceur aussi bien qu'homme du monde le Mestier des Armes, & qu'en diuerses rencontres, il tesmoigna tousiours veritablement, qu'il auoit esté vray Soldat du grand Capitaine Gonçalo Fernandez de Cordouë, Duc de Seza, & des autres Chefs les plus signalez de leur temps. Ainsi Diego Centeno voyant que les Ennemis ne bransloient point, comme il auoit creu, fit sa retraite avec vn fort bon ordre: ce qu'il obserua tousiours depuis en tous les esches que les gens de Caruajal luy donnerent, iusques à ce qu'ils le dessirent entierement.

CARVAIAL POURSUIT DIEGO CENTENO ; & apres avoir traité cruellement un des Ennemis, est affronté luy-mesme par un autre Soldat.

CHAPITRE XXIX.

SI-tost qu'il fut iour, François de Caruaial se mit à poursuivre son Ennemy, avec ses gens de pied, qu'il rangea par Bataillons, & la Canalerie qui faisoit l'Arriere-garde. Diego Centeno fit cependant sa retraite, & non seulement la nuit suivante, mais les trois ou quatre d'apres, il donna l'alarme à Caruaial, sur l'esperance qu'il eut que quelques-vns des Ennemis se viendroient rendre à luy. Mais comme tout le contraire arriva, il changea son dessein, & tascha de mettre ses gens à couuert, pour empescher que l'Ennemy ne les traittast mal. Tous les Auteurs demeurent d'accord, qu'ayant pris sa marche, il usa d'une diligence incroyable, & fit iusques à quinze lieues par iour. Il fit aller deuant le Bagage, & se tint tousiours à l'Arriere-garde, avec les plus resolus, & les mieux armez de ses gens : Quelque diligent qu'il fut pourtant, l'Ennemy ne l'estoit pas moins à le suivre, ne le perdant presque iamais de veüe, avecque son Bataillon formé, où il y auoit vingt-quatre piques, dont il disoit que ceux qui les portoient s'en scauroient fort bien seruir, comme ils firent, à la ruine de son Ennemy. En cette marche, Diego Centeno faisoit tousiours teste à François de Caruaial, principalement dans tous les passages les plus estroits qu'il rencôtroit le long du chemin, qui les embarrassoit quelquefois l'un l'autre, deux ou trois iours, & les empeschoit d'aller plus auant. Centeno commandoit alors, que tout le Bagage & les plus chargez, fissent le plus de diligence qu'ils pourroient ; & quand il iugeoit à peu près qu'il auoit bien fait vingt lieues, ou dauantage, il se destournoit de Caruaial, pour retourner à ses gens qui le voyant venir, *Beny soit Dieu*, disoient-ils, *de ce que le Tyran nous donnera possible deux iours de repos, dans le chemin qui luy reste à faire pour nous atteindre.* Surquoy ie rapporteray qu'il me souuient

d'auoir ouÿ dire à ce propos aux gens de Diego Centeno, qu'ils auoient à peine reposé cinq ou six heures, qu'ils estoient tous estonnez de voir paroistre de loing les picques des Ennemis, avecque tant de vitesse, qu'elles sembloient estre portées plustost par des Demons que par des Hommes: ce qui les obligeoit à l'instant de reprendre leurs rangs en diligence, suiuant les ordres de Diego Centeno, qui se mettoit tousiours à l'Arriere-garde pour les deffendre. Sur ces entrefaites, il arriua vne fois, qu'en vne certaine aduenüe fort estroite, & enuironnée de Rochers, qui l'embarroissoient de toutes parts, Diego Centeno, & ce peu de gens qu'il auoit, entretenrent les Ennemis plus de la moitié d'un iour, & firent retraite enuiron la nuit. Alors vn de leurs Carrabins, dont j'ay oublié le nom, monté sur vne Iument, & croyant faire beaucoup, sans considérer le peril où il s'alloit exposer, se mit à l'abry d'un Rocher, d'où s'appuyant sur sa lument, il tira de telle sorte, qu'en la presence de Caruajal, de la violence que fit le coup, vn fort bon cheual fut tué sur la place: Et d'autant qu'il auoit mis pied à terre, quand il voulut remonter il ne pût, pource que la lument effrayée du bruit de la Carrabine, prit soudain la fuite, & se mesla parmy les autres cheuaux qui alloient deuant: si bien que de cette sorte le pauvre Cavalier se vid demonté. Il fut pris à l'heure mesme, & mené à Caruajal, qui se despitant d'un costé, de la trop valeureuse resistance que ses Ennemis luy faisoient, & de l'autre de l'effronterie de ce Soldat, commanda pour le faire languir dauantage, qu'on eut à le ietter tout nud, pieds & poings liez, dans le prochain Marescage, d'où les Indiens ont accoustumé de tirer leurs Cruches, & leurs Pots de terre, pour les mettre ailleurs à couuert du froid, qui est là si grand, que s'ils les y laissoient au serain, ils les trouueroient le lendemain tous creuassées, & rompus. Ce fut donc en vn si rude lieu que ce mal-heureux Soldat passa la nuit entiere, durant laquelle c'estoit pitié d'oÿr les hauts crys, ou plustost les hurlemens effroyables qu'il faisoit, ne cessant de dire, *Misericorde, Chrestiens, & puis que ie le suis comme vous, laissez-vous toucher à la compassion, ie vous prie, & ne soyez point cruels à ce point, de me refuser la mort que ie vous demande, pour me deliurer de l'horrible tourment que ie souffre icy: ce qui sera la plus grande charité que vous me scauriez faire, dont vous recevrez la recompense au Ciel.*

Ces lamentations estoient à tout moment repetées par ce Misérable, pour esmouuoir à pitié les autres Soldats, qui s'imaginoient que François de Caruaial se deust contenter de l'auoir traité si cruellement. Il ne le fit pas pourtant : mais dès qu'il fut iour, il commāda qu'on l'estranglât, action, à vray dire, qui fut la plus grāde de ses cruauitez; apres laquelle il prit sa marche contre ses Ennemis, qu'il poursuuiuit sans relasche, & à toute rigueur. Comme ils ne pouuoient donc supporter la grande fatigue où il les reduisoit iour & nuict, plusieurs en furent tellement abbatus, que ny eux ny leurs cheuaux, n'eurent plus la force d'aller plus auant : de sorte que Caruaial les arresta, sans en espargner vn seul, faisant main-basse des plus considerables, & pardonnant quelquefois aux autres par la priere de ses Officiers. Il ne faut pas icy passer sous-silence vne piece qu'un Soldat luy fit alors, entre plusieurs autres, qui luy furent ioüées, durant tout le cours de cette Guerre-là. Il faut remarquer pour cét effet, qu'à cause que Caruaial estoit Mestre de Camp, les plus incommodez qui portoient les Armes, l'alloient trouuer à tout coup; & s'offrant à luy, *Monsieur*, luy disoient-ils, *nous auons fait plusieurs lieues de chemin, & nous sommes traisnez iusques icy à beau pied, pour auoir la gloire de seruir Monseigneur le Gouverneur; C'est pourquoy nous vous supplions de nous faire donner les choses necessaires, afin que nous puissions estre du nombre de ceux qui le seruent.* D'où il aduenoit la plus-part du temps, que François de Caruaial se laissant amadolier à leurs complimens estudiez, les rembourgoit de la despenſe qu'ils auoient faite le long du chemin, puis les assistoit le mieux qu'il pouuoit d'Armes, de cheuaux, d'habits, & d'argent. Ainsi parmy ces Soldats, il s'en trouua quelques-vns qui le seruirent fort bien iusqu'à la fin de la Guerre: mais il y en eut d'autres aussi, qui ne recoururent à luy, que pour en estre assistez de Cheuaux & d'Armes, pour s'enfuir apres, & s'aller rendre dans le Parry du Roy. Pour cette mesme fin, celuy dont i'ay à vous entretenir, estoit tousiours des derniers à pourſuiure l'Ennemy, & ne laissoit pas toutesfois de se vanter plus que les autres; disant, qu'il seroit tousiours le premier, si on luy donnoit vn Cheual tel qu'il le desiroit. Or comme il repetoit à tout propos le mesme langage, Caruaial importuné de l'oüir, s'aduisa de changer la mauuaise lument qu'auoir ce Fanfaron, en vne fort bonne Mule: L'ayant donc appellé; *Seigneur Soldat*, luy dit-il, *Voicy la meilleure Bête*

que nous ayens, obligez-moy de la prendre, afin que vous n'ayez pas suiet de vous plaindre de moy; & ie vous iure par la vie du Gouverneur mon Maistre, que vous me la payerez chèrement, si demain matin vous n'avez fait douze lieues deuant nous. Le Soldat receut la Mule, & pour n'encourir l'effet de cette menasse-là, s'enfuit cette mesme nuit, prenant vn chemin tout à fait contraire à celuy par où Caruaial poursuivoit ses ennemis: (ce qu'ils s'aduisa de faire, pour empeschier qu'on ne pût l'attraper, si l'on enuoyoit après luy) & marcha si viste, qu'au point d'iour il se trouua qu'il auoit fait vnze lieues: Ayant donc à cette heure-là, rencontré vn autre Soldat de sa connoissance, qui s'enalloit trouuer Caruaial, Camarade, luy dit il, obligez-moy, ie vous prie, de dire au Mestre de Camp, que ie le supplie bien fort de me vouloir pardonner, si ie n'ay pû executer ponctuellement ce qu'il a desiré de moy: ie n'ay fait encore qu'vnze lieues; mais vous pouuez l'asseurer qu'entre-ty & midy, j'acheueray les douze, & en adiousteray encore quatre. Le Soldat luy promit de s'acquiter de cette Commission, ne scachât pas que celuy qui la luy donnoit s'en fut fuy d'avec Caruaial, par l'ordre duquel il croyoit qu'il s'enalloit faire quelque message en diligence. Cependant ce Mestre de Camp apprit cette seconde fourberie, qui luy sébiant plus insupportable que l'action pour laquelle il auoit puny l'autre Soldat, luy fit dire tout en colere: Ces Messieurs les Tisserans (c'estoit, comme i'ay desia dit, le nom qu'il donnoit aux Transfuges, qui se iettent dans le Party du Roy) se tiendront tousiours en bon estat, & se confesseront, s'ils me veulent croire: par mesme moyen ils me pardonneront, s'il leur plaist, si i'en fais pendre désormais autant que l'en trouueray sans faire grace à vn seul: Je n'entends pas qu'ils m'offrentent d'auantage, & que sous pretexte de me vouloir seruir, ils s'en aillent avec les Armes & les Cheuaux que i'ay bien chèrement achetés pour les miens. I'en dis autant des Cleres & des Moines, qui me iotteront à l'aduenir ce mesme tour de sonplesse, en seruant d'Espions à l'Ennemy; C'est à eux à se tenir à l'Eglise, & dans leurs Conuents, afin d'y prier Dieu pour la Paix vniuerselle de la Chrestienté, & non pas à s'accoustumer (sous pretexte qu'on n'oseroit leur rien dire, à cause de leur Habits & de leur Profession) à faire vn si dangereux mestier que celui d'espions: Que s'ils desdaignent si fort la Paix, qui est la chose du Monde qu'ils deuroient le plus estimer; pourquoy me blâmera-t'on de leur faire la Guerre, & de les enuoyer au Gibet, comme ie l'ay veu pratiquer dans toutes les Guerres que i'ay suivies?

Voilà ce que dit Carvajal dans vn furieux transport de colere, & ce qu'il executa depuis, en la personne des vns & des autres, comme les Historiens le remarquent: Ce n'estoit pourtant qu'à ces Vagabonds, & à ces Perfides, qui le trompoient laschement, qu'il faisoit sentir tous ces effets de colere, & de cruauté: Car pour les Soldats qui seruoient fidellement le Roy, sans passer d'un Party à l'autre, il les accueilloit avec honneur, quand il en prenoit quelques-vns, & les traittoit le mieux qu'il pouuoit, pour les attirer de son costé. Mais nous le laisserons dans ces mescontentemens, & dans les traueses qu'il donnoit à Diego Centeno en le poursuiuant, pour passer à celles dont Gonçalo Picarre persecutoit le Vice-Roy; Les vnes & les autres estant aduenües en mesme temps, & presque aux mesmes iours.

*GONCALO PICARRE DONNE DE GRANDS
eschecs au Vice-Roy, iusques à le chasser du Peru; Et
Pedro de Hinoiosa prend la route de Panama, avec
l'Armée Nauale de Picarre.*

CHAPITRE XXX.

NOus auons dit cy-deuant, comme le Vice-Roy entra dans Quito, & les eschecs que luy donna Gonçalo Picarre: Car bien que ses gens ne fussent pas moins lassez, ny mieux pourueus de viures que ses Ennemis, & que mesme ils se trouuassent plus incommodez qu'eux; pource que le Vice-roy faisoit le degast par tout, pour empescher qu'ils ne trouuassent aucunes provisions, dont ils eussent moyen de se preualoir; Pour tout cela neantmoins, il ne laissoit pas de le poursuiure iour & nuict, pour le deffaire entierement, comme le remarque Carate par ces paroles.

Lib. 5.
Ch. 19.

Gonçalo Picarre courut le Vice-Roy, depuis la Ville de saint Michel, qu'il auoit prise pour lieu de Retraite, iusques à celle de Quito, qui en est à cent cinquante lieuës: car il auoit si fort pris à tache cette poursuite, qu'il ne se passoit presque point de iour auquel les Coureurs ne se vissent, & ne parlassent ensemble, sans que les vns ny les autres descendissent de cheual. Cet-

te vigilance estoit recommandable sur tout aux gens du Vice-Roy, qui auoient tousiours l'oreille à lerte: Que si pour se reposer ils auoient de nuit quelque relasche, iamais ils ne poisoient leurs habits, & tenoient tousiours leurs cheuaux bridez, sans s'amuser à dresser leurs Tentés, ny à perdre que le moins qu'ils pouuoient de temps apres leurs cheuaux: ce qu'ils obseruoient particulièrement aux lieux sablonneux, où il n'y a d'ordinaire aucuns Arbres: car alors faisant de necessité vertu, ils se seruoient d'une inuention assez bonne, qui estoit de porter de petits sacs, qu'ils remplissoient de sable, comme ils se voyoient au lieu où ils deuoient passer la nuit; puis ayant fait vne fosse, y mettoient dedans les sacs où ils attachoient les cheuaux, & en suite la couuroient de sable, y marchant dessus pour la fouler le mieux qu'ils pouuoient.

Outre que cette fatigue incommodoit grandement les deux Armées, la Faim les pressoit d'une estrange sorte, & particulièrement celle de Gonzalo Pizarre, qui marchoit en quête: Car le Vice Roy faisoit toute sorte d'efforts enuers les Indiens & les Caciques, pour les obliger à laisser le chemin dépourueu des commoditez necessaires, & se retiroit avec tant de precipitation, que pour ne perdre pas vn moment de temps, il faisoit tousiours mener en main apres luy par des Indiens, neuf ou dix cheuaux, des meilleurs qui fussent dans le Païs; Et quand il y en auoit quelqu'un de lassé, il le quittoit-là, & luy faisoit couper les jarres, afin que les Ennemis ne s'en pussent preualoir. En ce chemin là, Gonzalo Pizarre fut ioinct par le Capitaine Bachicao, venu de terre ferme du Voyage que nous auons dit, avec trois cens cinquante hommes, & vingt Nauires, chargez d'une grande quantité d'Artillerie. Il fit cette ionction par la Coste la plus proche de Quitu, où tous deux estant arriuez, Gonzalo Pizarre compta plus de huit cens hommes dans son Armée, où estoient les principaux Seigneurs & Soldats du Païs; Et pouoit on bien dire de luy, que iamais Tyran ne se trouua dans le calme, ny dans la prosperité où il estoit alors: Car outre que cette Prouince est naturellement fertile, & abondante en toute sorte de viures, il y auoit descouvert vn peu auparauant, plusieurs riches Mines d'or; dont il tira des sommes immenses des Départemens des principaux qui l'auoient abandonné; ensemble du Quint de sa Maiesté, & des Tresors qu'auoient laissé les Def.

functz. Là mesme Pigarre eut aduis que le Vice-Roy estoit à quarante lieues de Quito, à sçauoir en la Ville de Pasto, d'où l'on entre au Gouvernement de Benalcaçar. Il se resolut à l'heure mesme de l'aller chercher, si bien que tout cela se fit successiue-ment, & presque sans delay de part & d'autre: Car Gonçalo Pigarre ne fit pas long sejour dans Quito, d'où apres qu'il fut sorty, il y eut entre les deux Armées plusieurs escarmouches, qui se donnerent en vn lieu qu'on appelle vulgairement *Chande Riuiere*: Où il est à remarquer, qu'aussi tost que le Vice-Roy fut aduertý dans Pasto de la venue de Gonçalo Pigarre, il sortit de la mesme Ville, & ne cessa de marcher, qu'il ne fut arrivé à *Popoy*: Mais enfin Gonçalo Pigarre l'ayant suiuy courageusement vingt-lieues par de la Pasto, se resolut de retournér à Quito, pource qu'il voyoit bien que s'il alloit plus auant, il ne trouueroit ny gens ny viures dans le País: Il rebroussa donc vers Quito, & fit cette retraite, apres auoir harcelé l'Ennemy si long-temps, & dans vne si vaste estenduë de País, que bien à peine le pourrat-on croire, bien qu'on puisse asseurer sans menti, que depuis la Ville de Plata, d'où il sortit la premiere fois contre luy, il le pour-
suint iusques à celle de Pasto, d'où il y a sept cens lieues de distance, encore sont elles si grandes, qu'elles en valent bien mille de celles d'Espagne.

L'ay tiré d'Augustin de Carate ce que ie viens de dire, & ne suis pas d'aduis de m'arrester plus long-temps à ce que les Historiens ont escrit de cecy. Il suffit de sçauoir qu'apres que le Vice-Roy eut passé par de la *Chande Riuiere*, il se persuada que les Ennemis se contenteroient de l'auoir chassé des bornes du Peru, & de toute l'estenduë de sa Iurisdiction; qu'à la fin ils se lasseroient de le suiure, & qu'ainsi le laissant en paix, ils luy donneroient moyen de penser à ce qu'il auroit à faire: Mais quelque temps apres qu'il se fut mis cette pensée dans l'esprit, & qu'il en eut communiqué avec ses Capitaines, ils descouurirent les gens de Pigarre, qui prenant leur marche par vne longue colline par où l'on descend à la Riuiere, se hastoient d'aller avec la furie qui leur estoit ordinaire, pour tascher de les atteindre: ce qui estonna si fort le Vice-Roy, que leuant à mesme temps les mains au Ciel, O Dieu, s'ecria-t'il, sera-t'il possible que la Posterité crie un-
mais, qu'il y ait eu des Espagnols si ruels, que d'auoir poursuyuy l'En-
dant de leur propre Roy, depuis la Ville des Rois iusques icy, d'où il a

quatre cens lieues de che- en Cela dit, il pressa ses gens de continuer leur route, puis que l'Ennemy se hastoit si fort de le venir joindre.

Après que Gonzalo Pigarre, comme il a esté dit ailleurs, s'en fut retourné à Quito, il s'y fit paroistre si orgueilleux, & tellement insupportable, pour tant de victoires & de bons succez qu'il auoit eus, qu'il commença de s'emporter contre sa Maiesté mesme, à des paroles peu respectueuses, ou pour mieux dire insolentes. Ils'en alloit publiant, *Qu'il reduiroit le Roy à luy donner, ou de force, ou de gré, le Gouvernement du Peru, disant, qu'il y estoit obligé pour plusieurs raisons, qu'il alleguoit là dessus, & que s'il fusin le contraire, il luy sauroit fort bien resister.* Or quoy qu'il semblast dissimuler quelques fois, ces Capitaines pourtant ne laissoient pas de le croire, & le portoient mesme à ne cacher point cette pretention si vaste, & si desreglée. Ainsi durant le séjour qu'il fit à Quito, il ne pensa qu'à se resioüyr de sa bonne Fortune, faisant tous les iours des Festins & des Assemblées solemnelles; sans auoir cependant aucunes nouuelles du Vice-Roy, ny de l'ordre qu'il pretendoit mettre à ses affaires. Les vns disoient, qu'il s'en retourneroit en Espagne, par la voye de Carthagene: les autres, qu'il iroit en terre ferme, afin d'y gagner les passages, se pouruoir d'Armes, & leuer des gens, pour executer les ordres qui luy seroient enuoyez par sa Maiesté: Quelques vns aussi estoient d'opinion, que ce seroit dans la mesme Ville de *Popayan*, qu'il attendroit ce Mandement du Roy, n'estant iamais tombé dans l'esprit, qu'il deuit faire des preparatifs & des leuées, pour innouer quelque chose, contre l'ordre de sa Commission. Quoy qu'il en fut neantmoins, Gonzalo Pigarre & ses Capitaines, ayant ouï parler de tous ces desseins, iugerent à propos d'en dérourner le succez, & de se rendre les premiers Maistres de tous les passages dans la Prouince de terre ferme, pour n'estre surpris, quelque chose qui pût arriuer. Pour ce mesme effect, & pour empescher le Vice-Roy d'y aller, il manda l'Armée nauale qu'Hernand Bachicao auoit menée, composée de deux cens cinquante hommes, dont il fit General Pierre de Hinoyosa, Gentil homme de sa Chambre, tellement qu'il partit aussi tost; & de Puerto Viejo il enuoya dans vn Nauire le Capitaine Rodriguez de Caruajal. Celuy cy s'en alla droit à Panama, avecque des Lettres que luy donna Gonzalo Pigarre,

par lesquelles il prioit les principaux de cette Ville-là de vouloir appuyer ses affaires; les assurant qu'il n'enuoyoit cette Armée que pour les desdommager des pertes qu'eux & les autres Habitans auoient receuës de Bachicao, qu'il disoit estre aduenues contre sa volonté, sans qu'il eut iamais commandé qu'on dist degast, ny mesme pensé qu'on le deût faire.

Rodriguez de Caruajal estant arriué à trois lieues de Panama, sceut d'un Soldat de la Garnison, qu'il y auoit dans la mesme Ville deux Capitaines du Vice-Roy, l'un appellé Jean du Guzman, & l'autre Illanez; qu'ils leuoient-là des gens de secours, pour les mener en la Prouince de Benalcaçar, où le Vice-Roy les attendoit; que déjà mesme ils auoient plus de cent Soldats, vne honne quytité d'Armes, & cinq ou six pieces de Campagne; Et qu'encore que tout cela fut prest depuis plusieurs iours, ils n'alloyent pas toutesfois si tost trouuer le Vice-Roy, mais se tenoient dans la Ville, pour la deffendre des gens, qu'ils scauoient indubitablement que Gonçalo Pigarre y deuoit enuoyer, pour s'en rendre maistres. Rodriguez de Caruajal aduertý de tout cela, depescha secretement vn Soldat, avecque les Lettres qu'il auoit, à quelques Habitans de la ville, qui l'ayant descouuert à la Iustice, se saisirent incontinent de luy: en suite dequoy, les Bourgeois ne sceurent pas plustost la venuë de Hinoyosa, & quelle estoit son intention, qu'ils coururent aux Armes & enuoyerent deux Brigantins prendre avec adresse le Nauire de Caruajal: mais luy, qui par le retardement du Soldat, se doutoit bien de ce qui estoit aduenü, se mit à la voile; & ainsi les Brigantins ne le trouuant point, s'en retournerent pour ne perdre temps.

PEDRO DE HINOYOSA PREND
Vela Nuñez par le chemin. Preparatifs de Guerre
faits à Panama, pour luy resister; Et moyens tenus pour
appaîser cette Esmeute.

CHAPITRE XXXI.

LE Gouverneur de Panama, nommé Pedro de Casaos, natif de Seuille, fut en grande diligence à Nombre de Dios, où il rallia ce qu'il auoit là de gens, se pourueut d'Armes, tant offensciues que deffenciues; & ainsi avec tout ce qu'il pût auoir de munitions, & de Gens de Guerre, il tira droit à Panama, se tenant prest pour resister à Pedro de Hinoyosa. Les deux Capitaines du Vice Roy en firent de mesme; Et bien qu'entr'eux, & Pedro de Casaos, il y eut eu auparauant quelque dispute sur la prefeance, ils ne laissèrent pas d'eslire Casaos pour leur General. Dès que Pedro de Hinoyosa eut depeesché Rodriguez de Catuaial, il cōtinua son Voyage à Panama, & s'en alla tousiours demandant des nouuelles du Vice-Roy le long de la Coste: Et d'autant que pour sçauoir ce qui s'y passoit, il s'aduîsa de laisser des gens au Fort, & sur la Riuiere de Saint Iean, il fut tout estonné qu'ils luy amenerent dix Espagnols, par eux faits prisonniers de Guerre, de l'un desquels, il apprit que le Vice Roy, à cause du retardement de Iean de Guzman, & Iean d'Yllianez ses Capitaines, enuoyoit à Panama son Frere Vela Nuñez, avec ordre exprès d'emmener avecque luy les gens qu'il trouueroit là, & d'en leuer dauantage encore, avecque l'argent receu pour cette mesme fin, & pris dans les Coffres du Roy; Qu'il luy auoit de plus mis entre les mains vn Fils naturel de Gonçalo Pigatte, & que Vela Nuñez s'estoit aduîsé d'enuoyer deuant ce mesme Soldat, pour s'informer, s'il ne se passoit rien de nouveau dans la Coste, d'où Nuñez n'estoit qu'à vne iournée.

Après cét esclarcissement, Hinoyosa enuoya en queste deux Capitaines, avec vn assez bon nombre de Soldats, qui se diuiserent par deux chemins differents, suivant l'aduis que ledouble Espion leur donna: Ce qui leur réussit si heureusement; que les

vns prirent Vela Nuñez, & les autres Rodriguez Mexia, natif de Ville Castin, qui menoit le Fils de Gonçalo Pigarre; Prisonniers qui leur valurent beaucoup. Ils les menerent à Hinoyosa, qui se réjoit bien forr de cette prise, à cause que Vela Nuñez le pouuoir troubler à Panama dans ses pretentions diuerfes, & que d'ailleurs, il ne doutoit point que la desliurance du Fils de Gonçalo Pigarre ne fut extrêmement agteable à son Pere: tellement que cét heureux succez adueni en si peu de temps, les remplit tous d'une allegresse incroyable.

Dans ce comble de ioye, Pedro de Hinoyosa faisoit voile à Panama, lors que Rodriguez de Catuajal, venu au deuant de luy, l'entretint au long de ce qui estoit arriué n'aguere, & luy dit en suite, que ceux de la Ville auoient pris les Armes pour luy resister. Cette nouuelle ne luy despleur pas, & l'obligea de faire tenir prests ses gens, avec lesquels il continua sa Nauigation, iusques à ce qu'à certain iour du mois d'Octobre, & de l'an mil cinq cens quarante-cinq, il parut à la veuë de Panama, avec vnze Nauires, & deux cens cinquante hommes effectifs: Ceux de la Ville en prirent l'alarme incontinent, & coururent tous à leurs Drappeaux, bien que Pedro de Casaos, leur General, se vid Chef de plus de cinq cens Hommes, la plus-part desquels estoient Artisans & gens de boutique, si peu accoustumez aux Armes, qu'ils ne sçauoient ny tirer, ny manier mesme les Arquebuses; & le pire estoit, qu'ils n'auoient aucune enuie de se battre; pource qu'il leur sembloit que des gens qui venoient du Peru, leur deuoient estre plus vtils que dommageables en leurs Traitez, & en leur Commerce. Ils se representoient d'ailleurs, que les plus riches Marchands d'entreux, auoient au Peru des Compagnons, & des Facteurs associez à leur Negoce, & qui manioient leurs biens: Ce qui leur faisoit apprehender que Gonçalo Pigarre ne s'en fassit, quand il seroit aduertie de leur resistance. Pour toutes ces considerations naântmoins, ils ne laisserent pas de se mettre en deffense, & en ordre de bataille, ayant pour Chefs principaux, le General Pedro de Casaos, & Arias d'Azebedo, qui s'en alla depuis en Espagne, & fit sa demeure à Cordouë, où il y a encore aujourd'uy des Cavaliers qui sont ses Nepueux. Il y auoit aussi pour Chefs d'Escadre, Iean Fernandez de Robelledo, & André d'Arayza, sans les Capitaines du Vice-Roy, qui estoient Iean de Guzman, & Iean d'Illa-

nez, avec quantité d'autres hommes considerables, qui preten-
doient deffendre la Ville, tant pour seruir sa Maieité, que pour
estre encore tous en alarme, apprehendant que Pedro de Hi-
noyosa ne leur fit les mesmes violences que Bachicao leur auoit
faites. Luy cependant fasché de leur resistance, mit pied à ter-
re avec deux cens Hommes, tous bien armez, & vieux Soldats,
laissant les autres cinquante à la garde des Nauires. Il marcha le
long de la Coste, & fit mener les Chaloupes des grands Vais-
seaux, avec quantité d'Artillerie, pour en battre en ruine les En-
nemis, s'ils s'opiniaistroient à la resistance; & pour conclusion,
il laissa vn ordre exprés à ceux des Nauires, qu'en cas qu'il ad-
uint que dans le Combar ils fussent mis en déroute, ils eussent à
prendre Vela Nuñez, & les autres Prisonniers qu'ils auoient.

Le General Pedro de Casaos, voyant la resolution de Pedro
de Hinoyosa, & qu'il le venoit chercher, sortit contre luy, en
intention de se deffendre, & de vaincre, ou de mourir; Mais
comme ils n'estoient guere plus loing les vns des autres, que la
portée d'un coup d'Arquebuz, voila sortir de la Ville tout ce
qu'il y auoit de Religieux & de Prestres, portant quantité de
Croix & de Bannieres, couuertes de bouë. C'estoit pitié d'ouïr
les gemissemens qu'ils faisoient en forme de deuil, & les cris
qu'eux & le Peuple pouissoient iusques au Ciel en demandant
la Paix, sur le suiet de laquelle, ils ne cessoient de dire à leurs
Ennemis; *Que puis qu'ils estoient Chrestiens, & venus en ces Con-
trées, là, pour y prescher le saint Euangile, ils ne tournassent point
leurs Armes contre eux-mesmes; cela ne se pouuant faire sans leur com-
mune infamie.* A ce bruit, les deux Armées firent alte, & com-
mencerent à parler de Treve, pour laquelle on demeura d'ac-
cord de bailler des Ostages de part & d'autre. Hinoyosa donna
pour ceux de son Party Dom Baltazar de Castille, Fils du Com-
te de la Gomere; Et ceux de Panama enuoyerent Dom Pedro
de Cabrera, tous deux natifs de Seuille. Les gens de Hinoyosa
disoient pour leurs raisons; *Qu'ils trouuoient estrange que les Bour-
geois leur refusassent l'entrée de leur Ville, veu qu'ils ne venoient point
là pour leur faire aucun mal, mais pour reparer les pertes & les domma-
ges que Bachicao leur auoit faites par sa Tyrannie; Comme encore, pour
se fournir avec leur Argent, des munitions, & des viures qui leur estoient
necessaires pour leur Voyage: Qu'au reste ils auoient ordre exprés de Pi-
garre, de n'offencer personne, & de ne point combattre,* s'ils n'estoient

forcez; Qu'après qu'ils auroient calfeutré leurs Navires, ils s'en retourneroient à l'instant; Qu'ils n'estoient-là venus que pour aller en queste du Vice-Roy, & le réduire à retourner en Espagne, ainsi que les Auditeurs le conseilloyent, pour empêcher qu'il ne troublast davantage le País: Que ne le trouvant point à Panama, ils n'avoient garde de s'y arrêter, comme ils se le persuadoient; Qu'ils les prioient de ne point rompre avec eux; Qu'ils les traitteroient le plus efficacement qu'ils pourroient, pour ne déroger à l'ordre que leur en avoit donné Gonzalo Pizarre, en cas qu'ils se voulussent mettre à la raison; & qu'autrement, si par leur obstination ils s'efforçoient de combattre, ils feroient tout leur possible pour ne se point laisser vaincre.

C'estoient les raisons qu'ils produisoient, auxquelles le General Pedro de Cafaos en oppoisoit d'autres, qui sembloient estre assez considerables. Il disoit, Qu'ils entreprenoyent mal à propos, d'entrer à main armée dans les terres d'autrui: Que quand même Gonzalo Pizarre auroit droit, comme il disoit, de gouverner le País, il ne croyoit pas qu'ils fussent bien fondez à le venir violenter, sous prétexte qu'il les autorisoit; Que Bachicao leur ayant promis les mesmes choses qu'il leur promettoit, n'avoit pas laissé depuis d'empiecer sur leur Jurisdiction, & d'y faire des extorsions, & des valeries, au sçu desquels ils venoient remédier, à ce qu'ils disoient.

Voilà ce que dirent les vns & les autres si bien que pour appaiser ce differend, on s'advisa de nommer des Commissaires exprés, qui pour accommoder cette affaire au contentement des deux Partys, conclurent ensemble; Qu'il seroit permis à Hinoyosa de descendre à terre; d'entrer dans la Ville, d'y demeurer trente iours avec cinquante de ses gens, pour la sécurité de sa personne, & que l'Armée navale, avec ce qui restoit de Soldats, iroit relascher en l'Isle des Perles, pour y prendre des gens de Marine, & les matériaux necessaires à fecter de nouveau; Et qu'après que les trente iours seroient passez, ils s'en retourneroient tous au Peru. Les Articles de cette Paix furent signez de part & d'autre, avec serment de les garder: pour confirmation dequoy ils donnerent des gens en ostage.

Ainsi Pedro de Hinoyosa, avec cinquante de ses Soldats entra tout à mesme temps dans Panama, & s'y logea dans vne assez belle Maison, où il tenoit table ouverte à tous venans, permettant à ses gens de iolier, & de conuerser ouvertement avec les Bourgeois: d'où ils ensuiuir, comme dit Augustin de Carate,

de qui l'ay tiré cecy, que dans trois iours s'allerent donner à luy presque tous les gens de Guerre, que les Capitaines Jean de Guzman, & Jean d'Yllianez auoient leuez pour le Vice-Roy. Autant en firent tous les Faincants qui se trouuerent dans la Ville, dont ils n'estoient ny Habitans, ny Marchands, & qui pour estre affectionnez au Party de Hinoyosa, ne demandoient pas mieux que de l'accompagner au Peru. Des vns & des autres Pedro de Hinoyosa en forma des troupes considerables: ce qui fut * Jean cause que les deux Capitaines * du Vice-Roy se voyant abandonnez & d'Yllia. donnez de leurs gens, s'enfuirent secretement dans vne Bar. nez & que, avec quatorze ou quinze personnes qui leur estoient re- Jean de stées: de cette façon Hinoyosa demeurant paisible, tourna ses Guzman. pensées à l'entretienement de ses gens de Guerre, sans vouloir plus s'entremettre du Gouvernement, non plus que de l'administration de la Iustice, ny sans souffrir que les siens fissent aucun outrage à personne. En suite dequoy, il enuoya Pedro de Cabrera, & pareillement Hernand Mexia de Guzman son gendre, à Nombre de Dios. avec vn nombre de Soldats, pour garder ce Port, & tascher d'auoir les aduis qui leur estoient necessaires pour leur commune assurance, tant du costé d'Espagne que des autres Païs.

*ACTIONS DE MELCHIOR VERDUGO
à Truxillo, à Niçaraga, & dans Nombre de Dios,
d'où il fut chassé honteusement.*

CHAPITRE XXXII.

EN ce mesme temps aduint dans la Ville de Truxillo vne nouueauté bien estrange, & qui ne causa pas aussi moins de scandale, qu'elle auoit auparauant attiré de haine sur son Auteur, qui estoit vn Habitant de la mesme Ville, appellé Melchior Verdugo, auquel escheut le Gouvernement de Cassamarca, Prouince fameuse par la prise du Roy Athahuallpa, & les grands succez dont i'ay parlé cy-deuant.

Celuy-cy, pour estre narif de la Ville d'Auila, & par consequent Compatriote du Vice-Roy, * se voulut monstter zelé * qui e;

Roit auf- à son service par quelque action signalée. Ce qu'apperceuant lo
 si natif Vice-Roy; vn peu auparauant qu'il fut arresté prisonnier, il luy
 d'Auila. donna diuerses Commissions, pour s'appuyer de luy dans le des-
 sein qu'il auoit de dépeupler la Ville des Rois; ce qui rendit
 odieux Melchior Verdugo, & à Gonçalo Pigarre, & à tous les
 siens generally. Verdugo le recogneur, & se proposa des-
 lors de sortir du Royaume, sans attendre que les gens de Pigar-
 re se faussent de luy; Mais auparauant, il se voulut signaler par
 quelque action remarquable, faite contre l'opinion de Gonça-
 lo: Il gaigna pour cét effet quelques Soldats, acheta secreete-
 ment des Armes, & fit dans sa maison mesme quelque nombre
 d'Arquebuzes, de fers, & de chaines, son dessein estant de rui-
 ner s'il pouuoit iusques aux Principaux de la Ville, bien qu'en
 apparence il les tint, & pour Amis, & pour Camarades. La For-
 tune fauorisa ses desseins; d'autant qu'en cette conioncture, ar-
 riuu soudainement au Port de Truxillo vn Nauire, qui venoit
 de la Ville des Rois: Se voulant seruir de cette occasion, il fit
 appeller le Maistre Pilotte, & la plus-part de ses Compagnons,
 sous pretexte de leur vouloir monstrer certaines marchandises,
 & quelque Mahis-qu'il deuoit enuoyer à Panama. Mais
 quand il les tint à son logis, il les enferma dans vne basse fosse,
 puis il fit semblant de ne pouuoir se soustenir sur pied, à cause
 d'un mal de jambes, qui le trauailloit de temps en temps. Il mit
 cependant la teste à vne fenestre, d'où voyant passer les Offi-
 ciers de la Ville, & vn Greffier avec eux, il les pria de venir à
 luy, pour quelques Escritures qu'il auoit à faire, ne pouuant
 descendre, à cause de son indisposition; Eux ne se doutant de
 rien, le furent trouuer incontinent; & alors les ayant fait mener
 où estoit le Maistre Pilotte, il leur osta leurs baguettes, les en-
 chaina, & laissa près d'eux six Arquebuziers pour les garder.
 Cela fait, il reuint à la fenestre, d'où il appella d'autres Habi-
 bitans, fignant d'auoir à leur communiquer quelque chose;
 Mais au lieu de leur parler d'affaire, il les mit tous en prison, sans
 que ceux de dehors en sceussent rien: si bien que de cette sorte,
 il attrapa en peu de temps plus de vingt hommes, des Princi-
 paux restez dans la Ville; les autres estans allez avec Gonçalo
 Pigarre. Comme il eut ainsi ietté les fondemens de son dessein,
 il sortit en la place publique, avec quelques vingts Soldats de ses
 Amis, & se mit à crier, qu'on eut à prestter main-forte au Roy,
 faussant

faisissant tous ceux qui n'accouroient pas assez viste à luy. A pres cela, il fut trouuer ses Prisonniers, & leur dit à tous ensemble, Qu'il vouloit aller chercher le Vice-Roy; Que pour acheter des Armes, & faire des leuées, il auoit besoin d'argent, & partant qu'ils aduissassent entr'eux quelle somme ils luy pouuoient fournir, pour la donner sans delay, sinon, qu'il les emmeneroit Prisonniers avecque luy: de sorte qu'en ces extremitez tout ce que ces Infortunez pûrent faire, fut de payer comptant ce qu'ils luy promirent. Outre ces deniers, il alla prendre dans les Coffres du Roy ceux qui s'y trouuerent, & y adioustant ce qu'il auoit desja du sien, pour estre extrêmement riche, il se trouua possesseur d'une prodigieuse quantité d'or & d'argent, avec laquelle il s'embarqua dans le Nauire nouvellement arriué, menant avec luy iusques à la rade ces mal-heureux Prisonniers, qu'il laissa tous dans les fers, de peur qu'ils ne luy iouïssent quelque mauuais tour, & ne luy fissent rompre sa route, quand ils seroient libres. Il fit voile à Panama, & prit en ce voyage vn Nauire chargé de plusieurs marchandises, de celles que Bichicao auoit destrobées en cette Ville-là, lesquelles on luy faisoit renir; mais Bachicao se saisit de toutes, & les partagea entre ses gens. Or pource qu'il n'osoit pas aller à Panama, de peur qu'il auoit de rencontrer l'Armée nauale de Gonçalo Pigarre, qui estoit en cette Ville-là, il prit la route de Nigaraga; dequoy Pedro de Hinoyosa fut aussi tost aduertty, & enuoya en mesme temps apres luy, avec deux Nauires, où il embarqua six vingts Arquebusiers, le Capitaine Jean Alonso Palomin, qui auoit desia pris terre, & du Nauire duquel il s'empara. Il ne voulut point faire aucune descente en ce lieu là, pour estre bien assuré que les Habitans des Villes de Grenade, & de Leon, se tenoient prests, pour l'empeschier: ce qui l'obligea de s'en retourner à Panama, avec tout ce qu'il trouua de Nauires le long de la Coste de Nigaraga, dont il emmena ceux de seruice, & brussa les autres.

Comme il fut à Panama, il rendit compte à Pedro de Hinoyosa de tous ces succez, tandis que de son costé Melchior Verdugo se trouua fort empesché; ne pouuant executer en la Mer du Sud aucune des choses qu'il pretendoit faire contre Gonçalo Pigarre; car avec ce qu'il auoit perdu son Nauire, il ne pouuoit pas en acheter vn autre, pource que Bachicao & ses gens auoient tout pris. Mais comme il estoit en ces extremitez, il s'aduisa

qu'allant par la Mer du Nord à Nombre de Dios, il auroit moyen de venir à bout en cette Ville-là, de quelque grande Entreprise, s'imaginant que Pedro de Hinoyosa, y auroit mis peu de gens, & negligé de la garder, pource qu'apparemment il n'y auoit rien à craindre de ce costé-là : Sur cette imagination, il fretta quatre Fregates, & avec environ cent Soldats bien esquippez, ils s'embarqua sur le Lac de Niçaraga, par le Canal duquel il entra dans la Mer du Nord, & nauigua Coste à Coste, iusqu'à Nombre de Dios. En ce Voyage, sur la Riuere appelée *Chagré*, il prit vne Barque, où il y auoit certains Negres Latins, dont il s'informa de tout ce qui se passoit à Nombre de Dios, & particulièrement de ce qu'il y pouuoit auoir de gens de Guerre, & de Capitaines, ensemble du lieu où estoit leur quartier. Apres s'estre bien instruit, & auoir pris pour Guides ces mesmes Negres, il se rendit à la Ville enuiron la minuit, mit pied à terre, & assiegea la Maison, où les Capitaines Dom Pedro de Cabrera, & Hernand Mexia, demeuroident avec quelques Soldats; qui s'estant esueillez au bruit qu'on faisoit, se mirent à defendre leur logis, où les gens de Verdugo mirent le feu. Ceux de dedans se virent ainsi en grand danger, & pour s'en tirer furent contrainsts de se resoudre à vne sortie, comme en effet, ils en firent vne à trauers les Ennemis, qui leur firent peu de resistance, n'estant là venus qu'en intention de voler, plustost que de tuer personne. Les Fuyards se sauuerent à la faueur de la nuit; & par les Montagnes, qui sont grandes en ces quartiers-là, & presque attachées aux Maisons, ils se retirerent à Panama, où ils rendirent compte à Pedro de Hinoyosa de ce qui leur venoit d'arriuer : Cela luy fut grandement sensible, & fit naistre en luy vne iuste enuie de s'en vanger. Pour cét effet, il fut trouuer le Docteur Ribeyra, qui estoit alors à Panama, & qui se deuoit offenser de cette action de Verdugo plus que pas vn autre, pour estre Gouverneur de Nombre de Dios; Il s'en plaignit donc à luy, & mesme il encherit par-dessus, disant que sans tiltre, ny prouision aucune, le mesme Verdugo auoit eu l'effronterie d'entrer dans son Gouvernement à main-armée; Qu'il auoit de son Authorité propre pris les Officiers de Iustice, destitué les Prisonniers, & mis en alarme, non seulement les deux Mers du Sud, & du Nord, mais particulièrement la Ville de Nombre de Dios : Surquoy il conclud, qu'il le prioit instamment de le vou-

loir chastier, s'offrant pour cette fin à l'assister avec ses gens, & à luy prester main-forte. Le Docteur Ribera receut la plainte de Hinoyosa, & pareillement l'offre qu'il luy faisoit, tant de sa personne que de celle de ses gens, tellement que pour plus grande assurance, il prit serment d'eux & de leurs Capitaines, qu'ils luy obeiroient comme à leur Chef principal, & ne feroient rien contre ses Ordres. Ces choses ainsi conclusës, il sortit de Panama, pour s'acheminer à Nombre de Dios. Alors Melchior Verdugo qui en eut le vent, fit tenir prests ses gens, & avec eux les Habitans de la Ville. Hinoyosa les combattit, si bien que des premiers coups d'Arquebuzes qui furent tirez, il en demeura sur la place quelques-uns de morts, de part & d'autre : Cependant, comme les Habitans virent que leur propre Gouverneur menoit contre eux leurs Ennemis, dont il estoit principal Capitaine, firent retraite en la prochaine Montagne. D'où il aduint que pour les retenir, les gens de Verdugo se mirent tous en déroute : de quoy ne pouvant venir à bout, ny résister à leurs Ennemis, ils furent à leurs Fregates, & se saisirent du meilleur Navire qu'ils trouverent sur le Port. Cela fait, ils y mirent dedans l'Artillerie des autres Navires, avec laquelle ils bastirent la Ville, quoy qu'avec peu de succez ; pource qu'elle estoit dans un fonds. Ainsi Melchior Verdugo voyant qu'il ne pouvoit venir à bout de ses desseins, & que la plus-part de ses gens estoient demeurez à terre, tourna du costé de Carthagene, avec son Navire & ses Fregates, pour y attendre l'occasion de nuire à son Ennemy s'il pouvoit : Le Docteur Ribera, & Pedro de Hinoyosa mirent ordre alors à pacifier la Ville, où ils laisserent pour gardes les mesmes Capitaines d' auparauant, qu'ils renforcèrent de gens de Guerre, & retournerent à Panama.

BLASCO NUÑNEZ VELA FAIT DE
nouveaux preparatifs à Popayan, d'où Gonçalo Pi-
garre tâche de le faire sortir, sous pretexte de s'en al-
ler à Quito. Le Vice-Roy s'en va chercher Pedro de
Puelles.

CHAPITRE XXXIII.

LE Vice-Roy Blasco Nuñez Vela, comme nous auons dit
 icy-deuant, estoit en ce temps-là dans *Popayan*, où pour ne
 demeurer oisif, il fit amasser dans la Prouince tout ce qu'on y
 pût trouuer de fer, & enuoya chercher des Ouuriers pour le for-
 ger, & le mettre en œuvre; A quoy ils trauaillerent si bien, qu'ils
 firent en peu de temps deux cens Arquebuzes, & les rendirent
 toutes montées. Apres cela, s'estant pourueu d'Armes deffensi-
 ues, il escriuit au Gouverneur Sebastien de Belalcaçar, & à l'un
 de ses Capitaines qu'on appelloit Iean Cabrera, qui par l'ordre
 du mesme Gouverneur, s'en estoit allé en vne nouuelle Con-
 queste d'Indiens, l'aduertissant par toutes ses Lettres, des prin-
 cipales choses qui luy estoient arriuées, depuis son entrée dans
 le Peru, & du soulèvement de Gonçalo Pigarre: Sur quoy il
 concludoit, *Qu'ayant esté chassé du Pays par luy-mesme, il estoit re-*
solu de l'aller chercher; Qu'il n'attendoit pour cet effet, que d'auoir des
troupes à suffisance; & partant qu'il les prioit de le venir ioindre avec-
que leurs forces, leur remonstrant qu'en cela ils rendroient un signalé
seruice au Roy; Qu'apres la défitte du Tyran, on partageroit de nou-
veau le Peru; & que ce qu'il y auroit de meilleur seroit pour eux.
 Outre ces promesses, pour les encourager dauantage, il leur dit,
Que Diego Centeno s'en alloit seruir sa Maiesté dans les autres con-
finz du Peru; Qu'il luy venoit tous les iours de nouveaux Soldats, &
qu'ainsi le Tyran tenu de près, & poursuivy de part, & d'autre, ne pou-
uoit manquer de perir miserablement. Ces Lettres furent suivies
 d'une Commission qu'il leur donna, de prendre aux Villes fron-
 tieres trente mille Ducats, pour la Subsistance des gens de
 Guerre.

Les Capitaines ayant veu ces Depeschés, obeïrent ponctuel-

lement, & s'en allèrent à Popayan, avec cent Soldats bien équippez. Ils baisèrent les mains au Vice Roy, dont ils furent fort bien receus, & qui enuoya tout aussi-tost des Lettres de mesme reneur, que les précédentes au nouueau Royaume de Grenade, à Cartagene, & en diuers autres lieux. Par elles il demandoit de nouueaux secours, comme en effet il ne se passa presque point de iour qu'il ne luy en vint; & ainsi bien-tost apres il se trouua iusques à quatre cens hommes. En ce mesme temps il sceut l'emprisonnement de son Frere Vela Nuñez, & la perte de ses Capitaines Iean d'Yllanez, & Iean de Guzman: chose qui l'affligea fort, pour la grande esperance qu'il auoit d'estre assisté puissamment de ce costé-là.

Durant tout cecy, Gonçalo Pigarte ne s'entretenoit d'autre chose en son imagination, que des moyens qu'il pourroit tenir, pour auoir entre ses mains le Vice-Roy, ne pensant pas pouoir iamais estre en seureté, tant qu'il viuroit, & qu'il auoit vne Armée. Et dautant qu'il ne pouoit entrer où estoit cét Ennemy, à cause qu'il n'auoit pas les viures qu'il luy faloit, & que le País par où il faloit passer en manquoit aussi, il s'aduifa d'un expedient bien hardy, qui fut de faire courir le bruit, qu'il vouloit s'acheminer en la Prouince des Charcas, pour pacifier les troubles que Diego Centeno y auoit causez, & en son absence laisser dans Quito le Capitaine Pedro de Puelliez, avec trois cens hommes en la Frontiere du Vice-Roy, pour l'empescher d'aller plus auant, en cas qu'il le voulut entreprendre. S'estant proposé ces choses, il en hista l'execution, afin que la Renommée les publiast; nommant les Capitaines & les Soldats qui le deuoient suiure, comme encore ceux qui auoient à demeurer là, & donna secours aux vns & autres. Il sortit ainsi de Quito, comme il eut fait la reueüe des gens qu'il menoit, & des autres qu'il laissoit en garnison. Il mit ordre en suite, que toutes ces choses vinsent à la cognoissance du Vice-Roy; à quoy seruit grandement vn certain fourbe que le Vice-Roy auoit enuoyé pour Espion, afin d'estre aduertey par luy des deportemens de l'Ennemy: Cela n'arriua pas toutesfois: car au lieu de le seruir, ce Traistre se descouurit à Gonçalo Pigarte, pour le profit qu'il en esperoit, & luy donna l'intelligence du chiffre qu'il auoit, pour communiquer par Lettres avecque le Vice-Roy. Gonçalo Pigarte luy fit donc escrire tout ce qui se passoit, & trouua moyen de faire

donner la Lettre à vn Indien, qui n'osçachant pas ces tours de souplesse, se chargea de la faire tenir. Par mesme moyen il donna charge à Pedro de Puellas de faire sçauoir à quelques Amis qu'il auoit dans Popayan, qu'il estoit-là de sejour avec trois cent hommes, & que s'ils vouloient se venir resioüyr avec luy, ils le pouuoient faire sans crainte, puis que leur mutuelle amitié les y conuioit, & que d'ailleurs le Païs estoit en seuereté par l'absence de Gonçalo Piçarre. Or afin que cette affaire reüssit avecque plus de succez, il voulut que ses Lettres fussent portées par des Indiens, qui l'eussent veu partir, pour le pouoir asseurer ainsi; Et pour mieux iouer son roolle encore, il aduisa Pedro de Puellas d'enuoyer ses Indiens à descouuert, afin que les Lettres qu'ils porteroient tombassent entre les mains des Gardes du Vice-Roy, quiles luy donnassent à l'instant: Ce que piçarre n'eut pas plustost acheué de tramer, qu'il partit de Quito, comme nous auons dit; & pour ne passer outre il contrent le malade, à trois ou quatre iournées de-là.

Le Vice-Roy cependant receut les Lettres de son double Espion, & celles de Pedro de Puellas; de maniere que les croyant veritables, il y adiousta foy, & s'imagina qu'avec quatre cent hommes qu'il auoit, il vaincroit facilement Pedro de Puellas; apres la desfaite duquel il hasteroit celle de Gonçalo Piçarre; Et ainsi, bien qu'il n'eut aucunes nouuelles de luy que les chemins estoient fermez, il ne laissa pas toutesfois d'aller à Quito, se persuadant qu'au bruit de sa venuë, chacun s'iroit offrir à luy. Mais Gonçalo Piçarre en pensoit bien autrement, & comme le Vice-Roy ne faisoit rien, dont il ne fut aduertty d'heure en heure par les Indiens Canariens, qui luy rendoient compte ponctuellement de sa marche, & de son arriuée; Quand il sceut qu'il estoit à douze lieües de Quito, il rebroussa en diligence vers cette Ville-là, pour y ioincte Pedro de Puellas: d'où il aduint que ces deux Armées, ainsi iointes, avec beaucoup de ioye, allerent chercher le Vice-Roy pour luy donner Bataille; Car bien que cette nouuelle leur fut venuë, qu'il auoit deux cens hommes avec luy, cela n'estonna point Gonçalo Piçarre, quand il se mit à considerer qu'il n'auoit à faire qu'à des Apprentifs au mestier des Armes, au lieu que les siens y estoient habiles, & tous vieux Soldats: En ayant donc fait la reueüe, il trouua qu'il auoit deux cens Arquebuziers, trois cens cinquante Picquiers, cent cin-

quante Cavaliers bien équipez, & quantité de poudre fine. Il fit Capitaines des Arquebuziers Jean d'Acosta, & Jean Velez de Gueuare. Hernand Bashicao commanda les Picquiers, & Pedro de Puellez mena la Cavalerie, avec Gomez d'Alvarado. Quant à la Cornette, elle fut portée par François d'Ampuero, ayant avec luy soixante Chevaux. Adjoûtez à tout cecy, que le Licencié Benoist Suarez de Caruajal, Frere du Facteur Yllen Suarez, accompagnoit Gonçalo Piçarre, avecque trente de ses Amis, ou mesme de ses parens, desquels il se disoit Capitaine. C'estoient là les Forces de Gonçalo Piçarre, qui ne sceut pas plustost que l'Ennemy n'estoit qu'à deux lieus de luy, qu'il courut gagner le passage d'une Riviere, par où le Vice-Roy venoit, avec esperance qu'il le pourroit là mettre en déroute, & Piçarre l'ayant gagné s'y fortifia de bonne façon: Ce qui aduint, selon * le Pas-
Augustin de Carate, vn Samedi, quinzième de Januier, mil six-
cinq cens quarante-six.

Le Vice Roy Blasco Nuñez Vela, s'en alla d'un grand courage contre le Capitaine Pedro de Puellez; Car il s'imaginoit d'en venir à bout: puis decharger Gonçalo Piçarre, & d'en faire autant de luy, pour s'estre tousiours fait aceroire, que ceux qui suivoient le Tyran, l'abandonneroient enfin, & se mettroient à servir le Roy. Sur cette esperance, il se rendit si près de Pedro de Puellez, ne sçachant pas que Gonçalo Piçarre fust avec luy, que les Coureurs se parlerent, & se dirent mesme des injures: iusques à s'appeller Traistres; les vns & les autres se persuadant, qu'ils n'estoient-là que pour le service de sa Maïesté: Mais bien que cette entreveüe se fut passée, si est-ce que le Vice-Roy ne sceut iamais que Gonçalo Piçarre fut-là, & ne pensa pas avoir à faire qu'à Pedro de Puellez, en cette Bataille, qu'il creut se devoir donner au commencement de la nuit suiuvante, comme dit Augustin de Carate, par ces paroles expresses.

Liv. 5.
Ch. 35.

Le Vice-Roy prit l'advis de ses Capitaines, auxquels il sembla plus à propos & moins dangereux de se fortifier dans la Ville, que de donner la Bataille. Ainsi, avant la minuit, il fit tenir ses gens en Armes, avec que le moins de bruit qu'il fut possible de faire; Et les faisant décamper avec ce qu'il avoit de Tentés & d'Indiens, il fit le tour à main gauche, traucosant une assez bonne estenduë de Montagne, ou, comme dit Diego Fernandez Valentin, luy & ses gens eurent toute la nuit la
Ch. 52.
pluye sur le dos, passerent par des Fondrières fort dangereuses, & tra-

verserent de grandes Riuieres, Quelques fois aussi on estoit contrainct de faire tourner les cheuaux au bas des Collines, d'où se trainant sur la troupe, ils se laissoient cheoir dans les Riuieres prochaines: D'où il aduint qu'ayint marché toute cette nuit parmy ces perils, l'euement en fut tres-dommageable pour eux; pource qu'ouïr la perte qu'ils firent de quelques Cheuaux, il y eut encore des Soldats qui s'esgarerent de telle sorte, qu'ils ne purent se trouver assez à temps à cette Bataille.

Ce sont les paroles du palentin, qui deuoit dire de plus, que si quelque chose obligea le Vice-Roy à faire vn si penible chemin, ce fut l'extrême desir qu'il auoit d'enuelopper l'Ennemy par derriere, & de le charger le lendemain matin; ne pouuant s'imaginer que le chemin deuiroit estre si rude, ny si long; puis que comme dit Carate, il n'estoit qu'à trois lieues de Quiru: mais enfin il s'en trouua plus de huiet, à cause des rours & des destours que necessairement il luy fallut faire. Cette Action fut imputée à grande faute, à ceux qui la conseillerent au Vice-Roy, n'y ayant point d'apparence qu'à la veille d'une Bataille telle que celle-cy, on deuiroit fatiguer ainsi les hommes & les cheuaux, en les faisant roder toute la nuit, huiet lieues durant à trauers des Montagnes & des chemins presque inaccessibles. Mais quoy? quand le mal-heur doit arriuer vne fois, principalement en matiere de Guerre, les meilleurs conseils qu'on pense donner, ne se tournent le plus souuent qu'au prejudice de ceux qui les donnent.

BATAILLE DE QUITU, OÙ FUT DE-
faite l'Armée du Vice-Roy Blasco Nuñez Vela,
& luy mis à mort.

CHAPITRE XXXIV.

LE Vice Roy entra dans la Ville de Quiru, sans trouuer personne qui luy resistast: Et là mesme ayant appris d'une Femme, que Gonçalo piçarre le venoit trouuer, il s'en estonna grandement, & se douta bien de la piece qu'on luy auoit iouée. D'un autre costé Gonçalo piçarre nescachant rien de l'arriuée du Vice-Roy à Quiru, creut tousiours qu'il estoit dans son camp, iusques à ce que le matin les Coureurs s'estans approchez des

Tentes,

Tentes, & voyant le peu de bruit qu'on faisoit, entrèrent dedans, & sceurent des Indiens ce qui se passoit: dont ils aduertirent Gonçalo Pigarre. A cette nouuelle, il depescha en grande diligence des Coureurs de toutes parts, qui l'assurerent au vray que le Vice-Roy estoit dans Quitu: Il descampa donc à l'heure mesme, & fit marcher ses gens en ordre de Bataille, avec resolution de la donner au Vice-Roy, en quelque lieu qu'il le rencontra. Luy cependant bien certain de l'estat des affaires, & de l'aduantage que les Ennemis auoient sur luy, conclud à part soy (puis qu'il n'y auoit point d'autre remede) de hazarder ce combat; sur l'esperance qu'il auoit, que ceux qui seroient vrayes seruiteurs du Roy, se rendroient dans son Party.

Avec cette resolution, il sortit de la Ville pour receuoir l'Ennemy, & fit tout ce qu'il pût pour animer ses Soldats: Comme en effect, ils marcherent tous, avec tant de courage, & d'ardeur, qu'ils sembloient estre assurez de la Victoire: Et à vray dire, bien que gonçalo pigarre eut l'aduantage de son costé, touchant le nombre des gens de guerre, cela n'empeschoit pas que le Vice-Roy ne se pût donner la gloire d'auoir aussi de vaillans Chefs, & autres hommes signalez. Sancho Sanchez d'Avila, & son Cousin Iean Cabrero, estoient Capitaines des gens de pied, & l'Adelentrado, Sebastien de Belalcaçar, Sepeda, & pedro de Bassan commandoient la Caualerie. Comme ils furent en presence, il commencerent à s'escarmoucher, & les Arquebuziers firent de part & d'autre, diuerses descharges: en quoy veritablement ceux de pigarre se trouuerent auoir beaucoup d'auantage sur les gens du Vice-Roy, d'autant que ses Arquebuziers estoient plus adroits, comme plus accoustumez à la guerre, & leur poudre incomparablement meilleure que celle des autres: Et d'autant que leurs Bataillons marchoient trop serrez, il falut necessairement que les Soldats qui s'y trouuerent de surcroist, s'allassent ranger à leurs Drappeaux. Alors, du costé de gonçalo pigarre, & le Capitaine Iean d'Acosta, & vn autre bon Soldat, appellé raez de Sottomajor, rallierent leurs gens: de sorte qu'en mesme temps Gonçalo pigarre, commanda au Licencié Carual de partir avec sa Compagnie, pour charger les Ennemis du costé droit. Apres cét ordre, il voulut estre à la teste des gens de cheual; mais ses Capitaines n'en dementerent point d'accord, & les mirent en vn costé du principal Bataillon, avec sept, ou

huit gardes qui l'accompagnoient, leur dessein estant qu'il se tint là pour donner ses ordres.

Si tost que les Gens-d'armes du Vice-Roy, qui estoient environ cent cinquante, virent approcher ceux du Licencié Caruaial, ils allerent au deuant, & se meslerent parmy eux hors de temps, *avec si peu d'ordre*, comme dit Augustin de Carate, *qu'ils furent presque mis en déroute*, auant qu'auoir ioint les Ennemis; car vne troupe d'Arquebuziers qui les guettoient d'un costé, les endommagea grandement: Et d'ailleurs, le Licencié Caruaial les traita fort mal avecque les siens, qui pour estre en petit nombre, ne laissoient pas d'auoir l'aduantage sur ceux du Vice-Roy; Aussi veritablement, eux & leurs Cheuaux, estoient frais & robustes, au lieu que ceux du Vice-Roy, n'en pouuoient plus de foiblesse, & de lassitude: Ce qui fut cause que parmy eux il s'en trouua plusieurs, que le rude choc des Lances contraignit de vider les Arsons; Apres les auoir rompuës, & s'estre ralliez ils-en virent aux Espées, aux Haches, & aux Masses d'Armes, dont ils se chargerent si rudement, que la Bataille fut tout à fait cruelle & sanglante. Cependant, la Cavalerie de Gonzalo Pizarre, composée d'environ cent Hommes, qui marchaient sous sa Cornette, se mit à donner; & trouuant les Ennemis tous en desordre, n'eut pas beaucoup de peine à les mettre entièrement en déroute. Comme cela se passoit ainsi, les gens de pied ne s'espargnoient point de leur costé: Et pour le bruit effroyable qu'ils faisoient dans le Combat, sembloient estre en beaucoup plus grand nombre qu'ils n'estoient. Aux premieres descharges qui se firent, le Capitaine Jean Cabrera demeura mort sur la place, & vn peu apres luy, Sancho Sanchez d'Auila fut tué de mesme, apres s'estre seruy valeureusement d'une Espée à deux mains, dont il rompit plusieurs files du Bataillon contraire: Mais enfin, l'escheec des gens du Vice-Roy, ayant donné l'aduantage du nombre à ceux de Pizarre, outre qu'ils auoient desia celuy des Armes, leur fut vn chemin ouuert à la Victoire, pource qu'ils ne cesserent d'ataquer les Ennemis de tous costez, iusques à ce qu'ils en tuerent la plus part, & avec eux leurs Capitaines. Pendant cette déroute, le Vice-Roy mêlé dans la Cavalerie, combattoit avec beaucoup de courage; Ce ne fut pas mesme sans quelque sorte de bon-heur: car à la premiere rencontre, il porta par terre Alonse de Montaluo, & fit

plusieurs autres choses, qui tesmoignerent assez qu'il ne manquoit pas de cœur. Il portoit par dessus ses Armes, vne Camisole d'Indien, qui fut cause de sa mort, d'aurât qu'en cét équipage, qui empeschoit qu'on ne le connut, s'estant voulu retirer, apres la perte des siens, il fit rencontre d'un Habitant d'Arequepa, qu'on appelloit Hernand de Torrez, qui ne le reconnoissant point, luy deschargea sur la teste vn si grand coup d'une Hache d'Armes, qu'il l'estourdit tout à fait : si bien quel'un & l'autre tomberent par terre. Augustin de Carate dit à ce propos ce qui s'ensuit. *Le Vice-Roy, & son cheual, estoient si harassés du travail de la nuit passée, durant laquelle ils n'auoient, ny reposé, ny mangé, qu'il ne faut pas s'estonner s'ils se laisserent abbatre. Ce qui fut cause, qu'encore que les Fantassins du Vice-Roy tinssent ferme dans le Combat; si est-ce que le voyant porté par terre, ils lâcherent le pied, de telle sorte qu'ils furent mis en déroute, & la plus-part tailléz en pieces.* Liu. 5.
Ch. 35.

Que si Hernand de Torrez, eut connu le Vice-Roy, par l'ordre de saint Iacques qu'il portoit à descouuert sur son Estomach, il est indubitable qu'il ne l'eut point frappé à mort; mais qu'il eut plustost rasché de le prendre, appellant pour cét effect ses Camarades à son secours: Mais comme il le prit pour vn homme particulier, & mesme pour quelque pauvre Soldat, à cause de l'habillement d'un Indien dont il estoit déguisé, il luy donna le coup de la mort: Quelques-vns blasmerent le Vice-Roy, de s'estre ainsi trauesti; mais il le fit apparamment, afin de n'estre pas si tost pris, s'il venoit à perdre la Bataille; Et d'ailleurs, il ne desira pas qu'on le reconnut, afin qu'on le traitast en simple Soldat, plustost qu'en qualité de Vice-Roy: Et voila quelle fut sa disgrâce.

Après la défaite des gens du Vice-Roy, le Licencié Caruajal se mit à courir de toutes parts, pour voir si dans la déroute & la confusion des Vaincus, il ne le rencontreroit point, pour vanger sur luy le déplaisir qu'il auoit de la mort de son Frere; Mais il trouua que le Capitaine redro de puellez estoit apres, comme s'il eut voulu luy oster ce peu de vie qui luy restoit, tant à cause de sa cheute de dessus son cheual, que d'une Arquebuzade qu'il auoit receuë. Où il est à remarquer que ce fut vn des Soldats mesme du Vice-Roy, qui le monstra à redro de puellez, & que sans cét aduis il ne l'eut iamais reconnu de la façon qu'il estoit habillé. Le Licencié Caruajal

voulut mettre pied à terre, pour acheuer de le tuer sans le faire languir, disant que c'estoit vne lascheté trop grande, que de frapper inhumainement, & bourreler vn homme qui s'en alloit rendre l'esprit : de sorte qu'un peu apres le Liceneié, commanda à vn Negre qui le seruoit, de luy couper la teste, qui fut à l'instant portée à Quito, & publiquement exposée sur vn Gibet; elle n'y fut guere neantmoins, pource que Gonçalo Piçarre, bien fâché de cette Action, la fit aussi-tost oster de-là, & la ioindre au corps du Defunct pour l'enseuelir. Vn Autheur parlant de ce-cy, dit les paroles suiuanes.

Comme ont eut porté en la Ville de Quito la teste du Vice-Roy, elle fut mise en vn Gibet, qui estoit à la place, où elle ne demeura que fort peu de temps; car quelques-uns ne la pouuant souffrir, pour l'horreur qu'ils en eurent, l'osterent de ce lieu-là, & l'enseuelirent, apres l'auoir soimée à son corps.

L'on peut remarquer icy que cét Autheur, pour ne dire pas que Gonçalo Piçarre fit oster cette teste du Gibet, met en auant que quelques-uns l'attracherent, comme vn objet insupportable à leurs yeux; par où il semble blasmer Gonçalo Piçarre de l'auoir fait mettre là, ou du moins permis qu'elle y fut mise; ce qu'il ne fit pas neantmoins; au contraire, il en fut si fâché, qu'au rapport de Gomare, il l'enuoya destacher du Gibet, dès qu'il s'eut qu'on l'y auoit apportée. Mais c'est la coustume de la plus-part de ceux qui escriuent, d'adjoûter aux euenemens passez, ou même d'en retrancher beaucoup de choses, pour se rendre complaisans à l'humeur de ceux qu'ils veulent flatter. Le même Gomare en cét endroit, où il parle de la mort du Vice-Roy, *Hernand de Torrez*, dit-il, *Habitant d'Arequipa*, rencontra fortuitement *Blasco Nuñez*, qu'il ietta de son cheual en bas, sans le recognostre selon quelques-uns, pource qu'il portoit sur ses Armes vne espee de *Camisole* à l'Indienne: Alors *Herrera Aumosnier de Picarre*, qui le vid cheoir, accourut incontinent pour le confesser; & ne se sachant qui il estoit, le voulut scauoir de luy: Mais *Blasco Nuñez* refusant de se declarer: C'est, luy respondit-il, de quoy vous ne deuez pas vous mettre en peine; faites seulement vostre Charge. Que s'il cacha sa condition alors, ce fut selon quelques-uns, pour la crainte qu'il eut qu'on ne le traitast avec inhumanité, &c.

En suite de ces choses, on luy trancha la teste, qui fut portée au Gibet; Mais auparauant il y eut quelques Soldats, si peu ref-

peñucux, & si Barbares ensemble, qu'ils luy pellerent vne partie de la barbe, disant, *C'est pour auoir esté tousiours en colere, & d'humeur insupportable, que se voila maintenant reduit à ce point.* A quoy l'adjousteray, qu'un Capitaine de ma cognoissance porta quelque temps sur son chapeau, en forme de Pennache, ce qui estoit resté de barbe à ce Cavalier infortuné; Mais il fut contraint de l'oster par l'expres commandement qu'il en eut. Voila qu'elle fut la fin de Blasco Nuñez, pour s'estre voulu trop obstiner à introduire, & faire executer vne chose, qui n'estoit ny conuenable à son Roy, ny au vaste Royaume du Peru. D'où s'ensuiuirent aussi diuerses ruines, & mesme plusieurs morts, tant du costé des Espagnols, que des Indiens, comme nous auons veu cy-deuant, & comme nous le verrons encote dans la suite de Histoire: En quoy toutesfois ce Vice-Roy ne fut pas si à blâmer, comme on se le persuada, n'ayant rien fait en cela que par l'expres commandement du Roy son Maistre: Ce que nous prouuerons cy-apres, & par le tesmoignage des Historiens, & par l'adueu qu'il en fit luy-mesme plusieurs fois, dont nous auons desia fait mention.

ENTERREMENT DV VICE-ROY, ET ordre donné par Gonçalo Pizarre, apres le succès de la Bataille. Il pardonne à Vela Nuñez, & fait plusieurs bonnes Loix, pour le Gouvernement du Peru.

CHAPITRE XXXV.

GONÇALO Pizarre ayant gagné la Victoire, fit sonner incessamment la Retraite, pour auoir pris garde que ses gens s'escartoiert les vns des autres en la poutsuite des Ennemis, qu'ils ne cessoiert de traiter fort mal. En cette Baraille demurerent morts sur la place deux cens hommes du Vice-Roy: au lieu que du costé de Pizarre, il n'y en eut seulement que sept de ruez, comme le tesmoigne Carate; Dequoy l'on ne s'estonnera pas, si l'on considère que les gens du Vice-Roy estoient si lassez du long chemin, & de la fatigue qu'ils auoient eue la nuit precedente, qu'ils n'estoient pas gens à combattre, mais plustost

à se laisser tuer, comme ils firent, pour le service de leur Roy. Ils furent tous enterrez au Champ de Bataille, dans les fosses qu'on y fit exprés, en chacune desquelles ils en mirent six ou sept. Mais pour le regard du Vice-Roy, de Sancho Sanchez d'Auila, de Jean Cabrera, du Licencié Gallego, du Capitaine Sepeda, & des autres principaux, ils furent transportez à la Ville, & ensevelis dans la grande Eglise, avecque beaucoup de pompe, & de solemnité, Gonzalo Pizarre, & à son exemple, ses principaux Officiers, ayans tous pris des Robes de deuil; Les plus considerables d'entre les Blessez, furent Dom Alonso de Montemajor, le Gouverneur Sebastien de Belalcaçar, & François Hernandez Giron, que Gomare appelle François Hernandez de Casserez, dont Augustin de Chate ne fait aucune mention; mais Diego Fernandez dit de luy ce qui suit.

Gonzalo Pizarre voulut tuer le Capitaine François Hernandez Giron, & mesme il commanda qu'on le deposchast (perte qui n'est pas estée grande, pour les maux qu'il fit, & qu'il causa depuis au Peru) mais vaincu par les prieres qui luy furent faites, à cause qu'il n'estoit pas hait outre qu'il auoit combattu vaillamment, & que d'ailleurs, il p'ssoit pour parent de Laurens d'Aldana; Pizarre changea d'aduis, & luy fit grace.

Le Licencié Alvarez, Auditeur que le Vice-Roy mena toujours avec luy, fut si mal traité dans cette Bataille, qu'il y receut plusieurs blessures, dont il mourut peu de iours apres; Quelques Mefdisans neantmoins, comme le remarquent les trois Historiens susnommez, imputerent sa mort à la faute des Chirurgiens, qui s'entendoient, disoient-ils, avec Gonzalo Pizarre; Mais cela se trouua faux: & l'on reconnut alors vne chose assez ordinaire en tout temps, qui est, qu'en matiere de Factions, & de Partis contraires, les mauuaises langues s'imposent rarement silence, & prennent plaisir à mefdire, principalement de ceux, à qui la Fortune a fait auoir du pire. Sebastien de Belalcaçar obtint pardon du mesme Pizarre, qui l'enuoya en son Gouvernement, avec la plus part des gens qu'il auoit menez contre luy: Ce qu'il ne fit toutesfois, qu'apres l'auoir obligé par serment à le seruir, & luy estre fidele à l'aduenir. Apres cela il bannit à Chily Dom Alonso de Montemajor, Rodriguez Nuñez de Bouilla, Tresorier de *Quitru*, & quelques autres des Principaux de la Ville, qui se reuoierent en ce Voyage, & dans le Nauire

où ils estoient, s'en retournerent en la nouuelle Espagne. Il rallia en suite tout ce qu'il pût auoir de gens du costé des Vaincus, & fit pendre Pedro Bello, avec Pedro Anton, pour l'auoir abandonné laschement, & s'en estre fuys par Mer en la Ville des Rois. Cela fait, il demanda aux autres quel sujet ils auoient de se plaindre de luy, qui n'estoit-là que pour le commun bien des Habitans, & de la Soldatesque: qu'ils se faisoient la Guerre eux-mesmes, quand ils s'attaquoient à luy, & qu'il leur pardonnoit toutesfoi; Voulant croire que les vns auoient esté trompez, & les autres contrainsts à se mutiner ainsi: Surquoy il les rassoura, que s'ils se mettoient dans leur deuoir, il ne les estimeroit pas moins que ceux qui l'auoient suiuy. Qu'il les considereroit comme eux, & recognoistroit également leurs seruices: Ce que leur ayant promis, il les enuoya en son Camp, avecque les choses qui leur estoient necessaires, & vn exprés commandement à ses gens, de ne les fascher de parole, ny de fait, & de les traiter en Freres. En suite de cecy, il depescha des Courriers par tout le Royaume, pour y semer les nouuelles de sa Victoire, afin d'encourager dauantago ceux de son Party, & de ruiner les esperances des Ennemis. Il fit embarquer aussi pour Panama le Capitaine Alarcon, pour aduertir Pedro de Hinoyosa de l'heureux succez de ses Armes, & luy dire par mesme moyen, qu'à son retour il emmenast Vela Nuñez, & tous les autres, qui estoient Prisonniers avec luy. Cependant parmy ceux qui s'interessant dans sa Fortune, pensoient avec soing à sa conduite, & aux choses qu'il luy falloit faire à l'aduenir, il y en eut quelques-vns qui luy conseillerent d'enuoyer son Armée navale par la Coste de la nouuelle Espagne & de Niçaraga, brusser tout ce qu'on y trouueroit de Vaisseaux, afin de ruiner par ce moyen tous les des-seins que les Ennemis pourroient auoir de le combattre par Mer; & pareillement de mettre son Armée à couuert, au Port de la Ville des Rois, afin qu'en cas que sa Maiesté enuoyast des gens en terre ferme, ils ne pussent traicter au Peru, & qu'il se preualût ainsi de leur impuissance, à l'auantage de son Party, chose qui luy estoit en esser tres-importante, comme il se verra cy-apres, pour venir à bout de son entreprise. Mais Gonçalo Pigarte se fioit si fort à Pedro de Hinoyosa, & à ceux de sa suite, lesquels d'une basse necessité, il auoit tous esleuez à vne haute Fortune, & comblez ensemble d'honneurs & de richesses,

par diuers Départemens d'Indiens; Que sur la creance qu'il eut, qu'ils n'en seroient pas ingrats, comme Gentils-hommes qu'ils estoient, il ne daigna suivre le conseil de ses Amis : A quoy l'incita particulièrement l'apprehension qu'il eut, qu'on n'imputast cette preuoyance à lacheté de courage, ce qui l'eut fâché d'autant plus, que pour l'extrême confiance qu'il mettoit en sa propre valeur, qui trompe souuent ceux qui s'en picquent par trop, il se croyoit assez fort, pour resister à ses Ennemis, & les vaincre, quelques forces qu'ils eussent.

Le Capitaine Alarçon fit donc son voyage, emmenant avecque luy le Fils de Gonçalo Piçarre, Vela Nuñez, & les trois autres Soldats qu'on auoit pris tous ensemble, dont il en fit pendre deux, ayant sceu qu'ils auoient tenu quelque langage scandaleux, & en eut fait autant du troisieme, si le fils de Piçarre ne fut interuenu pour le sauuer, disant que ce dernier s'estoit tousiours comporté enuers luy, avec beaucoup de respect, & de soumission. Vela Nuñez arriué à Quitu, y trouua plus favorable qu'il ne croyoit Gonçalo Piçarre; car il luy pardonna tout le passé, l'aduertissant d'estre à l'aduenir plus aduisé, & de ne se point rendre suspect par des actions faites à la volée, qui ne pouuoient estre que dangereuses pour luy. Il le mena iusqu'à la Ville des Rois, avec plus de liberté qu'il n'en deuoit donner apparemment à vn si grand Ennemy: Neantmoins, comme Piçarre estoit homme franc, il ne se desioit pas volontiers de ceux qu'il ne croyoit plus estre en possession de luy pouuoir nuire. J'auois oublié de dire, que le Licencié Sepeda fut avec luy au Champ de Bataille, où il combattit en Soldat, & non pas en Auditeur, au gré de Gonçalo, qui apres auoir mis ordre aux choses que nous venons de dire, fit vn assez long séjour à Quitu, où il tourna ses pensées à tous les moyens qu'il pourroit tenir, pour bien regler cét Empire, dont il auoit le Gouvernement. Il consideroit, Qu'il se trouuoit seul, ayant luy-mesme fait rompre l'Audience à dessein, menant, comme j'ay dit avec luy, l'Auditeur Sepeda, Que le Licencié Aluarez estoit mort, le Docteur Texada enuoyé Ambassadeur en Espagne, & le Licencié Carate demeuré malade dans la Ville des Rois; tellement qu'il ne scauoit de quelle sorte reestabli l'Audience: Mais enfin, pour le desir qu'il auoit de rendre vn fidele compte de ses Actions, il se resolut de faire luy-mesme des Loix & des Ordonnances pour
le bon

le bon Gouvernement du Pais, l'accroissement de la Religion Chrestienne, & le commun bien, tant des Espagnols, que des Indiens, comme le remarque François Lopez de Gomare, dans *Ch. 17.* vn Chapitre, dont le titre est tel, *Du bon Gouvernement de Gonçalo Piçarre, en l'absence de François de Caruajal, & comme il fut sollicité de plusieurs à se faire Roy.*

Tant que Piçarre, dit le mesme Auteur, n'eut point près de luy François de Caruajal, son Mestre de Camp, il ne fit iamais mourir aucun Espagnol de son mouuement propre, & sans le consentement de toutes les autres de son Conseil; y procedant alors, selon l'ordre, & les formalitez de Justice; Il ordonna par Lettres expressez, Que sur peine de la vie, on n'eut à fouler, ny à rançonner en aucune sorte les Indiens; Que tous Commandeurs eussent des Prestres dans leurs Bourgades, pour enseigner aux Indiens la Doctrine Chrestienne, sur peine d'estre priuez de leurs Départemens; Qu'on eut soin de faire valoir le Quint & la Druane du Roy, disant, que son Frere François Piçarre ne s'y esparagnoit point: Qu'on ne prit seulement qu'un de dix, & que puis qu'il n'y auoit plus de Guerre, la mort de Blasco Nuñez l'ayant terminée, ils eussent tous à seruir fidèlement le Roy, pour l'obliger à reuocquer les Ordonnances, à les reestabli dans leurs Départemens, & à leur pardonner le passé. Voila quels estoient ses Reglemens, que chacun loüoit alors, & que Gasca mesme ne pûts'empescher d'approuuer, quand il dit de luy, *Qu'il ne gouuernoit pas mal, pour estre Tyran.* Oû il est à remarquer, comme j'ay dit ailleurs, que ce bon Gouvernement dura, iusqu'à ce que Pedro de Hinoyosa liura l'Armée en la puissance de Gasca.

C'est ce que dit Gomare dans ce Chapitre, où il adjouste quantité de choses, que nous rapporterons quand il en sera temps; Car il se passa en ces entrefaites diuerses Actions fort memorables, & qui meritent bien d'estre escrites: Mais pour les raconter comme il faut, il est necessaire que nous fassions vn voyage de sept cens lieûs, pour aller chercher François de Caruajal, Diego Centeno, que nous auons laissez dans vn grand Contraste, & se poursuiuant l'un l'autre, pour se faire tous les maux imaginables, comme il se verra par le Chapitre suiuant.

HARDY STRATAGEME DE DIEGO

*Centeno, contre François de Caruajal; & autres
diuers Euenemens, iusques à la fin de cét Eschec.*

CHAPITRE XXXVI.

FRANÇOIS de Caruajal, comme il a esté dit cy. deuant, ne perdit pas vne seule heure de temps, pour auoir entre ses mains Diego Centeno, & halter la défaite de cét Ennemy, contre lequel il marchoit rousiours en Ordonnance de Bataille, sans qu'il se passast guere de iours, ausquels il ne fit quelque butin sur luy. Mais vne fois entre les autres, comme il tallonnoit son Ennemy, qu'il n'abandonnoit iamais de veuë, il salut que les vns & les autres passassent par vn fonds (s'y en trouuant beaucoup de semblables en ce Pais-là) d'où iusques à vne petite Riuiere, il y auoit plus d'une lieüe à descendre, & aurant à monter, sans qu'il y eut qu'environ la portée d'une Arquebuz, d'une Colline à l'autre. Comme donc François de Caruajal sçauoit fort bien le chemin & ses aduenues; aussi estoit-il extrêmement aisé de prendre par là sa marche, cōme s'il eut mené son Ennemy à la boucherie. Car il s'imaginoit que tandis qu'il descendroit de la Coline au bord de la Riuiere, il luy donneroit moyen de gagner l'eminence du lieu, & qu'ainsi pendant que Centeno mōteroit l'autre Costau, ses Arquebuziers le tireroient de pied ferme, & ses gens par consequent, sans qu'apparamment ils deussent manquer leur coup. Caruajal se flattant de cette imagination, continuoit sa route avecque ses gens, qui ne cessoient de se resioüyr, à cause qu'ils tenoient pour certain, qu'auant qu'il fut nuit, ils verroient à leur contentement la fin de leur entreprise: mais d'un autre costé, Diego Centeno, qui prenoit garde à luy, & aux siens, descourrit de bonne Fortune l'extrême danger où il s'alloit exposer; de sorte que pour y mettre remede, à vne lieüe de la descente du Costau, qui menoit à la Riuiere, ayant assemblé les principaux de son Armée, Messieurs, leur dit il, *vous voyez en quelles extremittez nous sommes reduits; car tandis que nous monterons la Coline, qui est à costé de l'autre Riuiere, que nous auons de-*

uant nous, il est indubitable que nostre Ennemy nous enucloppera par derriere, & que ses Arquebuziers feront sur nous des descharges avecque tant de iustesse, qu'ils nous tuéront tous, sans que pas vn en eschappe: Mais pour empescher que cela n'arriue, ie me suis aduisé d'un stratageme qui ne me semble pas mauuais; C'est qu'il faut que six d'entre vous, de ceux qui ont les meilleurs cheuaux, se mettent derriere la Coline, qui est à la main droite de ce chemin, où ils se tiennent clos, & couuerts, en attendant que Caruajal, & son Auant-garde ayent passé. Ils donneront alors sur l'Arriere-garde; & sans respecer personne, chargeront indifferemment tout ce qu'ils trouueront d'Indiens, de Negres, & d'Espagnols; faisant le mesme de leurs Indiens, & de leurs cheuaux: avecque cela, ie suis d'aduis qu'ils crient le plus haut qu'ils pourront, afin que ce bruit venant aux oreilles de Caruajal, il rebrouffe pour secourir les siens, & nous laisse passer librement: sinon, nous perirons tous, auant que le iour se passe. Leur ayant donné cét aduis, il nomma six Caualliers à l'execution de cette entreprise, afin de vider le differend, où ils estoient ensemble; pource que l'ayant communiqué à quinze ou seize, ils y vouloient tous aller.

Après cette precaution, Diego Centeno poursuiuit sa route, hastant les siens de marcher le plus viste qu'ils pourroient. Les six Caualliers s'aduancerent vers la Coline, où ils se cachèrent, pour n'estre descouuerts; puis quand ils virent que Caruajal, & son Auant-garde (où il auoit mis ses meilleurs hommes, ne se doutât pas que ses Ennemis les deussent charger en queue) l'eurent entierement passée, ils attaquèrent l'Arriere-garde, & poursuiuirent avecque furie, les Espagnols, les Indiens, & les Negres qui menaient le Bagage. Non content de cela, ils tuèrent les Mulets & les Cheuaux qu'ils rencontrèrent: ce qui obligea les Ennemis à crier alarme, & à donner secours à leurs gens: Caruajal voyant ce qu'il ne pouuoit s'imaginer, fit alte à l'instant sans vouloir neantmoins rebrouffer chemin, de peur que l'alarme estant fausse, & ne trouuant aucuns Ennemis, il ne perdît l'occasion qu'il auoit en main: Cependant les six hommes de Cheual. passerent outre en leur Entreprise, & s'y prirent de si bonne façon, qu'ils reduisirent les gens de Caruajal, rous esfrayez qu'ils estoient, à redoubler leurs cris, & demander qu'on les secourut. Or pource qu'en mesme temps, il arriua qu'entre les Mulets que tuèrent les six Caualliers, ils'en trouua vn qui

estoit chargé de deux Barrils de Poudre, ils s'aduiferent d'y mettre le feu, d'où s'ensuiuit vn si grand bruit, que les Valons & les prochaines Colines en retentirent, comme de celuy de quelque tonnerre: Cela fit croire à François de Caruaial, que cette allarme n'estoit pas moins vraye que dommageable, si bien qu'à l'heure mesme, il enuoya secourir les siens, qui en auoient grand besoin: Les Cavaliers s'en estant apperceus, tournerent le dos, comme ils virent venir à eux les gens de Guerre, prenant le mesme chemin, par où ils estoient venus; Et ainsi à la faueur des Indiens leurs Guides, ils allerent ioindre six ou septiours apres, le Capitaine Diego Centeno. Par ce moyen le Mestre du Camp Caruaial vint bien à point, pour secourir les siens, & fut contraint de passer le reste du iour, & la nuit suivante, au mesme lieu où il les auoit secourus, ne pouuant aucunement poursuivre l'Ennemy, à cause des grands degasts que les six Cavaliers auoient faits: car n'ayant, ny faute de temps, ny aucun obstacle à leur dessein, ils tuerent tout ce qu'ils trouuerent de gens deuant eux, & donnerent moyen cependant à Diego Centeno de se retirer du mauuais passage, sans estre endommagé de son Ennemy, comme tous deux l'auoient creu. Dequoy veritablement Caruaial ne receut pas vn petit desplaisir; & n'est pas à croire combien il se despita de cét affront, quand il vint à se représenter, qu'un chetif Capitaine, qui à comparaisson de luy n'estoit qu'un petit Apprentif au mestier des Armes, n'auoit pas laissé luy ioüir cette piece, & ce hardy stratageme; par le moyen duquel il s'estoit desliuré de ses mains, & d'un danger si apparent, qu'il luy faisoit tenir sa perte pour ineuitable. Aussi pour l'extrême desplaisir qu'il en eut, il ne dit pas vn seul mot de tout ce iour là, ne pensant qu'à repater la perte receüe, ny ne voulut point souper cette mesme nuit, disant que le tour qu'on venoit de luy ioüir l'auoit saoulé pour vn long-temps. Mais enfin, apres qu'une partie de sa colere se fut passée avecque la nuit, s'adressant à ses principaux Officiers; *Messieurs*, leur dit-il, *il faut que te vous aduouë, que par l'espace de quarante ans que j'ay porté les Armes en Italie, j'ay veu se tirer glorieusement d'entre les mains de leurs Ennemis, le Roy de France; le grand Capitaine, Anthoine de Leyna; le Comte Pedro Nouarre; Marc-Anthoine Colonne; Fabrice Colonne, & plusieurs autres fameux Capitaines, tant Espagnols qu'Italiens: Mais apres tout, se n'ay iamais veu d'adresse semblable à celle, dont*

*s'est aujour d' huy seruy ce ieune homme , pour faire retraite , & se desli-
 urer des pieges que ie croyois luy auoir tendus. Ce furent les propres
 paroles dont vsa François de Caruaial, où ie n'ay adiouste, ny di-
 minué , & dont ie puis parler comme sçauant , pour les auoir ap-
 prises d'vn homme d'honneur, qui m'assura de les luy auoir ouy
 dire. Le iour d'apres, il se mit en Campagne de grand matin,
 poursuuiuant son ennemy avecque plus d'ardeur , & de diligen-
 ce qu'auparauant, de maniere qu'il gaignoit tous les iours sur luy
 des Gens, des Cheuaux, & quantité de Bagage: d'où il s'ensui-
 uoit , qu'il ne resta plus à Diego Centeno qu'environ quatre-
 vingts hommes, apres auoir esté poursuiuy plus de deux cens
 lieues, tantost par les grands chemins, tantost par de rudes sen-
 tiers, & tantost par des Montagnes, & des Vallées. Voyant donc
 ses gens si diminuez de nombre, & si abbatuz de lassitude , qu'il
 ne sçauoit que deuenir ; Il se persuada qu'il ne pourroit plus
 trouuer d'Azile sur terre ; Ce qui le fit resoudre d'en chercher
 vn sur la Mer, & de s'en aller le long de la Coste en la Ville d'A-
 requepa. Il enuoya pour cét effet vn de ses Capitaines, appelé
 Ribadaneira, avec ordre exprés, qu'en cas qu'il trouuaist quel-
 que Nauire à la Rade, il eut à s'en rendre maistre, ou à force d'ar-
 gent, ou par quelque sorte de stratageme, & à le mener au Port
 d'Arequepa, pour s'y embarquer, & se tirer de peril ; Le bon-
 heur voulust que Ribadaneira en trouua vn quis'en alloit à Chl-
 ly ; si bien que ses Compagnons & luy, l'ayant attaqué de nuict
 dans vne fregate, & avec le moins de bruit qu'ils peurent, s'en
 saisirent aisément, & le trouuerent fort propre à leur dessein,
 pour estre bien equippé de toutes choses. Ils se mirent donc de-
 dans, en intention de le mener au Port d'Arequepa ; Mais Die-
 go Centeno, pressé par Caruaial, y arriva plustost que le Naui-
 re ; & se voyant tenu de si près par l'Ennemy, qu'il ne sçauoit où
 aller, se resolut de diuiser ses gens. Il leur dit à cette fin, *Que
 Ribadaneira ne venoit point, & qu'en ce Port-là il n'y auoit aucun as-
 sescan, dans lequel il pût s'ensuyr de l'Ennemy, Quainsi luy sebloit à pro-
 pos qu'ils fissent retraite de quatre en quatre, de six en six, ou mesme
 tous seuls, comme ils aduiseroient pour le mieux, & qu'ils s'escartassent
 en diuers endroits, afin que si l'Ennemy conroit apres les vns, il ne les
 suiuist point tous ; Et que pour luy, il s'iroit cacher où il pourroit. Cela
 dit, il se retira d'avec eux, & s'en alla chercher vn lieu de Refu-
 ge sur le haut des Montagnes, accompagné de Louïs de Ribe-**

ra, & d'un Seruiteur: En effet, ces Fuyards y en trouuerent vn assez fauorable, en vne Cauerne où ils demurerent cachez près de huit mois, iusques à ce que le President Gasca entra dans le Peru, & furent entretenus durant tout ce temps-là, par vn Curaca, du Département de Michel Cornejo, dans les terres duquel ils se trouuoient, où nous les laisserions, iusques à ce qu'il sera temps de les en tirer.

Dans toutes les occasions que nous auons dites, où se trouua Diego Centeno, depuis qu'il eut leué des gens pour sa Maesté, il eut tousiours en sa compagnie Gonçalo Siluestre, natif de Herrera d'Alcantara, dont nous auons amplement parlé dans nostre Histoire de la Floride. Caruaial cependant poursuioit Diego Centeno iusques au Port d'Arequepa, où il en perdit la trace, & sceut que luy & ses Compagnons s'estoient débandez, qui çà, qui là. Ribadaneira arriua le lendemain matin dans vn Nauire, au Port de la mesme Ville, & ne pût si bien se cacher, que Caruaial n'apprit d'un Prisonnier qu'il estoit, à quelle fin il venoit là, & le passeport qu'il auoit, dont il fit dessein de se saisir, & pareillement de son Nauire. Mais Ribadaneira fut si aduisé, qu'apres auoir demandé à parler à quelqu'un de sa cognoissance, voyant qu'il ne venoit personne, il desmara du Port aussitost, & se mit à la voile. Caruaial ayant sceu à mesme temps, que Lopez de Mendoza fuyoit plus auant dans le Païs, avec sept ou huit de ses Compagnons, enuoya promptement apres luy vn des ses Capitaines, & avec luy 20. Archebuziers; qui l'ayant suivi près de cent lieuës, l'enfermerent enfin dans le Gouvernement, & le Païs de Conqueste du Capitaine Diego de Royas; d'où ils furent rendre compte à Caruaial de ce qui leur estoit arriué; Mais depuis qu'il vid que Diego Centeno s'estoit perdu, & que pas vn des siens ne paroissoit, il s'en alla droit à la Ville de la Plata, pour y tirer de l'argent, tant des biens de Gonçalo Pigarre, que des Fuyards qui l'auoient abandonné.

Pour reuenir à Lopez de Mendoza, il faut sçauoir que ce fut en effet luy-mesme, qui entra, comme nous auons dit, dans le Gouvernement de Diego de Royas, qui fut vn des Capitaines que le Licencié Vaca de Castro, Gouverneur du Peru, enuoya faire de nouvelles Conquestes, apres auoir appaisé les Reuoltes de ce grand Empire, par le chastiment & la mort de Dom Diego d'Almagre le ieune. Nous dirons dans le Chapitre suivant ce qu'iluy arriua.

*ADVANTURES DE LOPEZ DE MENDOÇA;
& de quelle sorte de Poison les Indiens se servoient,
pour envenimer leurs fleches; Avec le retour
du mesme Mendoza dans le Peru.*

CHAPITRE XXXVII.

L'INTENTION de Lopez de Mendoza estoit de se cacher avec ses Compagnons, sur les hautes Montagnes des Andes, qui sont au Levant de tout le Peru, iusques à ce qu'il vint quelque nouvel ordre de la part de sa Maiesté. Comme ils s'en alloit donc avec ce dessein, sans penser qu'il deuit iamais rencontrer aucuns Espagnols en ce País. là, il fut tout estonné de se trouver avecque Gabriel Bermudez, l'un de ceux, qui avec Diego de Royas estoient entrez dans ces nouvelles Terres, où luy & ses Compagnons firent à leur aduenement des efforts incroyables contre les Indiens leurs Ennemis, & souffrirent toutes les incommoditez, que le manquement des viures & la fatigue d'un long chemin causent ordinairement à ceux qui voyagent. Mais enfin, apres auoir aduancé sa Conqueste, iusques sur les bords de la Riuiere de Plata, tout contre le Fort que Sebastien Gabety auoir fait bastir, la mort de Diego de Royas leur General, fut cause que la dissention se mit parmy eux, quand il fut question d'eslire vn Chef, qui menast cette Armée, petite à vray dire, mais composée de gens qui auoient le cœur grand: Aussi attriua-t'il que par vn excez d'ambition déreglée, plusieurs de ceux qui pretendoient à cette Charge, s'entretuerent miserablement, & se diuiserent par diuerses bandes, tournant contre eux. mesmes leurs propres Armes, comme s'ils n'eussent point eu d'autres Ennemis à combattre.

La Mort de Diego de Royas vint d'un coup de Fleche que luy tirerent les Indiens, frottée d'une herbe si venimeuse, que ceux qui sont atteints de tels dards, n'en reschappent iamais, parce qu'apres la playe receuë, ce Poison fait son operation dans trois iours, & le septiesme il fait mourir le Blessé, dans un tel excez de rage, qu'il se mange les mains, & se donne de la teste contre la

muraille; si bien qu'il hasté sa fin par cette violence contre soy-mesme. Or d'autant que de si dangereux traits estoient grandement nuisibles aux Espagnols, ils firent toute sorte d'efforts, pour apprendre des Indiens quel en estoit le contrepoison: Mais voyant qu'ils ne le vouloient point declarer, ny par promesses, ny par menasses, ils s'aduiferent de tirer vne de ces Fleches dans la cuisse d'un Prisonnier d'entre eux, qu'ils lascherent apres à la Campagne, où il cueillit de deux sortes d'herbes differentes, chacune desquelles il pila separement, puis il beut le ius de l'une, & mit sur ses playes celuy de l'autre, les ayant auparauant incisées avec vn cousteau, & tiré la pointe de la Fleche, qui est si desliée, & faite de telle sorte, que quand ils viennent à la tirer de la playe, les éclats en demeurent dedans, qu'il faut arracher necessairement, autrement le contrepoison n'opere point; ce que l'Indien sceut si bien obseruer, qu'il fut guarý de sa blesseure. Les Espagnols descoururent ainsi ce secret, par le moyen duquel plusieurs se garentirent de la poison des Fleches, & quelques vns en moururent, pource qu'ils n'en pûrent tirer les pointes. Je rapporteray à ce propos, qu'aux Isles de Barlouento, en toute la Coste du Bresil, à Sainte Marthe, au nouveau Royaume, & en plusieurs autres Païs, les Indiens qui les habitoient, vsoient d'une sorte de poison bien estrange, qu'ils faisoient de cette façon, comme les premiers Conquerans l'apprirent depuis. Ils prenoient la cuisse d'un Indien, de ceux qu'ils tuoient à la Guerre, qu'ils exposoient au grand air, & au Soleil, apres l'auoir lardée d'autant de pointes de Fleches que la cuisse en pouuoit contenir. Les ayant ainsi laissées durant quelques iours, ils les retiroient; & sans les nettoyer, les faisoient secher à l'air, en quelque lieu où le Soleil ne donnast point, & en fettoient apres le bout de leurs Fleches: Ce qui estoit, à vray dire, vne inuention diabolique, & vn poison si dangereux qu'on n'en guerissoit que fort difficilement: A propos dequoy ie vous raconteray cy apres en son lieu, vne chose que ie vous puis asseurer au vray, pour l'auoir veüe moy-mesme. Depuis que les Espagnols furent entrez en ces Païs-là, les Indiens qui leur faisoient la Guerre, changerent la matiere du poison; Car au lieu qu'ils auoient accoustumé de la faire de chair d'Indien, ils la firent depuis de celle des Espagnols qu'ils mettoient à mort; Que s'ils en pouuoient prendre quelques vns qui fussent rousseaux, ou qui

cussent,

eussent, comme ils disent, le poil de safran, ils s'en seruoient plustost que des autres, pour ce genre de poison, trouuant cette couleur si estrange, qu'il leur sembloit qu'elle seroit plus venimeuse que pas vne autre. A quoy possible seruoit beaucoup, d'auoir ouï dire aux Espagnols, que tels Rousseaux estoient propres à faire du Reagal.

Mais pour reuenir à ceux qui entrerent les premiers dans ce Pais-là, il faut sçauoir qu'à raison de leur inimizie & de leurs mauuaises intelligences, voyant qu'ils ne pouuoient s'accorder, & qu'ils ne seroient iamais bien ensemble, ils resolurent de se separer, la plus-part d'entr'eux s'estant offerts à sortir de ce lieu-là, pour s'en aller au Peru, iugeant par les apparences que tant qu'ils seroient des-vnis & diuisez par la haine, ils ne seroient iamais rien contre les Indiens, qui estoient naturellement vaillans & aguerris. Ce que j'ay dit du poison, des Aduentures de Mendoza, & du Contraste des Espagnols, est amplement raconté par Diego Fernandez Palentin, qui dit là dessus des choses estranges, où ie vous enuoye pour abbreger mon Histoire. Il me suffit de vous aduertir, que ce qui fit aller ces Espagnols au Peru, fut premierement leur mauuaise intelligence, puis la nouvelle qu'un Indien leur apporta, touchant la Reuolte de ce grand Empire, quoy que neantmoins ils n'en sceussent pas les particularitez, mais seulement, que les Espagnols auoient guerre ensemble.

Cette nouuelle donc fut cause qu'ils enuoyerent Gabriel Bermudez en la Frontiere du Peru, pour sçauoir au vray ce qui se passoit entre ceux de leur Nation, & se ietter dans le Party qui leur sembleroit le plus aduantageux: d'où il aduint, que s'estant mis en chemin, il rencontra Lopez de Mendoza, qui luy fit un long recit de toutes les choses aduenues dans le Peru, depuis que Diego de Royas'en estoit sorty: de sorte que les Compagnons de Gabriel Bermudez s'estant ioints ensemble, mandèrent tous d'un commun accord Nicolas de Heredia Chef de l'autre Party, qui vint aussi tost avec ses gens. Lopez de Mendoza les mit bien ensemble, & alors les vns & les autres d'un commun consentement, l'ayant fait leur General, luy promirent de le suiure, & luy iurerent obeïssance. Ils estoient en tout cent cinquante hommes d'Armes, & presque tous bons Cavaliers, vaillans au possible, & inuincibles à la fatigue, comme

gens qui par l'espace de six cent lieuës de Pais, sans se donner le moindre relasche, & sans apprehender des travaux, qu'on peut, à vray dire nommer estrangers. Car en effet ils furent si grands, qu'ils sont au dessus de toute croyance, & de tout ce que les Historiens en scauroient jamais escrire,

Lopez de Mendoza se voyant fait Capitaine d'un si bon nombre de vaillans hommes, la gloire desquels s'estendoit si loing, sortit avec eux des Montagnes, pour voir s'il ne pourroit point resister à François de Caruajal, ou si quelque autre ne s'estoit pas joint à luy, sous pretexte de servir le Roy. Il entra dans la Contrée de *Pucuna*, & prit sa marche droit à la Ville, à qui l'on donne mesme nom qu'à la Prouince *. A son arrivée en ce lieu-là, il s'aduisa d'y séjourner quelque temps, pour s'y rafraichir, & y faire délasser ensemble ses hommes, & leurs cheuaux, qui se ressentioient les vns & les autres des travaux passez, & de l'extrême faim qu'ils auoient soufferte.

* Pucuna.

François de Caruajal, qui ne se mettoit en peine d'autre chose que de bien faire sa Charge de Mestre de Camp, fut aussi-tost aduertty de la sortie de Lopez de Mendoza, & des gens d'entrée (non qu'il donnoit aux Soldats nouvellement arriuez) qu'on luy dit estre sortis par vne estrange animosité les vns contre les autres : Ce qui le fit resoudre de les aller promptement chercher, pour se les pouoir assujettir plus à l'aise, avant qu'ils se fussent reconciliez ensemble. Lopez de Mendoza, qui sceut qu'ils venoient, se retrâcha dans le Bourg, & s'y fortifia le mieux qu'il pût, afin de luy resister; Mais quand il vid que Caruajal s'approchoit, il changea d'aduis, apprehendant qu'il ne l'assiégeât, & ne le contraignit par la faim à se rendre à luy, qui n'auoit fait aucune prouision de viures. Il considera d'ailleurs, que les siens, qui estoient presque tous gens de cheual, auoient beaucoup d'auantage sur les Ennemis; Qu'ils combatteroient mieux en plaine Campagne, qu'en vne Place assiegée, & que ceux de Caruajal se rendroient plus facilement à luy au Champ de Bataille, où il les pourroit receuoir plus à l'aise, qu'en vn lieu dont la muraille faisoit la separation: Car cette pensée qu'ils auoient tous, que Caruajal mescontentoit ses gens, & qu'à cause du mauvais traitement qu'il leur faisoit, ils l'abandonneroient aux occasions, estoit fortement enracinée dans l'esprit de plusieurs; & comme elle auoit souuent trompé Diego Centeno; aussi trompa-t'elle

maintenant Lopez de Mendoza. Il vint donc au deuant de François de Caruaial, qui marchoit en ordonnance de Bataille, avecque deſſein de l'attaquer dans ſon Fort; Mais quand il vid que Lopez de Mendoza ſon Ennemy ſortoit de la Place, il ſe mine plus qu'au parauant de luy vouloir donner bataille: Il n'en auoit pas enuie pourtant, & ne vouloit que le faire ſortir du Fort par vne ruſe de Guerre. Comme en eſſet il en ſortit avecque ſes gens, qui luy furent tous vn ſuiet de mocquerie, quand il vid qu'ils en eſtoient dehors, ne pouuât auoir bonne opinion d'eux, apres vne action ſi laſche, & ſi pleine d'imprudence. Pour le leur teſmoigner par les eſſets, il ſ'en alla droit à eux, & Lopez de Mendoza en fit de meſme; Mais les ayant approchez à la portée d'une Arquebuze, il leur ouurit le paſſage à coſté, & avec vn tres-bon ordre entra dans la Place, dont il venoit de ſortir, ſans qu'ils euſſent moyen de l'en empescher: Et à vray dire, pas vn ſeul des gens de Caruaial, ne s'alla rendre à Lopez de Mendoza, comme il ſe l'imaginoit. Mais apres tout, il ne denoit pas croire que les ſiens fuſſent capables de reſiſter à vn tel Meſtre de Camp, qui auoit la moitié plus de gens que luy, & pluſieurs Arquebuziers fort adroits. Ils changerent ainſi de poſte les vns & les autres, Caruaial s'eſtant logé dans le Fort, & Lopez de Mendoza à la Campagne. Les gens de Caruaial pillerent la Ville, où les Ennemis auoient laiſſé leurs biens. Ils eurent de butin, outre le Bagage, plus de cinquante mille pezos en Lingots d'argent; que Lopez de Mendoza, dès qu'il fut hors des Montagnes, fit tirer de certains lieux, où luy & Diego Centeno les auoient cachez, au temps que François de Caruaial les pourſuiuoit: Il voulut employer cét argent à la paye des Soldats, & en aſſiſter ceux qui eſtoient ſortis des Pais de Conqueſte; mais ils furent ſi genereux, que preſque pas vn d'eux n'en voulut receuoir, afin de ne déroger aux pretentions qu'ils auoient, qu'on leur feroit à l'aduenir des grands aduantages, pour auoir ſeruy le Roy à leurs deſpens, ſans tirer ny paye, ny recompenſe, comme ils expoſerent depuis en leurs requestes. Auſſi eſtoit ce l'ordinaire, non ſeulement des Sol'dats de Conqueſte, mais de ceux du Peru, qui ſe picquoient de Nobleſſe, de ne vouloir receuoir aucune ſorte d'aſſiſtance, ny de l'argent meſme, ſi on leur en offroit, faiſant gloire de ſeruir, non pour l'interet preſent, mais pour la recompenſe à venir: Que ſi dans vne extremité preſſante, quel-

qu'un d'entr'eux prenoit de l'argent, ce n'estoit point par forme de paye, mais plustost d'emprunt, s'obligeant pour cet effet de le rendre, & de le mettre dans les Coffres de sa Maiesté, ce qu'ils obseruoient tous fort ponctuellement, pource qu'ils mettoient le point d'honneur à s'acquitter en gens de bien de ce qu'ils auoient promis en vrais Soldats.

*FRANÇOIS DE CARVAIAL FAIT DES
Prodiges de valeur; par le moyen desquels il défit
& tué Lopez de Mendoza; Puis il prend sa
marche en la Prouince des Charcas.*

CHAPITRE XXXVIII.

TANDIS que les gens de Caruajal pillotent la Ville, Lopez de Mendoza sembla perdre vne grande occasion de combattre ses Ennemis, tel pillage ayant esté cause plusieurs fois de la perte des Vainqueurs, & du gain des Vaincus; Mais ils se retirèrent, à cause qu'ils se douterent bien que Caruajal ne feroit pas si mal aduisé que de negliger les choses, par le moyen desquelles il pourroit preuenir les embusches, & les surprises de ses Ennemis: En effet, il n'apperceut pas plustost que ses gens s'estoient esgarez, qu'il fit sonner la Trompette pour les rallier, & les tint toute la nuit sous les Armes: De plus, pour mieux tromper les Ennemis, & empescher qu'ils ne fissent quelque entreprisede à la faueur des tenebres, il escriuit au nom d'un de ses Soldats vne fausse Lettre, dont il fit porteur un Indien Latin, qu'il instruisit amplement sur ce qu'il luy falloit dire & faire, afin qu'on le creut plus aisement: Par cette Lettre il conseilloit aux Ennemis de charger Caruajal cette nuit-là, par deux endroits differens; avec assurance que plusieurs Mal-contens de son Party, s'iroient rendre au leur, & qu'ils ne l'auoient point fait le iour precedent, de peur que les Arquebuziers ne les tuassent, comme ils s'enfuiroient.

Cependant Caruajal, ainsi qu'il ie l'ay remarqué ailleurs, fit son profit à l'accoustumée, de l'opinion qu'auoient eu ses Ennemis, qu'il traittoit si mal ses gens, qu'indubitablement en cette

occasion ils s'enfuiroient d'avec luy, dés qu'ils le pourroient faire. Comme donc Lopez de Mendoza eut receu cetter Lettre, quoy qu'il ne sceut pas d'où elle venoit, pource qu'il n'y auoit point de nom, il ne laissa pas de la lire, & s'ébla mesme y adjouster foy, d'autant qu'elle se trouua conforme à ses sentimens; Alors il fit renir prests ses Soldats; & suiuant l'aduis qu'on luy donnoit, il attraqua enuiron la minuiet les gens de Caruaial, par les deux endroits qui luy estoient marquez; Mais cela ne luy seruit de rien, pource qu'ils luy resisterent tous vaillamment, sans que pas vn seul d'entr'eux s'esbranlast, pource d'aller rendre à luy: Ce qui le facha si fort, que se voyant trompé vray-semblablement, il se retira dans son premier poste, apres auoir perdu six ou sept des siens, qui furent tuez en cette occasion, outre qu'il y en eut quelques-vns de blesez par les Arquebuzes. Apres cet Eschec, ayant sceu des Indiens qu'à six ou sept lieues de là, François de Caruaial auoit laissé tout son Bagage, & celuy de ses gens, il resolut de se vanger de luy, & de payer ses Ennemis en mesme monnoye, dont ils l'auoient payé luy-mesme, en le pillant, sans luy rien laisser. Il se mit donc en chemin avecque ses gens, qui furent tous extrêmement aises de se pouoir preualoir des dépouilles de leurs Ennemis, parmi lesquelles ils trouuerent quantité d'or, d'Armes, & de poudre.

Les trois Historiens que nous citons icy d'ordinaire, demeurent d'accord, qu'au combat qui se donna de nuit, Caruaial receut vne Arquebuzade à la cuisse, dont il se pensa luy-mesme secrettement, afin que ses gens ne le sceussent, & qu'il ne laissas pas toutesfois de passer la mesme nuit à donner les ordres à ses Soldats; A quoy ils adjoustant, que ce fut vn des siens qui le blessa; Mais quoy qu'il en soit, la playe ne deuit pas estre grande, puis qu'elle ne l'empescha pas de marcher toute cette nuit-là, ny de poursuiure le iour d'apres ses Ennemis, qu'il trouua la nuit suiuant, tous assoupis de sommeil, sans daigner se tenir sur leurs gardes: d'où il aduint aussi qu'il en mit la plus-part en desroute, & fit prisonniers les autres. Ceux qu'il ne pût prendre s'escarterent en diuers endroits à la faueur des tenebres, & entr'autres Lopez de Mendoza: A quoy Caruaial ayant pris garde, dés aussitost qu'il fut iour il les suiuit à la piste, & apprit en chemin que les Ennemis auoient volé son Bagage, & celuy de ses compagnons.

Alors s'adressant à eux, *Camarades*, leur dit-il, *je ne pense pas que vous ne demeuriez d'accord avec moy, qu'en pillant nostre Bagage, le Seigneur Lopez de Mendoza n'ait emporté avec luy le mesme Cousteau, dont il doit auoir la gorge coupée.* Patoles dont il vfa, pour donner à entendre, que luy, & les siens, deuoient tous perdre la vie, ou regagner ce qu'ils auoient perdu. Aussi ne courut-il iamais avec tant d'ardeur qu'il fit depuis, pour aller ioinde Mendoza; Mais luy, qui auoit fait huiſt ou neuf lieues, & qui s'imaginoit que Caruaial auoit trop d'occupation, pour en faire autant ce iour-là, & celuy d'apres, s'arresta sur le bord d'une Riuiere, comme il l'eut passée, pour s'y rafraischir vn peu avecques ses gens. Là se trouuât tous lassez, & abbatus de sommeil, à cause de la fatigues des dernieres nuits, ils se mirent les vns à dormir, & les autres à manger; lors qu'à quelque temps de là, ils virent descendre par vn Costau, François de Caruaial, d'où il prenoit le chemin de la riuiere. Les plus endormis s'esueillèrent à l'instant, au bruit que firent leurs Compagnons, & furent tous effrayez de cette venue inopinée de l'Ennemy. Or comme ils s'imaginèrent que Caruaial menoit avec luy tout son monde, ils prirent diuerses routes, & se débanderent ainsi, pour n'auoir pris garde que ceux qui les venoient atraquer, n'estoient qu'enuiiron soixante Cavaliers, que Caruaial auoit choisis parmy les autres, pour estre les mieux montez de tous, ne croyant pas qu'il en salut dauantage pour suivre des Fuyards. En cette rencontre, il fit prisonniers plusieurs de ses Ennemis, & s'arresta quelque temps dans leur mesme Poste, pour y recouurer ce qu'ils auoient pris: Ce fut alors qu'allant en queste de son bien, il rencontra trois ou quatre escoliades de Soldats, qui se diuertissoient à iouer vne partie des Lingots d'or qu'ils luy auoient desrobéz, dont il prit suiet de les railler plaifamment, comme c'estoit sa coustume, & de leur dire quelques bons mots qui sont rapportez au long par Diego Hernandez. Il fut tout ce iour-là dans le mesme Poste, & donna loisir cependant à Lopez de Mendoza, de se railler avec cinq ou six des siens, tous les autres s'estant efgarez, qui ça, qui là, sans sçauoir où ils alloient, & sans autre dessein que de s'estoigner le plus qu'ils pourroient de l'Ennemy.

François de Caruaial ayant recouuré la meilleure partie de ce qu'on luy auoit pris, suivit à la piste les Fuyards, & trouua, sans le sçauoir, qu'il couroit apres Mendoza, pour s'estre adressé cõ

il y auoit plus de traces marquées. Il fit tant de diligence, qu'en-
core que ses Ennemis eussent sur luy l'aduantage de cinq ou six
heures de chemin; si est-ce qu'apres la seconde nuit de sa mar-
che, il arriua dès le point du iour à vn petit Bourg d'Indiens,
où estoit Lopez de Mendoca, qui depuis sa derniere déroute,
auoit mis vn peu plus de trente heures à faire vingt deux lieues,
& s'estoit arresté dans ce Bourg, s'imaginant que la quantité de
gens qu'auoit Caruajal, empescheroit qu'il n'allat si viste. Et
dautant que luy & ses Soldats n'auoient cessé de marcher iour
& nuit, sans que ny eux, ny leurs cheuaux eussent repeu, ny
tant soit peu reposé, ils se laisserent si bien surprendre au som-
meil, que de la façon qu'ils estoient immobiles, on les eut pris
plustost pour des corps morts, que pour des personnes viuantes.

Caruajal arriué au Bourg, avec huit Cavaliers seulement,
qu'il auoit destachez du gros qui venoit apres luy, n'en voulut
pas prendre dauantage, pour donner l'alarme certe nuit à Lo-
pez de Mendoca, & le faire perir dans sa fuitte, en luy ostant
tout moyen de reprendre haleine; Comme il apprit donc de
quelques Indiens le logis de ses Ennemis, & quel en estoit le
nombre, il s'y en alla sans rien craindre, & se saisit des deux por-
tes qu'auoit la maison, qui estoit vn grand logement, apparte-
nant au Cacique du Bourg. Alors, pour faire accroire à ces nou-
ueaux Hostes, qu'il auoit beaucoup de gens, & par ce moyen
empescher qu'ils ne se missent en deffense, il appella par leur
nom leurs Capitaines, bien qu'il n'en menast aucuns, leur di-
sant tout haut: *Seigneurs Capitaines, tel & tel, gardez cette porte:*
& vous aussi, Messieurs, tel & tel, ayez soing de vous tenir à cette
autre que voilà: Vous pareillement, Monsieur tel, apportez du feu pour
brusler cette Maison. Avecque ce bruit, & ces patoles, plusieurs
fois repetées, Caruajal espouuanta tous ceux du logis, où apres
qu'il fut entré luy troisiéme, il y desarma ses Ennemis, & les at-
tacha tous, à la reserue de Lopez de Mendoca, qu'il voulut res-
pecter, à cause de sa Charge de General: puis il les tira hors de
la maison, pour leur faire voir le peu de gens qu'il auoit; Et voi-
là comme fut pris Lopez de Mendoca; Ce que les Historiens ne
racontent que sommairement, pour ne se rendre ennuyeux à
desdire toutes les particularitez des hardiesses de Caruajal;
Quoy qu'il en soit, il est bien certain qu'vn peu apres auoir pris
Lopez de Mendoca, il luy fit donner le garrot, & trancher la te-

ste: comme aussi à Nicolas de Heredia, & à trois de ses Compagnons, pardonnant à tous les autres. Il octroya la mesme grace à tous les Soldats reuenus des Pais de Conqueste, commandant qu'on eut à leur rendre les Cheuaux, les Armes, & les autres choses qu'on leur auoit ostées: Il les assista mesme d'argent, & monta le mieux qu'il pût ceux qui estoient à pied, taschant de leur rendre toute sorte de bons offices, afin de les obliger à se ietter dans son Parry. Il donna de plus vne abolition à Louis Pardo, & à Alonso Camargo, qui auoient quitté Diego Centeno, pour s'enfuir avec Lopez de Mendoza: Ce qu'il fit, à ce que l'on tient, pource qu'ils luy descouurirēt vne cache, où Cetenno auoit enterré la valeur de plus de 50000. Duears en argent. Comme il eut gagné cette Victoire, voyāt qu'en tout ce Pais là, il n'y auoit plus personne qui s'opposast à ses Armes, il tourna du costé de Charcas, & seiourna quelque temps dans la Villa de Plata, où il tira tout ce qu'il pût auoir d'argent des Mines de Porosi, qui se decouurirent certe année là: & pareillement des Indiens autresfois suiets des principaux Seigneurs de functz; Comme aussi de ceux qui s'en estoient fuis, les Départemens desquels il conbisoit, au profit de Gōçalo Pigarte, pour le rembourser des fraiz de la Guerre. Le mesme iour qu'il entra dās la Ville de Plata, les principaux Bourgeois furent au deuant de luy pour l'appaiser, Alonso Ramirez entr'autres le vint receuoir avec la baguette en

main, qu'il portoit pour marque de sa dignitez de Iuge ordinaire de la Ville, dont Diego Centeno l'auoit pourueu: Ce que voyant Caruaial, *Seigneur Ramirez*, luy dit il, *faites vne pointe à cette baguette, & ne vous en seruez que come d'un Arast pour le tirer contre quelque chien; car si vous l'employez à quelque autre usage, ie vous iure que ie vous feray pendre.* Ce qu'il luy voulut bien dire, pour le tancer de son inciuilité, & l'aduertir qu'il auoit mauuaise grace de le venir receuoir avec la baguette en main, puis que ce n'estoit pas luy, ny aucun autre de son Party, mais son Enuemy qui la luy auoit donnée. Ramirez se déffir donc de cette marque d'honneur, ayant compris vn peu trop tard ce qu'il eut bien fait d'entendre plustost.

En cet endroit il y a le ne scay quoy d'ambigu dans l'Espagnol, qui auroit ce me semble fait mal uaisé grace, si ie l'auois autrement traduit.

*FRANÇOIS DE CARVAIAL ENVOYE
la teste de Lopez de Mendoza à Arequepa, & ce qu'une
Femme dit la dessus. Quelques-uns conspirent contre
luy: il le descouvre, & la punition qu'il en fit.*

CHAPITRE XXXIX.

LE iour d'apres que François de Caruaial entra dans la Ville de Plata, il enuoya la teste de Lopez de Mendoza à Arequepa, qu'il fit porter par Denys de Bobadilla, qui fut depuis Sergent Major de Gonzalo Pizarre, & qu'il me souuient d'auoir cognu. Sa Commission portoit de l'exposer au Gibet d'Arequepa, pour chastiment, & pour memoire ensemble de ce que luy & Diego Centeno s'estoient souleuez dans la mesme Ville. Ainsi Bobadilla porta cette teste, sur le suiet de laquelle ie trouue à propos vn euenement particulier, qui se passa avec vne honneste femme: l'action de laquelle fut si genereuse, qu'elle meritoit bien qu'on ne la passe point sous silence.

Cette Dame extrêmement vertueuse, & fort charitable, demouroit alors dans Arequepa, & s'appelloit Iéanne de Leyton, pour auoir esté nourrie en la Maison de Madame Catherine Leyton, sortie d'une des plus nobles Familles qui fussent alors dans le Royaume de Portugal, & Femme de François de Caruaial: Car bien que pour le rendre odieux, quelques Mefdisans la fissent passer pour sa Maistresse, cela se trouuoit faux neantmoins, veu qu'en effet elle estoit la Femme, fort estimée de son Mary, & de tous les Caualliers du Peru, comme elle le meritoit bien, & pour sa noble extraction, & pour ses qualitez eminentes.

Cette Dame, comme ie viens de dire, ayant nourry & esleué Iéanne de Leyton, qui pour ce suiet prit ce surnom d'elle-mesme, la maria à vn honneste homme, qu'on appelloit François Vozo, avec qui elle vescu si bien dans son Mariage, que François de Caruaial entr'autres, la respectoit comme sa propre Fille. Comme elle estoit donc d'une humeur fort douce, & naturellement portée à la paix, durant tous les troubles de Gonzalo

Piçarre, elle fauorisa tousiours ceux du Party du Roy: si bien qu'elles'employoit pour les vns enuers François de Caruaial, & assistoit les autres de ses biens; iusques-là mesme que lors qu'ils estoient en peine, elle les retiroit dans sa Maison propre. Comme en effet la premiere fois que Gonçalo Piçarre entra dans Rimac, où se fitent par son ordre les emprisonnemens, & les sanglantes executions dont i'ay parlé cy-deuant, il se trouua qu'elle auoit caché dans son logis trois des principaux Habitans. D'où il s'ensuiuit que François de Caruaial, qui ne pouuoit rien dissimuler, la fut trouuer aussi-tost: & la tirant en particulier; *Que sont deuenus, luy dit-il, les trois hommes que vous auez cachez ceins?* A quoy d'abord elle ne sceut respondre autre chose, que nier le fait: Mais comme elle vid que Caruaial luy nomma vn des trois, ou par soubçon, ou pour le sçauoir au vray, toute interdite, & confuse, mais pourtant avec vne ferme resolution; *Il est vray, luy respondit-elle, ie les tiens enfermez dans vne Chambre, d'où si vous voulez ie m'en vay les tirer, & vous mettre à la main vn couteau, afin que vous leur coupiez la gorge, & les mangiez mesme, pour vous assouuir, si cela se peut: Saoulez-vous donc de sang humain, puis que vous en estes si fort alteré.* Ce disant elle voulut descendre le degré, pour luy aller querir ces Prisonniers: Et alors Caruaial la voyant si resoluë, *laisse les, & moy aussi,* luy dit-il, & *va t'en au Diable.* Surquoy il sortit, & laissa victorieuse Ieanne de Leyron: Ce que ie me souuiens d'auoir ouï dire autresfois à Gonçalo Syluestre, dont i'ay parlé ailleurs, homme d'honneur, & digne de foy, bien qu'il fut grand Ennemy de Caruaial.

Quelque temps apres cét euenement, cette mesme Ieanne de Leyton s'en alla demeurer dans Arequepa, où Denys de Bobadilla porta la teste de Lopez de Mendoza, comme encore celle de Nicolas de Heredia, & d'autres trois ou quatre: de maniere qu'à son arriuée, auant qu'aller voir Pedro de Fuentez, Lieutenant de Gonçalo Piçarre en la mesme Ville, il fut trouuer Ieanne de Leyton, sçachant bien que François de Caruaial son Maistre en seroit tres-aïse. Elle luy fit vn fort bon accueil, & apres s'estre enquisse de sa santé, & de celle de son Seigneur, comme elle sçauoit qu'il estoit là venu pour faire mettre au Gibet les testes qu'il auoit apportées; *Seigneur Bobadilla, luy dit-elle, i'ay à vous demander vne grace, qui est de me vouloir donner la teste de Lopez de Mendoza, afin que ie la fasse enterrer le plus honno-*

ralement que ie pourray, & non pas toutesfois selon son merite, puis que c'estoit un Cavalier tres-considerable, & grand seruiteur du Roy. Bobadilla s'en excusa d'abord, disant qu'il ne le pouuoit, qu'elle cognoissoit assez l'humeur de François de Caruaial son Maître, qui le feroit escarteler, s'il luy arriuoit de faillir contre ses Ordres, & de ne luy rendre bon compte de eette teste-là. Mais sans se rebutter de ce refus contre celuy qui le faisoit, *He! ie vous prie*, luy repliqua-t'elle, *baillez-la moy pour l'amour de Dieu, & ie vous donneray deux cens Ducats, pour en assister quelqu'un de vos gens: Car apres tout, de quoy vous seruira-t'il d'auoir mis en un Gibet cette teste? n'est-ce pas assez qu'on l'ait coupée, sans la trainer maintenant par terre, & l'exposer honteusement en public?* Bobadilla s'excusa derechef, luy repettant trois ou quatre fois les memes termes que ie viens de dire. Ce qui fit que Jeanne de Leyton, lassée de voir que tant plus elle le prioit, tant plus il s'obstinait à l'esconduire de sa demande, sans que toutes ses promesses lo pussent flechir, *A la bonne-heure*, luy dit-elle en colere. *Mais sçache qu'il s'en prendra fort mal, les deux cens Ducats que ie t'ay offerts de la teste du Defunct, seront employez par moy à faire dire des Messes pour son Ame; & pour ne l'auoir voulu donner, afin de la faire enseuclir avec honneur, j'espere qu'un iour la tienne se fera coupée avec infamie.*

En effet la chose arriua depuis comme elle l'auoit predict, ainsi que vous le verrez dans la suite de l'Histoire. Babadilla cependant tourna en risée ce que luy dit cette Dame, du logis de laquelle il sortit, & s'en alla presenter les testes qu'il auoit apportées deuant Pedro de Foüentes: Mais voyant que les Indiens qui les portoient enucloppées dans vne mante, n'auoient pas le cœur de les en tirer, il le fit luy-mesme, sans en auoir aucune auction: Et sur ce que les Espagnols là presens luy dirent que ces testes sentoient mauuais; *Vous vous trompez Messieurs*, leur dit-il, *les testes des Ennemis que nos mains ont coupées, sentent fort bon, tant s'en faut qu'elles puent.* Paroles qu'il profera, pour monstrier par là qu'il estoit Seruiteur & Disciple de François de Caruaial, à qui ces façons de parler estoient ordinaires.

Le Mestre de Camp François de Caruaial, apres auoir deffait le Capitaine Diego Centeno, & donné la mort à Lopez de Mendoza, à Nicolas de Heredia, & à quelques autres, traitta le mieux qu'il pût les Soldats venus du Voyage de la Riuiere de

Plata, leur donnant des Cheuaux, des Armes, & de l'Argent, pour les attirer dans son Party. En suite dequoy il seiourna quelque temps dans la Ville de la Plata, d'où il tira tout ce qu'il pût auoir d'or & d'Argent, pour l'enuoyer à Gonçalo Piçarre: Cependant les Soldats restez de la dernière défaite, qui se picquoient de Noblesse, ne pouuant souffrir l'affront qu'ils croyoient que Caruaial leur eut fait, pour les auoir si facilement vaincus, ou mis en déroute, & priué de vie Nicolas de Heredia leur principal Capitaine, avec quelques-vns de leurs Compagnons, se resolurent d'en tirer raison, & de le mettre à mort. Ce qu'ils entreprirent plustost par vn desir de vengeance, que pour aucune auarice qui les y portast, comme quelques-vns l'ont voulu faire accroire, n'y ayant aucune apparence que cela fut, apres auoir refusé la paye qui leur estoit offerte assez largement par Lopez de Mendoza; Les Principaux de cette Conspiration furent, Louis Pardomo, Alonso Camargo, & quelques autres, ausquels François de Caruaial auoit desia pardonné, comme nous auons dit cy-deuant. Outre ceux-cy, il y en auoit encore trente des moins considerables, qui tous ensemble, ayant pris iour pour leur excurion, presterent serment sur vn Crucifix, d'en garder inuiolablement le secret; Mais ils ne pûrent si bien faire, que François de Caruaial, qui prenoit soigneusement garde à la conseruation de sa personne, & qui de plus auoit quantité d'Amis, ne descouurir leur dessein: de maniere qu'en ayant fait prendre quelques-vns, il les fit escarter, avec vn si grand transport de colere, qu'il sembla passer iusques à la rage; aussi tesmoigna-t'il visiblement son desplaisir, en repétant à toute heure ces paroles; *Balmazoda, & ses Compagnons, ont eu grand tort d'auoir voulu attenter à ma personne, apres auoir esté si bien traittez de moy, qui leur ay fait plus d'honneur qu'aux Seruiteurs propres du Gouverneur Piçarre mon Maistre.* Comme il en eut donc fait executer à mort six ou sept des Principaux, il s'aduisa de pardonner à tous les autres; ce qu'il fit exprés, afin de ne respan dre pas tant de sang: Et d'autant qu'il les connoissoit pour gens de courage, afin de s'asseurer d'eux, il les enuoya par diuers chemins, & par maniere d'exil à Gonçalo Piçarre, auquel il auoit escript vn peu auparauant, vne Relation fort ample des choses passées, & de la défaite de leurs communs Ennemis.

En eschange de cette Relation, François de Caruajal en re-

ceut à mesme temps vne autre de Gongalo Piçarre, par laquelle il apprit la Bataille de Quito, la mort du Vice-Roy, l'ordre par luy donné en suite, & le dessein qu'il auoit de s'en aller à la Ville des Rois, sollicitant Caruaial de l'y venir trouuer, pour resoudre ensemble de ce qu'ils auroient à faire à l'aduenir.

*DE CE QUE FRANCOIS DE CARVAIAL
dist par escrit, & de vive voix à Gongalo Piçarre,
pour l'induire à se faire Roy du Peru; ce que
plusieurs autres luy persuaderent aussi.*

CHAPITRE XL.

TOUTS ces bons succez, & ces nouuelles qui vinrent à François de Caruaial, luy mirent diuerses choses dans la pensée, touchant la Fortune de Gongalo Piçarre; car il pensa dès lors aux moyens qu'il pourroit tenir, pour le porter à se resoudre à s'establiſſir dans cét Empire, non seulement comme Gouverneur, mais comme Seigneur absolu, pour en auoir fait la Conqueste avecques ses Freres: Pour cette fin, il luy escriuit vne longue Lettre, rapportée dans l'Histoire de Diego Fernandez, par laquelle il le sollicita de se faire nommer Roy: Ce qu'il tascha de luy persuader en termes plus exprés, lors que l'ayant ioint à Rimac, il luy deseouurit ses sentimens par des paroles que ie rapporteray icy, bien qu'il semble que ce ne soit pas l'endroit où l'en doine faire mention. Ch. 19.

DISCOVRS REMARQVABLE DE
François de Caruajal à Gonçalo Piçarre.

• à Qui-
tu.

MONSEIGNEUR, vous n'ignorez point que nous seuls ne soyons cause de la mort du Vice-Roy Blasco Nuñez, aduenüe dans le Champ de Bataille * par la défaite de ses Troupes ; Qu'après luy auoir coupé la teste, on ne l'ait exposée au Gibet public ; Que nous n'ayons ouuertement porté les Armes contre l'Estendart Royal ; Et qu'en toutes ces conionctures ne se soient rencontrez plusieurs estranges euenemens, de voleries, de morts tyranniques, & d'autres Actes semblables, dont apparemment on nous fera les Autheurs. Cela estant, quelle esperance pouuons nous auoir que le Roy nous les pardonne ? Ce n'est pas neantmoins que ces Violences nous doiuent estre imputées ; puis qu'il est vray que les moins Coupables, & les Enfans mesme ne sont pas plus Innocens que vous l'estes de ce costé-là. Mais quoy ! les Rois se peuuent difficilement oster de l'Esprit la mauuaise opinion qu'ils ont conceüe d'un Homme, lors qu'elle y est vne fois enracinée ; Quelque bonne mine qu'ils luy fassent quand ils s'en désient, il ne se faut iamais fonder, ny sur leurs apparences, ny encore moins sur leurs promesses, quelques assurées qu'elles semblent estre ; Que deuez vous faire donc en de si grandes extremitez, sinon vous rendre Absolu, par le tiltre de Souuerain & de Roy ? Faites le, Monseigneur, & ne differez pas dauantage ; Esleuez vous dans le Throsne, & vous mettez sur la Teste par vostre main propre, vne Couronne que vous ne receurez iamais par la main d'autrui ; Monstrez que vous estes

capables de commander aussi bien que de Conquerir: Entrez en possession de ces terres vastes, où vous auez desia cueilly tant de Palmes; Et ce qu'il y aura de vacant & de vuide, reservez-le pour vos Amis, & vos Serviteurs: Que si vous les voulez encore mieux obliger, assurez leur en heritage, & à perpetuité, ce que le Roy ne leur donne que durant leur vie. La chose ne sera pas difficile, si vous en auez la moindre envie, & se pourra faire à leur aduantage, en les honorant du tiltre de Ducs, de Marquis, & de Comtes, comme vous sçauiez qu'il y en a dans tous les autres Royaumes du Monde; Car il s'ensuiura de là, qu'en combattant pour la conseruation de leurs Estats, ils s'armeront aussi pour la deffense du vostre.

Je vous conseille encore de créer de nouveaux Ordres Militaires, sous le nom & le tiltre de ceux d'Espagne, ou des Saints, pour qui vous auez une deuotion particuliere; De donner à ces Cheualiers telles marques que vous aduiſerez, avecque de bonnes rentes & pensions, pour s'entretenir selon leur qualité, comme il s'observe en tous les Païs où les Rois ont estably des Ordres de Cheualerie. Par de si beaux moyens, Monseigneur, vous gagnerez assurément les affections de tout ce qu'il y a de Caualliers & de Gentils hommes Espagnols dans ce Grand Empire; & obligerez ainsi tous les Mal-contens, qui vous auront aidé à le conquerir.

D'un autre costé, pour attirer les Indiens à vostre seruiſice, & les reduire, s'il en est besoin, à mourir pour vous, avec la mesme tendresse qu'ils ont tousiours eüe pour leurs Rois Yncas; Je suis d'auis que vous preniez pour Femme, celle des Princeſſes du Païs, qui se trouuera la plus proche de la Couronne; Et que pour ce mesme effet, vous enuoyez

des Ambassadeurs dans les Montagnes, où est à present
 confiné l'Ynca, à qui par droit de naissance doit eschoir
 l'Heredité de cét Empire. Car vous ne devez nullement
 douter, que luy faisant offre de le restablir dans sa premie-
 re grandeur, quand on luy demandera de vostre part en
 mariage une de ses Sœurs, ou de ses Filles, il ne tienne à sin-
 guliere faveur cette recherche-là, qui ne sera pas moins ad-
 vantageuse pour luy que pour vous. La raison est, pource
 qu'une si estroite Alliance sera cause qu'après le restablis-
 sement de leur Ynca, les Indiens vous seront tous acquis, &
 feront tres-volontiers ce que leur Roy leur comandera pour
 vostre service; Tellement qu'en toutes les occasions, ou de
 vous fournir des munitions & des viures, ou despeupler
 les Villes, ou de rompre les chemins par où vos Ennemis
 voudront aller contre vos Armées, vous les trouverez tou-
 jours prests à s'employer pour vostre conservation: d'où il
 adviendra qu'ils ne voudront plus vous attaquer, & me-
 me qu'ils ne le pourront pas, n'ayant aucun secours de ceux
 du Pays; dequoy vous tirerez cét avantage, que le Prince
 se contentant du nom de Roy, d'estre obey comme aupara-
 vant de ses sujets, & de les gouverner en paix, à l'exemple
 de ses Predecesseurs, sera cause que les Espagnols vous ser-
 uiront beaucoup mieux qu'à l'accoustumée. Car vos Ca-
 pitaines, & vos autres Officiers, pouruoiront bien plus aisé-
 ment au fait de la Guerre, quand pour obeyr au commande-
 ment de l'Ynca, les Indiens s'accommoderont à vostre desir,
 & suivront ponctuellement vos Ordres; par où vous serez
 encore assuré qu'ils ne vous tromperont point, & qu'ils ne
 feront plus comme ils font le Mestier de Traistres & d'Es-
 pions doubles. Outre tous ces avantages, vous en aurez un
 autre bien grand, qui sera de vous rendre Maître de la
 meilleure

meilleure partie de l'argent, & de l'or du Pays, ces metaux ne tenant point lieu de richesses aux Indiens. Adioustez à cecy, que vous possederez mesme tous les tresors que les Yncas y ont cachez; estant vray semblable que le Roy vous les fera mettre entre les mains, tant en consideration de vostre Alliance, que pour auoir esté restably par vous dans son Throsne; Que si vous auez une fois ce prodigieux amas de richesses, dont il s'est fait tant de bruiet, à quel comble de grandeur ne monterez vous point? Assurement il ne tiendra qu'à vous qu'avec des sommes immenses, vous n'ache- tiez tout le Monde, si vous voulez en estre Seigneur: Laissez vous donc posseder à cette illustre Ambition de commander souuerainement. Mocquez-vous de tous les reproches que vous pourroient faire là dessus les hommes vulgaires. Riez-vous de leur oüyr dire, que cette Perfidie offencera le Roy d'Espagne, Qu'elle attirera sur vous la Hayne publique, & qu'on vous tiendra par tout pour un Tyran: sou- uenez-vous seulement de ce bon mot, qui est passé en Prouer- be; qu'il n'y a point de Trahison à se faire Roy. Auant que nous missions le pied dans ce Pays, il appartenoit entiere- ment aux Yncas. Puis qu'on ne l'a pas gagné pour le ren- dre, vous y auez plus de droit que le Roy de Castille, pour l'auoir conquis avecque vos Freres, à vos despens propres, & au hazard de vos vies. Maintenant donc que vous re- stablissez l'Ynca dans la Dignité de Roy, vous obeysez à la Loy naturelle, & faites d'ailleurs ce que vous estes obligé de faire pour vostre honneur, lors que vous cherchez à com- mander dans un Royaume que vous auez conquis, afin de ne releuer plus désormais de l'Empire d'autrui: Aussi n'y a- t-il point d'apparence que Celuy qui par la force de son bras se peut faire Roy, se rende sujet par une la scheté de contra-

ge. Ce chemin n'est pas si espineux que vous diriez bien; Il ne s'agit que de se declarer, & de faire le premier pas. Obligez moy, Monseigneur, de considerer meurement ce que ie vous dis; Et vous trouuerez, ie m'assure, que mes Aduis ne sont pas des moins importans, pour vous esleuer au souverain Gouvernment, & à vostre exemple, ceux qui viendront apres vous. En vn mot, de quelque façon que l'affaire puisse aller, vous prendrez, si vous me voulez croire, le souhaitable tiltre de Roy; Tout autre nom est trop bas pour vn Homme tel que vous, qui par vostre Valeur extraordinaire, vous en estes rendu digne. Mourez donc Roy, Monseigneur, le le repette encore vne fois; mourez Roy, & sans souffrir davantage en Esclaue, entretenés vous souuent de cette pensée, Que celuy qui a du mal pour son plaisir, merise d'auoir encore pire.

Dans ce Discours de Caruaial, estoient contenus quelques autres Raisonnemens de mesme nature, & que ie pouuois facilement adiustericy; Mais i'ay mieux aymé les taire que d'en parler, pource qu'il m'ont semblé vn peu trop hardis; & qu'ain-si ils ne pouuoient pas moins offencer les Fidelles Seruiteurs de Roy, que plaire à ceux qui ne l'estoient pas. Gonçalo Piçarro escouta tres-volontiers son Mestre de Camp; & voyant fort bien, non-seulement où il visoit, mais aussi la grande adresse dont il vsoit, pour luy faire donner dans le but, l'appella tousiours depuis du nom de Pere, afin de luy tesmoigner par là le bon gré qu'il luy scauoit de ce qu'il s'interessoit ainsi dans l'accroissement de sa grandeur, pour en perpetuer la durée. Mais Caruaial ne fut pas le seul qui luy donna ce conseil: Pedro de Puellez, le Licencié Sepeda, Hernand Bachicao, & plusieurs autres de ses Amis, luy escriuirent presque le mesme; comme le remarque Gomare par ces paroles expresse: François de Caruaial, & Pedro de Puellez, sollicitèrent Piçarre par leurs Lettres, de se faire Roy, puis que la Couronne luy appartenoit, & de ne se point mettre en peine d'envoyer des Deputez à l'Empereur, mais de se pour-

avoir abondamment de Chevaux, d'Armes, & de Gens de Guerre, qui estoient les veritables Agents qu'il deuoit employer; De se saisir au reste du Quint Royal, ensemble des Villes, des Rentes, & des Droits que prenoit Cobos, sans les auoir meritez. C'estoit le contenu de leurs Lettres: A quoy se trouuoient conformes à peu près, les sentimens des Principaux. Les vns disoient, Qu'ils ne rendroient iamais le Pais à l'Empereur, s'il ne leur donnoit des Départemens à perpetuité: Les autres, Qu'ils feroient Roy, qui bon leur sembleroit, comme il estoit aduenü en Espagne à Pelayo, & à Garcia Ximenez: Les autres, Qu'ils appelleroient les Turcs, si l'on ne donnoit le Gouvernement du Peru à Pigarre, apres auoir mis en liberté son Frere Hernand; Et tous ensemble, qu'ils deuoient regner sur tout le Pais par droit de Conqueste, si bien qu'ils le pouuoient partager entr'eux, puis qu'aux despens de leurs biens & de leur peine, ils l'auoient gaigné glorieusement, & respandu leur sang pour le conquerir.

Ce sont les paroles dont Gomare conclud le Chapitre susdit, avec lesquelles ont beaucoup de rapport celles cy de Diego Liu. 25.
 Fernandez Palentin. Cela fait, il poursuiuit son chemin vers la Ch. 13.
 Ville des Rois, le long duquel, ses gens de Guerre s'entrete-
 noient diuersement, selon que leurs inclinations estoient diffé-
 rentes: Quelques-vns disoient, Que sa Maiesté donneroit vne
 generale Abolition du passé, en conservant Gonçalo Pigarre
 dans le Gouvernement du Peru: Et d'autres plus effrontez,
 Que quand le Roy ne le voudroit pas, il ne seroit aucunement
 obey. Mais le Licencié Sepeda, qui ne demandoit qu'à plaire à
 Pigarre, passoit bien plus outre, & ne feignoit point de dire avec
 Hernand Bachicao, & quelques autres de leur confidence; que
 par de vrayz & iustes titres le Royaume du Péru n'appartenoit
 point plus legitimement à personne qu'à Gonçalo: Ils produi-
 soient à ce propos quantité d'exemples de plusieurs Prouinces,
 Estats, & Royaumes, qui deuoient leur origine à la Tyrannie,
 & dont les Vsurpateurs n'auoient pas laissé pourtant d'estre te-
 nus pour Seigneurs & Rois legitimes; le temps, par qui tout
 se change, les ayant establis insensiblement dans la Souueraine-
 té. Surquoy ils tiroient en consequence le Differend aduenü
 au Royaume de Nauarre, les formalitez qui s'observent ordi-
 nairement au sacre des Rois, & plusieurs choses semblables
 qu'ils croyoient pouuoir seruir à fortifier leurs sentimens: d'oü

ils donnoient assez à cognoistre que leur inclination estoit portée à ce Gonçalo Pigarre eut vne plus haute Dignité que celle de Gouverneur, tous ensemble demeurant d'accord, que iamais homme n'auoit aspiré à la Royauté avec tant de droit que luy. Aussi le connoissoit-il bien: Et quoy qu'il n'en fit aucun semblant, il se laissoit pourtant flatter volontiers à de si doux langages qu'on luy tenoit, pour le desir qu'il auoit de satisfaire à cette vaste Ambition de Commander, qui est naturelle à tous les hommes: D'ailleurs, comme il n'auoit aucune teinture des Lettres, iusques-là mesme, qu'on tient qu'il ne sçauoit pas lire, il n'estoit pas homme à preuoir les grands inconueniens qui s'attachent d'ordinaire à la Conuoitise de Regner: Et d'autant que le Licencié Sepeda qui l'y pouffoit, estoit tenu pour sçauant, & pour homme de tres grand esprit, ils approuuoient tous le conseil qu'il donnoit à Pigarre, sans que personne le contredit: si bien qu'aux heures de loisir, ils ne s'entretenoient iamais d'autre chose que de cecy. Voila ce qu'en dit le Palentin.

Or d'autant que nous auons parlé n'guere des droicts de François de Cobos, Secretaire de l'Empereur, & dit qu'il les prenoit sans les meriter, il faut sçauoir que sa Maiesté luy auoit fait don d'un & demy pour cent de tout l'or & l'argent de la Fonderie qui seroit porté à la Doüanne, pour y prendre le Quint du Roy, & le mettre dans son Espargne, à condition neantmoins qu'il seroit tenu d'entretenir à ses despens vn nombre d'Ouuiers, pour fondre le Metail, & leur fournir mesme de charbon pour affiner l'or & l'argent; Tellement que si le Secretaire eust voulu, comme il y estoit obligé, s'acquitter bien de sa Charge, il auroit assurément plustost perdu que gagné. Mais il y mettoit bon ordre; pource qu'apres s'estre enquis de ceux qui venoient à la Doüanne, du Quint qu'il deuoient au Roy, il prenoit ses droicts par preciput, & apres il faisoit fondre, & affiner l'or & l'argent aux despens de sa Maiesté; tellement que par ce moyen il agissoit tout au contraire de son deuoir; Et voilà pourquoy Gomate dit, Qu'il prenoit des droicts sans le meriter, c'est à dire, sans mettre du sien ce qu'il estoit tenu de fournir.

CONSIDERATIONS DE PICARRE,
pour le service du Roy; Il sort de Quito, pour s'en
aller à Truxillo, & en la Ville des Rois; où
luy est faite une magnifique Entrée.

CHAPITRE XLI.

Les conseils donnez en foule à Picarre, ne pûrent jamais le faire résoudre à prendre le tiltre de Roy; le respect qu'il devoit naturellement à son Prince, ayant plus de puissance sur luy que toutes les Remonstrances de ses Amis; A quoy le porterent particulièrement les considerations suivantes: *Que sa Maesté Imperiale l'establiroit, comme il se le promettoit, dans le Gouvernement du Peru, pour reconnaissance des bons services que son Frere & luy avoient rendus en la Conqueste de cet Empire-là, dont ils se pouvoient dire les principaux Auteurs; Que le Marquis son Frere avoit un Breuet de survivance, pour celuy qu'il declareroit son Successeur; Qu'il l'avoit nommé luy-mesme à sa place par son escrit; Et que pour le regard des choses passées à la ruine du Vice-Roy, il auroit dequoy s'en justifier amplement, sur les estranges rigueurs qu'un si mauuais homme avoit exercées, pour faire executer les Ordonnances sans vouloir donner Audience aux Deputez des Estats: Qu'au reste, en consequence du fait, tout le Peuple de cés Empire, l'avoit esleu Procureur General, & que ce n'estoit pas luy, mais les Auditeurs, qui avoient pris le Vice-Roy, pour l'envoyer en Espagne.*

Sur ces considerations, Gorçalo Picarre fondeoit l'esperance qu'il avoit qu'on luy donneroit Abolition des choses passées, se faisant acroire que non seulement il en meritoit une, mais encore de nouvelles Lettres de confirmation dans l'evenement present, pour reconnaissance de ses services. Que s'il pensoit si hautement de soy-mesme, ce n'estoit pas chose dont il falut s'estonner, puis que les Hommes de Guerre ont cette coustume de se flatter dans leurs actions; de les estimer autant qu'ils peuvent, & mesme de les croire innocentes, quelques criminelles qu'elles soient.

Cependant le menu peuple, qui entendoit parler dececy, sca-

chant que Gonçalo Pigarre n'auoit osé faire vne chose qui luy estoit si aduantageuse, & que les Amis luy auoient tant de fois conseillée, en attribua la cause à vn défaut de Iugement, plustost qu'à vne crainte qu'il eut de violer le respect qui se deuoit au Roy. Plusieurs mesme appellerent cela, bassesse de Courage, & le blasmerent de peu de sens; & entr'autres, les Historiens qui n'en ont parlé qu'à son préiudice: Mais apres tout ils n'en ont escrit que suivant les Relations qu'ils en ont eues, peu conformes à la verité: Car il est certain que ceux qui le cognoissoient particulièrement, aduoüoient tous, que c'estoit vn Personnage assez penetrant dans ses affaires, grand Ennemy des Fourberies, ponctuel en ses promesses, veritable en ses paroles, aussi noble par sa Vertu, que par sa Naissance, & qui pour sa merueilleuse Franchise ne se fioit que trop en ses Amis, puis que ce furent eux-mesmes qui le perdirent, comme l'Histoire de sa vie en fait foy. Que si comme ie viens de dire, ceux qui l'ont écrite se sont abusez en cecy, ç'a esté pour auoir eu de mauvais memoires de personnes qui ne l'aymoient pas, & qui pour appuyer leur interests, s'estudioient à flatter le Party contraire au sien. Il faut mettre en ce nombre le Palentin, qui eut ordre d'en escrire ainsi, comme il le confesse luy-mesme par ces paroles, que i'ay tirées de sa Lettre Dedicatoire. *Comme i'ay voulu passer outre, ma plume s'est arrestée dans ma main, & i'ay refusé de courir dans cette Lice, à cause de quelques obstacles que i'ay trouués deuant moy, qui ont esté comme des Barrières qu'on a mises à ma course. Parmy tous ces incidens, me trouuant confus & irresolu, ie vins à la Cour de vostre Maieité, où ie fis voir à ceux de vostre Conseil des Indes, le premier Tome de l'Histoire que i'auois desja écrite, & dont voicy le second Volume. Ils en trouuerent la narration bonne, & le recit veritable, tellement qu'ils me dirent en suite, qu'il leur sembloit non seulement à propos, mais encore necessaire pour l'utilité publique, que i'acheussel'Histoire entiere: M'ayant donc ordonné de continuer, ils me firent esperer vne recompense de mon travail, d'où ie pris vne nouvelle haleine, & un nouueau courage d'exécuter ce qui m'estoit commandé par des hommes de si haute integrité, chassant loing de moy toutes les apprehensions que i'auois de pousser cét Ouvrage iusques au bout, &c. D'où l'on peut cognoistre que ceux qui escrinoient alors, estoient comme contrainsts de rapporter les choses, selon qu'elles leur estoient dictées par les plus passionnez pour l'un, ou l'autre Party.*

Gonçalo Pigarre, pour s'en aller en la Ville des Rois, & y faire sa residence, afin que se trouuant au milieu de cét Empire-là, il pût plus commodement agir dans la Negociation de Paix ou de Guerre, laissa dans cette Place-là pour son Lieutenant & Capitaine General, Pedro de Puellas avec trois cens Soldats; & ce ne fut pas sans raison qu'il le fit, ayant tout sujet de se fier en luy, pour en auoir tousiours esté seruy fidellement, & tiré par luy-mesme d'un precipice, où sans son secours, il estoit en apparent danger de se perdre. Or pource qu'en arriuant à la Ville de S. Michel, il apprit d'abord, qu'en cette Frôtiere-là il y auoit plusieurs Soldats en Armes, il enuoya contre eux avec cent trente hommes de Guerre le Capitaine mercadillo, qui peupla depuis la ville qu'on appelle auioird'huy Loxa. Cela fait, le Capitaine Porcel eut ordre de luy de prendre soixante Soldats, pour s'en aller avec eux en son ancienne Conqueste de la Prouince de *Pacamoru*: Il commanda pareillement au Licencié Caruajal, de prendre la route de la Mer, avec quelque nombre de gens aguerrys, dans les Nauires que Iean Alonse Palamin auoit amenées de Nizaraga, son dessein estant qu'il nauiguast coste à mont, & pourueut à la seureté des ports, suiuant les Instruptions & les Ordres qui luy en furent donnez. En effet, ce Licencié s'acquitta ponctuellement de sa Commission, & s'en alla par la Coste en la Ville de Truxillo, où Gonçalo pigarre se rendit par terre, tellement qu'apres cette ionction, ils prirent leur marche droit à la Ville des Rois.

Gonçalo pigarre sortit de Truxillo, avec vne Eslite de deux cens hommes de Guerre, dont les plus considerables estoient, le Licencié Caruajal, Iean d'Acosta, Iean de la Tour, le Licencié Sepeda, Hernand Bachicao, Diego Guillen, & autres personnes qualifiées. Comme il fut près de la Ville, il y eut parmy les siens vne grande diuersité d'opinions, touchant les honneurs de son Entrée. Les vns disoient qu'il la deuoit faire sous le Daiz, en qualité de Roy, puis qu'il le meritoit, & c'estoit l'aduis de ceux qui luy auoient conseillé d'en prendre le tiltre: Mais les autres, qui en parloient avec plus de moderation, iugeoient à propos de le receuoir dans la Ville, par vne de ses principales Portes, & par la Ruëneufue, comme faisoient les Romains au Triomphe de leurs Empereurs, apres des Victoires signalées. Ces opinions furent long-temps balancées de part, &

d'autre, chacun desirant d'autoriser la sienne: Mais Gonçalo Piçarre ne fut pas de cét aduis, & s'en remit entierement à ce que le Licencié Caruaial en ordonneroit. Il luy conseilla donc d'entrer à cheual, ayant deuant luy ses Capitaines à pied, qui seroient mener leurs cheuaux en main, & les Fantassins en suite, rangez par files. A leur exemple le reste de la Cavalerie mit pied à terre, & se mesla parmy l'Infanterie, ne iugeant pas raisonnable d'aller à cheual, puis que leurs Capitaines estoient à pied: Gonçalo Piçarre marchoit apres, monté sur vn beau cheual, tres richement harnaché. Il auoit à ses costez, quatre Prelats principaux; à scauoir, à la main droitel' Archeuesque de la Ville, avec l'Euesque de Quito; Et à la gauche, les Euesques de Cozco, & de Bogota, venu exprés au Peru, pour y estre consacré par la main de ces trois Prelats. Apres ceux-cy, marchoit en forme d'Arriere-garde vne Compagnie de Fantassins, sans que ceux-cy, ny les autres non plus qui alloient deuant, eussent aucunes Armes offensiuës, comme Piques, Arquebuzes, & autres semblables, afin de donner à connoistre, qu'ils venoient là plustost pour faire la Paix, que la Guerre. Laurens d'Aldana, Lieutenant de Gonçalo Piçarre les suiuit tous, avec les principaux Seigneurs, & Bourgeois de la Ville, d'où ils estoient sortis pour s'en aller au deuant du Gouverneur. A son arriüée tous en general le comblèrent de benedictions, & le remercièrent en particulier de leur auoir par tant de trauals & de perils, sauüé leurs biens & la vie, s'offrans à mourir pour la conseruation de la sienne.

En cette Entrée, Gonçalo Piçarre s'en alla droit à l'Eglise Cathedrale, pour y adorer le saint Sacrement, tandis que toutes les ruës par où il passoit, retentissoient du son des Trompettes, de diuers Concerts de Musique, & du bruit confus que faisoient les Cloches, qui s'entremessoit de toutes parts aux acclamations & aux réjouissances publiques. Au sortir de l'Eglise, il fut prendre logement dans l'Hostel du Marquis son Frere, où, s'il en faut croire les Historiens, il augmenta grandement son train, & y vescu avec beaucoup plus de pompe, & de magnificence qu'à l'accoustumée: les vns disent, qu'il auoit pour sa garde ordinaire quatre-vingts Halebardiers, & qu'aucun n'estoit assis en sa presence: les autres, qu'il donnoit sa main à baiser à tous ceux qui l'approchoient: Et ces beaux contes ne sont faits, que par des gens qui le haïssoient, & qui le vouloient rendre odieux

odieux aux autres, en flattant ses Ennemis à son desavantage: Ce qu'ils faisoient encore, pour imprimer vne mauuaise opinion de luy dans l'esprit de ceux qui le liroient: Tellement qu'il ne faut pas s'estonner, si tels Autheurs ainsi préoccupés par des Calomniateurs, ont si mal parlé dans leurs Escrits, & de ses Cavaliers, & de ses Ministres. Mais qui me prendroit à serment, pour dire de luy en vray-Christien ce que j'en ay veu, scauroit de moy que ie n'ay iamais apperceu d'Halebardiers en sa Garde; ny mesme ouy dire qu'il en eut aucun. l'adjouste à cecy, comme ie l'ay remarqué cy. deuant, qu'au temps que le Marquis son Frere entra dans le Peru, avec permission de sa Maiesté d'auoir pour sa Garde vingt-quatre Halebardiers; de tous ceux de ma connoissance, il ne s'en trouua que deux qui pour cét effet vou-lussent prendre la Halebarde, tous les gens d'Espée le tenant pour vne chose trop basse. Cela estant, ie ne puis comprendre cōme depuis, il se trouua vne personne qui en pût auoir quatre-vingts, en vn temps où la Vanité, la Presomption, & l'Orgueil, estoient montez à vn comble incomparablement plus grand, & plus haut qu'auparauant: ce que l'on peut inferer encore, dece que dans le Peru les Soldats Espagnols se piquent si fort de courage & de generosité, qu'ils desdaignent de tirer paye à la Guerre, où ils n'en veulent receuoir aucune, non pas mesme de sa Maiesté. D'où ie concluds, qu'il faut necessairement qu'en cét endroit l'Imprimeur se soit trompé, & qu'au lieu du mot d'Arquebuziers, conforme au sens de l'Auther, il ait mis celuy d'Halebardiers, pour ne scauoir pas qu'en ces contrées des Indes, la presomption Espagnole montoit bien plus haut que la Halebarde, & que les Gouverneurs auoient pour Gardes de leur personne, des Arquebuziers, & non pas des Halebardiers. Ils luy imposent encore, qu'il recouroit au Poison, quand ils se vouloit defaire de ses Ennemis; Ce qui est tellement faux, que l'on ne peut sans imposture luy imputer vne action si noire, qui ne luy tomba iamais dans la pensée, tant s'en faut qu'il l'eut commise: que si cela eut esté, j'en aurois assurément appris quelque chose, aussi bien que ceux qui le soustiennent impudemment. D'ailleurs, si cette seule meschanceté deuoit suffire, pour le faire haïr de tout le Monde, pourquoy les Autheurs auroient-ils assuré, qu'en plusieurs lieux il estoit extrêmement aymé de tous ceux du País? Qu'il me soit donc permis de dire veritable-

ment, & sans offencer personne, ce que i'en ay veu, puis qu'il
mon intention n'est autre que de raconter les choses passées,
sans y tesmoigner ny flatterie, ny animosité, n'ayant nul suiet de
me porter à l'un, ny à l'autre.

*L'AUTHEVR DESCRIT ICY LA FACON
de viure de Gonçalo Piçarre, la Mort de Vela Nuñez,
l'Arrivée de François de Caruaial en la Ville des
Rois, & la Reception qui luy fut faite.*

CHAPITRE XLII.

LA premiere fois que ie vis Gonçalo Piçarre, fut en la Vil-
le de Cozco, où il demeura depuis la Bataille de Huarina,
iusques à celle de Sacahuana, de l'une à l'autre desquelles il se
passa bien enuiron six mois: si bien que durant ce temps là, ie
fus presque tous les iours en sa Maison, où i'eus moyen de le
considerer, & sa maniere de viure. Comme tous le reconnois-
soient pour leur Chef, en l'accompagnant quelque part qu'il al-
last, soit à pied, soit à cheval, aussi les traittoit-il tous si obli-
geamment, que depuis le plus qualifié, iusques au moindre, il
n'y auoit, ny Bourgeois, ny Soldat, qu'il ne cherit comme son
propre Frere; Il ne donnoit iamais suiet à personne de se plain-
dre de luy, & si quelqu'un en le salüant, luy vouloit baiser les
mains, il ne le permettoit point, quelque priere qu'on luy
fit, par vne espèce de soumission. Il salüoit tout le Mon-
de le Chapeau à la main, & traittoit tousiours de Seigneu-
rie les personnes qui parloient à luy, & qu'il iugeoit dignes
de ce tiltre: Il appelloit du nom de Pere, François de Car-
uaial, comme ie l'ay remarqué cy. deuant; Et ie me sou-
uiens qu'en mon Enfance, estant vn iour dans sa Chambre,
où il s'entretenoit avec luy, ie pris garde qu'encore qu'il n'eut
personne que nous ttois, neantmoins comme si Caruaial se fut
deffié de moy, il le tira à l'escart, & luy dit quelque chose à l'o-
reille, de peur que ie ne l'oüyssse; à quoy Gonçalo Piçarre ne fit
pas vne longue responce, & luy dit peu de paroles, dont i'oüys
seulement celle-cy: *Voyez mon Pere.* Il mangeoit ordinairement

en public, en vne table fort longue, & qui estoit pour le moins de cent couuerts. Il y tenoit le haut bout, & tant à gauche qu'à droit, il y auoit apres luy deux chaires vuides, où iamais personne ne prenoit place; Là il faisoit bonne chere à tous les Soldats qui le venoient voir: Car pour les Capitaines, & les Seigneurs, iamais ils ne mangeoient avec luy qu'en leurs Maisons propres. Surquoy ie rapporteray, qu'il me fit l'honneur de m'inuiter à sa table par deux diuerses fois, dont l'une fut au iour de la Purification de Nostre-Dame. Son Fils Dom Fernand, Dom François son Nepueu, Fils du Marquis, & moy, y mangeâmes tous trois de bout, dans cét endroit de la Table qu'on laissoit ordinairement vuide, luy nous donnant à tout coup de ce qui luy estoit seruy. Ce que ie certifie auoir veu en vn aage, où ie n'auois pas encore atreint la dixiesme de mes années, & où ie n'entray que le douzième du mois d'Auril suiuant. De toutes ces choses on peut inferer, que les Historiens qui ont escrit le contraite, ont esté mal informez par des personnes passionnées, & qui en vouloient à Pigarre. A ces calomnies ils ont adjousté, qu'encore qu'il prit tous les deniers qui prouenoient des Droicts du Roy, comme aussi tous les Tributs des Départemens d'Indiens qui se trouuoient vacans, & de ceux qui s'estoient declarez contre luy, le tout se montant à plus des deux tiers des rentes du peru, il ne payoit pas pouttant les gens de Guerre, qui estoient fort mal satisfaits de luy; Et cependant il ne paroist point qu'ils disent qu'apres sa mort on trouuaist aucuns Tresors qu'il eut cachez: d'où se descouure assez la malice de ces donneurs d'aduis & de faux memoires. Ils l'accusent aussi d'auoir commis adultere, & s'il estoit vray, ils auroient grande raison de l'en blasmer comme ils font, tels debordemens estant en effet blasmables en toute sorte de gens; & sur tout en ceux qui ont du commandement sur autrui.

Mais pour reuenir à nostre Histoire, il faut sçauoir qu'en ce dernier voyage que fit Gonçalo pigarre en la Ville des Rois, arriva la mort infortunée de Vela Nuñez, Frere du Vice-Roy Blasco Nuñez Vela, causée par le Capitaine Iéan de la Tour, qui auoit espousé quelques années auparauant, vne Dame Indienne, Fille d'un Curaca de la Prouince de Puerro-Vicjo: D'où itatriua que les Indiens s'estimant fort honorez de l'alliance de cét Espagnol, qu'ils estimoient plus que leurs Tresors, luy en

descourirent vn dans le Tombeau del'vn des Predecesseurs de leur Seigneur, où il vauoit en or, & en Esmeraudes fines, la valeur de plus de 150000. Ducats: Ce qui fut cause que Iean de la Tour se voyant si riche, fut tanté de quitter là Gonçalo Piçarre, & de s'en aller en Espagne, pour y iouyr à son aise de ses richesses: Neantmoins, apres auoir bien considéré les fautes par luy commises contre le seruice de sa Maiesté, comme ayant esté du nombre de ceux qui auoient peulé la barbe au Vice Roy, dont luy-mesme, ainsi que i'ay dit ailleurs, s'estoit fait vne maniere de pennache, il ne pût se resoudre à ce Voyage, qu'il n'eut auparavant pensé aux moyens de le faire en seureté. A raison dequoy il sollicita Vela Nuñez de s'enfuir avec luy dans l'vn des Nauires qui estoient au Port; ce qu'il fit sur l'esperance, qu'à son arriüée en Espagne, luy & ses plus proches l'appuyeroient de leur faueur, pour l'auoir desliuré du joug, & de la puissance du Tyran. Aussi auoit il desia tiré le consentement de Vela Nuñez, lors qu'il changea tout à coup de resolution, fut vn faux bruit qui courut, que par Edit de sa Maiesté, Gonçalo Piçarre estoit continué dans le Gouuernement du Peru, à quoy il fut incité, pour s'estre mis dans l'Esprit qu'il ne deuoit point perdre les bonnes graces de Gonçalo Piçarre, mais s'y maintenir le plus qu'il pourroit, pour les faueurs signalées qu'il esperoit d'en recevoir. Pour empescher donc que Vela Nuñez, ou quelqu'autre pour luy, ne descourut à Piçarre la partie qu'ils auoient faite ensemble, & ainsi sauuer sa vie, il le declara luy-mesme, ou le fit dire de sa part; ce qui fut veritable à sa perte, puis qu'il en eut la teste tranchée, & que l'autre qui l'auoit si mal conseillé, fut escartelé publiquement; ce que plusieurs ostimerent auoir esté fait par Gonçalo Piçarre, plustost par la persuation du Licencié Caruajal, que pour aucun desir qu'il eut de faire mourir Vela Nuñez, l'ayant tousiours cognu d'assez bon naturel pour ne point pecher que par le mouuement d'autrui. Ainsi mourut ce bon Canalier, par la perfidie d'un Traistre, qui se montra tel en toutes façons; Cependant quelques iours auparavant, François de Caruajal ayant eu nouuelles de l'acheminement de Gonçalo Piçarre en la Ville des Rois, & vn Ordre exprés de le venir joindre, s'y en alla tout aussi-tost du costé des Charcas. Gonçalo Piçarre le fut recevoir assez loing de la Ville, & luy fit vn accueil merueilleux, comme à vn Capitaine digne du Triomphe, pour

auoir défait tant d'Ennemis , & gaigné tant de grandes Victoires. Caruajal laissa Alonse de Mendoza pour Capitaine & Lieutenant de Gonçalo Pigarre dans la Ville de la Plata , & emporta avec luy la valeur d'un Million en argent , qu'il auoit tiré , tant des Mines de Porosy , que des Départemens d'Indiens qu'il auoit trouué vacans , tellement que Gonçalo Pigarre eut de quoy faire vne despence Royale : Ce qui donna suiet à Caruajal de luy repeter les mesmes paroles qu'il luy auoit dites , pour luy persuader de se mettre sur la teste la Coutonne de Roy. Nous les laisserons , & leurs Confidens , avec les Principaux des Villes de cét Empire , dans les Negociations de la Paix , pour la commune tranquillité des Indiens , & des Espagnols ; Car , à vray dire , elle leur estoit d'autant plus souhaitable , que par elle seule la sainte Foy Catholique pouuoit s'augmenter en ce Païs là , par l'instruction de ces Peuples en la Doctrine Chrestienne ; & le Commerce s'establis sans danger , parmy les Marchands , & les gens d'affaires. Comme au contraire , les Guerres & les Reuoltes passées auoient iusqu'à lors interrompu leur trafiq , à cause que toutes choses estoient en peril eminent : Et certainement ceux qui auoient du bien ne s'en pouuoient pas dire les Maistres , pour les grandes violences des Meschans , dont les vns les en despoüilloient ouuertement , comme Tyrans , & les autres , sous vn specieux preterxe d'en auoir besoin pour le seruice du Roy : De sorte qu'en eux se verifioit au grand dommage du Public cet ancien Prouerbe : Que la pesche n'est iamais si bonne , que lors qu'elle se fait en eau trouble. Passons maintenant en Espagne , pour declarer ce que fit sa Maiesté Imperiale , quand elle apprit les Reuoltes qui se faisoient à toute heure dans le Peru , & l'Emprisonnement du Vice-Roy , Blasco Nuñez.

FIN DV QUATRIESME LIVRE.

TABLE DES CHAPITRES DE CE VOLUME.

LIVRE PREMIER.

CHAP. I.	T ROIS Gentils-hommes Espagnols aspirent à la Conqueste du Peru. fol. 2	
Chap. II.	Des Excellences, & des grandeurs que l'As- sociation des trois Espagnols a produites. 2	
Chap. III.	Du peu d'argent qu'il y avoit en Espagne, avant la Conqueste du Peru. 6	
Chap. IV.	Autres preuves du peu d'argent qu'il y avoit avant la Conqueste du Peru. 10	
Chap. V.	De ce que consta le nouveau Monde au Roy de Castille. 13	
Chap. VI.	Du prix des choses communes, avant que l'on conquit le Peru. 16	
Chap. VII.	Deux opinions touchant les Richesses du Pe- ru, & le commencement de sa Con- queste. 17	
Chap. VIII.	Almagre retourne deux fois à Panama pour avoir du secours. 22	
Chap. LX.	Pizarre est abandonné de ses gens, à la re- serve de treize, qui demeurèrent avec luy. 24	

TABLE DES CHAPITRES.

Chap. X.	<i>François Piçarre passe plus auant dans sa Conqueste.</i>	29
Chap. XI.	<i>François Piçarre, & ses treize Compagnons arriuent au Peru.</i>	29
Chap. XII.	<i>Chose merueilleuse aduenue à Tumpiz.</i>	32
Chap. XIII.	<i>Pierre de Candie va rendre compte de ce qu'il a veu, à ses Compagnons, qui s'en retournent à Panama.</i>	33
Chap. XIV.	<i>Voyage de Piçarre en Espagne, où il demande la Conqueste du Peru.</i>	35
Chap. XV.	<i>De ce que les Espagnols souffrirent, depuis Panama iusques à Tumpiz.</i>	38
Chap. XVI.	<i>Les Espagnols gaignent l'Isle de Puna, & la Ville de Tumpiz.</i>	41
Chap. XVII.	<i>De l'Ambassade, & des grands presens qu'Atahuallpa fit aux Espagnols.</i>	44
Chap. XVIII.	<i>Le Gouverneur enuoye des Ambassadeurs au Roy Atahuallpa.</i>	48
Chap. XIX.	<i>Reception faite par le Roy à l'Ambassade des Espagnols.</i>	53
Chap. XX.	<i>Harangue des Ambassadeurs, & Respon- se de l'Ynca.</i>	55
Chap. XXI.	<i>Les deux Ambassadeurs Espagnols retour- nent trouuer leurs gens, qui se tinrent prests à recevoir l'Ynca.</i>	60
Chap. XXII.	<i>Harangue que le Pere Frere Vincent de Valverde fit à l'Ynca Atahuallpa.</i>	64
Chap. XXIII.	<i>Inconueniens arriuez, pour n'auoir seu ex- pliquer le Raisonnement de Frere Vincent de Valverde.</i>	65
Chap. XXIV.	<i>Responße d'Atahuallpa à la Harangue de</i>	

TABLE DES CHAPITRES.

	<i>Frere Vincent de Valverde.</i>	70
Chap. XXV.	<i>Grande Sedition aduenüe entre les Indiens, & les Espagnols.</i>	73
Chap. XXVI.	<i>L'Autheur confronte ce qu'il a dit avec les Histoires des Espagnols.</i>	77
Ch. XXVII.	<i>Les Espagnols font Prisonnier le Roy Atahuallpa.</i>	79
Ch. XXVIII.	<i>Atahuallpa promet pour sa desliurance une incroyable Rançon aux Espagnols, qui pour l'auoir, font toute sorte de diligences.</i>	81
Chap. XXIX.	<i>Hernand Pizarre s'achemine à Pachamac. Succes de son Voyage.</i>	85
Chap. XXX.	<i>Tous les Demons du Peru sont rendus muets par la Vertu des Sacremens de la Sainte Eglise.</i>	89
Chap. XXXI.	<i>Huascar Ynca demande secours à deux des Espagnols Deputez.</i>	90
Ch. XXXII.	<i>Les deux Espagnols arriuent à Cozco, où ils trouvent des Croix dans les Temples, & dans les Maisons Royales.</i>	92
Ch. XXXIII.	<i>Ruse d'Atahuallpa, & Mort du Roy Huascar Ynca.</i>	95
Ch. XXXIV.	<i>Dom Diego d'Almagre arriue à Cassamarca. Presages, & bruits de la Mort d'Atahuallpa, qui en est tout en alarme.</i>	99
Ch. XXXV.	<i>Hernand Pizarre s'en va en Espagne, pour y rendre compte des choses aduenües dans le Peru.</i>	102
Ch. XXXVI.	<i>Procez fait au Roy Atahuallpa par fourberies, & fausses Informations, avec un Recit de sa Mort.</i>	

Ch. XXXVII.

TABLE DES CHAPITRES.

Ch. XXXVII.	Informations faites contre Atabualpa.	107
Ch. XXXVIII.	Grande preuve de la subtilité de l'Esprit d'Atabualpa ; & de la merueilleuse quantité d'or & d'argent qu'il donna pour sa Rançon.	111
Ch. XXXIX.	De ce que disoient les Espagnols touchant les choses qui s'estoient passées.	118
Chap. XL.	Effets de la diuision des deux Freres Yncas.	121
Chap. XLI.	Grande fidelité des Indiens du Peru enuers les Espagnols , qui les auoient faits prisonniers de Guerre.	125

LIVRE SECOND.

Chap. I.	DOM Pedro d'Aluarado s'en va à la Conquête du Peru.	128
Chap. II.	Des grands trauaux que Dom Pedro d'Aluarado , & ses gens souffrirent en leur Voyage.	133
Chap. III.	Le Corps d'Atabualpa est transporté à Quito , où le Tyran Ruminai exerce des cruantez estranges.	137
Chap. IV.	Ruminai fait enterrer en vie tout ce qu'il trouue de Filles dans vn Couuent.	140
Chap. V.	De quelques Combats entre les Indiens, & les Espagnols.	142
Chap. VI.	Les Indiens font mourir Cuellar , & capitulent pour les autres Prisonniers.	145
Chap. VII.	Les Espagnols entrent dans Cozco , où ils	

TABLE DES CHAPITRES.

	<i>trouuent de grands Tresors.</i>	149
Chap. VIII.	<i>Vn Indien demande à se faire Chrestien, & se conuertit avec grand zele.</i>	153
Chap. IX.	<i>Dom Diego d'Almagre, avec Dom Pedro d'Aluvarado, & Belalcazar, s'en vont chercher Ruminahui pour le chastier.</i>	155
Chap. X.	<i>Esperance, & crainte d'Almagre. Fuite de son Truchement, & Paix avec Aluvarado.</i>	159
Chap. XI.	<i>Almagre, & Aluvarado s'en vont à Cozco. Le Prince Manco Ynca vient parler au Gouverneur, qui luy fait vne tres-bonne reception.</i>	162
Chap. XII.	<i>L'Ynca demande aux Espagnols d'estre restabli dans son Empire, & la Responce qu'ils luy font.</i>	167
Chap. XIII.	<i>Les deux Gouverneurs s'en vont chercher le Mestre de Camp Quizquiz.</i>	171
Chap. XIV.	<i>Trois Batailles données entre les Indiens, & les Espagnols, avec le nombre des Morts.</i>	174
Chap. XV.	<i>Le Gouverneur sort de Cozco, s'abouche avecque Dom Pedro d'Aluvarado, & luy paye ce qu'on luy auoit promis.</i>	178
Chap. XVI.	<i>La Mort de Dom Pedro d'Aluvarado.</i>	182
Chap. XVII.	<i>Fondation de la Ville des Rois, & de celle de Truxillo.</i>	186
Chap. XVIII.	<i>Le Mestre de Camp Quizquiz est mis à mort par les oens.</i>	190
Chap. XIX.	<i>Dom Diego d'Almagre se fait Gouverneur sans en estre authorisé au Roy, & luy</i>	192

TABLE DES CHAPITRES.

	<i>se un Accord avec le Marquis.</i>	194
Chap. XX.	<i>Don Diego d'Almagre reçoit un grand es- chec en son Armée, & un fort bon trait- tement des subjets de l'Ynca.</i>	196
Chap. XXI.	<i>De nouvelles pretentions s'opposent à l'Em- pire de Chily, & Don Diego d'Al- magre fait de s'en retourner au Peru, & Pombay.</i>	203
Chap. XXII.	<i>Almagre sort du Royaume de Chily, pour s'en retourner à Cozco. Le Prince Man- co Ynca demande pour la seconde fois d'estre restably dans son Empire. Respon- se des Pigarres. Arrivée d'Hernand Pi- garre au Peru, & Emprisonnement de l'Ynca.</i>	208
Chap. XXIII.	<i>Grandes précautions du Prince Manco Yn- ca, pour se restablir dans son Empire.</i>	214
Chap. XXIV.	<i>Souslevement du Prince Manco Ynca, & deux signalez miracles faits en faveur des Chrestiens.</i>	218
Chap. XXV.	<i>Miraculeuse Apparition de la Vierge en fa- veur des Chrestiens, & Duel remarquable entre deux Indiens.</i>	224
Chap. XXVI.	<i>Les Espagnols gagnent la Forteresse de Cozco, où Jean Pigarre est mis à mort.</i>	238
Ch. XXVII.	<i>Divers Exploits de courage, qui se passent entre le sieur de Cozco, & les Indiens.</i>	
	<i>De la prise de la Ville des Rois.</i>	240

TABLE DES CHAPITRES.

Ch. XXIX.	Fuite de Villac-Vma, & chasiment fait de l'Interprete Philipo. Le Prince Ynca s. bannit de son Empire.	248
Ch. XXX.	Tesmoignage d'un Auteur, touchant les Rois Yncas, & leurs Sujets.	254
Ch. XXXI.	Diuers Contrastes entre les Almagres, & les Piçarres, suivis de l'Empyement d'Hernand Piçarre.	257
Ch. XXXII.	Des grandes trauersés aduenues à Garcilasso de la Vega.	262
Ch. XXXIII.	Alonse d'Aluaro est enuoyé au secours de Cuzco. Succes de son Voyage.	267
Ch. XXXIV.	La Bataille donnée près de la Riviere d'Almançay, où Alonse d'Aluaro, & ses gens sont faits Prisonniers.	274
Ch. XXXV.	Le Marquis fait diuers Capitaines. Gonzalo Piçarre est tiré de Prison. Arbitres esleus touchant le Gouvernement, & ce qu'ils en ordonnent. Entrevue des Gouverneurs, & desliurance de Hernand Piçarre.	280
Ch. XXXVI.	Explication de ce que nous auons dit, & marche de l'Armée d'Hernand Piçarre contre celle de Dom Diego d'Almagre.	286
Ch. XXXVII.	La sanglante Bataille des Salines.	291
Ch. XXXVIII.	Succes lamentables aduenus apres la bataille des Salines.	
Ch. XXXIX.	La Mort déplorable de Dom Diego d'Almagre.	
Chap. XL.	Diuers Capitaines sont enuoyez à de nou-	

TABLE DES CHAPITRES.

uelles Conquestes. Hernand Piçarre ar-
riue en Espagne, où il demeure long-temps
en Prison. 309

LIVRE TROISIÈME.

- Chap. I. **D**E la Conqueste des Charcas, & de
quelques Combats, qui s'y passe-
rent entre les Indiens & les Espa-
gnols. 315
- Chap. II. Le Marquis partage aux siens les terres de
la Prouince des Charcas, & Gonçale Pi-
çarre s'en va à la Conqueste de la Ca-
nelle. 320
- Chap. III. Des trauaux incroyables que Gonçale Pi-
çarre, & ses gens endurerent, ensemble
d'un Pont de bois, & d'un Brigantin
qu'ils firent, pour passer une grande Ri-
uiere. 324
- Chap. IV. François d'Orellana s'estant embarqué dans
le Brigantin, s'en va en Espagne, où il
demande la Conqueste du Pays descou-
uert, & meurt depuis sur la Mer. 329
- Chap. V. Gonçale Piçarre fait dessein de retourner à
Quitu, & ceux de Chily conspirent la
mort du Marquis son Frere. 335
- Ch. VI. Ceux de Chily attentent à la personne du
Marquis, & le tuent. 339
- Chap. VII. La mort du Marquis Dom François Pi-
çarre, & son pauvre Enterrement. 343

TABLE DES CHAPITRES.

- Chap. VIII. Des qualitez, & des mœurs du Marquis
Dom François Piçarre, & de l'Adalen-
tado Dom Diego d'Almagre. 348
- Chap. IX. De l'humeur affable du Marquis, & des
inventions dont il vsoit pour assister les
Necessiteux. 355
- Chap. X. Dom Diego d'Almagre s'estant fait procla-
mer Gouverneur du Peru, enuoye ses
Lettres de Prouision en diuers lieux du
Royaume, d'où s'ensuiuent plusieurs di-
uisions. 359
- Chap. XI. Précautions des principaux de Cōzco pour
le seruice du Roy, & de Dom Diego pour
ses interests propres. Vaca de Castro est
deputé d'Espagne pour estre Iuge de ce qui
s'est passé au Peru. 365
- Chap. XII. Ceux de Rimac, & de plusieurs autres Con-
trées, reçoient pour Gouverneur Vaca
de Castro. Stratageme de Pedro Alua-
rez, & de ses gens, qui sont d'une double
intelligence, au preiudice de Dom Diego
d'Almagre, & se ioignant avec Alonso
d'Aluorado. 371
- Chap. XIII. Le Gouverneur nomme des Capitaines, en-
uoye son Armée deuant, & met ordre à plu-
sieurs autres choses necessaires au seruice
de sa Maiesté. Recit de la Mort de Chri-
stofle de Sotello, & de Garcia d'Alua-
rado. 375
- Chap. XIV. Dom Diego d'Almagre va chercher le Gou-
verneur, & Gonzalo Piçarre sort de la

TABLE DES CHAPITRES.

	<i>Canelle, apres y auoir souffert plusieurs grands trauaux.</i>	380
Chap. XV.	<i>Gonzale Pizarre entré dans Quitu, escrit au Gouverneur, & luy offre sa personne, & ses gens. Responſe du Gouverneur, & le Party qu'il veut faire à Dom Diego d'Almagre.</i>	385
Chap. XVI.	<i>Le Licencié Vaca de Castro, & Dom Diego d'Almagre, mettent en Ordonnance leurs gens. Commencement de la Bataille, où le Capitaine Pierre de Candie est mis à mort.</i>	391
Chap. XVII.	<i>Continuation de la cruelle Bataille des Chupas. Deſroute des Almagres, Victoire du Gouverneur, & fuite de Dom Diego.</i>	395
Chap. XVIII.	<i>Noms des principaux Canaliers qui se trouuerent en cette Bataille, avec le nombre des Morts, le chastiment des Coupables, & la Mort de Dom Diego d'Almagre.</i>	400
Chap. XIX.	<i>La Paix s'establit dans le Peru, par le bon Gouvernement du Licencié Vaca de Castro. Cause essentielle des Troubles de ce Royaume-là.</i>	405
Chap. XX.	<i>Nouvelles Loix, & Ordonnances faites à la Cour d'Eſpagne, pour le Gouvernement des deux Empires de Mex que, & du Peru.</i>	411
Chap. XXI.	<i>Des Ministres qui furent enuoyez en la Mexique, & au Peru, pour faire execu-</i>	

TABLE DES CHAPITRES.

- ter les Ordonnances susdites , avec une Description de la Ville Imperiale de Mexique.* 416
- Chap. XXII. *Ceux de Mexique appellent des Ordonnances nouvelles. Elles sont publiées, & causent du trouble dans la Ville, mais le Visiteur l'appaise; & par sa Prudence comble d'un bon-heur extrême tout l'Empire de Mexique.* 421

LIVRE QUATRIESME.

- Chap. I. **D**E ce que fit Blasco Nunez Vela, dès qu'il fut entré en la Terre ferme, & aux Confins du Peru. 429
- Chap. II. *Le Licencié Vaca de Castro s'achemine en la Ville des Rois, & renuoye ceux qui l'accompagnoient. Desordres causez, à raison des Ordonnances, & du bruit qui en couroit publiquement.* 433
- Chap. III. *De ce qu'on disoit dans le Peru de ceux qui auoient conseillé de faire les nouvelles Ordonnances, & particulièrement contre le Licencié Barthelemy de las Casas.* 438
- Chap. IV. *Raisons des Malcontens du Peru, contre les nouvelles Ordonnances; & preparatifs diuers pour la reception du Vice-Roy.* 442
- Chap. V. *Entrée du Vice-Roy, & Emprisonnement de Vaca de Castro; avec un Recit des Desordres*

TABLE DES CHAPITRES.

- ordres publics, dont le Vice Roy ne fut pas exempt.* 447
- Chap. VI. *Le Peuple descoauure la haine secrette entre les Auditeurs, & le Vice Roy, à qui le Prince Manco Ynca, & les Espagnols qui estoient avecque luy, escriuent des Lettres.* 453
- Chap. VII. *La Mort deplorable du Prince Manco Ynca, & les Dissentions des Espagnols, causées par les Ordonnances.* 558
- Chap. VIII. *Continuation des mesmes Desordres, & Lettres écrites à Gonçalo Pizarre par les Communautéz des quatre Villes. Il est esleu Procureur General du Peru, & leue des gens, pour les mener avec luy en la Ville des Rois.* 463
- Chap. IX. *Gonçalo Pizarre sort de Cozco avec une Armée. Armement du Vice Roy, qui fait Prisonnier Vaca de Castro, & plusieurs autres des Principaux.* 468
- Chap. X. *Deux des Principaux d'Arequépa amènent au Vice Roy deux Vaisseaux, appartenans à Gonçalo Pizarre, de l'Armée duquel s'enfuyent quelques Seigneurs de Cozco.* 472
- Chap. XI. *Pedro de Puelles se iette dans le Party de Gonçalo Pizarre, & plusieurs autres en font de mesme.* 478
- Chap. XII. *Abolition donnée à Gaspar Rodriguez, & à ses Amis, avec sa mort, & celle des autres.* 483

TABLE DES CHAPITRES.

- Chap. XIII. *La Mort du Fauteur Yllen Suarez de Caruajal, & le desordre qu'elle cause dans tout le Peru.* 487
- Chap. XIV. *Irresolutions du Vice Roy, sur la venue de Gonçalo Piçarre en la Ville des Rois, manifestement contredites.* 492
- Chap. XV. *Emprisonnement du Vice-Roy, & diuers succez qui s'en ensuiuirent sur Mer, & sur Terre.* 497
- Chap. XVI. *Succez deplorables du Vice-Roy: Conspiration faite contre les Auditeurs, & le Vice-Roy mis en liberte.* 502
- Chap. XVII. *Requete des Auditeurs à Gonçalo Piçarre, & succez infortuné de ceux qui l'abandonnerent.* 507
- Chap. XVIII. *Gonçalo Piçarre arriue près de la Ville des Rois, où le delay des Auditeurs à le nommer pour Gouverneur, cause la mort à quelques uns des principaux Habitans.* 511
- Chap. XIX. *Gonçalo Piçarre, nommé Gouverneur du Peru, fait son Entrée en la Ville des Rois. Mort du Capitaine Gumiell, & Liberte donnée aux principaux Habitans de Cozco.* 515
- Chap. XX. *Resiouissance des Piçarres, suiuite d'une Abolition generale donnée aux Fuyards, & particulierement à Garcilasso de la Vega.* 520
- Chap. XXI. *Chastiment rigoureux d'une irreuerence envers le saint Sacrement, & de quelques*

TABLE DES CHAPITRES.

- blasphemes horribles , ensemble l'Esle-
ction qui fut faite de deux Procureurs ,
pour estre enuoyez en Espagne. 524*
- Chap. XXII. *Déplaisir extrême de Gonçalo Piçarre, pour
la desliurance de Vaca de Castro. Her-
nand Bachicao prend la route de Pana-
ma, & le Vice-Roy desliure des Commis-
sions pour faire des leuées de gens de
Guerre. 528*
- Chap. XXIII. *Bachicao fait diuerses choses dans Panama.
Le Licencié Vaca de Castro arrive en Es-
pagne, où il termine ses affaires, & le
Vice-Roy se retire à Quitu. 533*
- Chap. XXIV. *Deux Capitaines de Piçarre font couper
la teste à trois Officiers du Vice-Roy, qui
se venge d'eux par les Armes. Embar-
quement de Gonçalo Piçarre, qui prend
la route de Truxillo. 538*
- Chap. XXV. *Grandes Précautions de Gonçalo Piçarre,
pour trauerser un Pays desert. Il se fait
voir au Vice-Roy, qui se retire à Quitu.
Merueilleuse Prudence, & sage conduite
de Laurens d'Aldana. 543*
- Ch. XXVI. *Gonçalo Piçarre s'obstine à poursuiure le
Vice-Roy, auquel il donne plusieurs tra-
uersés. Grandes incommoditez dans les
deux Armées, avec la mort violente du
Mestre de Camp, & du Capitaine du
Vice Roy. 547*
- Ch. XXVII. *Mort de François d'Almendras, & Souf-
flement de Diego Centeno, arrêté par*

TABLE DES CHAPITRES.

- la resistance d'Alonso de Toro.* 552
- Cha. XXVIII. *Diego Centeno enuoyé des gens apres Alonso de Toro, Soubçons de Rebellion dans la Ville des Rois, appaisez par Laurens d'Aldana. Gonçalo Piçarre fait aller en la Prouince des Charcas François de Caruajal son Mestre de Camp, & ce qu'il fit en ce Voyage.* 558
- Chap. XXIX. *Caruajal poursuit Diego Centeno; Et apres auoir traitté cruellement un des Ennemis, est affronté luy-mesme par un autre Soldat.* 564
- Chap. XXX. *Gonçalo Piçarre donne de grands eschees au Vice-Roy, iusques à le chasser du Peru: Et Pedro de Hinoyosa prend la route de Panama, avec l'Armée Nauale de Piçarre.* 568
- Chap. XXXI. *Pedro de Hinoyosa prend Vela Nuñez par le chemin. Preparatifs de Guerre faits à Panama, pour luy resister; & moyens tenus pour appaiser cette Esmeute.* 573
- Cha. XXXII. *Actions de Melchior Verdugo à Truxillo, à Niçaraga, & dans Nombre de Dios, d'où il fut chassé honteusement.* 577
- Cha. XXXIII. *Blasco Nunez Vela fait de nouueaux preparatifs à Popayan, d'où Gonçalo Piçarre tasche de le faire sortir, sous pretexte de s'en aller à Qu tu. Le Vice Roy s'en va chercher Pedro de Puellas.* 582
- Cha. XXXIV. *Bataille de Quitu, où fut deffait l'Armée du Vice-Roy Blasco Nunez Vela, & luy*

TABLE DES CHAPITRES.

- mis à mort. 586
- Cha. XXXV. Enterrement du Vice-Roy, & ordre donné par Gonçalo Pigarre, apres le succez de la Bataille. Il pardonne à Vela Nunez, & fait plusieurs bonnes Loix, pour le Gouvernement du Peru. 591
- Cha. XXXVI. Hardy Stratageme de Diego Centeno, contre François de Carnajal; & autres diuërs enuenemens, iusques à la fin de cét Eschec. 596
- Ch. XXXVII. Aduentures de Lopé de Mendoza; & de quelle sorte de poison se seruoient les Indiens, pour enuenimer leurs fleches, avec le retour du mesme Mendoza dans le Peru. 601
- Ch. XXXVIII. François de Carnajal fait des Prodiges de Valeur, par le moyen desquels il deffait & tuë Lopé de Mendoza, puis il prend sa marche en la Prouince des Charcas. 606.
- Ch. XXXIX. François de Carnajal enuoye la reste de Lopé de Mendoza à Arequepa; & ce qu'une Femme dit là-dessus. Quelques-uns conspirent contre luy. Il les descouure, & la punition qu'il en fait. 611
- Chap. XL. De ce que François de Carnajal dit par escrit, & de vive voix à Gonçalo Pigarre, pour l'induire à se faire Roy du Peru; ce que plusieurs autres luy persuaderent aussi. 615
- Chap. XLI. Considerations de Pigarre, pour le service

TABLE DES CHAPITRES.

*du Roy. Il sort de Quito, pour s'en aller
à Truxillo, & en la Ville des Rois, où luy
est faite vne magnifique Entrée.* 623

Chap. XLII. *L'Autheur décrit icy la façon de viure de
Gonzale Picarra; La Mort de Vela
Nunez; l'Arriuée de François de Carua-
ial en la Ville des Rois, & la Reception
qui luy fut faite.* 628

FIN DE LA TABLE DE CE VOLUME.

101 1475314

